



СЕРВАНТЕС

# ДОН КИХОТ САРГУЗАШТЛАРИ



Тошкент  
Ғафур Ғулом номидаги  
Адабиёт ва санъат нашриёти  
1990

Редколлегия:

Ҳаким Назир  
Анвар Обиджон  
Фарҳод Мусажонов  
Қуддус Муҳаммадий  
Раим Фарҳодий  
Пўлат Мўмин  
Эргаш Раимов  
Худойберди Тўхтабоев  
Носир Фозилов

Рассом В. АПУХТИН

Сўзбоши муаллифи  
**НАВИЖОН БОҶИИ**

**Б. М. ЭНГЕЛЬГАРДТ**  
болалар учун қайта ишлаган

Русчадан *СОТИБОЛДИ ИУЛДОШЕВ* таржимаси

### **Сервантес Сааверда, Мигель де.**

Дон Кихот: Роман/Сўзбоши муаллифи Н. Боқий; Русчадан С. Иўлдошев тарж.— Т.: Адабиёт ва санъат нашр., 1990.— 432 б.—(Жаҳон болалар адабиёти кутубхонаси/Редкол.: Ҳ. Назир ва бошқ.).

Буюк испан ёзувчиси Сервантеснинг 1605 йилда босилган «Дон Кихот» асари жаҳон адабиёти хазинасини бойитган нодир асарлардан бири бўлиб қолди. Сервантес яратган Дон Кихот образи мавжуд ҳаётдан ажралган, асоссиз ҳаёллар гирдобиде ғаройиб саргузаштлар кечирган баландпарвоз, телба шоввоз бир шахс бўлса, унинг яроқбардори Санчо Панса эса ўз хўжасининг марҳамати туфайли бадавлат бўлиб олиш орзусидаги соддамуғамбир кимса образидир. Асар испан халқининг ўтмишдаги ҳаёт лавҳалари, урф-одатлари етук маҳорат билан, турмушдаги лақмалик, нодонлик, фирибгарлик каби иллатлари ўткир ҳажв тили билан тасвирланади.

Сервантес Сааверда, Мигель де. Дон Кихот: Роман.

И(Исп)

47030101000—155

С  $\frac{47030101000-155}{M352-(04)-90}$  Доп.—90

M352-(04)-90

ISBN 5-635-00605-1



уз таълимotingни қарор тоғтиролмайсан, фақат собит эътиқодинг учун jisми жонингни кўйдириб, кул қилишларига рози бўлсанггина ўз таълимotingни қарор тоғтиришинг мумкин». (Себастьян Кастеллио, «Кальвиннинг китобларига раддия...», 1554 йил.)

Асли, бруг дунёга келишнинг ўзи ҳам улуг саодат, табиатнинг инояти, марҳаматидир. Иисон зоти дунёи азимнинг қайси бурчагида ва қачон туғилишидан қати назар, уни доя кампирдан ҳам аввалроқ БАХТ йўрғаклаб олади, БАХТ гўдакни тетапои қилади, авайлаб-асрайди, беғубор бир даврни — болаликни ҳадя этади. Болалик — беғубор давр. Шубҳасизки, Мигель ҳам тупроғи кўпчиб турган кўчаларда югуриб-елган, уст-бошини чанг-тўзонга белаган, тенг-тўшлари билан ёнғоқ талашибми, олма талашибми муштлашган, ёқавайрон бўлган, бурни қонаган ва ҳоказо. Ҳатто сизу бизга ўхшаб ҳар йили биттадан кучук асраб олган бўлиши ҳам мумкин, кучугининг қулогини, думини кесган бўлса-да, ажаб эмас. Балки, суюб-суюб тарбиялаётган кучугини қўшни маҳалла болаларидан бирортаси ўғирлаб кетган чокларда тунларни бедор ўтказгандир, онасининг пинжига кириб олиб, юм-юм йиғлагандир?.. Эҳтимол, отаси унга хўтик совға қилгандир? Тойчоқ ёки кўзи-чоқ олиб берган бўлса не тонг!

Бора-бора бу қадим ҳаёт ҳар қандай асов болани ҳам ўз мақомига солиб йўрғалата бошлайди. Сервантеслар оиласи тирикчилик кўйида Вальядолид шаҳарчасига кўчиб ўтади. Ун яшар Мигель католик роҳиблар тайёрлайдиган эски мактабга жойланади: саводи чиққач, ижтимоий фанлар ўқитиладиган синфга ўтказилади. Чамаси, Мигелни диний мактабда ўқишга берилишига асосий сабаб — у камбағалларнинг болаларига мўлжалланган, харажати камроқ «илм ўчоғи» бўлса керак. Чунки Сервантеслар оиласи очин-тўқин ҳаёт кечирарди, болаларини ўқитиш учун алоҳида маблағ ажрата олмасди. Хуллас, Мигель тўрт йил мобайнида «бошланғич синфлар»да таҳсил кўради.

1561 йили оила Мадридга кўчди. Мигель хусусий мактабларда сабоқ олишни давом эттиради. Чунончи, ўз замонасининг машҳур маърифатпарвар кишиларидан бўлмиш Хуан ЛОПЕС ДЕ Ойос ташкил этган мактабда ўқийди. 1564 йили улар Севилья шаҳрига кўчиб борадилар. Онаси бу ерда табилик билан шуғулланади, дўкон очди. Лекин кўп ўтмай, бозори касод бўлади, инқирозга юз тутади. Шундан кейин улар 1566 йили узил-кесил Мадридга қайтиб кетишади (шу пайтлари Испания қиролининг пойтахти ҳам Мадридга кўчирилган эди). Сервантеслар оиласи ҳеч қачон чорвачилик билан шуғулланмаган бўлса-да, лекин уларни шартли равишда «кўчманчилар» деб аташ мумкин.

Мигель ўсмирлик чоғларида китобдан бош кўтармасди, у кечасию кундузи фақат мутолаа билан машғул бўларди. У ўн тўққиз ёшида ёзган сонет саклини қолган. Сонетнинг шу пайтгача сақланиб қолишига сабаб — унинг ёрқин истеъдод соҳиби қаламига мансублигида эмас, бу сонет ўртамиёна «мадҳия», холос. Сабаби бошқа томонда: бу сонет ўша пайтлардаги Испания қироли Иккинчи Филиппнинг учинчи хотини бўлмиш қиролича Исабеллага бағишланган. Тақдир ҳазилини кўрингки, Сервантес шеър бағишлагандан сўнг, орадан икки йил ўтар-ўтмас, 1568 йили Исабелла тўсатдан вафот этадию 1569 йилда «Испаниянинг шавкатли қироличаси Исабелла хоним касаллигининг ҳақиқий тарихи, оромбахш ўлими ва тантанали дафн маросими» номили анъанавий мажмуа чоп этилади. Бу тўпلامга барча мадҳия шеърлар қаторида Сервантеснинг «Кастилиялик хоним-ойим» сонети ҳам киритилган эди. Равшанки, мадҳия ёзиш учун истеъдод соҳиби бўлиш шарт эмас. Албатта, биз Сервантесни маддохликда айбламочки эмасмиз. Сўзсиз, у ватанпарвар бўлган, ватанпарварлик туфайли ўз мамлакатининг қироличасига сонет бағишлаган. Бундан ташқари, Исабелла ёшгина жувон эди, Сервантесга деярли тенгдош эди. Вoz устига, Исабелла Испания тахтининг ягона меросхўри эди; Иккинчи Филипп тахтининг қонуний вориси бўлиш учун ўзининг жиғинига — Исабеллага уйланади, ammo бу никоҳни Рим папаси қонунсиз деб топади. Охир-оқибатда Исабелла тўсатдан вафот этадию Сервантеснинг тасодифан ёзган сонети Испания тарихи саҳифасидан жой олади. Дарвоқе, «Исабелланинг... ҳақиқий тарихи» босилиб чиққан пайтда Мигель Сервантес Испания сарҳадларини тарк этган эди: у 1569 йили Италияга жўнаб кетади ва то 1575 йилга қадар хориждаги Испания армияси сафида хизмат қилади.

Сервантес нима учун Испанияни тарк этди? Мутахассисларнинг фикрича, у оиласини муҳтожликдан қутқариш аҳд қилди. Уша пайтларда Испания қироллиги билан Венеция жумҳурияти ўзаро иттифоқ тузиб, туркларни Урта Ер денги-

зи ҳавасидан суриб чиқаришга тайёргарлик кўрарди — бўлажак жангу-жадалларга аскарлар ёлланарди. Маълумки, ёлланма аскарлар асосан босиб олинган юртларни талон-тарож қиларди, қўлига илинган буюмни қопчигига тиқарди. Бу ҳақда Учтинчи Филипп саройида Венеция элчиси бўлиб турган Франческо Соранцо (1597-1602) ўз ҳукуматига қуйидагиларни маълум қилган эди: «Бутун дунёни зир титратган испан қўшинида қадимий жанговар интизом путурдан кетаётгани кўзга ташланипти. Ҳарбий бурчга калондимоғлик билан қарайдиган испан аскарларининг фикрига кўра, ғалаба ўз ҳолича бир пулга қиммат. Улар бениҳоя тубанлашиб кетганлар, гурур нима эканини аллақачон эсларидан чиқариб юборишган... Босиб олинган Италия ерларида гала-гала аскарларнинг оёғи етган жойлар хонавайрон бўлмоқда. Чунки аскарлар талаб кетишяпти, хароб қилишяпти, ўмаришяпти, ташиб кетишяпти, камбағалларнинг мулки барбод этиляпти: улар бу ўлкаларга жулдурвоқи аҳволда, оч-наҳор кириб келишадилар уст-бошларини бутлаб, сўқимга боқилган ҳўкизда семирчишиб чиқиб кетадилар» (К.И.Державин, «Сервантес», М. 1958 й. 22-бет). Кўриниб турибдики, босқинчилик эзилган халқларга доим кулфат келтирган, холос. Яна бир нарсага аҳамият бериш лозимки, ўша пайтлари Венеция жумҳурияти Испания билан иттифоқдош эди. Бу гапларни Мигель де Сервантесга — бўлажак ёзувчига нечоғлик алоқаси бор, деган савол туғилади. Алоқаси шундан иборатки, Сервантес ҳам юқорида «таърифланган» кўшиннинг битта вакили эди. Зеро, «инсон бир жамиятда яшаб туриб, шу жамият заминидан узилиб кетолмайди» (В. И. Ленин). Албатта, Сервантес виждонан азобланган бўлиши мумкин, у «камбағалнинг ўғрилардан қолган молига» (А.Орипов ибораси) кўз олайтирмаган бўлиши мумкин. Лекин унинг ватандошлари, сафдошлари ҳар қандай тубанликдан ҳам жирканмагани-да ҳақиқатдир. Ҳали халққаро ахлоқ қоидалари тўла-тўқис шаклланмаган даврдаги «тарихий манзаралар» шундай эди: турклар, араблар Оврўпони истило қиларди, оврўполиклар эса «ғайридинлар»нинг (яъни, мусулмонларнинг) додини бериб, юртларини талаб қайтардилар; дунёнинг икки жавҳари — Шарқу Ғарб бир-бирининг кўзига чўп тикишу қон тўкиш билан овора эди. Бу кўҳна тарих, афсуски, фақат «синфий курашлар тарихидан»гина иборат эмас. Тўғри, эътиқодлар кураши ҳам асрлар давомида инсоният умрини эгавлаган, емирган. Аммо тарихнинг энг қонли саҳифаларини манфаатлар кураши ташкил этади. Манфаатпараст гуруҳлар халқларни бир-бирига қарши гиж-гижлайди, уруш оловини ёқадилар ва ўзлари ўша олов шуъласида тобланиб ётадилар, кабобхўрлик қиладилар, бўзахўрлик қиладилар, фаҳшга муккасидан кетадилар. Ажабни, «айнан шафқатсиз йўсинда исқирт дунё қарашини бировларнинг онгига сингдирмоқчи бўладиган кишилар жиззаки бўладилар, уларнинг сиркаси сув кўтармайди» (Стефан Цвейг).

Қисқаси, Сервантеснинг хорижий мамлакатлардаги ҳаёти қалтис тарихий шароитга тўғри келади. Шу ўринда ёзувчининг таржимаи ҳолига муурожаат қиладиган, адабиётшуносларнинг назаридан четда қолмайдиган битта мунозарали «оқ доғ» хусусида индамай ўтсак инсофдан бўлмас.

Машҳур сервантешунос олим Р.М.Менендес «Дон Кихот» романининг яратилиш тарихига бағишланган мақолаларининг бирида шундай ёзади: «...дон Педро Торрельес билан дон Херонимо де Алса ўртасида 1522 йили Вальядолид шаҳарчасида содир бўлган машҳур дуэль ҳақиқатан ҳам Испаниядаги энг сўнгги дуэль бўлди». («Сервантес и всемирная литература», М., — «Наука» нашриети, 1969 й., 259-бет.) Аслида, олим роман яратилган пайтлари «рицарлик даври» ўтмиш мулкига айланиб қолган эди, демоқчи. Бу фикрга қўшилиш мумкин: дарҳақиқат «салб юришлар» у «Олга!» дейилса — бас, дарров отиша миниб, жангга кириб кетерадиган тентакнома аскарлар даври аллақачон ўтиб кетган эди. Лекин ондасоңда бўлса-да, «рицарлик дарди»га мубтало бўлган аскарлар овсарлар учраб турарди. Жумладан, шоввоз рицарлар ўйлаб топган яккама-якка олишув (дуэль) ҳам пинҳоний равишда рўй бераверарди. Масалан, Мадрид полиция ҳукумати томонидан 1569 йил 15 сентябрь кунини эълон қилган буйруққа биноан Алонса де Сигура номли кимсани яккама-якка олишувда ўлдирган Мигель де Сервантеснинг ўнг қўли чоғиб ташланиши ва 10 йил муддатга озодликдан маҳрум этилиши даркор эди. Балки, ушбу факт Р.М.Менендес ҳаётлик чоғида номаълум бўлгандир?.. Билмадик. Аммо, «факт қайсар бўлади» — ҳақиқатдан кўз юмиб бўлмайди. Ҳақиқат шундан иборатки, Мигель де Сервантес Сааведра хорижга жўнаб кетиши арафасида Мадридда мудҳиш ҳодиса рўй берган. Хўш, полиция ҳўжжатида қайд

этилган «Мигель де Сервантес» ким эди?.. Ҳозирча бу саволга аниқ жавоб топилгани йўқ. Фақат ана шу воқеа содир бўлгандан кейин Сервантеснинг хорижга кетиши кишида шубҳа уйғотади, холос. Тахминларга кўра, «ўнг қўли чопилиши лозим» бўлган жиноятчи бўлажак ёзувчининг «отдоши» бўлиши мумкин, унинг чет элга жўнаб кетиш вақти ҳам мутлақо тасодифан ўша кўнгилсиз воқеа содир бўлган паллага мос келиб қолган. Эҳтимол, шундайдир. Бу ҳақда ёзувчининг архивида ҳам ҳеч қандай маълумот йўқ. Демак, «Сервантес қўрққанидан чет элга қочиб кетган экан», деган шубҳа ўринсиз, албатта.

Испания қироли Иккинчи Филиппга кўнлаб садоқатли аскарлар керак эди. Чунки Урта Ер денгизини осийеликлар ихтиёрига топшириб бўлмасди: Урта Ер денгизи Ваҳри Муҳитга чиқаладиган ягона сув йўли ҳисобланарди, Ваҳри Муҳит эса ҳаёт-мамот масаласи эди.

1570 йили турк эскадраси Урта Ер денгизидagi Кипр оролининг муҳим маъмурий марказларидан бири бўлмиш Никозия шаҳрини босиб олади; 1571 йил 1 август кuni эса Кипрнинг пойтахти, асосий бандаргоҳи Фамагуст шаҳри турк қўшинига таслим бўлади. Зудлик билан туркларга қарши иттифоқ тузилади: Рим папаси, Иккинчи Филипп, Венеция ҳукумати «бир ёкадан бош чиқаради». Бешинчи Карлнинг ўғай ўғли дон Хуан Австрийский бирлашган қуроли кучларнинг «Муқаддас иттифоқ» ҳарбий-денгиз флотига қўмондон этиб тайинланади. «Муқаддас иттифоқ» таркибида 280 га яқин жанговар кема ҳамда италян, испан ва бошқа миллат вакилларига мансуб йигирма тўрт минг аскар бор эди. Сервантес ўз ротаи билан кўп эшакли кемада («Маркиза») жангга қиради. 7 октябрь тонгида Коринф кўрфазига қираверишда рақиблар флоти юзма-юз келиб қоладию қонли жанг бошланади: турк денгизчиларига Али пошшо (генерал) қўмондонлик қилади. Ҳар икки томон ҳам жуда катта талофот кўради. Лекин турклар мадад кўчларидан узилиб қолганликлари туфайли... мағлубиятга учрашга муваффақ бўладилар. Шу жангда Сервантес икки марта яраланади, чап елкасига ўк тегади — унинг жароҳати оғир эди, нагжада чап қўли фалаж бўлиб қолади: умр бўйи чап қўли ишламайди. Кейин у 1572 йилнинг охиригача ҳарбий касалхонада даволанади, ҳарбий қисмларнинг таъминот бўлимларида хизмат қилади. Ниҳоят, 1575 йили ҳарбий хизматдан истеъфога чиқиб, ватанига қайтишга аҳд қилади. 20 сентябрь кuni «Қуёш» номли кўп эшакли кемасида Неапол соҳилларидан ўз юртига жўнади. Кема французлар тасарруфидagi қирғоқлар бўйлаб Барселона томон йўл олади. Афеуски, Марселга яқинлашган пайтлари — Учқизи Мария бурунида уларни жазоирлик Доли Мами бошчилигидagi денгиз қароқчилари тутиб оладилар ва барча тутқунлар Жазоирга жўнатилади. Сервантес беш йил мобайнида асирликда, жудодикда оч-наҳор, юпун ҳаёт кечиришга маҳкум этилади. 1580 йил 19 сентябрь кuni, қароқчиларнинг шартига мувофиқ, беш юз пошшойи танга эвазига Сервантес озодликка чиқади.

1584 йилда ўттиз етти яшар Мигель де Сервантес ўн тўққиз яшар Каталина исмли қизга уйланади. 1585 йили Сервантеснинг кекса отаси вафот этади. Катта оила ташвишлари энди Мигелнинг зиммасига тушади. Шунинг учун у мўмайроқ пул топиш илинжида Севильяга боради. Келаси йили эса Сервантес бу шаҳарда узоқ муддат яшашга қарор қилади ва хотинини қайнотасига топшириб (қўйди-чиқди бўлмайдилар, фақат бошқа-бошқа жойда яшайдилар, холос), бир ўзи Андалусиянинг пойтахтига — Севильяга кўчиб кетади. Опа-сингиллари Мадридда қолади. Сервантес у ерда ўн беш йил яшайди.

XVI аср охириларидаги Севилья ҳақида Сервантеснинг замондошларидан бири қуйидаги маълумотларни ёзиб қолдирган:

«Бу ердаги маъмурий бошқармада ҳеч қанақа тартиб-интизом йўқ, ҳақиқат анқонинг уруғи, худодан қўрқинмайди, ҳалол кишиларни кундузи чироқ ёқиб ҳам топиб бўлмайди, пора бермаган одам икки дунёда ҳам ўз ҳуқуқларини ҳимоя қилолмайди, солиқдан тушган маблағнинг ёки бир йиллик даромадининг ўндан бир қисми тегишли амалдорга узатилмаса, ўз ер-мулкинга ҳам хўжайинлик қилолмайсан: ҳеч ким ўз бурчини рисоладагидай бажармайди, ҳеч ким ўзи бажариши лозим бўлган иш билан шуғулланмайди: ҳамма «ўлик мол»га ўхшайди — ё сотилади, ёки сотиб олинади... Тижорат аҳли ўғрилари чайқовчилардан иборат... Ҳар ким ўз улушини юлиб олишга тиришади. Камбағаллар қашшоқлик комида димикиб ётишибди, очкўз бойлар эса ҳирси-нафсини қондиролмай халак» (Мигель де Сервантес, «Ибрatли қиссалар», М., «Художественная литература» нашриёти, 1982 й., 8-бет).

Сервантес ана шундай чиркин муҳитда беш йил умргузаронлик қилади: тиркичиликнинг турфа хил кўчаларига кириб-чиқади — галла йиғувчи, бокиманда кишилардан солиқ тўпловчи бўлиб хизмат қилади. 1597 йили тухматга учраб қамалади. Кейин қамқондан озод қилинади. Кейин яна қамалади. Хуллас, уч марта ҳибсга олинади ва дўслари уни уч марта қутқариб олади.

Улуғ рус танқидчиси В. Г. Белинский: «Жамият даҳо фарзандига асрлар бўйи ҳомиладор бўлиб юради», деган эди. Шубҳасиз, Мигель де Сервантес испан халқининг даҳо фарзанди. Чунки у бутун ижоди мисолида, айниқса, «Ламанчлик дон Кихот» романи тимсолида испан тилининг камолини, бойлигини кўрсатди, бу тилда ўлмас бадиий асарлар яратиш мумкин эканини исботлаб берди. Маълумки, Уйғониб даврида Оврўпода миллий тилларнинг адабий тил сифатидаги ҳуқуқини қарор топтириш учун кураш бошланади. Бу курашга машҳур италян шоири А. Дантенинг «Халқ нутқи ҳақида» номли рисоласи туртки бериб юборади: у миллатдош ёзувчиларни италян тилида бадиий асарлар яратишга чақиради. 1536 йили Ферман де Оливейр илк бора «Португал тили грамматикаси» ни нашр эттиради, 1549 йилда эса дю Белле «Француз тилини ҳимоя қиламан ва шарафлайман» номли илмий асар ёзади, француз тили адабий тил бўлиши учун барча фазилатларга эга эканини исботлаб беради. Ўз-ўзидан равшанки, муайян тилнинг тўла-тўқис шаклланишини кўрсатиш учун ёки унинг шаклланиш жараёнини тезлаштириш учун фақат илмий асарларгина кифоя қилмайди. Бунинг учун рад этиб бўлмайдиган «ашёвий далил» керак. Чунончи, муайян миллий тилда тўлақонли бадиий асар яратилиши лозим. Худди шу маънода Сервантеснинг хизматлари беқиёсдир: Испания иқтисодий жиҳатдан инқирозга юз тутган бўлса-да, лекин испан тили навқирон эканини бу тилнинг, бу тилда яратиладиган дурдона асарларнинг умри боқий эканини бутун жаҳонга намоён этди. Бу ҳақда Сервантес ўзининг «Ибратли қиссалар»ига ёзган «сўзбоши»сида шундай дейди: «...бундан ташқари, менимча (аслида, ҳақиқатдан ҳам бор гап — шу, кас-тилья тилида) (испан тилининг эскича номи; худди ўзбек тили ҳам ўтган асрнинг охириларигача «турк тили» ёки «чигатоий тил» деб юритилган каби — изоҳ бизники: Н.В.) биринчи бўлиб қиссалар ёза бошлаган зоти мукаррам камина бўладилар; негаки, шу пайтгача бизда нашр этиладиган сонсаноксиз қиссалар хорижий тиллардан таржима қилинарди. Менинг қиссаларим эса ўзимнинг хусусий мулкимдир; асарларим ёзилиши жараёнида ҳеч кимга тақлид қилмаганман, бировдан қарзим ҳам йўқ: улар менинг қалбимда туғилган, уларни менинг қаламим дунёга келтирган. Энди улар нашриёт дастгоҳлари кучоғида ўсиб-ўлғайиши, ўзларидан ўзлари кўпайиши лозим».

Дунёда машҳур ёзувчилар жуда кўп, лекин ҳар қандай машҳур ёзувчининг битта-ю битта машҳур асари — китоби бўлади. Одатда, адабиётчилар бундай асарни «умр китоби» дейдилар. Биров «умр китоби»ни ёшлик чоғида ёзади, яна биров эса ўрта ёшлик пайтида умрбоқий асар яратади. Масалан, атоқли немис ёзувчиси Томас Манн «умр китоби» бўлмиш «Будденброклар» романини йигирма тўрт ёшида ёзган. Камдан-кам қолларда эса ёзувчи кексалик пайтида «умр китоби»га нуқта қўяди. Мигель де Сервантес шу маънода камёб ёзувчилар сирасига қиради: у умрининг сўнги палласини «Дон Кихот» романига бағишлаган эди; романнинг биринчи қисми 1605 йили нашр этилади, иккинчи қисми 1615 йилда босмадан чиқади, орадан бир йил ўтгач, ёзувчи вафот этади.

«Дон Кихот» романи яратилганига чоракам тўрт юз йил бўлди. Агар шу пайтгача бу романи мутолаа қилган ва бу романдан завқланган китобхонларни бошма-бош ҳисоблаб чиқишнинг имкони бўлса борми, уларнинг сони ҳозир бутун Ер юзида мавжуд бўлган аҳоли миқдоридан ҳам ошиб кетган бўларди. Ишонмайсизми? Мана бўлмасам, қуйидаги рақамларни ўзингиз ҳисоб-китоб қилиб кўринг: XVIII асрда Англияда «Дон Кихот» тўрт марта испан тилида ва йигирма тўрт марта инглиз тилида қайта-қайта нашр этилган. Рус ўқувчилари 1769 йилдаёқ «Дон Кихот» романидан баҳраманд бўлганлар. Бундан ташқари, романдан оврўполик турли диний оқимлар, сиёсий йўналишдаги гуруҳлар «қалқон» сифатида ўз гоёларини халқ онига сингдирадиган восита, гоёвий қурол тариқасида фойдаланганлар, яъни «Дон Кихот»дан кўчирмалар келтиришиб, ўзлари илгари сураётган «программа»ларнинг тўғри эканини исботлашга уринганлар, Сервантеснинг халқ орасидаги обрў-этиборидан усталик билан фойдаланганлар. Шу тарзда «Дон Кихот» романи аҳолининг ҳар хил табақалари ўртасида тарғиб қилинган. Қизиги шундаки, баъзан машҳур ёзувчилар ҳам ўзларининг ижодий принципларини «Дон

Кихот» га суянган ҳолда ҳимоя қилганлар. Жумладан, аслида «Том Сойернинг саргузаштлари», «Гекльберри Финнинг саргузаштлари» каби романтик руҳдаги асарлар муаллифи бўлса-да, бироқ Америка адабиётида мавжуд бўлган романтик оқимга қарши кескин курашлар олиб борган ва реализмнинг қарор топишини жон-дилидан истаган ғаройиб ёзувчи Марк Твен Сервантес тасвирлаган ҳаққониятни Вальтер Скотт, Фенимор Купер каби романтик ёзувчилар «тўқиб чиқарган уйдирмалар»га қарама-қарши қўяди: «Ажаб ҳол» битта китобнинг ўқувчига яхши ёки ёмон таъсир этиши мумкинлиги «Дон Кихот» ва «Айвенго» мисолида яққол кўринади. Биринчиси Ўрта асрлардан қолган рицарлик сафсаталарни ер юзидан суғуриб ташлади, иккинчиси эса ўла танта-навор сафсаталарни яна қайта тирилтирди. Бизнинг Жанубий вилоятларимиз хусусида айгиш мумкинки, Вальтер Скоттнинг фалокат асарлари шу қадар силани қуритганки, Сервантеснинг баракали таъсири бу ерда фақат ўлик ҳарфларни англагани, холос» (Марк Твен. Танланган асарлар, 4-жилд, 541-бет, М., 1960 й.).

Француз адабиётининг атоқли намоёниси Проспер Мериме ҳам дафъатан «Дон Кихот» романини баҳолашга истиҳола қилган эди. У 1869 йил 3 сентябрь кунини (умрининг охирларида) И.С.Тургеневга ёзган мактубида айнан шу масалада маслаҳат сўрайди: «Бу китобнинг зўр муваффақиятини бир четга қўйиб турайлик, лекин унинг аҳамияти ҳақида сира бош қотириб кўрганмисиз? Асар услуби ҳар қандай таърифдан юқори туради, лекин уни муносиб баҳолаш учун испан тилини билиш зарур. Бу китобда уйдирма унчалик кўп эмас. Аслини олганда, бу дунёда савдойининг ўй-хаёлларию ишидан ҳам ғамгинроқ ҳеч нарса бўлмас керак. Шўрлик савдойини эрмак қиладиган одамлар — герцог, герцогиня, Альтисидора — хуллас, уларнинг барчаси кўрқинчли жамоатдир. Хўш, нима учун мана шуларнинг ҳаммаси менга манзур бўлади? Шундай саволга бир неча кундан буён жавоб изляяпман-у, лекин тополмаяпман. Мен шу ҳақда сиз билан маслаҳатлашиб олишни жуда-жуда истайман».

Одатда, Дон Кихот — соғ эмас, у тентак, Санчо Панча эса ўша тентакнинг жўраси, дейдилар. Бир қарашда, бундай гапларда жон бордай туюлади. Чунки роман қахрамонларининг хатти-ҳаракатлари ҳар қандай соғ одамнинг ақлини шошириб қўяди. Шунинг учун ақли расо кишилар: «Ҳа энди, тентакларга бас келиб бўлармиди!» дейишиб, тескари бурилиб кетишлари турган гап. Аслида, Сервантес жўрттага қахрамонининг манглайига «тентаклик» нишонини ёпиштириб қўйган, холос. Ёзувчи шундай қилмаса бўлмасди, романини икки дунёда ҳам нашр этишмасди: қайтанда, ҳукумат одамлари шартта муаллифнинг ёқасидан олишардию: «Бизга ўшанақа одамни топиб берасан!» дейишиб, салкам олтмиш босма тобоқ ҳажмли романнинг ҳар саҳифасига биттадан, жами ўн тўрт миң тўрт юзта (14400) «изоҳ» сўрашарди. Натижада Сервантес терговдан бўшамай қоларди. Сервантес эса ҳақамлар билан савол-жавоб қилавериш устаси фаранг бўлиб кетган эди, у томдан ташлаб юборилса ҳам ерга оёғи билан тушишни ўрганиб олган эди: маъмурларнинг тазйиқ-таъқибларига осонликча чап бериб кетиш мақсадида «Дон Кихот»да рўй берадиган барча воқеаларни атайлаб рицарлик романларидан кўчириб олинаётгандай ёлгондакам таассурот уйғотади ва калтабин маъмурларни доғда қолдиради. Афсуски, у бирваракайига ҳам бўлғуси адабиёт мутахассисларини, ҳам ўқувчиларини озиктириб кегажагини асло хаёлида келтирмаган эди. Мана, энди «Дон Кихот»ни мутолаа қилган китобхон қаерда, қачон алданиб қолганини ўзиям сезмайди. Бизнингча, «Дон Кихот» романи эрмакталаб, қўнғилхушлик учун китоб ўқийдиган талабаларга мўлжалланмаган, уни зийрак йигит-қизлару қилни қирқ ёрадиган китобхонлар мутолаа қилгани маъқул. Фақат ўшаларгина бу китобнинг асл қудратини ҳис эта оладилар, фақат ўшаларгина бу роман инсон ҳаётининг шайдолик мавсумига бағишланганини илғаб оладилар, идрок этадилар.

Дон Кихот — азов-укубатлар оша ҳормай-толмай эзгуликка интилаётган инсон тимсолидир, у Шайдолик Мавсумининг тирик ёдгорлигидир.

Сиз ҳам, қадрили ўқувчи, кўз кўриб, қулоқ эшитмаган ғаройиботлар оламига саёҳат арафасида турибсиз.

Сафарингиз бехатар ўтсин!



# ДОН КИХОТ САРГУЗАШТЛАРИ



## ЛАМАНЧЛИК ДОН КИХОТНИНГ КИМЛИГИ

Ламанч вилоятига қарашли жўнгина қишлоқчада дон Кехана деган идальго<sup>1</sup> яшарди. Бошқа дворянлар сингари у ҳам таг-тугли насаби билан фахрланар, алмисоқдан қолган қалқон билан аждодларидан мерос бўлиб келаётган найзани муқаддас қилиб асрарди, ҳовлисида қирчанғи оти ва този ити бор эди. Топган даромадининг тўртдан уч қисми кечки овқатга — сабзавотдан тайёрланадиган гўштли шўрва билан ви-негретга кетарди. Ҳар жума ёсмиқ ёвғонига қаноат қилиб кун кечирса, аммо якшанба кунлари қовурилган кабуфис гўшти еб маза қиларди. Дон Кехана байрам кунлари нафис мовутдан тикилган чакмон, духоба шим, саҳтиён туфли кийса, бошқа кунларда хонаки дағал мовутдан тикилган костюмда юрарди. Унинг уйида ёши қирқлардан ошган экономка, ҳали йигирмага ҳам кирмаган қиз жияни ҳамда қариб мункиллаб қолган бир хизматкор яшарди. Идальгонинг ўзи эллик ёшларга бориб қолган, жуда озғин, эти суягига ёпишиб кетган скелет нусха бир зот эди. Шу қашшоқлигига қарамай, жони қаттиқ, чидам-бардоши зўр одам эди.

Дон Кехана бўш вақтини, дарвоқе, кеча-кундуз бўш эди, рицарлар тавсиф қилинган китобларни ўқиб ўтказарди. Шу машғулотга тамом берилиб кетиб, у овни, хўжалик ишларини йиғиштириб қўйди. Унинг мутолаага ишқибозлиги шу даражага бориб етдики, рицарлар ҳақидаги китобларни олишга ернинг каттагина қисмини ўйламай-нетмай сотиб юборди.

«Хуқуқ — нафсониятимга нисбатан сиз қўллаган адолат-сизлик мендаги одил ҳақиқатни шунчалик поймол қиладир-ким, бинобарин, мен сизнинг ноҳақлигингизга ҳақли равишда эътироз билдираман...» ёки «...порлоқ юлдузлари билан зоти илоҳийлигингизни камоли муқаррар этгувчи ва сизнинг муносиб улуғворлигингизга борки иззат-икромларни раво кўргувчи етти қават осмони гумбаз...» сингари романларда кўп учрайдиган баландпарвоз севги мактублари ва яккама-якка олишувга тантанавор даъватлар бизнинг идальгога жуда ёқарди. Бечора кабальеро бундай ибораларнинг маъносини билиб олишга ти-

ришиб тунларни бедор ўтказар, пайдар-пай фикрлардан боши гангиб, кўз ўнгини туман босарди. Устига-устак севиб ўқийдиган романларида учрайверадиган ғалати, ғайритабиий ҳоллар ҳам бечорани довдиратиб қўярди. Чунончи, машҳур рицарь Бельяниснинг ўзгаларга даҳшатли зарбалар бериб, ўзи бениҳоя қаттиқ шикастланганлигига идальгонинг ақли шошарди, негаки, бу рицарни даволаган табибларнинг маҳорат ва кароматлари бўлганда ҳам, барибир, унинг юзи ва танаси чандиқ ҳамда даҳшатли ямоқлар билан қопланиб кетиши керак эди. Ваҳоланки, романда Бельянис ҳар доим бежирим, навқирон, қиличдек йигит тимсолида намоён бўларди.

Дарвоқе, шундай бўлса ҳам Дон Кехана романлардаги шавкатли қаҳрамонлар кечирган ажойиб-ғаройиб саргузаштлар ва улар кўрсатган жасоратларга маҳлиё бўлиб ўзини тамомила унутарди. Роман қаҳрамонларининг тақдири уни эргаштириб кетарди, борди-ю муаллиф китобнинг сўнги саҳифасида бу туганмас воқеани келгуси китобда давом эттирмоқчи эканини айтса, унинг севинчи ичига сиғмасди. Кўпинча бизнинг кабалъеро ботирликда англиялик Пальмерин ёки галлиялик Амадис<sup>2</sup> зўрми деган масала устида руҳоний дўсти билан узоқ-узоқ баҳслашиб қоларди. Дон Кехана Амадис зўр деса, руҳоний Пальмерин<sup>3</sup> дерди; шу ерлик сартарош — уста Николас эса Амадис билан Пальмериннинг икковидан бирортаси ҳам рицарь Фебанинг олдида ип эшолмайди дерди. Николаснинг фикрича, Феба тантиқ Амадисдан ўзининг матонати билан устун эди.

Олижаноб идальго аста-секин ўқишга шундай берилиб кетдики, тонгдан оқшомгача, оқшомдан тонггача китобдан бош кўтармайдиган бўлиб қолди. У ҳамма ишини йиғиштириб қўйди, деярли ухлამасди, кўпинча овқат ейишни ҳам унутиб қўярди. Унинг бошида рицарь китобларидан ўқиган турли бемаъни қиссалар ғужғон ўйнарди, ҳатто ўнгида ҳам қонли жанглари, рицарларнинг яккама-якка олишувлари, ошиқ-маъшуқларнинг учрашувлари, ўғирлаб кетишлар, ёвуз жодугарлар ва олижаноб сеҳргарларни тасаввур қилиб алаҳларди. У бора-бора ростни ёлғондан мутлақо фарқ қилолмай қолди, унинг назарида дунёда шу қиссаларда тасвирланган воқеалардан ўзга ҳақиқат йўқдай бўлиб қолди. У турли романларнинг қаҳрамонлари ҳақида шундай жўшқин гаплар айтардики, гўё бу қаҳрамонлар унинг энг яқин дўстлари ва танишлари эди.

У Сайд Руи Диаснинг<sup>4</sup> олижаноб, шавкатли рицарлигига тан берарди-ю, лекин унинг бир уришда икки девни ним-талаган Зулфиқор деган рицарга етишига йўл бўлсин деб иловани қиларди. У Ронсеваль дарасида енгилмас Роланддан<sup>5</sup> голиб келган Бернард де Карпиони анча юксак қўярди. У ўзининг илтифотлилиги ва хушмуомалалиги билан бошқа паҳлавонлардан мутлақо ажралиб турувчи Морганте полвон ҳақида ҳам жуда яхши фикрда эди. Лекин Муҳаммаднинг олтин санамини ўғирлашда донг таратган ва сон-саноксиз йўл саргузашт-

ларини бошдан кечирган қахрамон монтальбаниялик Рейнальдони ҳаммадан кўп мактарди.

Бечора идальго тўрт девор ичидан чиқмай, тунлари ухламай нуқул китоб ўқийвериб ахири бутунлай ақлдан озди. Ана шунда жаҳонда ҳеч қайси телба-тентакнинг бошига келмаган ҳаёл бизнинг кабалъеро миясини чулғаб олди—у жаҳонгашта рицарлар сафига киришни ҳам фарз, ҳам қарз деб билди. У, дон Кехана, ўз шони шуҳратини орттириш учун она юрти манфаатини кўзлаб қуролланмоғи, отга миниб можаролар кетидан эл-юрт кезмоғи, аламзада хўрланганлар таърафини олиб, ёмонларнинг таъзирини бермоғи, поймол бўлган адолат, ҳаққониятни тикламоғи лозим. Қалбида кўрсатилажак жасорат ва қахрамонликлар орзуси жўш урган идальго ўз аҳди устидан чиқишга шошилди. У аввало ота-боболаридан қолган чордоқнинг бир четида кўп йиллар занглаб, чанг босиб ётган яроғ-аслаҳаларни топди, тозалади; уларни кўздан кечираркан, дубулғанинг қуббадор тепасигина қолганини кўриб ниҳоятда дили сиёҳ бўлди. Кам-кўстини тузатиш учун бор каш-фиётчилик истеъдодини ишга солди. Картондан сипар билан қулоқчин ясаб, дубулғасига ёпиштирди. Оқибатда ростакамга ўхшаган дубулға ясашга муваффақ бўлди. Энди дубулғасининг жангда бардош бера олиш-олмаслигини синаб кўргиси келиб қолди. Қиличини суғуриб, ҳавода ўйнатди-да, дубулғага икки марта туширди. Биринчи зарбадаёқ дубулға бўлак-бўлак бўлиб, қилган меҳнати чиппака чиқди. Идальгонинг фиғони ошди. У яна ишга киришиб кетди, лекин бу гал, дубулға пишиқ бўлсин деб, картоннинг тагидан тунука қўйди. Бу эҳтиёткорлигидан кўнгли таскин топди, дубулғасини иккинчи марта синаб кўришини ортиқча деб билди. Энди сипари усталик билан ясалган ҳаққиқий дубулғаси борлигидан кўнгли таскин топди.

Шундай кейин дон Кехана отхонага кириб, отини диққат билан кўздан кечирди. Бу от қариб қовурғалари саналиб қолган касалманд бир қирчанғи бўлиб, ростини айтганда сув ташишгагина ярарди, холос. Бироқ кабалъеромиз отнинг кўринишидан мамнун бўлиб, менинг отимга на ҳазрати Искандарнинг<sup>6</sup> Буцефали, на Сайднинг учқур Бабьеки<sup>7</sup> тенглаша олади, деган қарорга келди. Жангар отига жарангдор ва чиройли ном топмоқчи бўлди, зероки овлоқ бир қишлоқда яшовчи хўжайини ўзининг фақирона турмушини жаҳонгашта рицарнинг қайноқ фаолияти билан алмаштирар экан, унда оти ҳам ўзининг қишлоқча лақабини янги, шуҳратли ва дабдабали ном билан алмаштириши керак-да, деб ўйларди у. Ана шундай муносиб номни топишига тўрт кун кетди. Турли номларни ўйлаб чиқара-вериб, уларни таққослаб, муҳокама қилиб, чамалаб кўравериб, роса боши қотди. Ниҳоят Росинант деган ном маъқул бўлди. Бу ном унга жарангдор ва баландпарвоз ном бўлиб туюлди. Бундан ташқари, ана шу ном отнинг аввал қандай аҳволда эканлигини ҳам англатарди. Чунки дон Кехана бу номни роцин

(қирчанғи) ва antes (собик) деган икки сўздан ясаган бўлиб «собик қирчанғи» маъносини англатарди.

У отимга яхши лақаб топганимдан кейин, энди ўзимга ҳам лойиқ ном топишим керак, деган қарорга келди. Ўзига муносиб бундай номни ўйлавериб бир ҳафтани ўтказиб юборди, ниҳоят ҳаёлига ажойиб фикр келди: у ўзининг оддийгина Кехана номини хийлагина жарангдорроқ исм билан, яъни дон Кихот деб ўзгартиб қўя қолди. Лекин шу пайтда унинг ёдига бир нарса тушиб қолди: довррак Амадис номим билан бирга ватанимнинг номи ҳам доврұғ солсин деб, ҳамиша ўзини шунчаки Амадис эмас, балки галлиялик Амадис деб атаган. Дон Кихот ҳам ана шу ботир рицардан ўрнак олиб, бундан буён ўзини ламанчлик дон Кихот деб аташга қарор қилди. Энди ишлар жойида: унинг ким ва қаерлик эканини ҳамма дарҳол пайқаб ололади, энди унинг кўрсатган жасоратларидан она-Ватанининг шухрати ортади.

Ниҳоят, яроғ-аслаҳаси тозаланиб, дубулғаси билан сипари тузатилгач, қирчанғисига янги лақаб топиб, ўзи ҳам номини ўзгартиргач, энди ўзига маъшуқа излаб топишдан бошқа иши қолмади, зероки, ҳар қандай жаҳонгашта рицарь ҳам кўнглини банд этган маъшуқаси бўлмаса, у баргсиз ва мевасиз сўқир бир дарахтдай гап. Дон Кихот ўзига ўзи шундай деди: «Вашарти тақдир тақозоси билан бирор девга рўпара келиб қолгудек бўлсам (жаҳонгашта рицарлар эса бундай ҳолларга кўп учрайдилар), дастлабки олишувдаёқ уни кўтариб ерга уриб, шафқат тилашга мажбур этсам, унда рицарлар қонунига кўра, мен уни маъшуқамнинг ҳузурига юборишим керак. Шунда у қалбим хоқони, нозанин маликанинг олдига киради-да, оёғига бош уриб, итоаткорона гап бошлайди: «Мен Малиндрания оролининг подшоҳи, Каракульямбро деган дев бўламан. Баҳодир рицарь ламанчлик дон Кихот мени жангда енгди. У сизнинг ҳузурингизга келиб меҳр-шафқат сўрашимни буюрди, менинг тақдирим сиз жаноб олияларининг хоҳишларига боғлиқ экан...» «О,— деб хитоб қилди идалъго.— Албатта ўз маъшуқамга эга бўлишим керак: ёлғиз унинг ўзигина рицарнинг мардлигини муносиб қадрлайди. Шундайку-я, лекин маъшуқани қаердан топсам экан?» Дон Кихот шундай деди-ю хомуш ҳаёлга чўмди. Ногаҳон миясига ажойиб бир фикр келди. Қўшни қишлоқда яшайдиган Альдонса Лоренсо деган кўҳликкина деҳқон қизи эсига тушди. Рицаримиз маъшуқаликка шу қизни танлади. Уша қизга унинг асл исмидан унча фарқ қилмайдиган ва айни вақтда бирорта қиролича ёки машҳур сеньоранинг номини эслатадиган номни ўйларкан, уни Дульсинея Тобосская деб аташга аҳд қилди, чунки қиз тобосолик эди-да. Дон Кихотнинг назарида бу ном чиройли, оҳангдор ва, айни вақтда, йўлида жасорат кўрсатиши керак бўлган зотга мутлақо муносиб номдай туюлди.

## ДОН КИХОТНИНГ БИРИНЧИ БОР УЗ МУЛКИ-ДАВЛАТИДАН УЗОҚЛАШИБ САФАРГА ЧИҚҚАНИ

Ана шу тайёргарликлар кўриб бўлингач, дон Кихот ҳаялламай уйини тарк этиш ва рицарлик саргузаштларини излаб сафарга чиқишга аҳд қилди. Унинг назарида бундай ишда сусткашлик қилиш инсоният олдида зўр гуноҳ қилган билан тенг эди, ахир қанчадан-қанча ҳақоратланганлар интиқом олишга, қанчадан-қанча ҳақ-ҳуқуқидан маҳрум қилинганлар ҳимояга, қанчадан-қанча мазлумлар озодликка муҳтож! Ажойиб ёз кунларидан бирида у ҳали тонг отмай ўрнидан турди, яроғ-аслаҳаларини тақди, бошига пачоқ дубулғасини кийиб, кўк қулоқчинини тортиб боғлади. Росинантга ирғиб минди, қалқони ва найзасини қўлига олиб, зўр, шарафли ишга қадам қўйганидан хурсанд бўлиб, молхонанинг орқа эшигидан ҳеч кимга билдирмай далага чиқди. Лекин ҳали катта йўлга чиқмасдан хаёлига шундай даҳшатли фикр келдики, уйга қайтишига сал қолди. Дон Кихот кўкқисдан ўзига ҳали рицарлик унвони берилмаганини, бинобарин, рицарлик қонунларига мувофиқ рицарларнинг биронтаси билан ҳам жангга киролмаслигини ва бунга журъат эта олмаслигини эслаб қолди. Унга рицарлик унвони берилганда ҳам, рицарлик соҳасида ҳали янги эканлигини ҳамма дарҳол кўриши учун дастлаб оқ яроғ-аслаҳа тақиб юриши ва қалқонига белги қўймаслиги керак эди. Дон Кихот нима қилишини билмай, бир жойда хийла туриб қолди, лекин йўлга тушишга бўлган қайноқ иштиёқи унинг кўнглидаги барча шубҳалардан устун келди. У йўлида учраган биринчи рицардан ўзига рицарлик унвони беришини сўрашни кўнглига тугиб олди. Бетиним ўқийвериш оқибатида идальгомизнинг ана шундай аянчли аҳволга тушишига сабаб бўлган ўша романлар қаҳрамонларининг кўпчилиги ноиложликдан шундай қилган эдилар. Оқ яроғ-аслаҳаларига келганда, оқсувсардан ҳам оппоқ қилиб боплаб тозалаб оламан деб сўз берди ўзига-ўзи. Шу гапларни хаёлидан ўтказаркан кўнгли тинчиди, отнинг юганини бўш қўйганча йўлда давом эди: унинг фикрича, жаҳонгашта рицарь сафарда ана шундай қилиши керак эди.

Росинант майда-майда қадам ташлаб сурғалиб борар, демак, бизнинг кабалъеро ҳам хотиржам ўйга чўмса бўларди.

— Жасоратларимнинг бўлажак тарихчиси дастлабки сафаримни ёзишга киришганида, — дерди дон Кихот ўз-ўзига, — у ўзининг қиссасини: зар кокилли Феб<sup>8</sup> беқиёс гўзал заррин соч толаларини ер юзига эндигина ёйган, сайроқи қушлар бир хил наво билан эндигина жамол кўрсатиб келаётган Аврорани олқишлай бошлаган субҳидамда машҳур рицарь ламанчлик дон Кихот ўзининг ажойиб оти Росинантга миниб қадимий Монтъел водийси бўйлаб йўлга тушди, — деб бошласа керак.

Сўнгра қўшиб қўйди:

— Ниҳоят, менинг шонли жасоратларим саҳифаларга битил-

ган рассомлар ижодида ўз аксини топган, мрамрларда ифода-ланган аср асрлар ичида энг бахтиёри бўлади. О, менинг қахра-монликларимни битувчи солномачи, донишманд сеҳргар, ким бўлишингдан қатъи назар, сендан сўрайманки, олижаноб Роси-нантимни унутма.

Кейин дилини банд қилган маъшуқасини эслади:

— О, шайдо кўнглимнинг ҳоқони, дилрабо Дульсинея! Мени остонангиздан қувиб беқиёс чиройингиздан бебахра этдингиз, дийдорингизни кўрсатишга майлингиз йўқлигини билдириб, ўз шафқатсизлигингиз билан мени бағоят ранжитдингиз. Сизга бўл-ган муҳаббатим туфайли ҳар қандай жафою азоб-уқубатларга бардош беришга тайёр содиқ рицарингизни эслаб қўйсангиз бас, сеньора!

Ана шундай ҳасрат ва хаёллар оғушида хийла вақт ўтиб кетди. Дон Кихот чанг йўлдан аста борарди. Қуёш аллақачон тепага кў-тарилганди, унинг қайноқ нури бечора рицарнинг бошида қолган озгина миясини ҳам эритиб юборгудек эди. У кун бўйи йўл босса ҳамки ҳеч қандай ғаройиб ҳодисани учратмади. Бу унинг фиғони-ни ошириб юборди, зотан у иложи борича бирон воқеа устидан тезроқ чиқишни ва забардаст билаклари кучини синаб кўришни истарди. Кечқурун унинг ўзи ҳам, қирчанғиси ҳам очликдан нақ ўлаёзди. Дон Кихот дам олиб қорин тўйғазиш мумкин бўладиган қалъа ёки чўпон капасини топиш умидида теварак-атрофга назар ташлади. Умиди пучга чиқмади: йўлдан сал четроқда қад кўтарган карвонсаройга кўзи тушди; рицаримиз Росинантнинг биқинига ниқтаб, қош қорая бошлаганда карвон-саройга кириб борди. Шунини унутмаслигимиз керакки, саргу-зашт изловчимизнинг тасавурида унинг атрофини ўраб олган ҳамма нарса аслича эмас, балки ўзи ўқиган севимли рицар-лик романларида тасвирланганидек сеҳрли эди. Шунинг учун ҳам карвонсаройга кўзи тушиши билан, уни тўрт минорали, ноёб кумуш томли, кўтарма кўприкли ва тевариги чуқур хан-дақли қалъа деб ўйлади. У ўз тасавуридаги ана шу қалъа-га яқинлашаркан, мана ҳозир қалъа минораларининг кунгу-ралари орасида бирорта пак-пакана одам пайдо бўлади-ю, карнай чалиб рицарнинг келганини маълум қилади, деб кутиб, дарвозага бир неча қадам қолганда Росинантни тўхтатди. Худди шу дақиқада аллақандай бир чўчқабоқар чўчқаларни бир жойга тўплаш учун бурғусини чалиб юборди, дон Кихот эса, пакана одам менинг келганимни хабар қилипти деб ўйлади.

Дон Кихот қўлидаги найзаси билан меҳмонхона дарвозасини тақиллатди, буни эшитиб, ғоят семиз, семизлигидан жуда ювош кўринган хўжайин чиқиб келди. У ғалати қуролланиб олган бу аломат чавандозни кўриб, сал бўлмаса қаҳ-қаҳ уриб кулиб юборай деди. Бироқ, яроғ-аслаҳаларни ҳарбийчасига тақиб олган дон Кихотнинг ҳайбатини кўраркан, кўнглида унга ҳурмат туғилиб, хушмуомалалик билан деди:

— Агар сиздай илтифотли жаноб, сеньор рицарь, бу ерда қў-нишни лозим кўрсалар, қулай кўрпа-тўшакдан бошқа нимаики

хоҳласалар барини топадилар: меҳмонхонамизда бирорта ҳам бўш каравот йўқ.

Дон Кихот қалъа бошлигининг ўзига эҳтиром билан қилаётган муомаласини эшитиб жавоб берди:

— Сеньор қалъа хўжаси, менга нимани лойиқ кўрсалар, ҳаммасидан мамнун бўламан, зотан айтганларидек:

Совут, қалқон либосимдир,  
Жангу жадал оромимдир.

— Демак, сиз муҳтарам жаноблари учун қаттиқ тош-тўшак, доимий бедорлик уйқу экан-да? Ундай бўлса, марҳамат қилиб отдан тушсинлар, менда ҳамма зарур нарсаларни топа олишларига, хоҳласалар бир кечагина эмас, бутун бир йилни уйқусиз ўтказа олишларига ишонаверсинлар.

Хўжайин шундай дея узангини ушлаш экан, дон Кихот отдан зўрға тушди, чунки у кун бўйи туз тотмаган эди.

Кейин у хўжайиндан Росинантга алоҳида қарашини ўтинаркан, арпа ейдиган жониворлар орасида бу от энг ноёб эканини ҳам уқтириб ўтди. Хўжайин Росинантга бир қаради-да, унда дон Кихот айтганидек ноёблик кўрмади, лекин фикрини айтиб қўйишдан эҳтиёт бўлиб, жиловидан ушлаганча отхонага етаклаб кетди. Дон Кихот эса яроғ-аслаҳаларини еча бошлади. Бундай қийин ва мураккаб ишда унга етиб келган икки хизматкор аёл ёрдам беришди. Дон Кихотнинг уларни қалъа бекалари, аслзода хонимлар деб ўйлаши ўз-ўзидан маълум, албатта. Улар ҳаммалари совутни қилиб боғлаб қўйилган кўк ленталар чигал бўлиб кетгани учун уларни сира ечишолмади. Ленталарни қирқишдан бошқа иложи йўқ эди. Бироқ, дон Кихот тун бўйи дубулғада қийналиб чиқишни афзал билиб, бунга рози бўлмади. Аёллар дон Кихотнинг яроғ-аслаҳаларини ечишар экан, у ўзининг келгусида кўрсатадиган жасоратлари, ажойиб оти Росинант ҳақида ва нафосатли хонимлардан жуда миннатдор бўлганлиги ҳақида оғиз кўпиртириб вайсар, ўзи тўқиган қуйидаги бемаъни шеърни берилаб ўқирди:

Дон Кихотнинг ҳажрида  
Куйган каби ҳеч қачон  
Бошқа паладинни<sup>9</sup> деб  
Елмаганган парирўлар.  
Ўз элидан келганга  
Еш гўзаллар хизматда,  
Арғумоғига эса  
Қарашар графинялар.

— Йўрға деганим бу Росинант, ҳа, отимнинг номи шунақа олиҳиммат сеньоралар, ўзимнинг номим эса ламанчлик дон Кихот. Тўғри, буюк жасоратларим билан бутун дунёда шуҳрат топгу-



нимча номимни ошкор қилмоқчи эмас эдим, лекин уни сир сақласам сиз сеньораларимга ҳурматсизлик қилган бўлур эдим. Ҳа, айтгандай, сизларга нақадар бажонидил хизмат қилиш иштиёқида ёнаётганимни мана шу забардаст қўлларим кўрсатиб қўядиган вақтга оз қолди.

Хижолатда қолган хизматкор аёллар нима деб жавоб беришни билмаганларидан камсуқумлик билан индамай туришарди.

Бу орада отхонадан қайтиб келган хўжайин дон Кихотдан кўнгиллари нима тусабини сўради.

— Менга қолса, яхшилаб тамадди қилиб олар эдим,— деб жавоб берди идалго,— ахир кучимга куч қўшишим керак-да.

Аксига олиб, бугун жума куни бўлгани учун меҳмонхонада шўр балиқдан бошқа ҳеч нима топилмади.

Хўжайин дон Кихотга қайнатилган балиқ, худди рицарнинг яроғ-аслаҳаларидай қоп-қора ва моғорлаб кетган бир бурда нон келтириб берди. Дон Кихотнинг қандай машаққат билан овқатланаётганини кўрган киши ўзини кулгидан тийиши амримаҳол эди: оғзига қошиқни олиб бораё деса, бошидаги дубулға халақит берарди. Қўли лабига етмагани учун овқатни оғзига бирор киши солиб қўйиши керак эди. Башарти хўжайин қамиш найча олиб келмаганида ташналигини қондиришнинг сира иложи йўқ эди; у қамишнинг бир учини дон Кихотнинг оғзига солиб, бошқа учидан вино қуя бошлади. Дон Кихот дубулғанинг боғичини қирқиб ташламасалар бас, деб ҳаммасига бардош берди. Шу пайт тасодифан карвонсаройга кириб қолган деҳқон қамиш сивизгасини чалиб юборди. Дон Кихот аллақандай бир ажойиб қалъага кириб қолганига, зиёфатда музика чалинаётганига, шўр балиқнинг эндигина пиширилган хонбалиқ, қора ноннинг — оқ бўлка, карвонсарой эгасининг эса қалъа хўжайини эканига ишониши учун шунинг ўзи кифоя эди. Шу сабабли у ўзининг дастлабки сафаридан бағоят хурсанд эди. Уни фақат бир нарсани ташвишлантирарди — ҳали рицарлик унвонини олмани учун уни истаган пайтда қаллоб деб ҳамма ёққа жар солишлари мумкин эди.

### III БОБ

#### ДОН КИХОТНИНГ РИЦАРЛИККА УТИШИ

Шу ўй-хаёл билан гангиб қолган дон Кихот фақирона овқатини тезроқ еб бўлиб, ўрnidан турди, хўжайинни бир чеккага чақириб, уни отхонага бошлаб кирди-да, тиз чўкиб ёлвора бошлади:

— О, шавкатли рицарь, марҳаматингиз билан илтимосим бажо келтирилмагунча ўрnidан турмайман. Қиладиган илтимосим сизга шунки: шу хурат, инсон зотига бахт-саодат келтиради. Хўжайин меҳмоннинг тиз чўкиб турганини кўриб, унинг галати ойдоғини эшитганича аввалига довдираб, дон Кихотга аниқланича қараб қолди; у нима қилганини ҳам, нима деярини

ҳам билмасди. Ҷизини тутиб олгандан кейин эса дон Кихотдан ўрнидан туришни илтимос қилиб, ялина бошлади. Лекин хўжайин илтимосини бажо келтиришга сўз бермагунича у ўрнидан турмади.

— Чексиз олижаноблигингиз туфайли илтимосимни бажаришдан бош тортмаслигингизга имоним комил эди, сеньор,— деди дон Кихот.— Мен сиздан эртага тонготарда менга рицарлик унвони беришингизни ва марҳаматингиздан мени баҳраманд этишингизни сўрайман. Мен бугун қалъангиздаги ибодатхонада қурол тутиб тун бўйи мижжа қоқмай чиқаман. Тонготарда эса менга рицарлик унвони бериш маросимини ўтказасиз<sup>10</sup>. Шундан кейин мен, ниҳоят, жаҳонгашта рицарларнинг барча ҳақ-ҳуқуқларига эга бўламан-у, саргузашт излаб йўлга тушаман. Қуролим ер юзида ҳақиқат ва адолатнинг барқарор бўлишига хизмат қилади, чунки мен мансуб бўлган, шон-шухрати оламга ёйилган ўша буюк рицарлик ордени шуни тақозо этади.

Дон Кихотнинг савдои деб боя шубҳалана бошлаган хўжайин энди бунга ишонди, унинг телбалигидан мириқиб кўнгили очиш илинжида қўлтиғига сув пуркашга аҳд қилди. Шунинг учун ҳам у дон Кихотга жавоб бераркан, истак ва илтимослари ғоят оқилона, ўзининг мағрурона қиёфаси, келишган қадди-қомати ва юриш-туриши олижаноб рицарь бўлишидан дололат беришини ҳамда унинг ниятлари бу унвонига ниҳоятда муносиб эканини айтди. «Менинг ўзим ҳам,— деб илова қилди хўжайин,— ёшлигимда бу фахрли касб билан шуғулланганман. Саргузашт излаб бутун Испанияни изғиганман, Севилья, Гренада, Қурдоба, Толедо ва бошқа кўпгина шаҳарларда бўлганман. Турли-туман шўхлик, тўполон, муштлашишларга аралашганман. Демакки Испаниянинг барча суд ва турмаларида отнинг қашқасидай танилганман. Бирок, мана энди ёшим қайтиб қуйилиб қолдим, мана шу қалъада осойишта умр кечириб, насл-насибию унвони қандайлигидан қатъи назар, жаҳонгашта рицарларнинг ҳаммасини ўз қалъамда эҳтиром билан кутиб оламан, қўлимдан келадиган хизматимни улардан аямайман. Бу ишларни фақат уларга бўлган буюк муҳаббатим туфайли ҳамда кўрсатган яхши муносабатим эвазига уларнинг ўз мол-мулкларини мен билан бўлишишларини шарт қилиб бажо келтираман, албатта». Шундан кейин хўжайин, қурол кўтариб тунни бедор ўтказиш учун саройда ибодатхона йўқ, деди. Бирок, зарур бўлиб қолган тақдирда шундай унвонга сазовор бўлишдан олдинги тунни хоҳлаган жойда ўтказиш рицарлик қонунларига хилоф эмаслиги ўзига маълум эканини айтди, шунинг учун ҳам дон Кихотнинг қалъа ҳовлисида бемалол қурол-яроғини қўриқлаб чиқиши мумкин эканини, эртага эса, худо ёр бўлса, унга ҳамма удумларини, удумлар бўлганда ҳам ҳали дунёда ҳеч ким билмаган ва кўрмаган удумларни ўрнига қўйиб рицарлик унвони берилажагини айтди.

Суҳбат охирида қовоқхона хўжайини дон Кихотнинг пули бор йўқлигини суриштирди. Дон Кихот эса ёнида бир мири ҳам йўқлигини, чунки ўқиган романларида жаҳонгашта рицарлар-

нинг ўзлари билан пул олиб юрганларини учратмаганини айтди. Бунга хўжайин дон Кихотнинг янглишаётганини айтиб эътироз билдирди. Жаҳонгашта рицарлар ёнларида пул олиб юришлари кераклиги ўз-ўзидан маълум бўлгани учунгина бу ҳақда романларда ҳеч нарса ёзилмаган деди. Жаҳонгашта рицарлар ҳар эҳтимолга қарши ёнларида лиқ тўла ҳамёнгина эмас, балки тоза кўйлақлар ҳамда яраланганда суриш учун бир банка шифобахш малҳам ҳам олиб юришлари зарурлиги унга аниқ манбалардан маълум экан. Ярадорга бирорта митти ёки қизалоқдан шишада мўъжизадор мумиёи асл бериб юборадиган раҳмдил сеҳргарнинг ёрдамига ҳар гал ҳам умид боғлаб бўлмайди-ку, ахир. Бундай пайтларда фақат ўзинггагина ишонганинг маъқул, бошқа одам кунингга яради. Хўжайин шундай деб, бундан буён сира пулсиз ва зарур нарсаларсиз йўлга тушмасликни дон Кихотга маслаҳат берди. Бу нарсаларнинг қанчалик асқотишини рицарнинг ўзи сабҳатда кўриб-билиб олади.

Дон Кихот унинг маслаҳатига тўла амал қилишга ваъда берди-да, унвон олишдан олдинги тунни меҳмонхона ҳовлисида ўтказишга ҳозирлик кўра бошлади. У ўзининг яроғ-аслаҳаларини йиғиб, моллар сув ичадиган охурга олиб бориб қўйди, кейин найза билан қалқонини қўлига олиб, савлат тўкиб охур атрофда айлана бошлади. Дон Кихот бу ишга киришганда аллақачон қош қорайган эди.

Бу орада хўжайин меҳмонхонага кириб, ижарадорларга рицарлик унвонини олиш ниятида қурол кўтариб яроғ-аслаҳаларини қўриқлаётган телба идальго тўғрисида гапириб берди. Бу ғалати, мияси айниган одамнинг кимлигини билишга қизиқиб қолган ижарадорлар тентакни кўриш ниятида ҳовлига отилдилар. Дон Кихот мағрурона қиёфада бир маромда қадам ташлаб, у ёқдан-бу ёққа бориб келиб турарди. Баъзан у юришдан тўхтаб, найзасига таянганича яроғ-аслаҳаларига узоқ тикилиб қоларди. Сутдек ойдинда рицарлик унвонини олмоқчи бўлган қаҳрамонимизнинг ҳар бир ҳаракати томошабинларга олисдан яққол кўриниб турарди.

Меҳмонхонада тунаб қолган хачир ҳайдовчилардан бири, бахтга қарши, хачирларини суғормоқчи бўлмаганида-ку тун тинч ва осойишга ўтарди, албатта. У ҳеч нарсадан шубҳаланмай охур томон йўл олди. Унинг одим шарпасини эшитган дон Кихот хитоб қилди.

— Барча жаҳонгашта рицарлар ичида энг шавкатли ҳисобланган рицарнинг яроғ-аслаҳаларига қўл чўзган эй беадаб рицар, ким бўлишингдан қатъи назар, нима қилаётганингни аввал ўйлаб кўр! Тега кўрма уларга, йўқса, бу беадаблигинг учун роса таъзирингни ейсан.

Хачир ҳайдовчи бунга парво ҳам қилмади. Охурнинг ёнига келди-да, яроғ-аслаҳаларни тасмасидан ушлаб нарига улоқтириб юборди. Буни кўрган дон Кихот кўзларини кўкка тикиб, сеньораси Дульсиняга фикран мурожаат қилиб шундай деди:

— Сиз банд этган шавкатли юрагига санчилган биринчи ҳа-

қорат тиғи жароҳати эвазига қасос олиш учун менга мадад беринг, сеньорам, биринчи синовда ўз меҳр-шафқатингиздан мени бегона қилманг.

У шу сўзларни айтаркан, қалқонини бир чеккага қўйиб, найзасини икки қўллаб баланд кўтарганча хачир ҳайдовчини жон-жаҳди билан туширган эди, у ўзини билмай юмалаб қолди. Дон Кихот эса яроғ-аслаҳасини йиғштириб олиб, яна охурга қўйди-да, ҳеч нарса юз бермагандай, пинагини бузмай, бамай-лихотир охур атрофида айлана бошлади. Бир неча дақиқадан кейин иккинчи хачир ҳайдовчи чиқиб келди. Ошнасининг бошига тушган аянчли аҳволдан беҳабар бу ҳам бадбахт яроғ-аслаҳаларни охурдан олиб ташламоқчи бўлди. Бироқ дон Кихот уни ҳам огоҳлантирди. У бир оғиз ҳам сўз қотмай, шартта найзасини кўтариб хачир ҳайдовчининг бошига туширдик, у шўринг қурғур ҳам гурс этиб ерга йиқилди. Шовқинни эшитган меҳмонхонадагилар хўжайин бошчилигида югуришиб етиб келишди. Уларга кўзи тушган ҳамоноқ дон Кихот қалқонини қўлига олди-да, қиличини қинганин суғуриб хитоб қилди:

— О, қалбимнинг ҳоқони, юрагимнинг таянчи, гўзалларнинг гўзали! Ишқингда буюк жангга кираётган рицарингга камол эътиборинг билан бир нигоҳ ташлайдиган фурсат келди.

Дуодай янграб кетган бу сўзлар идадьгомизнинг қалбидан шундай мардликни қўзғатиб юбордики, бутун дунёдаги хачир ҳайдовчилар биргалашиб ҳужум қилганларида ҳам у чекинмасди. Яраланганларнинг ўртоқлари узоқлари отаётган тошбўрони остида у қимир этмай турарди; қўлидаги қалқони билан ўзини ҳимоя қиларди-ю, яроғ-аслаҳа турган охур ёнидан бир қадам ҳам жилмасди. Ҳовлида шовқин-сурон кўтарилди. Хачир ҳайдовчилар бақириб-чақиритарди, сўқинитарди. Эсхонаси чиқиб кетган хўжайин уларга жанжални бас қилинлар деб ялинарди. Дон Кихот эса товущининг борича дўк урарди:

— Эй разил, пасткаш қуллар! Мен сизлардан жирканаман! Майли, тошбўрон қилаверинлар, бостириб келаверинлар, ҳамла қилаверинлар! Бу сурбетлик ва аҳмоқчиликларинг учун ҳозир жазоларингни тортасанлар.

Дон Кихотнинг бу хитобида шу қадар кўп жасорат ва ғазаб янграб турардики, бундан ҳужум қилувчиларнинг ўтакаси ёрилаёзди. Улар аста-секин тинчланиб, тош отмай қўйдилар. Шундан кейин дон Кихот ярадорларни олиб кетишларига розилик берди, яроғ-аслаҳаларини яна боягидай виқор ва хотиржамлик билан муҳофаза қила бошлади.

Бироқ содир бўлган мижро хўжайинга ёқмади ва янги фалокат яна юз бермасдан олдин у тезликда меҳмонни савил қолгур рицарлик орденига ўтказиб қўя қолишга аҳд қилди. У эҳтиром билан дон Кихотга яқинлашиб шундай деди:

— Бу беҳаё малайлардан ғазабланманг, муҳтарам жаноб! Сизга ваъда бериб айтаманки, улар бу беадабгарчиликларига яраша ибрат бўларли жазоларини оладилар. Хўш, энди муқаддас удумни бажо келтириш вақти етмадимикан? Одатда яроғ-асла-

ҳани қўриқлаш икки соатдан ошмаслиги керак, сиз эса муҳо-  
фазани тўрт соат давом эттирдигиз. Қасримда ибодатхона йўқ-  
лигини сизга боя маълум қилган эдим. Бироқ бусиз ҳам ишни бит-  
казишга жазм қилсак бўлаверади.

Унвон беришнинг асосий таомили гарданга мушт тушириш-  
у, қилич билан чап елкага уришдан иборат. Буни эса очиқ  
майдонда ўринлатса ҳам бўлади. Шундай экан, ғанимат вақтни  
қўлдан бермайлик.

Рицаримиз хўжайиннинг сўзига лақмалик билан ишониб,  
унинг амрига итоат этишга тайёр эканини айтди.

— Сиздан фақат бир нарсани илтимос қиламан,— деб қўшиб  
қўйди у,— бу муқаддас удумни тезроқ амалга оширинг. Нега  
десангиз, унвон олганимдан кейин менга бирон кимса ҳужум  
қилгудек бўлса, қасрда бирор тирик жон зотини қолдирмай-  
ман. Муҳтарам қалъа соҳиби, сизга бўлган ҳурматим туфайли,  
кимни ўз ҳимоянгизга олсангиз, ўшанга шафқат қиламан, холос.

Рицарнинг юқоридаги сўzlари хўжайиннинг бу беором меҳ-  
мондан тезроқ қутулиш иштиёқини янада кучайтирди.

Фаросатли, ҳозиржавоб ва эпчил бу одам ўша заҳотиёқ хачир  
ҳайдовчиларга берилган арпа ва сомоннинг миқдори ёзиб бори-  
ладиган қалин дафтарини олиб чиқди-ю, икки хизматкор аёл  
билан ёниб турган шамни кўтариб келаётган бола кузатувида  
дон Кихотнинг ёнига борди, унга тиз чўкишни буюрди, ўзини  
қалин дафтардан қандайдир дуони ўқиётган киши қилиб кўрса-  
тиб, қулочкашлаб туриб рицаримизнинг елкасига мушт туширди,  
сўнгра алланималарни пичирлаб дон Кихотнинг елкасига унинг  
ўз қиличи билан уриб қўйди. Шундан кейин хизматкор аёллар-  
дан бирига қилични дон Кихотнинг белига боғлашни буюрди.  
Буни хизматкор аёл жуда чаққонлик билан бажарди. Тўғри,  
аёлнинг кулгидан ичаги узилаёзди, лекин кўзи олдида боя ри-  
царимизнинг кўрсатган жасорати кулгисини тийишга мажбур  
этди. Хушахлоқ сеньора дон Кихотнинг белбоғига қиличини  
боғлар экан:

— Муҳтарам жанобнинг рицарлик ишлари ва жангларда  
муваффақият қозонишига худонинг ўзи ёр бўлсин,— деди.

Дон Кихот бу лутф-эҳсон учун ўз билак кучи-ла эришадиган  
шон-шухратини вақти келиб қайси ҳайси хоним билан баҳам кўриши  
кераклигини билиш иштиёқида бу аёлнинг исмини сўради.  
У камоли мулојимлик билан жавоб бериб, исми Толоса, ўзи  
толедолик ямоқчининг қизи эканини ҳамда дон Кихотга ҳамиша  
содиқ қул бўлиб қолишга тайёр эканини айтди. Дон Кихот унга  
бўлган муҳаббати туфайли бундан буён ўзини донья Толоса деб  
аташини қиздан илтимос қилди. Қиз унинг илтимосини бажо  
келтиришга ваъда берди. Шундан кейин бошқа хоним дон Ки-  
хотнинг оёғига шпорларини тақиб қўйди. Сўнгра дон Кихот  
боя белбоғига қилич тақиб қўйган аёл билан қандай гаплашган  
бўлса, бу аёл билан ҳам шу хилда гаплашди. Аёлнинг исмини  
сўради, аёл исми Мэлинера, ўзи антекералик ҳалол тегирмон-  
чининг қизи эканини айтди; дон Кихот исми олдига донья

сўзини қўшишни ундан илтимос қиларкан, уни беҳисоб миннатдорчиликка кўмиб юборди. Бу тантанали маросим тамом бўлганидан кейин дон Кихот отга минишга ошиқди: чунки саргузашт излаб йўлга тушишга сабри чидамасди. У Росинантни эгарлаб, унга бир сакраб миниб олди-да, хўжайинга шундай ажойиб ва гаройиб ифодалар билан ташаккур изҳор қилдики, буни сўз билан таърифлаб беришнинг сира иложи йўқ. Ниҳоят, рицардан кутулганидан хурсанд бўлган хўжайин дон Кихотга қисқа-қисқа, аммо дабдабали сўзлар билан жавоб қайтариб, тунаганига ҳам бир тийин ҳақ олмай, уни илиғ-иссиғида соғ-саломат кузатиб қўйди.

#### IV БОБ

### РИЦАРИМИЗНИНГ МЕҲМОНХОНАДАН ЖУНАБ КЕТГАНДАН КЕИИНГИ КЕЧИРГАН САРГУЗАШТЛАРИ

Дон Кихот меҳмонхонадан йўлга чиққанида тонг ота бошлаган эди. Меҳмонхона эгасининг пул, кийим-кечак ва бошқа нарсалар ҳақидаги гапларини эслаб, у энг аввало барча зарур буюмларни тахт қилиб олиш ва ўзига яроқбардор топиш учун уйига қайтишга ихтиёр қилди ва Росинантни ўз қишлоғи томон бурди. Росинант ҳам гўё эгасининг истагини тушунгандай, бажонидил елиб кетди, гўё туёқлари ерга тегмай учди.

Бироқ рицаримиз бир неча қадам йўл юрмасданоқ ўрмонзордан мунгли инграган товуш эшитилиб қолди. Дон Кихот Росиннинг жilовидан тортиб, хитоб қилди:

— Худонинг марҳаматига шукур! Мана, ниҳоят мен рицарлик бурчимни адо этиш ва олижаноб ниятимнинг мевасини тотиш шарафига муяссар бўлаётirman. Бу нола чекаётган менинг ҳимоя ва кўмагимга муҳтож бирор бахти қаро одам бўлса керак.

Дон Кихот Росинантнинг жilовини буриб, нола эшитилаётган томонга шошилди. У ҳали ўрмонзорга кирмасиданоқ шундай манзарага кўзи тушди: давангидай бир деҳқон белигача яланғочлаб ташланган ўн беш ёшлар чамасидаги болани дарахтга боғлаб, йўғон тасма билан савалаётган эди. Бола ўзини қўярга жой тополмай додлар, деҳқон бўлса:

— Қилғилиқни қилиб қўйиб, энди нега додлайсан!— дерди совуққонлик билан.

— Энди сира бундай қилмайман, сеньор!— деб жавоб берарди ҳиқиллаб бола.— Рост, энди сира бундай қилмайман! Энди подага яхши қарайман.

Буни кўриб дон Кихот ғазаб билан хитоб қилди:

— Эй ярамас рицарь, ўзини ҳимоя қилолмайдиган ожизларга ҳужум қилиш уят, бу қилмишингизнинг нақадар пасткашлик эканини ҳозир мен сизга амалда исботлаб бераман!

Тиш-тирноғигача қуролланган, найзасини нақ бурни тагида ўйнатиб турган отлични кўрган деҳқон, энди куним битибди, деб ўйлади-да, титраб-қақшаб жавоб берди:

— Сеньор рицарь, бу бола менинг чўпоним, у шундай ялқов ва анқовки, деярли ҳар куни бир қўй йўқотмаса иложи йўқ. Уни шунинг учун жазолаётирман, у бўлса, ҳақимни бериш алам қилаётганидан шундай қиляпти, дейди.

— Бошимиздан нур сочаётган қуёш ҳаққи қасамёд этаманки, худди кўксингга найза санчаман! Бечорани қўйиб юбор ва ҳозироқ унинг иш ҳақини бир чақасини ҳам қолдирмай бер. Йўқса, бир зарба билан турган жойингда масалангни ҳал қиламан! Ҳозироқ ечиб юбор уни.

Қўрқиб кетган деҳқон лом-мим демай болани дарахтдан ечиб юборди. Дон Кихот боладан хўжайиннинг қанча қарздорлигини сўради. Бола ойига етти реалдан<sup>11</sup>, тўққиз ойлик маош қарздор эканини айтди. Дон Кихот ҳисобласа жами олтмиш уч реал экан, шундан кейин хўжайинга, ё боланинг ҳақини ҳозироқ тўла, ёки у дунёга жўнайсан, деди. Деҳқон юраги чиқиб кетганидан гўлдираб қолиб, бу пулдан болага олиб берган уч жуфт бошмоқ билан касал бўлганида икки марта қон қуйдириб тўлаган бир реални олиб қолишим керак, деб жавоб берди.

— Хўш, майли, шундай дейлик,— деди дон Кихот.— Лекин уни калтаклаб этикнинг ҳам, қон қуйишнинг ҳам ҳақини ундириб олдингиз. Чунки у сотиб олиб берганингиз чарм бошмоқни йиртган бўлса, сиз унинг нақ терисини шилиб олдингиз. У касал бўлганида сартарош унга қон қуйган бўлса, соғ пайтида сиз унинг қонини тўкяпсиз. Демак, орангиз очик.

— Сўзларингизга тамомила қўшиламан, сеньор рицарь, бироқ ҳамма бало шундаки, ёнимда пул йўқ. Майли, Андрес мен билан бирга қишлоққа борсин, бир реални ҳам қолдирмай ҳамма пулини бераман!

— Мен у билан бирга борарканманми?— хитоб қилди бола.— Сираям бормайман, сеньор! Буни ҳатто хаёлимга ҳам келтирмайман. Иккаламиз ёлғиз қолдик дегунча, у теримни шилиб олади.

— Бундай қилмайди,— эътироз билдирди дон Кихот,— мен амр қилдимми, тамом, амримни бажаради. У ўзи мансуб бўлган рицарлик ордени ҳақи қасамёд этса бас, уни қўйиб юбораман ва ҳақингни беришига ишонаман.

— Гапингизни ўйлаб гапиряпсизми, муҳтарам сеньор!— хитоб қилди бола.— Хўжайиним рицарь ҳам эмас, ҳеч қандай рицарлик орденига ёзилган ҳам эмас, ахир у Кинтанар қишлоғилик Хуан Альдудо деган бой-ку.

— Бунинг аҳамияти йўқ,— деб жавоб берди дон Кихот,— Альдудо рицарь бўла олиши мумкин. Ҳар қайсимиз ҳам хайрли ишларга қодир ўғлонлармиз.

— Хўжайиним хизмат ҳақимни тўлашдан бош тортиб турибди-ю, хайрли иш қиларканми?— деди бола.

— Бош тортаётганим йўқ, ўғлим Андрес,— деди деҳқон.— Мен билан юр. Дунёдаги бор жамийки рицарлик орденлари ҳақи қасамёд этаманки, бир реални ҳам қолдирмай, яна янги пул билан ҳамма ҳақингни тўлайман.

— Эскиси билан тўлашингизга ҳам рухсат этаман,— деди

дон Кихот. — Оддий реалларнинг ўзи ҳам кифоя. Лекин, билиб қўйинг, сўзингизнинг уддасидан чиқсангиз чиққанингиз, чиқма-сангиз, қасамёд этаманки, қаттиқ жазоланасиз: калтакесакдай ковак-ковакка яшириниб олсангиз ҳам барибир топиб оламан. Сизга бундоқ буйруқ бераётган кишини билмоқчи бўлсангиз, таниб олинг: мен дилозор ва адолатсиз кимсалардан қасос олувчи шавкатли ламанчлик дон Кихот бўламан.

У шундай деди-да, Росинанга қамчи босиб жўнаб кетди. Деҳқон рицарнинг ўрмонзор ичкарисига кириб кетишини кутиб турди-да, кейин Андресга қараб:

— Қани берироқ кел-чи, ўғлим, ҳалиги дилозорлардан қасос олувчининг буйруғини бажо келтириб, сенга қарзларимни тўлаб қўяй, — деди.

— Ростини айтсам, — деди Андрес, — сиз, мухтарам жаноб, ўша меҳрибон рицарнинг буйруғини адо этсангиз жуда яхши қилган бўласиз. Жасорати ва одиллиги учун унга худо минг йил умр берсин!

— Мен сени ғоят яхши кўрганимдан, — деб жавоб берди хўжайин, — хизмат ҳақингни кўпайтириб бериш учун ҳозир қарзимни янада кўпайтираман.

Шундай деб болани қўлидан ушлаб олди-да, яна дуб дарах-тига боғлаб, чалажон қилиб савалади.

— Хўш, қалай, сеньор Андрес, — деди хўжайин, — ана энди бемалол ҳимоячингизни қидираверинг. Ҳа, айтгандай, мен сизни афтидан унча хафа қилмадим шекилли. Аслида бутун терингизни жуда-жуда шилиб олгим келиб турибди.

Шундан кейин деҳқон болани ечиб юборди-да, бор, ўша валинеъматингни излаб топ, деб маслаҳат берди. Андрес юм-юм йиғлаганча рицарни топиб, ҳамма гапни айтиб бераман, деб сургалиб ўрмон ичкарисига кириб кетди, хўжайин эса мазаҳ қилиб кулганча унинг ортидан қараб қолди.

Дон Кихотнинг боланинг тарафини олгани мана шундай оқибатга олиб келди.

Ваҳоланки рицаримиз назарида ўз рицарлик жасоратига ажойиб асос солгандай бўлган эди. У ана шу саргузаштдан тўла қаноатланиб, пичирлаганча йўлида осойишта давом этди:

— О, гўзал Дульсинея Тобосская, сен ўзингни ҳозир ер юзида яшаб турган барча аёллар орасида энг бахтиёри ҳисоблашинг мумкин. О, гўзаллар гўзали! Тақдир сенга ламанчлик дон Кихот-дек жасур ва шавкатли рицарга худди итоаткор қулингдай амр қилмоқни бахш этди. Кечагина рицарлик унвонига эга бўлганига қарамай бугуннинг ўзидаёқ унинг дилозор ва адолатсиздан қасос олганидан бутун дунё хабардор. У ҳали она сути оғзидан кетмаган норасти болани азоблаётган бир виждонсиз ёвузнинг қўлидан даррани тортиб олди.

Кўп ўтмай у икки йўл кесишган чорраҳага етиб келди. Унинг-дек жаҳонгашта рицарлар одатда чорраҳага келганларида қайси йўлдан боришни ўйлаб бир оз тўхтаб қолишлари ёдига тушиб, уларга тақлидан дон Кихот ҳам худди қай томонга юришини



билмаётгандай бир неча дақиқа туриб қолди. Кейин йўл танлашни Росинантнинг ўзига қўйиб берди. Росинант отхонага олиб борадиган йўлни танлади, албатта, бинобарин дон Кихот ҳам она қишлоғига равона бўлди. Икки милча йўл босганидан кейин олисдан келаётган отлиқлар тўдасига кўзи тушди. Кейинчалик маълум бўлишича улар ипак харид қилиш учун Мурсияга кетаётган тоledoлик савдогарлар экан. Савдогарлар олти киши бўлиб, тўрт отлиқ хизматкор ва уч пиёда хачир ҳайдовчилар кузатувида соябон тутиб бораётган эдилар. Шу заҳотиёқ дон Кихотнинг хаёлига, мана ҳозир ажойиб бир можаро содир бўлади, деган ўй келди. Шунинг учун ҳам эгарга ўрнашиброқ ўтирди, найзасини маҳкам ушлаб, қалқон билан кўкрагини тўсганча йўлни ўртасида туриб олиб, ўзи жаҳонгашта рицарлар деб тасаввур қилган савдогарларнинг яқинлашувини мағрурона ва мардона қиёфада кута бошлади. Улар яқинлашиб келгандан кейин эса овозини баландлатиб, мутакаббирлик билан деди:

— Дунёда беқиёс Дульсинея Тобосскаядан кўра гўзалроқ қиз йўқлигини тан олмагунларингизча, орангиздан бирортангиз ҳам олдинга бир қадам силжиёлмайсиз!

Савдогарлар бу сўзларни эшитиб тўхташди. Улар бу нотаниш кишининг ғалати гаплари ва ажабтовур кийимидан қаршиларида телба бир кимса турганини дарҳол фаҳмладилар. Дон Кихотнинг қаттиқ талаби уларга ғалати туюлди, ораларидан ҳазилкаш ва қувноқ бир одам шундай деб жавоб берди:

— Сеньор рицарь, сиз тилга олган ўша ажойиб сеньорани биз танимаймиз. Уни бизга бир кўрсатсангиз, агар у сиз айтгандай чиндан ҳам жуда чиройли бўлса, унда майли, талабингизни бажонидил адо этамиз.

— Сўзларимнинг орий ростлигига ишонмоқ учун, — деди дон Кихот, — уни ўз кўзингиз билан кўришингиз шарт эмас! Сиздан маликамни кўрмай туриб ҳам, гапимнинг ҳақ эканлигини тасдиқлашингизни ва буни тан олишингизни талаб қиламан, акс ҳолда ҳаммангизни жангга чақираман. Ё рицарлик қонунларига мувофиқ навбатма-навбат, ё ҳаммангиз бир йўла майдонга чиқаверинг. Ўзимнинг бешак ҳақлигимга имоним комилки, мен ҳаммангизга баробар келишга қодирман.

— Сеньор рицарь, — деб жавоб берди савдогар, — биз сира эшитмаган ва ҳеч қачон кўрмаган нарсамизни тўғри деб гуноҳ қилиб қўйишдан қўрқамиз. Шунинг учун ҳам мен ўз ҳамроҳларим бўлган мана шу сеньорлар номидан сиз муҳтарам зотдан ўтиниб сўрайманки, бизга ўша сеньоранинг бирорта суратини кўрсатинг. Башарти хонимингизнинг бир кўзи ғилай бўлса ҳам майли, суратини кўргач, истагингизга қараб уни гўзалларнинг гўзали деб тан оламиз, шунда тилагингизга етиб, кўнлингиз жойига тушади.

Дон Кихот аччиғланганидан ўдағайлаб юборди:

— Гўзалликда беқиёс маликам шаънига айтаётган ҳақоратли сўзларингиз учун мендан осонлик билан қутулолмайсиз!..

У шундай деб найзасини ўқталганча дарғазаб бўлиб суҳбат-

доши устига от қўйди. Бу беадаб савдогарнинг бахтига Росинант тошга қоқилиб кетмаганида унинг абжағи чиқарди. Росинант йиқилиб, дон Кихот анча нарига учиб тушди. У жон-жаҳди билан ўрнидан туришга уринар, найзаси, қалқони, оёғидаги шпорлари, дубулғаси билан эскириб кетган оғир яроғ-аслаҳалари бунга халақит берарди. Ётган жойида беҳуда типирчиларкан:

— Қочманглар, эй номардлар, муттаҳамлар, шошмаларинг! Йиқилишимга мен эмас, отим айбдор!— деб қичқирарди.

Афтидан сиркаси сув кўтармайдиган бағри тош бўлса керак, хачир ҳайдовчилардан бири бу ҳақоратларга чидаёлмай, рицарнинг адабини бериб, қовурғасини санаб қўймоқчи бўлди. У дон Кихотнинг олдига югуриб борди, қўлидан найзасини тортиб олиб бўлак-бўлак қилиб ташлади-да, бир бўлаги билан рицаримизни савалашга тушди, қалқону совути қаттиқ бўлса ҳам уни бир қоп буғдойдай туйиб ташлади. Савдогарлар шунча ҳайҳайлашса ҳам, барибир, хачир ҳайдовчи жаҳлидан тушмади. Ерда ётган найза бўлакларини битта-битта олиб, у кукун бўлиб кетгунича ер тишлаб ётган рицарни савалайверди. Рицарь ҳам бошига ёғилаётган калтак зарбига қарамай, ҳамон бақирар, осмону заминга ва ўзи қароқчилар деб ўйлаган кишиларга қараб дўқ уради.

Ниҳоят хачир ҳайдовчи чарчаб, шўрликни калтаклашни бас қилди; савдогарлар яна йўлга тушишди; уларга эрмак топилди, то манзилга етгунча калтакланган шўрлик рицарь ҳақида чақ-чақлашиб борадиган бўлдилар. Душманлари кетиб қолганини кўрган дон Кихот яна ўрнидан туришга уриниб кўрди. Бироқ хачир ҳайдовчи уни чалажон қилиб тушлаган эди, шўрлик идальго ҳатто бармоқларини ҳам қимирлата олмади. Лекин шунда ҳам умидсизланмади; бу билан ўзининг шуҳратига ҳеч қандай путур етмаганини, бу бахтсизликка оти сабабчи бўлганини биларди.

## V БОБ

### РИЦАРИМИЗНИНГ УИГА ҚАЙТИБ КЕЛГАНИ

Рицаримиз қимирлашга ҳам ҳоли қолмаганига қаноат ҳосил қилганидан кейин одатича ўзини юпатишга: романлардан бугунгига ўхшайдиган биронта воқеани эслашга ҳаракат қилиб кўрди. Шу ондаёқ телбанамо тасаввурида кимсасиз тоғлар орасида ёлғиз ташлаб кетилган ярадор Балдуин гавдаланди. Дон Кихотга ана шу рицарнинг чеккан нолаю фиғони ўзининг ҳозирги аянчли ҳолига тамоман мос келадигандек туюлди, шунинг учун ҳам идальгомиз ўзи тасаввур қилиб юрган хонимни зўр ҳис билан ўз ҳузурига чорлай бошлади:

О сеньорам, ҳузуримга кел,  
Қайғум арит, боқиб бир киё!

Лекин у:

О, Мантуан ҳукмдори сен,  
Тогажоним, қиблагоҳимсан,—

сатрларини айтиб бўлмасданоқ жонига тақдир ора кирди. Йўлда дон Кихотнинг ҳамқишлоғи бўлган бир деҳқон кўринди. У тегирмондан келаётган эди; тупроққа қоришиб ерда чўзилиб ётган одамни кўриб, олдига келди-да, унга нима бўлганини, нега бундай мунгли инграётганини сўради.

Дон Кихот тепасидаги деҳқонни амакиси маркиз Мантуанский деб ўйлади шекилли, саволларига жавоб бермай, рицарь Балдуиннинг бошига тушган бахтсизликлар куйланган романсни ҳадеб такрорлайверди.

Деҳқон бундан жуда ҳайратда қолди. У таёқ зарбидан қайилиб кетган сипарни шоша-пиша ортга сураркан, ўзига таниш чеҳрага кўзи тушди.

— Сеньор Кехана,— деди у,— сизга ким бунақа озор берди?

Бу соддадил одам шўрлик рицарнинг яраланган-яраланганини кўриш учун унинг кўкрак ва орқа сипарини олиб ташлади. На бирон жароҳат, на қонаган жой кўринди. Шундан кейин у дон Кихотни азот кўтариб зўрға эшагига ўтқазди, чунки эшакда бу шўрлик унча қийналмайди, деб ўйлади. Деҳқон шўринг қурғур идальгони қулайроқ ўтказиб қўйгач, унинг яроғ-аслаҳаларини йиғиштириб олиб, Росинантнинг эгарига боғлади, кейин от билан эшакнинг жиловидан ушлаб олди-да, индамай қишлоққа жўнади. Дон Кихот ҳам индамас ва ўйчан кўринарди. Хачир ҳайдовчи уни шу қадар бошлаб калтаклаганидан эгарда аранг ўтирар, гоҳо-гоҳо нафаси кўкка етгудай хўрсиниб қўярди. Бундан ташвишга тушган деҳқон ундан қаери оғриётганини яна сўради. Бу орада дон Кихот Балдуинни унутган, энди унинг ёдига Антекера ҳокими Родриго де Нарваэсининг мавр Абиндарраэсни қандай ушлаб олгани ва ўз қалъасига қамаб қўйгани ҳақидаги воқеа тушганди. Шунинг учун ҳам Родриго де Нарваэсга асир Абиндарраэс қандай иборалар билан жавоб қайтарган бўлса, деҳқоннинг саволларига дон Кихот ҳам шундай жавоб берди.

— Шуну билиб қўйингки, илтифотли сеньор дон Родриго де Нарваэс,— рицарь ўз гапини шундай яқунлади,— ҳозиргина сизга тасвирлаб берганим, шарафига мен ҳали дунёда ҳеч ким кўрмаган, кўрмаётган ва бундай кейин ҳам ҳеч қачон кўрмайдиган шонли жасоратлар кўрсатган, кўрсатаётган ва бундан буён ҳам кўрсатадиган гўзал Харифа эндиликда — сулув Дульсинея Тобосскаядир.

— Ахир тушунсангиз-чи, илтифотли сеньор, мен умуман дон Родриго де Нарваэс эмасман, ҳамқишлогингиз Педро Алонсо-

ман; мухтарам жаноблари Балдуин ҳам, Абиндарраэс ҳам эмас, ҳурматли идальго, сеньор Кеханасиз.

— Кимлигимни ўзим биламан,—эътироз билдирди дон Кихот,—дунёдаги барча рицарлар кўрсатган жасоратларнинг жами менинг жасоратимга тенг келолмаслигини ҳам биламан.

Улар ана шундай гаплар билан кечга яқин қишлоққа етиб бо-ришди.

Калтак зарбидан аянчли аҳволга тушиб қолган дон Кихотнинг эшакда келаётганини бирор кимса кўришини истамаган деҳқон қош қорайишини кутиш ниятида қишлоқ чеккасидаги ғов ёнида тўхтади. Қоронғи тушганидан кейин эса қишлоққа кириб, дон Кихотнинг уйи томон йўл олди. Уйдан ғўнғир-ғўнғир товушлар эшитилиб турарди: идальгомизнинг энг қалин икки ошнаси—руҳоний билан сартарош—унинг уй ичидагилар билан кенгашиб ўтиришарди. Экономка шанғиллаб шундай дерди;

— Илтифотли сеньор лицензиат<sup>13</sup> Перо Перес,—руҳонийнинг номи шундай эди,—хўжайиним ҳақида қандай фикрдасиз? Мана икки кундирки, унинг ўзи билан бирга қирчанғиси ҳам, найзаси ҳам, яроғ-аслаҳалари ҳам ғойиб бўлди!... О, қандай бахтсиз аёлман-а! Бу лаънати рицарлик романлари уни ақлдан оздирган бўлса керак деб ўйлайман. Ўзи билан ўзи гаплашиб ўтириб, саргузаштлар излаш учун уйдан чиқиб кетиши ҳақида неча марталаб қасам ичганлари ёдимда. Бутун Ламанча энг доно кимсани йўлдан оздирган бу китоблар қуриб кетсин!

Жияни ҳам шундай фикрда эди:

— Биласизми, сеньор уста Николас,—сартарошнинг номи шундай эди,—сеньор тоғам, бу ярамас романларни нақ икки кунлаб мижжа қоқмай ўқиб чиқарди. Охири шу даражага бориб етардики, қизишиб кетганидан китобни улоқтириб юбориб, қиличини яланғочлаганича, қулочкашлаб деворни чопаверарди. Ҳолдан тойганидан кейин, минорадай-минорадай тўртта девни ўлдирдим, деб бақираверарди. Тинка-мадори қуриганидан тоғамнинг аъзойи баданидан тер қуйиб кетар, ўзи эса бу терни жангда яраланган жойларимдан оқаётган қон деб ўйларди. Шундан кейин катта чўмични тўлдириб муздек сув ичаркан, бу сув эмас, дўстим, буюк сеҳргар Эскифе олиб келиб берган ноёб дори дерди. Бу кўргуликлар учун мен ўзимни айбдор деб ҳисоблайман. Тоғамнинг алаҳлашларини сиз илтифотли жанобларга маълум қилишга илгари ақлим етмагани учун ўзимни кечиролмайман. Сизлар бунга чек қўярдингиз, албатта. Бунинг учун тоғамнинг ақлдан оздирадиган китобларни ёқиб ташлашнинг ўзи кифоя эди.

— Мен фикрингизга батамом қўшиламан,—деди руҳоний,—бечора дўстимизни бундан-буён жинни қилиб қўймаслиги учун бу аҳмоқона китобларни эртагаёқ ўтга ташлашга сўз бераман.

Дон Кихот билан ҳамроҳи бу гапларни охиригача эшитишди. Деҳқон қўшнисининг алаҳлаш сабабларини энди тушунди. Шунинг учун ҳам у:

— Эшикни очинг, сеньора! Оғир яраланган сеньор Балдуин,

маркиз Мантуанский, яъни сеньор мавр Абиндарраэснинг ўзлари келдилар, уни Антекеранинг ҳукмдори жасур Родриго де Нарваэс олиб келмоқда,—деб қичқирди.

Дехқоннинг товушини эшитиб ҳамма югуриб чиқди; эркаклар ўз дўстларини, аёллар эса ўз хўжайинлари ва тоғаларини таниб, у билан қучоқ ёзиб кўришишди. Лекин мадори қуриганидан эшакдан ҳам тушолмаган дон Кихот уларга шундай деди:

— Шошманглар! Отимнинг айби билан қаттиқ яраландим. Дарҳол тўшакка олиб кириб ётқизинглар-у, иложи бўлса тезроқ доно сеҳргар Урганда<sup>14</sup> хонимни чақиртириб келинглар, яраларимни боғлаб дори-дармон қилиб тузатсин.

— Кўрдингларми, қандай фалокат юз берибди!—хитоб қилди экономка.—Юрагим бекорга ғаш бўлмаган экан! Бемалол кираверинг, муҳтарам жаноб, сизни ҳар қандай сеҳргар хонимларсиз ҳам даволай оламиз. Сиз илтифотли хўжамни шу аҳволга солган бу рицарлик китоблари минг бир балога гирифтор бўлсин!

Дон Кихотни ўрнига ётқизишиб, жароҳатларини малҳамлаб боғлаб қўйишмоқчи бўлишган эди, ҳеч қандай яраланган жой кўринмади. У, ўнга дев билан олишаётиб, жанг роса авжига чиққан пайтда отим Росинант билан бирга ерга йиқилиб тушиб сал лат едим, деб тушунтирди. Унинг сўзига қараганда, ер бу махлуқлардан баттарроқ сурбет ва ваҳший жониворларни кўрмаган эмиш.

— Вой-буй,—унинг сўзини бўлди руҳоний,—ҳали юртимизда девлар ҳам пайдо бўлиб қолишибди-да? Қасамёд этаманки, эртага қуёш чиқмасданоқ улардан асар ҳам қолмайди.

Улар дон Кихотдан бошидан кечирганларини суриштира бошлашди, лекин у ҳеч нарсани гапириб беришни истамасди. У фақат овқат беришларини ва тинч қўйишларини илтимос қилди, чунки ниҳоятда қорни очган ва уйқудан қолган эди. Илтимоси бажо келтирилди, руҳоний эса дехқондан дон Кихотни қаердан ва қандай аҳволда топганини суриштира бошлади.

Дехқон бўлган воқеани бажонидил айтиб берди ва ҳатто идальгонинг баъзи бемаъни гапларини ҳам такрорлади.

Бу эса руҳонийнинг дон Кихот китобларини ёқиб ташлашга бўлган иштиёқини янада кучайтириб юборди. Эртасига эрталаб сартарош дўстининг олдига кирди ва иккаласи идальгомизнинг уйига жўнашди.

Дон Кихот ҳамон уйқуда эди. Руҳоний дон Кихотнинг жиянидан барча бахтсизликларга сабаб бўлган китоблар қўйилган хонанинг калитини сўради. Экономка уларни ўша хонага бошлаб кетди. Хонадаги жавонларда юзга яқин қалин ва яна анчагина ажойиб муқовали кичикроқ томлар қалашиб ётарди. Экономка бир дақиқа шошилмай туришни руҳонийдан илтимос қилиб, хонадан чиқди-да, ҳадемай бир пиёла оби раҳмат билан пуркағич олиб келди.

— Мана буни олиб, сеньор руҳоний, аввал хонага сув пуркаб чиқинг, бўлмаса, бу китобларда ҳикоя қилинувчи сеҳргарлардан бирортаси ҳозир бўлиб, уруғ-аймоқларини дунёдан супуриб

ташламоқчи бўлаётганимиз учун қасос олиб, яна бизни бирор махлуққа айлантириб қўймасин.

Руҳоний соддадил экономканинг бу ҳадиксирашидан кулиб қўйди-да, китобларини битта-битталаб олиб беришни сартарошдан илтимос қилди. У дуруст китобларни ажратиб олмоқчи эди.

— Йўқ, йўқ,— деб хитоб қилди жиян,— уларнинг бирортаси ҳам аяшга арзийдиган эмас, бошимизга фалокат тушишида ҳаммаси ҳам айбдор. Яхшиси, ҳаммасини деразадан ҳовлига улоқтириб, ёқиб ташлаймиз.

Экономка ҳам шу фикрни маъқуллади. Бироқ руҳоний уларнинг бўлмағур гапига сира эътибор бермай, китобларининг ҳеч бўлмаса номини кўриб чиқишга аҳд қилди. Унга уста Николас қалин бир томни узатди. Бу том тўрт қисмдан иборат бўлиб, галлиялик Амадиснинг тарихи экан. Уни кўриб руҳоний шундай деди:

— Эшитишимга қараганда, бу Испанияда нашр этилган биринчи рицарлик романи бўлиб, қолганлари унинг давомидир. Шунинг учун мен буни албатта ёқиб ташлашимиз керак деб ўйлайман.

— Э, йўқ, сеньор!— эътироз билдирди сартарош.— Эшитишимча бу роман ҳозиргача ёзилган асарлар ичида энг яхшиси, шундай бўлгач, уни олиб қолсак арзийди.

— Сизнинг гапингиз маъқулга ўхшайди,— жавоб берди руҳоний,— биз уни ҳисобга олиб, ҳозирча тегмай турамыз. Қани энди анови китобни кўрайлик-чи.

— Амадис Галльскийнинг қонуний ўғли Эспландианнинг жасоратлари,— деди сартарош.

— Лекин, инсоф билан айтганда,— деди руҳоний,— отанинг хизматлари боласини асраб қололмайди. Қани сеньора экономка, деразани очинг-да, уни ҳовлига улоқтиринг-чи. Гулханимизнинг дастлабки қалови бўлсин.

Экономка буни бажонидил бажо келтирди.

— Қани, кейингиси-чи,— деди руҳоний.

— Кейингиси,— деб сўзида давом этди сартарош.— Амадис Юноний. Менимча бу жавондаги китобларнинг ҳаммаси Амадислар уруғига мансуб.

— Ундай бўлса ҳаммаси ҳовлига улоқтирилсин,— деди руҳоний.

— Мен ҳам шундай фикрдаман,— деди сартарош.

— Мен ҳам,— унинг сўзини маъқуллади жиян.

— Шундай бўлганидан кейин,— деди экономка,— ҳаммасини ёқиб ташлаш керак.

Бирин-кетин қалин ва юққа томлар ҳаммаси деразадан улоқтирилди.

Руҳоний рицарлик романларини саранжом қилганидан кейин турли шеър ва поэмалар тўпламлари қўйилган жавонга кўз ташлади. Лекин у қўлига ҳали биринчи тўпламни ҳам олмасданоқ дон Кихотнинг қаттиқ товуши эшитилиб қолди:

— Бу ёққа келинлар, бу ёққа, довюрак рицарлар,— деб бақирарди у.— Забардаст билакларингизнинг кучини кўрсата-

диган пайт келди! Сарой рицарлари курашда ғалабани ўзлариники қилиб олмоқчилар.

Бу қичқириқдан ташвишга тушган дўстларимиз китобларни дуч келган томонга улоқтириб, товуш чиққан ёққа югуришди.

Улар ётоқхонага киришди, қарашса дон Кихот ўрнидан туриб олибди, у ғазаби қайнаб ўзи тасаввур қилган душманларга эпчиллик билан қилич санчиб, жон-жаҳди билан чопиб ташлардики, гўё ўзини сира бемор ва бемадор ҳис этмасди.

Руҳоний билан уста унинг олдига югуриб бориб, зўрлик билан ўрнига ётқизишди, дон Кихот бирмунча тинчланганидан кейин руҳонийга мурожаат қилди:

— Ростини айтсам, сеньор архиепископ Турпин,<sup>15</sup> жаҳонгашта рицарлар қўлга киритган ғалабани сарой рицарларнинг ўзлариники қилиб олишларига йўл қўйиб бериш ўн икки пэр<sup>16</sup> учун ниҳоятда уят. Йўқ, бундай таҳқирга мен асло йўл қўймайман!

— Тинчланинг, илтифотли сеньор оғайни,—деди руҳоний,—худо хоҳласа эртага ҳамма нарса жойига тушади, бугун бой берган нарсаларимизни ўн ҳисса қилиб тўлатиб оламиз. Ҳозирча муҳтарам ошнаимиз ўз саломатликларини ўйласинлар. Менимча, яраланмаган бўлсангиз ҳам, қаттиқ чарчаганга ўхшайсиз.

— Йўқ, мен яраланганим йўқ,—деди дон Кихот,—лекин ҳақиқатадан ҳам роса саваланиб эзиб ташланганман. Маккор ва бахил дон Рольдан<sup>17</sup> мени дуб дарахти танаси билан савалади, негаки рицарлик жангларида унинг ягона рақиби эканимни биларди. Ўрнимдан турадиган бўлиб олсам бас, адабини бериб қўяман. Энди менга нонушта келтиринглар, чунки ҳозир энг аввало куч йиғиб, бақувват бўлиб олишим керак. Ундан кейинчилик ҳам қасос олавераман.

Айтганини қилиб, унга овқат келтиришди. Дон Кихот овқатланиб олгач, яна қаттиқ уйқуга кетди.

Ўша кечаси экономка уйдаги бор китобларнинг ҳаммасини ёқиб юборди, руҳоний аяган китоблар ҳам оловда кул бўлиб кетди. Эртасига кутубхона эшигини ғишт билан уриб, устидан суваб ташлашди. Дон Кихотга хонани бор китоблари, жавонлари ва жиҳозлари билан бирга қандайдир бир сеҳрғар ўғирлаб кетди деб айтишга қарор қилишди. Бу ишларни тамомлаганларидан кейин ҳаммалари идальгонинг соғайиб кетишини сабрсизлик билан кута бошлашди. Икки кундан кейин дон Кихот анчагина қувватга кириб, энди ўрнидан тура оладиган бўлди. У энг аввало китобларини кўрмоқчи бўлди, албатта. Ўз кутубхонасининг эшигини топа олмай ҳайратланганини кўрсангиз эди. Анча вақт уйда дайдиб юрди, хоналарни бирма-бир айланиб чиқди, суваб ташланган эшик ёнига қайта-қайта келиб, қўллари билан пайпаслаб кўраркан, ҳайрон бўлиб атрофга аланглаб қараб қўярди. Ниҳоят, экономкадан кутубхонанинг эшигини сўради. Бунга қандай жавоб беришини руҳоний ўргатиб қўйган эди. У шундай деди:

— Кутубхона эшигимиз? Нимасини айтасиз, муҳтарам сень-

ор! Кутубхона ҳам, китоблар ҳам ғойиб бўлгани қачонийди. Ҳаммасини шайтон ўғирлаб кетган.

Шунда жияни гапга аралашди:

— Сиз, илтифотли тоғам, саёҳатга чиқиб кетганингизда бир куни кечаси сеҳргар учиб келди. Ўзи учиб келган аждаҳодан бир сакраб тушти-да, кутубхонага кирди: у ерда нима қилганини кўзим билан кўрганим йўқ, лекин бир неча дақиқадан кейин томинг орасидан учиб чиқиб кетди, уйни эса тутун босди, ҳеч нарсани кўролмай қолдик. Бир оздан кейин унинг нималар қилганини билмоқчи бўлиб қарасак, хонадан ҳам, китоблардан ҳам номи-нишон қолмабди. Лекин бир нарсани яхши эслаб қолдик: ўша ёвуз чол учиб кетаётиб, отим Муньятон, деб қичқирди дўриллаб.

— Муньятон эмас, Фрестон,—сўзини бўлди дон Кихот.

— Оти Фрестонми, Фритонми, буни худо билади,— деди экономка,—фақат оти «тон» билан тугаши яхши эсимда қолди.

— Ҳа, бу ўша ашаддий душманам—донишманд сеҳргарнинг худди ўзи,— деди дон Кихот.—Мени кўрарга кўзи йўқ, чунки ўзи мурувват кўрсатаётган рицарь билан бир куни менинг олишишимни ва бу жангда ғалаба қозонишимни ўзининг сеҳрли китоблари ҳамда жодугарлиги ёрдамида билиб олган. Ана шунинг учун ҳам у мени турли фалокатларга дучор қилиб, йўлимга тўғаноқ бўлишга қасд қилган.

## VI БОБ

### АЖОЙИБ РИЦАРИМИЗ ЛАМАНЧЛИК ДОН КИХОТНИНГ ИККИНЧИ САФАРИ

Ўша воқеадан кейин дон Кихот икки ҳафта давомида уйда тинчгина ўтирди. Унинг ғайритабиий саргузаштларга бўлган иштиёқи сўнганини экономка билан жияни пайқаб қувонишди. Ҳа, айтгандай, баъзан у ўз ошналари бўлмиш руҳоний билан сартарошга ер юзида олтин даврни қайта тиклашга даъват этилган жаҳонгашта рицарларга дунё ҳамма нарсадан ҳам кўпроқ муҳтождир, деб қўярди. Ҳали алдамчилик, макр, ёлғон ҳақиқат ва самимийлик билан қоришиб кетмаган; ҳали на ғараз, на ҳирс, судьялар ўзбошимчилигидан одамлар жабрланган; ҳамма ерда тинчлик ва осойишталик ҳукм сурган ҳамда толеи баланд инсон табиатнинг ажойиб лутф-эҳсонларидан сира ташвишланмай баҳраманд бўладиган ўша бахтиёр давр ҳақида дон Кихот завқ билан гапирарди. У инсонларни ана шу ажойиб кунларга қайтариш тақдир тақозоси билан ўз зиммасида эканига кўр-кўрона ишонарди. Руҳоний дон Кихотга баъзан эътироз билдирар, баъзан унинг фикрига қўшиларди, зотан усталик қилмай туриб бундай фикрларнинг бемаънилигини шўринг қурғур идальгога исботлашни хаёлга келтирмаса ҳам бўларди.

Бироқ дон Кихот ўзининг тентагона режаларига ич-ичидан ишонар ва бунга содиқ қолаверар эди. У уй ичидагилардан яширикча бир деҳқонни, олижаноб (агар олижаноблиги жуда кам



одамни ҳам шу ном билан аташ мумкин бўлса), лекин ўйлаб-не-тиб ўтирмай иш тутадиган одамни ўзига яроқбардор<sup>18</sup> бўлишга ундай бошлади. Дон Кихот уни бу ишга жон-жаҳди билан қизиқтираркан, унга бойлик ва шон-шухрат ваъда қиларди. Дарвоқе, у ўз жасорати билан забт этадиган биринчи оролини ўша деҳқонга бир умрга мулк қилиб беришни ваъда қилди. Унинг гапига қараганда, бундай зафарга жуда тез муддатда эришаркан. Санчо Панса деб аталган бу деҳқон боши айланиб, унинг гапларига чиппачин ишонди-ю, хотини ва болаларини ўз ҳолига ташлаб, дон Кихот хизматига кирди.

Шундан кейин дон Кихот пул топишга киришди: буюмларининг баъзиларини сотди, баъзиларини гаровга қўйиб, анча маблағ тўплади. Бундан ташқари, у оғайниларининг биридан вақтинчаликка думалоқ қалқон олди, пачағи чиқиб кетган дубулгасини тузатди. Ишларини битказиб бўлганидан кейин яроқбардори Санчога фалон кун, фалон соатда йўлга тушиш ниятида эканини маълум қилди-да, асбоб-анжомларини тахт қилиб қўйишини тайинлади. Дон Кихот Санчога сафар тўрвасини олишни унутиб қўймасликни алоҳида таъкидлади. Санчо тўрвани унутиб қўймасликка ваъда берди, шунингдек пиёда юришга унча лаёқати бўлмагани учун эшагини олиш ниятини ҳам айтди. Санчонинг бу гапи дон Кихотнинг кўнглига бир мунча ғулғула солиб қўйди. У жаҳонгашта рицарлардан қайси бирининг яроқбардори эшак миниб юрганини эслашга уриниб кўрди, лекин сира эслай олмади. Аммо бирорта бедаб рицарь билан биринчи тўқнашувдаёқ отини тортиб олиб, эшакка қараганда ўз шаънига анча муносиброқ бу жониворни яроқбардорига беришини хаёл қилиб, кўнгли таскин топди-ю, Санчонинг гапига рози бўлди.

Ниҳоят, ҳамма нарса тахт бўлганидан кейин бир кун кечаси улар ҳеч кимга билдирмай қишлоқдан чиқиб кетишди. Санчо хотини ва болалари билан, дон Кихот эса экономкаси ва жияни билан хайрлашмади. Улар тун бўйи йўл юриб, тонг ота бошлаганда қишлоқдан анча узоқ кетиб қолишган, энди таъқиб этишларидан қўрқишмаса ҳам бўларди.

Ширин хаёлларга ғарқ бўлган Санчо Панса ўз эшагида савлат тўкиб борарди. У ваъда қилинган оролга тезроқ губернатор бўлиш иштиёқида ёнарди. Дон Кихот тасодифан Монтъел текислигидан ўтадиган йўлни танлади, у биринчи саёҳатида ҳам шу йўлдан кетган эди. Лекин ҳозир бу йўлдан бориш мароқлироқ эди: негаки ҳали вақт эрта, қуёш ўз қайноқ нурларини саёҳатчиларимизга ҳали сочганича йўқ эди. Санчо Панса ўз хўжайинига шундай деди:

— Муҳтарам сеньор, жаҳонгашта рицарь жаноблари, тагин орол ҳақидаги ваъдангизни унутиб қўйманг. Орол қанча катта бўлганида ҳам барибир уни бошқара оламан.

Бунга дон Кихот шундай жавоб қайтарди:

— Дўстим Санчо Панса, шуни қулоғингга яхшилаб қуйиб олгинки, забт этган орол ёки подшоликларига ўз яроқбардорлари-

ни ҳоқим қилиб тайинлаш одати қадим замонларда жаҳонгашта рицарлар орасида жуда кенг тарқалган одат эди, мен ҳам ана шу ажойиб одатга амал қилишга қатъий бел боғлаганман. Бироқ бунинг бир лекини ҳам бор. Қадим замонларда рицарлар ўз яроқбардорларига бирор вилоятни кўп йиллик машаққатли хизмати эвазигагина инъом қилганлар. Ваъда қилинган инъомни кутавериб қариб кетган яроқбардорлар ҳам кўп бўлган. Мен бўлсам, башарти икковимиз ҳам тирик қолсак, яқин кунларда бир эмас, бир неча подишоликни забт этаман. Ана ўшанда, дарҳол улардан энг яхшисини сенга ҳадя қиламан. Тағин бекорга лоф уряпти деб ўйлама: биласанми, жаҳонгашта рицарлар етти ухлаб тушингга кирмайдиган ажойиб-ғаройиб ҳодисаларни бошдан кечирадидлар. Инчунун сенга ваъда қилганимдан ҳам кўра аълороқ ҳадя бериш мен учун ҳеч гап эмас.

— Борди-ю, мен,— деди Санчо, қирол бўлиб олсам, унда хотиним Тереса Панса кам деганда қироличаю болаларим шаҳзода ва малика бўлишаркан-да, а?

— Бунга амин бўлавер,— деб жавоб берди дон Кихот.

— Бироқ менинг шубҳам бор,— деди Санчо Панса,— нега десангиз, борди-ю тожлар ерга худди дўлдай ёғилиб кетган тақдирда ҳам Тереса Панса улардан бирортасига муносиб эмас. Ахир у қандай қилиб қиролича бўла оларди, сеньорим! У қиролича сифатида икки чақага арзимайди. Балки, графлик муносиб келар, шунда ҳам худо, ол қулим, деб юборса.

— Буни худойи таолонинг ўзига қўйиб қўявер, Санчо,— деди дон Кихот.— Худойи таолонинг ўзи унга нима лойиқлигини билади, сен бўлса ўзингни бунақа паст ҳам олма, ҳеч бўлмаганда губернаторликдан камини ҳам ўйлама.

— Ўйламайман ҳам, сеньорим,— деб жавоб берди Санчо,— хўжайинимнинг қанчалик қудратли ва қандай олиҳимматлилигидан хабардорман. Марҳаматли жаноб, менга ҳам кучим етадиган, ҳам кўнглимга хуш келадиган лавозимни берсангиз керак, албатта.

## VII БОБ

### ШУ МАҲАЛГАЧА КЎЗ КЎРИБ, ҚУЛОҚ ЭШИТМАГАН, ШАМОЛ ТЕГИРМОНЛАРИГА ҚАРШИ ДАҲШАТЛИ ЖАНГДА ШАВКАТЛИ ДОН КИХОТНИНГ ҒАЛАБА ҚОЗОНГАНИ

Шу пайтда улар даланинг ўртасида қаққайиб турган ўттиз ёки қирқтача шамол тегирмонини кўриб қолишди. Уларни олисданок пайқаган дон Кихот ўз яроқбардорига шундай деди:

— Тақдири азал ишимизнинг кушойишини бериб, омадимиз ўнгидан келяпти. Дўстим Санчо, ҳов анави томонга қара! Ҳов анави текисликда девлар йиғилишиб туришибди. Ҳозир мен уларга қарши жанг бошлаб, бирортасини ҳам қолдирмай қириб ташлайман. Уларнинг битмас-туганмас хазиналари бор: уларни энганимиздан кейин бойиб кетамиз. Буни адолатли жанг дейишади,

бунақанги ёвузларнинг тухумини ер юзидан қуритиш худога хуш келади.

— Қани ўша айтаётган девларингиз?— деб сўради Санчо Панса.

— Хув ана, рўпарангда туришибди-ку!— деб жавоб берди дон Кихот.— Қўлларининг баҳайбатлигини кўряпсанми? Баъзиларининг қўли икки мил келади.

— Сўзимга ишонинг, марҳаматли сеньорим, булар дев эмас, шамол тегирмон, қўл деб айтаётган нарсаларингиз қўл эмас, шамолда айланиб тегирмон тошини юргизадиган парраklar.

— Рицарлик саргузаштларида ҳали тажриба орттирмаганлигинг яққол кўришиб турибди,— деди дон Кихот.— Булар девлар! Агар чўчиётган бўлсанг, бир чеккага чиқиб дуо қилиб тур, мен булар билан тенгсиз ва қақшатқич жангга киришаман!

Дон Кихот шу сўзларни айтаркан, шпорлари билан Росинантнинг биқинига ниқтади-ю, ўз яроқбардорининг охи-зорига қулоқ солмай, от елдириб кетди.

— Қочмаларинг, разил махлуқлар,— деб қичқирди у.— Сизлар кўпчиликсиз! Рақибингиз эса битта рицарь, холос!

Шу дақиқада енгилгина шамол кўтарилиб, улкан парраklar айлана бошлади. Дон Кихот буни кўриб яна қаттиқроқ қичқирди:

— Қўлларингиз баҳайбат Бриарейнинг<sup>19</sup> қўлларидан каттароқ бўлганида ҳам барибир мендан қочиб қутулолмайсиз!

Шундай қилиб, дон Кихот ўз жонини Дульсинея Тобосская хонимга топшириб, энг яқинида турган тегирмонга қараб от солди-ю, қўлидаги найзасини қулочкашлаб унинг паррагига қадади.

Бироқ, шу пайтда кўтарилган кучли шамол парракни айлан-тириб юборди. Найза синиб кетиб, рицарь от-поти билан бир чеккага бориб тушди.

Буни кўрган Санчо хўжайинига ёрдам бериш учун эшагини шитоб билан йўрғалатиб кетди. Тегирмон паррагининг даҳшатли зарбидан гангиб қолган дон Кихот ерда худди ўликдай чўзилиб ётарди.

— Мана кўрдингизми, азизим!— деб хитоб қилди Санчо,— булар девлар эмас, шамол тегирмонлари деб айтмабмидим. Мияси айниб қолган телбаларгина буларнинг тегирмонлигини билмайди.

— Бас қил, дўстим Санчо,— деб жавоб берди дон Кихот,— рицарлик ишларида ҳеч нарсага ақлинг етмайди. Бу менинг кутубхонамни ўғирлаб кетган ўша сеҳргар Фрестоннинг янги найранглари эканлигига ишончим комил. Мени зафар шон-шўхратларига бурканмасин деб девларни тегирмонга айлантириб қўйган ҳам ўша. Ҳа, унинг менга нисбатан бўлган адовати ана шундай кучли. Лекин ғам ема. Бир кунмас-бир кун унинг ҳамма қабиҳ сеҳрларини кунпаякун қилиб ташлайман.

— Дунёда бўлмайдиган иш йўқ,— гапига қўшилди Санчо Панса. Кейин дон Кихотга ўрнидан туришга ёрдамлашиб, уни сеҳрланган девлар билан бўлган ана шу бахтсиз олишувда сал бўлмаса нақ олдинги оёғи чиқиб кетаётган Росинантга миндирди.

Рицаримиз ўзининг содиқ яроқбардори билан ҳозиргина содир бўлган воқеа ҳақида суҳбатлашганича йўлга тушди.

— Ҳаммасидан ҳам найзадан ажралганимизга хафаман,— деди дон Кихот.— Лекин Диэго Перес де Варгас исмли бир испан рицари бошидан кечирган саргузашт ёдимда, жанг пайтида ўша рицарнинг қиличи синиб кетган, ўшанда у дарҳол бир катта дуб шохини синдириб олган-да, ана ўша таёқ билан қанчадан-қанча жасорат кўрсатган, қанчадан-қанча маврларни қириб ташлаган-ки, бунинг натижасида уни Варгас-Таёқ деб атай бошлашган. Мен ҳам худди Варгасдай қиламан, йўлда учраган биринчи дубнинг каттакон, залварли шохини синдириб оламан-да, у билан кўз кўрмаган, қулоқ эшитмаган қаҳрамонликлар кўрсатаман, бундай жасоратларнинг шоҳиди бўлганингдан сен ўзингни энг бахтиёр киши деб биласан!

— Худованди каримнинг эрк-иродаси бениҳоя,— деб жавоб берди Санчо,— сиз жаноби олийларининг ҳамма гапларига ишонаман. Лекин сеньорим, афтидан жуда қаттиқ шикастланганга ўхшайсиз. Бир ёққа оғиб кетяпсиз, эгарга маҳкамроқ жойлашиб ўтириб олинг.

— Гапинг рост,— деди дон Кихот,— оғриқдан шикоят қилмаётганимнинг сабаби шундаки, бутун ичак-чавоқлари ағдариб ташланган тақдирда ҳам жаҳонгашта рицарлар «вой» демасликлари керак.

— Ундай бўлса, мен бунга ҳеч эътироз билдиролмайман,— деб жавоб берди Санчо,— ўз ҳақимда шуни айтишим керакки, борди-ю рицарлик қоидалари жаҳонгашта рицарларнинг яроқбардорларига оғриқдан бақирини ман этмаган бўлса, унда мен эт-бетим сал тилинса ҳам додлайвераман.

Дон Кихот Санчонинг соддалигидан кулиб юборди, рицарлар яроқбардорлари оғриқдан инграшлари керакми-йўқми деган нарсани рицарлик романларида сира ўқимаганини, шундай бўлгач, Санчо Панса хоҳлаганича инграб, дод-вой солавериши мумкинлигини айтди.

Бу орада Санчо қуёшга бир қараб қўйди-да, озгина тамадди қилиб олсак ёмон бўлмасди, деди.

Дон Кихот бунга жавобан ҳали қорни очмаганини, Санчонинг овқат егиси келаётган бўлса тортиниб турмай овқатлана бериши мумкинлигини айтди.

Дон Кихотнинг марҳаматли руҳсатини олган Санчо эшагига қулайроқ жойлашиб ўтирди-да, сафар тўрвасидан овқат олиб ея бошлади. Ҳар ютим овқатдан кейин у мешдаги винодан шу қадар иштаҳа билан ичардики, буни кўрган ҳар қандай карвонсарой эгасининг оғзидан суви келиши мумкин эди. Эшагини оҳиста ҳайдаб, қадам-бақадам винодан ҳўплаб бораркан, саргузашт қидириб ҳар қандай хавфли саёҳатларга ҳам чиқиш меҳнат эмас, жоннинг роҳати экан, деган фикр Санчонинг миясидан жой олган эди.

Бу орада қоронғи тушиб, йўловчиларимиз йўлни буриб, тунагани тўхташди. Дон Кихот яқинроқдаги дарахтдан бир шохини

синдириб олди-да, унга синиб кетган найзасининг тигини боғлаб қўйди. У ўзи севган романларнинг шонли қаҳрамонлари сингари бир дақиқа ҳам мижжа қоқмай, Дульсинеяни ўйлаб тонг оттиришга аҳд қилди.

Санчо бўлса яхшилаб овқатланиб олди-да, эрталабгача донг қотиб ухлади. Дон Кихот уйғотмаганида тўғри юзига тушган қуёш нуридан ҳам, янги кунни қувонч билан қутлаётган сон-саноқсиз қушларнинг сайрашларидан ҳам уйғонмасди. У уйқудан бош кўтариши билан энг аввал мешни чамалаб кўрди, виноси озайиб қолганидан жуда хафа бўлди. У яқин орада мешни винога яна тўлдириб ололмасликдан чўчирди. Лекин дон Кихот нонушта қилишдан воз кечди, чунки аввал айтганимиздек, у ширин хаёллар билан тўйиб юрарди.

Улар Пуэрто Лалисе дарасига қараб йўл олишиб, кундузи соат учларда у ерга етиб боришди.

— Биродарим Санчо,— деди дон Кихот,— бу ерда бизни ажойиб ва ғаройиб саргузаштлар кутиб турибди. Лекин бир нарсани унутмагилки, бошимга ҳар қандай хавф келган тақдирда ҳам сен мени ҳимоя қилиш ниятида қилич кўтармаслигинг керак. Қора халқдан чиққан баъзи бир ярамас қаланғи-қасанғилар тўдаси ҳужум қилган тақдирдагина яроқбардорнинг ўз хўжайинига ёрдамлашишига рухсат этилади. Борди-ю, улар рицарь бўлса, унда рицарлик қонунларига мувофиқ, ҳали сен рицарлик унвонига эга эмас экансан, жангга киришинг қатъиян ман этилади.

— Хотиржам бўлаверинг, сеньор,— деб жавоб берди Санчо,— амри-фармонингизни асло бузмайман; мен табиатан ювош одамман ва ҳеч маҳал олдин мушт кўтаришга жазм этмайман. Лекин шуни очик айтиб қўяйки, башарти ўзимни ўзим муҳофаза қилишга мажбур бўлсам, унда ҳеч қандай рицарлик қонунларига қараб ўтирмай, дилозорлардан ўзимни қўлимдан келганча асрайман.

— Бу сенинг ишинг,— деди дон Кихот,— мен сени огоҳлантириб қўймоқчиман, холос. Рицарларга қарши олишувларимга ҳеч қачон аралашма. Ўз ғайратинг ва жўш урган мардлигингни босиб туришга ҳаракат қил.

— Бу масалада хотиржам бўлаверинг, марҳаматли жанобим. Диний удумларга амал қилиб, якшанба кунларини қандай байрам қилсам, сизнинг буйруқларингизни ҳам шундай бажо этишга ваъда бераман!

### VIII БОБ

#### ҚЎРҚМАС БИСКАЙЛИК БИЛАН ЖАСЎР ЛАМАНЧЛИК ЎРТАСИДАГИ МАШҲУР ЖАНГ

Улар шу масалада суҳбатлашиб боришаркан, йўлда икки бенедиктчи-роҳиб<sup>20</sup> кўринди. Улар туядек-туядек келадиган норғил хачирларда келишарди. Жазирама иссиқ ва чанг йўловчи-

ларни кенг соябонларини тутиб, сафар кўзойнақларини тақиб олишга мажбур қилган эди. Роҳиблар кетидан тўрт ёки беш отлич билан икки пиёда қўриқчилигида бир карета келарди. Кейинчалик маълум бўлдики, каретада ўтирган хоним Севильяга, эрининг ҳузурига келаётган экан. Роҳибларга кўзи тушган ҳамноқ дон Кихот ўз яроқбардорига қичқирди:

— Мана, биродарим Санчо, шундай ажойиб саргузаштнинг устидан чиқиб қолдикки, бунақасини буюртириб ҳам учратиб бўлмайди! Хув анави қора кийимли отличлар ёвуз ниятли сеҳр-гарларнинг ўзи, бунга шубҳа йўқ, улар бирор қироличани ўғирлаб, худо билади, қаерга олиб қочиб кетишаётган экан. Аммо мен қандай қилиб бўлса ҳам уларнинг жирканч найрангларини пучга чиқаришим керак.

— Ўйлаб кўринг, марҳаматли сеньорим, — деб жавоб берди Санчо, — тагин ярамас аҳволга тушиб қолманг. Қора кийимлик бу отличлар оддий бенедиктчи-роҳиблар, каретада эса саёхатчилар келишаётган бўлишлари керак. Шошманг, сеньор! Нима қилаётганингизни аввал яхшилаб ўйлаб кўринг!

— Мен сенга боя айтган эдим, Санчо, рицарлик саргузаштларига ақлинг етмайди деб, лекин мени алдаёлмайдилар!

У шундай деди-ю, от йўртириб кетди. Роҳиблар сўзини эшитадиган жойга яқинлашгач, Росинантни тўхтатиб, баланд товуш билан қичқирди:

— Эй сиз, ёвуз дўзахилар, ўғирлаб олиб қочиб кетаётган олижаноб маликаларни дарҳол қўйиб юборинг, йўқса, қилган жиноятларингизга яраша жазо топасиз, ўлимингиз менинг қўлимда!

Дон Кихотнинг ғалати кўриниши ва бемаъни сўзларини эшитиб ҳайрон қолган роҳиблар хачирларининг жиловини тортиб тўхташди. Ҳайратларидан ўзларига келгач, шундай жавоб беришди:

— Сеньор рицарь, биз ҳеч қанақа ёвуз дўзахилар эмасмиз, авлиё Бенедикт ордени роҳибларимиз. Ўз ишимиз билан йўлга чиққанмиз. Бу каретада ким кетаётгани ёхуд кимни олиб кетаётганлари бизга номаълум.

— Йўқ, мени алдаёлмайсанлар! Сен беномус ёлғончиларни жуда яхши биламан! — деб хитоб қилди дон Кихот.

У шундай деяркан, жавоб ҳам кутиб ўтирмай, шпорлари билан Росинантни бир ниқтади-да, найзасини ўқталганча роҳиблардан бирига ғазаб билан шундай ташландики, агар у ўзини ерга отмаганида эҳтимол дон Кихот уни эгардан уриб туширган ва жуда қаттиқ ярадор қилган ёки биратўла ўлдириб қўяқолган бўларди.

Роҳибнинг ерда ётганини кўрган Санчо эшагидан сакраб тушди-да, унинг кўйлагини еча бошлади. Роҳибларни кузатиб бо-раётган иккала хизматкор ўдағайлаб Санчога ташланишди. Санчо рицарлик қонунларига мувофиқ хўжайини жангда қўлга киритган ўлжани олишга ҳақли эканлигини уларга айтиб беҳуда қичқирарди. Хизматкорлар рицарлик қонунларини етти ухлаб тушларида ҳам кўрмаган эдилар. Дон Кихотнинг саёхатчи аёл

билан суҳбатга тушиб кетганини ва ўз томонларига қарамаётганини кўриб, улар Санчони ерга ётқизиб олдилар-да, чала ўлик қилиб роса дўппосладилар. Бу орада жон-пони чиқиб кетган роҳиб ўрнидан турди-да, хачирига миниб, уни нарида кутиб турган ҳамроҳи ёнига ҳайдаб кетди. Кейин ҳар иккала бенедиктчи бу ғалати воқеанинг нима билан тугашини ҳам кутиб ўтирмай, кетларидан иблис изма-из қувиб келаётгандай қўрқиб, чўқинганларича илгарилаб кетдилар.

Бу пайтда дон Кихот каретада ўтирган хонимга шундай сўзлар билан мурожаат қиларди:

— Зоти олийлари озод қилиндилар,— деб гап бошлади у,— энди нимани хуш кўрсалар шуни қилаверсинлар, чунки ўзларини ўғирлаганларнинг номуссизлиги менинг забардаст билакларим зарби остида кўкка совурилди. Лекин сиз ўз халоскорингизнинг номини билиб олишингиз керак. Мен оламда беқиёс ва гўзал донья Дульсинея Тобосскаянинг асири бўлмиш жаҳонгашта рицарь ламанчлик дон Кихот бўламан. Мен сизга кўрсатган хизматим мукофотига фақат бир нарсанигина сўрайман: Тобосога бориб, қалбим ҳоқони бўлмиш маликам ҳузурига кириг-да, сизга озодликни мен туҳфа қилганимни айтинг.

Келиб чиқиши бискайлик<sup>21</sup> бўлган, каретани кузатиб бораётган отбоқарлардан бири ўзларининг Тобосога қайтишларини дон Кихотнинг талаб қилаётганини эшитиб қолиб, от қўйиб келди-да, рицаримиз найзасини ушлаб олиб, испанчани бузиб қичқирди:

— Йўлингдан қолма, рицарь, жўна! Ҳозироқ каретани қўйиб юбор, бўлмаса худо ҳақи қасамёд ётаманки, бошингни сапчадай узиб ташламасам бискайлик номимни бошқа қўяман!

Дон Кихот унинг гапларини яхши тушуниб, муносиб жавоб қилди:

— Ярамас махлуқ! Хизматкорсан-да, башарти рицарь бўлганингдами, қўполлигинг ва безбетлигинг учун адабингни бериб қўярдим-а.

— Қанақасига мен рицарь эмас эканман! Худо ҳақи ёлғон гапиряпсан! Қани найзангни ташлаб, қиличингни ол-чи! Мен бискайликман, денгизда ҳам, қуруқликда ҳам идальгоман. Рицарманми, рицарь эмасманми, буни сенга бир кўрсатиб қўяй,— деб қичқирди ғазаби қайнаб бискайлик.

Бу қўрслик дон Кихотни ғазаблантириб юборди.

— О, қалбимнинг ҳоқони, гўзалларнинг гули Дульсинеям, саховатингизни тан олиб, мардона жангга кираётган рицарингизга мадад беринг.

У шундай деди-ю, найзани ерга улоқтириб, қилични олди-да, ҳаддан зиёд мардоналик билан бискайликка ташланди. Бироқ бискайлик ҳам қўрқиб-писиб ўтирмади. Кўз очиб-юмгунча каретадаги ёстиқни олиб кўксига қалқондай тутди-ю, жойидан қўзгалмай душманини кутганча тураверди. Томошабинлар бу даҳшатли олишувни чурқ этмай кузата бошладилар. Каретадаги хоним билан унинг оқсочлари авлиёларга нола қилиб, ўз хизматкорларига мадад тилай бошладилар.

Энг аввал жиззаки бискайлик зарба берди. У душманга шу қадар ғазаб ва куч билан ташландики, қўлидаги қиличи айланиб кетмаганида борми, бу зарба орадаги даҳшатли яккама-якка олишувгагина эмас, балки умуман рицаримизнинг бундан кейинги саргузаштларига ҳам чек қўйган бўларди. Лекин янги жасоратлар кўрсатиш учун дон Кихотнинг жонини асраб қолган мурувватли тақдир рицаримиз душманининг қўлидаги қилични айлан-тириб юборди-ю, бунинг натижасида қилич рицарнинг чап елкасини ялаб ўтди. Бироқ унинг дубулгаси синиб, қулоғининг бир чеккасини ялаб кетди, совутининг чап ёни узилиб, жаранг-журунглаб ерга тушди.

Дон Кихотнинг шу топда ғазаби қанчалик қайнаб кетганини тасвирлашга қалам топилармикан? У узангига оёқ тираб қаддини ростлади-да, бискайликнинг бошига шундай қаҳр билан қилич солдики, унинг оғзи, бурни, қулоқларидан шариллаб қон оқа бошлади, ўзи эгарда чайқалиб кетди, агар хачирининг бўйнини қучоқлаб қолмаганида эгардан учиб тушарди. Жилов қўлидан қичиб кетди, узангидан оёқлари сирғаниб тушди, ҳуркиб кетган хачир далада шаталоқ отиб чопиб бораётиб, хўжайинини ерга йиқитиб юборди.

Бискайлик ерга йиқилгач, дон Кихот отидан сакраб тушиб, шикастланган душманнинг олдига югуриб борди-да, бошида қилич ўйнатиб, таслим бўл, деб қичқирди. Бироқ бискайлик каловлаб қолганидан бир оғиз сўз ҳам айтолмади. Олишувнинг оқибати бу бечора учун бундан ҳам бешбаттар бўлиши мумкин эди, ғазабдан ўзини йўқотиб қўйган дон Кихот уни аямасди. Бироқ бу шўрликнинг бахтига яккама-якка олишувни кузатиб турган малика каретадан сакраб тушди-да, хизматкоримнинг бир қошиқ қонидан кеч, деб ялинмоқчи бўлиб рицарь томонга югурди.

— Хизматингизга ҳамиша тайёрман, гўзал маликам, — деди дон Кихот виқор ва салобат билан, — илтимосингизни бажонидил бажараман, лекин бунинг бир шарти бор: бу рицарь Тобосо деган қишлоққа бориб, менинг номимдан оламда тенги йўқ донья Дульсинея оёғига йиқилишга ваъда бериши керак, кейин Дульсинея бунини нима қилса ўзи билади.

Қўрқиб кетган ва ранжиган малика унинг нималар деяётганини яхши англамай, ҳатто Дульсинеянинг кимлигини сўраб ҳам ўтирмай, рицарга хизматкори унинг буйруғини айтганидай қилиб бажаражагига сўз берди.

— Ваъдангизга ишонаман, — деди дон Кихот, — гарчи қаттиқ жазога лойиқ бўлса ҳам гуноҳидан кечаман унинг.

## IX БОБ

### ДОН КИХОТ БИЛАН САНЧО ПАНСА ЎРТАСИДАГИ АНТИҚА СУҲБАТ

Роҳибларнинг хизматкорлари уриб дабдала қилиб ташлаган Санчо Панса бир амаллаб ўрnidан турди-да, дон Кихотнинг як-



кама-якка олишувини зўр диққат билан кузата бошлади. У, рицаримизга ғалаба тилаб, хўжайини губернаторлигини ваъда қилган бирор оролни забт этишига мадад беришини сўраб астойдил худога илтижо қила бошлади. Жанг тамом бўлганини ва хўжайиннинг Росинантга минмоқчи бўлаётганини кўриб югуриб борди-да, оёғига тиз чўкиб, қўлини ўпди ва шундай деди:

— Сеньорим дон Кихот, марҳаматингизни аямай, бу даҳшатли жангда қўлга киритган оролингизнинг губернаторлигини инъом этсангиз менга. Бу орол қанчалик катта бўлмасин, уни оламдаги барча губернаторлардан кам бошқармаслигим ва буни удалай олишимга кўзим етиб турибди.

Бунга дон Кихот шундай жавоб берди:

— Шунга билиб қўйки, биродар Санчо, жаҳонгашта рицарлар йўлларнинг чорраҳаларида бунақа ҳодисаларга тез-тез дуч келиб турадилар: бундай пайтларда бошинг ёрилиши ёки қулоғингдан ажрашинг мумкин, лекин бундан бирор манфаат кўролмайсан. Сабр қил, бундан муҳимроқ ҳодисаларга ҳам дуч келамиз ҳали, ўшанда сени орол губернаторлигигагина эмас, ундан ҳам юқорироқ бирорта амалга қўяман.

Санчо дон Кихотга самимий миннатдорчилик билдириб, унинг қўлини ва совутининг этагини ўпди-да, Росинантга миншига ёрдам берди, кейин эшагига миниб, хўжайини кетидан жўнади. Дон Кихот каретада ўтирган маликага бир оғиз ҳам сўз айтмай, хайр-маъзурни насия қилиб, отини йўрттириб кетди. Санчо унинг орқасидан зўр бериб эшагини лўкиллашиб борар, бироқ эшак Росинантга етолмасди. Кўп ўтмай Санчо орқада қолиб кетди. Шунда у, мени кутиб тур, деган мақсадда хўжайинига қичқирди. Унинг қичқирган товушини эшитган дон Кихот Росинантни тўхтатди. Санчо унга етиб олиб бундай деди:

— Бирор черковга яширинсак оқилона иш қилган бўламиз деб ўйлайман, сеньор, чунки ҳозир сиз олишган одам шундай оғир яраландики, буни Санта Эрмандадга<sup>22</sup> хабар қилишса ажаб эмас. Унда бизни қамаб қўйишади, у ердан қутулиб чиққунча эса кўрадиганимизни кўрамиз.

— Бас қил, — деди дон Кихот. — Яккама-якка олишувда ўз рақибини ўлдиргани учун жаҳонгашта рицарни турмага ташлаш бу сира бўлмаган гап!

— Одам ўлдириш ҳақида ҳеч нарса билмайман, — деб жавоб берди Санчо, — умримда бунақа ишни қилмаганман, лекин Санта Эрмандаднинг катта йўлларда ёқалашадиган одамлар билан жуда қизиқишини яхши биламан.

— Ташвишланмай қўяқол, дўстим, — деди дон Кихот, — мен сени ҳар қандай турмадан ҳам қутқара оламан. Лекин менга виждонан шунга айт-чи: дунёда мендан довурак бирор рицарни кўрганмисан сира? Ҳамла қилишда мендан кўра жасоратли, ҳимояда матонатли ва зарба беришда эпчилроқ рицарь борлигини ўқиганмисан романларда?

— Ростини айтсам, — деди Санчо, — умрим бино бўлиб бирор романни ўқимаганман, чунки ўқишни ҳам, ёзишни ҳам

билмайман. Аммо гаров боғлашишга ҳам тайёрманки, дунёга келганимдан бери сиздан жасурроқ жанобга хизмат қилмаганман. Фақат сизни ана шу жасоратингиз учун ҳозиргина мен тилга олган ўша хилват жойда жазонгизни тортмасангиз бўлгани. Бироқ, муҳтарам сеньор, ўз гамингизни ҳам ейишингиз керак, ахир кулоғингиздан тирқираб қон оқапти, менинг тўрвамада эса титилган ип\* билан бир оз оқ малҳам бор.

— Шифобахш, мўъжизакор Фьерабрас малҳамини қандай тайёрлашни унутиб қўймаганимда-ку,— деб жавоб берди дон Кихот,— буларнинг ҳаммаси ортиқча эди-я! Ана ўша малҳамдан зиғирчаси бўлганда ҳар қандай жароҳатни тузатиб юборарди.

— У қанақа малҳам? — деб сўради Санчо Панса.

— У малҳамнинг таркибини жуда яхши эслайман,— деб жавоб берди дон Кихот.— Шошмай тур, дастлаб учраган қишлоққа кириб боришимиз биланоқ сенга ўша дорини тайёрлаб бераман. Агар вақти келиб жангда бирор қудратли душман мени икки бўлак қилиб чопиб ташласа (жаҳонгашта рицарлар бундай ҳодисага учраб турадилар), унда ерга ағдарилиб тушган ярим бўлагимни эҳтиёт билан кўтариб олда, уни эгарда қолган ярим бўлагимга бириктир, лекин билиб қўй, иккала бўлагим жуда тўғри бўлсин. Шундан кейин менга ўша малҳамдан икки-уч қултум ичир, қарабсанки ҳеч нима бўлмагандек соппасоғайиб кетаман.

— Ундай бўлса,— деди Санчо,— менга ҳеч қанақа губерна-торликнинг кераги йўқ. Сизга кўрсатаётган чексиз ва садоқатли хизматим эвазига сиздан фақат бир нарсани сўрайман: менга ана шу ажойиб дорининг таркибига кирадиган дориворларнинг рўйхатини берсангиз бас, марҳаматли жанобим. Сира шубҳам йўқки, ўша малҳамингизнинг бир мисқолини ҳаммавақт ва ҳамма ерда икки реалга, балки ундан ҳам қимматроққа пуллаш мумкин. Бу эса умримни ҳалол ва тинч яшаб ўтказишимга етарлидир. Ҳа, айтгандай, бунақа дорини тайёрлаш қимматга тушади-ми?

— Уч реалга унинг уч асумбрасини<sup>23</sup> тайёрлаш мумкин,— деб жавоб берди дон Кихот.

— Ундай бўлса нимани кутиб турибсиз, марҳаматли сеньор!— хитоб қилди Санчо.— Ўзингиз ўша дорини тайёрласангиз, менга ҳам ўргатсангиз бўлмайдими?

— Жим бўл, дўстим,— деб жавоб берди дон Кихот,— ҳали мен сенга бундан ҳам катта сирларни айтаман, бундан ҳам ортиқ лутф-эҳсонларга кўмиб юбораман. Энди кулоғимни тузатиш чорасини кўрайлик, унинг оғриғи жонимдан ўтиб кетяпти.

Санчо тўрвасидан титилган ип билан малҳам олди. Дон Кихот дубулғасини оларкан, унинг пачоқланиб кетганини кўриб ақлдан озишига сал қолди. Қўлини қиличига қўйиб ва кўкка кўз тикиб туриб шундай деди:

\* Латтадан титиб олинган ип: илғари вақтларда ярага бойлаш учун пахта ўрнида ишлатиларди. (Тарж.)

— Ун саккиз минг оламни яратувчиси ва тўрт муқаддас китоб ҳақи қасамёд этаманки, буюк маркиз Мантуанский ўз жияни Балдуиннинг ўлими учун қасос олишга қасамёд этгандан кейин қандай яшаган бўлса, мен ҳам бундан буён шундай яшайман; мени бундай ҳақоратлаган шахсдан қасос олмагунимча дастурхондан нон емасликка, ую кулбаларда тунамасликка, яроғ-аслаҳаларимни ечмасликка ва уйимга қайтмасликка қасам ичаман.

Санчо бу сўзларни эшитиб шундай деди:

— Нималар деяпсиз, муҳтарам жанобим, сеньор дон Кихот! Агар сиз энгган рицарь буйруғингизни бажо келтириб, Дульси-нея Тобосская хоним ҳузурига оёғига бош ургани жўнаган бўлса, унда сизнинг олдингизда у бегуноҳ ва янгитдан жиноят қилмагунимча яна жазоланишга лойиқ эмас-ку, ахир.

— Гапинг тўғри, Санчо,— деб жавоб берди дон Кихот.— Мен ўша рицардан қасос олишдан воз кечаман. Лекин мен бошқа бирор рицардан худди мана шу дубулғамдай ажойиб дубулгани тортиб олмагунимча ўз қасамимга содиқ қоламан. Яна мени, оғиз кўпиртиряпти, деб ўйлама. Ахир мен буюк кишилардан ибрат олиб, уларнинг изидан бораман: Мамбриннинг дубулғаси билан ҳам шундай бўлган бу Сакрипантга жуда қимматга тушган.

— Бундай ниятларингиз балога даф бўлсин-е, муҳтарам жаноб!— хитоб қилди Санчо.— Бу фақат соғлиққа зиён, виждон азоби-ку. Борди-ю, дубулға кийган одамни яқин орада учратолмасак-чи? Унда нима қиласиз? Наҳотки, ақлдан озган ўша кекса маркиз Мантуанский изидан бориб, кийимингизни ечмай ухлаб, очик ҳавода тунаб, хуллас, ўзингизни минг азобга мубтало қилиб, бу ниятингизни амалга оширмақчи бўлсангиз? Ўзингиз ўйлаб кўринг марҳаматли сеньор бу йўллардан қуролланган рицарлар эмас, балки шу атрофда яшовчи оддий подачилар билан тинч аҳоли қатнайди-ку, ахир. Бу бечоралар дубулгани кўриш у ёқда турсин, бундай нарсга борлигини эшитмаган бўлсалар ҳам керак.

— Янглишяпсан,— деб жавоб берди дон Кихот.— Орадан икки соат ўтар-ўтмас гўзал Анжелика туфайли Альбракни<sup>24</sup> қамал қилган қўшинлардан ҳам кўпроқ қуролланган кишиларга дуч келаман.

— Ҳа, майли, сиз айтгандай бўла қолсин,— деб жавоб берди Санчо.— Лекин худо ёр бўлиб, тезроқ омадимиз келсин-у, менга жуда қимматга тушадиган ўша оролни забт этайлик, ана ундан кейин ўлсам армоним йўқ.

— Бундан ташвишланмагин, деб айтдим-ку сенга, Санчо орол бўлмаса, худди узукка кўз кўйгандай сенга жуда боп келадиган бирорта қироллик, масалан Дания ёки Собрадистга ўхшаш мамлакат топилиб қолар, бундан фойда қилсанг қиласанки, зиён кўрмайсан, ахир қироллик бу чор атрофи қутурган денгиз билан қўршалган бирорта кичкинагина орол эмас-ку; ҳа, у ерга сув кечиб хавф-хатарда эмас, қўруқликдан хотиржам-

гина борса ҳам бўлади-ку. Дарвоқе,бу ҳақда вақти соати келганда гаплашамиз, ҳозир тўрвангни қараб кўр-чи, ейдиган бирор нарса бормикин. Тамадди қилиб олгач, бирор қалъани излаб йўлга тушамиз, ўша ерда тунаймиз, боя сенга айтган дорини тайёрлайман, нега десанг, худо ҳақи, қулоғимнинг оғриғига ҳеч чидаёлмаяпман.

— Тўрвамда атиги бир дона пиёз, бир бўлак пишлоқ, бир-икки бурда нон бор,— деди Санчо.— Булар сиздек мард бир рицарга арзимайдиган овқат, марҳаматли хўжам.

— Бу масалада жуда калтафаҳмсан-да!— хитоб қилди дон Кихот.— Қулоғингда бўлсинки, Санчо, жаҳонгашта рицарларнинг мардлиги ва жасорати — ойлаб овқат етмай юраверишда! Ҳар ҳолда улар овқат танлаб ўтиришмайди, тўғри келган нарсани еб кетаверишади, агар менчалик кўп роман ўқиганингда эди, машҳур рицарларнинг ўз шарафига берилган зиёфатлардагина овқат ейишларини, бошқа вақтларда эса гулларнинг исига маст бўлиб юраверишларини билган бўлардинг. Фақат гулларнинг ҳиди билангина қорин тўйғазмай, бошқа зарур нарсаларни ҳам ейишган бўлиши керак, албатта. Ахир, рицарлар ҳам ҳаммага ўхшаган одам, шундай бўлгач, овқатланмасликлари мумкин эмас. Умрларининг кўпини ўрмонзор ва чўлу биёбонларда ўтказганлари учун худди ҳозир сен менга таклиф қилаётган оддий қишлоқона овқатлар билан кифояланган бўлсалар керак. Шунинг учун, дўстим Санчо, менга қувонч бахш этган нарсадан сен ранжимай кўяқол, нега десанг, мен учун аждодларимдан ибрат олишдан ҳам ҳузурлироқ нарса йўқ. Бутун фикри ёдини қусуру иллат ва гуноҳга ботган оламни қайтадан янгилашга қаратган одам овқат ҳақида ўйлармиди! Мени жаҳонгашта рицарлик муқаддас урф-одатларини бузишга мажбур этишга уринмай кўяқол.

— Муҳтарам жанобим, кечиргайлар,— деб жавоб берди Санчо.— Мен ўқишни ҳам, ёзишни ҳам билмайман-ку, ахир. Шундай экан, рицарлик қоидаларидан қандай хабарим бўлсин. Бундан буён сиз учун қопда қуритилган турли меваларни олиб юраман, ўзимга бўлса ҳам мазали, ҳам ёғлиқроқ бирор нарса гамлаб оламан.

— Мен, жаҳонгашта рицарлар қуруқ мевадан бошқа ҳеч нарса ея олмайдилар деяётганим йўқ,— эътироз билдирди дон Кихот.— Улар одатда қуруқ мевалар билан, яна далада ўсадиган баъзи бир гиёҳлар билан тамадди қилишарди демоқчи эдим, холос. Мен ана ўша гиёҳларни яхши биламан, уларни топишга ҳам қодирман.

— Мана бу жуда ҳам фойдали илм экан,— тан берди Санчо,— вақти келиб унинг асқотиши турган гап, буни юрагим сезиб турибди.

ДОН КИХОТНИНГ ЯНГУЭСЛИК ОТБОҚАРЛАР БИЛАН БЎЛГАН МАШЪУМ  
УЧРАШУВИ

Шу ерга келганда дон Кихот билан Санчо ўз йўрғаларидан тушдилар, озиқ-овқат солинган тўрвани очдилар, унда борини осойишта ва иноқлик билан, ўз мартабаларига қарамай, дўстона баҳам кўра бошладилар.

Бу орада Росинант билан эшак қуюқ ўтзорда бемалол ўтлаб юришарди. Санчо Росинантнинг ювошлигига ишониб уни кишанламади. Бироқ тақдир ёки тўғрироғи, шайтон қалтис ҳазил қилиб дўстларимиз бошига оғир маломатлар солди. Шу ўтлоқда янгуэслик отбоқарларнинг отлари ҳам ўтлаб юрарди. Елғизликда зерикиб қолган Росинант отларни кўриб улар ёнига йўрғалаб кетди. Бироқ Янгуэс тулпорлари Росинантни жуда совуқ кутиб олишди, биргалашиб бечорани тишлашга, тепишга киришишди. Орадан бир дақиқа ҳам ўтмай Росинантнинг қоринбоғи узилиб кетиб, эгари шалоп этиб ерга тушди. Шовқинни эшитиб отбоқарлар югуриб келишди. Улар ўз уюрларида бегона отни кўриб, сўйиллари билан шўринг қурғур Росинантнинг шундай таъзирини бердиларки, у нақ чалажон бўлиб ерга йиқилди.

— Дўстим Санчо,— деди дон Кихот,— буларнинг рицарь эмас, балки пасткаш ҳамда разил одамлар эканлиги кўриниб турибди. Винобарин, Росинант учун улардан қасос олишда менга дадил ёрдам беришинг мумкин.

— Улардан қандай қасос олиш мумкин,— деб сўз қотди Санчо,— ахир улар йигирма кишидан ошиқ бўлса, биз эса аслида бир ярим-у, санокда икки киши бўлсак.

— Елғиз ўзим юзтасига бас келаман,— деди Дон Кихот. Шундан кейин ортиқча гапириб ўтирмай қиличини яланғочлади-ю, янгуэсликлар устига ташланди. Ўз хўжайинининг жасоратидан далда олган Санчо Панса ҳам унинг кетидан жангга ташланди. Дон Кихот биринчи зарбадаёқ отбоқарлардан бирини оғир ярадор қилди. Аввалига янгуэсликлар бир дақиқа ҳангу манг бўлиб қолишди, лекин ҳужумга отилган икки киши эканини кўриб ўзларини анча босиб олишди-да, сўйилларини ишга солишди. Улар рақибларини қуршаб олиб, чаққонлик ва эпчиллик билан беаёв савалайверишди. Бу тенгсиз жанг узоққа бормади: бир неча дақиқа ўтмаёқ Санчо ерга чўзилиб қолди, бу олишувда бор маҳорати ва мардлиги ҳам кўп иш беролмаган дон Кихот эса Росинантнинг оёқлари ёнига қулади. Чунки ғазоби кўзиган деҳқонлар қўлида сўйил даҳшатли қуролга айланиб кетади-да. Отбоқарлар ўз душманларининг қимир этмай ётганини кўриб, бу нотаниш кишиларни ўлдириб қўйибмиз, деб ўйлашди. Янгуэсликлар ўзларини қотилликда айблаб, жавобгарликка тортишларидан қўрқиб, шоша-пиша отларига юкла-

рини ортдилар-у, ерпарчин бўлиб ётган икки саргузашт излов-  
чини шу аҳволда қолдирганча йўлларига равона бўлдилар.

Аввал Санчо Панса ўзига келди. Кўзини очиб у ёқ-бу ёққа қараркан, ёнида ётган хўжайинига кўзи тушиб:

— Сеньор дон Кихот! Ҳой, сеньор дон Кихот! — деди оҳиста,  
мунгли оҳангда.

— Нима дейсан, биродарим Санчо! — инграб жавоб қилди  
дон Кихот.

— Сиз марҳаматли жанобимнинг бир-икки томчи Ферта Бла-  
се малҳамини мендан аямасликларини истардим, — деб жавоб  
берди Санчо Панса. — Балки бу малҳам рицарь қиличи зарбини  
тузатганидек, деҳқон сўйили зарбидан етган жароҳатга ҳам  
шифо берар.

— Ҳайҳот! — хитоб қилди дон Кихот! — Бундай малҳами-  
миз бўлганда-ю, бошқа ҳеч нарсанинг ҳожати йўқ эди-я. Аммо-  
лекин жаҳонгашта рицарь шарафи-ла қасамёд этаманки, Санчо  
Панса, агар тақдир тўғаноқ бўлмаса, уни икки кунга қолмай  
топаман.

— Муҳтарам жанобим, бу қонталашиб мўматалоқ бўлиб  
кетган жойларимиз қачон тузалиб кетаркин? — деб сўради Сан-  
чо Панса.

— Ҳазимнинг қонталаш жойларим майлику-я, — деб жавоб  
берди роса калтакланган рицарь, — аммо мени ҳамма нарсдан  
кўра юз берган воқеага ўзим айбдорлигим қийнапти. Рицар-  
лик унвонини олмаган кишиларга қарши қилич кўтармасли-  
гим керак эди. Ана шу рицарлик қонунларини бузганим учун  
ҳам жанглар худоси мени ҳақли равишда жазолади. Ҳа, Санчо  
Панса, айтадиган гапларимни қулоғинга қуйиб ол, негаки бу  
ҳар икковимизга ҳам фойдали: манфур авомнинг бизга ташлан-  
моқчи бўлаётганини кўришинг биланок менинг қилич яланғоч-  
лашимни кутиб ўтирмай, ўз қиличингни олгин-у, кўнглинг хоҳ-  
лаганича адабини бериб қўй. Борди-ю, авомнинг ёнини рицар-  
лар оладиган бўлса, унда мен сени ҳимоя қилишга ва уларга  
муносиб зарба беришга қодирман. Ахир бу шавкатли қўлларим-  
нинг қудрати нақадар буюк эканлигига амалда ҳазор бора  
ишондинг-ку.

Бечора сеньоримиз жасур бискайликни енганидан кейин  
ана шундай мағрурланиб кетганди. Бироқ Санчо Панса бу ху-  
сусда хўжайинига қараганда бошқачароқ фикрда бўлгани учун  
индамай қўяқолиш ўрнига шундай деб жавоб берди:

— Сеньор, мен беозор, камсуқум, мўмин-қобил, ким қандай  
хафа қилса ҳам хўп деб кетаверишга тайёр одамман, чунки  
менинг хотиним, бола-чақам бор, уларни боқиб катта қилишим  
керак. Ана шунинг учун ҳам, сиз марҳаматли жанобимнинг  
руҳсатлари билан, на авомга, на рицарларга қарши сира-сира  
қилич кўтармайман. Мени хафа қилганларни ва бундан буён  
хафа қиладиганларни олдиндан кечираман. Мени кимки хафа  
қилмасин, аслзодами ё авомми, бадавлатми ё камбағалми,

идальгоми ё деҳқонми, ҳар қандай одам бўлса ҳам барибир: мен ҳеч кимга тегмайман.

Дон Кихот буни эшитиб шундай деди:

— Қани энди қовурғаларим бунчалик оғримаса-ку, сенинг қанчалик янглишаётганингни тушунтириб берсам, Санчо. Сўзларимга қулоқ сол, гуноҳқор банд. Ўзинг тасаввур қилиб кўр, борди-ю, биздан мурувватини дариг тутаетган тақдир шамоли тўсатдан майлимизга қараб эсса-ю, орзу-истакларимиз елканини қапайтириб, бизни мен сенга ваъда қилган ўша оролнинг гаванига олиб бориб қўйса. Ўшанда сен ўзингнинг бу янги лавозимингни уддалаёлмассан деб қўрқаман. Чунки сен хафа қилганлари учун қасос олишни, ўз шаънингни қахрамонона ҳимоя қилишни ва ўз ҳуқуқларинг учун мардона курашишни истамаёпсан. Ваҳоланки, одатда забт этилган мамлакатларнинг аҳолиси янги ҳокимга нохушлик билан истар-истамас бўйсунадилар. Ана шундай аҳоли устидан ҳукмронлик қилиш учун эса ҳоким мард ва қатъий бўлиши зарур.

— Ҳозир мен мухтарам жаноблари тилга олганларидек мард ва қатъий бўлишни истардим,— деб жавоб берди Санчо Панса,— сабаби, аҳволим жуда оғир. Қамбағаллик шаъним билан қасамёд этаманки, мен ҳозир насихатдан кўра дори-дармонга муҳтожман. Сеньор, ўрнингиздан туришга ҳаракат қилиб кўринг, зотан у бунча ҳурматга лойиқ бўлмаса-да, Росинантнинг туришига ёрдам берайлик. Ахир бу кўргиликларнинг сабабчиси-да у. Мен Росинантдан бундай учарликни сира-сира кутмаган эдим, уни ҳам ҳаминша ўзимдай ақлли ва ювош деб ўйлардим. Ўз яқинларингнинг ичидагисини билиб олиш осон эмас, деб жуда тўғри айтишаркан. Сиз қилич ўйнаиб ўша бечора жаҳонгашта рицарга ғолибона зарбалар берганингиздан кейин кўп ўтмай таёқдан елкаларимиз яғири чиқади деб ким ўйлабди дейсиз!

— Сенинг елкаларинг-ку, Санчо, бунга ўрганиб қолган-а, аммо ҳеч ким ҳеч қачон бармоғини ҳам тегизишга журъат этолмаган менинг елкаларимни айтмайсанми,— деб жавоб берди дон Кихот.— Башарти мен кўплаб рицарларнинг бошига худди шундай мусибатлар тушган деб ўйламаганимда — нималар деяпман ўзи! Агар бунга имоним комил бўлмаганида, аллақачон алаимга чидаёлмай оламдан ўтган бўлардим.

Унинг бу гапларига яроқбардори шундай деб жавоб берди:

— Модомики жаҳонгашта рицарларнинг бошига бундай мусибатлар туриши муқаррар экан, сеньор, марҳамат қилиб менга айтинг-чи, бошимизда ҳадеб шунақа калтак синаверадими ёки орадан бирор маълум муддат ўтиши керакми? Шундақанги яна иккита ҳодисага дуч келгудек бўлсак бардош бера олмаймиз деб қўрқаман!

— Дўстим Санчо, шуни билиб қўйгилки,— деб жавоб берди дон Кихот,— жаҳонгашта рицарларнинг ҳаёти хавф-хатар ва мусибатлар билан тўла, лекин бунинг эвазига улардан ҳар қайси-си қироллик ва ҳатто императорлик тожигга эга бўлишни умид

кила олади. Биқинларим бунча қаттиқ оғримаганида-ю, улардан баъзиларининг бир сафар кўрсатган жасорати билан қироллик тахтига чиққанини сенга айтиб берардим. Лекин, ҳатто шундан кейин ҳам улар азоб-уқубат ва мусибатларга кўп марталаб бардош берганлар. Бу хусусда рицарлик тақдирининг бевафоллигини ўз бошидан кечирган довюрак галлиялик Амадис ажойиб мисол бўла олади, бир кун у ўзининг ашаддий душмани сеҳргар Аркалайнинг қўлига тушиб қолади. Аркалай уни ўз қалъаси ҳовлисидаги устунга боғлаб қўйиб, отининг югани билан нақ икки юз мартадан ортиқроқ савалаган. Шунинг учун ҳам бошимга тушган азоб-уқубатдан нолиш мутлақо ярашмайди, чунки ана ўша довюрак ва олижаноб кишилар бошига тушган бахтсизлик меникидан юз чандон ортиқроқ. Бунинг устига, қўлга тасодифан тушиб қолган қурол билан етказилган жароҳат уят ҳисобланмайди. Бу хусусда яккама-якка олишувлар тўғрисидаги қоидаларда аниқ кўрсатмалар борки, унда шундай дейилади: «Борди-ю, бир этикдўз қўлидаги қолипи билан бошқа бир этикдўзни урса, унда гарчанд бу қолип ёғочдан ясалган бўлса-да, калтак еганим таёқ билан калтакланган деб ҳисоблаб бўлмайди!» Бу бадбахт олишувда бизнинг шаънимизга доғ тушди деб ўйлама, чунки бу одамлар оддий таёқлар билан жанг қилди. Менимча, уларнинг бирортасида на қилич, на найза, на ханжар бор эди.

— Уларнинг нима билан жанг қилаётганларини кўришга менда вақт бўлмади,— деб жавоб берди Санчо.— Хаш-паш дегунча улар қўлларидаги таёқлари билан шундай сийлаб беришдики, кўз ўнгим қоронғилашиб, оёқларим чалишиб кетди. Бунинг устига, таёқ еганим учун шаънимга доғ тушдими ё йўқми, буни ўйлаб ҳам ўтирмайман. Бу зарбаларнинг қовурғаларимдаги сингари хотирамда ҳам чуқур из қолдирганларининг ўзи ҳам етиб ортади.

— Шунини билиб қўйки, ошнам Санчо,— деди дон Кихот,— унутилмайдиган алам ҳам, ўлим даволай олмайдиган жароҳат ҳам йўқ.

— Наҳотки фақат вақт енгиллатиб, ўлим эса даволай оладиган мусибатлардан ҳам ёмонроқ ғам-алам бўлса оламда? — деб жавоб берди Санчо.— Агар дардимизга оддий малҳам даво бўлганда-ку, алам демас эдим-а буни, лекин, назаримда, барча дори-дармонлар ҳозир бизга ёрдам беролмайди.

— Умидсизланма, дўстим Санчо! Мана мендан ибрат ол,— деди дон Кихот.— Кел, яхшиси Росинантнинг ҳолидан хабар олайлик. Бу шўрлик ҳам биздан кам жафо кўрмаган бўлса керак.

— Жаҳонгашта тулпор бўлганидан кейин,— деб жавоб берди Санчо,— бунинг ажабланадиган жойи йўқ. Эшагимнинг эсон-омон қолганига хурсандман, бизларнинг теримиз шилиниб кетишига сал қолган бир пайтда унинг бир тола тукига ҳам зиён етмади.

— Бахтсизлик юз берганда тақдир тақозоси билан ҳамиша



ундан қутулишнинг бирон иложи топилади,— деди дон Кихот.— Мен бу гапни шунинг учун айтяпманки, эшагинг бу гал Росинантнинг ўрнини босиши ва бирор қалъага элтиши керак, токи у ерда жароҳатларимни даволаб, менга ғамхўрлик кўрсатгайлар. Мен умуман эшак миниш рицарни камситади, деб ўйламайман, хушчақчақ кулги худосининг тутинган отаси ва мурабийси хушфёъл кекса Силеннинг Юзёлгон шахрига ажойиб эшак миниб борганини қаердадир ўқиганим эсимда.

— Ҳазратлари, у киши эшакка миниб олган бўлсалар керак,— деди Санчо.— Ахир, эгарга миниш билан худди ичига ахлат солинган қопдек кўндалангига ётишнинг фарқи бор-да.

Бунга дон Кихот шундай деб жавоб берди:

— Жангда яраланиш ҳамиша шуҳрат келтиради, дўстим Панса. Шундай экан, баҳслашиб ўтирмай, яхшиси, мени эшакка қулайроқ кўндириш тараддудини кўр. Тунгача бу хилват жойда қолиб кетмаслик учун шошилишимиз керак.

— Лекин мен сиз ҳурматли зотнинг оғзиларидан жаҳонгашта рицарлар очиқ ҳавода тунашни афзал кўрадилар, деб эшитган эдим-ку,— деди Панса.

— Улар,— деб жавоб қилди дон Кихот,— тунашга жой тополмаганларида ёки ошиқ бўлиб қолганларида шундай ҳол юз беради. Тўғри, шунақа бир рицарь бўлган, у нақ икки йиллаб жазирама иссиқ, қаҳратон қиш, ҳар қандай оби ҳаво шароитига бардош бериб қояда яшаган, шундай бўлса ҳам бундан қалбини ром этган хонимнинг хабари бўлмаган. Машҳур Амадис Галльский ўз дилдорининг ғазабига учраб саккиз йил даштда қолиб кетган. Даштда у тавба-тазарру ва ибодат қилган, дарё-дарё кўз ёши тўкиб, шафқатсиз маликасидан гуноҳидан ўтишини сўраган. Шу вақт ичидан у бирор марта ҳам ёпиқ жойда тунамаган, иссиқ овқат емаган, кийим-бошини ҳам алмаштирмаган. Бундан бошқа мисолларни ҳам келтириш мумкин. Аммо бас, Санчо, ортиқча эзмаликнинг кераги йўқ. Эшак ҳам бирор балога учрамасидан тезроқ тараддудингни кўр.

— Йўқ, энди шайтон ҳам йўлдан оздиrolмайди,— деди Санчо.

Шундан кейин нақ ўттиз мартача оҳ-воҳ қилиб, олтмиш марта хўрсиниб, уни бу аҳволга солганларни юз бор лаънатлаб, аранг турди ердан. Қадди уч букилиб оқсоқланганча ва гандираклаганча эшагининг ёнига борди-да, уни эгарлади. Эшак ҳам гўё хўжайинига раҳми келгандай жуда аянчли аҳволда эди. Санчо унга дон Кихотни кўндириб, Росинантни ҳам кетига боғлади-да, юганидан ушлаб, катта йўл томон аранг сургалиб кетаверди.

Бироқ унга тақдир шафқат қилди. У бир чақирим ҳам йўл босмай, узоқдаги карвонсаройга кўзи тушди, дон Кихот уни шу заҳотиёқ қалъа деб ўйлади. Санчо бунинг карвонсарой эканини исботлашга беҳуда уринди. Дон Кихот бу қалъа деб туриб олди. Дарвозага етгунларича тортишиб бордилар. Етиб келишгач эса

Санчо қаерга келишганини ҳам сўраб ўтирмай, тўппа-тўғри ичкарига етаклаб кираверди эшагини.

## XI БОБ

РИЦАРЬ ҚАЛЪА ДЕБ УИЛАГАН КАРВОНСАРОЙДА ДОН КИХОТ ВА УНИНГ СОДИҚ ЯРОҚБАРДОРИ БОШИГА ТУШГАН САВДОЛАР

Каравонсарой эгаси эшакда кўндаланг ётган дон Кихотни кўриб Санчодан, бу бечорага нима бўлди, деб сўради, Санчо унинг қоядан кулаб биқинлари шикастланганини айтди. Карвонсарой бекаси, табиатан кўнгли бўш, раҳмдил аёл, бу сўзни эшитгач, дон Кихотга ёрдамга шошилди. У ўзининг ёшгина ёқимтой қизига янги меҳмонга қарашни буюрди. Бир кўзи гилай, ялпоқ бўйин, барваста ва новчадан келган Мариторнес исмли астуриялик хизматкор аёл билан рицаримизга яқиндагина бадавлат арвалоли хачир ҳайдовчи тунаган чордоқда жой ҳозирлашди.

Ўрин ҳам жуда ажойиб эди, баланд паст икки скамейкага омонатгина уч-тўртта тахта ташланган бўлиб, унга тўшалган жун тўшак босилавериб тошдай қотиб кетган, қўтос терисидай қаттиқ икки чойшаб исқирт, илма-тешик кўрпа — бу ётоқнинг бор жиҳози шу эди.

Дон Кихотни ана шу фақирона ўринга ётқизишди ва бека қизи билан икковлашиб шу заҳотиёқ унга малҳам сура бошлашди. Ана шу пайтда бека бечора идальгонинг баданида беҳисоб қон-талашган жойларни кўриб, булар йиқилиб тушиб жароҳатланганга эмас, таёқ изларига ўхшайди-ку, деди.

— Таёқ изига дейсизми? — жавоб берди Санчо. — Йўқ, қоя жуда серқирра ғадир-будир экан, ҳар қайси қирра баданида мўматалоқ из қолдирган.

Кейин яна қўшиб қўйди:

— Бекам, бир яхшилик қилинг, ана шу малҳамдан озроғини эҳтиёт қилиб олиб қолинг. У яна бошқа бировга ҳам керак: менинг ўзимнинг ҳам белим зирқираб оғрияпти.

— Бундан чиқди сиз ҳам юмалаб тушган экансиз-да? — деб сўради бека.

— Мен-ку юмалаб тушганим йўға-а, — жавоб берди Санчо Панса, — хўжайиним йиқилиб тушганида шундай қўрқиб кетдимки, мени минглаб сўйил билан калтаклашгандай баданим зирқираб кетди.

— Ҳа, шунақа бўлади, — деди беканинг қизи. — Мен ҳам кўпинча туш кўрганимда қоядан йиқилиб кетаётганга ўхшайман-у, лекин ҳеч йиқилиб тушолмайман. Уйғониб кетганимдан кейин эса, чиндан ҳам йиқилиб кетгандай, ўзимни жуда ҳорғин сезаман.

— Ҳамма гап шунда да, сеньора, — деди Санчо, — тушимда эмас, ўнгимда хўжайиним дон Кихотга ўхшаб бутун баданим кўкариб мўматалоқ бўлиб кетди.

— Бу кабальеронинг исми нима? — деб сўради хизматкор аёл Мариторнес.

— Ламанчлик дон Кихот, — деб жавоб берди Санчо Панса. — У оламдаги энг машҳур ва энг қудратли жаҳонгашта рицарлардан бири.

— Жаҳонгашта рицарларнинг ўзлари ким? — яна сўради хизматкор аёл.

— Мана бу солддаликни қаранг-у, — хитоб қилди Санчо Панса. — Наҳотки сиз уларнинг кимлигини эшитмаган бўлсангиз. Бўлмаса билиб қўйинг, синглим, жаҳонгашта рицарь — дунёдаги энг галати зотдир. Бугун у чала ўлик қилиб калтакланиши, эртага эса қарабсанки император бўлиб олиши, бугун ожиз бир камбағал бўлиши, эртага эса ўз яроқбардорига учта-тўртта қиролликдан хоҳлаганини инъом эта оладиган бадавлат одам бўлиши мумкин.

— Ие, бу қанақаси? — сўради бека. — Хўжайинингиз ана шундай катта одам бўлса, нега шу маҳалгача ҳеч бўлмаса бирор графликни қўлга олмадингиз.

— Бу дарров бўла қолмайди-да, — жавоб берди Санчо. — Саргузашт излаб йўлга тушганимизга атиги бир ой бўлди, лекин шу маҳалгача бирорта ҳам арзийдиганига йўлиққанимиз йўқ. Баъзан излаганинг қолиб, мутлақо бошқа нарсани учратасан. Бироқ сизга шуни айтаманки, хўжайиним дон Кихот яраларидан қутулса, яъни лат еган жойлари тузалиб кетса, мен ҳам соғ-саломат бўлсам, Испаниянинг энг олди князларидан ҳам улугроқ бирор мартабага эришаман.

Дон Кихот бу суҳбатни жуда эътибор билан тинглади. У қаддини зўрға кўтарди-да, беканинг қўлини ушлаб туриб, шундай деди:

— Гапимга ишонаверинг, гўзал сеньора, мендек олий зотга ўз қалъангиздан жой берганингизни ўзингиз учун бир бахт деб ҳисоблашингиз мумкин. Мен ўзим тўғримда сизга гапириб ўтирмайман, чунки киши мақтаниш билан ўзини ерга уриб қўяди. Лекин яроқбардорим кимлигимни сизга маълум қилади. Аммо шуни айтмоқчиманки, менга кўрсатган марҳаматингиз хотирамда абадий қолади ва мен бунинг учун умр бўйи сиздан миннатдор бўлиб юраман. Борди-ю, номини мен шивирлаб такрорлашгагина қодир бўлганим марҳаматсиз гўзалнинг сеҳрли кўзлари ақли-ҳушимни ўғирлаб, муҳаббати мени асир қилмаганида эди, мана бу паринамо қизнинг қўлларига бутун эркимни тутқазган бўлардим.

Бека, унинг қизи ва оқ кўнгили Мариторнеслар жаҳонгашта рицарнинг гапларни ҳайратланиб тингларканлар, гўё у юнон тилида сўзлаётгандай, ҳеч нарсага тушунмадилар. Тўғри, улар рицарнинг ўзларига яхши сўзлар билан ташаккур айтаётганини фаҳмладилар-у, лекин унга нима деб жавоб беришга ақллари шошди, шунинг учун ҳам унга анграйганча тикилиб туришди. Чиндан ҳам дон Кихот уларга аллақандай алоҳида бир зотдек туюлди. Бека билан қизи дон Кихотга хайрли тун тилаб чиқиб

кетишди, хизматкор аёл Мариторнесга эса хўжайинидан кам бўлмаган даражада ёрдамга муҳтож Санчо билан шуғулланди. Ўз ишини адо этгач, у ҳам пастга тушиб кетди ва сайёҳларимизнинг ўзлари қолди.

Дон Кихотнинг фақирона ва қаттиқ каравоти чордоққа кираверишда биринчи эди. Санчо унинг ёнига жойлашди, хачир ҳайдовчининг ўрни бир оз нарида эди. У ўз хачирларидан хабар олиб, тунги овқатларини бериб бўлгач, чордоққа чиқиб ёнбошлади ю, шу заҳотиёқ ухлаб қолди. Санчо ҳам шундай қилмоқчи бўлди ю, лекин биқинларининг оғриғи унга уйқу бермасди.

Дон Кихот оғриқдан Санчодан кам азоб чекмаётган эди, у кўзларини чақчайтирганича қоронғиликка беҳуда тикилиб ётарди. Кўп ўтмай уйга бутунлай жимлик чўкди, кираверишдаги лампадан бошқа чироқларнинг ҳаммаси ўчирилди.

Бу чуқур сукунат ва идальгомизнинг севимли романларида тўлиб тошиб ётган саргузаштлар тўғрисидаги хотиралар унинг бошида фараз қилишгина мумкин бўлган жуда ғалати ва бемаъни фикрлардан бирини уйғотди. Назарида у қандайдир улугвор қалъага кириб қолгандай ва унинг хусни-жамолига асир бўлган беканинг қизи уни севиб қолгандай, бугун кечаси ҳузурига келишга ваъда бергандай туюлди. Бу алаҳлашларни чинакам ҳақиқат деб ўйлаб, бу машъум алдовларга учиб ўз олиҳимматлилигимга путур етмаса эди, деб ташвишлана бошлади. Ҳатто қиролича Жиневра<sup>20</sup> севги изҳор қилган тақдирда ҳам ўз маликаси Дульсинея Тобосскаяга бевафолик қилмасликка қатъий қарор берди.

Бахтга қарши Мариторнесга чордоқда нимадир керак бўлиб қолди. У шовқин чиқармаслик мақсадида эҳтиёткорлик билан юқорига кўтарилди. Бироқ у энди остонадан ўтиши биланоқ дон Кихот унинг қадам товущини эшитиб, каравотида туриб ўтирди-да, хизматкорнинг яқинлашишини кута бошлади. Астуриялик аёл қоронғида дон Кихотнинг каравотига чиндан ҳам тегиб кетишига сал қолди ва олиҳиммат кабальеромиз унинг қўлидан ушлаб қолишга улгурди. Қўрқиб кетган Мариторнес жон-жаҳди билан ундан қутулишга уриниб кўрди, лекин дон Кихот уни ўз каравотининг четига ўтирғизиб, мулойимлик билан оҳиста деди:

– О, гўзал, аслзода сеньора, бир қиё боқиб, мени самовий чиройингиздан баҳраманд этган бебаҳо илтифотингизга яраша яхшилик қилишни шундай истардимки! Бироқ машъум тақир қалбимни аллақачон бошқа бир гўзал малика севгиси билан банд этган. Қалбимдаги орзу-ўйларимнинг ягона ҳукмдори бекиёс Дульсинея Тобосскаяга мангу содиқ қолишга қасам ичганман. Башарти шундай бўлмаганида, сира ҳаялламай миннатдорлик ҳислари билан тўлиб-тошган юрагимни оёқларингиз остига тўкиб солардим.

Бироқ довдираб қолган Мариторнес дон Кихотнинг гапларига қулоқ солмас, қўлини тортиб олишга уринарди. Ниҳоят, бу шовқин сурон хачир ҳайдовчини уйғотиб юборди. Дарвоқе, унинг

Мариторнесга майли бор эди. У рашки келиб аста ўрнидан турди-да, дон Кихотнинг олдига келди. Қараса, дон Кихот қутулиб қочмоқчи бўлаётган Мариторнеснинг қўлидан ушлаб олиб, унга нималарнидир шивирляпти. Ғазабланган хачир ҳайдовчи кўп ўйлаб ўтирмай бу гапга чечан рицарнинг жағига қулочкашлаб шундай туширдик, рицарнинг оғзи қоқ-қора қон бўлди. Хачир ҳайдовчи бу ҳам кам дегандай дон Кихотнинг кўкрагига чиқиб олди-да, уни тепкилай бошлади. Омонатгина турган каравот икки кишини кўтара олмай шарақа-шуруқлаб синиб кетди. Бу қий-чувдан ташвишга тушган хўжайин чироқ кўтарганча чордоққа югурди. Уни кўриб янада эхонаси чиқиб кетган Мариторнес қочиб кетаётиб тинч ухлаётган Санчонинг ўрнига қоқилиб кетди-да, унинг устига йиқилиб тушди. Санчо уйқу аралаш мени ажина бўғяпти деб ўйлаб муштрларини ишга солди. Оғриғига чидаёлмаган Мариторнес ҳам ҳар қандай эҳтиёткорликни унутиб, Санчони дўппослай бошлади, икки ўртада ораларида қизгин олишув бошланиб кетди. Буни кўриб хачир ҳайдовчи Мариторнесга ёрдамга ташланди, етиб келган хўжайин эса учраганни савалай бошлади. Кулфат устига чироқ ўчиб қолди, аёвсиз зарблар дуч келганга тушаверди.

Охири шундай бўлди, ўша ҳовлида Теледо Санта Эрмандад-ни ўқсиси ҳам тунаб қолган эди, у ғалати тўс-тўполонни эшитиб, ҳассасини олганча чордоққа чиқди-да;

— Адолат ҳақи айтаманки, бас қилинлар! Худо ҳақи ҳамда Санта Эрмандад ҳақи бас қилинлар! Сизларга буюряпман буни! — деб қичқирди.

У энг аввал абжағи чиққан ўрнида беҳуш ётган дон Кихотга қоқилиб кетди. Уқчи унинг соқолидан тутамлаганча: «Адолат иши учун ёрдамга!» деб қичқирди. Бироқ тутиб олган одами қимир этмай ётганини кўриб ўлдириб қўйишипти деб ўйлади-да, янада қаттиқроқ қичқирди:

— Дарвозаларни бекитинг! Ҳеч кимни ташқарига чиқарманг, бу ерда қотиллик юз берибди.

Буни эшитиб ҳамманинг қути ўчиб кетди, мушкетди ҳам бир зумда тўхтади. Хўжайин шошганича ўз хонасига, хачир ҳайдовчи ёпинчиғи остига, хизматкор аёл ўз хужрасига жўнаб қолди; фақат шўрлик дон Кихот билан Санчо ўз ўринларидан қўзғалишолмасди. Шунда ўқчи дон Кихотнинг соқолини қўйиб юборди-да, жинойтчиларни ушлаб қамоққа олиш ниятида чироқ излаб кетди. Бироқ анча вақтгача ҳеч нарса тополмади, чунки хўжайин йўлакдаги чироқни жўрттага ўчириб қўйган эди. Уқчи ўчоқ бошига боришга мажбур бўлди, у ерда анча уриниб, зўр машаққат билан пировардида қора чироқни ёқди.

КАРВОНСАРОИНИ ҚАЛЪА ДЕБ БИЛИБ, ҲЗ БОШИГА БАЛО  
ОРТТИРГАН БОТИР РИЦАРЬ ДОН КИХОТ ВА УНИНГ  
СОДИҚ ЯРОҚБАРДОРНИНГ ТОРТГАН БЕҲИСОБ  
УҚУБАТЛАРИ

Бу орада дон Кихот аранг ўзига келди, инқиллаб яроқбардорини чақирди:

— Санчо, дўстим, ухляяпсанми? Ухляяпсанми, дўстим Санчо?

— Эй, уйқуга бало борми бу ерда,— жавоб қилди Санчо алам билан жаҳл аралаш,— туни билан жину иблислар мени мазах қилишиб чиқди.

— Бу гапингга тамомила ишонаман,— жавоб қилди дон Кихот,— сабаби ё мен ҳеч нарсани тушуна олмаяпман, ёки бу қалъа сеҳрланган. Нега десанг... Ҳа, дарвоқе, аввал сен мен айтганларни ҳаётлигимда ҳам, оламдан ўтганимдан кейин ҳам оғзингдан чиқармасликка қасамёд қилишинг керак.

— Онт ичаман,— деди Санчо.

— Бундай дейишдан мақсад,— деди дон Кихот,— бирор кимсанинг шаънига доғ туширишга виждоним йўл қўймайди.

— Айтяпман-ку, сизга,— деди Санчо,— токи азиз жонингизни худойи таолога топширгунингизча бировга гапирмасликка қасам ичаман деб, худоё худовандо эртагаёқ юрагимни бўшатишни насиб этсин.

— Наҳотки, мен сенинг дилингни оғритган бўлсам, Санчо?— сўради дон Кихот,— мунча менинг ўлимимни тилаб қолдинг.

— Йўқ, гап бошқа ёқда,— жавоб қилди Санчо,— шунчаки сир сақлашга сабри-тоқатим йўқ. Бу мен учун оғир ва жирканчли туюлади.

— Хўп, яхши,— деди дон Кихот,— менга бўлган муҳаббатинг, олиҳимматлилигингга ишонаман. Шуни билиб қўйгинки, шу тунда мақтанса мақтангудек ажойиб бир воқеа юз берди. Қисқаси, менинг ҳузуримга шу қалъа хўжайинининг жаҳонда тенги йўқ гўзал қизи ҳозиргина келди. Унинг кийинишини, тийран ақли ёки бошқа фазилатларини мен сенга қандай қилиб сўзлаб бера оламан, бунга маликам Дульсинея Тобоскаяга бўлган садоқатим монелик қилади. Мен фақат бир нарса дея оламан, холос: ё осмони фалак менинг бахт-саодатимга ҳасад қилди, ё, тўғрироғи, қалъа сеҳрланган. Нега десанг, мен у қиз билан ширин суҳбат қилаётганимда қандайдир бир ғойибий дев қулочкашлаб жағимга шундай туширдикки, шу дамгача оғзи-бурним лиқ тўла қон, кейин роса эзиб урди, аъзойи баданим титилиб кетди. Бунинг олдида кечаги подачиларнинг калтаклагани ҳолва деса бўлади. Буларнинг ҳаммасидан чиқадиган хулоса шуки, бу қизни сеҳрланган қандайдир мавр қўриқлаб туради, бу гўзал менга насиб бўлмайди.

— Ҳа, албатта, менга ҳам насиб бўлмаса керак,— жавоб қил-

ди Санчо,—чунки тунн билан елкамда тўрт юздан ортиқ мавр улоқ чошиб юрди, бунинг олдида кечаги калтак ейиш ширин бўсадай бир гап. Лекин қандай қилиб сиз, сеньор, буни ажойиб воқеа деб ҳисоблай оласиз? Ахир биз аранг жон сақлаб қолдик, қилча фойда кўрмадик-ку. Муҳтарам жанобим ҳар ҳолда гўзал қизнинг қўлидан ушлашга муяссар бўлибдилар, каминанинг боши эса калтак остида қолди. Бахтсиз одамман мен! Онам мени ғам-алам учун туққан! Ахир: мен мутлақо жаҳонгашта рицарь бўлмасам-у, негадир бутун калтак менинг бошимда синса!

— Бу қанақаси, наҳотки сени ҳам калтаклаган бўлсалар?— сўради дон Кихот.

— Бўлмасам-чи, ёлғон бўлса, ота-онамга лаънатлар ёғилсин,— жавоб қилди Санчо.

— Хафа бўлма, дўстим,— деди дон Кихот, ҳозир бебаҳо малҳам тайёрлайман, бирпасда тузалиб оламиз.

Шу вақт, ниҳоят қора чироқни ёқишга муваффақ бўлган ўқчи ўлди деб ўйлаган жасадини кўргани кириб қолди. Ўқчи тўстўполонда кийиниб ололмаган эди, ҳозир эса бошидаги оқ рўмоли ва устидаги оқ кўйлақда қора чироқ ёруғида арвоҳдек кўриларди.

— Сеньор, бизни ўлдирмоқ учун қайтиб келган ва боя сиз айтган сеҳрланган мавр шу эмасми?

— Йўқ, у эмас,— жавоб қилди дон Кихот.— Чунки сеҳрланганларни кўриб бўлмайди.

— Агар уларни кўриб бўлмаса, сезиб бўлса керак,— деди Санчо,— буни зирқираб оғриётган биқинларим айтиб бериши мумкин.

— Менинг биқинларим ҳам,— деди дон Кихот,— лекин ҳар ҳолда биз кўриб турган бу одам сеҳрланган мавр бўлмаса керак.

Ўқчи буларнинг бемалол гаплашиб ўтирганини кўриб жуда ҳайрон қолди. У дон Кихотнинг ёнига келиб, сўради:

— Хўш, ишлар қалай, азизим?

— Сизнинг ўрнингизда бўлсам, сал хушмуомалароқ бўлардим. Еки сиз томонларда жаҳонгашта рицарлар билан шунақа гаплашиш одат бўлиб қолганми, беадаб?

Бундай жавобни эшитган ўқчи жаҳли чиқиб, ёг тўла қора чироқ билан дон Кихотнинг миясига шундай туширдик, калласи ёрилишига сал қолди. Хона қоп-қоронғи бўлиб қолди, ўқчи югуриб чиқиб кетди?

— Шубҳасиз, сеньор,— деди Санчо Панса,— бу ўша сеҳрланган мавр экан. У, афтидан, бебаҳо маликасини кимгадир сақлаганга, бизга эса фақат мушту қора чироғини асраб қўйганга ўхшайди.

— Назаримда, рост гапирётганга ўхшайсан, Санчо,— деди дон Кихот,— бундай сеҳргар билан жанг қилишни ҳатто ҳаёлга келтиришнинг ҳам ҳожати йўқ. Шунингдек, ғазабланмоқ ёки нолимоқ ҳам бефойда. Ахир, булар кўринмас, ғойибона кучлар, улардан ўч ололмаимиз-ку. Бу ҳақда кейин гаплаша-

миз. Ҳозир эса, Санчо, ўрнингдан тур-да, қалъа комендантини чақириб кел. Ундан бир илож қилиб озгина ёғ, вино, туз ва розмарин\* олиб кел, шифобахш малҳам тайёрламасам бўлмайди. Тўғриси айтганда, у менга жуда зарур. Бояги шарпа етказган жароҳатларимдан тирқираб қон оқяпти.

Санчо оғриқдан инқиллаб ўрнидан турди-да, қалъа эгаси олдига кетди. Каловлаб бораётиб ўқчига урилиб кетди, шунда унга:

— Ким бўлсангиз ҳам, сеньор, илтифот қилиб бизнинг ҳожатимизни чиқарсангиз: шу қалъага жойлашиб олган сеҳргар мавр зарбидан оғир жароҳатланиб ўрнидан туролмай ётган жаҳонгашта рицарлар орасида тенги йўқ бир кимсага дори тайёрлаш учун бир оз розмарин, вино ва туз топиб берсангиз,— деди.

Бу сўзларни эшитган ўқчи уни тентак экан деб ўйлади. У кириш эшигини очиб, хўжайинни чақириб, унга шўрлик Санчонинг илтимосини айтди.

Хўжайин Санчога сўраган нарсаларининг ҳаммасини берди, у дон Кихотга олиб бориб берди.

Дон Кихот дориворларни дарҳол олиб, роса қориштирди, Мариторнес келтириб қўйган кўзачага солиб қайнатди, ниҳоят шифобахш малҳам тайёр бўлди. Шундан кейин у қоришмани қуйиш учун бирор шишача келтиришларини сўради, бироқ уйда шиша топилмаганлиги учун зайтун ёғидан бўшаган тунука идишга қўйди. Шундан сўнг тунука идишга қараб саксон марта «яратган тангримиз» ва бошқа аллақанча дуоларни ўқиб, ҳар сўзида бир чўқинарди. Санчо Панса, хўжайин ва ўқчи дон Кихотнинг бутун хатти-ҳаракатини чурқ этмай кузатиб турдилар. Дуохонликдан сўнг рицаримиз дарҳол шифобахш малҳамнинг кучини синаб кўрмоқчи бўлди, кўзачада қолган қорининг кучини ютиб юборди. Бироқ дорини ичиб бўлар бўлмас ўқчиқ тутиб, варақлатиб қуса бошлади. Ўқчийвериб қора терга ботди. У ўзини иссиқроқ ўраб, тинч қўйишларини илтимос қилди. Роса уч соат тошдек қотиб ухлаб тургач, дон Кихот ўзини тетик ва бардам ҳис қилди, ҳатто калтакдан сўнгги оғриқлар ҳам сезилмасди. У ўзини тамомила соғлом сезиб, ҳақиқий Фьерабрас малҳамини ясаганига ишонч ҳосил қиларкан, бундан шу доривор шарофати билан ҳеч қандай тўқнашув, калтак ва муштлашишлар хавfli эмас деди ўзича.

Хўжайиннинг соғайиши Санчо Пансага чинакам мўъжиза бўлиб кўринди, у шу заҳотиёқ дон Кихотдан сеҳрли малҳамдан беришини сўради. Дон Кихот бажонидил унга кўзачани узатди. Кўзачани қўш қўллаб ушлаб олган Санчо, бу дорининг сеҳрли кучига жуда ишониб, хўжайининикидан сал озроғини қултиллаб ичди. Аммо Санчонинг ошқозони хўжайининикига ўхшаш унчалик сезгир эмас эди. Бечора дарров қайт қилмади-ю, қорни мижғиб оғрий бошлади, аъзойи

\* Розмарин — барги ва гулидан хушбўй мой олинадиган ўсимлик.



баданини совуқ тер босди; у энди куним битибди деган қарорга келди.

Оғриқдан тиришиб, малҳамни ҳам, унга малҳам берган ярамасни ҳам сўка бошлади. Унинг азоб чекаётганини кўриб турган дон Кихот шундай деди:

— Назаримда, Санчо, ҳамма фалокат сенинг ҳақиқий рицарь эмаслигингда бўлса керак, негаки бу малҳамнинг нафи фақат рицарларга тегади, холос.

— Муҳтарам жаноблари бундан хабардор бўлсалар,—хитоб қилди Санчо,—нега ахир, эй зотим билан қуриб кетай, олдинроқ айтмадилар буни.

Шу пайт дори ўз таъсирини кўрсата бошлади. Совуқ тер қуйилаётган Санчо шу қадар ғужанак бўлиб олдики, унинг ўзигина эмас, балки бу ерда турганларнинг ҳаммаси омонатини эгасига топширадиган вақти етди, деб ўйлашди. Санчо икки соатча азоб чекди, тинка-мадори қуриб, оёқларида аранг турарди.

Бу орада дон Кихот янги саргузашт излаб тезликда йўлга чиқишни ихтиёр қилиб қолди, акс ҳолда бекор ўтаётган ҳар бир соат унинг ҳимояси ва ҳомийлигига муҳтож бўлган барча бебахтлар учун бир мусибатдек туюлди. У ўз қўли билан Росинантни эгарлади, ўз яроқбардорининг эшагига бор юklarини ортди, сўнгра Санчонинг кийиниши ва эгарга миниб олишига ёрдамлашди.

Карвонсаройдаги жамики одам дон Кихотнинг жўнаб кетишини томоша қилгани йиғилишди. Тўпланганлар орасида хўжайиннинг қизи ҳам бўлиб, кабальеромиз ундан кўзини узмасди. Дам-бадам у чуқур хўрсиниб қўярди. Тўпланганлар, ақалли кеча кечқурун унинг этидаги моматалоқ бўлиб кетган ва шилинган, шалоббо бўлган жойларни кўрганлар у биқинларининг оғриғидан уҳ тортяпти, деб ўйлашди.

Хайрлашмоқ учун дон Кихот отини буриб, хўжайин олди-га келди-да, тантанавор оҳангда шундай деди:

— Эй бадавлат сеньор, қалъангизда менга улкан ва беҳисоб марҳаматлар кўрсатилди, зотан мен сўнгги кунларимга қадар сиздан миннатдор бўлишни ўз бурчим деб биламан. Оҳ, қани энди сизни хафа қилган бирор бешарм муттаҳамнинг таъзирини бериб, яхшилигингизни қайтара олсам эди. Зотан билиб қўйингки, ожизларга ёрдамлашиш, мазлумларнинг тарафини олиш, ёмонларнинг таъзирини бериш менинг бурчимдир. Яхшилаб ўйлаб кўринг ва очикдан-очик айтаверинг, мабодо менинг ҳимоямга муҳтож эмасмисиз? Рицарь номи билан қасам-ёд этаманки, сизнинг ҳар қандай адолатли истагингиз дарҳол ва беками-кўст бажо келтирилади. Хўжайин ҳам худди шу оҳангда деди:

— Сеньор кабальеро, дилимни оғритганлардан ўч олишингизнинг ҳеч ҳожати йўқ, чунки бундай воқеа юз бергудек бўлса, менинг ўзим дилозорларнинг адабини бериб қўйишга қодирман. Мен фақат жанобларнинг меҳмонхонада бир кеча

турганлари, кечки овқат ва икки ўрин, шунингдек, икки жонивор еган сомону ем учун ҳақ тўлаб кетишларини истардим, холос.

— Демак, бу карвонсарой экан-да?—деб сўради дон Кихот.

— Шундай, бунинг устига донғи кетган қўноқхона,—деб жавоб қилди хўжайин.

— Шу дақиқагача мен янглишиб юрган эканман,—деди дон Кихот,— чунки, тўғриси айтганда, бу ерни мен қалъа деб тасаввур қилибман. Модомики, бу қалъа эмас, балки карвонсарой экан, мен сиздан ҳақ тўлашдан озод этишингизни сўрайман, холос. Зотан, мен жаҳонгашта рицарлар одоб қондасини бузолмайман. Бундай қоидага мувофиқ—бу нарсани яхши биламан—улар ҳеч вақт меҳмонхонада турганлари учун ҳақ тўлашмаган. Қадимий одат бўйича уларни ҳамма ерда иззат-икром билан кутиб олишлари керак; бу уларнинг кечаю кундуз саргузашт излаб очлик ва ташналик, иссиқ ва совуққа чидаб, беқарор тақдирнинг барча бевафоликларига бардош бериши эвазига кўрсатилган адолатли тортиқ бўлади, холос.

— Бундай масалаларга кўп ҳам тушунавермайман,—деди хўжайин.—Қани, тегишлисини тўлаб қўйинг, рицарларнинг ҳар хил қоида-қонунлари билан менинг ишим йўқ.

— Сиз беадаб ва кўрс одам экансиз,—хитоб қилди дон Кихот ва Росинантнинг биқинига ниқтаб, дарвозадан чиқаркан, яроқбардори орқасидан келяптими-йўқми, бу билан иши ҳам бўлмай от йўрттириб кетаверди. Меҳмоннинг ҳақ тўламай чиқиб кетганини кўрган хўжайин Санчо Пансага мурожаат қилиб ҳақини тўлашни сўради, лекин Санчо бундан мутлақо бош тортди.

— Жаҳонгашта рицарнинг яроқбадори,—деди Санчо,—хўжайин амал қилган қоидага бўйсунишга мажбур.

Хўжайиннинг газаби қайнаб кетди, у агар Санчо тўламайдиган бўлса, уни ўзи билганича жазолашни айтиб дўқ урди. Лекин Санчо ўлдирсаларинг ўлдирингларки, мен тўламайман, деди. У ҳеч қачон жаҳонгашта рицарларнинг ажойиб, қадимий одатини бузмаслигини, акс ҳолда шундай одил қонунни бузганлиги учун бошқа яроқбардорларнинг таънаи маломатига қолиши мумкинлигини айтдилар.

Санчонинг шўрига бу кеча карвонсаройда сеговиялик тўрт мовут босувчи, кордовалик уч савдогар билан Севилья ярмаркаси даҳасидан келган икки сайёҳ тунаб қолишган эди. Булар ҳаммаси шўх, забардаст, ҳазилкаш йигитлар эди. Улар Санчонинг сўзларини эшитиб, ўз билгиларича унинг таъзирини бериб қўймоқчи бўлдилар. Кўз очиб-юмгунча бечора яроқбардорни ўраб олиб, эгардан суриб туширдилар. Улардан бири югуриб бориб катта чойшаб олиб чиқди: сўнгра йигитлар шўрпешона Санчони шу чойшабга ётқизиб олиб, осмонга иргита бошладилар.

Жафокаш Санчо шундай қичқирардики, ҳатто буни кабальеро жаноблари ҳам эшитди. Аввалига дон Кихот бирор

саргузаштга дуч келадиганга ўхшайман деб ўйлади, лекин кўп ўтмай ўз яроқбардорининг овозини таниди. У жиловни буриб, яна карвонсарой томон от қўйди. Карвонсаройга яқинлашганида дон Кихот яроқбардорини калака қилиб ўйнаётганларини кўрди. Санчони ҳар иргитишганда пирпирак бўлиб шундай айланар эдики, агар дарғазаб бўлмаганида дон Кихот ҳам ичкалари узилгунча кулармиди. У бечора Санчони қутқаришга отилди, лекин дарвоза берк эди; шунда девордан ошиб тушмоқчи бўлди, афсуски, отдан тушишга ҳам мадори етмади. Шунинг учун девор орқасида туриб шумлик қилаётган йигитларни лаънатлаш ва бўралаб сўкишдан ўзига иложи йўқ эди.

Ҳазилкаш йигитлар эса бунга ҳеч эътибор бермай, ўз ишларини қилаверишди, чархпалак бўлиб ҳавода ўмбалоқ ошаётган Санчонинг дод-войи тобора авжга чиқаверди. Ниҳоят, улар чарчаб, эрмакларини ерга туширишди. Кейин эшакни олиб келиб, Санчони эгарга ўтқазиб қўйишди, елкасига чопонини ташлаб, тўрт томонинг қибла, деб қўйиб юборишди. Раҳмдил Мариторнес Санчонинг қийналиб кетганини кўриб, бир кружка сув берсам ёмон бўлмас, деб ўйлади. Санчо кружкани энди оғзига олиб борганида ўз хўжайинининг товущини эшитиб тўхтади.

— Санчо, сув ича кўрма, жигаргўшам! Агар ўлиб қолмайин десанг, уни ичма. Мана буни қара, мана сени дарҳол тузатадиган мўжизакор малҳам.

Лекин Санчо ўз хўжайинига қовоғини солиб қаради ва шундай деб қичқирди:

— Муҳтарам жанобим менинг рицарь эмаслигимни унутиб қўйдиларми дейман-а? Бу дорини ўзлари учун сақлаб қўйсинлар, жин урсин-э! Мени ўз ҳолимга қўйсангиз-чи!

Охирги сўзларини айтarkan, кружка аллақачон оғзига бориб қолган эди. Бир қултумни ичиб бўлмаёқ бунинг оддий сувгина эканини билиб, афтини буриштирди ва Мариторнесдан вино келтиришни сўради. Мариторнес унинг илтимосини бажонидил бажариб, ўз ёнидан вино сотиб олиб келди. Санчо винони ичиб бўлди-ю, товони билан эшагини ниқтади, дарвозани ланг очиб, саройдан чиқиб кетди. Гарчи биқинлари зирқираб турган бўлса-да, у ўз айтганини қилганидан, қўноқ учун бир пул бермай жўнаганидан мамнун эди.

Тўғри, сарой эгаси унинг сафар тўрвасини олиб қолган, лекин Санчо шошилганидан буни сезмаган эди.

### ХIII БОБ

#### ДОН КИХОТНИНГ ҚУИЛАР СУРУВИ БИЛАН ҚИЛГАН ЖАНГИ

Азоб чеккан, чалажон Санчо хўжайинига яқинлашиб келганда, у бечорага дон Кихот шундай деди:

— Биласанми, соддадил Санчом, яъни сен карвонсарой де-

ган бу қалъанинг сеҳрланганига тамомила ишонч ҳосил қилдим. Сени кўз очтирмай роса калака қилган анави ёвузларни оддий кишилар деб бўлмайди; улар нариги дунёдан чиққан арвоҳлар, қудратли сеҳргарлар. Улар афсун ўқиб мени ҳали сеҳрламоқчи бўлдилар, чунки мен эгарда ўтирган жойимдан қимирлай олмадим. Аммо, қасамёд қиламанки, башарти девордан ошиб ўта олганимда сен учун улардан қаттиқ ўч олардим. Ҳатто рицарлик унвонини олмаганлар билан жанг қилишни ман этган рицарлик қонун-қоидасини ҳам бузар эдим.

— Агар лаънати малҳамни ичиб бунчалик мазам қочмаганида-ку, ўзим ҳам бошлаб ўч олган бўлардим-а,— деди Санчо.— Қўлингни ҳам, оёғингни ҳам қимирлата олмасанг нима ҳам қилардинг. Лекин, муҳтарам жаноблари, мени калака қилган ярамасларни арвоҳ ёки сеҳргар деб беҳуда ўйлаяптилар. Булар ҳам худди сиз билан менга ўхшаш гўшт ва суякдан иборат оддий одамлар. Ҳар бирининг ўз исми бор, бир-бирларини чақирганларини эшитдим, бирининг оти Педро Мартинес, бошқасиники Тенорио Эрнандес, карвонсарой эгасининг оти эса Хуан Паломеке— Чапақай экан. Шуни билингки, сеньор агар сиз отдан тушолмаган, девордан ошолмаган бўлсангиз, бунинг сабаби, сеҳру жодуда эмас. Чала ўлик қилиб калтакланган одамнинг девор ошишига йўл бўлсин! Лекин сизга, муҳтарам жанобим, шуни айтиб қўймоқчиман: бу саргузаштлар бошимизга шундай мусибатлар соладики, кўп ўтмай ўнг оёғимизни чапидан ажрата олмай қоламиз. Яхшиси, эсинг борида этагингни ёп, деганларидек, батамом майиб бўлмасимиздан уйга қайтсак оқилона иш қилган бўламиз. Ўрим-йиғим вақти яқинлашиб қолди. Қордан қочиб ёмғирга тутилиб, дарбадар юргандан кўра айни хўжалик ишлари билан шуғулланадиган ганимат паллани бой бермаган маъқул.

— Менинг бечора Санчом! Рицарлик ҳаётини яхши билмайсан-да! Гапни бас қил, сабр-тоқатли бўл! Шундай кун келадики, рицарларча қахрамонликларга ўз ҳаётини бағишлаш қандай олижаноб иш эканлигини сен ўз кўзларинг билан кўрасан. Қани айт-чи, душман устидан ғалаба қозонишдан ҳам қувончлироқ нарса борми? Жаҳонда бундан яхшироқ нарса йўқ, икром бўл.

— Гарчи шундай бўлса ҳам бунақа ишларнинг маънисига сира тушуна олмайман,— жавоб қилди Санчо.— Лекин менга фақат бир нарсагина равшан; биз жаҳонгашита рицарлар бўлган кунимиздан буён— тўғрироғи, сиз рицарлик унвонини олгансиз, сеньор, чунки мен шунчаки сизнинг яроқбардорингизман, холос,— бискайликни енгганимиздан буён бирорта ғалабага эришганимиз йўқ, шунда ҳам ярим қулоғингиздан, дубулгангизнинг ярмидан жудо бўлдингиз. Ушандан бери калтагу тумшуғимизга мушт туширишларидан бошимиз чиқмайди. Бунинг устига мен шўрликнинг пешонамда чойшабда осмонга итқитиш ҳам бор экан. Яна сиз, худди мени масхара қилаётгандек, сени иргитганлар оддий одамлар эмас, арвоҳлар дейсиз:

гарчанд ўч олиш, сиз муҳтарам зот таъкидлаганидек, ҳузур-ҳаловат бахш этса ҳам, буни амалда синаб кўришдан ожизсан дейсиз.

— Бир оз сабр қил, Санчо,— деди дон Кихот.— Мен мўъжизавий кучга эга бўлган қилични қўлга киритиш умидидаман. Кимдаки бундай қилич бўлса ҳеч қандай сеҳру жоду таъсир қилмайди унга. Балки, бахтим ярақлаб Амадис қиличи қўлимга тушиб қолар— жаҳондаги қиличларнинг энг аълоси, унинг дамига тоб бероладиган ҳеч қандай яроғ-аслаҳа йўқ.

— Башарти,— деб жаврай бошлади Санчо,— сиз муҳтарам жанобга шундай қилич насиб этгудек бўлса, у фақат рицарлар учунгина яраб, мендек яроқбардорнинг биқинлари эса яна калтакдан қайишавермаса, деб қўрқаман.

— Қўрқишни йиғиштириб қўй, Санчо,— деди дон Кихот,— якин орада само сенга кулиб боқади, ўз марҳаматини аямайди.

Шундай суҳбат қуриб, секин-аста илгарилаб боришаркан, дон Кихот бирдан йўлда кўкка кўтарилаётган қуюқ чангни кўриб қолди. Бундан хурсанд бўлганидан Санчога қараб қичқирди:

— О, Санчо, тақдир менга қандай улугвор жасоратлар кўрсатишни ато этганини ўз кўзинг билан кўрадиган кун келди. Мана, ниҳоят, забардаст билакларимдаги кучни ишга соламан; мен кўрсатган қаҳрамонликлар «Шон-шухрат» китобига ёзилади, ундан келгуси авлодлар ўқиб-ўрганадилар. Олдинда кўтарилаётган чанг-тўзонни кўряпсанми, Санчо? У чанг биз томонга келаётган сон-саноксиз лашкарларни тўсиб турибди.

— Модомики шундай экан, икки қўшин бостириб келяпти, чунки орқа томонда ҳам худди шунга ўхшаш чанг кўтарил-япти,— деди Санчо.

Дон Кихот ўгирилиб қаради, Санчонинг рост гапираётганига ишонч ҳосил қилиб жуда қувониб кетди. Унинг айниган тасаввуридан ҳаммавақт ва ҳамма ерда, рицарлиқ романларида ёзилганидек, жангу жадал, сеҳр-жоду, саргулашт ва қаҳрамонликлар, ишқий можаролар, яккама-якка олишувлар нари кетмасди. Шунинг учун ҳам унинг мана шу топда икки душман лашкари бир-бирига қарши келаётганига бирон дақиқа ҳам шубҳаланмаётганига сира ажабланмаса бўлалди. Астиде эса бу чанг — бир яйловдан бошқа яйловга ҳайдаб кетилаётган икки катта қўй сурувининг туёқлари остидан кўтарилаётган чанг эди. Лекин дон Кихот бунинг икки катта қўшин эканлигини шу қадар жон куйдириб таъкидлардики, ниҳоят, Санчо ҳам бунга ишониб, ундан сўради:

— Сеньор, ҳақиқатан ҳам улар бир-бирига душман икки катта қўшин бўлса, бизнинг нима ишимиз бор улар билан?

— Нима ишимиз бор! — хитоб қилди дон Кихот.— Бизнинг ишимиз жабрланганлар ва кучсизларга ёрдам бериш. Биз ёрдамга муҳтож бўлган тарафни қўллашимиз керак. Шуни билгинки,

Санчо, рўпарамиздан келаётган қўшинга улкан Трапобана оролининг ҳукмдори буюк император Алифанфарон бошчилик қилмоқда, орқамиздан келаётган қўшиннинг лашкарбошиси эса унинг душмани гарамантлар қироли Пентаполиндир.

— Бу икки сенъор нима учун урушадилар?— деб сўради Санчо.

— Шунинг учунки,— жавоб қилди дон Кихот,— Алифанфарон христиан Пентаполинининг гўзал қизини севиб қолган; Алифанфарон мажусий, шунинг учун ҳам қизнинг отаси ғайридин Алифанфарон то сохта пайғамбар Муҳаммаддан кечиб, бизнинг динимизни қабул қилмагунгача унга қизини бермоқчи эмас.

— Пентаполин ҳақ бўлмаса, соқолим бир туки қолмай тўкйлиб кетсин!— хитоб қилди Санчо.— Мен унга бажонидил ёрдам кўрсатаман.

— Бу билан сен ўз бурчингни адо этасан,— деди дон Кихот,— чунки бундай жангларда қатнашиш учун рицарь бўлишнинг ҳеч ҳожати йўқ.

— Бунисини-ку биламан-а,— деди Санчо,— менинг ташвишим: кейин эсон-омон яна топиб олиш учун эшагимни қаёққа яширамиз? Эшак миниб жанг қилиш ярашмаса керак деб ўйлайман.

— Сен мутлақо ҳақсан,— деди дон Кихот.— Уни боши оққан томонга қараб қўйиб юбор, кейин топа олармиканман деб асло ғам ема. Зафар қозонганимиздан кейин минглаб отларни қўлга киритамиз, бу ёгини сўрасанг, ҳатто Росинант ҳам хавф остида, уни яхшироқ отга алмаштириб олмоқчиман. Энди, ҳали жанг бошламасимиздан олдинроқ менинг сўзларимни диққат билан эшит: мен сенга ҳар икки қўшиннинг асосий рицарларини айтиб бераман. Уларни яхшироқ кўриб олишинг учун анави теппаликка чиқайлик, юр, у ердан ҳар икки қўшин яққол кўзга ташланади.

Улар теппаликка чиқдилар, лекин бу ердан ҳам бирор нарсани аниқроқ кўриш қийин эди. Қуюқ чанг-тўзон ҳар икки сурувни тўсиб турар эди, лекин дон Кихот бундан ташвишга тушмади. Рицаримиз ўз тасавурида бир-бирлари билан душман бўлган икки қўшинни кўриб турарди. У қўлини олдинга чўзиб, ишонч билан сўзлай кетди:

— Қара, Санчо, ана заррин қурол-аслаҳалар тақиб олган рицарь: унинг қалқонида қиз боланинг оёғи остида ётган тожли арслоннинг расми бор. Бу — Пуэнте де Платнинг ҳокими жасоратли Лауркалько. Унинг ёнида олтин гуллар билан безалган яроғ-аслаҳали жангчи, Киросиянинг улуғ герцоги, даҳшатли Микоколембо. Унинг ўн томонидагиси ҳақиқий паҳлавон, учала Арабистоннинг ҳокими, довюрак Брандабарбаран де Боличе. Унинг совути илон пўстидан ясалган, қўлида қалқон ўрнида душманлардан ўч олиш ниятида жон бераётиб Самсон бузган ибодатхонанинг эшиги. Энди мана бу ёққа қарасанг, қарши томондаги армияни ҳамиша ғолиб ва бирон марта ҳам

енгилмаган Янги Бискайнинг ҳоқими Тимонель Каркахонский бошқариб келаётганини кўрасан; унинг мовий қурол-анжоми олтин ва қумушлар билан қопланган, қўлидаги қалқонда олтин мушукнинг расми бор, тагига «миёв» деб ёзиб қўйилган. Айтишларига қараганда, бу унинг севгилиси—герцог Альгарбскийнинг гўзалликда тенги йўқ қизи Миулинанинг қисқартирилган номи эмиш. Унинг ёнида баҳайбат аргумоқ минган, оппоқ қурол-анжомли, бетамға оқ қалқонли ёш рицарь. У яқиндагина рицарлик унвонини олган француз йигит Пьер Папин, сеньор Утрикскийдир. Хув нарироқдагиси, ҳаворанг яроғ-аслаҳали, йўрға чипор зебранинг биқинларига тигдай ботадиган шпорларини тираб тургани—Эроннинг қудратли герцоги Эспартафилардо дель Боске. Унинг қалқонига бир даста сарсабил расми солиниб, кастиль тилида: «Тақдиримни кўр», деб ёзиб қўйилган.

Дон Кихот тобора завқ-шавққа тўлиб борарди, ўзи тасаввур этган ҳар икки қўшиннинг кўплаб рицарларини санаб ўтди, ҳар қайсисига махсус белги, туғро ва девиз қўйди.

— Рўпарамиздаги қўшин,—давом этди тўхтамай дон Кихот,—турли-туман қабилалардан иборат. Булар орасида машҳур Ксанфнинг ширин сувларидан ичган халқлар бор; уларнинг кетидан Массилия атрофидан чиққан тоғликлар, булардан кейинги бахтиёр Арабистоннинг соф олтин қумларини элакдан ўтказадиган қабилалар келяпти. Ана, нурафшон Термодонтнинг ҳузурбахш соя-салқин соҳилларида яшовчи хушбахт халқлар. Улардан кейин ўз сўзига амал қилмовчи нумидийлар, сўнгра камон отишда довуғи кетган форслар, югуриб-елиб жанг қиладиган мидия ва парфияликлар; кўчма чодирли араблар; шафқатсизликда донг таратган оқ тан скифлар; лабларидан суяк-саёқ ўтказиб олган ҳабашлар ва номларини мен айтолмайдиган бошқа халқлар келишяпти. Иккинчи қўшиннинг олдинги сафларида соҳиллари зайтунзор Бетиснинг зилол сувларини ичиб чанқоғини босадиган қабилалар келишяпти, улар кетидан тўлқинида тилла оқувчи Тахо дарёсининг сувларида чўмиладиган қабилалар; улар кетидан ажойиб Хепилнинг ҳосилдор соҳилларида яшовчилар келишяпти. Ана Хереснинг гўзал яйловларида яйраб яшовчи халқлар, ана олтин бошоқлардан тож кийган бадавлат ламанчликлар; ана ўз сурувларини илон изидек буралиб кетган Гвадиана дарёси ёқаларидаги кенг яйловларда ўтлатувчи қадимий готларнинг сўнги авлодлари; ҳўв ана, ўрмонзорлар билан қопланган Пиреней ва қорли Апеннин тоғу тепаларида совуқда қалтираб кун ўтказадиганлар. Хулласи калом, Санчо, сен бу ерда оламдаги барча қабилалар, халқларнинг ҳаммасини кўриб турибсан<sup>27</sup>.

Қанчадан-қанча мамлақату озмунча халқларни бирма-бир санаб ўтмади дон Кихот!

Буларнинг аксарияти унинг миясини чулғаб олган рицарлик романларида бор эди, холос. Санчо бирон сўз айтишга ботинмай ўз хўжайинининг гапларини диққат билан эшитди. Фақат гоҳогоҳ дон Кихот айтаётган рицарлар ва паҳлавонларга кўзим

тушиб қолармикан деб у ёқ-бу ёққа аланглаб қўярди. Бироқ қуюқ чанг-тўзондан бошқа ҳеч нарсани кўрмасди. Ниҳоят, сабр-тоқати тугаган Санчо хитоб қилди:

— Сиз айтган ўша рицару паҳлавонлар қайси гўрда ўзи? Мен ақалли бирортасини ҳам кўрмайман. Еки улар ҳам ўтган кечаси ҳузуримизга келган шарпаларга ўхшаб сеҳрланганми?

— Нималар деясан!—хитоб қилди дон Кихот.—Отларнинг кишнашини, дўмбираларнинг гумбурлашини, карнайлар овозини эшитмаяпсанми ахир?

— Қўй-қўзиларнинг маърашидан бошқа ҳеч нарсани эшитмаяпман,—жавоб берди Санчо.

Дарҳақиқат, ҳар икки қўй суруви ҳам жуда яқин келиб қолган эди.

— Вужудингни қамраб олган ваҳима аниқ кўришинг ва эшитишингга халал бeryпти,—деди дон Кихот.—Ваҳиманинг маъноси ҳам шунда-да, ахир, сезгирларимиз ўтмаслашади, ҳамма нарса нотўғри, тескари бўлиб кўринади. Қўрқаётган бўлсанг, бир чеккага чиқиб тур, бу ёғини менинг ўзимга қўйиб бер. Кимгаки кўмак бергудек бўлсам ёлғиз ўзим ўша томонга зафар тортиқ қила олишимга ишонавер.

У шундай деди-ю, Росинантнинг биқинига тигдек шпорларни нуқиб, найзасини ўқталганча тепадан пастга қараб яшиндек учиб кетди.

— Жанобим, сеньор дон Кихот, орқага қайтинг,—қичқира бошлади Санчо.—Худо ҳақи, сиз қўзи-қўйларга ҳужум қиляпсиз? Қайтинг орқага, отамнинг номи билан лаънатлайман сизни! Бу қандай нодонлик! Менга ишонинг, бу ерда на паҳлавонлар, на рицарлар, на яроғ-аслаҳаю на қалқонлар ва на мовий осмон бор, ҳеч бало йўқ! У нималар қиляпти ўзи, эҳ гуноҳкор бошим!

Бироқ дон Кихотни ҳеч нарса тўхтата олмади. Шамолдек елиб кетаётиб у баланд овоз билан қичқирди:

— Саховатли Пентаполиннинг содиқ ҳимоячилари, бардам бўлинг! Қани, ортимдан, олға! Мен сизнинг ашаддий душманингиз пасткаш Алифанфарондан ўч оламан!

Шундай ҳайқириқ билан сурувларнинг қоқ ўртасига ёриб кирди-да, гўё ёвуз душманларини яксон қилишга киришгандек, жон-жаҳди билан жониворларга найза санчаверди. Уни тўхтатмоқчи бўлиб подачилар бекорга дод-вой солишарди. Дон Кихот ҳеч нарсага қулоқ солмай ўнгу сўлига найза санчаверди. Унга гап таъсир қилмаслигини англаган подачилар ўз сопқонларини созлаб, дон Кихот устига муштдек-муштдек тошларни ота бошладилар. У бўлса ўтакаси ёрилаётган сурувлар ичида жонбозлик қилар, овози борича қичқирарди.

— Қайдасан, эй, такаббур Алифанфарон? Қани, майдонга чиқ. Мен сен билан яккама-якка жанг қилишга тайёрман, Пентаполин Гарамантскийга беозларча ҳужум қилганинг учун таъзирингни беришга қодир рицарман!



Бироқ шу пайт унинг биқинига каттакон бир тош келиб тегдики, қовурғалари уваланиб кетишига сал қолди.

Қаттиқ оғриқдан дон Кихот ё ўлдим, ёки яраландим, деб ўйлади; малҳами эсига тушиб тунука идишни олди-да, оғзига олиб борди. У ҳали бир неча қултум ичмасиданоқ иккинчи бир тош қўлидаги тунука идишни уриб туширди-да, жағини ёриб юборди. Агар биринчи тошда бечора рицарнинг боши гангиган бўлса, иккинчиси жағига тегиб ҳушдан кетиб ерга қулади. Енига югуриб келган подачилар уни ўлди деб ўйлашди. Улар шоша-пиша сурувларини тўплаб, яраланган еттита қўйни елкаларига ортганча жўнаб қолишди.

Ўз хўжайинининг тентаклигини тепаликдан кузатиб турган Санчо сочларини юлиб, ўзини бу телба идальгога дуч қилган тақдирини лаънатларди.

Подачилар сурувлари билан анча узоқлашганларидан кейин Санчо тепаликдан тушиб, ерда қимирламай чўзилиб ётган дон Кихотнинг ёнига югуриб келди.

— Хўш, мен нотўғри айтган эканманми, сеньор дон Кихот? — деди Санчо. — Ахир мен сизга, бу кўшин эмас, қўйлар суруви деб қичқиргандим-ку.

— Санчо, дўстим, — деди аранг дон Кихот, — сўзларимга ишон, буларнинг ҳаммаси мени ҳамиша таъқиб қилиб юрган сеҳргар душманнинг жирканч хийла-найрангидир! Бу жангда мен қозонадиган шуҳратга ҳасад қилиб, душман лашкарларини қўй сурувига айлантириб қўйди. Гапимнинг ростлигига осонгина ишонишнинг мумкин, Санчо: эшагинга мину уларнинг орқасидан бор. Мендан нарироққа бориб рицарларнинг ўз қиёфаларига киришини, сурувдаги қўйларнинг жасур жангчиларга айланишини кўрасан. Дарвоқе, сабр қил. Аввало, менга ёрдамлашиб юбор. Оғир шикастланганга ўхшайман.

Санчо дон Кихотнинг яраларини боғлаш учун сафар тўрвасидаги суртма мой ва докани олиб келгани эшаги томон югурди, лекин бориб қараса, тўрва йўқ. Тўрванинг йўқолганига ишонган Санчо аламдан ақлидан озаёзди. У роса сўкиниб вайсаяди, ўз хўжайинини ташлаб уйга қайтишга онт ичди, ҳар қанақа орол ва губернаторликка тупурдим, деб бақирди.

Бу орада дон Кихот қўллари билан жағини аста ушлаб ўрнидан турди. Ўз хўжайини олдидан бир қадам ҳам жилмай турган вафодор Росинантнинг юганидан етаклаб, Санчо томон юрди. Санчо кўкраги билан эшагига суянганича юзини қўллари билан бекитиб чурқ этмай турарди. Унинг умидсизланганини кўрган дон Кихот шундай деди:

— Шуни билгинки, Санчо, кимки ўзгаларга қараганда улғурок мартабага эришмоқчи бўлса, оғир қийинчиликларга бардош бермоғи даркор. Бизнинг бошимизга ёғилган даҳшатли фалокатлар бўрони тезда қора булутлар тарқаб осмоннинг очилишидан ва ишларимизнинг ўнгидан келишидан нишонадир. Зотан, ғусса ҳам, қувонч ҳам унча узоққа чўзилмайди, бинобарин ғам-алам узоқ чўзилган экан, демак, севинч яқин қо-

липти. Шунинг учун менинг бошимга тушган фалокатдан сен хафа бўлаверма. Ахир, сенга шикаст етмади, соппа-соғсан-ку.

— Қанақасига соппа-соғ бўлай!—кичқириб юборди Санчо.— Наҳотки кеча чойшабда иргитилган киши отамнинг ўгли бўлмаса? Бор бисотим билан бирга йўқолган тўрва наҳотки меники эмас, бировники бўлса?

— Тўрванг йўқолибдими?—деб сўради дон Кихот.

— Ҳа, худди шундай, йўқолибди,—жавоб қилди Санчо.

— Демак, бугун овқат қилишдан бенасиб бўлибмиз-да,—деди дон Кихот.

— Лекин шу яйловда, муҳтарам жанобларининг сўзларига биноан, жаҳонгашта рицарларга овқат ўрнига ўтадиган гиёҳлар ўсгувчи эди-ку,—деди Санчо.

— Ростини айтсам,—деди дон Кихот,—ҳар қандай гиёҳдан бир бурда нону икки дона қоқланган балиқни афзал кўрадим. Бу гапдан нима фойда! Эшагинга мин, азизим Санчо, орқамдан юр. Худойи таоло марҳамати бениҳоя: ҳаводаги чивилларнинг, ердаги қурт-қумурсқаларнинг, сувдаги итбалиқларнинг насибасини ўзи етказди. Унинг қуёши ҳаммага—ёмонларга ҳам, яхшиларга ҳам баробар нур сочади, унинг оби раҳмати художўйларга ҳам, гуноҳкорлар бошига ҳам баробар ёғилади. У албатта биз каби бандаларига ҳам меҳр-шафқат кўрсатади.

— Муҳтарам жаноблари, сизга жаҳонгашта рицарликдан кўра воизлик кўпроқ ярашаркан,—деди Санчо.

— Жаҳонгашта рицарлар ҳамма нарсани билишлари ва удасидан чиқа олишлари керак,—деб жавоб қилди дон Кихот.— Илгариги замонларда нотиклик ва ваъзхонликда Париж университети докторларининг ҳеч биридан қолишмайдиган рицарлар бўлган. Шуни билгинки, дўстим, ҳеч қачон найза қаламни, шунингдек, қалам найзани ўтмаслаштирмаган.

— Яхши, сенъорим, сиз айтгандек бўла қолсин,—деди Санчо.—Энди юринг, тунаш учун бирор жой топайлик. Худо худолигини қилиб тунашга бирор бошпана ато қилса-ю, у ерда на сеҳрли чойшаб, на арвоҳу шарпа ва на сеҳрланган маврлар бўлса. Уларнинг бирортасига яна рўпара бўлгандан кўра жаҳаннамга кетганим афзалроқ.

— Худодан марҳамат тила, жигаргўшам ва мени хоҳлаган томонга бошла,—деди дон Кихот.—Бу гал тунашга жой танлаш сенинг ихтиёрингда. Энди қўлинг билан бир пайпаслаб кўр-чи, нечта тишим синганикин. Мана бу ёғини, ўнг томонини кара, чунки бу жағим қаттиқ оғрияпти.

Санчо унинг оғзига қўлини тикиб, сўради:

— Жанобларининг бу ерда илгари нечта тишлари бор эди?

— Тўрт дона,—жавоб берди дон Кихот,—ақл тишимдан бошқа ҳаммаси бутун, соппа-соғ эди.

— Муҳтарам жаноблари янглишмаяптимикинлар?—деб сўради Санчо.

— Мабодо бешта бўлмаса, тўрт дона деяпман-ку, сенга,—

деди дон Кихот. — Умр бўйи бирортаси суғурилмаган, қурт емаган, шамоллашдан тушиб кетмаган ҳам.

— Мана энди муҳтарам жанобларининг, — деди Санчо, — бу ёғларидаги пастки жағларида икки яримта тишлари қолипти, юқорида эса ҳеч нима йўқ, кафтдек теп-текис.

— Ана бахтсизлиг-у! — хитоб қилди дон Кихот яроқбардоридан бу қайгули хабарни эшитиб. — Бундан кўра қўлимни — албатта қилич тутадиган ўнг қўлимни эмас, кесиб ташлашгани яхшироқ эди. Зотан, шуни билиб қўйгинки, Санчо, озиқ тишларисиз оғиз тошсиз тегирмондек бир гап; инсон учун ҳар бир тиш олмосдан қимматлироқдир. Нима ҳам қилардик, рицарликнинг оғир йўлига кирган эканмиз, ҳали бошимизга бундан бешбаттар фалокатлар тушиши мумкин. Дўстим, қани эшакка мину, йўл бошла, бошинг қаёққа оғса, мен ҳам кетингдан бораман.

Санчо эшагига миниб, тунамоқ учун жой топа олишига ишонган томонига катта йўл бўйлаб жўнади. Дон Кихот эса унинг кегидан Росинантни секин ҳайдаб борарди: у отини тезроқ елдиrolмас эди, биқинлари ва жағининг оғриғидан эгарда аранг ўтирарди. Ўз жанобини бирор нарса билан овутиш илинжида Санчо қўйидагича суҳбат бошлади.

#### XIV БОБ

### САНЧО ПАНСА БИЛАН УНИНГ ХУЖАИНИ УРТАСИДАГИ ОҚИЛОНА СУҲБАТ ВА УНДАН КЕЙИН МУРДА ОЛИВ КЕТАЕТГАНЛАР БИЛАН ТЎҚНАШУВ

— Менинг кўнглимга шу фикр келяптики, сеньор, — деди Санчо, — бошимизга ёғилаётган барча фалокатлар муҳтарам жанобларининг тантанавор қасамёдга амал қилмаганликлари туфайли юз берди. Ахир, анави Маландринми ё Ламандринми бўлмаса, ҳақ оти қурсин, ўша сеҳргарнинг дубулғасини қўлга киритмагунингизча бирор қапада ётмаслигингиз, ечинмаслигингиз, дастурхон ёзиб нон емаслигингиз ва яна аллақанча шартларни бажаришингиз керак эди-да.

— Тўғри гапиряпсан, Санчо, — деди дон Кихот. — Рост гап, бу қасамлар тамомила хаёлимдан кўтарилибди. Сени чойшабда нега иргитганларини энди тушуняпман. Сен буларни ўз вақтида менга эслатиб қўймагансан, лекин, кўрасан, мен ўз гуноҳимни оқлайман. Рицарнинг қахрамонлик кўрсатиш билан оқланмайдиган гуноҳи йўқ.

— Ие, менинг айбим нима, ахир мен ҳеч қанақа қасам ичган эмасман-ку! — хитоб қилди Санчо.

— Қасам ичганмисан, ичмаганмисан, бунинг фарқи йўқ, — деди дон Кихот, — ихтиёрийми-беихтиёрми, барибир, мен билан ҳамкорлик қилдингми, шунинг ўзи кифоя. Қасамни бузаётганимни кўргансан-у, мени тўхтатмагансан.

— Ундай бўлса, муҳтарам жаноблари, бу гапларни ўз аҳдларини унутгандек эсдан чиқариб юбормасинлар. Шарпалар яна

мени, эҳтимол, муҳтарам жанобларини ҳам калака қилишни истаб қолса борми, ҳолимизга вой!

Шу тарзда суҳбатлашиб йўловчиларимиз катта йўлдан оҳиста илгарилаб боравердилар. Бу орада қуёш ботиб, ҳамма ёқни қоронғу босди, тунайдиган бирон бошпананинг эса қораси ҳам кўринмасди. Азоб чекиб, очқаб, тунаш ғамида индамай йўлда давом этардилар. Бирдан олисда, йўлда учар юлдузларга ўхшаш ёрқин шуълалар ўтлар милтиллаб кўринди. Буни кўрган Санчонинг қўрқувдан жони чиқиб кетишга сал қолди, дон Кихот ҳам ўзини унутаёзди.

Бири эшак нўхтасини, иккинчиси от тизгинини тортди ва бу нима бало бўлди, деб икковлари ҳам тўхташди. Шуълаларнинг тобора ёрқинлашаётганидан ўтларнинг ўзлари томон яқинлашиб келаётгани яққол кўриниб турарди. Шу топда Санчо куз япроғидек қалтирар, дон Кихотнинг ҳам туклари тип-тикка бўлиб кетганди. Бутун жасоратини тўплаб, рицаримиз шундай деди:

— Шубҳасиз, Санчо, мен бутун куч ва жасоратимни кўрсатишим зарур бўлган катта ва ғоят қалтис воқеа юз беради.

— Оббо, шўрим қуриди! — қичқириб юборди Санчо. — Агар булар яна арвоҳлар бўлса, — афтидан шунақага ўхшайди, — уларнинг калтаклашига бардош бера оладиган шунча қовурғани қаердан оламан-а?

— Бу шарпалар ким бўлмасин, — ишонч билан деди дон Кихот, — сенгагина эмас, ҳатто устингдаги кийимингнинг бирор ипига қўл теккизишларига ҳам йўл қўймайман. Ўтган гал мен девордан ошиб ўта олмаганим туфайли сени калака қилишди. Лекин ҳозир биз очиқ ердამиз, бу ерда бемалол қилич ўйната оламан.

— Агар улар бу сафар ҳам олдингидек афсун ўқиб, жойингиздан қўзғатмай қўйишса, очиқ ерда бўлишингиздан нима фойда? — деди Санчо.

— Ҳар ҳолда сендан илтимос, Санчо, руҳингни туширма, — деди дон Кихот. — Менинг жасоратим қандайлигини ҳозир амалда кўрасан.

— Худонинг марҳамати билан ўзимни дадилроқ тутишга ҳаракат қиламан, — деди Санчо.

Улар йўлдан бир оз четга чиқиб, қоронғиликда яқинлашиб келаётган шуълаларни яна синчиклаб кузата бошладилар; кўп ўтмай сербар, узун либос кийган бир тўда қандайдир йўловчиларни кўзлари илғай бошлади; бу қўрқинчли ҳол Санчога шу қадар ёмон таъсир этдики, безгак тутаётгандек тишлари такилларди. Бу сирли маросим бемалол кўринадиган даражада жуда яқин келиб қолганда Санчонинг тамомила қути учиб, тишлари янада қаттиқроқ такиллаб бошлади. Олдинда қўлларида машъала тутган, оқ мантия кийган йигирма чоғли отлиқ, улар кетидан мурда ташийдиган вазмин аравалар келарди; аравалар орқасидан эса этаклари хачирларнинг туёғигача тушадиган узун мотам чопонларини кийган яна олти киши келарди (уларнинг от эмас, хачир миниб келаётганликлари хачирларнинг секин юришидан кўриниб

турарди). Отлиқлар нималар ҳақидадир эшитилар-эшитилмас гудурлаб, ғамгин гаплашганча секин келардилар. Ҳувиллаган яйдоқ даштда, бунинг устига ярим кечада, бу ғалати манзара ҳар қанақа одамнинг ҳам ўтакасини ёриб юборарди. Рўпарадан келаётганларнинг арвоҳ эканликларига ҳеч шубҳа қилмаган Санчонинг руҳи бутунлай тушиб кетди. Санчо қўрққан сари дон Кихотнинг кўзларига романларда тасвирланган саргузаштлардан бири яққол кўриниб, унинг ботирлиги тобора авж оларди.

Мурда ташувчи арава қўшғилдиракли мотам соябонидай, унда ўлдирилган ёки оғир яраланган рицарни олиб келаётгандай кўринди ва угина, яъни дон Кихотгина бу рицарь учун ўч олмоғи даркордек туюлди. Узоқ ўйлаб ўтирмай, найзасини жангга шайлаб, эгарга маҳкамроқ ўтирди-да, қаддини ростлаб, мантияли отлиқлар ўтадиган йўлнинг ўртасига виқор билан чиқиб турди. Йўловчилар яқин келганда баланд овоз билан қичқирди:

— Эй, ким бўлсаларинг ҳам тўхтанглар! Дарҳол жавоб беринглар, ким бўласизлар, қаердан қаёққа кетяпсизлар, бу соябон аравада кимни олиб кетяпсизлар. Кўринишингиздан ё жиноятчиларсиз ёки ёвузлардан жафо чекканларсиз. Қилган жиноятингизга яраша жазолашим ёки кўрган жабрингиз эвазига қасд олишим учун гап нимадалигини билмоғим зарур.

— Биз шошиляпмиз, карвонсаройгача ҳали анча бор,— деди отлиқлардан бири,— шунинг учун сиз билан гаплашиб ўтиришга вақтимиз йўқ.

Шундай деб, у хачирини «чу» дея унинг ёнидан ўтиб кетмоқчи эди. Бу жанобдан ҳақоратланган дон Кихот хачирнинг жиловидан ушлаб, қичқирди:

— Тўхтанг, беодоб нодонлар, саволларимга жавоб берингиз! Йўқса, мен сизларни жанг майдонига чақираман.

Ҳуркиб кетган хачир олд оёқларини кўтариб тик кўтарилган эди, устида ўтирган одам ерга ағдарилиб тушди. Унинг ёнида келаётган хизматкори дон Кихотни роса сўқди. Бусиз ҳам қаҳр-газаби қайнаган дон Кихот қора кийимдаги отлиқлардан бирига ташланиб, кўз очиб-юмгунча ерга қулатди уни. Сўнгра у яшин тезлигида бошқа рақибларига ташланди. Росинант, гўё қанот пайдо қилгандай, гоҳ олдинга, гоҳ орқага енгил ва ғурур билан югуриб-еларди. Мантия кийган йўловчилар қўрқоқ ва бунинг устига қуролсиз одамлар эди. Улар дон Кихотга қаршилиқ кўрсатишга ҳаракат ҳам қилмай чор атрофга қочиб қолишди. Назарларида уларга одам эмас, иблис ҳамла қилгандек туюлган бўлса керак.

Душманни тумтарақай қочириб, дон Кихот яна хачир ағдарган одамнинг ёнига келди. У шўрлик ҳамон ерда ётар, ёнида эса ёниб тугай деб қолган машъала ётарди. Дон Кихот унга найзасини ўқталиб, ўлим даҳшатини сочиб таслим бўлишини таклиф қилди.

— Таслимман, таслимман!— қичқирди ердаги одам.— Менга шафқат қилинг, мухтарам зот, оёғим синиб кетди, ўрнимдан туролмаяпман. Ўтиниб сўрайман, сеньор, агар одил христиан бўлсангиз мени ўлдирманг. Ахир мен дин пешволариданман.

— Сиздек диндор шахсни бундай ишларга аралашишга қайси иблис мажбур этди,— хитоб қилди дон Кихот.

— Аралашишга ким мажбур этди дейсизми? Бу кўргилик бераҳм тақдирдан бўлса керак,— деди ерда ётган йўловчи.

— Эҳтиёт бўлинг, бундан ҳам бешбаттар бўлишларингиз ҳеч гап эмас,— деди дон Кихот.— Яхшиси, қайсарлик қилмай, ўзингиз кимсизу бу қанақа маросим эканини аниқроқ тушунтириб беринг.

— Муҳтарам жанобларининг саволларига бажонидил жавоб бераман,— деди у.— Шундай қилиб, муҳтарам жанобларининг ахбори олийларига ҳавола бўлсинки, менинг исми-шарифим Алонзо Лопес бўлиб, асли алькобендасликман. Мен анави тумтарақай қочган ўн бир дин пешволари билан Баэса шахрдан йўлга чиққан эдим. Баэсада қазо этган сеговиялик бир дворяннинг жасадини ўз хилхонасига қўйиш учун олиб кетаётган эдик.

— Уни ким ўлдирди?— деб сўради дон Кихот.

— Чиркин иситма ёрдамида худо уни лаҳадга йўллади.

— Ундай бўлса,— деди дон Кихот,— худо мени бу одам учун ўч олиш машаққатидан халос этибди, чунки унинг ўлимига ҳеч ким айбдор эмас экан. Тақсири аълам, сизга шу нарсани айтиб қўймоғим керакки, каминангиз ламанчлик рицарь дон Кихот бўладилар. Менинг бурчим — адолат йўлида ёвузларнинг таъзирини бериш, аламзадаларни ҳимоя қилиш, бахтсизларга таскин бериш учун олам кезишдир.

— Қандай адолат ўрнатишингизни мен билолмай қолдим,— деди руҳоний,— оёғимни шундай «тузатиб» қўйдингизки, энди умримнинг охиригача соғайиб кетиши амримаҳол. Бунинг устига менга шундай тасалли бердингизки, ўла-ўлгунимча эсдан чиқармайман. Сизнинг бу саргузаштингиз менинг бошимга тушган бир мусибат бўлди.

— Ҳамма нарса биз ўйлагандек бўлавермайди,— деди дон Кихот.— Ҳамма бало шундаки, сеньор лиценциат, мотам либо-сида, машъалалар билан аллақандай тушуниб бўлмайдиган дуоларни ўқиб, ярим кечада йўл юришни ихтиёр қилиб қолган сизлар. Сизларни у дунёдан чиққан ёвуз иблислар тўдаси деб билиб, жаҳонгашта рицарлар бурчига кўра ҳамла қилганимни тушуниш мумкин эмас, албатта.

— Пешонамда бор экан-да, бу кўргилик,— деди лиценциат,— ҳар ҳолда сеньор жаҳонгашта рицарь, модомики бошимга кулфат солган экансиз, ҳеч бўлмаса туриб олишга ёрдам қилинг, узангига ўралиб қолган оёғимни чиқара олмаяпман.

— Нега шу вақтгача индамадингиз!— хитоб қилди дон Кихот.— Санчо! Санчо!— деб чақирди ўз яроқбардорини.

Бироқ Санчо унинг чақиригига шошилмаб эди. Олишув бошланган дастлабки дақиқаларда у ўз хўжайинининг жасорати ва чаққонлигидан ҳайратда қолди, аммо кейинчалик қўрқув ва ҳайратни унутиб, секингина орқада келаётган хачирга ортилган озиқ-овқатларни бир ёқли қилишга киришиб кетди. Озиқ-овқат-

ларни чопонига тугиб, уни эшагига ортиб қўйгандан кейингина хўжайини томон юрди. Икковлари биргаллашиб сеньор лиценциатни аранг хачир остидан суғуриб олдилар-да, эгарга ўтқазиб, қўлига машъал тутқаздилар. Сўнгра дон Кихот бу бечора йўловчига ўз ҳамроҳларига етиб олишини, жаҳонгашта рицарь муқаддас бурчини адо этайтиб уларни ноўрин хафа қилиб қўйгани учун узрини бориб айтишни буюрди. Санчо бўлса бунга қўшимча шундай деди:

— Мабодо у сеньорлар шундай эпчиллик билан таъзирларини берган ботирнинг ким эканлигини билмоқчи бўлсалар, муҳтарам зот, бу Ғамгин Қиёфа лақабли ламанчлик машҳур рицарь дон Кихот деб айтинг.

Лиценциат улар билан хайрлашиб ўз йўлига жўнаб кетгандан кейин, дон Кихот Санчодан нега уни Ғамгин Қиёфали рицарь деб атаганини сўради.

— Биласизми, муҳтарам хўжам,— жавоб берди Санчо,— менинг кўзимга машъала ёруғида шундай бахтсиз, ҳорғин, шундай озғин ва заҳил рангда кўриндингизки, бунга кўриб юрагим эзилиб кетди. Афтидан, бу жангу саргузаштлар туфайли анча тинка-мадорингиз қуриганга ўхшайди.

— Йўқ, Санчо,— деди дон Кихот,— гап асло унда эмас. Тўғрироғи, менинг жасоратларим тарихини олтин саҳифаларига битувчи донишманд, қадимий рицарлар каби ўзимга ҳам бирор муносиб лақаб танлашимни истаган: улардан бири Ўтли Қилич рицарь, бири рицарь Дев, бошқа бири Улим рицари деб аталган ва шу лақаб билан жаҳонга машҳур бўлишган. Менимча, мана шу ваздан ўша донишманд мени Ғамгин Қиёфа рицарь деб аташни сенинг дилингга солган. Шу дамдан эътиборан мен шу лақабни қабул қиламан ва бундан-буён ҳам уни сақлаб қолиш учун имкон бўлиши биланоқ қалқонимга энг ғамгин қиёфа тасвирини солдираман.

— Бунинг учун вақт ва пул сарфлашнинг ҳеч ҳожати йўқ,— деди Санчо.— Юзингизга тушиб турган сипарни кўтарсангиз бас, ҳар қандай киши қалқонингиздаги тасвирсиз ҳам сизни Ғамгин Қиёфа рицарь деб атайди — ҳа, сўзимга ишонаверинг. Онт ичаман, шундай, сеньор. Очлик ва уриб синдирилган тиш сизга шундай оро бериб туриптики, қалқонга тасвир ўйдириб ўтиришингизнинг асло ҳожати йўқ.

Дон Кихот кулимсиради, Санчо билан тортишиб ўтирмади. Бирдан рицаримиз миясига мурда ортилган аравани текшириш, ҳақиқатан ҳам у ерда одам жасади борми-йўқлигини билиш фикри келиб қолди. Лекин Санчо бунга кўнмади.

— Сеньор,— деди у,— сиз учун бу қалтис воқеанинг охири олдингиларидан кўра бахайр бўлди. Бироқ сиздан тумтарақай қочган одамлар яккаю ягона бир рицардан қочганликларини найқаб қолишлари мумкин. Эс-ҳушларини йиғиб, қўрқоқлик қилганларидан ўсал бўлиб қайтиб қолсалар борми, бизни яхшилаб калтаклашлари мумкин. Эшакни тахт қилиб қўйганман, тоғ қин, қоринлар оч, ўликлар лаҳадгаю тириклар дастурхонга де-

ганларидек, бу ердан чаққонроқ жилиб қолганимиз маъқул эмас-микан?

Сўнгра Санчо эшак нўхтасини тутиб, илдам жўнаб қолди. Дон Кихот яроқбардорининг ҳақлигига иқрор бўлиб, ҳеч эътирозсиз унинг кетидан йўлга тушди. Қатор-қатор тепаларни ошиб, атрофи шамолдан тўсилган тинчгина ўтлоқ майдончага кириб қолишди ва шу ерда тунашга қарор қилишди. Санчо эшакдаги юкларни туширди: рицарь билан яроқбардор ўт-ўланлар устида ёнбошлашиб бир йўла нонушталик, тушки ва кечки овқатни туширдилар. Черковчи жаноблар хачирга ортиб келаётган совуқ таомлар (улар ўзларини сийлашни биладилар) билан қоринларини роса тўйдиришди. Бироқ уларнинг бошига яна янги ташвиш тушди: томоқларини ҳўллагани вино у ёқда турсин, бир қултум сувлари ҳам йўқ эди. Шунда Санчо ўтлоқнинг баррадек май билан қопланганини кўриб шундай деди... аммо унинг нима деганини келгуси бобдан биламиз.

## XV БОБ

### ЛАМАНЧЛИК РИЦАРЬ ДОН КИХОТНИНГ КЎЗ КЎРИБ, ҚУЛОҚ ЭШИТМАГАН ҚАҲРАМОНЛИГИ

— Бу ўтлар шу қадар кўм-кўк бўлиб яшнаб турибдики, сеньор, шу яқин орада ариқча бўлса керак. Сал нарироққа бориб кўрайлик-чи. Тўғрисини айтганда, очликдан ҳам баттарроқ қийнаётган чанқоқни бостиришимизга ишончим комил.

Бу маслаҳат дон Кихотга маъқул тушди: у Росинантни жиловидан ушлаб, Санчо бўлса кечки овқатдан қолган озуқаларни эшакка юклаб, секин-аста жўнадилар. Тун ниҳоятда қоронғи бўлиб, улар ўтлоқда пайпаслана-пайпаслана зўрға борардилар. Улар ҳали икки юз қадамча юрганлари ҳам йўқ эдики, бирдан улкан ва баланд қоялардан шовиллаб тушаётган сувнинг товуши эшитилгандек бўлди. Шовиллаган товуш уларни ғоят қувонтириб юборди. Шовқин қаёқдан келаётганини аниқлаш учун тўхтаб қулоқ сола бошладилар. Шу дамда бирдан сув шовиллашига ўхшамаган аллақандай ғалати товушни эшитиб қолишди. Бу қандайдир бир оҳангдаги зарб товуши бўлиб, худди биров болға билан сандонни ураётгандай эди. Бу товуш кучли сув шовқини билан аралашиб кетар ва ҳар қанақа одамнинг юрагига ваҳима соларди. Табиатан қўрқоқ, юраксиз бўлган Санчо бу даҳшатдан ўзини тамомла унутаёди. Зим-зиё тун, кимсасиз ҳувиллаган жой, шаббодада тебранаётган дарахт барглари оҳиста ва қўрқинчли шивирлайди: олисда шаршара гувиллайди, шу сурон орасида бир оҳангдаги ўша ваҳимали зарб эшитилиб турарди — буларнинг ҳаммаси юракка ваҳима солади.

Дон Кихот бу мавҳумликда ортиқ чидаб туролмади. Жасорат ва шижоат билан тўлиб-тошиб, содиқ Росинантга жадал минди-ю, қалқонини олиб, найзасини ўқталганча хитоб қилди:

— Дўстим Санчо, шуни билиб қўйгинки, само мени шу темир



асрда бунёд қилган экан, бундан мурод, мен олтин асрни қайта тиклашим керак. Мен — пешонасига хавф-хатарлар, улуғвор ишлар, мислсиз қахрамонликлар ёзилган зотлардан бўламан. Мен, такрор айтаманки, Тўғарак стол рицарлари<sup>28</sup>, Франциянинг ўн икки пәри, Шавкатли тўққиз паҳлавоннинг<sup>29</sup> жасоратини тиклашга, ўз шон-шуҳратим билан Платирлар, Таблантлар, Оливантлар, Тирантлар, Феб ва Бельянислар ва ўтмишдаги бошқа барча машҳур жаҳонгашта рицарлар галасидан устун бўлишга даъват этилган шахсман, чунки шундай буюк, мислсиз қахрамонликлар кўрсатаманки, мен қилган ишлар олдида бу паҳлавонларнинг энг шуҳратли ишлари ҳам ҳеч нарса бўлмай қолади. Қулоқ сол, менинг вафодор содиқ яроқбардорим, қандай сокин, зим-зиё кеча, япроқлар эшитилар-эшитилмас шивирлайди, сув Ой тоғларидан тушаётгандек ваҳимали гувиллайди, бетиним зарбалар эса қулоқларни тешгудек кишининг гашига тегяпти. Буларнинг ҳаммаси ҳатто Марснинг<sup>30</sup> юрагига ваҳима солиши мумкин, бундай даҳшатли ҳодисаларга ўрганмаган кишининг эса ҳолига вой! Лекин мен қўрқшини билмайман, томирларимда қоним жўш уряпти, юрагим кўкрагимни ёриб чиққудек гупуллаяпти — қанча хавфли бўлмасин, шу зулматдаги саргузаштларни бошдан кечиришга ошиқяпман. Хўп, яхши қол! Росинантнинг айилини бир оз тортиб қўй, худо ўз паноҳида асрасин сени! Мени бу ерда кўп эмас, уч кун кутгин. Агар уч кундан кейин қайтиб келмасам, уйга, қишлоққа жўна, сўнгра Тобосога бориб, оламда тенги йўқ маликам Дульсинеяга, сиз қалбини асир этган рицарь содиқ қулингиз бўлиш орзусида мислсиз қахрамонлик кўрсатиб ҳалок бўлди, дегин.

Ўз хўжайини сўзларини эшитган Санчонинг кўнгли бузилиб, кўзига ёш оларкан, шундай деди:

— Сеньор, бундай даҳшатли кўргуликка ўзингизни уриш қаёқдан хаёлингизга келиб қолди, сира тушуна олмаяпман буни. Ахир, қоп-қоронғи тун бўлса, бизни биров кўрмаса, гарчи уч кундан буён ҳеч нарса ичмаган бўлсак ҳам, бемалол бошқа ёққа бурилиб хавф-хатарлардан нари кетишимиз мумкин бўлса. Буни ҳеч ким билмайди ва бизни қўрқоқ деёлмайди. Дарвоқе, жаноблари яхши билган қишлоғимиз руҳонийсининг, кимки хатар изласа, у албатта халок бўлади, деган насиҳати ёдимда. Чойшабада иргитиш менинг қисматимга тушиб, само сиз муҳтарам жанобларини бундан асраб қолди. Яна тангри сизни, марҳумни кузатиб бораётган душманлар галасига қарши ғолибона жанг қилганингизда бешикаст сақлаб қолди. Шунча қилганингиз етиб ортади. Тақдирингизни мўъжиза билангина омон қоладиган саргузаштлар йўлига тикманг. Мени ўйланг. Билиб қўйингки, мени ёлғиз қолдириб кетишингиз биланок азбаройи қўрқувдан жонимни ҳар қандай кимсанинг қўлига топшириб қўйишим мумкин. Мен муҳтарам жанобим хизматини ўташ, бу йўлда муддаога етиш ниятида ватанимни, хотинимни, болаларимни ташлаб чиқдим. Камбағалнинг ови юрса ҳам дови юрмайди, деб бежиз айтмаган эканлар. Менинг ҳамма умидларим чиппакка чиқмоқда. Муҳтарам жаноб-

лари кўп марта ваъда қилган ўша савил қолгур орол энди менга насиб бўлса керак деб турганимда, сиз мени шу хилват, кимсасиз жойда қолдириб кетмоқчисиз. Худо ҳақи ўтинаман, сеньор, бошимга бундай мусибатни солманг. Ҳеч бўлмаса тонг отгунча сабр қилинг, агар подачилик қилиб юрган кезларимда вақтни билиш борасида ўрганган илм-тажрибам панд бериб қўймаса, тонг отишига атиги уч соат қолди. Етти Оғайни қоқ тепамизда турипти, демак, вақт ярим кеча.

— Қани ўша Етти Оғайни<sup>31</sup>, Санчо?— сўради дон Кихот.— Ахир, тун булут билан шу қадар қопланганки, осмонда бирор юлдузни кўриб бўлмайди?

— Айтганингиз тўғри,— деди Санчо,— кўрққанга қўшалок кўринади деганларидек, ер остидагию осмони фалакдаги ҳар нарса кўринаверади. Дарвоқе, бусиз ҳам, мундоқ ақл ишлатиб ўйлаб қаралса, тонг отишига оз қолгани аниқ кўриниб турибди.

— Тонг қачон ёришса ёришаверсин,— жавоб қилди дон Кихот,— лекин ҳеч ким ҳеч қачон мени, кўз ёшлари, ёлворишлари олдида рицарлик бурчини ўташдан воз кечди, дея олмайди. Бинобарин, бас қил бу гапларни, Санчо! Бу мисли кўрилмаган ва даҳшатли саргузаштга қотишишни дилимга солган худо мени ўз паноҳида сақлайди ва сенга тасалли беради. Бас, энди Росинантнинг айилини торт, мени шу ерда кут, тез орада ё тирик, ёки ўлик ҳолда қайтаман.

На кўз ёши, на маслаҳат ва на ёлворишлар хўжайинининг собит иродасига таъсир қилмаганини кўрган Санчо ҳийла ишлатишга киришди. У Росинантнинг айилини тортар экан, унинг орқа оёқларини билдирмасдан эшагининг нўхтаси билан боғлаб қўйди. Ҳеч нарсадан хабарсиз дон Кихот ирғиб Росинантга минди-ю, шпорлари билан биқинига ниқтади. Бироқ, нўхтага ўралашиб қолган от жойидан жила олмади. Ҳийласининг ўринлаганига ишонган Санчо Панса шундай деди:

— Мана кўрдингизми, муҳтарам зот, менга халлоқи оламнинг раҳми келди, мени ёлғиз ташлаб кетишингизни хуш кўрмаяпти. Жойингиздан қўзғала олмаяпсиз, Росинант қанча чиранмасин туёғи ердан узилмаяпти. Бу бечора жониворни азоблаш, атайлаб тақдирга қарши бориш гуноҳдир!

Дон Кихот жазаваси тутиб, жон-жаҳди билан отини ниқтар, лекин қанча чиранмасин отни ўрнидан қўзғатолмас эди. Ниҳоят, ҳолдан тойган, тақдирга тан бериб, тонг отишини ёки отнинг жойидан қўзғала олиши мумкин бўлган дақиқани кутишга қарор қилди. Ишнинг бундай мушкуллашишида қандайдир сирли кучларнинг таъсири борлигига ишониб, у шундай, деди:

— Начора, Санчо! Модомики Росинант жойидан жилолмаётган экан, кўкда тонг жилваси кўринмагунча сабр этишга тўғри келади. Бироқ тонг отиши ҳам чўзилиб кетяпти, аламимдан дод солиб йиғлаб юборай деяпман.

— Йиғининг ҳожати йўқ,— жавоб қилди Санчо.— Агар Росинантдан тушиб, жаҳонгашта рицарларга ўхшаб майсазорда бир оз ёнбошлаб ҳордиқ чиқаришни лозим кўрмасангиз, сиздек муҳта-

рам жанобимни овутиш учун эрталабгача ажойиб воқеалардан сўзлаб бераман. Мислсиз қахрамонлик кўрсатишдан олдин сиз куч-ғайрат тўплаб олишингиз керак.

— Нима! Сен отдан тушиб, бир оз мизғиб олганингиз маъқул деяпсанми?— хитоб қилди дон Кихот дарғазаб бўлиб.— Наҳотки сен мени хавф-хатар таҳдид қилиб турган бир пайтда ухлайдиган баъзи рицарлардан деб ўйласанг. Уйқуни ўзинг ур — сен ухлашга яратилгансан, ёки кўнглинг тусаганини қилавер; мен бўлсам ўз шаънимга муносиб иш тутаман.

— Жаҳлингиз чиқмасин, муҳтарам сенъорим,— деди Санчо,— соддалигим қурсин, шу сўзларни айтиб ўтирибман. Ёнингизга яқинроқ туришга рухсат этинг.

Дон Кихот илтифот кўрсатди. Шунда Санчо икки қўли билан хўжайини ўтирган эгарни маҳкам ушлаб, ундан бирор қадам ҳам узоқлашишдан қўрқиб, чап сонига тираниб олди. Қаёқлардан-дир эшитилаётган ўша бир меъёрдаги зарб товушидан уни қўрқинч босарди.

— Хўш, Санчо, мени овутиш учун сўзламоқчи бўлган ҳикоянгни нега бошламаёсан?— деди дон Кихот.

— Мен сизга бир воқеани ҳикоя қилиб беришга уриниб кўраман,— деди Санчо,— агар уни охиригача тугата олсам, оламда бундан аъло ҳикоя йўқлигига иқрор бўласиз. Диққат билан эшитинг, муҳтарам зот, мана ҳозир бошлайман. Шундай қилиб, ўтган ишга салавот. Яхшилик бўлгудай бўлса, ҳаммага бўлсин, ёмонлик эса унинг кўйига тушганга тегсин. Муҳтарам жаноб, «Бало излаганга тегсин», деган сўзларга эътибор беринг. Бу сўзлар гўё узукка кўз қўйгандай, сизга жуда ёпишиб тушади-да: муҳтарам ҳазратлари фалокат изига тушиб, дарбадар юрмай, тинчгина ўтирганлари маъқул эди. Модомики, бизни хавф-хатарларга тўла бу йўлдан боришга ҳеч ким зўрламаётган экан, бошқа йўл билан тинчгина қайтиб кетганимиз яхши эмасмикан?

— Ҳикоянгни давом эттир, Санчо,— деди дон Кихот,— қайси йўлдан боришни ҳал қилишни менинг ўзимга қўйиб бер.

— Давом эттираман,— деди Санчо.— Шундай қилиб, Эстремадура деган бир жойда эчки боқадиган бир подачи, бошқача қилиб айтганда серкабоқар бўлган экан ва бу эчки боқувчи подачи ёки менинг ҳикоямда айтилгандек серкабоқарни Лопе Руис деб аташаркан. Ўша Лопе Руиснинг Торральба исмли чўпон қизга ишқи тушиб қолипти, шу Торральба деган подачи қиз бир бадавлат чорвадорнинг қизи бўлиб, бадавлат чорвадор эса...

— Агар ҳар сўзни икки мартадан қайтарадиган бўлсанг, Санчо,— деб унинг сўзини бўлди дон Кихот,— у ҳолда ҳикоянгни икки кунда ҳам тугатолмайсан; донолардек қисқароқ ва маънолироқ қилиб сўзла, йўқса, овозингни ўчир!

— Бу эртақлар қишлоғимизда қандай айтилса, худди ўшандай сўзлаёпман,— жавоб қилди Санчо.— Бошқача қилиб айтолмайман, бундан ташқари, бу қадимий одатни бузишни иста-

майман ҳам. Бинобарин, жанобларининг мендан буни талаб этишлари ҳам ўринли эмас.

— Майли, билганингча айтавер, — деди дон Кихот, — модомики, ҳикоянгни тинглаш насиб бўлган экан, сабр-тоқат қиламан.

— Шундай қилиб, сеньорим, — давом этди Санчо, — мен сизга айтган чўпон Торральба деган подачи қизни яхши кўриб қолганди. Бу қиз, ҳозир кўз олдимда тургандек, барваста, ўжар бўлиб, мўйлови бўлганидан эркакка ўхшар эди.

— Уни танирдингми? — сўради дон Кихот.

— Мен-ку уни билмайман-а, — жавоб қилди Санчо, — лекин бу воқеани айтиб берган киши, буларнинг ҳаммаси рўйирост бўлган воқеа, агар буни бирорта кишига сўзлайдиган бўлсанг қасам ичаманки, ўз кўзим билан кўрганман деявер, деган. Шундай қилиб, вақт ўтаверди-ўтаверди, ҳамиша ҳар ерда ҳозир шайтон шумлигини қилаверди, ниҳоят, чўпоннинг подачи қизга бўлган муҳаббати қаттиқ газаб ва нафратга айланди. Чўпон уни шу қадар ёмон кўриб қолдики, унинг қорасини кўрмаслик учун ҳатто қишлоқни ташлаб, қизнинг ном-нишони етмайдиган узоқ ўлкаларга кетишга жазм қилди. Йигит эчкиларни тўплаб, Эстремадура яйловлари билан Португалия қироллиги томон кетди. Бундан хабар топган Торральба йигит кетидан йўлга тушди. Қўлда ҳасса тутган, елкасига хуржун ортиб олган қиз яёв, яланг оёқ узоқ йўл босди. Унинг хуржунида бир парча ойна, яримта тарақ, кичкина шишада аллақандай суртадиган нарса бор эди. Дарвоқе, унинг нимаси борлигининг аҳамияти йўқ, барибир ҳозир текшириб кўриб бўлмайди. Шуни айтишим керакки, қиз чўпон йигитни қувиб бораркан, йигит ўз подаси билан Гвадиана дарёсига етиб келган эди. Бу пайтда дарё тошадиган палла бўлиб, йигит келган жойда на қайиқ ва на сол, на йигитни, на подасини олиб ўтиб қўядиган бир кимса бор эди. Йигит қаттиқ изтиробга тушди, чунки у Торральбанинг етиб келишини, алиний-ёлвориб, кўз ёши тўкиб унинг кўнглини юмшатишга уринишини биларди. У чор атрофга аланглай бошлади, ниҳоят, кичкина қайиқчада ўтирган балиқчини кўриб қолди. Қайиқча шу қадар кичик эдики, унга бир одаму бир эчки аранг сиғарди. Бироқ бошқа илож йўқ. У балиқчини чақирди, ўзини ва уч юз бош эчкисини нариги соҳилга ўтказиб қўйишни шартлашди. Балиқчи қайиқчасига бир эчкини солиб нариги қирғоққа ўтказди, қайтиб келиб иккинчи эчкини ўтказди, яна қайтиб учинчи эчкини олиб ўтди... Нариги қирғоққа неча эчкини олиб ўтганлигини яхшилаб санаб туринг, мабодо ҳисобда бирорта эчкидан адашиб қолсангиз борми, мен ҳикояни давом эттира олмайман, воқеа шу ерда тўхтайти-қолади, марҳаматли жанобим. Ҳа, шу нарса ёдингизда бўлсин, сеньор. Энди бу ёғини эшитинг. Нариги қирғоқ ботқоқ ва тойғоқ бўлгани сабабли ҳар бир эчкини эсон-омон ўтказиш учун анча-мунча вақт кетади. Балиқчи ҳар қалай бир эчкини, кейин яна бирини, сўнгра яна бирини олиб ўтди.

— У ҳаммасини олиб ўтди деб қўяқолсанг-чи бир йўла, — унинг гапини бўлди дон Кихот. — Бўзчининг моксицидек қирғоқ-

дан-қирғоққа югураверасанми, бунақада йил ўн икки ой ҳам етмайди-ку?!

— Балиқчи қанчасини олиб ўтиб қўйди? — деб сўради Санчо.

— Ким билади дейсан! — жавоб қилди дон Кихот.

— Ахир қанча олиб ўтаётганини астойдил ҳисоблаб боринг, деб илтимос қилувдим-ку, барибир ҳисобдан адашибсиз-да. Энди давомини айта олмайман.

— Бу қанақа бемаънилик! — эътироз билдирди дон Кихот. — Наҳотки сенинг афсонанг учун қанча эчки олиб ўтилганининг аниқ ҳисоби зарур бўлса, ҳисобдан янглишиб кетилса ҳикоянгни давом эттира олмасанг?

— Йўқ, сенъор, асло давом эттира олмайман, — жавоб қилди Санчо, — чунки мен ўзларидан ҳисобини олиб бориб турсинлар деб илтимос этганимда ва ўзлари нечта эчки олиб ўтилганлигини айта олмаганларидаёқ сизга айтиб бермоқчи бўлган воқеанинг охири хаёлимдан чиқди-кетди, худо ҳақи, давоми жуда қизиқ эди.

— Демак, афсонанг тамом бўпти-да? — деб сўради дон Кихот.

— Ҳа, худди марҳум бувимдек тамом бўлди, — жавоб қилди Санчо.

— Ростини айтсам, — давом этди дон Кихот, — сен менга шу кунга қадар одамлар тўқиган эртақ, қисса ёки ҳикояларнинг энг фаройибларидан бирини сўзлаб бердинг. Ҳеч ким умрида бу тариқа бошланиб, шартта узиб қўйиладиган афсонани эшитган эмас, эшита олмайди ҳам. Дарвоқе, сендек ақли расодан бундан бошқа нарсани кутиб ҳам бўлмайди. Афтидан анави бетиним зарблар эс-хушингни айнитиб қўйганга ўхшайди.

— Бўлиши мумкин, — жавоб қилди Санчо. — Лекин қиссам тугагани аниқ, нега десангиз, кимки олиб ўтилган эчкилар ҳисобидан адашдимиз — эртақнинг ҳам кети узилади.

— Узилса узилавермайдими, жуда соз бўпти-да, — деди дон Кихот, — қани, энди бир кўрайлик-чи, Росинанг ўрнидан қўзғолармикан.

У яна отнинг биқинига ниқтай бошлади, лекин от жойидан қўзғалмай тепинарди — оёқлари чалкашиб қолган эди. Дон Кихот ноилож сабр-тоқат қилишга, яроқбардорининг ёлғон-яшиқ гапларини эшитиб вақт ўтказишга мажбур бўлди. Яхшики, тонг отишга сал қолган эди.

Тонг энди ёриша бошлаган эдики, Санчо секингина Росинантнинг оёқларини бўшатиб юборди. Бойлиқдан бўшаган Росинанг гўё хурсанд бўлгандай бошини силкий бошлади. Росинантнинг ҳаракатини кўрган дон Кихот, содиқ отим мени мислсиз қахрамонлик кўрсатишга чақиряпти, бу хайрли ишнинг бошланишидан нишона, деб ўйлади. Сирли шовқин ҳамон тинмас, дон Кихот бўлса бунинг нималигини шу дамгача англаб етмас, эди. Шу сабабдан рицаримиз вақтни беҳуда ўтказмай иккинчи бор Санчо билан хайрлашди, олдин уқтирганидек кўпи билан уч кун кутишни, мабодо уч кундан сўнг қайтмаса, тақдири илоҳий бу даҳшатли олишувда ўз омонатини олибди, деб билишини таъкидлади.

Шундан сўнг Санчога ўз номидан сеньора Дульсинеяга етказиши зарур бўлган гапларни қайтарди. Охирида дон Кихот ўз содиқ яроқбардорига меҳнатлари эвазига берилажак мукофотлар хусусида ташвишланмаслиги кераклигини айтди.

— Башарти мен ҳалок бўлиб кетганимда ҳам,— деб сўзини тугатди рицарь,— сен барибир тақдирланасан, чунки мен уйда васиятнома қолдирганман, шунга биноан, менга қилган хизматингга яраша ҳақ оласан; агар яратган тангри мени хавф-хатардан соғ-саломат сақласа, Санчо, сенга ваъда қилинган орол қўлимда деявер.

Оқ кўнгил хўжайинининг аламли сўзларини эшитган Санчо яна куйиниб йиғлади-да, ҳар қандай даҳшатли соатларда ҳам унга ҳамдам бўлишга тайёр эканлигини, бироқ дон Кихот ўзини бундай хатарларга урмагани яна ҳам маъқулроқ эканлигини айтди.

Дон Кихот ўз яроқбардорининг садоқатидан кўнгли эриб кетди-ю, лекин унинг илтижоларига қулоқ солмай, Росинантнинг биқинига ниқтаб, зарб товуши, оқим сурони келаётган томонга қараб от солди. Санчо бўлса яхши кунида ҳам, ёмон кунида ҳам ҳамроҳи ва ҳамдами бўлган содиқ эшагининг юганидан ушлаганча хўжайини изидан йўлга тушди. Улар каштанзордан ўтиб, чўққиларидан баҳайбат шаршара шовиллаб тушаётган баланд қоялар этагидаги ўтлоққа чиқиб қолишди. Бу қоялар тагида қандайдир ғарибона кулбалар бор эди. Йўловчиларимизга уларни қўрқувга солган зарб-товушлар худди шу кулбалардан чиқаётгани аён бўлди. Шаршара шовқинидан Росинант хурқди, лекин дон Кихот ўз тулпорини тинчлантириб, кулбалар томон дадил боришга жазм қилди. Ўз маъшуқасига дилдан муурожаат этиб, бу хатарли олишувда қўллаб-қувватлашини илтижо қилди. Санчо ўз хўжайинидан бир одим ҳам ортда қолмай борарди. У Росинант панасида туриб, кўнглига ваҳима солаётган нарсани ўз кўзи билан кўриш иштиёқида бўй чўзавериб, бўйин томири узилишига сал қолди. Улар аста-секин дўнг қояни айланиб ўтган ҳам эдиларки, кўз ўнглирида уларни тун бўйи қўрқув ва ташвишга солган машъум шовқин-суроннинг манбаи намоён бўлди-қўйди: уларнинг рўпарасида (яна аччиғланиб, хафа бўлма, китобхон!) мовут босадиган дастгоҳнинг олти тўқмоғи бир меъёрда навбатма-навбат зарб билан тушиб гумбурларди.

Жумбоқнинг бундай ечилишини кўрган дон Кихот тошдек қотди-қолди. Унга разм солган Санчо ўз хўжайинининг хижолатдан бошини қуйи солиб турганини кўрди. Дон Кихот бўлса ўз навбатида яроқбардорига кўз қирини ташларкан, Санчонинг ёноқлари шишиб, гуё ҳозир кулгидан ёрилиб кетгудек бўлиб турганини сизди. Ҳафсаласи пир бўлган дон Кихот ўзини тутиб туролмай, кулиб юборди. Дарҳол хўжайинидан андоза олган Санчо ҳам кулоқни қоматга келтиргудек баланд овоз билан қаҳқаҳлаб юборди. У тўрт бор ўзини аранг тўхтатди-ю, лекин яна кулаверди. Ниҳоят, дон Кихотнинг жаҳли чиқа

бошлади, бироқ шу заҳоти Санчо бирдан хўжайинининг гашига тегиб, тантанавор оҳангда очиқ-ойдин сўзлай кетди:

— Дўстим Санчо, шуни билиб қўйгинки, самонинг мени шу темир асрда бунёдга келтиришдан муроди, мен ҳалиги олтин билан сайқалланган ёки олтин асрни қайта тиклашим керак. Мен пешонасига хавф-хатарлар, улуғвор ишлар ва мислсиз қаҳрамонликлар ёзилган зотлардан бўламан...

Санчо даҳшатли зарбларни биринчи бор эшитган вақтда дон Кихот нималар деган бўлса ҳаммасини сўзма-сўз қайтарди. Санчонинг мазах қилаётганини кўрган дон Кихотнинг газаби қайнаб, бечоранинг елкасига найза билан икки марта туширди; агар найза Санчонинг елкасига эмас, бошига тушганда борми, дон Кихот унга хизмат ҳақи бериш ташвишидан қутуларди. Хўжайини билан ҳазиллашиш хавфли эканини кўрган Санчо яна найза тушиб қолишидан қўрқиб, дарҳол сафсатабозликни тўхтатди-да, мўминтойлик билан шундай деди:

— Тинчланинг, муҳтарам жанобим, худо ҳақи, мен ҳазиллашдим, холос.

— Лекин, мен ҳазиллашмоқчи эмасман! — деди дон Кихот. — Жаноб ҳазилкаш, наҳотки шу босма тўқмоқлар ўрнига бошқа бирон хавфли воқеага дуч келиб қолса, менинг ҳасрат кўрсатиб ишни бир ёқлик қилишимга ишонмасангиз? Наҳотки мен, яъни рицарь, аллақандай тақир-туқурни фарқ этишим, унинг қайсиси босма тўқмоғу қайсиси бошқа нарса эканлигини билишга мажбур бўлсам? Ахир, ростини айтганда, сиз жирканч эркаквачча мана шунақа барча тегирмону босма тўқмоқлар орасида туғилиб ўсангиз; мен эса умримда кўрмаган бўлсам буларни. Ўз хўжайинингиз устидан кулишдан кўра, яхшиси, шу олти босма тўқмоқни олтига баҳайбат девга айлантинг, улар менга ҳамла қилишсин. Башарти қиличимнинг бир зарбасидан тилка-пора бўлишмаса, ана шунда оғзингиз қулогингизга етганча кулинг мендан.

— Бўлди энди, сеньорим, — деди Санчо, — дарҳақиқат ҳазилни ҳаддидан ошириб юборганлигимдан пушаймонман. Келинг энди, яхшиси, ярашиб қўя қолайлик. Худоё худовандо бўлажак қўргиликлардан бугунгидек эсон-омон, бешикаст чиқинг. Ҳар ҳолда иқдор бўлганингиз маъқул, марҳаматли жанобим: ахир шунчаки оддий бир мовут босадиган дастгоҳнинг овозидан ўтакамиз нақ ёрилаёзгани — дарвоқе, жаноблари кўрқувни билмайдилар — бинобарин, менинг қутим учини кулгили эмасми? Ахир бу ҳақда қишлоғимизда гапириб қолинса борми, эшитган одамнинг кулгидан ичаги узилади-я.

— Биз бошимиздан кечирган воқеа мутлақо кулгили эмас деб айтолмайман, — деди дон Кихот, — лекин бу ҳақда бировларга гапиришнинг кераги йўқ. Бундай воқеаларни яхши тушуниб олиш учун ҳамма одамларда ҳам фаҳм-фаросат етишавермайди.

— Ҳар ҳолда, — деди Санчо, — ўзлари найзани яхши ишга соларканлар: калламни мўлжалга олиб ҳамла қилдингиз, худонинг марҳамати билан каминанинг эпчиллик қилиб чап бер-

ганлиги туфайлигина елкамга тушди. Ҳа, майли: суйганингиздан урасизда, урганингиз ун оши, сўканингиз сўк оши қабилида мақол бор дарвоқе. Мўътабар сеньорлар хизматкорларини сўкиб таъзирини берганларида шу заҳоти янги иштон инъом этганлар; лекин жаҳонгашта рицарлар ўз хизматкорларини яхшилаб калтаклагандан кейин уларга нима инъом этишларини билмайман, мабодо, калтаклардан кейин улар хизматкорларига бирор орол ёки қироллик ҳадя қилмасмиканлар?

— Ҳа, тақдир ёр бўлиб сенинг ҳамма сўзларинг чиндан рўёбга чиқиб қолиши ҳам ҳеч гап эмас,— деди дон Кихот.— Урганим учун кечир. Ахир сен кичкина бола эмассан, жаҳл келганда ақл қочади, деганларидек, сабр-тоқати тугагандан кейин киши нима қилаётганини ўзи ҳам билмай қолади. Бундан буён бу сенга сабоқ бўлади: менга ортиқча гап-сўз айтишдан тилингни тий, чунки мен сон-саноқсиз рицарлик китобларини ўқиб чиққанман, лекин уларнинг бирортасида яроқбардорнинг ўз хўжайини билан сенчалик кўп гаплашганини учратганим йўқ. Тўғриси айтганда, бунга иккаламиз ҳам айбдормиз: сенинг айбинг ҳурмат-эътиборимни унчалик ўрнига қўймаганинда, менинг айбим эса сендан бунга талаб этмаганимда. Масалан: Амадис Галльскийнинг яроқбардори Гандалин Қуруқлик оролининг графи бўлса-да, тарихда айтилганига ишонилса, ўз хўжайини билан туркларнинг одатига кўра шапкасини қўлга олиб, икки букилиб таъзим этган ҳолда гаплашаркан. Мен Амадисдек қаттиққўл эмасман, аммо лекин, Санчо, сен хўжайин билан хизматкор, сеньор билан қарол, рицарь билан яроқбардор ўртасидаги фарқни унутмаслигинг керак. Худди мана шу важдан бугундан бошлаб ўзаро муомаламиздаги бетакаллуфлик ва майнавозчиликни бир чеккага йиғиштириб қўямиз: агар сен мени бирор сабаб билан ранжитсанг, бундан фақат ўзинггина масалдаги сопол тувакчадек жабрини кўрасан. Ваъда қилинган марҳамат кўрсатиш ва мукофотлаш фурсати эса ўз вақт-соати билан келади, мабодо бўлмай қолса, барибир маошинг йўқолмайди, бу ҳақда мен сенга бир неча бор айтганман.

— Бу гапларингизнинг бари бамаъни, ажойиб, муҳтарам жаноб,— деди Санчо.— Мен бир нарсани билишни истардим. Мукофот бериладиган кун умуман келмай қолиши ҳам мумкин: у ҳолда мен фақат маошгагина қаноат қилишим керак бўлиб қолади. Қани менга айтинг-чи, улуг зотн, қадим вақтларда жаҳонгашта рицарларнинг яроқбардорлари қанча маош олганлар ва қай тартибда ёлланганлар — ойигами ёки кунигами?

— Менимча,— жавоб қилди дон Кихот,— у замонларда яроқбардорлар ҳеч вақт маош олмаганлар, фақат ҳадя-инъомлар билан кифояланганлар. Модомики, мен уйда қолдирган васиятномамда сенинг маошинг ҳақида эслатган эканман, бунга сабаб: бизнинг бу мушкул замонда рицарнинг ҳоли нима кечинини азбаройи билмаганимдан айтганман. Зотан, мен қандайдир арзимаган бир нарсани деб у дунёда азоб чекишни иста-



майман. Бинобарин, Санчо, сен бу дунёда жаҳонгашталикдан ҳам оғирроқ бирор иш йўқлигини билиб қўйишинг зарур.

— Орий рост! — жавоб қилди Санчо. — Сиздек улуғ зот, довюрак жаҳонгашта бир рицарь юрагига босма тўқмоқларнинг гупуллаши ваҳима солишининг ўзи бунинг исботи. Бироқ, сиз шунга ишонингки, бундан-буён жаноблари билан асло ҳазиллашмайман, сизни ҳамма вақт ўз хўжайиним, сеньорим деб иззат-икром билан улуғлайман.

— Ана шунда барака топасан, — жавоб берди дон Кихот, — чунки ота ва онадан кейин ўз хўжайинини кўпроқ ҳурмат қилиш даркор.

## XVI БОБ

### БУЮК САРГУЗАШТ ВА МАМБРИННИНГ БЕБАҲО ДУБУЛҒАСИНИ ҚЎЛГА КИРИТИШ ҲАМДА РИЦАРЬ БИЛАН УНИНГ ЯРОҚБАРДОРИ УРТАСИДАГИ СУҲБАТ

Шу вақт севалаб ёмғир ёға бошлади. Санчо ёмғирдан қочиб мовут босадиган хонага киришга бажонидил тайёр эди, лекин дон Кихот яроқбардорининг кинояли гапларидан кейин уни шу қадар ёмон кўриб қолгандики, у ерга киришни асло истамади. Шу боисдан улар ўнгга бурилиб, кўп ўтмай бу ерга кечагина келган йўлларига чиқиб олишди. Улар ҳали ярим чақиримча юрганлари ҳам йўқ эдики, дон Кихот олисда келаётган чавандозни кўриб қолди. У бошига худди олтиндек ярақлаётган ғалати қалпоқ кийиб олган эди.

— Менимча, Санчо, — деди дон Кихот, — ҳар қандай мақол тагида ҳақиқат бор, чунки бу ҳикматларнинг ҳаммаси илму фан онаси — турмуш тажрибасидан олинган. Қўлдан бўлмаса йўлдан деган мақол бағоят ҳақ гап экан. Бунақа дейишимнинг маъноси шуки, тақдир кеча биз излаган саргузашт эшигини бекитиб, ҳатто мовут босадиган ишхонадан кўрқишга мажбур этганди: бугун бўлса кўрибсанки, тақдир саҳоват кўрсатиб бошқа бир саргузашт эшигини ланг очиб турибди. Бироқ бу, афтидан, жиддий ишга ўхшайди! Қара, агар янглишмасам, мен қидириб топаман деб онт ичган, Мамбриннинг дубулғасини кийиб олган чавандоз ўз оёғи билан биз томон келяпти.

— Худо ҳақи эҳтиёт бўлсинлар, муҳтарам жанобим, — жавоб қилди Санчо, — мовут босадиган ишхонадаги кўргиликдан бўлмасин тагин сеньор.

— Ҳе, жин урсин сени, — деди жаҳл билан дон Кихот, — дубулғага мовут босадиган ишхонанинг нима дахли бор экан?

— Нима ҳам дердим, — жавоб қилди Санчо, — аммо рост гап, муҳтарам жаноб, мабодо менинг илгаригидек ўзлари билан бемалол гаплаша олишимга ижозат берсалар, каминангиз сиздек ҳурмати олийларининг адашаётганликларини исботловчи далиллар келтира олган бўларди.

— Эй қўрқоқ ва хоин, хўш, мен нимада янглишибман?! —

хитоб қилди дон Кихот.— Қани айт-чи, бошига олтин дубулға кийган чавандознинг ола тўриқ йўрға отда келаётганини кўрмайсанми?

— Кўряпман,— жавоб қилди Санчо,— қандайдир одамнинг эшак миниб келаётганини кўриб турибман. Эшагининг туси менинг эшагимдақа тўриқ, бошига кийган нарсаси эса ҳақиқатан ҳам ярқироқ.

— Ҳа, ўша Мамбрин дубулғасининг худди ўзгинаси-да,— деди дон Кихот.— Ўзингни четга ол, мени у билан юзма-юз қўй: ана шунда менинг қилич билан бу нотаниш рицардан кўпдан орзу қилганим дубулғани қандай тортиб олишимни томоша қиласан.

— Чеккага чиқиб туришим қийин эмас,— жавоб қилди Санчо,— бироқ, муҳтарам жаноб, эҳтиёт бўлишингизни ўтиниб сўрайман. Босма тўқмоқ, яъни дастгоҳларга дуч келгандек яна бирор кўнгилсиз воқеага учраб қолманг деяпман.

— У дастгоҳларни эсга солманг деб мен сизга юз бор айтдим, биродар,— сўзини бўлди дон Кихот,— йўқса, етмиш икки томирингиздаги жонингизни суғуриб олмасам одам эмасман.

Санчо хўжайинини оғзидан кўпикдек сочилиб чиқаётган сўзларига чиндан ҳам амал қилиб, саваб қолмасин деган хавфда тилини тийди.

Аммо бошига ярқироқ дубулға кийиб олган сирли чавандознинг ким эканлигини китобхонга маълум қилиш лозим. Бизнинг рицарь ўз яроқбардори билан бораётган катта йўл яқинида икки қишлоқ бор эди. Буларнинг бири кичкинагина қишлоқча бўлиб, унда на дорихона, на сартарошхона бор эди. Шу сабабли каттароқ қишлоқдаги сартарош ҳар икки қишлоқ аҳлига хизмат қиларди. Айни шу вақт кичик қишлоқдаги бир киши қон олдириши, бошқаси соч-соқолини қирдириши зарур бўлиб қолибди. Улар сартарошни чақиртиришибди, сартарош мис жомини олиб йўлга тушибди. Кўргиликни қарангки, сартарош йўлда ёмғирда қолибди. У янги шляпасини ёмғирдан сақлаш учун ярқира-тиб тозаланган жомни бошига тўнтариб кийиб олибди. У Санчо айтгандек тўриқ эшак миниб келарди, дон Кихотнинг кўзига эса дарҳол рицару олтин дубулға, ола саман от бўлиб кўринди. Зотан, кўзига нимаки кўринса, у ҳаммасини ўзи истаганча тасаввур этиб, бемаъни, аҳмоқона хаёлларга берилиб кетарди.

Сартарош рицаримизга яқинлашган ҳам эдики, Росинантини баҳоли қудрат чоптириб найза ўқталганича унга қарши от солди. Сартарош ёнига етиб келган дон Кихот қичқирди:

— Ўзингни ҳимоя қил, эй нотавон, ёки менга чиндан ҳам тегишли бўлган нарсаларни жанг-жадалсиз топшириб қутулиб қол!

Хаёлига ҳам келтирмаган қандайдир бир шарпаннинг беҳосдан қилган ҳамласидан нақ ўтакаси ёрилган сартарош гурс этиб эшакдан ағанади-ю, бошидаги жом тушиб юмалаб кетди. Сартарош елкаси ерга тегар-тегмас бамисоли кийикдек сакраб туриб, чунон қочдики, ҳатто унга шамол ҳам ета олмасди. Йўлда ётган

жомни кўрган дон Кихот бечора сартарошни таъқиб этишни хоҳламади.

— Ғалабининг осонлик билан қўлга киришини кўрдимми, Санчо,— деди дон Кихот,— менинг мажусий рақибим тишлаб олган овини овчига ташлаб қочган қундузга ўхшаб оқилона иш тутди.

Дон Кихот Санчога дубулгани олиб келишни буюрди, Санчо уни қўлга олар экан:

— Худо ҳақи, бу жом чакки эмас! Камида саккиз реал туради,— деди.

Сўнгра Санчо жомни хўжайинига узатди, у бўлса дарҳол бошига кийиб, сипарини излаб, уни айлантира бошлади. Сипарини топа олмагач, ниҳоят, шундай деди:

— Атайин ясалган бу дубулгадан кўриниб турибдики, бу мажусийнинг калласи жуда катта экан. Лекин дубулганинг сипари ва орқа печи йўқлиги бағоят ачинарлидир.

Дон Кихотнинг сартарош жомини дубулга деганини эшитган Санчо қаҳқаҳлаб кулиб юборишдан ўзини аранг тўхтатиб қолди, чунки хўжайинининг жаҳли чиққудай бўлса, нималар рўй бериши мумкинлигини ўз вақтида эслаб қолди.

— Нега куляпсан, Санчо? — сўради дон Кихот.

— Мен бу дубулганинг эгаси бўлмиш ўша мажусийнинг калласи қандай катталигидан куляпман,— деди Санчо.— Ахир бу дубулга худди сартарош жомининг ўзгинаси-ку.

— Менинг фикримга нима келганини биласанми, Санчо? Афтидан, бу машҳур сеҳрли дубулга унинг бутун қадру қимматини билмайдиган одамнинг қўлига тушиб қолганга ўхшайди. У дубулганинг соф олтиндан ясалганини кўриб, унинг сипари ва орқа печини ажратиб ташлаб, қуббали асосидан сен айтаётган сартарош жомини ясаб олган. Ҳа, майли. Мен бу дубулганинг қанақалигини яхши биламан-ку, уни нимага айлантиришганининг мен учун аҳамияти йўқ. Темирчилиги бор биринчи қишлоққа кирганимиздаёқ дубулгани бошқатдан ясаб оламиз, ана шунда бу дубулга олдида темирчилик худосининг уруш худосига ясаб берган дубулгаси ҳеч гап бўлмай қолади. Ҳозирча, йўғидан кўра бори деганларидек, шу тахлитда кийиб юравераман. Ахир тошбўрондан сақланиш турган гап-ку.

— Ҳа, албатта, мабодо икки қўшин тўқнашувида душманлар палаҳмонлардан тош отиб, сиздек муҳтарам зотнинг тишларини дабдала қилиб ва менинг ичак-чавоғимни ағдараётган анови лаънати малҳам солинган тунука идишчани синдиргандек воқеалар юз бермаса бўлгани! — жавоб қилди Санчо.

— Ҳечқиси йўқ, Санчо. Малҳамни қайтадан тайёрлаш мумкин,— жавоб қилди дон Кихот.— Унинг қандай тайёрланишини ёддан билишим сенга маълум-ку.

— Ҳа, менинг ҳам эсимда,— деди сергап яроқбардор.— Аммо қачон бўлмасин умрида уни тайёлайдиган ёки тотиб кўрадиган бўлсам, илоҳим жойимда тил тортмай қолай. Дарвоқе, бу дори-дармоннинг бундан кейин менга зарурати ҳам йўқ, чунки

бировни шикастлашдан ёки ўзим жароҳатланишдан эҳтиёт бўламан. Ҳеч вақт биров билан муштлашишни мен ўзим бошламайман, кимки мен билан муштлашадиган бўлса орқа-олдимга қарамай қочаман. Тўғри, балки бахтсизлик рўй бериб, яна мени чойшабда иргитишар, начора, бундан қочиб қутулиб бўлмайди. Бундай пайтда гужанак бўлиб олиб, нафасни ичимга ютганча, кўзни чирт юмиб тақдир ва чойшабга тан бериб ётаверишдан бошқа илож йўқ.

— Сен ёмон христиансан, Санчо, — жавоб қилди бу гапга дон Кихот. — Чунки сеҳрли қалъада ёки сен айтгандек қовоқхонада тортган азобингни унутолмайсан. Шуни билиб кўйгинки, олижаноб ва саховотли кўнгил бунга ўхшаш майда-чуйдаларга парво қилмайди. Наҳотки, ўшандан кейин чўлоқланиб қолган бўлсанг? Ёки қовургангни синдиришдими, каллангни ёришдими? Нега сен у ҳазилни эсингдан чиқара олмайсан? Ахир, у фақат ҳазилгина эди-ку. Агар мен шундай деб ўйламаганимда эди, сен учун интиқом олгани у ерга албатта қайтиб борган бўлардим. Мен уларнинг бошига шундай даҳшату мусибатлар солардимки, бунақасини юнонлар ҳам Елена<sup>32</sup> ўғирланганида қила олмаган эдилар. Дарвоқе, шуни айтишим керакки, — қўшимча қилди рицаримиз кўзларини осмонга тикиб, оғир хўрсинаркан, — башарти Елена бизнинг давримизда ёки тенги йўқ Дульсинея Тобосская Троя замонида яшаган бўлса эди, машҳур юнон аёли гўзалликда осонликча машҳур бўла олмас эди.

Дон Кихотнинг бу сўзларига жавобан Санчо шундай деди:

— Ҳа, майли! Модомики, биз ротакамига қасд ололмас эканмиз, бу ҳазил бўла қолсин. Лекин мен бунинг қанақанги ҳазил бўлганини яхши биламан, — яна имоним комилки, у менинг ёдимдан ҳеч чиқмайди, елкаларим ҳам асло унутолмайди. Келинг, бу гапни бас қилайлик. Яхшиси, мухтарам жаноб, сиз худди қуйиб кўйгандай менинг эшагимнинг ўзгинаси бўлган манави ола саман отни нима қилиш кераклигини айтсангиз. Ахир эгаси уни ўз ҳолига ташлаб кетди. Соқолим билан онт ичаманки, ёмон эшакка ўхшамайди! У кунимизга яраб қолиши мумкин, бирга олиб кетмайликми?

— Енгилганларни талон-торож қилиш менинг одоб қоидамга кирмайди, — жавоб қилди дон Кихот. — Рицарлик одати душман отини тортиб олиб, ўзини пиёда ҳайдашни ман қилади. Башарти жангда ғолиб чиққан киши ўз отидан ажралиб қолган тақдирдагина у отни қонуний ҳарбий ўлжа сифатида олиши мумкин, холос. Шунинг учун Санчо, бу отни ёки эшакни (сен агар унинг эшак бўлишини жуда истасанг) ўз ҳолига қўй, ишонаманки, биз кетгач, эгаси яна қайтиб келиб, уни олиб кетади.

— Худо билади, — деди Санчо, — уни жуда олиб кетгим келяпти ёки ҳеч бўлмаганда ўзимникига алиштириб олсам, ахир ундан меники ёмонроқ-ку. Бир эшакни иккинчисига айирбошлашни ҳам тақиқлайдиган рицарлик қонун-қоидалари жуда бемаъни экан-да. Қани, айтсинлар-чи, ҳеч бўлмаганда эгар-жабдуқларни алмаштириб олсам бўлармикан?

— Бу хусусда мен қатъий бирор нарса деёлмайман, — жавоб қилди дон Кихот. — Бу шубҳалироқ нарса — суриштириб аниқлаб олиш зарур. Дарвоқе, кел, мен сенга рухсат этдим, модомики, эшагинг учун эгар-жабдуқ шу қадар зарур экан, алиштириб олақол.

Хўжайиндан рухсат олгандан сўнг, Санчо дарҳол эгар-жабдуқларни алмаштириб, эшагини шу қадар ясатдики, кўрқда унга тенг келадиган эшак топилмас эди.

Сўнгра саргузашт изловчиларимиз бир дарахтзорда тўхташиб, дафн маросими билан бораётган аравалардан Санчо олиб олган нарсалар билан нонушта қилишди; яқиндаги анҳордан қониб сув ичишди. Улар бир оз хордиқ чиқаргач, яна йўлга тушдилар. Росинантни ўз майлига қўйиб бердилар, эшак ҳам бир қадам орқада қолмай, унинг кетидан эргашиб борарди. Ниҳоят, улар катта йўлга чиқишди, бу йўлнинг қаёққа олиб боришини билишмаса-да, таваккалига кетавердилар. Шу вақт Санчо хўжайинига мурожаат қилди.

— Марҳаматли жаноб, ўзлари билан бир оз гаплашишга ихтиёр билдирмасмиканлар? Мени сукут сиртмоғига солиб қўйганингиздан бери йўқ деганда тўрт дона савол қорнимда биқиб кетди, бешинчиси бўлса тилим учида турибди, бунинг ҳам беҳуда кетишини истамас эдим.

— Майли, гапира қол, — деди дон Кихот, — фақат қисқароқ қил, кўп гап қулоққа ёқмас.

— Айтмоқчи бўлган нарсам фақат шуки, сеньор, — гап бошлади Санчо, — мана бир неча кундирки, бу саргузаштларимиздан нақадар арзимаган наф кўрганимизни ўйлайвериб бошим қотди. Ҳазратлари йўл чорраҳаларида ва чўлу биёбонларда турли саргузаштлар ихтиёр этадилар. Бироқ бундай ерларда сизнинг ҳамма зафарларингиз ва хатарли жасоратларингизни барибир ҳеч ким кўрмайди ва қайд этмайди. Менинг фикримча, гарчанд муҳтарам жаноблари ҳам ўзгача мушоҳидага бормаслар, агар иккаламиз бирор император ёки улуг ҳукмдор хизматига ўтсак анча маъқул иш қилган бўлардик. Шунда муҳтарам жанобларнинг буюк жасоратлари ва янада юксакроқ ақл заковатларини намойиш қилиш имкони туғилармиди. Подшо эса ҳар иккимизни хизматимизга яраша тақдирлай биларди. Бундан ташқари, унинг саройида инсофли тарихчи топилгусидиким, у муҳтарам жанобларининг кўрсатган жасоратларини бир умр абадийлаштириш учун хатга туширарди. Ўз ишларим хусусида мен сўз очмоқчи эмасман, чунки менинг кечмишларим мезони сизникидан бошқачароқ. Дарвоқе сизга айтиб қўяйки, агар яроқбардорларнинг жасоратларини қайд этиш одати бўлганида эди, каминанинг қаҳрамонликлари ҳам чакана китоб бўлмасди.

— Фикрларинг ёмон эмас, Санчо, — жавоб қилди дон Кихот. — Бироқ бундай фахрли хизматга киришдан олдин рицарь имтиҳон тариқасида жаҳонни кезиб, турли-туман саргузаштларни бошдан кечирмоғи даркор. У аввало жаҳонга донг тара тиши керак — номи тилларда дoston бўлишига эришмоғи лозим.

Ана шунда у бирор атоқли ҳукмдор саройига яқинлашган заҳотиёқ уни кўрган болалар унинг келганлиги ҳақида жар соладилар: уни кўргани оломон йиғилади, тантанавор, ҳаяжонли сурон кўтарилади: ана Қуёш рицари, ёки қудратли ва даҳшатли дев Брокабрунни мағлуб этган Аждар рицарь! Мана у — сеҳрлар занжирини чилпарчин қилиб, тўққиз юз йил асоратда ётган Эроннинг Буюк мамлугини халос этган киши! Ана ўшанда оломоннинг шовқин-суронини эшитган қирол ўз шоҳона қасрининг деразасидан қараб, бизнинг рицарни кўргач, дарҳол унинг яроқ-аслаҳаларидан ёки қалқонга битилган ёзувдан кимлигини билиб олади-да, шундай дейди: «Эй менинг рицарларим, шавкатли қаҳрамонни, бугун рицарликнинг гултожи ва кўркини қарши олишга пешвоз чиқинг!» Унинг амри фармонига кўра ҳаммалари ташқарига чиқадилар, қиролнинг ўзи бўлса зинанинг ярмигача келиб меҳмонни бағрига босади ва сеньора қироличага таништириш учун уни ичкарига бошлайди, бизнинг рицар қиролича ёнида турган қирол қизини — дунёдаги шу кунгача маълум ва машҳур барча мамлакатлардаги маликалар ичида энг гўзал ва энг ифбат-иболи маликани кўради. Қиз рицарга, рицарь эса қизга кўз ташлайди ва улар юрагида бирдан кучли ишқ-муҳаббат туғён уради. Улар катта хавф-хатарни олдиндан сезгандек бўладилар ва бир-бирларига бўлган эҳтирос ва изтиробларини қандай баён этишни билмайдилар. Кейин рицарни саройдаги ясоғлиқ оромгоҳга олиб кирадилар, бу ерда унинг яроқ-аслаҳаларини ечишиб, эғнига қимматбаҳо қирмизи мантия ташлайдилар. Агар у ўзининг илгариги кийимида бинойидек бўлса, бундай тўлатўйис либосда янада очилиб кетади. Оқшом тушгач, рицарь кечки овқатни қирол, қиролича ва малика билан биргаликда баҳам кўради. Ўзгалар сезмаган ҳолда рицарь билан малика бир-бирларидан кўз узолмай қоладилар ва кўз қарашларида сўз билан ифода этиш мумкин бўлмаган маъноларни билдирадилар. Таомдан сўнг ҳамма ўрнидан турганда, тўсатдан залга бадбашара пакар, унинг орқасидан эса икки дев кузатувида гўзал аёл кириб келади. Аёл қадимги донолар ўйлаб чиқарган синов-шартни ўртага ташлайди; кимки шу шартни ўринлатса, у дунёда энг олий рицарь бўлади.

Қирол ўз рицарларига бахтларини синаб кўришни буюради, лекин уларнинг ҳаммаси мағлубиятга учрайди. Фақат маликанинг буюк бахти қувончига бизнинг рицаргина бу синовда муваффақият қозонади ва малика мана шундай қаҳрамонга ўз муҳаббатини бағишлаганидан беҳад хурсанд бўлади. Тақдир тақозоси билан худди мана шу пайтда қирол ўзи каби қудратли бошқа бир шоҳга даҳшатли уруш эълон қилади. Шунга кўра бизнинг рицарь бир неча кундан сўнг ўз қуроли кучини кўрсатиш учун унга мурожаат этади. Қирол бажонидил унга рухсат этади ва рицарь бундай марҳамат учун тавозе билан қирол қўлини ўпади. Шу тундаёқ рицарь ўз маҳбубаси малика билан унинг ётоқхонаси деразалари қараган боғ панжарасидан хайрлашади. Бу панжара орқали улар илгари ҳам ишончли канизак ку-

затувида бир неча бор суҳбатлашган эдилар. Рицарь хўси-нади, малика эса ҳушдан кетади, талвасага тушган канизак гирдикапалак бўлиб уни ҳушига келтиришга уринади. У тонг отиб, бирор кимсанинг бу ҳолни кўриб қолишидан хавфсиради. Ниҳоят, малика ўзига келади-да, панжарадан оппоқ қўлларини рицарга чўзади, у бўлса қўлларни ўпаркан, кўз ёшларини тўкади. Улар бир-бирларига қандай хабар етказиб туришини шартлашиб оладилар: малика рицардан тезроқ қайтишини ўгиниб сўрайди, у бўлса тезда қайтишга қасамёд этиб, яна малика қўлларини ўпа бошлайди ва ниҳоят у, гўё ҳаёт билан видолашаётгандек, малика билан чуқур ҳаяжонда хайрлашади.

Кейин рицарь ўз хонасига кетади, ўзини тўшакка отади, бирок ғам-аламдан бир дақиқа ҳам кўзларини юма олмайди. Тонг ёришмас ўрнидан туради-ю, қирол ва қиролича билан хайрлашиб, йўлга равона бўлади. Узоқ вақт жанг қилади у, жангу жадалда зафар қозонади, қиролнинг душманларини енгади, сон-саноксиз шаҳарларни тобе этади ва ниҳоят, саройга қайтади. Ана шунда у шартлашилган жойда ўз севгилиси билан учрашади ва хизматлари эвазига маликанинг қўлини сўраяжаги ҳақида келишиб олади. Қирол унинг насли-насабини билмаганлиги сабабли розилик бермайди, аммо шунга қарамай рицарь маликага уйланади. Пировардида қирол рицаримизнинг қудратли бир қиролнинг ўғли эканлигидан хабар топиб, бу никоҳни ўзи учун бир бахт деб билади. Кейин қирол вафот этади, тожтахт маликага қолади ва қарабсизки, рицарь қирол бўлиб олади. Ана шунда бундай юксак мартабага етишда рицарга ёрдам берган яроқбардорига ва бошқаларга ҳиммату марҳамат кўрсатиш фурсати етади. Рицарь яроқбардорини маликанинг канизагига, аниқроғи, уларнинг учрашувига воситачи бўлган гўзалга уйлантиради. Бу гўзал эса қудратли бир герцогнинг қизи бўлиб чиқади.

— Гапнинг лўндасини айтсам, менга худди шуниси керак-да! — хитоб қилди Санчо.— Сиз нимаики деган бўлсангиз худди шундай бўлишига аминман. Муҳтарам жанобларимнинг Ғамгим Қиёфа рицарь деб ном олишлари ҳам бежиз эмас-да.

— Бунга шубҳа қилмасанг ҳам бўлади, Санчо,— деди дон Ки-хот.— Чунки жаҳонгашта рицарлар худди мен сенга айтгандек қирол ёки император тахтига чиққанлар ва чиқадилар. Биз ҳозир қайси христиан ёки мажусий қиролнинг уруш қилаётганини ва унинг гўзал қизи бор-йўқлигини аниқлаб олсақ-кина бас. Лекин бу ҳақда фикр-маслаҳат этишга ҳали фурсат келади, чунки мен сенга айтгандек саройга боришдан олдин биз саргузаштларни бошдан кечириб шуҳрат қозониб олишимиз керак. Аммо бошқа мушкул томони ҳам бор. Айтайлик, мен ўз жасоратим билан бутун оламда ўлмас шуҳрат қозондим, қирғин уруш олиб бораётган қирол ҳам топилди-ю, унинг гўзал қизи ҳам бор. Хўш, мен қайси йўл билан ўзимни қирол зотига мансуб ёки ҳеч бўлмаганда императорга чатишган жойим бордек қилиб кўрсатишим мумкин? Ахир қирол менинг олий насл-наса-

бимга амин бўлмасдан туриб қизини бермайди-да. Қонли жанглар, мардонавор олишувлар эвазига оладиган бундай мукофотдан маҳрум бўлиб қолмасам, деган ташвишдаман. Рост, аслида мен қадимий дворянлар авлодиданман, ер ва мулким бор. Иззат-нафсимни ранжитсалар беш юз суэльдо<sup>33</sup> талаб этишим мумкин. Бинобарин, менинг қаҳрамонликларимни битгувчи донишманд шажарамизни мукамал тадқиқ этади ва менинг қадимги қироллар авлодидан эканлигимни аниқлайди. Акс ҳолда қирол хоҳишига қарамай иш тутишга тўғри келади. Малика мени шундай қаттиқ севиб қоладики, отасининг норозиликига қарамай мени ўзининг умр йўлдоши ва хўжайини деб атайди; шунда мен уни яширинча узоқларга олиб кетаман, ана унда эса фурсат ёки ажал туфайли ота-онанинг қаҳр-ғазаби ўтади-кетади. Мен қирол бўлганимда сени графлик мартабасига кўтараман.

— Ундай бўлса, — деди Санчо, — ўзимизни ҳақ йўлга бошлагувчи худои таолога топшириш ва тақдирга тан беришдан бошқа иложимиз йўқ.

— Модмики граф бўлиб қоларкансан, — давом этди дон Кихот, — демак, сен рицарсан: одамлар нима дейишса дейишаверсин, барибир улар сени сеньор деб улуғлашга мажбур бўладилар.

— Хўш, наҳотки сиз мени ўзини вонга муносиб тутолмайди деб ўйлайсиз? — сўради Санчо.

— Вон эмас, унвон демоқчи бўлсанг керак-а? — деди дон Кихот.

— Ҳа, шундай бўла қолсин, — деди Санчо Панса. — Мен ўзимни йўқотиб қўймасман дейман. Бир вақтлар мен каттагина бир майдонда қоровуллик қилган эдим, қоровуллик кўйлаги менга шу қадар ярашган эдики, ҳамма бу вазоҳатинг билан қози бўлиб олишинг ҳеч гап эмас дейишарди. Борди-ю, олтин ва марваридлар билан безатилган мантияни елкамга ташлаб олсам нималар бўлади-я! Имоним комилки, ўлканинг ҳар тарафидан одамлар мени кўргани югуриб-елиб келишади.

— Тўғри, вазоҳатинг жуда басавлат бўлади, — деди дон Кихот, — лекин соқолингни тез-тез олиб туришинг керак, чунки у қалин, тароқ ўтмайди, патак бўлиб кетган. Ақалли кунора устара билан қирғишлаб турмасанг ҳар ким бир чақирим наридан ҳам афтингдан танийди.

— Бу мушкул иш эмас, — деди Санчо, — чораси маош белгилаб, сартарош ёллаш-қўйиш. Зарурат туғилгудек бўлса, грандлар орқасидан отбоқарлар юргандек, кетимдан эргашиб юрадиган қилиб қўяман.

— Грандлар орқасидан отбоқарларнинг юришини қаёқдан биласан?

— Маълумингиз бўлсинким, муҳтарам жаноблари, — деди Санчо, — бир неча йил муқаддам мен пойтахтда бир ойча бўлгандим. У ерда мен бир сеньорни кўчада тез-тез кўриб турардим. Уни жуда бадавлат одам дейишса-да, жуда пакана



эди. У доим сайр қилар, кетидан эса бир отлиқ худди соядек эргашиб юргани-юрган эди. Мен нега бу одам пакана сенъор билан баравар юрмай, доим ортида боради, деб сўрадим. Менга, отлиқ унинг отбоқари, бинобарин грандлар одатига кўра уларни ҳаммавақт отбоқари кузатиб юриши керак, дейишди. Бу гап ёдимга қаттиқ ўтириб қолган экан, ўшандан бери сира эсимдан чиқмайди.

— Ҳа, гапинг рост, — деди дон Кихот, — сен сартарошни бир-га олиб юришинг мумкин. Шунин билгинки, удум-одатлар ҳаммаси бирданига ва тамомила қарор топмаган, шунга кўра сен сартарош кузатувида сайр этадиган биринчи граф бўлсанг ажабмас.

— Сартарош масаласини менга қўйиб бераверинг, мухтарам зот, — деди Санчо, — ўзлари қирол бўлиб, мени графликка кўтариш чорасини кўрсалар зўр иш бўларди.

— Ташвиш қилма, ҳаммаси бўлади, — деди дон Кихот бамайлихотир, бироқ рўпарага назар ташлар экан, рицаримиз шундай нарсаларни кўрдик, бу навбатдаги бобда ҳикоя қилинажак.

## XVII БОБ

### ЗУРЛАБ ОЛИБ КЕТИЛАЕТГАН КЎПГИНА БАХТСИЗЛАРГА ДОН КИХОТНИНГ ОЗОДЛИК БЕРГАНИ

Дон Кихот рўпарадан пиёда келаётган ўн икки кишини кўрди; уларнинг ҳаммаси тасбеҳга тизилган маржондай битта узун занжирга боғлаб қўйилган, қўллари кишанбанд эди. Уларни тўрт соқчи қўриқлаб борарди: соқчилардан иккитаси отлиқ бўлиб, қадимий пилта милтиқ билан, иккитаси пиёда бўлиб, найза ва қилич билан қуролланганди.

— Мана қирол каторга қилган турнақатор занжирбанд тутқунлар; уларни галер<sup>34</sup>га олиб кетишяпти, — деди Санчо.

— Нимага тутқунлар бўлсин? — деб сўради дон Кихот. — Қирол ҳам зўравонлик қилар эканми?

— Мен бундай деётганим йўқ, — деди Санчо, — бу одамлар ўз жиноятлари учун қиролнинг галерларига мажбурий хизматга ҳукм қилинганлар демоқчиман.

— Хуллас, — деб эътироз билдирди дон Кихот, — бу одамлар галерга ўз хоҳишлари билан эмас, зўравонликдан мажбур бўлиб келишмаяптимикин?

— Худди шундай, — деб жавоб берди Санчо.

— Ундай бўлса, — деб сўзида давом этди хўжайин, — бурчим мени зўравонликка қарши қўзғалишга ва бу бечораларга ёрдамлашишга ундайди.

— Мухтарам жаноб, — деб эътироз билдирди Санчо, — қирол билан суд зўравонлик қилишмайди, одамларни уларнинг гуноҳларига яраша жазолашди.

Шу орада бандилар етиб келишди ва дон Кихот бағоят мулоиймлиқ билан соқчиларга мурожаат қилиб, бу бечораларнинг не-

га занжирбанд этилганини тушунтириб беришларини сўради. Отлиқ соқчилардан бири, бу каторга қилинганларнинг ҳазрати олийларига тобе эканини, уларнинг галерга олиб кетилаётганини айтди, унинг кўрган-билгани шугина эди, холос.

— Барибир мен, — деди дон Кихот, — уларнинг ҳар қайсисидан бошига тушган бу бахтсизликнинг сабабларини алоҳида-алоҳида сўраб билишни истардим.

У илтимосини шунчалар хушмуомалалик билан айтдики, бунга жавобан иккинчи отлиқ соқчи бундай деди:

— Гарчанд бу ярамаслар устидан чиқарилган аниқ ҳукмни ёнимизда олиб бораётган бўлсак ҳам, тўхтаб, қоғозларни сиз муҳтарам жанобларига ўқиб беришга вақтимиз йўқ. Яхшиси, уларнинг ҳар қайсисининг олдига бориб, ўзларидан сўраб билиб олақолинг, сеньор. Агар иташса, бор гапни сизга айтиб беришадди, буни жон-жон деб иташса керак, чунки бу зўравонларга разиллик қилиш ёки буни гапириб беришдан улугроқ ҳузур йўқ.

Дон Кихот рухсат олгач, занжирбандларнинг олдига борди-да, йигирма тўрт ёшлар чамасидаги биринчи тутқун йигитдан нега бундай мусибатга учрагани сабабларини сўради. Йигит бунинг ҳаммасига севги айбдор деб жавоб берди.

— Бу қанақаси, фақат севги туфайлими?! — Хитоб қилди дон Кихот. — Агар севги туфайлигина галерга юборишса, у тақдир-да мен аллақачон эшкак эшиб юришим керак эди.

— Муҳтарам жаноблари бошқа севгини кўзда тутмоқдалар, — деди тутқун. — Менинг севгим бошқачароқ, мен уст-бош солинган саватни қаттиқ севиб қолиб қучоғимга шу қадар меҳр билан босиб олдимки, одил суд зўрлик билан тортиб олманганида, ҳали ҳам қўйиб юбормаган бўлардим. Ана шу севги туфайли менинг елкамга юз дарра уришди-да, қўшимчасига уч йил галер хизматига ҳукм қилишди.

Дон Кихот иккинчи тутқунга ҳам шу саволни берди, бироқ тутқун оғиз очмай, маъносиз юришда давом этаверди. Унинг номидан ёнидаги киши сўзга аралашди:

— Уни канарейкалик қилгани, бошқача қилиб айтганда, хонанда ва созандаларни ҳам галерга ҳукм қилишса?

— Ие, бу қанақаси? — яна сўради дон Кихот. — Наҳотки хонанда ва созандаларни ҳам галерага ҳукм қилишса?

— Ҳа, сеньор, — деб жавоб берди тутқун, — тревога вақтида ашула айтишдан ёмони йўқ.

— Бунақасини хаёлимга ҳам келтирмаган эдим, — эътироз билдирди дон Кихот. — Ахир: «Кимнинг қўшиқ ҳамдами, унинг бўлмайти гами», дейишади-ку.

— Бу ерда тескариси, — деди тутқун: — Ким қўшиқ айтса бир бор, у умр бўйи хор-зор.

— Ҳеч тушунмаяпман, — деди дон Кихот.

Шу пайт отлиқ соқчилардан бири гапга аралашди:

— Сеньор кабальеро тревога вақтида ашула айтиш дегани — бу виждонсизлар тилида қийноқ вақтида ўз айбини бўйнига олиш дегани. Бу гуноҳкорни қийноққа солишган эди, у ўз жи-

ноятини бўйнига олди: бу мол ҳайдар эди, яъни ҳар хил уй ҳай-  
вонларини ўғирлаб ҳайдаб кетарди. Уни олти йил галерга ҳукм  
қилишди ҳамда қўшимча икки юз дарра уришди. Ишонмасан-  
гиз, бу фирибгарнинг елкасини очиб қаранг. Энди бўшанглик  
қилганидан афсусланиб, ич-этини еб, уялиб юрибди, бошқа мут-  
таҳамлар эса қийноққа охиригача чидаб, айбини бўйнига олмас-  
ликка бардоши етмади деб ундан жирканишиб, жабрлаб, якка-  
лаб қўйишмоқда. Зероки улар «ҳа» сўзи ҳам, «йўқ» сўзи ҳам бир  
оғиздан чиқади деган нақлга амал қилишади. Жиноятчининг энг  
катта ютуғи шуки, унинг тирик қолиши ёки ўлиб кетиши, гу-  
воҳларга ёки далилларга эмас, балки унинг ўз тилига боғлиқ  
дейишади. Менимча, уларнинг бу мулоҳазаси тўғри.

— Мен ҳам шундай фикрдаман, — деб жавоб берди дон Кихот.

Шундан кейин у учинчи тутқуннинг олдига бориб, унга ҳам  
аввалги икки тутқунга берган саволини берди: у уялиб-негиб  
ўтирмай, шартта-шартта жавоб берди:

— Ўн дукатим бўлмагани учун беш йил муддатга галер-  
лар ҳузурига жўнаб кетяпман.

— Сизни бу мусибатдан қутқариш учун жон деб йигирма  
дукат беришга ҳам тайёрман, — деди қичқириб дон Кихот.

— Вақт ўтди, сеньор, — деди тутқун. — Ҳозир мен денгизнинг  
қоқ ўртасида сузиб бораётган кемадаги пули кўп, аммо сотиб ол-  
гани нон топмаганидан оч қолган бадавлат савдогарга ўхшайман.  
Сиз эҳсон қилаётган ана шу йигирма дукатим илгари бўлганида-  
ку, ишбошининг оғзини мойлаб, оқловчининг миясини янгилаган  
бўлардим, шу билан қарабсизки, бу йўлда занжирга тушган то-  
зидай сургалмай, озодликда жавлон уриб юрардим.

Сўнгра дон Кихот қолган тутқунлар билан ҳам савол-жавоб  
қилди. Ҳар қайсиларининг нима учун галерга ҳукм қилингани  
тўғрисидаги сўзларини батафсил эшитди. Рицаримиз энг сўнгги  
марта мурожаат қилган тутқун ўттиз ёшлар чамасидаги қадди-  
қомати келишган, хушбичим, бир кўзи сал ғилай одам эди. У  
қолган тутқунларга қараганда бошқачароқ занжирбанд қилин-  
ган эди. Унинг гавдаси бошидан оёғигача узун занжир билан  
чирмаб ташланган. Унинг иккита ҳалқаси бўлиб, биттаси бошқа  
ҳамма тутқунлар боғланган занжирга уланган, «дўстимни  
эҳтиёт қил» деб аталувчи иккинчи ҳалқасидан камаригача ик-  
кита сим чўзилиб кетган, бу симлар қўлларидаги кишанларга  
пайвандланган эди; шу туфайли тутқун на қўли, на бошини  
қимирлата оларди. «Бу одам нега бунчалик қаттиқ кишанлаб  
қўйилган», деб сўради дон Кихот.

Отлиқ соқчи унга шундай жавоб берди:

— Чунки унинг бир ўзи бошқа ҳамма тутқунлар қилган  
жамики жиноятдан ҳам кўпроқ жиноят қилган; бунинг устига  
у шундай довюррак учарки, жуда маҳкам кишанланишига қара-  
май яна қочиб кетмасайди, деб эҳтиёт бўлиб боряпмиз. Сизга бу  
одамнинг машҳур Хинес де Пасамонте, ёки унинг бошқача оти  
Хинесильо де Парापилья эканини айтсак, шу кифоя бўлса  
керак.

— Сал оғзингизга қараб гапиринг, сеньор комиссар,— деди тутқун,— одамга ҳар хил лақаблар бераверишни бас қилинг. Менинг номим сиз муҳтарам зот айтганидай ҳеч ҳам Хинесильо эмас, балки Хинес, ўзим Парапильядан эмас, Пасамонтеданман. Яхшиси, сиз ўз авлодингизни ўйласангиз бўларди. Жуда кўп ажойиботлар очардингиз...

— Сал секинроқ, сеньор қароқчи,— деб жавоб берди комиссар,— бўлмаса, оғзингни юмиб қўяман.

— Вақти келиб менинг Хинесильо де Парапилья эмаслигимни ҳамма билиб олади.

— Муттаҳам, ҳали сенинг бунақа лақабинг йўқми?— деб сўради назоратчи.

— Борликка бор-у,— деб жавоб берди Хинес,— лекин ҳеч кимга ўзимни бундай деб ататтириб қўймайман! Сеньор,— деб мурожаат қилди у дон Кихотга,— сиз бизга бирор нарса бермоқчи бўлсангиз тезроқ беринг-да, кейин йўлингиздан қолманг. Бошқаларнинг ишига аралашиб сўроқ қилаётганингиз жонимга тегди, борди-ю менинг кимлигимга қизиқсангиз, билиб қўйинг! Мен Хинес де Пасамонте бўламан, мана, мана шу бармоқларим билан тарихимни ўзим ёзганман!

— У тўғри гапни айтяпти,— деди комиссар.— Чиндан ҳам у ўз ҳаётини ёзган, ёзганда ҳам жуда қойил қилган, лекин китоби турмада қолган, гаровига икки юз реал олган.

— Икки юз дукат тўласам ҳам,— деди Хинес,— барибир уни қайтариб оламан.

— Олсанг нима бўпти, шунақа ажойиб китобми?— сўради дон Кихот.

— Ажойиб бўлганда қандай,— жавоб берди Хинес.— Тор-меслик Ласарильодан ҳам, ана шу хилда ёзилган ёки бундан кейин ёзиладиган ҳамма китоблардан ҳам соз<sup>35</sup>. Унда ёзилганлар ҳаммаси ҳақиқат, бу китоб шу қадар қизиқ ва ғалатики, ҳар қандай уйдирма ҳам унинг олдида ип эшолмайди, буни фақат сизга айтяпман, муҳтарам жаноблари.

— Китобнинг сарлавҳаси нима?— сўради дон Кихот.

— Хинес де Пасамонтенинг ҳаёти,— деб жавоб берди у.

— Ёзиб тугатилганми?— сўради дон Кихот яна.

— Менинг умрим тугамай туриб, қандай ёзиб тамом қилинган бўлсин,— деб жавоб берди Хинес.— Туғилганимдан то мана ҳозир галерга жўнатилаётганимга қадар, кўрган-кечирганларимнинг ҳаммаси ўша китобда баён қилинган.

— Галерга биринчи марта жўнаётган бўлсангиз керак-а?— сўради дон Кихот.

— Худо ва қиролнинг даргоҳида хизмат қилиб, тўрт йилимни галерда ўтказиб юбордимки, қоқ нон билан дарранинг мазаси қандайлиги менга аён,— деб жавоб берди Хинес.— Бироқ яна ўша ерга юборилаётганимдан унчалик хафа эмасман. У ерда шошмай-нетмай китобимни меъёрига етказаман. Испан галерларида ишлайдиган одамларнинг бўш вақтлари шундай кўпки, қандай ўтказишни билмайсан киши.

— Сен ахмоқ одам эмас экансан!— деди дон Кихот.

— Бахти каро ҳам эмасман,— деб илова қилди Хинес.— Мияси ишлайдиган одамларгина ҳамиша бахти қаро бўлади.

— Муттаҳамларгина бахти қаро бўлади,— комиссар Хинеснинг гапини бўлди.

— Мен сиздан боя оғзингизга қараб гапиринг, деб илтимос қилган эдим, сеньор комиссар!— деди Хинес.— Сизга биз бечораларни ҳақорат қилиш эмас, ҳаммамизни қирол тайинлаган жойга олиб бориб қўйиш топширилган. Шунинг учун гапни бас қилинг-да, йўлга тушайлик, бўлмаса ким билади, бошингизга қандай ишлар тушар, балки галерга ўзингиз илиниб қоларсиз!

Комиссар Пасамонтени қўполлиги учун урмоқчи бўлиб, қамчисини ўйнатган эди, дон Кихот уларнинг ўрталарига туриб олди, комиссардан тутқунни урмасликни илтимос қилди.

— Маҳкам боғлаб ташланган одамнинг чакаги сал очилса, нима бўпти? — деди у. Сўнгра у занжирбандларга ўгирилиб, шундай деди:

— Сизларнинг айтганларингиздан мен бир нарсани яққол тушуниб олдим, азиз биродарлар: сизлар, гарчанд, қонунга мувофиқ суд йўли билан жазоланган бўлсаларингиз ҳам келгусида кечирадиган умрингизга унча мойил эмассиз, сизларни зўрлаб галерага олиб кетишяпти. Бунинг устига устингиздан чиқарилган ҳукмнинг унча тўғри эмаслиги эҳтимолдан ҳоли эмас! Бирингизни қийноқдан қўрққанингиз, иккинчигизни пули камлиги, учинчигизни ҳимоячингиз йўқлиги, тўртинчигизни судьянинг ноҳақ ҳукми бу балога йўлиқтирган. Ким билади дейсиз, балки ҳақ бўлгандирсиз-у, аммо буни судда исботлай олмагандирсиз. Лекин адолат ғолиб чиқиши керак. Худо мени нима мақсадда буюк жасоратлар кўрсатишга даъват этиб, жаҳонгашта рицарлар сафига қўшилишимни ва мазлумларни ҳамда эзилганларни ўз паноҳимга олиб, уларни ҳимоя қилишим учун онт ичишимни буюрганини ҳозир кўрасиз. Лекин мен масалани тинч йўл билан ҳал қилиш мумкин бўлган жойда куч ишлатиш керакмаслигини биламан, шунинг учун аввало соқчилар ва комиссардан сизларнинг кишанларингизни ечиб, ўзларингизни тинчгина бўшатиб юборишга рози бўлишларини сўрайман. Олло-таоло билан табиат эркин қилиб яратган кишиларни қулга айлантиришни мен ниҳоятда шафқатсизлик деб биламан. Бунинг устига, сеньор соқчилар,— деб қўшиб қўйди дон Кихот,— бу бечоралар шахсан сизнинг олдингизда ҳеч қандай гуноҳ қилишгани йўқ. Ҳар ким ўз гуноҳига ўзи жавоб беради: осмонда худо бор, у ёмонлик қилганларни одиллик билан жазолайди, яхшиликка марҳамат кўрса-тади. Бандалари эса бошқа одамларнинг жаллодлари бўлиб қолмасликлари керак. Мен сизларга яхшилик билан ташаккуримга лойиқ бўлишингизни сўраб мурожаат қиламан. Агар илтимосимни ўз хоҳишингиз билан бажармасангиз, найзам ва қиличимни ишга солиб бўлса ҳам, уни бажаришга мажбур этаман!

— Бу қанақа ахмоқона ҳазил!— хитоб қилди комиссар,— Буни қаранг-а, нималар деб валдираяпти у! Ахир давлат жино-

ятчиларини бўшатиб юборишга бизнинг ҳақимиз борми, бизга бундай буйруқ беришга сизнинг ҳаққингиз борми? Қани, яхшиликча омон-эсон йўлларига жўнаб қолсинлар-чи, муҳтарам жаноблари, бошларидаги жомни ҳам тўғрилаб олсинлар, ундан кейин беҳуда нарсага овора бўлиб юрмасинлар, сеньор!

Дон Кихот ғазабланганидан ўзини тутолмай, комиссарга шундай шашт билан ташландики, у ҳужумга тайёрланмасданоқ найза зарбидан эгардан қулади. Бу кутилмаган ҳужумдан бошқа соқчилар ҳам аввалига довираб қолишди. Бироқ улар шу заҳотиёқ эс-ҳушларини йиғиб олишди-да, қилич ва найзаларини шайлаб, бараварига дон Кихотга ташланишди. Тутқунлар қутулиш имконияти туғилганини сезиб, бор кучлари билан кишанларни узиб ташлашга киришмаганларида балки рицаримизнинг аҳволига маймунлар йиғлармиди. Ҳамма гангиб қолди: соқчилар нима қилишни, тутқунларга ташланишни ҳам, ёки ҳужум қилаётган дон Кихотдан ўзларини муҳофаза қилишни ҳам билмай қолишди. Шу орада Санчо Хинес де Пасамонтега кишанни узиб ташлашда ёрдам берди. Хинес кишандан қутулиши биланоқ йиқилиб ётган комиссарнинг олдига ўгуриб борди-да, унинг пилтали милтиғини олиб, соқчиларга ўқталди. Лекин ўқ отишга тўғри келмади: чунки жанг майдонида битта ҳам душман қолмаган эди. Пасамонтенинг қўлидаги милтиқдан ва бошқа тутқунларнинг отаётган тошларидан қўрқиб, уларнинг ҳаммаси тумтарақай қочиб қолганди. Санчо қоровулларнинг тўзиб кетганини кўриб ўзига келди-ю, жуда қўрқиб кетди. У, соқчилар бўлган воқеани оқизмай-томизмай Санта Эрмандадга етказишса керак, шундан кейин Санта Эрмандад тревога кўтариб, дарҳол тутқунлар билан уларнинг халоскорлари изига тушади, деган хаёлга келди. У бу фикрини дон Кихотга айтди-да, уни бу ердан дарҳол кетишга ва яқинда кўриниб турган тоғ оралиғига кириб яширинишга кистай бошлади.

— Ҳовлиқма,— деди дон Кихот,— ҳозир нима қилишимиз кераклигини яхши биламан.

Шундан кейин рицаримиз комиссарни талаб, ҳар томонга тарқаб кетаётган тутқунларни чақирди: улар буйруқ кутиб дон Кихотнинг атрофини ўраб олишди, дон Кихот гапни шундай бошлади:

— Олижаноб кишилар ўзларига яхшилик қилган кишилардан ҳамиша миннатдор бўладилар, чунки қадр билмасликдан зўрроқ гуноҳ йўқ. Сизлар эса, сеньорлар, менинг сизларга валинеъматлик қилганимни ҳозиргина ўз тажрибангизда кўриб ишондингиз. Хўш, шундай экан, қилган мурувватим учун сиздан бир нарсани талаб қиламан: ҳозиргина ўзларингиз қутулган кишанларингизни елкангизга олиб, тезда Тобосо шаҳрига жўнашингизни истайман. У ерда сеньора Дульсинея Тобосская ҳузурида бўлиб, унга Ғамгин Қиёфа рицарь салом айтди дейсиз, сўнгра сизларни халос этиш учун кўрсатган шонли жасоратларимни унга ипидан-игнасиғача сўзлаб берасиз. Истагимни бажарганингиздан кейин хоҳлаган томонингизга кетаверишингиз мумкин.

Шунда Хинес де Пасамонте барча тутқунлар номидан жавоб берди:

— Сеньор халоскоримиз, сиз муҳтарам жанобларининг буйругингизни сира бажо келтира олмаймиз, нега десангиз, биз тўдалашиб йўлга чиқа олмаймиз. Аксинча, бизни албатта изимизга тушадиган Санта Эрмандад топиб олмаслиги учун турли томонларга тарқалиб кетишимиз керак. Муҳтарам жаноблари сеньора Дульсинея ҳузурига бориш ўрнига, бизга ҳар қанча бўлса ҳам дуо ўқишни буюра қолсинлар, биз жон деб муҳтарам жаноблари ҳақиқага дуо ўқиймиз. Бизни кишанларини олиб Тобосога боришга рози бўлишади деб ўйлаш ва ҳали эрталаб соат ўн бўлмади туриб, ҳозир ярим кеча, деб бизни ишонтиришга уриниш қайрағочдан нок қидириш билан баробардир.

— Қасамёд этаманки, — деб қичқирди дон Кихот дарғазаб бўлиб, — дон аблах, дон Хинесильо де Парапилья, яна қандай отингиз бор эди, сиз ўша ерга ёлғиз ўзингиз борасиз ва бу кишанларни орқалаб кетасиз.

Пасамонте бу ҳақоратни эшитаркан, дон Кихотни миясини еган деб ўйлаб, ўртоқларига бир нарсани ишора қилди. Улар ўша заҳоти тўрт томонга тарқалишди, шундан кейин дон Кихотнинг устига дўлдай тош ёғдира бошлашди, у қалқони билан ҳам ўзини ҳимоя қила олмай қолди. Санчо эшагининг биқинига яшириниб олиб, тошдан ўзини эҳтиёт қилиб қолди. Хўжайини эса бир неча дақиқа ўзини зарбдан асради, лекин пировардида кўкраги билан елкасига келиб теккан бир неча тошдан гуппа қулади. У қулаши биланоқ тутқунлардан бири унинг устига ўзини отди-да, бошидан жомни олиб, у билан елкасига уч-тўрт марта туширди, сўнгра тутқунлар бечора рицарнинг яроғ-аслаҳалари устидан кийиб юрадиган камзулини ечиб олишди, пайпоқларини ҳам шилиб кетишмоқчи эди, лекин бунга рицаримизнинг пойабзали халақит бериб қолди. Санчонинг плашини ечинтириб, уни фақат кўйлақда қолдиришди, ниҳоят, қолган ҳарбий ўлжаларни ўзаро бўлашиб олиб, тоғларга кириб яширинишди.

Жанг майдонида эшак билан Росинант, Санчо билан дон Кихот қолди. Эшак хаёл сургандай бошини қуйи солиб олган, ўқтин-ўқтин қулоғини силкитиб қўярди; чамаси, қулоғининг таги ҳамон жаранглаётгани учун тошбўрон ҳали ҳам тугамаган деб ўйлаётган бўлса керак; Росинант ўз хўжайини билан бирга ерда ётарди, чунки нонкўр тутқунлардан унга ҳам хийлагина зиён-заҳмат етган эди. Плашидан ажралган Санчо эса Санта Эрмандадни ўйлаб қўрқувдан титрарди; дон Кихот эса халос этган одамларининг ўзига нисбатан бундай аҳмоқона муомалада бўлганида гоят гаранг бўлиб қолган эди.

## ХИНЕС ДЕ ПАСАМОНТЕНИНГ САНЧО ПАНСАНИНГ ЭШАГИНИ ҚАНДАЙ ҚИЛИБ УЎИРЛАБ КЕТГАНИ

Дон Кихот адолатни тиклаш йўлида кўрсатган жасоратининг қандай аянчли тугаганини кўриб, яроқбардорига шундай деди:

— Номуссиз ва виждонсиз кишиларга яхшилик қилиш — денгиздан сув овлаш билан баробар деган гапни жуда кўп марта эшитганман, Санчо. Бунинг тўғрилигига энди ишондим. Одил суднинг ишига аралашмаслик керак, деган маслаҳатингга қўшилмаганимдан афсусланаман. Сўзларингга ишонганимда бу кўнгилсизликка йўлиқмаган бўлардим. Утган ишга салавот, энди бу азобларга чидаймиз-у, келгусида ақллироқ иш тутишга ҳаракат қиламиз.

— Марҳаматли жанобларига ақл киргунча мен турк бўлиб кетсам керак, — деб жавоб берди Санчо. — Сиз агар менинг маслаҳатимга дарҳол кирганингизда бу кўнгилсизликларга йўлиқмаган бўлардик, дедингиз. Бўлмаса энди менинг маслаҳатимга кириг — бундан каттароқ балодан ҳам омон қоламиз. Сизнинг барча рицарлик шон-шавкатларингиз Санта Эрмандадга қарши туришда бизга қўл келолмайди, чунки у ҳамма жаҳонгашта рицарларни битта қилганда ҳам сариқ чақага олмайди. Унинг мерганларининг ўқи ҳозирданок қулоғимнинг тагида ғувиллаётгандай бўлиб туюлмоқда.

— Сен туғма қўрқоқсан, Санчо, — деб унинг гапини бўлди дон Кихот. — Лекин мени қайсарликда айбламаслигинг учун энди сенинг маслаҳатингга кирман-да, Санта Эрмандадга учраб қолмаслик учун бу ердан жўнайман. Бироқ сен мени гўё қўрққанидан бу учрашувдан ўзини четга олди деб ҳозир ҳам, бундан кейин ҳам ҳеч кимга айтмасликка қасам ичасан. Фақат сенинг ёлворишингга қулоқ солганим учун шундай қилаётганимни унутма. Борди-ю сен менга виждонсизларча туҳмат қилиб, гўё мени чиндан ҳам қўрқса арзийдиган хавфдан ўзини четга олди деб бирор кишига айтиш фикрида бўлсанг, ана шу фикрингнинг ўзи учуноқ шу ерда ёлғиз ўзим қолишга ва сен шу қадар ваҳима билан гапираётган муқаддас қардошликкина эмас, балки етти ака-ука Маккавейлар<sup>36</sup>, Кастор билан Поллукс<sup>37</sup> ҳамда дунёда мавжуд бўлган ҳамма ака-укалар, қардошларни кутишга тайёрман.

— Сенъор, — деб жавоб берди Санчо, — кетиш қочиш эмас, қутулишга кучимиз етмайдиган хавфни кутиш эса ўтакетган телбаликдир. Оқиллик эса эртанги кун учун бугун ўзингни эҳтиёт қилишинг кераклигини ва бутун ҳаётингни бир йўла хавфда қолдирмаслигингни буюради. Ҳа, майли, мен жоҳил ва қишлоқиман, лекин барибир мен аҳмоқ эмасман. Соғлом фикр юрита оламан, шундай экан, маслаҳатимга кирганингиздан афсусланманг. Агар мадорингиз етса Росинантга мининг, бўлмаса мен ёрдамлашвораман, шундан кейин ортимдан юраверинг, чунки ҳозир бизга қўлимиздан ҳам оёғимиз зарурроқ, дилимга келган гап шу.



Дон Кихот бир оғиз ҳам эътироз билдирмади. Отига миндида яқинида кўриниб турган Сиерра Морена тоғ даралари томон эшагини ҳайдаб кетган Санчонинг кетидан жўнади. Санчо тоғдан ошиб ўтиб, Вис ёки Альмодовар дель Кемпогача боришни ҳамда у ерда Санта Эрмандад излаб тополмайдиган қояларда бир неча кун яширинишни мўлжаллаган эди. Олижаноб яроқбардор ўзининг тўриқ эшагида етарли озиқ-овқат олиб кетаётгани учун ҳам узоқ тоғларга чиқиб кетишга журъат этган эди, озиқ-овқатлар эса қандайдир каромат билан очкўз тутқунларнинг қўлига тушмай қолган эди.

Кечга яқин улар Сиерра Морена тоғларининг жуда ичкари-сига чиқиб олишди, тунагани хилват бир дарада қулоч ёзган катта эман дарахти тагига жойлашишди. Санчо бу ерда овқат тугагунча истиқомат қиламиз деган қарорга келди. Бироқ тақдирнинг машъумлигини қаранг, дон Кихотнинг мардлиги ва нодонлиги туфайли кишандан қутулган бояги тутқунларнинг энг довюраги машхур фирибгар ва ўғри Хинес де Пасамонте ҳам Санта Эрмандаднинг қўлига тушишдан қўрқиб тоғларга қочган ва дон Кихот билан Санчо Панса яширинган мана шу дарага ҳали қоронғи тушмай яшириниб олган эди. Ёвузлар миннатдор бўлишни билмайдилар. Бойлик орттириш йўлидаги битмас-туганмас иштиёқ ҳамisha уларни янги жиноятларга отлантиради. Шунинг учун ҳам Хинес саёҳатчиларимизни кўриб, яна улар ҳисобига бир нарса орттиришни ўйлаган бўлса, бунга ажабланишнинг ҳожати йўқ. Бу нонкўр фирибгар Санчонинг тўриқ эшагини ўғирлашга аҳд қилди. У Росинантни ҳеч нарсага ярамайдиган қирчанги деб ўйлади. Шунинг учун унга эътибор ҳам бермади. Мана, ниҳоят, саёҳатчиларимиз уйқуга кетганларида Хинес улар тўхташган жойга келди-да, эшакни етаклаб қолди; тонг отарда у шу қадар узоқлашиб кетган эдики, энди уни қидириб топишнинг иложи йўқ эди.

Уфққа кўтарилган қуёш бутун ер юзига қувонч, фақат биргина Санчо Пансага алам олиб келди. Энди у эшагидан маҳрум бўлган эди. Санчо эшак йўқолганини пайқаб жон-жаҳди билан фарёд қила бошладики, бундан уйғониб кетган дон Кихот шундай фиғонни эшитди:

— О, ўз уйимда туғилган, севикли жигарбандим, болаларимнинг қувончи, қўшнилариمنىнг ҳаваси, хотинимнинг ҳузурини, меҳнатларимда кўмакдошим! Энди мен сенсиз қандай яшайман, ахир сен ҳар кунни топиб берадиган йиғирма олти мараведис ҳар кунги овқатга кетадиган харажатимнинг ярмига етарди.

Дон Кихот гап нима ҳақида кетётганини билгач, сенга ўзимнинг учта хўтигимни тухфа қиламан деб Санчони овунтиришга уриниб кўрди. Бу қўл келди. Санчо тинчиди, ҳўнграб йиғлашини қўйди, кўз ёшларини артиб, дон Кихотга олижаноблиги учун миннатдорлик билдирди.

Дон Кихот тоғ бағрига кириши биланоқ чеҳраси ёришиб кетди: унинг назарида бу жойлар энг ажойиб саргузаштлар учун яратилгандай эди. У ана шу фикрларга берилиб шундай кайфичоғ

бўлиб кетган эдики, ҳатто дунёдаги ҳамма нарсани унутганди. Ўзини хавфдан ҳоли сезган Санчо эса бисотларидаги роҳиблар овқатидан энг мазалилари билан қорнини тўйгазишни ўйларди. Рицаримиз ўзлари тунаган дарадан чиқиб олдинга қараб кетди. Санчо бўлса, унинг кетидан пиёда жўнади. У энди йўқолган эшагининг юкини елкасида кўтариб олиб, бирин-кетин қопдан бўлак-бўлак егулик нарса чиқариб оғзини тўлдириб кавшаб борарди. Бу унга шундай маъқул тушган эдики, энди у бошқа ҳеч қандай саргузаштларни ўйламас эди.

Санчо тўсатдан кўзини очаркан, хўжайинининг тўхтаб, ерда ётган бир нарсани найзаси билан илиб олмоқчи бўлаётганини кўрди. У яқинроқ келиб дон Кихот чарм сумкани найзасининг учига илинтирганини пайқади. Сумка ярим бўлса ҳам, шундай оғир эдики, Санчо ердан кўтаришда хўжайинига ёрдам бераман деб, инқиллаб юборди. Дон Кихот яроқбардорига сумкада нима борлигини билишни буюрди. Сумка занжир билан боғлаб қўйилган бўлса-да, Санчо уни оппа-осон очди. Сумкада тўртта голландча юпка кўйлак, келиштириб тикилган анча-мунча бошқа ички кийимлар бор эди. Бир рўмолчага эса талайгина олтин танга туғиб қўйилганди. Санчо буларни кўриб хитоб қилди:

— Бизни шундай ажойиб саргузаштга йўлиқтирган худога шукур! Қани энди шундай ўлжалар тез-тез учраб турса!

Сўнгра у яна сумкани титкилаб ҳашамдор муқовали ён дафтарчани топиб олди. Дон Кихот Санчога ён дафтарчани ўзига бериб, пулларни ёнига солиб қўйишини буюрди. Бу билан у яроқбардорини жуда хурсанд қилиб юборди. Санчо Панса зўр миннатдорлик билан хўжайинининг қўлини ўпди-да, сумкадаги ич кийимларни овқат турган қопага солиб олди.

Шундан кейин саёҳатчиларимиз яна янги саргузаштлар излаб йўлга тушишди.

## XIX БОБ

### ДОН КИХОТНИНГ МАЪЮС ГУЗАЛГА ТАҚЛИДАН ТАВБА ҚИЛИШНИ ЎЗ ЗИММАСИГА ОЛГАНИ ВА ДУЛЬСИНЕЯ ТОБОССКАЯ ХУЗУРИГА ЧОПАР ЮБОРИШГА АХД ҚИЛГАНИ

Дон Кихот энг хилват тоғ оралиқларидан тобора ичкарилаб борарди. Садоқатли яроқбардори ўз хўжайинининг кетидан судралиб қадам ташларкан, ўлгудек гап соғгиси келар, хўжайини биринчи бўлиб сўз ташлашини тоқатсизлик билан кутарди. Чунки хўжайинининг индамас ва одобли бўлиш зарурлиги тўғрисидаги қатъий буйруғини бузишни истамасди, ниҳоят тоқати тоқ бўлиб гап бошлади:

— Сенъор дон Кихот, муҳтарам жаноблари, менга оқ фотиҳа бериб, кетишимга ижозат этсангиз. Уйга, бола-чақаларим олдига кетсам: улар билан ақалли истаганимча гаплашиб мулоҳаза юрта олишим мумкин, сиз муҳтарам жаноблари эса менга кечаю кундуз ана шу даштда дайдишни, бунинг устига лом-мим демасликни

буюрасиз, менинг бўлса доим тилим қичиб туради. Бундан кўра мени тириклайин ерга кўмиб қўяқолганингиз маъқул. Яроқбардорга осон эмас экан: умр бўйи саргузашт излаб кунинг ўтаркан, сени калтаклашаркан, чойшабга солиб осмонга улоқтиришаркан, тошбўрон қилишаркан, муштлашаркан, бунинг устига яна оғиз ҳам очмагин, қўнглингга тугилиб қолган гапингни айтмай, соқовга ўхшаб қоларкансан.

— Ниятингга тушуняпман, Санчо,— деб жавоб берди дон Кихот,— тилингни тийиб қўйганлигимни бекор қилишимга муштоқсан. Майли, шундай бўлсин, мен розиман, оғзингга келганини гапиравер. Лекин шуни унутма: мен сенга фақат шу тоғларда юрган пайтимиздагина хоҳлаган вақтингда истаганингни айтишингга рухсат бераман. Аҳоли яшайдиган жойларга борганимизда, яна тилингни тийиб қўйман, ана ўшанда то мен ўзим сўз ташламагунимча индамай юраверасан.

— Шунисига ҳам шукур, муҳтарам жаноблари. Пайтдан фойдаланиб бир савол беришимга рухсат этгайсиз: нега энди борган сари тоққа кириб боряпмиз, одам қадами етмаган бу жойларда санғиб юрмасдан ҳам Санта Эрмандаддан бемалол яширинишимиз мумкин-ку?

— Шуни билиб қўйки, Санчо,— деб жавоб берди дон Кихот,— бу хилват ва бўм-бўш ерлар менда жасорат кўрсатиш иштиёқи туғдирмоқда, шундай жасорат кўрсатаманки, бу жасорат менинг номимни абадий шон-шарафга чулғайди, ҳамда бир вақтлар энг машҳур рицарлар кўрсатган барча буюк жасоратлардан юксакроқ жасорат бўлади бу.

— Бу жасоратингиз жуда хавфлими?— деб сўради Санчо Панса.

— Йўқ,— деб жавоб берди Ғамгин Қиёфа рицарь.— Тагин ким билади дейсан, балки қаттиқ азоб чекишимга тўғри келар. Ҳаммаси сенинг ғайратингга боғлиқ.

— Менинг ғайратимга боғлиқ?— хитоб қилди Санчо.

— Ҳа,— сўзида давом этди дон Кихот.— Мен сени бир топшириқ билан юбормоқчиман, агар уни тез ва муваффақиятли бажарсанг, унда бошимдаги мусибатларим узоққа чўзилмайди, довруғим эса бутун оламга таралади. Лекин бу қандай топшириқ экан деб сени қийноққа солиб қўйишим ярамайди, шунинг учун тўғридан-тўғри ишга ўтамиз. Сенга албатта маълумки, Санчо, ўз санъати билан донг таратишни истовчи ҳар қандай санъаткор ўзи улуғвор ҳисоблаган устодларнинг ижодига тақлид қилади. Ҳар қандай ақл юритувчи киши ҳам турмушда ана шу қоидаларга риоя қилиши керак. Кимки донишмандлик ва сабр-тоқатликда ном чиқаришни истаса, у Улиссга<sup>38</sup> тақлид қилиши лозим, Гомер Улиссни донолик билан қатъийликни ўзида мужасамлантирган киши сифатида гавдалантирган. Виргилий ўзининг Энейида<sup>39</sup> бизга ҳурматли ўғил билан донишманд доҳийнинг намунасини тасвирлаб берган. Ҳар иккала шоир ҳам албатта ўз қаҳрамонлари инсониятга ўрнак бўлсин учун уларнинг аслида кечираётган турмушларини эмас, балки келгусида қандай бў-

лишлари кераклигини тасвирлаганлар. Қандай бўлмасин, жаҳонгашта рицарь ҳам тақлид қилиши учун ўзига бирор қаҳрамонни танлаши керакки, бу тўғрида мен билан тортишиб ўтирмайсан. Ягона ва бекиёс Амадис Галльский менинг учун ана шундай қаҳрамоадир. Аммо машҳурларнинг машҳури бўлган бу рицарь нақ сеньора Ориана томонидан рад этилгач. Пенья-Побре қоясини ошён этиб, номини Бельтенеброс, яъни Маъюс Гўзал қилиб ўзгартириб, гуноҳларига иқрор бўлиб тавба-газарруга берилган вақтида ўз рицарлик жасоратини, донишмандлик, мардлик ва чинакам ошиқлигини айниқса яққол кўрсатган. Унинг изидан боришга яна шунинг учун ҳам қатъий бел боғладимки, бу жасоратга тақлид қилишим, бошқа жасоратлари — дев ва аждаҳоларнинг калласини узиб ташлаши, бутун бошли қўшинларни қувиб, флотни тўзғитиб юбориши ҳамда сеҳрларнинг сеҳрини пучга чиқариши каби жасоратларига тақлид қилишдан кўра бу мен учун қулайроқдир. Бу кимсасиз хилват қоялар ўйлаган ишларимни амалга ошириш учун бағоят қулай жой ва шу бугуноқ ўзимнинг янги жасоратларимни амалга оширишга киришиш ниятидаман.

— Бу бўм-бўш жойда муҳтарам жаноблари нима қилмоқчилар ўзи?— сўради Санчо ўз хўжайинининг узундан-узоқ гапидан ҳеч нарса тушунмай.

— Амадис Галльскийнинг изидан бормоқчиман, ўз маъшуқамнинг бағритошлигидан умидсизликка тушиб девонага айланиб юрмоқчиман, деб айтдим-ку сенга,— деб жавоб берди дон Кихот.— Айни вақтда мен жуда қаҳри қаттиқ деб ном олган шавкатли дон Роландга<sup>40</sup> ҳам тақлид қиламан. Дон Роланд гўзал Анжеликанинг ўзига вафосизлик қилганини эшитгач, аламига чидаёлмай телба бўлиб қолган: у дарахтларни томири билан қўпориб ташлаган, сойларнинг тиниқ сувларини лойқалатган, чўпонларни ўлдирган, уларнинг кулбаларини ёндириб, хонавайрон қилган, абдий ном қолдиришга муносиб бўлган, бундан бошқа минглаб номаъқулчиликларни қилган. Аммо мен Роланд, Орландо ёки Ротоланднинг (у ана шу уч ном билан машҳур бўлган) ҳамма номаъқулчиликларига тақлид қилмоқчи эмасман. Балки мен Амадиснинг бир ўзига тақлид қилиш билан қаноатланарман. Амадис ҳеч қотиллик қилмаган, ҳеч кимнинг уйини куйдирмаган, лекин шунга қарамай ўз қайғуси ва кўз ёшлари билан шухрат қозонган. Бундай шухратга ундан олдин ўтган рицарлар ҳам, кейин ўтган рицарлар ҳам муяссар бўлолмаганлар.

— Ҳайлашимча, сеньор,— деди Санчо,— сиз айтган рицарлар бу майнавозчиликларни маълум сабабларга кўра қилишган. Аммо, билишимча, сиз муҳтарам жанобларининг ақлдан озишларига ҳеч қандай сабаб йўқ. Наҳотки бирор хоним севгингизни рад этган ёки сеньора Дульсинея Тобосская сизга вафосизлик қилган бўлса?

— Биласанми, дўстим Санчо,— деб жавоб берди дон Кихот,— бирор ваз туфайли жинни бўлиш ҳеч машаққатли ҳам, қаҳрамонлик ҳам эмас, лекин бирон вазисиз жинни бўлиш тамоман

бошқа гап. Мабодо ҳеч нарсадан-ҳеч нарса йўқ жинни бўлиб қолганимни маъшуқам эшитгудай бўлса, чиндан умидсизликка тушиб, ғазабим қўзишига сабаб бўлувчи бирор ножўя иш қилиб қўйса, менинг нималар қилишга қодир эканлигимни тушуниб олади. Мен хат ёзиб, сени маликам Дульсинеянинг ҳузурига юбораман, ундан бирор жавоб олмагунча телба бўлиб юравераман. Агар у ўз мактубида менинг содиқлигимга яраша баҳо берса, телбалигим ва тавба-тазарруни бас қиламан, борди-ю аксинча бўлса, чиндан ҳам ақлдан озиб, ҳеч нарсани ҳис қилмай қўяман. Хуллас, маликам қандай жавоб бермасин, менинг изтироб ва мусибатларим тугайди. Агар сен менга қувончли хабар олиб келсанг, ақлим жойига қайтиб, ундан лаззатланаман, борди-ю қайғули хабар олиб келсанг, уни тушунмайман, чунки ақлдан ажраламан. Энди менга айт-чи, Санчо, Мамбриннинг дубулғасини асраб қолган эдинг-ку, тўғрими? Мен халос этган нонкўр тутқун уни майда-майда қилиб ташламоқчи бўлганидан кейин ердан кўтариб олганингни кўрган эдим. Майда-майда қилиб ташлай олмаганининг сабаби маълум: сеҳрли дубулғани йўқотиб юбориш осон эмас.

Бунга Санчо шундай жавоб берди:

— Худо ҳақи, сенъор Ғамгин Қиёфа рицарь, сиз баъзан шундай гапларни айтасизки, эшитишга ҳеч тоқат қилолмайман. Рицарлар тўғрисидаги, подшоликлар ва давлатларни босиб олиш, менга орол ҳада қилиш ҳамда эҳсон кўрсатиб, шон-шуҳратга буркая-жагингиз ҳақидаги гапларингиз шунчаки қуруқ ваъзхонликми, билмайман, бу бор гапми ёки йўқ гапми деган фикр келади миямга. Сиз муҳтарам жанобларининг сартарош жомини Мамбриннинг дубулғаси деганингизни бирор киши эшитиб қолса, эҳтимол, сизни чиндан ҳам ақлдан озибди, деб ўйласа керак. Уша жом менинг сумкамда; унинг ҳаммаёғи пачоқ-пачоқ бўлиб кетган, шундай бўлса-да, мен уни олволгандим. Агар худонинг раҳми келиб, хотиним билан болаларимнинг олдига бориш насиб бўлса, пачоқларини текислаб, соч-соқол олишда фойдаланаман.

— Энди, Санчо, менга ҳам худонинг номи билан қасам ичимга рухсат эт,— деди дон Кихот.— Қасам ичаманки, шу вақтгача дунёда шунчалик бефаҳм яроқбардор бўлган эмас. Наҳотки менга хизмат қила бошлаганингдан буён ўтган вақт ичида жаҳонгашта рицарларнинг қўли теккан буюмларнинг сирли нарсага айланиб қолиши ва ўз қиёфаларидан бошқача бўлиб кўринишларига ишонч ҳосил қилмаган бўлсанг? Атрофимизни ҳамиша сеҳргарлар ўраб олганлиги учун шундай бўлаётир, сеҳргарлар бизни қўллаб-қувватлаш ёки аксинча ҳалок этиш иштиёқида барча буюмларни сеҳрлаб бошқа нарсага айлантириб қўймоқдалар. Буни эсдан чиқармагил, ана шунда сен соч-соқол оладиган жом деб ўйлаган буюмни мен нега Мамбриннинг дубулғаси деяётганимни тушуниб оласан. Менга ҳомийлик қилаётган сеҳргар Мамбриннинг асл дубулғасини бошқаларнинг кўзига жомга ўхшатиб қўйиб, ўзининг донолигини намоийш қилди: акс ҳолда бошқалар дубулғани мендан тортиб

олиш учун изимга тушишган бўларди, чунки бу дубулға топил-майдиған нарсадир. Лекин одамлар буни сенга ўхшаб шунчаки соч-соқол оладиган жом деб ўйлаганлари учун ҳам унга қўл чўзишмаёттир: нонкўр тутқун аввал уни синдириб ташлашга уриниб кўрди, кейин эса ерга улоқтираркан, уни олишни ҳатто хаёлига ҳам келтирмаганини эсласанг, бас, ишончинг комил бўлсинки, агар у ҳақиқатни билганида эди, дубулғани ташлаб кетмаган бўларди. Дубулға ҳозир менга керак бўлмагани учун, сенда тураверсин, дўстим. Қаттиқ қайғуга ботганим белгиси сифатида ҳозир яроғ-аслаҳаларимни, бошдан-оёқ ҳамма кийимимни ечаман.

Улар ана шундай суҳбат билан юксак тоғ этагига етиб боришди, унинг қояларини ювиб оқаётган сокин сой ям-яшил ўтлоқ атрофини айланиб ўтарди, бу ўтлоққа қараган киши ҳаяжонланмай қололмас эди. Ўтлоқзорда қуюқ соя ташлаб турган дарахтлар қад кўтарган бўлиб, барра майса ҳамда ранго-ранг гуллар билан қопланган эди. Ғамгин Қиёфа рицарь ана шу ўтлоқни тавба-тазарругоҳи қилиб танлади-да, отини тўхтатиб, хитоб қилди:

Бошимга тушган бахтсизликдан қон йиғламоқлик учун ана шу манзилни танлайман. Мана шу ерда дарё бўлиб оққан кўз ёшларим сойга қўшилади, чеккан оҳу фиғонимдан тоғ дарахтларининг барглари бетиним шивирлаб, пора-пора бўлган қалбим нолаларидан куйлайдилар. О, умрим куёши! О, Дульсинея Тобосская, сен менинг йўлчи юлдузимсан, бор бахтимсан, илоё азиз-авлиёлар қўллаб, бутун орзуларинг амалга ошсин! Қара, ҳижрон мени қай куйга солди, содиқлигимга яраша марҳамат кўрсат менга! Шу хилватгоҳда ўсиб, камол топган ва эндиликда ёлғизликда менинг ҳамдардларим бўлган эй дарахтлар, новдаларингизни аста чайқаб, менинг бу ерга келганим сизларга малол келмаётганидан ишора қилинг. Сен эса, эй менинг яроқбардорим, муваффақиятларим ҳамда мусибатларимда содиқ йўлдошим, ҳозир мен нималарни қилсам, ҳаммасини хотирангда сақлаб қол ҳамда буларнинг барини менинг ноумидликка тушишим ва ғам-андухга ботишимнинг ягона гуноҳкорига етказ.

У ана шу сўзларни айтиб Росинантдан сакраб тушди-да, унинг эгарини ечди, сўнгра сағрисига шапатилаб, шундай деди:

— О, сен мен каби ўз жасоратлари билан шунча шуҳрат қозонган, тақдирдан шунчалар азоб-уқубат чеккан аргумоғим, энди сен озодсан, хоҳлаган томонингга бораверишинг мумкин, сен эркинлик олишга лойиқсан, сенга эркинликни ўзи ундан маҳрум бўлаётган одам бермоқда.

Санчо эса буни кўриб қичқириб юборди:

— Илоё тўриқ эшагимни ўғирлаб кетган одамни жин урсин. Мен ҳам ўз оғайнимнинг сағрисига шапатилаб, роса мақтаган бўлардим. Айтгандай, у ёнимда бўлганида эди, уни кўйиб юборишга сира ҳам рози бўлмасдим, чунки, мен ҳеч кимни сидқидилдан яхши кўриб қолганим ҳам йўқ, севгидан тоғу тошга чирмашаётганим ҳам йўқ. Лекин, рост гапни айтсам Ғамгин Қиёфа рицарь, агар муҳтарам жаноблари чиндан ҳам мени бирор топ-

ширик билан жўнатмоқчи, шундан кейин ўзлари ақлдан озмоқчи бўлсалар, унда Росинантни яна эгарлашлари керак эди. У йўқолган эшагимнинг ўрнини босади; Росинантни миниб, олдинда турган йўлни тезроқ босиб ўтаман, пиёда жўнайдиган бўлсам, Дульсинеянгизнинг ҳузурига қачон етиб бораману қачон қайтаман, гапнинг ростини айтсам, жуда секин юраман.

— Ҳа, бўпти,— жавоб берди дон Кихот,— фикринг ёмон эмас; майли, айтганинг бўлсин; Росинантни олақол. Бу ердан уч кундан кейин жўнаб кетасан, чунки менинг нималар қилишимни ва нималарни гапиришимни кўриб: эшитишингни истайман, кейин эса бунинг барини маликага етказасан.

— Хўш, сиз нималар қилмоқчисиз?— қизиқсинди Санчо Панса.

— Аввалига кийимларимни йирта бошлайман,— жавоб берди дон Кихот,— кейин яроғ-аслаҳаларимни ҳар ёққа улоқтираман, бошимни қояларга ураман... умуман шундай ишлар қиламанки, кўриб донг қоласан.

— Худо ҳақи,— деди Санчо,— бошингизни қояга эҳтиётлик билан уринг: бўлмаса бошингизни шундай уриб олишингиз мумкинки, ўзингиз ҳам адойи тамом бўласиз, ҳамма ғалати ишларингиз ҳам. Сиз муҳтарам жанобларига шундай маслаҳат бераман: гарчи сиз бу борада албатта пешанани бирор нимага уриш керак, бусиз сира мумкин эмас, деб ҳисобласангиз, муҳтарам жаноблари, унда бошингизни сувга ёки пахтага ўхшаш бирорта юшоқ буюмга урсангиз ўрнига ўтмасмикан. Бошқасини менга қўйиб қўяверасиз. Мен сеньора Дульсинеянинг олдига бориб, сиз марҳаматли зотнинг пешонангизни қоянинг олмосдан қаттиқ қиррали жойига урдилар деб айтаман.

— Яхши маслаҳатларинг учун сендан миннатдорман, дўстим Санчо,— деб жавоб берди дон Кихот,— лекин мен сени огоҳлантириб қўйишим керакки, мен ҳозир сенга нималар деган бўлсам, ҳаммасини бекам-кўст бажараман. Рицарлик қоидалари, ақалли ўз ҳаётимизни сақлаб қолишимиз учун ҳам бизга ёлғон гапиришни ман этади. Шу сабабдан ҳам бошни тошга уриш зарби кучли ва салмоқли бўлиши, бунда зарра сохталикка йўл қўйилмаслиги керак. Бинобарин, жароҳатларимни даволаш учун менга бир оз титилган ип қолдиришинг зарур: минг афсуски, кўргилик экан, малҳамни йўқотиб қўйдик.

— Энг катта бало эшакни йўқотганимизда бўлди, марҳаматли жанобим,— деб жавоб берди Санчо,— эшагимиз билан бирга биз озиқ-овқат солинган қопдан ташқари ҳамма нарасадан: эҳтиёт қилиб қўйилган ички кийимлардан ҳам, титилган ипдан ҳам, бинтлардан ҳам маҳрум бўлдик. Ўша ярамас гиёҳдан ясалган заҳарли ичимликни яхшиси эсингизга ҳам олмай қўяқолинг, сеньор! Мен буни сиздан ўтиниб сўрайман. Ўша ичимликнинг номини эшитсам, бутун ичим алғов-далғов бўлиб кетади. Сиздан яна битта илтимосим бор: ўзингиз белгилаган уч кунлик муддат тугади, қилган телбаликларингизни мени кўрди деб тасаввур қилинг, мен эса сеньорангизга шунақанги бўлмағур гапларни бошлаб ет-

казаманки, аста қўяверинг. Шундай қилиб, хатингизни ёзинг-у мени тезроқ жўнатинг, нега десангиз, сиз мухтарам жанобларини мана шу аърофдан тезроқ қутқариб олиб чиқиб кетиш учун зудлик билан қайтишни истайман.

— Сен бу ерни аъроф деб атадингми, Санчо?— хитоб қилди дон Кихот.— Дўзах деб атасанг бундан ҳам тўғрироқ бўлади.

— Ҳеч-да,— деб жавоб берди Санчо,— дўзахга тушган киши қайтиб чиқолмайди, мен эса Росинантни ниқтайвериб оёқларимдан ажралиб қолмасам, сизни бу ердан қутқариб олиб кетиш умидидаман. Тобосога етиб бориб, сеньорангиз Дульсинеянинг ҳузурда ҳозир бўлдим дегунча сиздек мухтарам зот қилган ва қилаётган нодонлик ҳамда телбаликлар (унинг ҳам, бунинг ҳам маъноси бир) тўғрисида шундай лоф ураманки, у илгари эмандай қаттиқ бўлган тақдирда ҳам дарҳол ипак қўлқопдай юмшаб қолади. Шундан кейин унинг асалдай ширин жавобини олиб орқамга қараб учаман-да, сиз марҳаматли жанобимни бу аърофдан халос қиламан. Бу аъроф кўринишидангина дўзахга ўхшайди, шунинг учун ҳам сизда бу ердан чиқиб кетиш умиди бор. Мен сизга аввал айтганимдай, дўзахдаги гуноҳкорларда бундай умид йўқ. Мухтарам жаноблари гапимга қарши чиқмасалар керак деб ўйлайман.

— Жуда тўғри,— деб жавоб берди Ғамгин Қиёфа рицарь,— хўш мактубни нима деб ёзамиз?

— Менга туҳфа этишни ваъда қилганингиз учта хўтикни беришини эконокангизга ёзишни яна унутиб қўйманг, мухтарам жаноб.

— Хотиржам бўл, унутмайман,— деб жавоб берди дон Кихот;— лекин мактубни нимага ёзсам экан? Қоғозимиз йўқ-ку. Балки қадимий одамлардек биз ҳам дарахт баргларига ёки мум тахтакачларга ёзишимиз керакдир, ундай десам, бу ерда ана шундай тахтакачларни топиш ҳам қоғоз топишдай қийин бир гап. Дарвоқе, миямга яхши фикр келиб қолди: тоғдан топиб олган ён дафтарчамиз бор, ундан икки-уч варақ тоза соҳифа топилади, албатта. Сен эса дастлабки учратган қишлоқда бирорта мактаб муаллимини ёки дьячокни\* топгин-да, хатни яхши қоғозга ҳусни хат билан кўчириб ёзишни буюргин; лекин эҳтиёт бўл, уни одатда қоғозни тирнаб, чаплаштириб ёзадиган мирзаларга бера кўрма, чунки уларнинг ажи-бужи хатини шайтоннинг ўзи ҳам ўқиёлмайди.

— Унда имзони нима қиламиз?— деб сўради Санчо.

— Амадис ўзининг мактубларига ҳеч маҳал имзо чекмаган,— деб жавоб берди дон Кихот.

— Бу-ку шунда-я,— деди Санчо,— аммо тилхатингизнинг тагида албатта имзонгиз бўлиши керак-да, борди-ю уни қайта кўчирилса эҳтимол, имзо қалбаки дейишлари мумкин, қарабсизки унда мен эшаксиз қолавераман.

— Ўз тилхатимга ўзим имзо чекаман, жияним имзомни кўр-

\* Христианлар черковидаги энг қуйи даражали руҳоний.



гач, лом-лим демай амримни бажо келтиради. Муҳаббатномага келганда, охирига: «Қазоси етгунча қулингиз бўлган Ғамгин Қиёфа рицарь» деб ёздир. Имзом қўлим билан чекилмас экан, бунинг аҳамияти йўқ. Чунки, хотирамга қараганда, Дульсинея на ёзишни, на ўқишни билади, бунинг устига умри бино бўлиб менинг на хатимни, на ёзувимни кўрган. Биз фақат бир-биримизга қараб қўя қоладик, шунда ҳам аҳён-аҳёнда бир. Виждоним ҳаққи қасамёд ётаманки, кўз нуримдан ҳам ортиқ севган маъшуқамни ўн икки йил мобайнида тўрт марта ҳам кўрмаганман. Унинг падари Лоренсо Корчуэло билан волидаси Альдонса Ногалеслар уни шу қадар жиддий тарзда тарбиялашганки, менинг термулиб қолишларимни у умуман пайқаманган бўлиши эҳтимолдан ҳоли эмас.

— Ие-ие-ие! — деб юборди Санчо. — Ҳали сеньора Дульсинея Тобосская Лоренсо Корчуэлонинг қизи — Альдонса Лоренсомиди?

— Ҳа, — деб жавоб берди дон Кихот, — у бутун дунёнинг маликаси бўлишга лойиқдир.

— Э, мен уни жуда яхши танийман, — хитоб қилди Санчо, — нимасини айтасиз. Қизмисан қиз-да ўзиям. Худо урсинки, бақватлилик ва эпчилликда қишлоқ йигитларининг ҳеч биридан камлиги йўқ! У жаҳонгашталиқ қилиб юрган ёки шунақа ниятда бўлган ҳар қандай рицарнинг адабини бериб қўяди. Турган жойимда тил тортмай ўлай агар, шундай кучлики, асти қўяверинг! Овози шунақанги ўткирки! Сизга мен бир нарсани айтиб қўяй, бир кун у қўнғироқхонамизга чиқиб олиб, отасининг далада ишлаётган баграklarини чақириб роса бақирди, улар ярим миля келадиган жойдан қизнинг товушини қўнғироқхона тақинасида тургандай аниқ эшитдилар. Энг яхшиси шундаки, у нозу карашмани билмайди, нуқул кулгиси қистайди, ҳар нарсага завқланаверади. Сеньор Ғамгин Қиёфа рицарь, энди мен сизга айтмоқчиманки, ўша қиз ҳақи телбалик қилишингиз мумкин ва кераккина бўлиб қолмай, муҳтарам жаноблари, балки умидсизланиш ва ҳатто ўзингизни осиб қўйишингизга ҳам асосли сабаблар бор. Бундан хабар топган ҳар қандай одам сизни тўғри қилибди деса керак. Мен уни анчадан буён кўрганам йўқ, жамолига назар ташлаш учун тезроқ йўлга тушгим келяпти. У анча ўзгариб кетган бўлса керак; чунки қизи тушмагур қачон қарама далада, очиқ ҳавода, жазирама офтобда, бундан эса кишининг туси тез бузилади. Лекин, сеньор дон Кихот, мен сизга бир ҳақиқатни очаман. Шу кунгача марҳаматли жаноблари ошиқ бўлган сеньора Дульсинеяни бирор малика ёки сиздек мўътабар зот юбориб келган ажойиб совғаларга лойиқ бирон эътиборли хоним деб ўйлаб, бунга қатъий ва қаттиқ ишониб лақиллаб юрган эканман. Чунки сиз унинг ҳузурига бискайликни, каторгачи тутқунларни юбордингиз, илгари ҳам кўпгина одамларни йўллагандирсиз, эҳтимолки муҳтарам жаноблари, мен яроқбардорлик хизматларига ўтгунимча анчагина ғалабаларга эришган бўлсангиз керак. Ахир ўзингиз яхшилаб ўйлаб кўринг, сеньора Альдонса Лоренсога,

яъни айтмоқчиманки Дульсинея Тобосская ҳузурига муҳтарам жаноблари ўзлари энган кимсаларни юбориб турибдилар ва юбораверадилар, улар Дульсинея Тобосскаянинг ҳузурига бориб, унинг олдида тиз чўкадилар, хўш бундан қизга нима фойда? Ахир улар қизнинг ҳузурига у зиғирпойларини толалаётган ёки уни саройда туяётган пайтда бориб қолсалар хунук бўлади-ку. Уни ана шунда, иш устида кўриб улар дарғазаб бўлишлари, совғангиздан эса, эҳтимол, қиз кулиши ҳамда хафа бўлиши мумкин-ку!

— Мен сенга неча марталаб айтдимки, ўтакетган маҳмадонсан деб, яна ўтмас зеҳнинг билан ақл ўргатмоқчи бўласан,— деди дон Кихот,— ўзингнинг ўта аҳмоқ, менинг бениҳоя доно эканлигимни очиқ-ойдин билиб олишинг учун, шуни билиб қўйгилки, романларда баён қилинадиган ҳамда шеърларда мадҳ этиладиган ҳамма графинялар билан қироличалар ҳамма олижаноб ва гўзал хонимлар аслида йўқ. Шеър бағишлаш мумкин бўлсин деб, ошиқ бўлишга, севишга лойиқ экан десин деб уларни шунчаки ўйлаб топадилар. Менинг Альдонса Лоренсони дунёда энг гўзал ва ақлли қиз, энг олиий насаб малика деб ўйлашимга ким тўсқинлик қила олади? Агар билмасанг билиб қўйишинг керак, Санчо, айниқса икки нарса ишқ-муҳаббат уйғотади; чинакам гўзаллик билан шон-шухрат, Дульсинеяда эса униси ҳам буниси ҳам бор. Гўзалликда ҳеч ким унга тенг бўлмайди, камдан-кам кишигина у сингари шон-шухрат орттирган. Хуллас, мен ҳақ гапни айтяпман, деб ҳисоблайман, чунки менинг тасаввуримда у шундай гўзал, шундай олижаноб тарзда гавдаланадики, на Елена, на Лукреция, на бошқа қадимий машҳур хонимлар унга тенг бўлмайдилар. Одамлар нима дейишса деяверишсин. Агар нодонлар менга танбеҳ берадиган бўлишса, унда донишмандлар мени мақтовга буркашди.

— Сиз мутлақо ҳақсиз, муҳтарам жаноблари,— деб жавоб берди Санчо,— фикрингизга қўшиламан, сиз донишмандсиз, мен эса эшакман. Ҳай, ҳай!.. «эшак» деган бу ярамас сўз нега оғзимдан чиқиб кетди-я, ахир осилган одамнинг уйида арғамчидан гап очишмайди-ку. Афтидан йўқотган эшагимни сира-сиранинутмасам керак. Хўп энди марҳаматли жаноблари, хатларни ёзиб, мени тезроқ жўнатинг, чунки вақт ўтиб кетяпти.

Дон Кихот ён дафтарчани олиб четроққа чиқди-да, диққат-эътиборини тўплаб, хат ёза бошлади. Хатни тамомлагач, Санчони чақирди-да, шундай деди:

— Менинг Дульсинеяга юбораётган мактубимга диққат билан қулоқ солиб, уни ёдлаб қолишга ҳаракат қил. Йўлда йўқолиб қолиши ҳеч гапмас. Тақдир менга акслик қилмоқда ҳар қандай қолга тайёр бўлиш керак.

Бунга Санчо шундай деб жавоб берди:

— Ҳа, муҳтарам жаноблари, уни икки ёки уч марта кўчириб ёзинг-да, менга, беринг, кейин ўзим уни бус-бутун етказаман. Лекин уни ёдлаб олишим мушкул, мени бундай машаққатдан халос этинг; хотирамнинг шундай абжағи чиқиб кетганки, баъзан

хатто ўз номимни ҳам унутиб қўяман. Лекин шундай бўлса ҳам ўқиб беринг, жуда соз ёзилган бўлса керак.

— Қани, нималар ёзганимга қулоқ сол, — деди дон Кихот.

*Дон Кихотнинг Дульсинея Тобосскаяга мактуби.  
Мўғтабар ва ҳукмдор сеньора!*

«О, болу шакар Дульсинея Тобосская, айрилиқ тиғидан юрагининг энг чуқур жойларигача яраланган рицарь, гарчанд ўзи сиҳат-саломатликдан маҳрум бўлса ҳам, сенга сиҳат-саломатлик тилайди. Агар чиройинг мени назарга илмаса, агар қадр-қимматинг менга қарши шайланса, агар нафратинг менга ҳалоқатни раво кўрса, мен бу аламни енга олмайман, чунки бу алам бедиво бўлибгина қолмай, деадад ҳамдир. Эй бағригош гўзалим, севикли рақибам сен мени гирифтор этган дилхасталикларни оқкўнгил яроқбардорим Санчо сенга тўла айтиб беради, агар мендан марҳаматингни аямасанг, мен сеникиман, борди-ю буни раво кўрмасанг, ихтиёринг ўзингда, унда мен ҳаётим билан видолашиб, сенинг қаҳринг ҳамда ўзимнинг оташин муҳаббатимни қаноатлантирурман.

*Қора ерга киргунча сенинг қулинг бўлган  
Ғамгин Қиёфа рицаринг.»*

— Бобомнинг умри билан қасам ичаманки, — деб хитоб қилди Санчо бу мактубни эшитаркан, — мен бунақанги дабдабали мактубни ҳеч эшитмаганман. Муҳтарам жанобларининг бунақанги усталик билан мактуб тўқишларини ва бу мактубга «Ғамгин Қиёфа рицарь» деган имзонинг жуда ўринли тушганини кўриб қотиб қоласан киши. Чин сўзим, марҳаматли жаноблари, иблиснинг худди ўзгинасисиз, билмаган нарсангиз йўқ!

— Жаҳонгашта рицарь, — деди дон Кихот, — ҳамма нарсани билиши керак.

— Энди муҳтарам жаноблари, — деб сўзида давом этди Санчо, — қоғознинг орқасига учта хўтик ҳақида ёзиб, аниқроқ имзо чекингким, токи сиз ёзганлигингиздан ҳар ким ҳам дарҳол хабар топсин.

— Жоним билан, — деб жавоб берди дон Кихот ҳамда ёзувини тугатгач, қуйидагиларни ўқиди:

*Сиз ким муҳтарам сеньора жияним, ушбу хатни олиб борган менинг яроқбардорим Санчо Пансага йўлга чиқишим олдидан сиз муҳтарамаларига қараб туришни тайинлаган ўша бешта хўтикдан учтасини инғом қилинг. Сизга буюраманки, мен бу ерда ундан олган учта эшак ўрнига, ўша учтасини беринг. Бу иш бажо келтирилгач ҳамда ундан тилхат олингач, у билан орамиз очик деб ҳисобланади. Сиерра Морена чангалзорларида, мазкур йилнинг йигирма иккинчи августида ёзилди.*

— Жуда соз,— деди Санчо,— қани, энди имзо чекинг, марҳаматли жаноблари.

— Имзо чекишнинг ҳожати йўқ,— деб жавоб берди дон Кихот,— жимжима чизсак бас, шунинг ўзи имзога ўтаверади; унга учта эмас, уч юзта эшак ҳам бераверади.

— Сиз муҳтарам жанобларига ишонаман,— деб жавоб берди Санчо,— энди бориб Росинантни эгарлай, унгача менга оқ фотиҳа беришга тайёрланиб туринг. Мен сиз марҳаматли жанобларининг қилмоқчи бўлаётган телба ҳаракатларингизга қараб ўтирмай, ҳозироқ йўлга тушаман. Мен ўшасиз ҳам сеньорага шунақанги ажойибот ва ғаройиботлардан гапириб бераманки, у ҳайратга тушади.

— Йўқ, Санчо, ақалли баъзи бир телба ҳаракатларимни тамошо қилишинг керак. Ана ўшандагина кўрганларингни ва ҳамма тўқиганларингни унга виждон азобисиз сўзлаб бера оласан. Лекин шунга амин бўлгилки, менинг телба ҳаракатларим сенинг ҳамма дофларингдан ошиб тушади.

— Худо ҳақи, муҳтарам жанобим, ўшаларни томоша қилишга мажбур этманг. Унда сизга шундай раҳмим келиб кетадики, албатта ҳўнграб йиғлаб юбораман, эшагимни ўйлаб шунчалар йиғладимки, бошларим хум бўлиб кетди, энди яна бошқатдан кўз ёши тўкишга кучим ҳам, мадорим ҳам қолмади. Борди-ю муҳтарам жаноблари менга бирор телбаликни кўрсатмоқ иштиёқида бўлсалар, эсларига келганини тезроқ кўрсатсинлар. Менга бунинг сира ҳожати йўқлигини ўзингиз биласиз. Ҳаммасини кўрсатаман десангиз, мен аввал маълум қилганимдек, олтин дақиқаларимиз бекор кетади. Қанчалик тез жўнасам, марҳаматли жаноблари кутаётган ўзларига муносиб хабарни шунча тез олиб қайтаман. Сеньора Дульсинейя шуни қатъий билиб қўйсинки, агар у сизнинг мактубингизга муносиб жавоб қайтармас экан, унда худо ҳақи қасам ичаманки, мушт ва шапа-лоқлар билан бўлса ҳам уни кўндираман. Афв этасиз, сиз муҳтарам зотдек машҳур жаҳонгашта рицарь битта шунақанги... аёлни деб ақлидан озади-ю, бунга чидаб бўладими. Лекин у менинг тилимни қичитмай қўяқолсин, йўқса, шундай гапларни тўкиб соламанки, на у, на мен омон қоламиз. Бунақа ишларни бошлаб ташлайман. У мени яхши билмайди, билганида-чи, менинг туғилган кунимда овқат емай, рўза тутган бўларди.

— Очиғини айтсам, Санчо, назаримда сен ҳам менга ўхшаб девона бўлиб қолганга ўхшайсан,— деди дон Кихот.

— Э, йўқ,— деб жавоб берди Санчо,— мен сира ҳам сиз муҳтарам жанобларига ўхшаган девона эмасман, лекин қизиққонликда сиздан ошиб тушаман. Келинг, бу гапни бас қилайлик. Яхшиси, айтинг-чи, марҳаматли жаноблари, мен қайтиб келгунча нимани тамадиқ қиладилар? Чўпонлардан овқат сўраб, ёки тортиб олишни мўлжаллаётганлари йўқми?

— Бундан хотиржам бўл,— деб жавоб берди дон Кихот,— олдимда энг лазиз таомлар турган тақдирда ҳам, мен барибир ана шу ўтлоқдаги гиёҳу ана шу дарахтларнинг мевасидан

бошқа ҳеч нарса емаган бўлардим. Менинг кўрсатадиган жасоратим — ҳеч нима емаслик ва ўзимни ҳар қанақанги муҳтожликка гирифтор қилишдир.

Бунга Санчо шундай деб жавоб берди:

— Нимадан хавотирланаётганимни, муҳтарам жаноблари, биласизми? Бу ер шундай ичкариликки, мен қайтиб келадиган йўлни тополмай қолсам керак.

— Сен бу ернинг белгиларини яхши эслаб ол,— деди дон Кихот,— мен бўлсам узоққа кетиб қолмасликка ҳаракат қиламан. Ҳа, айтгандай, адашиб қолмаслик ҳамда изни йўқотиб қўймаслик учун текисликка чиққунча буталардан кўпроқ кесиб ташлаб кетавер, қара, ҳамма ёқни бута босиб ётибди. Қайтаётганингда эса лабиринтдаги Тезейнинг ипи бўйлаб борилгандек, ана шу йўл кўрсатувчи шох-шаббаларни қоралаб мени топиб оласан.

— Хўп, шундай қиламан,— деб жавоб берди Санчо Панса.

Санчо биринчи бута новдасини синдириб олди, кейин дон Кихот унга оқ фотиҳа берди ва ниҳоят, улар аччиқ кўз ёши тўкиб ажралишди. Санчо Росинантга минди-да, отни эҳтиётлаш, ўзига қандай меҳрибонлик қилса унга ҳам худди шундай ғамхўрлик кўрсатиш тўғрисида дон Кихотдан топшириқ олгач, текислик томон жўнади. Лекин Санчо юз қадам ҳам йўл юрмай қайтиб келди-да, шундай деди:

— Гапингиз тўғри, марҳаматли жаноблари, мен сизнинг телбаларча ҳаракатларингиздан ҳеч бўлмаса биттасини кўришим керак экан, акс ҳолда кўрганман деб қасам ичиб гуноҳ қилган бўламан. Айтгандай, сизнинг энг катта телбалигингиздан хабардорман: бу муҳтарам жанобларининг шу ерда ёлғиз қолаётганларидир.

— Мен сенга ҳамisha шуни таъкидлаб келаётган эдим-да, Санчо,— деди дон Кихот.— Бир дақиқа шошмай тургин. «Ё танграм», деб ибодат қилмасингданок, мен сенга баъзи нарсаларни кўрсатиб бўламан.

Рицаримиз ортиқча ваъзхонлик қилиб ўтирмай, шоша-пиша фақат кўйлаги қолгунича ечинди-да, икки марта сакради, сўнг-ра икки марта боши билан ўмбалоқ ошди. Санчога шунинг ўзи кифоя эди; у ўз хўжайинининг қолган ҳаракатларини кўришни эп билмади-да, Росинантнинг бошини буриб, зудлик билан йўлга тушди.

## XX БОБ

### ДОН КИХОТНИНГ СИЕРРА МОРЕНАДА КЎРСАТГАН ЯНГИ ЖАСОРАТЛАРИ ҲАМДА САНЧО ПАНСАГА НИМА БЎЛГАНИ

Дон Кихот ёлғиз ўзи қолгач, ўмбалоқ ошиш ва сакрашни бас қилди, энг баланд чўққига чиқиб ўтириб олди-да, илгарилари бир неча бор хаёл сурган нарсалари тўғрисида яна чуқур ўйга чўмди. Кимга тақлид қилса яхши бўларкин, шиддаткор Роланд-гами ёки Маъюс Амадисгами?

— Роланд қўрқмас рицарь эди, — деб ўйлади у ўз-ўзича, — бу ҳаммага аён. Лекин унинг ҳамма фазилатларини бир ёққа қўйиб қўйликда, нима учун ва қандай қилиб ақлдан озганини таҳлил қилайлик. Маъшуқаси Анжелика ундан келишган ёш мавр Медосни устун кўрганини билиб қолган дақиқада ақлдан озганлиги ҳақиқатга яқиндир. Лекин менинг бошимга бундай иш тушмаган бўлса, унга қандай қилиб тақлид қилай? Менинг Дульсинея Тобосскаям энг олижаноб ва ҳимматли хоним, у менга ҳеч маҳал бевафолик қилмаган деб қасамёд эта оламан-ку, ахир. Агар бу борада шубҳаланиб, шиддаткор Роланд сингари телбалик қиладиган бўлсам уни бағоят хафа қилиб қўяман-ку. Айни вақтда шуни ҳам биламанки, Амадис Галльский телбаликка ҳам тушмай, ҳеч қандай золимлик ҳам қилмай ўзининг ошиқлиги билан бутун дунёга дoston бўлган. Унинг тарихида эҳмоқ қилинишича, сеньора Ориана унга, то менинг ўзим рухсат этмагунимча кўзимга кўринма, деб буюрган. Шунда Амадис қандайдир бир қаландарнинг кузатувида Пенье Побрега чиқиб кетган, ўзини худога топшириб, то тангри унинг аччиқ аламига шафқат қилмагунича кўз ёши тўкаверган. Агар бу рост бўлса (ростлиги турган гап), унда нега энди қип яланғоч ечиниб, ўзимга ҳеч зарари тегмаган дарахтларни синдиришим керак? Чанқаганимда ташналигимни бостирадиган бу сой сувини нега лойқалатишим керак? Шундай қилиб, яшасин Амадиснинг хотираси, ламанчлик дон Кихот ундан ўрнак олсин. Тўғри, менинг Дульсинеям мендан юз ўғиргани ҳам, мендан нафратлангани ҳам йўқ, бунга ўртамиздаги айрилиқнинг ўзи етарли эмасми? Шундай қилиб, тезроқ ишга киришиш керак! Хотирам! Амадиснинг шонли ишларини ақлимга сол! Ана шу машҳур рицардан ибрат олиб ишни нимадан бошлашим кераклигини ўргат. У ўзини худога топшириб бетиним сиғингани ёдимда. Демак, дарҳол сиғинишга киришишим керак. Аммо тасбеҳни қаердан олсам экан?

Бироқ у бу масалани тез ҳал қилди: кўйлагининг этагидан тасмадай бир парчасини йиртиб олди-да, биттасини каттароқ қилиб ўн битта тугунча тугди, тасбеҳ ҳам тайёр бўлди. У Сиерра Морена тоғларида бўлган пайтида ана шу тугунчалар ёрдамида миллионлаб дуоларни ўқиди. У фақат бир нарсадан хижолат чекарди — уни гуноҳларидан халос этиб, кўнглига таскин бергувчи қаландарни топиб бўлмасди бу ердан. Аммо дуо ўқиб, тавба-тазарру қилишдан бошқа илож йўқ эди. У қолган вақтини ўтлоқда сайр этиб, оҳу фиғонли шеърлар ёки Дульсинеяни улуғлаб мадҳиялар тўқиш билан ўтказди. У ўзининг бу шеър ва мадҳияларини дарахтлар танасига ўйиб ёки қумларга чизиб ёзарди. Ёзган ҳамма шеърларидан фақат биттаси сақланиб қолган:

Атрофимда бўй чўзган қатор  
Яшил дарахт, майса, ўт-ўлан.  
Қизиқмайсиз наҳотки бир бор  
Шўрлик ошиқ дардлари билан.

Менинг ғамгин ўйларим сизга  
Ташвиш солмас заррача ахир.  
Тобосолик Дульсинядан  
Айри тушиб шўрлик дон Кихот  
Кўз ёш тўкар аччиқ ва тахир.  
Ҳайдаб келди шафқатсиз қисмат  
Ишқ хазонин яйдоқ маконга.  
Бу изтироб истайди фақат,  
Билмас аммо нечун, қай жонга?  
Эрот ичра чекади азоб,  
Бардош қилмай нетади ахир?  
Тобосолик Дульсинядан  
Айри тушиб шўрлик дон Кихот  
Кўз ёш тўкар аччиқ ва тахир.

У кўп ваҳший қоялар аро  
Излар экан ором ва юпанч,  
Тақдир лекин аямай асло  
Бошга солди изтироб ва ранж.  
Фигонига ҳатто Амур ҳам  
Зарра парво қилмайди ахир.  
Тобосолик Дульсинядан  
Айри тушиб шўрлик дон Кихот  
Кўз ёш тўкар аччиқ ва тахир.

У вақтини ибодат қилиш, тавба-тазарру, шеър тўқиш, нолаю фиғон чекиб азиз-авлиёларга сиғиниб, оҳу зорига етишларини ва ҳаста кўнглига таскин беришларини илтижо қилиш билан ўтказа бошлади. Шунингдек, у еса бўладиган турли-туман гиёҳларни қидириб топди, бундан бошқа тамадди қиладиган нарсанинг ўзи йўқ эди. Борди-ю Санчо уч кундан кейин эмас, балки уч ҳафтадан кейин қайтганида у Ғамгин Қиёфа рицарни шундай озиб-тўзиб кетган, ҳатто туққан онаси ҳам таниёлмайдиган ҳолда учратармиди.

Энди эса шеър ёзиш ҳамда нолаю фиғон чекишга шўнғиб кетган рицаримизни шу ерда қўя туриб, Санчо Панса ўз хўжайини билан хайрлашиб, унинг топшириғини бажариш учун йўлга чиққанидан кейин бошидан нималарни кечирганини ҳикоя қилиб берамиз. Санчо Сиерра Морена тоғ оралиғидан чиқиб олгач, Тобосога олиб борадиган йўлни қидира бошлади. Кутилмаганда яқиндагина ўзи чойшабда осмонга итқитилган карвонсаройдан чиқиб қолди. Овқатланадиган пайт эди. Санчонинг бирор иссиқ овқат еб олгиси келди, шу ниятда у дарвоза томон юрмоқчи бўлди-ю, лекин бу карвонсаройда ўзини роса калака қилишганини эслаб, иккиланиб туриб қолди. Ҳавода ўмбалоқ ошиб кетгани бирдан кўз олдида яққол гавдаланди. У нима қилсам экан деб тараддудланиб турганида дарвозадан икки киши чиқиб қолди, иккови ҳам Санчони дарҳол таниди. Улардан бири ўз ҳамроҳига мурожаат қилиб гап қотди:

— Сиз нима дейсиз: сеньор лицензиат, анови Санчо эмасми? Ахир у саргузашт қидирувчимиз билан бирга жўнаб кетган деган эди-ку дон Кехананинг экономкаси.

— Худди ўшанинг ўзи,— деб жавоб берди лицензиат,— остидаги ҳам идальгонинг оти.

Улар Санчони дарров танишди; чунки улар дон Кихотнинг китоблари устидан суд ўтказган ўша руҳоний билан сартарошнинг худди ўзи эди. Панса билан Росинантни таниб, улар дон Кихотдан хабар топиш учун шу заҳотиёқ Санчонинг олдига келишди. Руҳоний Санчо Пансага шундай деди:

— Хўжайинингиз қаерда, дўстим Санчо Панса?

Санчо ўз хўжайинининг қаерда ва қандай аҳволда қолганини улардан яширмоқчи бўлди, шунинг учун хўжайинининг жуда муҳим иш билан банд эканини, лекин бунинг қандай иш эканини ҳатто кўзини ўйиб олишса ҳам айтолмаслигини билдирди.

— Башарти сиз, Санчо Панса,— деди сартарош,— унинг қаерда эканини бизга айтиб бермасангиз, сиз уни ўлдириб бори ўғини шилиб олгансиз деган фикрга келамиз, бунинг устига унинг отини миниб олибсиз. Бу қирчангининг хўжайинини бизга топиб беринг, йўқса ишингиз чатоқ бўлади.

— Менга бекорга пўписа қиялмасизлар,— деб хотиржамлик билан жавоб берди Санчо Панса.— Мен бировни ўлдирадиган ёки шилиб оладиган одамлардан эмасман. Ҳар ким пешанасига ёзиб қўйилган пайтда ёки тангрининг ўзи буюрган пайтда ўлаверсин. Менинг хўжайиним тоғларда юрибди, у ерда бутун вужуди билан тавба-тазарру қияпти.

Шу ондаёқ Санчо дон Кихот билан ўзининг нималарни бошдан кечирганларини ҳамда хўжайинини қаерда қолдириб келганини бидирлаб, лаби лабига тегмай гапириб ташлади. Гапнинг охирида Лоренсо Корчуэлонинг қизи бўлмиш сеньора Дульсинея Тобосскаяга мактуб олиб бораётганини айтиб, уни ўз хўжайини қулоғига севиб қолганини илова қилди. Санчонинг ҳикоясидан руҳоний билан сартарош хайратда қолдилар. Улар гарчанд дон Кихотнинг девоналиги ҳамда унинг рицарлик фантазияларидан хабардор бўлсалар ҳам, лекин унинг қилган ишларини эшитганларида ажабланмай қололмадилар. Улар Санчо Пансадан дон Кихотнинг Дульсинея Тобосскаяга ёзиб юборган мактубини кўрсатишни илтимос қилдилар. Санчо бу мактубнинг ён дафтарга битилганини, ўзи эса йўлда дастлаб учратган қишлоқда уни алоҳида қоғозга кўчириш учун бериши тўғрисида топшириқ олганини айтди. Шунда руҳоний, агар Санчо мактубни кўрсатса уни чиройли қилиб кўчириб беришини айтди. Санчо Панса ён дафтарчани оламан деб кўлини қўлтиғига тикди-ю, лекин тополмади, чунки дафтарча дон Кихотда қолган эди: дон Кихот мактубни Санчога беришни унутиб қўйган, Санчо эса уни беришни дон Кихотнинг ёдига солишни хаёлига ҳам келтирмаганди.

Шунда Санчонинг ранги мурдадай оқариб кетиб, ҳамма чўнтақларини бирма-бир титкилай бошлади. Дафтарча йўқлигига кўзи етгач, мутлақо ўзини йўқотиб қўйди. Умидсизланганидан



икки қўли билан соқолини юла кетди, кейин эса ўз-ўзига кетмакет қаттиқ тарсаки тортиб юборди.

Буни кўриб таажжубланган руҳоний билан сартарош ундан нега ўзини-ўзи қийнаётганини, нима гап бўлганини суриштиришди.

— Сенга нима бўлди дейсизларми? — деб жавоб берди Санчо. — Шундай бўлдики, мен бир дақиқада ҳар қайсиси бир қалъа нархи билан баробар турадиган учта хўтикни қўлдан бердим.

— Нималар деяпсиз? Бир вақтда, бунинг устига бир йўла учта хўтикни қандай қилиб қўлдан бериб қўйдингиз? — деб сўради сартарош.

— Мен ён дафтарчани йўқотиб қўйдим, — деди Санчо, — унда Дульсинеяга аталган мактубдан ташқари хўжайиним ёзиб берган хат ҳам бор эди, ана шу хатни кўриб унинг жияни менга учта хўтикни бериши керак эди.

Санчо уларга ўз эшагининг йўқолганини гапириб берди. Руҳоний эса Санчонинг хўжайини топилгач, уни ўз ваъдасининг устидан чиқиб яна бир тилхат ёзиб беришга, лекин бу гал алоҳида қоғозга ёзиб беришга кўндиришга ваъда қилиб, уни юпатди. Ён дафтарчадаги тилхатнинг барибир ҳеч қандай қонуний кучи йўқ, деди.

Шундан кейин Санчонинг кўнгли жойига тушди.

— Дульсинеяга ёзилган мактубнинг йўқолганидан унча хафа эмасман, — деди у, — мен бу мактубни деярли эслаб қолганман ва ҳар қандай мирзага ҳам ёддан айтиб бера оламан.

— Ундай бўлса бизга айтиб беринг, Санчо, — илтимос қилди сартарош, — ёзиб оламиз.

Санчо Панса бошини қашиди, аввал осмонга, кейин ерга қараб олди, бармоғини тишлаб турди-да, ниҳоят, оғзини тоқатсизлик билан пойлаб турган тингловчиларни бир оз қийнагач, қичқирди:

— Э, ақлгинам қурсин, сеньор лицензиат! Бу бемаъни мактубни ҳозиргина ипидан игнасиғача эслаб турган эдим, худди атайлаб қилгандек, бирданига хаёлимдан кўтарилди. Унинг: «Мўътабар ва ҳар ким сеньора», деб бошланганини биламан, холос.

— Янглишяпсиз шекилли, Санчо, — деб эътироз билдирди сартарош, — «ҳар ким» деб ёзган бўлиши мумкин эмас. Мактубда ё «ҳаким» ё «ҳоким», деб ёзилган бўлиши керак.

— Ҳа, ҳа, худди шундай, — бунга қўшилди Санчо, — эсимда бўлса, кейин «қаттиқ қўл ва номашҳур сиздек муҳтарама гўзалнинг қўлларини мен жулдур ва уйқусиз ўпаман» деб, яна унга сиҳат-саломатлик тилагани ва нималардир жуда яхши баён қилинган эди, мактубнинг охирида эса: «Сизнинг тобутдан Ғамгин Қиёфа рицарингиз», деган сўзлар бор эди.

Бундан руҳоний билан сартарош нақ ичаклари узилгудай қотиб-қотиб кулишаркан, унинг хотирасини роса мақташди ва мактубни эслаб қолиш ҳамда ёзиб олишлари учун яна икки марта такрорлашни илтимос қилдилар.

Санчо бир қоп ҳар хил лопларни тўқиб, мактубни яна бир не-

ча марта такрорлади. Кейин у ўз хўжайинининг барча қилиқларини гапириб берди, ўзини эса бу ерда чойшабга солиб осмонга улоқтирганлари ҳақида индамай қўяқолди. Охирида, мабодо сеньора Дульсинея Тобосская кўнгилдагидек жавоб қайтарса, хўжайини янги саёҳатга чиқажаги ҳамда албатта император ёки ҳеч бўлмаганда қироллик тахтига минаяжи,— ҳа, улар ўзаро ана шундай келишиб олишганди,— агар дон Кихотнинг жасорати ва қудрати эътиборга олинса, бунга эришиш ҳеч гап эмас эканлиги ҳақида сўзлади. Бу нарса содир бўлиши биланоқ хўжайини Санчони бадавлат ва бепоён мулки бўлган бирор амалдорнинг вориси, император ҳузуридаги хонимлардан бирортасига уйлантириб қўяди (унгача Санчо тул бўлиб қолади, албатта, бундан ўзгача бўлиши ҳам мумкин эмас). Бу эса чор атрофи сув билан ўралган орол ва оролчалардан минг марта афзал-да. Буларнинг ҳаммасини Санчо шу қадар бепарволик ҳамда шу қадар аҳмоқона кўриниш билан гапирдики, тингловчилар яна таажжубланиб, бу бечора ҳам дон Кихотнинг алаҳлашидан заҳарланиб, ақлдан озган бўлса, хўжайинининг телбалиги бадтар ошибди-да, деб ўйланиб қолдилар. Руҳоний билан сартарош Санчони яхши умидларидан ҳафсаласини пир қилмаслик учун унинг қайноқ сўзларидан завқланганларини билдирдилар ва дон Кихотнинг сиҳат-саломатлигини сўраб худога сиғинишни маслаҳат бердилар, хўжайиннинг епископлка ёки бирор катта лавозимга кўтарилишдан кўра императорлик тахтига миниш орзусига осонроқ муяссар бўлиши мумкин, деб қўшиб қўйишди. Бунга Санчо шундай жавоб берди:

— Сеньорлар, бир нарсани билиб олмоқчиман, борди-ю тақдир ўз ишини чаппасига айлантириб, хўжайиним император эмас, балки епископ бўлишни хоҳлаб қолса, унда жаҳонгашта епископлар ўз яроқбардорларини нима билан тақдирлайдилар?

— Одатда улар ўз яроқбардорларини, — деб жавоб берди руҳоний, — черковнинг бирор сердаромад лавозими билан тақдирлаб, руҳоний ёки хўжалик бошлиғи қилиб тайинлайдилар.

— Бунинг учун, — деб эътироз билдирди Санчо, — яроқбардор уйланмаган бўлиши ҳамда ҳеч бўлмаганда ибодат вақтида хизмат қила билиши шарт-ку, ундай бўлса мен бечоранинг шўримга шўрва тўкилди деяверинг! Ахир менинг хотиним бор-ку! Бунинг устига алифни таёқ дейман-у, қандай ибодатга ярайман. Хўжайинимнинг миясига жаҳонгашта рицарлар каби ҳамда уларнинг изидан бориб император бўлиш ўрнига епископ бўлиш фикри келиб қолса, унда менинг ҳолим нима кечади?

— Қуйинманг, дўстим Санчо, — деди сартарош, — биз хўжайинингиздан епископ эмас, император бўлишини илтимос қиламиз. Қалбига илмдан кўра ҳарбий эрмак яқин бўлгани учун унга епископлик кулоҳидан кўра императорлик тожи кўпроқ ярашади.

— Мен ҳам шундай деб ўйлаган эдим, — деб жавоб берди Санчо, — лекин сизларга айтиб қўяй, хўжайинимнинг қўлидан ҳамма нарса ҳам келади. Бошимга бир фикр келиб қолди: худога илтижо қилиб хўжайинимни тўғри йўлга солишини тилайман, бу йўлда у

ҳам шон-шухрат қозонсин, ҳам мени катта-катта совғалар билан мукофотласин.

— Сиз жуда оқилона гапиряпсиз,— деди руҳоний,— яхши христиандек иш туяпсиз. Энди эса биз хўжайинингизни сиз айтгандек у берилиб кетган бефойда тавба-тазаррудан қутултириш чорасини кўришимиз керак. Буни қай йўсинда амалга ошириш кераклигини ўйлаб кўриш учун, юринглар, карвонсаройга киримиз. Бунинг устига анча кеч бўлиб қолди, овқатланиш пайтимиздан ҳам анча ўтиб кетди.

Санчо, сизлар кираверинглар, мен сизларни дарвоза олдида кутиб тураман, деди. Ўзининг карвонсаройга нимага киргиси келмаётганини кейин тушунтириб беришини айтди. Улардан фақат ейиш учун бирор иссиқ овқат, айтгандай, Росинантга сули олиб чиқиб беришларини илтимос қилди. Руҳоний билан сартарош қўноқхонага киришди-да, бир неча дақиқадан кейин Санчога овқат олиб чиқиб беришди, кейин эса ўзлари бечора идальгони қандай қилиб уйга қайтишга кўндириш кераклиги ҳақида бош қотира бошлашди, чунки унинг тақдирида ўзларининг катта ҳиссалари бор. Ниҳоят, руҳонийнинг миясига бир фикр келди. Бу дон Кихотнинг кўнглига ўтирадиган, ўзларига ҳам жуда қўл келадиган фикр эди: у сартарошга ўзининг жаҳонгашта малика бўлиб кийиниб олишини, сартарош эса унинг яроқбардори бўлажagini айтди. Улар шу киёфада дон Кихотнинг олдида — тоғларга жўнашади. Ҳақоратланган ва бор-йўғидан маҳрум қилинган қиз ҳимоя сўраб дон Кихотга мурожаат этади. Қиз рицарга ялиниб-ёлвориб, уни таҳқирлаган ёвуз сеҳргардан ўч олиб бериш учун дон Кихотни қаерга олиб борса ўша ерга боришини сўрайди. Бундан ташқари у то дон Кихот ўзининг ана шу илтимосини бажо келтирмагунича юзидан ниқобини олмаслик ҳамда саволларига жавоб бермасликка ижозат беришини илтимос қилади. Дон Кихотнинг бу тузоққа илинишига ва шу йўл билан уни ўз ватанига қайтариб олиб кетишга муваффақ бўлишларига қатъий ишонарди руҳоний, у ерга боргандан кейин эса унинг ғаройиб телбалигининг олдини оладиган бирорта дори-дармон топиш ҳақида ўйлашиб кўрадилар.

## XXI БОБ

### ДОН КИХОТНИНГ ЎЗИНИ ЎЗИ МАЖБУР ЭТГАН ТАВБА-ТАЗАРРУДАН ҚАНДАЙ ХАЛОС БУЛГАНИ

Руҳонийнинг режаси сартарошга ёқиб тушди, улар шу заҳотиёқ ишга киришишди. Карвонсарой бекасидан битта юбка билан рўмол сўраб олишди, гаровга эса руҳонийнинг янги либосини қолдиришди. Сартарош ўзига қорамтир буқа думидан узун соқол ясаб олди. Бу дум қўноқхона деворида илиғлик турар, хўжайин эса унга тароғини қадаб қўйишга одатланиб қолганди, бека уларга бу кийим-бош нимага кераклигини сўраб қолди. Руҳоний унга дон Кихотнинг телбалигини, уйдан қочиб кет-

ганлигини, саргузашт қидириб узоқ вақтлардан бери санғиб юрганини айтиб берди.

— Ҳозир бечора идальго,— деб тамом қилди руҳоний ўз ҳикоясини,— сизнинг қўноқхонангизга яқин бўлган тоғ оралиғида дарбадар бўлиб юрибди. Биз уни ўша ердан алдаб уйига олиб кетишга қарор бердик. Бунинг учун эса иккаламиздан биримиз аёл киши бўлиб кийиниб олишимиз керак.

Бу ўз уйларида малҳам тайёрлаган ўша жинни эканини хўжайин билан бека дарҳол пайқаб олишди. Улар ўз қўноқхоналарида содир бўлган ҳамма воқеани, гап орасида рицарнинг яроқбардорини чойшабга солиб, осмонга улоқтиришганини ҳам руҳонийга сўзлаб беришди. Руҳоний билан сартарош Санчонинг зўр бериб яширган сирини ана шундан билиб олишди. Уларнинг режасини астойдил маъқуллаган бека руҳонийни бошлаб ясантирди: унга эни қафтдек келадиган қора духобадан йўл-йўл гул солиб тикилган ҳамда оппоқ ипак шокилалаи кўк духоба белбоғ танғиб қўйилган мовут юбкани кийгизди. Руҳоний рўмол ўрнига ўзининг тунги қалпоғини бостириб кийди-да, пешанасини бир парча қора шойи билан танғиб, яна бир парча қора шойини ёноқлари билан соқолини беркитадиган ажойиб ниқоб қилиб тутиб олди. Сўнгра у каттакон бир шляпани бостириб кийиб олдики, бу шляпа ҳатто соябон ўрнини боса оларди. Кейин плашга ўралиб, хачирга хотинчасига минди. Буқа думидан ясалган қора соқоли белига тушган сартарош эса иккинчи хачирга минди. Улар ҳамма билан, ўйлаган ишлари муваффақиятли тугаши учун тасбеҳнинг ҳар донасини ўгирганда биттадан дуо ўқишга ваъда берган хушфёъл Мариторнес билан ҳам хайрлашдилар. Балки худо бу гуноҳкор аёлнинг нидосини эшитар ҳамда ўзларининг қийин ва чинакамига христианлик ишларида уларга мадад қўлини чўзар. Бироқ улар карвонсаройдан чиқар-чиқмас, руҳонийнинг хаёлига бундай кийим кийиб аҳмоқона иш қилаётгани келди, чунки руҳоний одамга энг яхши эзгу ният йўлида ҳам хотин киши бўлиб кийиниши муносиб эмас. У буни сартарошга айтди ва ролларини алмашишни илтимос қилди, чунки сартарошнинг таҳқирланган қиз, руҳонийнинг эса яроқбардор бўлгани дуруст: ана шунда, ҳар ҳолда, у ўз мансабини камроқ камситган бўлади. Улар бу ҳақда баҳслашишаркан, олдиларига Санчо Панса етиб келди, уларнинг қандай кийиниб олганини кўриб, хахолаб юборди. Бу кулги руҳонийга қаттиқ тегди, сартарошга ролларини алмаштириш зарурлигини янада зўр бериб исботлай бошлади. Ниҳоят, сартарош бунга рези бўлди, лекин дон Кихот яширинган дарага етиб бормагунларича кийимини ўзгартирмаслигини айтди. Шундан кейин руҳоний сартарошга дон Кихотни эргаштириб кетиш учун ўзини қандай тутиши зарурлигини мукамал тушунтира кетди.

Бу гаплар ахир Санчони зериктирди. У олдинроқ бориб дон Кихотни топиб туришни таклиф қилди. Муғомбир яроқбардор Дульсинеяга мактуб эсон-омон олиб бориб берилганини, у эса, илтифот қилмай қўйишимдан чўчиса, рицарь шу ондаёқ менинг

ҳузуримга келсин, деб ўзи, яъни Санчо орқали буюриб юборганини хўжайинига айтиб, уни алдашни кўзлаган эди.

— Дон Кихотни яширинган жойидан чиқишга кўндириш учун,— деб илова қилди Санчо,— балки шунинг ўзи етарлидир. Унда, муҳтарам жаноблари, ўзларини қийнаб ўтирмайдилар.

Дўстларимизга бу маслаҳат жуда маъқул тушди; улар Санчонинг таклифига сира иккиланиб ўтирмай рози бўлишди. Ўзлари сал кечроқ йўлга тушишларини ва у буталар шох-шаббасини сочиб келган дарада тўхташларини Санчо билан келишиб олишди. Улар етиб боргунларича Санчо дон Кихотни қидириб топиши ва у билан гаплашиб олгач, руҳоний ва уста Николаснинг йўлига чиқиб туриши керак. Санчо ўз ҳамроҳларига қайси йўлдан бориш маъқуллигини батафсил тушунтирган, отини йўрғалатиб кетди, дўстларимиз эса қолган вақтда ҳаракат режасини яна бир марта аниқ муҳокама қилиб олиш учун карвонсаройга қайтишди.

Шу орада руҳонийнинг қайта кийиниш воқеаси қўноқхонада турган ҳамма одамнинг эътиборини тортди. Улар орасида тасодифан бир чиройли жувон ҳам бор эди, у йўл-йўлакай қўноқхонага тушган эди. Бека унга руҳонийнинг режаси ҳақида биланларини айтиб берди, бу саргузаштга гоят қизиқиб қолган сеньора ана шу режа билан аниқ танишиб олмоқчи бўлди.

Дўстларимиз унга шўрлик идальго тарихини бажонидил ҳикоя қилиб беришди. Айни вақтда улар рицаримизни ростгўй, оққўнгил ва жасур одам сифатида роса мақташди. Доротея исмли бу ёшгина йўловчи жувонга бу ҳикоя жуда таъсир қилди. Унинг ўзи ҳам рицарлик романларини севар, Амадис билан Роланднинг жасоратларига қойил қоларди. Шунинг учун ҳам шўрлик дон Кихот воқеаси унинг юрагига шундай бориб қадалдики, натижада дўстларимизга уларнинг олижаноб ишларида ёрдам беришга қатъий иштиёқ билдирди.

— Ишонаманки,— деб илова қилди у, руҳонийга кулиб туриб мурожаат қилар экан,— таҳқирланган аёл ролини мен сиздан яхшироқ ўйнасам керак. Бунинг устига қиз бола жаҳонгашта рицардан мадад сўраганида қандай гапиришини мен жуда яхши биламан.

Доротея ҳозир шайланиб чиқишини айтди-да, беканинг хонасига кириб кетди. Бир неча дақиқадан кейин у эгнига қимматбаҳо матодан тикилган чиройли кўйлак, ажойиб кўм-кўк газламадан мангиля\* кийиб, бўйнига маржон, қўлларига билангузуклар тақиб саёҳатчиларимиз ҳузурига чиқиб келди. Унинг латофати ва гўзаллигидан ҳаяжонга келган руҳоний билан сартарош ҳаяллаб ўтирмай, шу топдаёқ Санчо Панса билан учрашиладиган жойга жўнашга қарор беришди.

Эртасига улар белгиланган жойга етиб келишди ҳамда Санчони кутиш мақсадида қоялар билан дарахтларнинг ҳузурбахш соясида сокин сой оқиб ўтадиган кўкатзорга қўнишди. Анча

\* Аёлларнинг елкага ташлаб юрадиган енгисиз калта кийими.

вақт кутишга тўғри келди. Руҳоний билан сартарош эса, Санчо нега бунчалик ушланиб қолди-я, деб ташвишлана бошлашди. Ниҳоят, улар қандайдир қаттиқ қичқирикни эшитиб, Санчонинг овозини танишди. Руҳоний Санчонинг истиқболига юрди; унинг ташвишланиб дон Кихот қаерда, деб берган саволига содиқ яроқбардор ўз хўжайинини битта кўйлақда, сомондай саргайиб, тинка-мадори қуриб, очликдан ўлай деб қолган, ўз маликаси Дульсинеяни соғиниб оқ тортиб ётган ҳолда топганини айтди.

— Мени кўриб сеньор рицарь жуда хурсанд бўлиб кетди, — деб сўзида давом этди Санчо, — лекин Дульсинея унга у ерларни тарк этиб, тезда Тобосога йўл олишга буйруқ берди, деганимда у гўзалига муносиб жасорат кўрсатмагунича унинг ажойиб кўзларига кўринишга бетлай олмаслигини айтди. Агар аҳвол шу тариқа давом этаверса, — деб илова қилди Санчо Панса, — хўжайинимнинг сира ҳам император бўла олмаслиги хавфи туғилади, менинг эса юксак унвон билан бойликка бўлган умидларим пучга чиқади. Шунинг учун ҳам уни бу хилват жойдан олиб чиқиб кетиш йўлида бирор восита ўйлаб топиш шарт.

Руҳоний ҳар қандай йўл билан бўлса ҳам дон Кихотни бу ердан олиб кетамиз деб Санчони юпатишга киришди.

Руҳоний билан Санчо Панса шу кўйи гаплаша-гаплаша сартарош билан Доротея қолган жойга етиб келишди. Доротеянинг беқиёс чиройидан ҳамда тўқис либосидан ҳайратланган Санчо бу гўзал сеньоранинг кимлигини, бу одам оёғи етмаган жойларда нима қилиб юрганини руҳонийдан суриштира бошлади.

— Бўтам Санчо, — деб жавоб берди руҳоний, — бу аёл буюк Микомикон қироллигининг валиаҳд маликаси, у ўзини ҳақоратлаган ёвуз девдан ҳимоя қилишини сўраб, сизнинг хўжайинингизни излаб келган. Оқкўнгил рицарь дон Кихотнинг доврuginи эшитиб, уни излаб Гвинеядан келган.

— Мана буниси қойил! Жуда соз, — хитоб қилди Санчо Панса, — агар хўжайиним муҳтарам жаноблари айтаётган ўша ёвуз девни ўлдириб, ёмонликни даф этиб хонимнинг аламини олса яна ҳам соз бўлади. Агар ўша махлуқ шарпа бўлмаса, дон Кихот уни биринчи олишувдаёқ ўлдириб қўйса керак, чунки хўжайиним шарпалар устидан ҳокимлик қилишга ожиз. Лекин сиз марҳаматли жанобларидан бир илтимосим бор, сеньор лиценциат, хўжайинимнинг бошига тагин епископ бўлиш нияти келмасайди деган хавотирдаман, шунинг учун сиз, муҳтарам жаноблари, унга, шу маликага тезроқ уйлан, деб маслаҳат беринг. Ана ўшанда уни ҳеч ким епископлик мансабига ўтказолмайди, у ҳам осонлик билан қироллик тахтига эга бўлади, менинг орзуларим ҳам ушалади. Мен ҳаммасини яхшилаб ўйлаб чиқдим ва борди-ю, хўжайиним епископ бўлса бу менинг катта кулфатим бўлади, деган қарорга келдим, чунки мен черков хизматига ярамайдиган одамман, ваҳоланки уйланганман, бола-чақам бор. Хотинимни қўйишим мумкин, албатта, лекин бунинг учун кўп вақт овораю саргардон бўлиш керак. Шу сабабли агар хўжайиним тезроқ ана шу

сеньорага уйланса бағоят маъқул иш қилган бўларди. У муҳтарам хонимнинг исми шарифларидан беҳабарлиги туфайли қандай улуглашни ҳам билмайман.

— Уни,— деб жавоб берди руҳоний,— ўз қироллиги номи билан қиролича Микомикон деб аташади.

— Тушунаман,— деди Санчо,— номлари ўз туғилган жойлари билан аталган одамларни кўп учратганман, масалан, Педро де Алькала, Хуан де Убеда, Диэго де Вальядолид: Гвинеяда эса қироличалар ўз қиролликлари номи билан аталсалар керак, у ерда одат шунақадир балки.

— Эҳтимол шундайдир,— деди руҳоний,— хўжайинингизни уйлантиришга келганда эса, уни қироличага уйланишга кўндириш учун қўлимдан нимаики келса ҳаммасини қиламан.

Санчо руҳонийнинг ваъдасидан тўла қаноатланди, руҳоний эса Санчонинг соддадиллигидан, бунинг устига хўжайинининг телбалиги унга шу қадар тез юққанидан ажабланмай қололмади. Бу орада Доротея руҳонийнинг хачирига миниб олди, сартарош эса буқа думидан қилинган соқолни боғлаб олди; кейин Санчога рицарнинг олдида руҳоний ва уста Николас билан учрашганини тилга олишни қатъий ман этиб, ундан дон Кихотнинг олдига бошлаб боришни сўрашди.

Санчо индамасликка тантанали ваъда берди ва Доротея ўз ҳамроҳлари билан йўлга тушди. Улар чорак кам бир миля ҳам юришмасданок, қоялар орасидаги аллақачон кийиниб олган, лекин қуролииз рицаримизни кўриб қолишди. Доротея Санчо Пансадан бу одам унинг хўжайини эканини билиши биланок хачирини дон Кихот томонга дадил ҳайдади, соқолли сартарош ҳам унинг кетидан бораверди. Улар дон Кихотнинг олдига етиб боришганида яроқбардор хачирдан тушиб, Доротеяга тушишга ёрдам бериш мақсадида унга яқин борди. Бироқ Доротеянинг ўзи хачирдан эпчиллик билан сакраб тушди-да, дон Кихотнинг олдига бориб тиз чўкди, бундан жуда ҳайратланган рицарь уни ердан кўтармоқчи бўлди, лекин у ўрнидан турмай рицарга шундай деди:

— О довьорак ва қудратли рицарь, саховатингиз ҳамда меҳрибонлигингиз билан мендай таҳқирланган, дилхаста бир маллакка қатта таянч бўладиган шафқат кўрсатиб, мени бахтиёр қилмагунингизча ўрнимдан турмайман. Башарти жанговар шон-шавкатингиз сўнмас шуҳратингиздан қолишмаслиги рост бўлса, машҳур номингиз довруғига мафтун бўлиб узоқ мамлакатлардан келган ва бошига тушган мусибатлардан халос этишингизни сиздан ўтиниб сўраётган бир бахти қаро мазлумага ёрдам қўлингизни чўзишга мажбурсиз.

— Эй, гўзал хоним! — деди дон Кихот.— Сизни ердан кўтариб олишимга рози бўлмагунингизча, мен сизга жавоб ҳам қайтармайман, гапингизга қулоқ ҳам солмайман.

— Йўқ, сеньор,— деб жавоб берди сохта малика,— менга ҳойий бўлишга ваъда бермагунингизча мен ўрнимдан қўзғолмайман.

— Гўзал хоним, бунинг бир шарти бор, агар сизга берадиган ёрдамим ва ҳомийлигим менинг қиролимга, менинг ватанимга, менинг қалбим билан озодлигим калитига эга бўлган маликага бирон зиён-заҳмат етказмасагина шундай қиламан, деб сизга рицарчасига ваъда бера оламан.

— Қасамёд этаманки, бундан уларга ҳеч қандай зиён етмайди,— деб жавоб берди Доротея.

Шу вақт Санчо ўз хўжайинининг ёнига борди-да, қулогига шивирлади:

— Муҳтарам жаноблари унга ўз ҳомийликлари ва ёрдамларини бемалол ваъда қилиб юбраверишлари мумкин, чунки бу сариқ чақага ҳам арзимайдган нарса: атиги битта дени ўлдириш керак, холос, худди шундай қилишингизни сўраётган хоним эса, олижаноб малика Микомикон, Хабашистондаги буюк Микомикон қироллигининг қироличаси.

— Унинг кимлиги менга барибир: виждоним ҳамда рицарлик орденим қонуни нимани буюрса, мен ҳар қандай одамга шафқат кўрсатишга тайёрман.

Кейин Доротеяга мурожаат қилиб қўшиб қўйди:

— Ўрнингиздан турунг, эй гўзал хоним, мендан нимани тиласангиз ҳаммасини бажо келтиришга сўз бераман.

— Ундай бўлса, эй мурувватли рицарь,— деди ўрнидан тураётиб сохта малика,— зудлик билан менинг узоқ ватанимга жўнаб кетишингизни сўрайман, марҳаматли жаноб. Бундан ташқари, олло-таолонинг амри маъруфи ҳамда инсоният қонун-қоидаларига хилоф равишда менинг қироллигимни босиб олган сотқиндан ўч олмагунингизча, ҳеч қандай иш ва саргузаштларга қўл урмаслигингиз тўғрисида менга ваъда беришингиз керак.

— Ваъда бераман,— деди дон Кихот тантанали равишда.— Сеньора, шу пайтдан бошлаб сиз ўзингизни эзаётган аламларни улоқтириб ташлашингиз ҳамда бўшашиб кетган умидларингизга куч ва мадор бағишлашингиз мумкин, чунки олло-таолонинг марҳамати ҳамда менинг қиличимнинг ёрдамида тез орада яна ўзингизни қадимий ва буюк қироллигингиз тахтида кўрасиз, уни сиздан тортиб олишга журъат этган сотқинлар ҳолига маймунлар йиғлайди. Шундай қилиб, тезроқ ишга киришиш керак, чунки сусткашлик хавфлидир, дейдилар.

Доротея дон Кихотнинг қўлини ўпмоқчи эди, лекин у боадаб ошиқлардан бўлгани учун буни рад этди. Дон Кихот назокат ва тавозе билан эгилди-да, Доротеяни ўрнидан тургазиб, ўзининг қўлидан ўпди. Кейин Санчога Росинантнинг айилини тортиб боғлаб, яроғ-аслаҳаларини келтиришни буюрди. Санчо дарахтга илиб қўйилган яроғ-аслаҳаларни худди ўлжадай тортиб олди-да, бирпасда хўжайинини қуроллангирди. Шунда рицаримиз тантана билан гап ташлади.

— Шундай қилиб, худо ҳақи бу бахтсиз маликани ҳимоя қилишга киришамиз.

Сартарош эса кулгисини аранг босиб, бир қўли билан соқолини сийпаганча ҳамон тиз чўкиб турарди. Дон Кихотнинг йўлга



тушишга шошилаётганини кўрганидан кейин у ўрнидан турди-да, сохта қироличасининг хачирга минишига дон Кихот билан бирга кўмаклашди. Шундан кейин рицаримиз Росинантга, сартарош эса ўз хачирига минди. Елғиз Санчогино пиёда юрди.

Шу онда у беихтиёр ўз эшагини эслади. Аммо содиқ ўртоғини ҳадемай унутди. У яқин орада хўжайиним Микомикон қироли бўлади, мени бирор вилоятнинг ҳоқими қилиб тайинласа керак, деган ўй билан ўзини юпатарди. Уни мазкур подшоликнинг негрлар мамлакатига эканлиги ва келгусида қора танлиларгина унга вассал бўлиши ранжитарди. Лекин у қўйидаги фикрлар билан ўзига ўзи таскин берарди: «Вассалларим негрлар бўлса нима қипти, шунга ҳам ташвишми? Ҳеч бўлмаганда мен уларни кемаларда Испанияга олиб келаман. Испанияда ҳаммасини сотиб юбораман, менга нақд пул тўлашади, ана шундан кейин бирор унвон ёки лавозимга эришиб, умр бўйи бадавлат яшайман. Бундай қулай ишни қўлдан бериб қўймасликка фаҳм-фаросатим ҳам, маҳоратим ҳам бор: ахир бор-йўғи ўттиз ёки қирқ мингта келадиган негрни сотиб юбориш нима экан. Худо ҳақи, мен уларни — каттасини ҳам, кичигини ҳам бир зумда қўлдан ўтказвораман. Уларнинг туси қорақудан ҳам қора бўлса бўлар, — мен уларни бирпасда қумуш ва олтинга айлантивораман. Мен улар айтган аҳмоқлардан эмасман!» Бу ёқимли ўйлардан маст бўлган Санчо пиёда юришнинг барча қийинликларини унутиб юборган эди.

Бу манзарани буталар орасидан кузатиб турган руҳоний дон Кихот ва сохта малика ўз яроқбардори ҳамда Санчо Пансалар билан йўлга тушганларини кўриб, уларга ўзининг ҳам қўшиладиган вақти келганини пайқади.

У буталар орасидан чиқди-да, дон Кихотга гўё унинг кимлигини эслаётгандай тикилиб қолди, сўнгра қучоқларини кенг очиб идальгомизга отилди.

— О рицарлар кўзгуси, олижаноб ватандошим, мардонавор ламанчлик дон Кихот, мазлумларнинг таянчи ва пуштипаноҳи, жаҳонгашта рицарларнинг гули ва шухрати, — деб хитоб қилди у, — мен сизни энг бахтли даврда учратдим!

У шундай деб дон Кихотнинг чап оёғини қучоқлаб олди. Дон Кихот ҳам руҳонийнинг гаплари ва ҳаракатидан ҳайрон бўлиб, унга жиддий нигоҳ ташлади ва, ниҳоят, таниди. Бу учрашувдан жуда ажабланган дон Кихот отдан тушишга ҳаракат қилган эди, лекин руҳоний уни ушлаб қолди. Шунда дон Кихот гап ташлади:

— Сеньор лицензиат, қўйиб юборинг, отдан тушай; сиздек мўътабар зот пиёда кетаётган бир пайтда менинг отда юришим яхши эмас.

— Мен сира бунга рози бўлмайман, — деб жавоб берди руҳоний, — муҳтарам жаноблари отдан тушмасинлар. Сиз ўзингизнинг ажойиб қаҳрамонона ишларингизни мана шу шонли тулпорда амалга оширингиз. Мени, ношуд бир дин арбобини эса марҳаматли жанобларининг ҳамроҳларидан бирортаси ўз хачирига мингаштириб олса, шунга ҳам хурсанд бўламан. Ўзим-

ни худди тулпор Пегасда ёки машхур хабаш Мусоракнинг зебра-сида кетаётган рицардай ҳис қиламан.

— Мен бунӣ ўйламабман, сеньор лиценциат,— деб жавоб берди дон Кихот,— лекин сеньора малика менга бўлган муҳаб-бати туфайли ўз яроқбардорига эгарга сиз мўътабар зотни мин-дириб, ўзи мингашиб олишга буйруқ беради деб ишонаман.

— Буйруқ беришимнинг ҳожати йўқ деб ўйлайман,— деди малика,— менинг яроқбардорим шундоқ ҳам гапга тушунади-ган одобли одам, дин арбоби пиёда қолиб, ўзи отда юришга асло рози бўлмайди.

— Жуда тўғри,— деб жавоб берди сартарош.

У шундай деб хачирдан тушаркан, руҳонийга минишни таклиф қилди, руҳоний ялинтириб ўтирмай, дарров хачирга минди. Бахтга қарши, хачир ёлланган, бунинг устига ҳурковуч бўлиб, сартарош мингашмоқчи бўлганида шаталоқ отаверди. Хайриятки, уста Николаснинг кўкраги ёки калласига тепиб юборганида борми, балки, сартарош бунақанги режани чиппакка чиқармиди. Шунда ҳам кўрқиб кетганидан шартта ўзини чет-га оларкан, шошилганидан қоқилиб кетиб ерга ағдарилди ва шунда ясама соқоли тушиб кетди. Бечора ўзини йўқо-тиб қўйганидан нима қилишини билмай қолди, қўллари билан юзини берикитиб олганча ҳамма тишимни синдириб юборди, деб додлайверди.

Шу орада йўлда ётган соқолни кўриб дон Кихот ифодалаб бўлмайдиган даражада ҳайратга келди-да, қичқириб юборди:

— Худо ҳақи, бу мўъжиза-ку! Хачир унинг соқолини пичоқ билан кесгандай узиб олди-я!

Ёлгонлари очилиб қолиши мумкинлигини кўрган руҳоний сакраб тушди-да, сартарош ўзига соқол қилиб олган буқа думи-ни дарҳол кўтариб олди-ю, қўллари билан юзини яшириб ётган уста Николас томон отилди. Сартарошнинг бошини ўзининг кўк-рагига қўйиб, алланималар деб вайсаганча, яна соқолини ёпиш-тириб қўйди. Ҳамроҳларига алоҳида афсун ўқиганини, шунинг учун ҳозироқ соқолнинг яна ўсиб чиқажагини айтди. Кейин чет-га ўтиб турди, яроқбардор эса соғ-саломат, бешикаст ўрнидан турди, соқоли ҳам кўксига тушиб турарди. Бундан дон Кихот ба-ғоят ҳайратда қолди ва шу ондаёқ ана шу афсунни ўзига маълум қилишни руҳонийдан сўради, чунки унинг фикрича, бошқа бахт-сизликлар юз берганда ҳам мазкур афсун қўл келиши мумкин, негаки одамнинг соқолини юлиб олинса, унинг чаккалари албат-та яра бўлиб қолиши керак. Ваҳоланки, маликанинг яроқбардо-ри дарҳол тузалиб кетди. Бинобарин, бу афсун соч-соқолни ўсти-рибгина қолмай, жароҳатни ҳам тuzатар экан.

— Жуда тўғри,— деб жавоб берди руҳоний,— бу афсунни сизга айтиш мен учун катта қувонч. Жаҳонгашта рицарга бу-нинг жуда катта фойдаси тегиши мумкин.

Кейин оралиғи икки миляга яқин бўлган карвонсаройга етиб боргунларича хачирга олдин руҳоний, кейин бошқалар, хуллас учовлари навбатма-навбат минадиган бўлишди. Шундай қилиб,

ишлар яна ўз жойига тушганидан кейин ҳаммалари — дон Кихот ўзининг Росинантида, малика билан руҳоний хачирларда, сартарош билан Санчо Панса эса пиёда йўлга чиқишди. Дон Кихот бир оз йўл юрганидан кейин Доротеяга шундай деди:

— Сеньора ҳазрати олиялари, мени хоҳлаган томонингизга бошланг.

Бироқ малика ҳали жавоб бермасданок, лиценциат гап ташлади:

— Сиз зоти олиялари бизни қаерга бошлаб боришни лозим кўрасиз? Микомикон қироллигига бўлса керак? Тўғрими?

Доротея нима жавоб бериш кераклигини шу заҳотиёқ пайқаб олди.

— Ҳа, сеньор,— деди малика,— мен ўша қиролликка боришим керак.

— Модомики шундай экан,— деб давом этди руҳоний,— менинг қишлоғим орқали ўтишимиз керак, у ердан сиз зоти олиялари Картахенга жўнаб кетасиз. Картахенда орқадан шамол эсиб, қулай шароит бўлди дегунча кемага тушишингиз мумкин. Денгизда бўрон кўтарилмай турса, атиги тўққиз йилгина йўл босиб улуғ Меотий кўлига етиб борасиз, у ердан ҳазрати олияларининг қиролликларига юз кунлик йўл қолади чоғи.

— Муҳтарам жаноблари хато қияптилар,— деб жавоб берди Доротея,— об-ҳаво ҳаммавақт нобоп бўлса ҳам ватанимдан Испанияга етиб олишим жуда мушкул. Шунга қарамай мен омон-эсон етиб келиб ҳамда кўрмоқчи бўлган одамимни — сеньор дон Кихотни кўрдим. Испания соҳилига сёғим тегар-тегмас унинг довруғи қулоғимга чалиниб қолди ва қалбимда ана шу шавкатли рицарни топиш, унинг мурувватидан баҳраманд бўлиш, ўзимнинг адолатли ишимни унинг энгилмас кўлига топшириш иштиёқи туғилди.

— Мени мақташни бас қилинг,— унинг гапини бўлди дон Кихот,— нега десангиз мен ҳар қандай хушомадни ёмон кўраман, мақтовларингизнинг мутлақо самимийлигига, гарчанд, шубҳам бўлмаса-да, сеньорам, ҳар қалай камтарин каминангиз шаънига ҳақоратдай бўлиб туюлади. Сизга айтадиган гапим шунки, мен қанчалик жасорат кўрсатишга қодир бўлмай, ҳаммасини хизматингизга бағишлайман, сиз учун ҳатто жонимдан кечиб, ўзимни қурбон қилишга ҳам тайёрман. Лекин бунинг ўз вақти келади, ҳозир эса, сеньор лиценциат, энгил-елпи, бунинг устига хизматкорсиз бир ўзингиз бу ерларга қандай келиб қолдингиз, ана шуни гашириб беринг, булар ҳаммаси мени жуда ажаблантирмоқда.

— Буни сизга қисқача сўзлаб бераман,— деб гап бошлади руҳоний.— Сиз муҳтарам жанобларига шу нарса маълум бўлсинки, сеньор дон Кихот, бундан кўп йиллар муқаддам Америкага кўчиб бориб қолган бир қариндошим юборган пулни олиш учун умумий дўстимиз сартарош, уста Николас билан Севильяга жўнадик. Оладиган пулимиз оз эмасди! Роппа-роса 60.000 пезо<sup>41</sup> — бу чакана эмас. Хўш, кеча биз ана шу йўллардан

ўтиб бораётган эдик, бизга тўрт қароқчи ҳамла қилиб, ҳамма нарсамизни битта қўймай шилиб олишди. Шу атрофда яшайдиган одамларнинг гапига қараганда мазкур ҳодисанинг энг ғалати томони шуки, сургун қилинган бу қароқчилар шу яқин орада озод қилиб юборилган экан. Овозаларга қараганда, комиссар билан қўриқчиларнинг қаршилигига қарамай, уларни қандайдир бир довжорак ботир бўшатиб юборган эмиш. Бу одам ё жинни, ё бўлмаса тошбағир ва виждонсиз, қароқчиларнинг ўзидай муттаҳам бир одам эканлигига ҳеч шубҳа йўқ. Ахир ўзингиз ўйлаб кўринг-а, муҳтарам жаноблари, бу билан у бўрини қўйга, тулкини товукқа, ёки пашшани асалга қўйиб юборгандай иш тутган. Афтидан, қиролнинг доно буйруғини бузганидан кейин, у адолат судини ҳақорат қилишга ва ўзининг қонуний жаноби қиролга қарши исён кўтаришга жазм қилган: чамаси, у галераларни матросларсиз қолдиргиси ҳамда бир неча йилки дам олаётган Санта Эрмандадни ишга солгиси келиб қолган. Хуллас, у шундай ишларни қилганки, бундан руҳи изтиробда, танаси азобда қолади.

Шуни айтиш керакки, Санчо ўз хўжайинининг сургун қилинганлар орасида бошидан кечирган саргузаштини руҳоний билан сартарошга аллақачон айтиб берган эди. Шунинг учун ҳам руҳоний ўз ҳикояси дон Кихотга қандай таъсир қилишини кўриш учун қароқчилар ҳақидаги бу воқеани тўқиган эди. Дон Кихот эса руҳонийнинг ҳар сўзини эшитганда ранги оқариб-бўзариб турди-ю, лекин бу довруғи кетган талончиларни ўзи бўшатиб юборганини айтишга жазм қилолмади.

— Бизни талаганлар ана ўшалар, — деб сўзини тамомлади руҳоний, — уларни муносиб жазодан яширганни шафқатли тангрининг ўзи кечирсин.

## XXII БОБ

### СОҲИБЖАМОЛ ДОРОТЕЯНИНГ ДОНОЛИГИ ВА САНЧО ПАНСАНИНГ ЭШАГИ ТОПИЛГАНИ

Руҳоний гапини тугатмасданок Санчо хитоб қилди:

— Бу жасоратни менинг хўжайиним кўрсатди, сеньор лиценциат, чин сўзим. Бу ишга қўл уришдан олдин яхшилаб ўйлаб кўриш керак деб қанча айтдим! Тўғри эмасми, сеньор? Ёвуз қилмишлари учун эшкакчиликка бадарга қилинган жиноятчиларни бўшатиб юбориш оғир гуноҳ эканлигини сизга айтмаганмидим?

— Тентак! — деди шу пайт дон Кихот. — Ўз йўлида учраган дарбадар ва эзилган кишилар айблими ё йўқми, бунинг текшириб ўтириш жаҳонгашта рицарларга ярашмайди. Биз бахтсизларнинг жиноятига эмас, тортаётган азоб-уқубатларига эътибор берамиз. Мен мунчоқ ёки тасбеҳ доналари ипга терилгандай занжирларга боғлаб қўйилган уқубатдаги кишилар билан тўқнашдим ва виждоним буюрганича йўл тутдим. Бу ёғини тангрининг ҳукмига ҳавола қилдим. Хатти-ҳаракатим кимга номақбул

туялса, демак, у рицарлик нималигини мутлақо билмайди. Мен буни истаган кишига қиличимнинг қудрати билан исбот қила оламан. Бироқ бундан муҳтарам сеньор лицензиат мустаснолар, у кишининг руҳонийлик мартабалари олдида бўйин эгаман.

У шундай деб, оёгини узангига тиради, сартарош жоми ўрнига яна кийиб олган дубулғасини пешанасига сурди, чунки бу Мамбриннинг машҳур дубулғаси каторгачилар томонидан яроқсиз ҳолга келтирилган, ҳозир эса тузатишга муҳтож бўлиб эгарга илиғлик турарди.

Дон Кихотнинг ҳаяжонланганини кўрган, унинг яна бирорта кўнгилсиз ҳодисани бошлашидан хавфсираган зийрак ва ҳозиржавоб қиз Доротея ранжиган рицарни тинчлантиришга уринди:

— Сеньор, менга берган қасамингиз ёдингизда бўлсин. Сиз менинг учун ўч олмасдан туриб ҳеч қандай саргузаштларга бош қўшмасликка ваъда бергансиз. Ғазабингизни босинг. Сизни ишонтириб айтаманки, каторгачилар енгилмас қўлингиз туфайли озод бўлганини сеньор лицензиат билганда эди, у сиз муҳтарам зотга бирор ёмон сўз айтишдан олдин тилини тишлаб қоларди.

— Онт ичиб айтаманки, бу ҳақ гап, — маъқуллади руҳоний, — бундан кўра мен мўйловимни битта-битта юлганим маъқул эди.

— Мен гапни бас қиламан, сеньорам, — деди дон Кихот, — қалбимда қайнаб турган адолатли ғазабни ҳам босаман. Ўз ваъдамнинг устидан чиқмагунимча тинч, хотиржам юраман. Яхши ниятларим эвазига, сиздан ўтиниб сўрайман, агар малол келмаса, менинг ҳаққоний ҳамда даҳшатли қасамим кимнинг бошига тушишини, сизни ким хафа қилганини айтиб берсангиз.

— Ҳаммасини бажонидил айтиб бераман, — деди Доротея, — фақат бошимга тушган кулфат ва офатларни эшитиш сизни зериқтириб қўймаса, деб қўрқаман.

— Зериктирмайди, сеньорам, — жавоб қилди дон Кихот.

Доротея унинг гапига жавобан:

— Ундай бўлса қулоқ солинглар, сеньорлар, — деди.

У шу сўзларни айтиши биланоқ руҳоний билан сартарош доно Доротея қандай нарсаларни тўқиркан, деб унга яқинроқ келишди; Санчо ҳам дарҳол уларга эргашди. У қизнинг бошига қандай кулфатлар тушганини тезроқ билишга қизиқарди, чунки у ҳам дон Кихот сингари қизнинг айтганлари соф ҳақиқатлигига ишонарди. Доротея эса эгарга қулайроқ ўтириб олиб, шундай ҳикоя бошлади:

— Аввало, ҳаммангизга маълум бўлғайки, сеньорлар, исмим...

Шу ерда у дудуқланиб қолди, чунки руҳоний ўзига нима исм қўйганини эсидан чиқариб юборганди. Руҳоний гап нимадалигини дарҳол фаҳмлаб, уни хижолатдан чиқаришга шошилди.

— Ҳазрати олиялари, ўз кулфатларингизни эслаб, бунчалик хижолатпазликка тушиб қолишингиз ажабланарли иш эмас, — деди у. — Кулфат кимнинг бошига тушса, унинг хотирасини ўтмаслаштиради. Кишилар кўпинча бошларига бахтсизлик

тушганда сизга ўхшаб ўз исмларини ҳам унутиб қўядилар. Сиз исмингиз малика Микомикон ҳамда улуғ Микомикон қироллигининг қонуний ворисаси эканлигингизни унутиб қўйганга ўхшайсиз. Бироқ мен эсга солишим билан сиз ҳазрати олиялари бизга айтмоқчи бўлган гапларингизни фаромуш хотирингизда яна тиклагайсиз, деб ишонаман.

— Жуда тўғри,— деди қиз.— Ишонаманки, бу ёгини эслатмасангиз ҳам гапимдан адашмай ҳақиқий саргузаштимни ҳикоя қилиб бераман. Қиролни, яъни отамни Донишманд Тинакрио дейишарди, чунки у афсунгарлик билимини сувдек биларди. Афсун унга онам, қиролича Харамилья отамдан илгари оламдан ўтишини, унинг вафотидан сўнг ўзи ҳам кўз юмисhini, менинг эса етим бўлиб қолишимни маълум қилди. Бу мудҳиш башорат ташвишга соларди: у мамлакатимизнинг ёнгинасида, катта оролда Ёвузкўз Пандафиландо исмли дев яшашини биларди. У ўзини ғоятда даҳшатли қилиб кўрсатиш ниятида атайин икки кўзини олайтириб, ўқрайиб боқарди, шунинг учун ҳам уни ёвузкўз деб аташарди. Отам ўзининг сеҳрли билими билан мен етим қолганим ҳақидаги хабар девга етган ҳамоно катта қўшин тортиб қироллигимизга бостириб кириши, уни эгаллашини билиб олди. Бу офат, вайронгарчиликдан девга турмушга чиқсамгина қутулиш мумкин экан. Лекин отам менинг бунга асло рози бўлмаслигимга шубҳа қилмаган. Бу борада заррача янглишмаганди у; бу жирканч махлуқ билан бўладиган никоҳ фикрининг ўзиёқ мени даҳшатга солиши кундай равшан эди. Кейинроқ отам борди-ю Пандафиландо ҳужум қилиб қолгундай бўлса қаршилиқ кўрсатмаслигимни огоҳлантирди. Бу дев шунчалик кучлики, унга ҳеч қанақа қўшин бас келолмайди. «Саховатли, садоқатли фуқароларимизни қирилишдан сақлаб қолишнинг бирдан-бир йўли,— деган эди отам,— қиролликни ихтиёрий равишда ташлаб, мадад излаб Испанияга кетишдир». Мен у ерда ўша вақтга бориб донғи дунёга тараладиган жаҳонгашта рицарни топишим лозим экан. Бу рицарнинг исми дон Асон ёки дон Хигот бўлиб, у менинг ҳимоячим, халоскорим бўлиши керак экан.

— Эҳтимол, у дон Кихот дегандир,— Санчо Панса қизнинг сўзини бўлди — ёки бошқачароқ қилиб Гамгин Қиёфа рицарь дегандир.

— Худди шундай,— деди Доротея.— Отам яна ўша рицарнинг новча, озгинлигини, ўнг елкасининг пастроғида холи борлигини ҳам айтган эди.

Буни эшитган дон Кихот яроқбардорига:

— Бу ёққа кел, биродар Санчо, ечинишга кўмаклаш, донишманд қирол айтган рицарь чиндан ҳам ўзим эканлигимга ишонч ҳосил қилмоқчиман.

— Муҳтарам жаноблари ечиниб нима қиладилар? — сўради Доротея.

— Отангиз айтган ўша холим бор-йўқлигини кўрмоқчиман,— жавоб қилди дон Кихот.

— Бунинг учун ечинишнинг ҳожати йўқ,— деди Санчо,—

муҳтарам жанобларининг елкаларининг қоқ ўртасида худди ўшанақа хол борлигини аниқ биламан: бу — мардлик нишонаси.

— Шунинг ўзи кифоя,— деди Доротея,— холингиз елкангиздами ё бўйингиздами — бунинг мутлақо аҳамияти йўқ; муҳими — у бор, қаерингизда бўлса ҳам барибир, тананинг ҳаммаёғи бир хил. Саховатли отам башоратининг тўғрилигига шубҳам йўқ, сеньор дон Кихотга мурожаат қилиб хато қилмадим, отам ҳам худди шу кишини назарда тутган. Унинг донғи бутун Испанияга ёйилиши ҳам бежиз эмас. Кемадан Осунага тушмасимданоқ унинг жасорати ҳақидаги гапларни эшитдим, юрагим ўша заҳотиёқ менинг халоскорим, ҳимоячим шу киши эканлигини сизди.

— Менинг сеньорам, Осуна денгиз гавани эмас-ку, қандай қилиб у ерга кемадан тушдингиз? — деб сўради дон Кихот. Доротея ҳали жавоб қайтармасданоқ гапга руҳоний аралашди:

— Сеньора малика сиз муҳтарам зотнинг номларини биринчи маротаба эшитган жойи Осуна эканлигини айтмоқчи бўлган бўлсалар керак, ўзлари Малагада кемадан тушганлар.

— Худди шундай демоқчи эдим,— маъқуллади Доротея.

— Ундай бўлса тушунарли,— деди руҳоний.— Хўш, гапингизда давом этаверинг, ҳазрати олиялари.

— Бошқа нима ҳам дердим,— деди Доротея,— бундан ташқари, тақдир менга раҳм қилиб, сеньор дон Кихотни топиб олдим. Илтифот ҳамда марҳаматлилиги туфайли менга ёрдам беришга рози бўлди. У Ёвузқўз Пандафиландо деган девга қарши қурашишга ваъда берди ва унинг ўша ёвуз махлуқни енгиб, қонунсиз ўғирланган осойишталигимни яна қайтариб беришига шубҳам йўқ. Бу ишлар тақдиру азалда битилганидек, отам До-нишманд Тинакрио башорат қилгандай амалга ошири керак. Бундан ташқари, отамнинг юнон ҳамда халдей тилларида ёзилган ёрлиқларида шундай дейилган: агар башоратномада номи зикр қилинган рицарь девнинг калласини узиб, менга уйланишни истаса, дарҳол, ҳеч қандай гап-сўзсиз унинг қонуний хотини бўлишим ҳамда ўз тақдирим билан биргаликда қиролликни унинг ҳукмронлигига топширишим лозим.

— Мана бу гапга нима дейсан, дўстим Санчо? — хитоб қилди дон Кихот.— Нималар гапирилаётганини эшитяпсанми? Сенга худди шу гапларни аймаганмидим? Мана, ҳукмронлик қиладиган қироллигимиз ҳам бор.

— Худо ҳақи, тўғри! — деди Санчо.— Уша сеньор Панфиладонинг бўйинини узиб, маликага уйланмаслик тентакликнинг ўзгинаси-ку!

Шу сўзларни айтгач, севинчи ичига сиғмай икки марта кўкка сакради, кейин Доротея минган хачирнинг юганидан ушлаб тўхтатди-да, унинг қўлини ўпишга ялиниб изн сўрай бошлади. Хўжайиннинг тентаклиги ва хизматкорининг лақмалигини кўриб ким ҳам кулмайди дейсиз. Доротея унга қўлини чўзди, қиролликни бошқара бошлаши биланоқ уни катта амалдор этиб тайинлашга ваъда берди. Санчо чиройли сўзлар билан шу қадар мин-

натдорчилик билдира бошладики, атрофдагилар яна кулиб юборишди.

— Кечмишларим ана шунақа, сеньорлар, — давом этди Доротея. — Энди икки оғизгина гапим қолди, холос. Биз гаванга яқинлашганимизда қаттиқ бўрон қўзғолди. Кемамиз чўкиб кетди, ҳамроҳларимнинг ҳаммаси қутурган денгиз тўлқинлари қаърида ҳалок бўлишди. Мен билан анави соқолли яроқбардоргина омон қолдик, тахталарга тирмашиб, соҳилга қандайдир мўъжиза билан зўрага келиб олдик. Кўриб турибсизки, менинг ҳаётим ажойибот ҳамда сир-асрордан иборат. Шу билан ҳикоямни тамомлайман. Ортиқча бирор нарса деган бўлсам узр. Кимнинг бошига оғир бахтсизлик тушса, у ўша одамнинг хотирасини заифлаштиришини сеньор лиценциат тўғри айтдилар, менинг умрим эса бошдан-оёқ мудҳиш кўргиликлардан иборат бўлди.

— О зоти улуғ, жасур сеньора, — деди дон Кихот тантанали қилиб, — қаршимдаги синовлар қанчалик улуғ ҳамда ғаройиб бўлмасин, ўз ваъдамни охиригача бажаришга онт ичаман. Қаҳрли душманни қарши олиш учун дунёнинг нариги чеккасигача сиз билан бораман, худонинг паноҳида унинг қалласи қиличим зарби билан ерга думалайди. Уни бирёқлик қилиб, сизни ўз давлатингиз тахтига ўтқизгач, ихтиёрни ўзингизга қўйиб бераман, зероки қалбим банд, инон-ихтиёрим ақлим ўғирлаган... Хўп, етар энди. Шуни айтишим мумкинки, уйланишни ҳатто хаёлимга ҳам келтиролмайман.

Дон Кихотнинг бу гаплари Санчога ёқмади, у ўзини тутта олмай хитоб қилди:

— Онт ичиб айтаманки, сеньор дон Кихот, ҳозир ақлингиз жойида эмас. Шундай аслзода маликага уйланиш ҳақида гап кетаётган бир пайтда иккиланишга ҳожат бормикан? Хўш, тақдир ҳар қадамда мана шунақа омадларга дуч қилаверади деб ўйлайсизми? Қўлингизга ўз оёғи билан кириб келаётган қиролликдан юз ўғирманг, қирол бўлиб олганингиздан кейин мени маркиз ёки ноиб қилиб қўясиз. Уйланинг, албатта уйланинг! Жин урсин сизни! Наҳотки сеньора Дульсинейани маликадан гўзал деб ўйласангиз? Мутлақо ундай эмас! Онт ичиб айтаманки, у маликанинг пайтавасига ҳам арзимайди.

Бундай таҳқирона сўзларни эшитган дон Кихот бир зумда ғазабга келди, найзасини кўтариб, ҳе йўқ, бе йўқ, Санчони икки марта туширдик, у ерга қулади. Агарда Доротея рицаримиздан яроқбардорига раҳм қилишни илтимос этмаганида, уни ўлдириб қўярмиди.

— Наҳотки, — деб хитоб қилди рицаримиз, — сизнинг бундай хаёсизликларингизни ҳадеб кечираверади деб ўйласангиз, эй сурбет? Ҳой ярамас, разил одам, бундай ўйга борманг, ҳа, тенги йўқ Дульсинейа ҳақида тилингиз шундай бепوشна гапларга борган экан, албатта разил одамсиз! Ҳой аҳмоқ, бекорхўжа, қишлоқи, унинг хаёлининг ўзи менга қанчалик куч, жасорат бахш этишини биласизми? Эй тили илоннинг тилидай қалдираган муттаҳам, ким қиролликни эгаллаб, девнинг қалласини узди ҳамда сизни



макр қилиб қўйди (зероки ўйланган нарсани қилинган деб хисоблайман)? Узининг жасорати учун мени танлаб олган Дульсинеянинг қаҳрамонлиги эмасми бу? У менинг қонимда, мен билан зафар кучаяпти, унинг ёди билан қалбим тепади, нафас оламан, у менинг ҳаётим, борлигим. Эй ярамас, кўрнамак одам, сизни у киши жулдурвоқи одамдан аслзода сеньорликка кўтарган-а? Уз валинеъматингиз яхшилиги эвазига қўланса сўзлар билан фисқи фасод тарқатяспиз-а!..

Санчо қаттиқ зарбадан гангиб қолган бўлса-да, ҳарҳолда дон Кихотнинг сўзларини эшитди. У ўрнидан лип этиб туриб, Доротеянинг ҳачири орқасига ўтди-да, ўша ердан туриб хўжайинига эътироз билдирди:

— Сеньор, сиз мана шу маликага уйланишдан воз кечаётганингизни ўйлаб кўринг, унда сиз қирол бўлолмайсиз. Шундай экан, сиздан қандай марҳамат кутишим мумкин? Ана шунга ўкиняпман, холос. Осмондан тушгандай олдингиздан чиқиб қолган мана шу маликага уйланишингиз лозим. Кейинроқ сеньора Дульсинеянинг ёнига қайтишингиз мумкин-ку. Гўзаллик масаласига келсак, бу ишга мен аралашмайман. Софдиллик билан айтсам, менимча иккови ҳам чиройли. Лекин сеньора Дульсинеяни анчадан бери кўрганим йўқ.

— Нега кўрмас экансан? — дон Кихот унинг гапини бўлди. — Ҳой шаккок хоин, ҳоризгина ундан салом келтирдинг-ку!

— Мен уни бир зумгина кўрдим, ҳозир қандайлигини яхши пайқай олмадим демоқчи эдим. У ҳарқалай ҳуснда тенгсиз деб айтишим мумкин.

— Бу сафар сени кечирдим, — деди дон Кихот, — сен ҳам ҳафа қилганим учун мени афв эт. Кўпинча кишилар жаҳл устида кейин пушаймон бўладиган ишларни қилиб қўядилар.

— Буни биламан, муҳтарам жаноблари, — деди Санчо. — Мана мен ҳам тилимнинг учиди турган гапни айтиб юборишдан ўзимни тия олмаيمان.

— Шундай бўлса ҳам, Санчо, — деди дон Кихот, — нима деяётганингни ўйлаб гапир, ортиқча сўзни гапирмаслик учун тилингни маҳкам тишла.

— Хўп майли, — деди Санчо, — худо ҳаммасига шоҳид, менинг гапларимми ё сизнинг хатти-ҳаракатингизми, муҳтарам жаноблари, қайси бири ёмонлигини ўзи билади.

— Етар жавраш, Санчо! — Доротея унинг гапини бўлди. — Бориб хўжайинингизнинг қўлини ўпинг, кечирим сўранг. Бундан кейин тобосолик гўзал сеньора ҳақида яхши-ёмон гапларни гапирганда эҳтиёт бўлинг. Гарчанд мен уни мутлақо билмасам-да, унга хизмат қилишга чин кўнглимдан розиман. Қолган ишда худога суянаверинг, ҳаммаси ўз изидан кетаверади: мол-мулкки бўласиз, кейин князлардай яшайверасиз.

Санчо дон Кихотга яқинлашиб, қўлини ўпишга изн сўради; у эса керилиб узатди қўлини. Санчо уни ўпди, дон Кихот эса унга оқ фотиҳа берди. Сўнгра садоқатли яроқбардорига олдинроққа ўтишни таклиф қилди. Рицаримиз ундан энг муҳим нарсаларни сўраб

олиши лозим эди. Санчо итоат қилди, улар орқадагилардан бир оз илгарилаб кетишгач, дон Кихот шундай деди:

— Сенинг сафаринг ҳақида сўрашга сира қулай фурсатни тополмадим шу чоққача. Ҳозир тақдир бизга ана шундай фурсатни ҳадя қилганда, Дульсинейя тўғрисидаги хушxabарни билиш бахтидан мени маҳрум қилма.

— Сизга нима мақбул бўлса сўрайверинг,— деб жавоб берди Санчо.— Сеньор бир нарсани сиздан ўтиниб сўрайман: бундан бунча бунчалик қизиққон бўлманг.

— Нега бундай дейсан, Санчо? — сўради дон Кихот.

— Шунинг учунки,— деди Санчо,— мени нима учун урганингизни тушунолмай қолдим. Сеньора Дульсинейяни фақат сиз муҳтарам жаноблари учун азиз бўлгани туфайлигина чуқур ҳурмат қиламан. (У қанақасига азиз бўларди!)

— Санчо, илтимос қиламан, жаврашни бас қил,— деди дон Кихот,— гапларинг менинг сезгимни таҳқирлаяпти. Бу ҳақда ҳозиргина сенга айтгандим, янги гуноҳга эски тавба ўтмайди, деган мақолни биласан-ку.

Шу пайт уларнинг рўпарасидан эшак минган қандайдир бир киши кела бошлади. Аввалига уни лўли деб ўйлашди, лекин ҳар бир эшакни кўрганда кўзи косасидан чиққундай олайиб кетадиган Санчо номаълум кишига тикилиб туриб, у озод қилинган каторгачи Хинес де Пасамонте, остидаги эшак эса ўзининг севимли эшаги эканини дарҳол пайқаб қолди. Ажабланган ва севиниб кетган Санчо қичқириб юборди:

— Ўғри Хинесильо, кўрнамак махлуқ, бор бисотим, ҳаётимни қайтар, оромимни бузма, эшагимни бер, бойлигимни қайтар, кейин, йўқол, ўғри, муттаҳам, ярамас!

Бироқ шунча ҳақоратли сўзларнинг ҳожати йўқ эди. Санчо ҳақоратга озиг жуфтлаши биланоқ Хинес эшакдан ўзини ташлаб, зинғиллаганича қочиб қолди, бир зумда кўздан ғойиб бўлди. Санчо эшаги ёнига чопиб борди-да, бўйнидан қучоқлаганча шундай деди:

— Войлигим, жигаргўшам, қадрдон дўстим, аҳволинг не кечди?

Шундай деркан, у эшагини худди одамдай эркалатиб, ўпа бошлади. Эшак эса эгасининг эркалатиб, ўпишига жимгина йўл бериб турарди. Шу пайт бошқа йўловчилар ҳам етиб келишди ва Санчони табриклай бошлашди, дон Кихот эса эшаги топилганига қарамай яна учта хўтик ҳадя қилажагини айтди. Санчо жуда бахтиёр эди.

Шундан кейин у эшагига минди, ҳаммалари яна йўлда давом этдилар. Дон Кихот ўз яроқбардори билан ҳамон олдинда борарди. Доротейя билан руҳоний ва уста Николас кейинда боришарди. Гапларини Дон Кихот эшитмаслигини билиб руҳоний Доротейяга шундай деди:

— Сеньорита, ҳикоя тўқишдаги санъатингизга қойилман: бу ҳикоя рицарлик романларидаги воқеаларнинг худди ўзгинаси-ку!

— Мен рицарлик романларининг кўпини ўқиганман, — деди Доротея, — уларнинг мазмунини эсда яхши сақлаб қолганман, афсуски, географияни яхши билмайман, шаҳарларнинг номини аралаштириб юбораман, Осунада тушдим деб таваккалига айтиб юбордим.

— Мен ҳам худди шундай деб ўйладим, — деди руҳоний, — ишни силлиқлаш учун дарҳол гапга аралашдим. Бу бахтиқаро идальгонинг ҳар қандай хаёлий, уйдирма нарсаларга лаққа ишонишининг сабаби — бу воқеалар худди унинг аҳмоқона китобларидаги каби ҳикоя қилингандир. Бунга ажабланмай бўладими? Бу ҳали ҳаммаси эмас! Гап рицарлик ҳамда рицарлар ҳақида кетса бу саховатли идальгонинг оғзи энтак-тентак гаплардан бўшамай қолади. Қолган вақтларда шудай соғлом, чуқур мулоҳаза юритадики, беихтиёр унга ҳурматинг ошиб кетади. У севган мавзуга гапни буришинг билан яна ғирт тентак бўлади-қолади.

Улар шу кўйи гаплашиб боришаркан, дон Кихот Санчо Панса билан суҳбатни давом эттирди.

— Дўстим Панса, жанжални бас қилайлик. Гина-кудуратни бир ёққа йиғиштириб қўй, энди Дульсинейни қачон, қаерда ва қандай кўрганинг ҳақида гапириб бер. У нима қилаётган экан? Унга нима дединг? У нима деб жавоб берди? У менинг мактубимни ўқиётганда юзида қандай ўзгаришлар юз берди? Уни ким кўчириб берди? Хуллас, бундай пайтда айтишга, савол-жавоб беришга арзийдиган ҳамма нарсани сўзлаб бер, токи эшитиб ҳузур қилсин деб ҳеч нарсани қўшиб-чатма, энг муҳими, мени хурсандликдан маҳрум қилмаслик учун ҳеч нимани яширмай, оқизмай-томизмай гапир.

— Сеньор, — деди Санчо, — гапнинг тўғриси айтсам, хатингизни ҳеч ким кўчиргани йўқ, кўчириб ёзолмасди ҳам, ахир у ўзингизда қолган эди-да, сиз уни менга беришни унутибсиз.

— Тўғри айтяпсан, — деди дон Кихот, — мактуб ёзилган ён дафтарчани сен кетгач икки кундан кейин ёнимдан топиб олдим. Бу мени анча ташвишлантириб, хафа қилди. Мактубни олмаганингни пайқаб дарҳол қайтасан деб ўйлагандим.

— Шундай қилардим ҳам, — деди Санчо, — лекин бахтни қарангки, хатни сиз ўқиган пайтда ёдлаб олган эдим. Мен мирзага айтиб турдим, у сўзма-сўз ёзиб берди, кейин у черков радиyasi ҳақидаги кўп хатларни ўқиган бўлса ҳам бунақа чиройли хатни умрида кўрмаган ҳамда ўқимаганлигини айтди.

— Ҳозиргача ҳам ёддан биласанми? — сўради дон Кихот.

— Йўқ, сеньор, — деди Санчо. — Мен уни керак бўлгунча ёдимда сақладим. Уни мирзога ёздирганимдан кейиноқ ёдимдан кўтарилди. Дарвоқе, бошланиши ёдимда «Олий нафрат...», ие кечирасиз — «олий насаб сеньора», охирини ҳам биламан: «Гўр-га киргунча дўстингиз, Ғамгин Қиёфа рицарингиз», хатнинг ўрталарига «жоним», «ҳаётим», «кўз қорачиғим» каби сўзларнинг юзтачасини қистириб юбордим.

РИЦАРНИНГ ҶЗ ЯРОҚБАРДОРИ БИЛАН СУҲБАТИ ВА АНДРЕС ИСМЛИ  
БОЛА БИЛАН УЧРАШГАНИ

— Мен яна шуни билмоқчиман, — деди дон Кихот Санчо Панса билан суҳбатни давом эттириб, — маъшуқам, гўзалларнинг тенгсиз маликаси, сеньора Дульсинея сен борганимда нима қилаётган экан. Айтмоқчи, ақлим етиб турибди: эҳтимол, у ўзига мафтун бўлган рицарга, яъни менга қилинадиган тухфага гавҳар қадаётган ё зар ип билан гул тикаётган бўлса керак.

— Йўқ, — деди Санчо, — у орқа ҳовлида буғдой элаётган эди.

— Эҳтимол, — деди дон Кихот, — лекин унинг қўли теккан буғдойлар инжуларга айлана бошлагандир. Дўстим, у буғдойларнинг қанақалигини кўрмадингми: оқмиди ё қорами?

— Сарик, — деди Санчо.

— Шунга амин бўлгинки, Санчо, у сепган сарик мағиз буғдойлар оппоқ нон бўлади. Лекин ҳикояни давом эттир. Мактубимни берганингдан кейин сеньора Дульсинея нима қилди? Мактубни роса ўпгандир-а? Еки менга бўлган камоли ҳурмати туфайли бошига қўйдими? Қани, тезроқ гапир!..

— Сизнинг хатингизни унга бераётганимда у буғдой тўла галвирни астойдил силкитиб эларди. Шу сабабли менга: «Дўстим, мактубни анави қопнинг устига қўя қолинг. Ҳозир ишим бошимдан ошиб ётибди. Буғдойни элаб бўлиб ўқийман», деди.

— О, донишманд сеньора! — деди дон Кихот. — У ҳузур қилиб ўқиш учун шошилмаган. Хўш, Санчо, ундан кейин-чи. У ишини тамом қилгунча сен билан нималар тўғрисида гаплашди? Менинг тўғримда сўрагандир? Нима деб жавоб қилдинг? Қани тезроқ гапир, мендан бирорта сўзни ҳам яширмай ҳаммасини гапир.

— У ҳеч нарсани сўрамади, — эътироз билдирди Санчо. — Мен сизнинг унинг ишқида адои тамом бўлиб, тоғларда қип яланғоч юрганингизни, қоқ ерда ухлаб, қаттиқ, чағир тошлар устида ўмбалоқ ошишингизни, дарё-дарё кўз ёши тўкиб, нолаю фиғон чекиб, тақдирга лаънатлар ўқиб ётганингизни айтиб бердим.

— Тақдирга лаънатлар ўқияпти деб чакки айтибсан, — эътироз билдирди дон Кихот. — Аксинча, тақдир мени баланд мартабали, Дульсинея Тобосскаяни севишдек бахтга муяссар этгани учун умримнинг охиригача шукур қиламан.

— Баландликка баланд, бун тўғри айтдингиз: у мендан уч вершок\* новча, — деди Санчо.

— Наҳотки бўйларингни ўлчашган бўлсанглар? Бунга нечук ҳаддинг сизди?

— Бу жуда осон бўлди, — жавоб қилди Санчо. — Буғдой тўла қопни эшакка ортишиб бераётганимда у билан ёнма-ён туришга

<sup>1</sup> Вершок — 4,4 см.га баравар узунлик ўлчови.

тўғри келди: худди шу ерда унинг мендан новчароқлигини пайқаб қолдим.

— Дарҳақиқат, — деди дон Кихот, — қалбининг юксак фазилатлари новча бўйига муносиб бўлибди. Хўш, бугдойни элаб бўлиб, мактубни ўқигач нима деди?

— У хатни ўқигани йўқ, чунки ўқишни ҳам, ёзишни ҳам билмайди, — деди Санчо. — Хатни олди-ю, бировнинг қўлига тушиб қолишдан ҳадиксираб майда-майда қилиб йиртиб ташлади. Ишқида сарсон-саргардон бўлиб юрганингизни айтиб беришимнинг ўзиданоқ кифояланди. Охирида сиз мухтарам жанобларининг қўлингизни ўпажагини, ўша чангалзорлардан тезроқ чиқиб, тентаклигингизни ташлашингизни, Тобосога тезроқ етиб келишингизни буюрди; у сиз марҳаматли жанобларини жуда-жуда кўргиси келибди. Мухтарам жанобларининг ўзларини Ғамгин Қиёфа рицарь деб аташларини айтиб берганимда, у роса кулди. Мен ундан бискайлик йигит салом айтдим, деб сўрасам, йигитнинг келганини, у кўзига ажойиб кўринганини айтди. Яна ундан каторгачилар ҳақида сўрадим, худога шукрки, уларни кўрмабди.

— Қани, менга айт-чи, сен олиб борган хушхабар эвазига у сенга нима ҳадя қилди? Чунки қадимдан хонимлар билан жаҳонгашта рицарлар ўртасида маъшуқалардан ошиқларга, ошиқлардан маъшуқаларга хабар келтирувчи яроқбардорларга, махрамларга ёки митти одамларга қимматбаҳо нарсалар ҳадя қилиш удуми бор.

— Бу яхши одат экан, — деб мақтади Санчо, — афсуски, уни ҳозир унутиб юборишган. Эндиликда бир бурда нон билан пишлоқ бериш расм бўлибди. Мен хайрлашаётганимда сеньора Дульсинья ўшанақа бурдани девордан менга узатди. Шунини ҳам айттайки, пишлоқ қўй сутидан қилинган экан.

— Маъшуқам анча сахий, — деди дон Кихот. — Эҳтимол, ўша пайтда унинг қўлида қимматбаҳо безаклар бўлмагандир. Шунинг учун у сенга ҳеч нарса бермаган. Лекин сен ташвишланма, дўстим. Ҳаққингни оласан. Ҳаммасини ўзим тўғрилайман. Санчо, мени нима ажаблантираётганини биласанми? Назаримда сен у ёққа учиб бориб келганга ўхшайсан; ахир, сен йўлда уч кун бўлдинг, холос. Тобосогача эса ўттиз милядан ортиқроқ. Ўйлайманки, менга ғамхўрлик, ҳомийлик қилаётган доно сеҳргар (шунанга одамим бор, бўлиши керак, йўқса, мен ҳақиқий жаҳонгашта рицарь бўлолмасдим) сени сездирмай ўша ёққа олиб бориб ташлаган. Бунинг ажабланидиган ери йўқ: кўпинча доно сеҳргар жаҳонгашта рицарни тўшагида ухлаётган жойидан олиб кетади, уйғонгач ухлаётган жойидан мингларча миля олисда эканлигини ҳеч тасавур қилолмайди. Жаҳонгашта рицарлар ҳар қадамда учрайдиган хавф хатарлардан бир-бирларини сеҳрларнинг ёрдамисиз халос қилолмайдилар. Баъзан улардан бири Арманистон тоғларида бирорта андриак, ёвуз махлуқ ёки бошқа баҳайбат душман билан урушаётган бўлади, жанг ниҳоятда қизиган, ўлим хавфи туғилган бир пайтда қаёқдандир булут усти-

да ёки оташ аравада, ҳозиргина Англияда юрган бошқа бир рицарь оғайниси келиб қолади, уни ўлимдан қутқариб, кечки овқатга қадар яна уйига етиб боради. Унинг уйдан жанг майдонигача эса камида икки ё уч минг миля келади. Бундай мўъжизалар жасур рицарларга ғамхўрлик қилувчи сеҳргарларнинг афеуни кучи билан бўлади. Шунинг учун ҳам, дўстим Санчо, Тобосога бунчалик тез бўриб келганинга ажабланмайман ҳам: эҳтимол, донишманд ҳомийларимдан бирортаси сени у ерга осмонда учуриб олиб борган-ку, сен буни сезмагансан. Энди бошқа нарсадан гаплашайлик. Яхшиси, нима қилишим кераклигини айт. Сеньорам тезда ҳузурига етиб боришимни буюрибди, шундай экан, унинг амрини бажо келтиришим керак. Бироқ мен маликанинг орқасидан итоаткорлик билан боришга онт ичганман, рицарлар удуми ваъданинг устидан чиқиш, ундан кейингина ўзи, ўз муҳаббати ҳақида ўйлашни тақозо этади. Маъшуқамни тезроқ кўриш истаги мени қийнаётир, лекин шуҳрат чанқоғи ҳамда номус бурчи мен аҳд қилган янги жасоратни зафар билан қоплашга даъват қилади. Аввало мен маликага берган ваъданинг устидан чиқишга аҳд қилдим. Тезроқ Микомикон қироллигига етиб бориб, дев билан жанг қиламан, унинг калласини оламан, маликани тахтга ўтқазиб, бир дақиқа ҳам ҳаялламай маъшуқам сари ошиқаман. Аминманки, у менинг хатти-ҳаракатимни қувватлайди, ўзбошимчалигимни кечиради, чунки дев устидан ғалаба қозонганим унинг номини бутун оламга машҳур қилади. Ахир, қилигим билан кўрсатган, кўрсатаётган, кўрсатажак қаҳрамонликларим унинг ҳомийлиги ва унга бўлган садоқатим самарасидир.

— Эҳ, нималар деяпсиз-а, муҳтарам жаноблари! — деди Санчо.— Наҳотки, сиз мана шундай бой, машҳур маликадан воз кечсангиз, менга айтганларидек айланаси йигирма минг миля келадиган бой, гўзал табиатга эга бўлган қиролликни қўлдан чиқариб юборсангиз? Бу қироллик Португалия билан Кастилияни бирга қўшганда ҳам ундан каттароқ! Худо ҳақи, гап қайтарманг! Енгилтак сўзларингизни тарк этинг-у, маслаҳатимга қулоқ солинг: руҳоний учраган биринчи жойдаёқ дарҳол маликага уйланинг, бўлмаса, лиценциатимизнинг ўзлари ҳам қойилмақом қилиб никоҳ ўқиб юборадилар. Журъат қилганим учун узр, лекин мен ҳам маслаҳат берадиган ёшга кириб қолдим. Дарҳол уйланинг! Узоқдаги думбадан яқиндаги ўпка яхши, танлаб-танлаб тозисига учраб, сўнгра пушаймон қилиб юрманг.

— Менга қара, Санчо! — деди Дон Кихот.— Агар унга уйланиб, тезроқ қирол бўлсин ва мени хайр-эҳсонларга кўмиб ташласин деб маслаҳат бераётган бўлсанг, билиб кўйки, уйланмасдан туриб ҳам орзуларингни рўёбга чиқаришим мумкин. Дев билан жангга киришдан олдин маликадан мабодо енгиб чиқадиган бўлсам қироллиkning ярмини беришга ваъда оламан. Ана унда никоҳдан ўтмасдан ҳам қироллиkning ярмини олишим, уни истаган кишига ҳада этишим мумкин. Уни сендан бошқа кимга ҳам ҳада қилардим?

— Албатта менга, — деди Санчо, — фақат менга берадиган вилоятингиз муҳтарам жаноблари, денгизга туташган бўлсин, чунки у ерлар менга ёқмай қоладиган бўлса вассал-негрларимни кемага ўтказиб Испанияга олиб бораман ҳамда кул қилиб сотаман. Энди, марҳаматли жаноблари, сизга бир маслаҳат беришга рухсат этинг: сеньора Дульсинея билан кўришаман деб вақтни бекор ўтказиб ўтирманг, яхшиси зудлик билан девни ўлдиргани жўнай қолайлик. Буни қанчалик тез бартараф қилсак, шунча яхши, аминманки, бундан бизга фойда бўлади, шуҳратимиз ортади.

— Такрор айтаман, Санчо, — деди дон Кихот, — менга бемалол ишонишинг мумкин. Маслаҳатингга амал қиламан, аввал девни ўлдириб, кейин Дульсинея билан учрашаман. Аммо шуни билиб қўй, иккаламизнинг ўртамиздаги гап шу ерда қолсин. Ахир, Дульсинея бунчалик эҳтиёткор, камтар экан, ҳамма нарсанинг махфий қолишини истар экан, мен ҳам, бошқа одам ҳам бу ҳақда лом-мим демаслигимиз керак.

— Ундай бўлса, — деди Санчо, — нега сеньора Дульсинеянинг ҳузурига ўзингиздан енгилган одамларнинг ҳаммасини юбораврасиз? Бу унга бўлган ўз муҳаббатингизни бутун оламга ёйиш эмасми? Кимни енгган бўлсангиз у маъшуқангизнинг ҳузурига бориб, тиз чўкиб сизнинг юборганингизни маълум қилаверса севгингиз махфий қолармиди?

— О, нақадар содда ва аҳмоқсан-а! — деди дон Кихот. — Санчо, менинг муҳаббатим маъшуқамнинг шуҳратини оширишини наҳотки фаҳмламасанг? Шуни яхши уқиб ол: ҳеч қандай илтифотдан умидвор бўлмай маъшуқа хаёлида юрган жаҳонгашта рицарь туфайли қиз шон-шуҳратга қопланади.

— Руҳоний ўз ваъзиди, — деди Санчо, — бундай муҳаббат билан фақат худони севиш мумкин деган: марҳаматдан умидвор бўлмай, жазодан қўрқмай севиш зарур, бироқ мен нарса учун худони севишни, унинг хизматига бел боғлашни афзал билардим.

— Жин урсин бу тентакни! — деди дон Кихот. — Баъзан у билимдонлардан ҳам яхшироқ фикрларни айтади.

— Мен эса, худо ҳақи, ўқишни ҳам билмайман, — деб жавоб қилди Санчо.

Шу пайт уста Николас, тўхтанглар, деб қичқириб қолди, чунки руҳоний билан малика йўл чеккасидан оқаётган булоқ бўйида дам олишга аҳд этишганди. Бу Санчога ёқиб тушди. У дон Кихотнинг содиқ яроқбардори ўзини лақиллатаётганини фаҳмлаб қолишидан ҳадиксираб, қил устида турган одамдай хавотирда эди. Бу орада бошқа йўловчилар ҳам етиб келишди, ҳаммалари ўтиришиб, тамадди қилишга бошлашди.

Улар овқатланишиб турганда йўлда бир бола пайдо бўлди. У йўловчиларни кўриб, тўсатдан тўхтади, бир оз тикилиб турди-да, ўзини дон Кихотга ташлаб, унинг оёқларини қучди, ёлғондан йиғлаб хитоб қилди:

— Ох, сеньорим! Наҳотки муҳтарам жаноблари мени тани-

маётган бўлсалар? Ахир, мен ёвуз хўжайиним эман дарахтига боғлаб қўйганида ўзингиз озод қилиб юборган боламан-ку!

Дон Кихот уни таниди, қўлидан ушлаб атрофдагиларга мурожаат қилди:

— Сеньорлар, ёвуз, ярамас одамлар томонидан қилинган дилзорлик учун ўч олиш, адолатни ҳимоя қилиш йўлида жонбозлик кўрсатаётган жаҳонгашта рицарларнинг оламда яшаши нақадар зарурлигига энди ишончингиз комил бўлса керак. Биласизми, сеньорлар, яқинда ўрмондан ўтиб бораётиб, чинқирик, оҳвоҳ овозларини эшитдим. Ўз бурчимни ҳис қилиб, ўша томонга шошилдим. Маълум бўлишича, эманга боғланган бола бақираётган экан. Мен шунисига хурсандманки, ўша бола ҳозир қаршингизда турибди, гапларимни тасдиқлай олади. Хуллас, у даҳатга боғланган эди, унинг ёнидаги деҳқон болани камар билан танасидан қон чиққунча саваларди. Мен деҳқондан бечорани нега бунчалик қаттиқ савалаётганини сўрасам, у бола ўз ҳизматкори эканини, ялқовлиги ва ярамаслиги учун таъзирини бераётганини айтди. Шунда бола хўнграб туриб: «Сеньор, мен ундан ўз ҳақимни беришни сўраганим учун уряпти!» деди. Хўжайин эса ўзини оқлаб гапира кетди. Мен унга қулоқ соларканман, гаплари икки пулга ҳам арзимаслигини пайқаб қолдим. Шундан сўнг болани ечишга амр қилдим, деҳқондан эса болани уйга олиб бориб, охирги реалигача ҳақини бериши учун ваъда олдим. Шундайми, ўғлим Андрес? Ахир, унинг хўп додини берганимни, амримни дарҳол бажо келтириш учун ялиниб-ёлворганини сен биласан ку. Жавоб бер! Қўрқма! Нима ҳодиса юз берган бўлса, манови сеньорларга айтиб бер, ҳаммасини, токи жаҳонгашта рицарларнинг қанчалик зарур, фойдали эканлигини билиб қўйишсин.

— Муҳтарам жанобларининг ҳамма гаплари — чин ҳақиқат,— деди бола,— бироқ ишнинг охири жаноблари ўйлагандан бошқачароқ бўлди.

— Бошқачароқ дейсанми? — деди дон Кихот.— Наҳотки хўжайин ҳақингни бермаган бўлса?

— Ҳақ бериш у ёқда турсин, сиз ўрмондан чиқишингиз биланоқ у мени дарахтга боғлади, шундай саваладики, авра-астаримни ағдариб ташлади. Ураётиб мени шу қадар масхара қилдики, оғриқнинг азоби бўлмаганда ўзим ҳам кулиб юборардим. Кейин у мени чала ўлик ҳолда ўрмонга ташлаб кетди, касалхонага аранг етиб олдим, хўжайиним уриб яра қилган жойларни даволатиб шу кунгача ётиб қолдим у ерда. Ҳаммасига муҳтарам жаноблари айбдорлар. Агар сиз бировланинг ишига аралашмай ўз йўлингизда кетаверганингизда, хўжайиним мени оз-моз савалаб, кейин қарзини тўларди. Сиз бўлсангиз бекорга аралашиб унинг жаҳлини авжига миндирдингиз. Тўғри, у гапингизни қайтаролмади. Лекин сиз кетишингиз биланоқ у бутун қаҳрини менга сочди, шундай сочдики, умрбод майиб бўлиб қолсам керак.

— Нотўғри иш қилганимни тан оламан,— деди дон Кихот.— У ўз қарзини тўламагунча кетмаслигим керак эди. Лекин, агар у



ҳақингни тўламаса, ҳатто китнинг қорнига яшириниб олганда ҳам уни излаб топишга ваъда қилганим эсингда бўлса керак, Андрес?

— Тўғри, — деди Андрес, — бироқ бундан менга нима фойда?

— Фойдаси бор ё йўқлигини ҳозир кўрасан! — деб хитоб қилди дон Кихот.

— У шундай деб шоша-пиша ўрнидан турди-да, Санчога нарироқда ўтлаётган Росинантни эгарлашни буюрди.

Шу пайт Доротея ундан нима қилмоқчи эканлигини сўраб қолди.

Дон Кихот деҳқонни ахтариб топажагини ва охирги тийинигача қолдирмай Андреснинг ҳақини олиб беражагини айтди. Шунда малика ўзига қиролликни қайтариб бермагунча унинг бошқа саргузаштларга бош қўшмайман деган ваъдасини эслатди. Шу сабабли у ўз ғазабини босиши ва деҳқонни излашдан воз кечиши керак.

— Ҳа, бу тўғри, — деди дон Кихот. — Қайтиб келгунимча Андрес сабр қилиши керак, лекин мен яна бир карра ваъда бериб, онт ичиб айтаманки, деҳқондан ўч олиб, ўз қарзини тўлашга мажбур қилмагунимча ором нималигини билмайман.

— Онтингизга ишонмайман, — деди Андрес, — сизнинг ўч олиб беришингизнинг ҳожати ҳам йўқ. Бунинг ҳаммаси сафсата! Мен ҳозир фақат Севильяга қандай етиб олиш ҳақида ўйлаяпман. Агар қўлингизда бўлса йўлда егани егулик нарса берсангиз-у, тинчгина қолаверсангиз. Илоҳим, менга қанча яхшилик қилган бўлсангиз жаҳонгашталиқда ҳам шунча эзгулик кўринг.

Санчо халтасидан бир бурда нон билан пишлоқ олди, уни болага бераётди:

— Ўғлим Андрес, мановини ол, сенга худо ёр бўлсин, — деди.

Андрес бошқа ҳеч нарсага умид боғламагани учун нон билан пишлоқни олди-ю, бошини қуйи солиб, кетишга ҳозирланди. У кетаётди дон Кихотга шундай деди:

— Эй жаҳонгашта рицарь, худо ҳақи, борди-ю, қачон бўлмасин яна учрашиб қолгудек бўлсак, гарчи мени нимта-нимта қилиб юборишаётган бўлсалар ҳам бунга аралашманг. Агар муҳтарам жаноблари мени ҳимоя қиладиган бўлсалар аҳволим бадтар танглашади. Оламдаги барча жаҳонгашта рицарлар билан биргалиқда гумдон бўлинглар! — Андрес шундай деди-ю, оёғини қўлтиқлаб қочиб қолди, чунки бу адабсизлиги учун қувиб етиб жазолашларидан қўрқди.

Дон Кихот Андреснинг ҳикоясидан жуда хижолатда қолди, унинг ҳамроҳлари эса ўзларини кулгидан аранг тутиб туришарди.

#### XXIV БОБ

#### ДОН КИХОТНИНГ ҚИЗИЛ ВИНО МЕШЛАРИ БИЛАН ЖАНГ ҚИЛГАНИ

Йўловчиларимиз дамларини олгач, хачирларни эгарлашди ва ҳеч қандай саргузаштсиз, Санчо Панса эслаганда кўнгилсиз-

лик туғдирган карвонсаройга етиб боришди. Лекин у ичкарига киришга мажбур бўлди. Карвонсарой эгаси, унинг хотини, қизи ва Мариторнес дон Кихот билан Санчони кўришиб, хурсандлик билан қийқириб пешвоз чиқишди. Рицаримиз улар билан кеккайибгина омонлашди ва ўтган сафаргидан кўра дурустроқ ўрин ҳозирлашни буюрди. Карвонсарой бекаси агар у олдинги сафаргидан кўра яхшироқ ҳақ тўласа князлар ётадиган ўрин ҳозирлаб беражagini айтди. Дон Кихот бош қимирлатиб розилик билдирди. Унга олдин ўзи бир марта тунаган қазноққа яхшигина ўрин солиб беришди.

Руҳоний тушлик овқат буюрди, хўжайин эса дурустроқ инъомдан умидвор бўлиб бисотида бор энг яхши таомлардан берди. Ҳамма стол атрофига ўтирди, фақат дон Кихот ҳамон ухларди; уни уйғотмасликка аҳд этишди, чунки бечора рицаримизга овқатдан кўра уйқу аълороқ эди. Тушлик маҳалида хўжайин, унинг хотини, қизи, Мариторнес ва карвонсаройда яшаётган одамлар ҳузурда дон Кихотнинг телбаликлари ва уни излаганликлари ҳақида гап кетди. Ҳамма бир-бирига дон Кихотнинг ғалати телбалиги ҳамда саргузаштлари ҳақида ҳикоя қилди. Руҳоний ҳамма иллат рицарь романларини ўқишда эканлигини, ана шу сабабли дон Кихотнинг ақли айниб қолганлигини айтди. Хўжайин бунга эътироз билдирди:

— Худо ҳақи, бу ҳодиса қандай рўй берганига ҳеч ақлим етмаяпти, фикримча, дунёда бундан кўра ўқимишлироқ нарса бўлмаса керак. Менда ана шу романлардан икки-учтаси бор, тўғрисини айтганда, улар менга катта ҳузур бахш этади. Фақат мен эсам, балки бошқалар ҳам бундан баҳраманд бўлишган. Ўрим палласида байрам кунлари бизда ўроқчилар тўпланишади; уларнинг орасида ҳаммавақт бирор саводхони топилиб қолади албатта; у китобни қўлига олади, биз эса ўттиз кишича бўлиб унинг атрофига ўтириб оламиз-да, бутун вужудимиз билан тинглаймиз. Ўзим ҳақида шундай дейишим мумкин: китобда рицарнинг ўнг ва сўлга урган шиддатли зарбалари ҳақида гап кетганида, бутун куч-қувватимни сарф этиб шу жангларда қатнашгим, бу ҳақда кечаю кундуз эшитгим келади.

— Мен ҳам жуда ҳузур қиламан, — деб қўшиб қўйди бека. — Бундай китобхонлик пайтида уйга шунақаям жимлик чўкадики, пашша учса эшитилади. Бу романларга шундай берилиб кетасизки, мен билан жикиллашишга ҳам қўлингиз тегмай қолади.

— Жуда тўғри! — деди Мариторнес. — Мен ана шундай воқеаларни, айниқса, соҳибжамол сеньориталар ҳақидаги ҳикояларни тинглашни жуда ёқтираман; улар бирорта апельсин дарахти остида ўзларининг садоқатли рицарлари билан бирам қаймоқлашиб ўтиришардики, асти қўяверинг.

— Сиз нима дейсиз, сеньорита? — руҳоний хўжайиннинг қизига мурожаат қилди.

— Ростини айтсам, сеньор ўзим ҳам билмайман, — деди у. — Мен ҳам романлар ўқилганда, гарчи озроқ тушунсам-да, берилиб қулоқ соламан. Менга отамнинг ҳавасини келтирадиган

жанглр эмас, балки рицарларнинг ўз маъшуқаларини қўмсаб айтган мунгли гаплари кўпроқ ёқади. Тўғри, баъзида раҳмим келганидан йиғлайман ҳам.

— Борди-ю ўша рицарлар сизнинг дардингизда йиғлашса,— деди Доротея,— сиз уларни дарҳол юпатардингиз, тўғри эмасми, сеньорита?

— Нима қилишимни ҳам айтолмайман,— деди қиз.— Фақат бир нарсани биламан, ана шу маъшуқаларнинг баъзилари ўз рицарларига шу қадар шафқатсизки, рицарлар уларни шер, йўлбарс деб, бошқа жирканч нарсаларнинг номи билан аташади. Эҳ, худойим! Нақадар раҳмсиз, виждонсиз аёллар-а, пок одамларга бир қиё боқиш улар учун қийин-а, рицарлар эса уларнинг ишқида ё ўлади, ё жинни бўлиб қолишади! Узини бунчалик тарозига солишнинг нима ҳожати бор экан, сира тушунолмайман.

— Жим бўл, ҳой қиз,— онаси унинг гапини бўлди.— Қизларнинг бундай ишлар ҳақида билиши ҳам, фикр юритиши ҳам мумкин эмас.

— Сеньор мендан сўрадилар-да,— деди у,— жавоб бермасам бўлмайти-ку, ахир.

— Хўп, етар,— деди руҳоний,— сеньор хўжайин, яхшиси менга китобларингизни келтиринг. Уларни бир кўриб қўймоқчиман.

— Жоним билан,— деди хўжайин. У ўша заҳоти ўрнидан қўзғалиб, хонасига кетди, қулфлоглиқ эскигина қутини келтирди, очиб, унинг ичидан дона-дона қилиб ёзилган бир неча қўлёзма ва катта-катта учта китоб олди. Биринчи китоб «Дон Сиронхилио Фракийский», иккинчиси «Фелисмарте Гирканский», учинчиси эса, «Улуғ капитан Гонсало Эрнандес Кордовский тарихи» бўлиб, унда Диэго Гарсия де Паредес ҳаёти бирга қўшиб ёзилган эди. Руҳоний дастлабки икки сарлавҳани ўқиб, сартарошга юзланди ва шундай деди:

— Бизга дўстимизнинг экономакаси билан жияни камлик қилиб турибди.

— Уларсиз ҳам иш битираверамиз,— деди сартарош,— бу китобларни молхонага олиб бориш ёки яхшигина ловиллаб ёнаётган печкага ташлаш менинг ҳам қўлимдан келаверади.

— Нима? — деди хўжайин.— Муҳтарам жаноблари китобларини ёндирмоқчимилар?

— Манови иккитасини: Дон Сиронхилио ва Фелисмартени, холос.

— Наҳотки бу китоблар еретик ёки флегматик бўлса? — деб сўради хўжайин.

— Дўстим, сиз флегматик эмас, схизматик демоқчи бўлдингиз, шекилли? — деб сартарош унинг хатосини тўғрилаб қўйди.

— Ҳа, ҳа,— деди хўжайин,— фақат бирортасини албатта ёқмоқчи бўлсангиз, яхшиси «Улуғ капитан Диэго Гарсия»ни олақолинглар. Қолган китоблар хусусида шуни айтаманки, улардан бирини ёндиргандан кўра ўзимни ёндиришга изн бераман.

— Иним,— эътироз билдирди руҳоний,— бу китобларнинг

ҳар иккови ҳам ёлғон-яшиқ, бўлмағур, бемаъни нарсалар билан тўла, «Улуғ капитаннинг тарихи» эса чин ҳақиқат; унда Гонсало Эрнандес Кордовскийнинг хизматлари ҳақида ҳикоя қилинади. У ўзининг улуғ ҳамда ҳисобсиз жасоратлари билан бутун дунёда Улуғ капитан номини олган. Эстрададурдаги Трухильо шаҳридан чиққан Диэго Гарсия де Паредес эса ажойиб жангчи бўлган. У шу қадар қудратга эга бўлганки, бир бармоғи билан тегиримон паррагини тўхтатиб қўя олган: кунларнинг бирида бутун бир қўшинни кўприқдан ўтказмай якка ўзи жанг қилган. У кўп қаҳрамонликлар кўрсатган, агар унинг ҳаётини бирорта моҳир тарихчи ёзадиган бўлса, унинг шухрати Гектор, Ахилл ҳамда Роландларникини босиб кетади. Афсуски, у ўз ҳаёти ҳақида ўзи ёзган, ўз саргузаштларини ёзишда жуда камтарлик қилган.

— Бу гапингизни момамга айтинг! — деди хўжайин. — Тегиримон паррагини тўхтатгани ҳайратомуз иш эмиш! Худо ҳақи, агар сиз Фелисмарте Гирканскийни ўқисангиз ёмон бўлмасди. У қиличи билан бир зарба беришда, худди болалар ясайдиган роҳибчалардек, гўё улар ловиядан ясалгандай бешта девни қоқ иккига бўлиб ташлаган. Кейинги сафар эса у тиш-тирноғигача қуролланган бир миллион олти юз мингдан ортиқроқ аскарни бўлган жуда катта қўшинга дуч келган, уларни қўй сурувидай тумтарақай қилиб қувган. Сиз дон Сиронхилио Фракийский ҳақида нима дея оласиз? Кунларнинг бирида у дарёда сузиб бораётганида сув ичидан баҳайбат олов илон чиқиб қолган; бу махлуқни кўрган дон Сиронхилио илонга ташланиб унга миниб олган, томоғидан шундай қаттиқ бўға бошлаганки, ўша заҳотиёқ бўғилаёзган илон ўзини ғиппа бўғиб турган рицарни дарё тубига судраб тушиб кетган. У ерда рицарь ўзини улкан қасрда кўрган, илон эса чолга айланиб, эшитишга арзийдиган нарсаларни ҳикоя қилган. Сиз гапирмай қўя қолинг, сеньор! Мана шу китобни ўқинг, қойил қолганингиздан эсингизни йўқотиб қўясиз. Сизнинг Улуғ капитангиз билан Диэго Гарсиянгизни эса сариқ чақага ҳам олмайман.

Буни эшитган Доротея уста Николасга астагина шундай деди:

— Хўжайинимизнинг дон Кихот бўлиб қолишига озгина етишмайди, холос.

— Мен ҳам шу фикрдаман, — деди сартарош. — Афтидан, у бу китобларда ёзилган нарсалар чин ҳақиқат деб ўйлайди, унга бунинг ёлғонлигини ялангоёқ кармелитлар<sup>42</sup> ҳам уқдира олмаса керак.

— Менга қаранг, иним, — руҳоний хўжайинга мурожаат қилиб гапида давом эди, — бу романларда номи зикр қилинган Фелисмарте Гирканский ҳам, дон Сиронхилио Фракийский ҳам, бошқа рицарлар ҳам аслида бўлмаган, буларнинг ҳаммаси бекорчи ёзувчиларнинг уйдирмаси, улар ўз китобларини беҳуда эрмак учун ёзганлар.

— Етар, мени чалғитишни бас қилинг, муҳтарам жаноблари! Ўзим ҳам бешгача санашни, этигим қаеримни сиқишини би-

ламан. Наҳотки мана шу ажойиб китобларда ёзилганларнинг ёлгон ёки уйдирма эканлигига мени ишонтирмақчи бўлсангиз! Ахир, бу китоблар Қирол Кенгаши аъзолари рухсати билан босилган-ку, улар бундақа ёлгон-яшиқ сеҳргарлик ҳамда жанглар ҳақидаги уйдирмаларни босишга рухсат берадиган жаноблар эмас-ку. Ахир, бу қиролнинг садоқатли фуқароларини тўғри йўлдан оздириш-ку!

— Дўстим, сизга айтдим-ку, ахир, — эътироз билдирди руҳоний, — бу романларнинг ҳаммаси бекорчиларга эрмак учун ёзилган деб. Ҳукумат шахмат ёки тўп ўйини учун ҳам рухсат беради-ку, ахир. Нега энди ҳукумат рицарлик романларини босишга рухсат этмас экан? Бу афсона гапларни тўғрига йўловчи нодон одамлар борлиги кимнинг ҳам хаёлига келарди? Шундай қилиб, сеньор, маъна, китобларингизни олинг-у, уларда нима рост, нима ёлгонлигини ўзингиз ҳал қилинг, бунинг сизга фойдаси зўр бўлади. Илоҳим, қарвонсаройингизда турувчи дон Кихотнинг дардига мубтало бўлманг.

— Йўқ, йўқ, — деди хўжайин, — жаҳонгашта рицарь бўлмайман, ҳали эсимни еб қўйганим йўқ. Ўша шавкатли рицарлар яшаган даврга қараганда ҳозир тартиб-қоидалар тамоман ўзгариб кетганини яхши биламан.

Ўз одатига зид равишда чуқур сукут сақлаб ўтирган Санчо хўжайин билан руҳонийнинг суҳбатига эътибор билан қулоқ солди. Санчо Панса рицарлар ҳақидаги романлар қип-қизил уйдирма эканлигини ва эндиликда рицарлар йўқлигини эшитиб, ўз хўжайинининг Микомикон мамлакатига қиладиган сафари нима билан тугаши устида қаттиқ бош қотириб қолди. Ў ўзини йўқотган, хижолатда қолган аҳволда идальгомиз ухлаётган қазноққа кетди. Лекин бир дақиқадан кейин ҳовлиққанича чопиб келди.

— Бу ёққа, сеньорлар, тезроқ ёрдам беринглар! — деб бақирди у. — Хўжайиним даҳшатли жангга кирди, бунақанги даҳшатли жангни умрим бино бўлиб кўрмаганман. Худо номи билан онт ичиб айтаманки, у Микомикон маликасининг душмани бўлган девга қилич билан шундай ҳамла қилдики, калласини сапчадай узиб ташлади.

— Нималарни валдираяпсиз, иним? — деб хитоб қилди руҳоний Санчо, эсингиз жойидами ўзи? Жин урсин, дев биздан икки минг миля нарида-ю, бу ҳодиса қандай юз бериши мумкин?

Шу пайт қазноқдан дон Кихотнинг шиддатли бақириқлари эшитилди:

— Қўлимга тушдинг-ку, энди омон қолмайсан, ўғри, қароқчи, кўрқоқ!

Бу ҳайқириқлар кимдир деворга зарб билан ураётгандай даҳшатли шовқин-суронга аралашиб кетди. Ҳамма қазноқда нима бўлаётганини билиш учун қулоғини динг қилди.

Шу пайт Санчо яна бақириб қолди:

— Нега қаққайиб турибсизлар? Хўжайинимга ёрдамлашгани бормайсизларми? Айтмоқчи, унинг якка ўзи ҳам душманга бас келаверади. Дев аллақачон ўлган, у худо олдида нопок умр

кесчиргани учун сўроқ берапти. Мен шовиллаб оққан қонни, вино тўла мешдай боши елкасидан думалаганини ўз кўзим билан кўрдим.

— Агар анови дон Кихотми ё дон Алвастими бош томонида турган вино тўла мешни ёриб юбормаган бўлса мени ҳар нима деяверинг. Вино оққан-у, бу аҳмоқ уни қон деб ўйлаган.

У шу сўзларни айтди-ю, жанг бўлаётган жойга ошиқди, хонадагилар ҳам унинг орқасидан қазноққа боришди, уларнинг кўз олдига ғаройиб манзара намоён бўлди. Бизнинг идальго қазноқнинг ўртасида турар, эғнида калта кўйлак, жун босган узун, ориқ оёқлари роса ифлосланган эди: бошида хўжайиннинг ёғи чиққан қизил қалпоғи, чап қўлига Санчо ёмон кўрган чойшабни (негалиги унинг ўзига яхши аён) ўраб олган, ўнг қўлида эса яланғочланган қилич, ҳар томонга ҳамла қилаётгир. Бунинг устига гўё дев билан олишаётгандай қаттиқ қичқирарди. Ажабланидиган жойи шуки, бу ишларни у кўзини юмиб қиларди. Унинг тасавури келажакда бўладиган жанг ҳақидаги фикр билан банд бўлгани учун тушига Микомикон қироллигига етиб боргани ва ўз душмани билан жанг қилаётгани кирди. У чала ўйқуда виноли мешларни девлар деб гумон қилиб, уларни шунчалик чавақлаб ташладики, хона винога тўлиб-тошди. Хўжайин ўз бойлигининг нобуд бўлганини кўриб ғазаби қайнаб кетди; муштумини тугиб дон Кихотга ташланди, агарда шўрлик рицарни сартарош билан руҳоний ҳимоя қилишмаганда борми, уни чала ўлик қилиб дўппослашарди. Бироқ еган муштлари ҳам идальгонинг уйқусини тарқата олмади. Сартарош қудуқдан катта идишда совуқ сув келтириб, унинг бошидан оёғигача қуйишга мажбур бўлди. Ана шундан кейингина у уйғонди. Бу орада Санчо девнинг калласини ахтариб ҳаммаёқни тимирскиларди. Излаши беҳуда эканини англаб шундай деди:

— Бу уйда бирор сеҳргарликка дуч келишни олдиндан билгандим. Ўтган сафар худди шу ернинг ўзида қанчадан-қанча тепки, тарсакиларни едим, уни ўйласам юрагим ваҳимага тушади. Мени ким савалагани бир шайтонга аён. Энди бўлса ҳалиги калла ҳам йўқолди, ахир хўжайиним бир зарба билан уни узиб ташлаганини, қон фонтандай отилиб чиққанини ўз кўзим билан кўргандим-а.

— Қанақа қон, қанақа фонтан? Эй, худо ургур, барча азиз-авлиёларнинг қаҳрига учрагур,— деб бақирди хўжайин,— ҳой фирибгар, бу қон фонтанлари илма-тешик қилиб юборилган мешлардан чиқаётганини кўрмаяпсанми? Эҳтиёт бўл, ҳой тентак, тагин вино дарёсига ғарқ бўлиб ўлмагин. Илоҳим у дунёда хўжайинингни шайтонлар ўзи манови мешларни илма-тешик қилгандай илма-тешик қилиб ташлашсин!

— Ҳеч нарсага тушунмаяпман,— деди Санчо,— агар ўша йўқолган каллани топмасам, менга тегадиган графлик сувда эриган туздек йўқ бўлди деяверинг.

Санчонинг ўжарлик билан ҳадеб такрорлаётган бу беҳуда гаплари шундоқ ҳам дон Кихотнинг етказган зараридан ғазаби

қайнаб турган хўжайиннинг тоқатини тоқ қилди. У олдинги сафаргидек ҳеч нарса тўламай кетолмайсизлар деб худонинг номини шафе келтириб қасам ича бошлади. Энди уларга рицарликнинг ҳеч қандай имтиёзлари ёрдам бера олмайди, у ҳатто илма-тешик қилиб ташланган мешларни ямаш учун ҳам ҳақ тўлашга уларни мажбур қилади. Бу орада дон Кихотни тинчлантириш учун руҳоний унинг қўлидан ушлади, рицаримиз уни малика Микомикон деб ўйлаб, руҳонийнинг қаршида тиз чўкди ва шу сўзларни айтди:

— Эй, ҳазрати олиялари, аслзода ва шуҳратли сеньора, бундан буён ярамас махлуқнинг қилмишларидан қўрқмасдан тинч яшайверишингиз мумкин. Бугундан бошлаб ўзимни сизга берган ваъдамдан халос бўлдим деб ҳисоблайман, худои таолонинг қудрати ҳамда ишқида ёнаётганим ўша маъшуқамнинг марҳамати туфайли ўз ваъдамнинг устидан чиқдим.

— Ана, мен сизларга нималар дегандим? — қичқирди Санчо.— Аслида мен маст ҳам эмасдим. Хўжайиним девни ўлдирганига қойил қолинг. Энди ҳамма иш миҳдай, графлик эса киссамда турибди.

Ҳар иккала тентакнинг: хўжайини билан хизматкорининг бу валдирашларига кулмай бўладими? Ҳамма хахолаб кулиб юборди. Фақат хўжайиннинг юрагига кулги сиғмасди; ахир, у алвастини ҳар жиҳатдан сўкарди. Ниҳоят, сартарош билан руҳоний дон Кихотни ўринга ётқизишга муваффақ бўлишди. Рицарь жуда чарчаган шекилли, ётди-ю, донг қотиб ухлаб қолди. Шундан сўнг дўстларимиз ҳалигача девнинг калласини топа олмаган Санчо Пансани юпата бошладилар. Ҳаммасидан ҳам вносидан ажраган хўжайинни тинчлантириш қийин бўлди. Бу орада хўжайиннинг хотини саннаб йиғлай бошлади:

— Илоҳим отинг ўчгур бу жаҳонгашта рицарь ҳовлимизга касофат келтирди. Унинг келиши бизга қимматга тушди! У ўтган сафар ҳам на овқатга, на кўрпа-ёстиққа, на хашакка, на ўзи, яроқбардори, оти ҳамда эшаги еган сулига — ҳеч нарсага ҳақ бермай кегиб қолган эди. Ушанда у саргузашт излаб юрган рицарлар, илоҳим шунақа саргузашт талаб рицарлар гумдон бўлсин,— ҳақ тўлаши шарт эмас деб айтганди; дайди рицарларнинг удумида шундай дейилганмиш. Кейин эса бошқа бир сеньор — унинг ошнаси менинг энг яхши кўйлагимни сўраб олиб, ўзининг сафарларида шундай дабдаласини чиқарибдики, юрагинг туздай ачишиб кетади. Энди бўлса ўлганнинг устига чиқиб тепгандай анови тентак рицарь ҳамма мешларни илма-тешик қилиб винони оқизиб юборди, илоҳим қонинг ҳам худди шу винодай оққур. Ота-боболарим ҳаққи қасамёд қилиб айтаманки, агар охирги тийинигача ундан ундириб олмасам отимни бошқа қўяман.

Ғазаби қайнаб-тошган бека яна кўп жавради; унинг ёнига хизматкор қиз Мариторнес ҳам қўшилди. Ниҳоят, руҳоний вино, меш, бошқа нарсаларнинг ҳақини тўлаймиз деб ваъда қилиб, уларни тинчитди.

Бу орада девнинг калласини тополмай бўғилиб турган Санчо беканинг саннаб йиғлашига ва руҳонийнинг гапларига диққат билан қулоқ сола бошлади. Худди шу пайтда у ҳеч қандай ёвуз кўзли девнинг йўқ эканлигини, хўжайин эса мешлар билан жанг қилганини англаб қолди. Бундан у ниҳоятда ранжиди. Энг алам қиладигани шу эдики, бу ердагилардан ҳеч ким: хўжайин билан хотини ҳам, руҳоний ҳам Доротеяга маликага қилгандай муомила қилишмасди. Ҳамма унга оддий муносабатда бўлишар, уни Доротея, сенъорина дейишар, ҳазил қилишар ва кулишарди. Унинг ўзи ҳам ўзини оддий тутар, хўжайиннинг қизи билан шивирлашиб кулар, меҳмонлар билан гаплашар, уларга илтифот кўрсатарди; хуллас, у машҳур маликага, қудратли қироллиқнинг ворисига мутлақо ўхшамасди. Санчо ўзини бутунлай йўқотиб қўйди. Унинг миясида даҳшатли шубҳа пайдо бўлди. «Буларнинг ҳаммаси алдаш бўлса-чи? — деб ўйлади у.— Устимиздан кулиш, эрмак қилиш учун хўжайиним билан менинг бошимни айлантиришмаяптимикиан? Шуниси ажабланарлики, руҳонийдек босиқ, ақлли одам ҳам шу ҳазилга аралашибди-я».

## XXV БОБ

### ДОН КИХОТНИНГ ҲАРБИЙ ИШ ВА ИЛМ-ФАН ҲАҚИДАГИ АНТИҚА ФИКРЛАРИ

Ичини шубҳалар кемирган Санчо сабри тугаб, эндигина уйқудан турган дон Кихотнинг ҳужрасига дадил юриб борди.

— Сенъор Ғамгин Қиёфа муҳтарам жаноблари, — деди Санчо, — энди истаганингизча ухлашингиз мумкин. Девни ўлдириб, маликага унинг қироллигини қайтариб бериш ҳақида ташвиш тортмасангиз ҳам бўлади. Бу иш охирига етди.

— Мен ҳам шундай фикрдаман, — деди дон Кихот, — аммо лекин дев билан чакана жанг қилмадим. Ниҳоят, унга қақшатғич зарба беришга муваффақ бўлдим, калласини танидан жудо қилдим, қон эса дарё бўлиб оқди.

— Қизил винодек бўлиб оқди деяверинг, — деди Санчо, — муҳтарам жанобларига маълум қилишга журъат этаманки, билмасангиз билиб қўйинг, сиз ўлдирган дев каттакон меш, қон эса олти ароб<sup>43</sup> қизил вино, кесилган бош эса... қуриб кетсин шу бош, сизнинг ғалабангиз далили сифатида малика Микомиконга кўрсатаман деб уни роса ахтардим-у, лекин ҳеч қаердан топа олмадим.

— Нималарни валақлаяпсан, аҳмоқ! — дон Кихот ўрнидан қўзғалиб, ғазаб билан қичқирди. — Сен бутунлай ақлдан озганга ўхшайсан.

— Яхшиси, ўрнингиздан турунг, муҳтарам жаноблари, нималар қилганингизни кўриб, дев билан олишганингиз учун қанча пул тўлашингизни ҳам билиб қўйинг. Хўжайин билан хотини илма-тешик қилиб ташланган меш, тўкилган вино учун каттагина пул тўлашга мажбур қилишади. Сенъор, бу ҳали оз! Малика Микомикон Доротея деган оддий бир хонимга айланиб қолди.



Сиз ухлаб ётганингизда ана шунақа ғаройиб ҳодисалар юз берди.

— Ҳеч нарса мени ажаблантира олмайди,— жавоб берди дон Кихот,— ўтган сафар ҳам шу ерда тўхтаганимизда, бу уйда сеҳрли нарсалар юз беришини сенга айтгандим, эсингда бўлса керак. Ҳозир ҳам ўшанақа ҳодиса юз берган, бунга ажабланмаслик керак.

— Агарда мени осмонга итқитишган чойшаб ҳам сеҳрланган бўлганида эди, бу гапларга ишонган бўлардим. Ахир, у ҳақиқий, оддий бир чойшаб эди-ку. Бунинг устига ҳозирги хўжайин, илгари ҳам худди ўшанинг ўзи эди, ҳазилу аския билан чойшабнинг бир четидан ушлаб туриб, мени итқитгани яхши эсимда. Мен гуноҳкор, оми одам бўлсам ҳам, ҳамма нарса шу тариқа юз берган экан, бу ерда ҳеч қандай сеҳргарлик йўқ, балки буни яхшигина савалашнинг ўзгинаси деб ўйлайман.

— Майли, худо хоҳласа, ҳаммаси ўз изига тушиб кетади.— деди дон Кихот,— кийимларимни бер, сен айтган ҳамма ҳодисаларни ўз кўзим билан кўрмоқчиман.

Дон Кихот ўз яроқбардори ёрдами қазноқда кийинаётганда руҳоний ва сартарош Доротея билан биргаликда бундан кейинги режалар ҳақида фикр юритишарди.

Ниҳоят, улар Доротея илгаригидек малика Микомикон ролини ўйнайверсин, дон Кихот эса девга қарши олиб борилган жанг ҳали тамом бўлмаганига ва маликани Микомикон қироллигига ча кузатиб қўйишига ишонтиришга жазм қилишди.

Улар ўзаро фикрлашиб олишмасданоқ дон Кихот тўлиқ қуролланган ҳолда ҳозир бўлди: унинг бошида пачоғи чиққан Мамбриннинг дубулғаси — сартарош жоми, серсуяк гавдасида занглаган совут, қўлида қалқон. У тантанавор, вазмин юриб гўзал Доротеяга яқинлашди ва шундай деди:

— Соҳибжамол сенбора, яроқбардорим сиз ҳазрати олияларининг ҳалок бўлиб йўқолганингизни, малика ҳамда машҳур сенборадан оддий қизга айланиб қолганингизни айтди. Агар бу ҳодиса сизни ҳимоя қила олмаслигимдан хавфсираб афсунгар қирол, яъни отангиз изми билан юз берган бўлса, шуни билингки, у жуда адашади, жаҳонгашта рицарлар тарихидан яхши хабардор эмас экан. Агарда у ҳам мен сингари рицарлик романларини диққат билан ўрганганида унчалик машҳур бўлмаган рицарларнинг ҳозиргидек эмас, балки бундан ҳам зўрроқ жасоратлар кўрсатганлари ҳақидаги беҳисоб мисолларни топарди. Қаҳри қаттиқ, кучли дев Пандафиляндони енгиш менинг учун ҳеч гап бўлмади. Мен у билан бир неча соат илгари тўқнашдим ҳамда уни ўлдирдим. Камтарлигим бу жасоратни ёйишга йўл қўймайди. Вақти келиб бу қаҳрамонликнинг тафсилотини билиб ҳам қоларсиз.

— Нималарни валдираяпсиз, сенбор,— шу пайт хўжайин гапга аралашди.— У қанақасига дев бўлсин. Сиз бор-йўғи вино тўла мешларимни илма-тешик қилдингиз, холос.

Лекин руҳоний ишора билан дон Кихотнинг гапини бўлмасликни илтимос қилди.

— Эй аслзода, тахти тожидан маҳрум этилган сеньора,— деб дон Кихот гапида давом этди,— башарти ҳурматли отангиз — қирол Микомикон менинг қудратимга ишонмай; сизни бошқа қиёфага киритган бўлса, илтимос қиламан, шу қиёфага кирганингизга ишонманг, чунки дунёда менинг қиличим йўл очадиган жойда хавф-хатар бўлмайди. Душманингизнинг бошини сапчадай узиб ташлаган эканман, ҳадемай сизнинг бошингизга қонуний равишда ўзингизга тааллуқли бўлган тожни кийгизаман.

Дон Кихот маликадан жавоб кутиб жим қолди, у ўзини жиддийликка олиб ҳозиржавоблик билан жавоб қайтарди:

— Шавкатли Ғамгин Қиёфа рицарь! Менинг ўзгариб қолганлигимни айтган одамнинг гапига мутлақо ишонманг, чунки кеча қандай бўлсам бугун ҳам шундайман. Ғолиб қўлингизнинг қудратидан фойдаланиш фикридан ҳали воз кечганимча йўқ! Сеньора, отам ҳақидаги яхши фикрингизда қолаверинг, у жуда донишманд одам. Ахир, у сизни учратишимни, менинг ҳимоячим, халоскорим бўлишингизни олдиндан башорат қилган. Мен аминманки, у сизни жаҳонгашта рицарлар ичида энг машҳури ҳамда энг ботири деб билган фикридан ҳеч қачон қайтмайди. Эртага яна йўлга равона бўламиз, бугун кеч бўлиб қолди, кўп йўл юришга улгурмаймиз.

Ақлли қиз Доротея ана шундай деди. Уни эшитган дон Кихот ғазабланиб Санчога мурожаат қилди:

— Шуни билиб қўйки, Санчо, бутун Испанияни ахтарганда ҳам сенчалик аҳмоқни топиб бўлмайди. Айт-чи, ўғривачча, ярамас одам, ҳозиргина малика Доротея деган оддий қизга айланиб қолганини, мен узиб ташлаган калла вино солинган меш эканлигини менга айтмадингми? Хуллас, шундай бемаза гапларни айтдингки, умрим бино бўлиб бунчалик хижолатда қолмагандим. Худо номи билан онт ичиб айтаманки... (Шу пайт кўзини осмонга тикди, тишларини гижирлатди) ҳозироқ дабдалангизни чиқариб ташлайман! Бу барча алдоқчи яроқбардорлар учун яхшигина сабоқ бўлсин.

— Мендан аччиғланманг, сеньорим,— деди Санчо босиқлик билан.— Ҳамма нарса илгаригидай қолгани, малика Микомикон ҳеч қандай қиёфага кирмаганига сиздан кўра кўпроқ хурсандман. Демак, бу ишда ўз улшим — губернаторлик ёки бирорта оролни олиш умиди йўқолмайдиган бўлди. Хўш, девнинг ўрнига вино солинган мешларга ҳужум қилганингизга келсак, худо ҳақи, адашганим йўқ. Тешилган мешлар ҳозиргача тўшагингизнинг бош томонида, қизил винолар эса ерда қўл-қўл бўлиб ётибди. Менга ишонмасангиз, озгина сабр қилиб туринг. Ҳали кўрасиз, сеньор хўжайин келтирган зиёнингиз учун мумайгина пул талаб қилади.

— Менга қара, Санчо, мени кечиргин-у, лекин сен қип-қизил аҳмоқнинг урасан. Наҳотки бу мени таъқиб этиб юрган ёвуз сеҳргарнинг қилмиши эканлигини тушунмасанг? Лекин бу ҳақда гапни бас қилайлик, барибир сени ўнглаб бўлмайди.

— Бас,— деб такрорлади руҳоний ҳам.— бу ҳақда бошқа гапирмайлик. Модомики, сеньора малика эртага жўнаймиз дедими, шундай қилайлик. Оқшомдан сахаргача ширин суҳбат қуриб ўтирайлик, эртага олижаноб рицар дон Кихотнинг орқасидан йўлга тушамиз, чунки унинг йўлда кўрсатадиган қулоқ эшитмаган жасоратлари ҳамда қаҳрамонликларини кўришни истаймиз.

— Сизларга хизмат қилиш, кузатиб бориш менинг бурчим,— деди дон Кихот.— Менга кўрсатган илтифотларинг, менинг ҳақимдаги яхши фикрларинг учун бағоят миннатдорман. Жонимни қурбон қилиб бўлса ҳам ишончларингни оқлашга интиламан.

Бу орада кеч кирди, меҳмонхона эгаси руҳонийнинг буйруғи билан яхшигина кечки овқат ҳозирлаш ҳаракатига тушди. Ҳамма стол атрофига ўтирди, дон Кихотни эса, қаршилик кўрсатса ҳам, энг ҳурматли жойга ўтқазди. Дон Кихот малика Микомиконнинг ўз ҳимоячиси билан ёнма-ён ўтиришини истади. Овқат маҳалида хушчақчақлик авжига чиқди. Айниқса, дон Кихот тақсимчани бир томонига суриб, зўр ҳавас билан гапга тушганида ўтирганлар хурсандчилигининг чеки бўлмади.

— Сеньорлар, агарда яхшигина ақл юритилса, оламдаги барча касб-ҳунардан рицарлик устун туришини тан олиш керак. Рицарлар кўрсатган жасорат олдида бошқа одамларнинг иши арзимас бир нарсадай бўлиб қолади. Манови машҳур малика Микомиконга ҳамда унинг халоскори бўлган менга қараб туриб жаҳонгашта рицарлик касби ва маҳоратининг одамлар ўйлаб чиқарган касб, маҳоратдан устун эканлигига ким ҳам шубҳа билдира олади? Рицарларнинг ҳаёти катта хавф-хатар ва синовлар билан боғлиқ эканлигини рад этишга ким ҳам журъат эта олади? Ҳарбий билимдан юқори билимлар ҳам бор деган кишилар жуда янглишадилар. Аслида улар нима дётганларини ўзлари ҳам билишмайди. Улар келтирган далилга кўра, маънавий меҳнат жисмоний меҳнатдан устун эмиш. Яна уларнинг фикрича ҳарбий ишда маънавий фазилатлар ҳеч қандай роль ўйнамас эмиш, гўёки бунда мардикорлар ҳунаридек жисмоний кучдан бўлак ҳеч нима талаб қилинмас эмиш. Бизнинг рақибларимиз шундай дейишлари билан ўз нодонликларини номойиш қиладилар, холос. Биз ҳарбийлар шундай ишларни қиламизки, у зўр ақл ҳамда уддабуронликни талаб қилади. Наҳотки бутун бир қўшин ёки шаҳарнинг масъулияти зиммасида бўлган жангчининг ақли танасидан камроқ ишласа? Фақат жисмоний кучнинг ўзигина душманнинг ниятини, унинг режаларини, ҳарбий ҳийла ҳамда макрларини англаш, олдиндан билишга, сизга таҳдид қиляётган хавфни йўқотишга ёрдам бера олармиди? Буларнинг ҳаммаси ақлнинг иши, тана иши эмаслиги равшан. Энди кўрайлик-чи, кимнинг ақли ўткирроқ. Буни фан билан ҳарбий таълим ўз олдига қўйган вазифаларни муҳокама қилиш орқали биламиз, чунки энг олижаноб мақсадга интилан ақлгина юқори туради. Фаннинг мақсад ва вазифаси бахт-саодатни (эзгуликни) адолатли равишда тақсимлаш, ҳар кимга ўз улушини бериш,

саховатли қонунларнинг бажарилиши учун жон куйдириш ҳамда ғамхўрлик қилишдан иборат. Бу мақсад шубҳасиз олижаноб, юксак, зўр мақтовга сазовордир, лекин ҳарбий таълим интилаётган мақсад ҳар ҳолда кўпроқ мақтовга лойиқ, чунки унинг мақсади — тинчлик, кишилар фақат осойишта ҳаётдагина роҳат-фароғатда яшаши мумкин. Ана шу тинчлик урушнинг чинакам мақсади, агар урушнинг мақсади шу бўлса, жангчининг мақсади ҳам шу. Демак, ҳарбий таълимнинг ўз олдига қўйган мақсадлари фан интилаётган мақсадлардан муҳимроқ, юқорироқ туради.

Дон Кихот шу қадар берилиб, аниқ ва оқилона гапирардики, шу дамда ўтирганлардан бирортаси ҳам уни тентак деёлмас, балки унинг гапларини жон қулоғи билан эшитарди. У сўзида давом этди:

— Хўп, энди талабалар тақдирини олиб кўрайлик. Уларнинг катта бахтсизлиги — камбағалчилик: талаба кўпинча оч қолади, совуқ еб қалтирайди, ғарибона кийинади. Ҳар ҳолда у бир бурда нонини топиб ейди, бу зодагонларнинг дастурхони қолдиғи бўлса ҳам, тиланиб олса ҳам майли, ҳар қалай ҳаво совуқ кунларда талаба учун яхши одамларнинг уйида исиниб олишига печка ёки манқал топилади. Албатта, талабанинг кўйлаги оз, иссиқ тўн эса анқонинг тухуми эканлиги ҳаммага маълум. Албатта, улар қоқилиб, йиқилиб, яна ўрнидан туриб кетаётган йўл оғир, нотекис, эгри-бугри, лекин тиришқоқлик, интилиш туфайли талаба орзу қилган олимлик даражасига эришади, одам бўлади. Ана ўшанда унинг учун маъмурчилик, тўкин-сочинлик бошланади: у мазали овқатлар ейди, қиммат матолардан кийимлар кияди, ҳамма ерда ҳурмат-иззат кутади уни. Энди талаба билан жангчининг тақдирини бир-бирига таққослаб кўринг. Бу бахтиқаро жангчидан ҳам қашшоқроқ одам оламда йўқ: у озгина маошга қаноат қилиб яшайди, лекин бу маошни ҳам доимо ушлаб қолишади ёки мутлақо тўлашмайди. Тўғри, баъзида у талончилик ҳисобига ҳам кун ўтказади, лекин шуни ҳам унутмангларки, у шу ишга қўл уриши билан ўз ҳаётини таҳлика остида қолдирибгина қолмай, гуноҳга ҳам ботади. Лекин бундай гуноҳ орттириб тузукроқ умр кечириш ҳаммавақт ҳам насиб бўлавермайди унга. Шунинг учун ҳам бир бурда қаттиқ нон топса ҳам шукур қилади, иссиқ овқатни эса камдан-кам учрайдиган лаззатли таом деб билади, ана шунинг учун ҳам дабдаласи чиққан совути одатда унинг учун шоҳона кийим ҳамда кўйлак ўрнида хизмат қилади. Жазирама ёз кунларидан — у қуёш тафтида пишади, қишда эса изғирин совуқда шамдек қотади, ўз қайноқ нафаси билангина ўзини иситади. Кечаси ўринда ётиб, кундузги азоблардан қутулади деб ўйламанг. Агарда бу ўрин унинг кўзига тор бўлиб кўринса бунга ўзи айбли, чунки яланғоч ердан ўзига яраша жой ўлчаб олиб, чойшабнинг ғижим-ланишидан асло чўчимай, истаганича роҳат қилиб ётиши мумкин. Ва ниҳоят, жанг кунлари ҳам етиб келади. Бу кун мард жангчига қандай юксак марҳаматлар ҳада қилиши мумкин? Агар дайди ўқ чаккасини ялаб ўтса, дока ё латта-путталардан бошига табиблар

қалпоғи кийгизилади ёки у фахрли жароҳат олиб, қўли ё оёғидан ажралади. Башарти фалак унга марҳамат қилса, жангдан соғ-саломат чиқадиган бўлса яна илгаригидек камбағал, фақирлигича қолаверади. У яна ўзини кўрсатиш учун янги жанг ёки ғалабаларни кута бошлайди, бундай жангда эса у мукофот олишдан кўра ҳаётини осонгина йўқотади. Сеньорлар, бир жангчи ўзини кўрсатгунча қанча-қанча одам ўлиб кетгани ҳақида ҳеч ўйлаб кўрганмисиз? Мен қандай жавоб беришларингни олдинданок билман. Сизлар ўлган, майиб бўлганлар минг-минглаб топилади, мукофотланган одамлар эса бармоқ билан санарли дейсиз. Олимлар орасида ишлар бутунлай бошқача, тўғри эмасми? Улар тирикчилик ўтказиш учун доимо бирор нарса топа оладилар, ёмон яшамайдилар. Демак жангчининг меҳнати оғир, лекин оладиган мукофоти оз. Энди ханузгача ҳал этилмаган, ҳарбий ишнинг бошқа фанлардан устун туриши масаласига яна қайтайлик. Илм тарафдорлари бизсиз ҳарбий иш яшай олмайди, чунки уруш ўз қонунларига эга, бу қонунларни фақат фан очиб беради, холос, дейишади. Ҳарбий иш тарафдорлари эса уларга эътироз билдириб, агар ҳарбий маҳорат бўлмаганда эди, бу қонунларнинг ўзи бўлмас эди, зотан шугина шаҳарларни химоя қилади, йўл хавфсизлигини таъминлайди, денгизни қароқчилардан қўриқлайди, хуллас, ҳаммаёқда тинчлик, осойишталикни ўрнатади, деб айтади. Ахир, илгаридан исбот қилинган-ку, нима қиммат турса, у қадрланиши, баҳоси ҳам ортиқ бўлиши лозим. Олимлар машҳурлик ҳамда тўқчиликка қаттиқ меҳнат қилиш, оч қолиш, қашшоқлик, бош қотириш, ошқозонни бўш қақлаш ва бошқа нарсалар эвазига эга бўлади. Бироқ яхши жангчи бўлиш учун жангчи олимнинг бошига тушган барча қийинчиликларга бардош бериши, бунинг устига ҳар дақиқада ўз ҳаётини таҳлика остида қолдириши зарур. Агар олимнинг кўнглига эҳтиёж ҳамда қашшоқлик ваҳима солиб турса, бу қамал қилинган қалъада қолган жангчининг қўрқуви олдида нима деган гап? Айтайлик, у бирорта истеҳком ёки қалъа олдида соқчилик қиляпти, у ана шу минор остидан душманнинг лаҳм қазиб келаётган, уни портлатмоқчи эканлигини сезади. Бироқ бу даҳшатли қўрқувга қарамай ўз постини ташлаб кетишга ҳаққи йўқ. Унинг қўлидан келадиган бирдан-бир иш лаҳм ҳақида ўз капитанига хабар бериб қўйиш, холос, шундан кейин у яна ўз жойига келиб туради, яна бир дақиқадан кейин эса қанотсиз осмону фалакка кўтарилишини кутиб ўтиради. Лекин урушда бундан ҳам хавфлироқ ҳодисалар юз беради. Тасаввур қилинг, очик денгизда иккита кўп эшкакли кема бир-бирига чангак ташлайди; аскарлар эни икки фут келадиган тахта йўлда туришга мажбур; уларга ажал уруғини сепувчи душманнинг замбараклари тўғрилланган; уларнинг оғзи бир найза бўйичалик нарида; сал бежо ҳаракат жанг қилувчиларни денгиз тубига фарқ қилиши мумкин, бироқ шунга қарамай ор-номус устунлик қилиб, улар душман замбарағи ўқларига кўксини қалқон қилишади, торғина тахта йўлдан бориб душман кемасига ташланишади. Бу ерда ажабланишга арзийдиган нарса шуки,

бири денгиз тубига ғарқ бўлса, бошқаси дарҳол унинг ўрнини эгаллайди<sup>44</sup>. Уруш даҳшатлари ичида бунақа жасурлик, мардликни мутлақо топа олмайсиз! Ана шу ўт очувчи қуроллар яратилмасдан олдин жанг қилганлар анча бахтиёр эди; имоним комилки, кимки шу қуролни ўйлаб чақарган бўлса, у ҳозир ўзининг шайтонга хос кашфиёти учун дўзахда жавоб берапти, азоб тортяпти, чунки ана шу қуролнинг шарофати билан жасур кабальеро бирор разил қўрқоқнинг қўлида ҳаётдан ажралади. Жангчининг жасур қалбини мардлик, матонат алангалатади, тўсатдан узоқ йиллар ширин ҳаёт кечиришга лойиқ бўлган одамнинг ўйларини ҳам, ҳаётини ҳам аллақайлардан учиб келган дайди бир ўқ сўндиради. Жасур жангчини ўлдирган қотил эса ўз лаънати машинасининг ўтидан талвасага тушадиган қўрқоқ бир киши бўлиб чиқади. Шунинг учун ҳам баъзида биз яшаётган мана шундай жирканч замонда жаҳонгашта рицарликни танлаганимдан пушаймон бўлиб кетаман; ғарчи мени ҳеч қандай хавф-хатар чўчитолмаса-да, ҳар қалай порох ёки кичкинагина қўрғошин парчаси қиличим кучи билан оламда шуҳрат қозонишдан маҳрум қилиб қўймаса деб хижолат тортаман. Худо ёр бўлиб, ўз ниятларимни амалга ошира олсам, шундай хавф-хатарларни бартараф қиламанки, бунақасини ўтган замон жаҳонгашта рицарлари мутлақо кўрмаган, ана шунда мен шон-шуҳратга ботаман.

Дон Кихотнинг узундан-узоқ нутқи ана шундай бўлди. У гапга шу қадар берилиб кетдики, Санчонинг аввало озгина тамадди қилиб олиб, кейин фикр юритиш лозимлигини айтишига қарамай, овқатдан бир луқма ҳам тотмади. Дастурхон атрофида ўтирган бошқа кишилар эса, мана шундай ақлли, ширинсўз одамнинг гап рицарлик томон бурилиши биланок тентакдан фарқи бўлмай қолишдан беихтиёр афеусланишди. Руҳоний, ғарчи ўзи олимлар табақасига мансуб бўлса-да, дон Кихотнинг фикрларига тўлиқ қўшилганини айтди.

Дон Кихотнинг нутқини фақат руҳонийгина эмас, балки ҳамма қувватлади: барчалари мамнун ва хурсанд эдилар. Бу орада вақт ярим кечадан оғиб қолган, шу боисдан туннинг қолган қисмида дам олишга жазм этишди. Фақат дон Кихотгина дам олмаслигини ва тонггача қалъани қўриқлаяжагини айтди.

— Нима ҳодиса бўлишини ким билсин? — деди рицарь. — Тўсатдан бирорта дев ёки ёвуз сеҳрғар ҳужум қилиб қолиши ҳам мумкин-да.

Атрофдагилар унга миннатдорлик билдириб, ётишга ҳозирлана бошлади. Хонимлар ўз хоналарига кириб кетишди; эркаклар тўғри келган жойда ётиб қолди; Санчо эса бошқалардан кўра дурустроқ ўрнашиб, отхонадаги эшаги абзалларига ёнбошлади. Дон Кихот эса ҳали ҳам қалъа деб юргани карвонсаройни қўриқлаш учун Росинантига миниб йўлга чиқди.

## КАРВОНСАРОЙДА ЮЗ БЕРГАН ҒАРОЙИБ ҲОДИСА

Бутун меҳмонхона чуқур уйқуга чўмди, фақат хўжайиннинг қизи билан хизматкор қиз Мариторнесгина уйғоқ. Улар дон Кихотнинг отлик, тўлиқ қуролланган ҳолда карвонсарой атрофида айланиб юрганини кўришиб, у билан ҳазиллашмоқчи бўлишди.

Ҳамма уйлар ичида фақат битта чордоқнинг деразаси йўлга қараган эди. Ҳазилкашлар шу дераза ёнига жойлашиб, дон Кихотни кўриб туришди; у отда найзасига суянганича ўтирар, вақти-вақти билан худди юраги ёрилиб кетаётгандек чуқур, ғамгин хўрсиниб кўярди. У хўрсинаркан, мулойим қилиб шундай дерди:

— О, маликам Дульсинея Тобосская — гўзалларнинг гўзали, ақл хазинаси, саховатлар эгаси, оламдаги барча энг яхши нарсаларнинг тимсоли! Шу топда нима қилиб ўтирибсан? Сенга хизмат қилиш ниятида хавф-хатар йўлига кирган, ишқингда ёнган рицарни эсламаяпсанмикин? Эй, тўлин ой, ундан менга хабар келтир! Эҳтимол, сен ҳозир унинг юзига тикилиб тургандирсан, унинг ҳашаматли саройи кўшкида кезиб юрганини ёки шийпонда панжарага суяниб, сенга тикилиб, менинг ҳақимда ўй сураётганини, менинг мажруҳ қалбимни эзаётган дардни ўзининг шон-шуҳрати, номусига ҳалал етказмай юмшатиш ҳақида ўйлаётганини кўриб тургандирсан. Эҳтимол, у тортган азобларим эвазига хурсандлик, дардмандликка — юпанч, ўлим ўрнига ҳаёт, хизмат эвазига илтифот кўрсатиш тўғрисида бош қотираётгандир! Эй, тоғлар ортидан маъшуқам билан дийдор кўришишга ошиқаётган нурли қуёш, ёлбораман сенга, мендан унга салом айт! Лекин унга тикилиб туриб, юзидан бўса ола кўрма, йўқса, уни сендан рашк қиламан, рашким шу қадар кучлики, Фессал водийсидами ёки Пеней соҳилларидами, аниги эсимда йўқ, чопқир нимфани қувиб, унга рашк қилган сен гўзал Фебнинг рашки меникининг олдида ҳеч нарса эмас.<sup>45</sup>

Дон Кихотнинг таъсирчан гапи худди шу ерга етганда, хўжайиннинг қизи уни аста чақириб қолди:

— Муҳтарам сеньор! Марҳамат қилиб бу ёққа келсангиз!

Дон Кихот унинг овози келган томонга бошини бурди ва ҳаммаёқ сутдек ойдинга ғарқ бўлган бир пайтда кимдир уни дераза томонга чақираётганини кўрди (дераза унинг кўзига ҳашаматли қалъалардаги катта, олтин панжарали деразага ўхшаб кўринди, чунки унинг меҳмонхонани қалъа деб билганидан хабаримиз бор); ўша заҳоти унинг ожиз тасаввурида, ўтган сафаргидек, қалъа бекасининг гўзал қизи қалбидаги муҳаббат жўш уриб, ўз шаънига доғ туширишдан ҳам қўрқмай, Дульсинея Тобосскаянинг шафқатсизлигидан азоб чеккан рицарнинг дардини енгилатмоқчи ва уни юпатмоқчи деган хаёл жонланди. Ўзини одобсиз деб ўйламасликлари учун Росинантнинг бошини буриб, деразага ақинлашди-да, хўрсиниб гап бошлади:

— Эй, соҳибжамол хоним! Сизнинг илтифотингиз, улуғ сахо-

ватингизга муносиб бўлмаган бир кишига бунчалик илтифот қилаётганингиздан афсусланаман. Бунинг учун мендек толеи паст жаҳонгашта рицарни койимаслигингиз лозим, чунки унинг муҳаббати бир кўргандаёқ ишқи кўнглини забт этган маъшуқасидан бошқага хизмат қилолмайди. Эй гўзал сеньора, газабланманг, мени унутинг, ўз оромгоҳингизга кириб кетинг, мени ўз марҳаматингиздан баҳраманд қилишга уринманг, мени ўз ҳолимга қўйинг. Лекин муҳаббат билан эмас-у, бошқа йўл билан мурувватингиз учун миннатдорчилик билдиросам, майли, истагингизни сўранг. Гўзал рақибам, ҳозир ёнимда бўлмаган қалбим ҳукмдори номи билан онт ичиб айтаманки, нимани истасангиз дарҳол бажо келтираман. Илонлардан ўрилган медузанинг сочини ёки шишага қамалган қуёш нурини талаб қилинг, ҳаммасини муҳайё қиламан.

— Сеньор рицарь, бекамга буларнинг ҳеч қайсиси даркор эмас,— деб унинг гапини бўлди Мариторнес.

— Бекангизга нима керак экан, эй назокатли хоним?— деб сўради дон Кихот.

— Бекам қўлингизни чўзишингизни илтимос қиляптилар, холос,— деб жавоб қилди Мариторнес.— У қўлингиз тегиши биланок ўзини мана шу деразада кўриниш каби ўз шаънига доғ туширишдек хавфли қадамга ундаган ишғиёқ туғени тинчийди деган умидда; борди-ю сеньоранинг отаси унинг бу қилмишини билиб қолса, энг енгил жазо берганда бекамнинг қулоғини кесиб ташлайди.

— Кошки шундай бўла қолса!— хитоб қилди дон Кихот.— Қани, шундай қилиб кўрсин-чи, ошиқи беқарор қизига қўл кўтаришга журъат этган шафқатсиз отани қандай оғир жазо кутса, уни ҳам шундай жазо кутади!

Мариторнес дон Кихотнинг ўз илтимосига кўнаётганини кўриб, зинғиллаганча пастга тушди, отхонага кириб, Санчо Панса эшагининг нўхтасини олди ва ўша заҳотиёқ орқасига қайтди, худди шу топда дон Кихот Росинантнинг эгарига оёғини қўйиб, ўзи тасаввур қилган ҳамда ортида муҳаббат ўқидан кўкси яраланган қиз турган панжарали деразага қўлини чўзиб шундай деяётган эди:

— Сеньора, бу қўлни, тўғрироғи, ёвузлар гарданига қамчи бўлиб тушгувчи қўлни қабул этгайсиз. Такрор айтаман, ҳали ҳеч кимсанинг, ҳатто ишқи кўнглимни банд этган ўша вужудим ҳоқонининг ҳам қўли тегмаган мана шу қўлларимдан ушланг. Мен уни сизга бўса олиш учун эмас, балки ундаги пайларнинг чайрлигини, мушакларнинг ўйнаб туришини, томирларининг бўртиб чиққанлигини кўриб, қўл эгасининг куч-қудратига баҳо беринг деб чўзаётирман. Шунда Мариторнес:

— Уни ҳозир кўрамай,— деди.

У нўхтадан сиртмоқ ясаб, дон Кихотнинг қўлига солди, бир учини эшикнинг лўкидонига маҳкам боғлади. Қайиш сирилиб қўли оғриганини сезган дон Кихот шундай деди:

— Назаримда, марҳаматли хоним қўлимни нозик бармоқлари билан эмас, темир исканжа билан қисаётганга ўхшайдилар-а. Қў-



лимга бунчалик азоб берманг, сизга етказган озоримда унинг ҳеч қандай айби йўқ. Шунин билан қўйингки: ошиқ кўнглига бунчалик бешафқат ўч олишни тугиб қўймайди.

Бироқ дон Кихотнинг гапини ҳеч ким эшитмади. Иккала қиз ҳам кула-кула қочиб кетишди, у эса қўли боғланганича қолаверди.

Бечора зўр ташвиш ва қўрқувда қолди. Росинант сал қимирла-са тамом, рицаримиз бир қўли билан осилиб қолади. Шу сабабли у қимирлашга қўрқар, бутун умиди ювош, итоаткор отида эди. Ниҳоят, дон Кихот боғланиб қолганини, хонимларнинг эса қаёққа қочиб кетганликларини фаҳмлади ва бу ишда яна сеҳргарлар иштирок этгандир деб ўйлади, албатта. Шунда у ўзининг бефаросатлиги ва соддалигига лаънатлар ўқий бошлади: у яқиндагина анчагина кўнгилсизликларни кўрган қалъага яна келмаслиги керак эди. Ахир, жаҳонгашта рицарларнинг қонунида, агар бирор рицарнинг саргузашти бахтсизлик билан тугаса, унда бу бошқа бир рицарнинг қисмати эканини англатади, инчунун, унга яна қўл урмаслик лозим дейилган-ку. Ана шуларни ўйлаб, у қўлини бўшатиш учун ҳадеб силтайверди. Лекин унинг хатти-ҳаракатлари натижасиз эди, қайиш тобора унинг қўлини қаттиқроқ қисар, оғриқ эса баттар кучаярди. Бирорта одам ёрдамга келиб бўшатиб юбормагунча унинг эгар устида қимирламай туришдан бошқа иложи қолмаган эди. У барча сеҳр-афсунларни парча-парча қилувчи Амадиснинг қиличини қўмсади, ўзини мана шу деразага боғлаб қўйган тақдирни лаънатлади, ахир, ҳозир унинг ёрдамига қанчадан-қанча азият чеккан, оч-яланғоч одамлар муҳтож; рицаримиз ўз маъшуқаси Дульсинея Тобосскаядан ҳам хаёланмадад сўради ва ниҳоят, ҳозир бутун ёруғ жаҳонни унутиб эшагининг эгарини бошига қўйиб донг қотиб ухлаб ётган садоқатли яроқбардори Санчо Пансани чақира бошлади. Санчо эшитмаётганига қаноат ҳосил қилган дон Кихот донишмандлардан Лиргандео билан Алькифони ёрдамга чақирди, саховатли Ургандудан ҳимоя қилишини ўтина бошлади. Ниҳоят, тонг ёриша бошлаганда у шу қадар талвасага ва бесаранжомликка тушдики, ҳўкиздай бўкираверди. Рицаримизга кундуз ҳам озодлик бахш этмайдигандай, мана шу ерда умрбод сеҳрланганича қоладигандай бўлиб туюлди. Ундаги бу ишончнинг мустаҳкамланиб қолишига Росинантнинг ўзини ғалати тутиши ҳам сабабчи бўлди: шафодор от тун бўйи қоққан қозикдай қилт этмай турди. Рицаримиз бу ёмон аломат, демак, отим билан биргаликда самовий навжардоғларнинг ёвуз таъсири тугамагунча ёки саховатли бошқа бир сеҳргар бу сеҳрни йўқ қилмагунча шу кўйи емай, ичмай, ухламай тураверарканман деб ўйлади.

Тонг ёриша бошлаши биланоқ карвонсаройга отларининг эгарига мушкет осган, башанг кийинган тўртта отлик етиб келди. Меҳмонхона дарвозаси берк бўлгани учун келган одамлар уни тақиллата бошладилар. Уларни кўрган, ҳеч нарсага аҳамият бермай ўзини соқчи, деб ҳис этган дон Кихот ғазаб билан қичқирди:

— Рицарлармисиз, яроқбардорлармисиз, ким бўлишингиздан

қатъи назар, бу қалъанинг дарвозасини тақиллатишни бас қилинг! Шундай каллаи саҳарда қалъа эгаларининг ухлаётганига, қуёш заррин нуруларини оламга сочгандагина дарвозалар очилишига наҳотки ақлларинг етмаса? Кун ёйилгунча сабр қилинглар, ана шундан кейин сизларни бу ёққа қўйса бўладими-йўқми эканлигини биламини.

— Бу қанақасига қалъа бўлсин? Нималар деяпсиз ахир? Карвонсаройда такаллуфга ўрин борми?! Агар сиз карвонсаройнинг эгаси бўлсангиз, буйруқ беринг: дарвозани очишин, биз сайёҳлармиз, отларимизни овқатлантириб олгач, яна йўлга тушамиз, жуда шошиляпмиз.

— Жаноблар, наҳотки мен карвонсарой эгасига ўхшасам? — деб сўради дон Кихот.

— Кимга ўхшашингизни билмайман, — деди отлик. — Фақат қўноқхонани қалъа деб сафсата сотиб ўтирганингни биламан, холос.

— Бўлмасам-чи, бу қалъа-да, — деди дон Кихот, — шу атрофдаги энг яхши қалъа, бу ерда қўлида салтанат ҳассасини тутган, бошига тож кийган одамлар паноҳ топишган.

— Назаримда бу ерда масҳарабозлар гурпушаси тўхтаганга ўхшайди: маълумки уларда кўпинча қаттиқ қоғоздан ясалган тожлар, салтанат ҳассалари бўлади; бундай қашшоқ кўримсиз қўноқхонада ўшалардан бошқа қирол ҳамда шаҳзодаларга бало борми?

— Агар жаҳонгашта рицарлар бошига тушган саргузаштлардан беҳабар бўлсангиз, — деб эътироз билдирди дон Кихот, — дунёни билмас экансизлар.

Бироқ дон Кихот билан гап талашини тун бўйи юриб келган отликларнинг юракларига сиғмасди. Улар дарвозани шу қадар ғазаб билан тақиллата бошладиларки, қўноқхонадагиларнинг ҳаммаси уйғониб кетди, қўноқхона эгаси эса ким тақиллатаётганини билгани чиқди. Шу пайт отликлардан бирининг оти, қулоқлари шалвираб, ўйга толгандай бошини қуйи солиб қимирламай осилиб қолган эгасини кўтариб турган Росинантга яқинлашаркан, уни хидлай бошлади. Гарчи Росинант ёғочдай қотиб турса ҳам унинг томирларида қон кўпириб оқарди: у ҳам эркалашга нисбатан ҳиссиз қолмади, ўз навбатида оғайнисини искай бошлади. Бироқ у сал қимирлаши биланоқ дон Кихотнинг оёқлари силжиб, эгардан сирғалиб кетди, агар нўхтага осилиб қолмаганида ерга гурсиллаб йиқиларди. Шунда у шу қадар қаттиқ оғриқни сездики, худди қўлини елкасидан суғуриб олаётгандай бўлди. Оёқлари ерга тегай-тегай деб турарди, лекин бундан унинг аҳволи энгиллашмади: яна озгина чўзилса оёғи ерга тегишини кўрган дон Кихот жон-жаҳди билан ерга етишга ҳаракат қилиб кўрди, бироқ бундан оғриқ зўрайди, холос. Ниҳоят, азоб чидаб бўлмаслик даражага етди, дон Кихот шундай бўкириб юбордики, қўноқхона эгаси шошилиб дарвозани очди, даҳшат ичида қичқириниб келган томонга югурди. Доввойдан Мариторнес ҳам уйғониб кетди; гап нимадалигини дарҳол фаҳмлаб, ҳеч кимга сездирмай хонага югуриб кирди ва дон Кихот осилиб турган нўхтани ечиб юборди, рицарь ерга шалоплаб

тушди. Шу пайт унинг олдига хўжайин билан сайёҳлардан бир нечаси етиб келишди, уни қуршаб олишиб, нима ҳодиса бўлганини, нега қичқирганини сўрай бошлашди. Рицаримиз эса ҳеч кимга жавоб бермай, қўлидаги сиртмоқни ечиб ташлаб, ўрнидан турди-да, Росинантга минди, қалқонини қўлга олиб, найзасини тик ушлаганча олдинга чопиш учун орқага тисарилди, сўнгра бақирганича от қўйиб келди:

— Кимки мени бирорта гуноҳ учун сеҳрланган дегудек бўлса, малика Микомикон ижозати билан уни ёлгончи деб айтаман, ундан жавоб талаб қиламан ҳамда яккама-якка жангга чақираман.

Дон Кихотнинг гаплари янги келган кишиларни ҳайратда қолдирди, лекин хўжайин дон Кихотнинг кимлигини тушунтириб, унга эътибор бермасликни, унинг ақлдан озганлигини айтди.

Бу орада тонг тамоман ёришиб, қуёш нурлари, шунингдек, дон Кихот кўтарган шовқин карвонсаройдагиларни уйғотиб юборди. Қўноқхона ҳовлиси аста-секин одамга тўла бошлади. Янги келганлар ўз ишлари билан машғул бўлиб, дон Кихотга ҳеч эътибор бермадилар, шу сабабли рицаримиз аламига чидолмай фиғони фалакка чиқди. Агарда дон Кихот рицарлик орденининг уставида жаҳонгашта рицарлар гарчи илгари бирор жасорат кўрсатиш йўлида онт ичган бўлса-да, янги саргузаштга бош қўшиши мумкин деган бандини топа олганида борми, уларни ҳол-жонига қўймай чақирқини қабул қилишга мажбур этган бўлармиди балки. Бироқ малика Микомиконнинг подшолигини олиб бермагунича тасодифий тўқнашувларда қатнашишини одобсизлик ҳамда ўз ҳаётини тахлика остида қолдириш деб тушунди, шунинг учун ҳам ўзининг уришиш ниятидан қайтди. Худди шу пайт дарвоза ёнидан қичқирқч эшитилди: хўжайиннинг янги келганлар билан банд эканини кўрган, қўноқхонада тунаган икки киши ижара ҳақини бермай жуфтакни ростлаб қочмоқчи бўлишди; лекин хўжайин уларни дарвоза олдида тутиб олди-да, ҳақ тўлашларини талаб қилди; у оғайдан боди кириб-шоди чиқиб сўкинарди, қочмоқчи бўлганлар қутурганча мушт дўлайиб унга ташланганди. Бечора хўжайин бақириб, одамларни ёрдамга чақира бошлади, лекин ҳамма ўз ишига шунчалик берилиб кетган эдики, ҳеч ким дод-войга эътибор бермади: шу пайт хўжайиннинг қизи нарироқда турган дон Кихотга мурожаат этиб хитоб қилди:

— Сеньор рицарь, муҳтарам жаноблари, худо сизга битмас-туганмас куч ато қилган экан, бечора отамга ёрдам беринг, анови ярамаслар уни дўппослашяпти.

Унинг бу гапига дон Кихот хотиржамлик билан жавоб берди:

— Эй гўзал қиз, ҳозир сизнинг илтимосингизни бажо келтира олмайман, чунки ўз зиммамга олган жасоратни охирига етказмагунимча янги саргузаштларга аралашмасликка ваъда берганман. Бўлмаса шундай қилайлик: бориб отангизга айтинг, улар билан қаттиқроқ муштлаверсин, асло бўш келмасин, бу орада мен унга ёрдам бериш учун малика Микомикондан ижозат оламан; агар у рухсат берса, кўнглингиз тўқ бўлаверсин, уни албатта қутқариб оламан.

— Вой, шўрим қурсин! — деди шу ерда турган Мариторнес. — Муҳтарам жаноблари рухсат олиб келгунларича хўжайиним нариги дунёда бўлади.

— Сеньора, фақат рухсат олсам бўлгани, — деб жавоб қилди дон Кихот, — хўжайинингиз у дунёда бўладими, йўқми — менга барибир: у дунёда бутун дўзах менга қарши турса ҳам уни қутқариб келаман. Унинг учун шундай ўч оламанки, сизлар бағоят мамнун бўласизлар.

У шу сўзларни айтаркан, жаҳонгашта рицарларга хос қиёфага кириб, Доротеянинг қаршисида тиз чўкди ва ҳазрати олияларидан шиддатли жанг қилаётган қалъа эгасига ёрдам бериши учун изн сўради. Малика жон-жон деб рухсат берди, дон Кихот қўлига қалқон билан қиличини олиб, ўша заҳоти хўжайинни ҳанузгача дўппослаётган иккала одам олдига — қўноқхона дарвозаси томон чопиб кетди, лекин уларга яқинлашгач, Мариторнес билан беканинг хўжайинга тезроқ ёрдам беришини сўраб қичқаришаётганига ҳам қарамай, тўсатдан таққа тўхтаб қолди.

— Мен шунинг учун шошилмаяпманки, — деди дон Кихот, — қора халққа қарши қилич кўтариш менга ярашмайди. Яроқбардорим Санчони бу ёққа чақиринглар, чунки бундай ҳолларда ўч олувчилик, ҳимоя қилиш унинг зиммасида бўлади.

Бу орада тепки ва муштлар хўжайинга шу қадар кўп ёгилдики, Мариторнес, бека ва унинг қизи хўжайинлари, эри, отасининг аҳволи оғирлашганини кўриб, дон Кихотнинг шошилмаётганидан жаҳллари чиқди.

Худди шу пайт қўноқхонага дон Кихот Мамбриң дубулғасини, Санчо Панса эшагидан эгар-жабдуғини тортиб олган ўша сартарош келиб қолса бўладими! Сартарош эшаги билан отхонага кирди, у ерда эгар атрофида ивирсиб юрган Санчо Пансани кўриб қолди. Ўз нарсаларини кўриб, ўша заҳотиёқ яроқбардорга ташланди.

— А-а, ўғри жаноблари, қўлга тушдингиз-ку! Ўғирлаб кетган жомни, эгар-жабдуқни буёққа чўзинг энди! — деб бақира бошлади у.

Тўсатдан қилинган ҳужум туфайли Санчо қаддини ростлади-ю, ўйлаб турмай сартарошнинг башарасига бошлаб мушт туширди, унинг оғзи-бурни қонга беланди. Бироқ, сартарош эгарни маҳкам ушлаб олиб шундай қичқирдики, қўноқхонадагиларнинг ҳаммаси бу шовқинни эшитиб шу ёққа югуришди. Сартарош дод соларди:

— Адолат, ҳақиқат қилинсин! Қирол номи билан! Мана бу ўғри, йўлтўсар менинг эгаримни ўғирлаб олганди, энди ўзимни ўлдирмоқчи.

— Елғон, — жавоб қилди Санчо, — мен йўлтўсар эмасман! Бу эгарни хўжайиним дон Кихот одил жангда қўлга киритган.

— Одил жангда! — бақирди ғазабланган сартарош Санчога мушт дўлайиб. — Вой муттаҳам-ей!

Санчо сартарошга қарши зарба берди, ҳар иккиси роса муштлашди. Етиб келган одамлар орадан нима гап ўтганлигини, ким ҳақу ким ноҳақ эканлигини билмаганликлари учун жанжалга аралашмай, бақрайиб туришарди.

Бу орада дон Кихот қўноқларни ўз қарзларини тўлаб, қўноқхона эгасини тинч қўйишларига иқдор қилган эди. Шундан сўнг ўз яроқбардорининг шовқин-суронини аллақачонлар эшитган рицаримиз нима гаплигини билиш учун отхона томон югурди. Санчонинг сартарош билан чаққон жанг қилаётганини кўрган дон Кихот ўз яроқбардорининг жасоратидан мамнун бўлди ва имкон бўлиши биланоқ уни рицарликка ўтказишга қарор қилди, зотан довжорак Санчо рицарлар орденига шараф билан хизмат қилиши мумкин эди.

## XXVII БОБ

### КАРВОНСАРОИДА ЮЗ БЕРГАН ҒАЛАТИ ҲОДИСАЛАРНИНГ ДАВОМИ

Сартарош билан Санчо Панса ўртасидаги жанжал тобора кучайиб борарди.

— Қаранглар, сеньорлар, — деб қичқирарди сартарош ҳовлига тўпланиб, муштлашишни кузатиб турганларга қараб, — мана бу муттахам менинг эгаримни ўғирлаган. Бир кунни келиб худонинг менга ўлим юбориши қандай ҳақ бўлса, эгарнинг меникилиги ҳам шундай ҳақ. Оғилни қаранг, эшагим ўша ерда, у ёлғон гапирмаса керак. Ишонмасанглар, ўзларинг эшагимни эгарлаб кўринглар, башарти эгар унга тўғри келмаса, майли, мени муттахам дея қолинглар. Бундан ташқари, бу қароқчи соқол олишга ишлатадиган яп-янги қутдеккина бир эскудога сотиб олган жомимни ҳам илиб кетибди.

Дон Кихот буни эшитгач, ўзини тўхтатиб қололмади: уришаётганларнинг ўртасига тушиб, уларни ажратиб, қайси томон ҳақлиги аниқлангунча эгар ҳамманинг кўзига кўриниб турсин деб уни ерга қўйиб қўйди-да, шундай деди:

— Сеньорлар, Мамбриннинг дубулғаси бўлиб келган, бўлиб келаётган ва бундан кейин ҳам шундай бўлиб қоладиган нарсани сартарошлик жоми деб атаётган мана бу олижаноб яроқбардор йўл қўйган чалкашлик нимадан иборатлиги ҳозир сизга аён бўлади. Мен бу дубулғани ундан ҳалол жангда тортиб олганман, шундан буён унинг қонуний хўжайинидирман! Бу одам қайси эгар ҳақида гапиряпти, сира тушунолмаяман. Тўғри, яроқбардоримга бу шўринг қурғур кўрқоқнинг отидаги эгар-жабдугини олишига изн берганим сал-пал ёдимда. Модомики, эндиликда отнинг эгар-жабдуги ўзгариб, эшакнинг эгарига айланиб қолган экан, мен буни мўъжизадан бўлак нарса деб тушунолмайман: рицарлик саргузаштларида бундай ўзгариб қолишлар тез-тез юз бериб туради. Ҳозир бунга ўзингиз амин бўласиз. Қани, бўтам Санчо, югуриб бориб, мана бу олижаноб одамга сартарошлик жоми бўлиб кўринган дубулғани олиб кел-чи.

— Жин урсин, сеньор, — деб жавоб берди Санчо, — ҳақлигимизни исботлашга бошқа далилимиз йўқ экан, манави эгар-жабдуқ отники бўлса, сартарошлик жоми ҳам Мамбриннинг дубулғаси бўлиб чиқади-да.

— Амримни бажар! — қатъийлик билан унинг сўзини бўлди

дон Кихот. — Бу қалъадаги нарсаларнинг ҳаммаси ҳам сеҳрлаб қўйилмаган-ку, ахир!

Санчо жомни келтиргач, дон Кихот уни тўпланганларга кўрсатиб, шундай деди:

— Сеньорлар ва кабалъеролар! Мана бу тилла дубулғага қараб, унинг сартарошлик жомига ўхшаш-ўхшамаслигини ўзларингиз бир ўйлаб кўринглар... Мана бу яроқбардор бизни бир чақага арзмаган сартарошлик жомини ўғирлашда айблаб нақада уятсизлик қилмоқда. Ўзим тобе бўлган рицарлик ордени ҳақи қасамд қилиб айтаманки, бу мен ундан тортиб олган ўша дубулға, мен унинг ҳеч нарсасини йўқотганим ҳам, унга ҳеч нарса қўшганим ҳам йўқ.

— Ҳа, бу тўғри гап, — деди шунда Санчо, — чунки менинг хўжайиним дубулғани қўлга киритгандан буён уни атиги бир марта кийиб, яъни кишанланган бахтсиз кимсаларни озод этишда жанг қилган. Агар ўшанда хўжайинимнинг бошида мана шу сартарошлик дубулғаси бўлмаганда аҳволи чатоқ эди, чунки бу жангда бошимизга дўлдай тош ёрилган эди.

— Қани, буни сартарошлик жоми эмас, дубулға деб туриб олган бу жаноблар тўғрисида сиз азизлар нима дейсизлар, — деб қичқирди сартарош.

— Бунинг аксини айтишга ким журъат эта олади! — деб хитоб қилди дон Кихот. — Агар бу рицарь бўлса, ноҳақ гап айтаётганини, борди-ю яроқбардор бўлса, унга минг карра ёлғон гапирётганини исботлаб бераман.

Мазкур мунозара пайтида шу ерда ҳозир бўлган уста Николас ҳамманинг кайфини чоғ қилиш ниятида дон Кихотни қўллаб-қувватлашга жазм этди, шунинг учун ҳам сартарошга мурожаат қилиб, шундай деди:

— Сеньор сартарош, шуни билиб қўйингки, мен аввало сизнинг касбдошингизман, мана йигирма йилдан кўпроқ вақтдан буён шу касбни қиламан, шундай экан, бирорта ҳам сартарошлик асбоби йўқки, мен уни билмаган бўлай. Бундан тушқари, ёшлигимда аскарлик хизматини ўтаганман, темир қалпоқ, дубулға сингари ва бошқа яроғ-аслаҳаларни биламан. Бинобарин, тасдиқлайманки, оқранг — қорарангга, ҳақиқат ёлғонга қандай ўхшаш бўлса мана бу муҳтарам сеньор қўлидаги буюм ҳам сартарошлик жомига шундай ўхшайди. Кўп нарсалар етишмаса ҳам, айтаманки, бу ҳақиқий дубулға.

— Албатта етишмайди-да, — деди дон Кихот. — Аввало сипарий йўқ.

— Мутлақо тўғри, — гапга аралашди сартарош дўстининг ниятини тушунган Ҷуҳоний.

Бу ҳазил ҳаммага ёқиб тушди, тўпланганлар орасида бир неча кабалъеро бор эди, улар ҳам дон Кихотнинг қўлидаги нарса сартарошлик жоми эмас, балки дубулға деб бир овоздан тасдиқлашди.

— Эй худо, ўзинг кечир, — деб хитоб қилди гангиб қолган сартарош. — Шунча муҳтарам одамлар буни қандай қилиб жом эмас, дубулға дейишяпти? Бундай ҳолда бутун бир дорилфунун ҳайрат-

да қолиши мумкин. Майли, нима қилай, мана бу сеньор айтгандай, жомим дубулға бўлиб чиққанидан кейин эшагимнинг эгари ҳам отнинг жабдуғи бўлади-да.

— Барча рицарлик ишларида биз сеньор дон Кихотни энг яхши ҳакам деб биламиз, — деди руҳоний, — шундай экан, бунинг эшакнинг эгари ёки отники эканини у ҳал қилиб бериши керак.

— Худо ҳақи қасамдэ этаманки, сеньорлар, — деди дон Кихот, — бу қалъада кўпгина ғаройиб ҳодисаларга дуч келдим, шунинг учун ҳам ростини айтсам, бу ерда содир бўлган ҳар қандай воқеа тўғрисида ҳукм юритишга менда журъат йўқ. Менимча, бу ердаги ҳамма воқеалар қандайдир сеҳргарлик натижасида содир бўлаётир. Мана бугун кечаси ҳам мен нақ икки соат қўлимда осилиб турдим, нега менинг бошимга бундай кулфат тушганини ўзим ҳам билолмай қолдим. Шундай экан, ҳакамликни ўз зиммамга олиш мен томонидан энгилтаклик бўлур эди, ана шунини эътиборга олиб, бу вазифани сизларнинг ихтиёрингизга топшираман, сеньорлар. Эҳтимол, мендек рицарлик сафига ўтмаганингиз сабабли сеҳр кучи сизларга таъсир этмас, бинобарин, бу қалъада содир бўлаётган ҳодисаларни, менга туюлганидек эмас, асл ҳолида кўришга қодирсизлар.

— Сеньор дон Кихот, — деди руҳоний, — жуда тўғри айтяптилар: бу жумбоқни ечиш бизнинг ишимиз. Бироқ бизнинг ҳукми-миз қонуний бўлиши учун, мана бу сеньорлар фикрларини яширин билдирадилар, кўпчилик нима деганини эса кейин маълум қиламан.

Дон Кихотнинг ғалатилигини билганлар роса ҳузур қилишди, лекин уни энди кўриб турганларга бу манзара ғоят аҳмоқона бўлиб туюлди. Қўноқхонага эндигина кириб келган уч сайёҳ (кўри-нишларидан улар кўпроқ ўқчи аскарларга ўхшашарди) худди шу фикрда эди. Сартарошлик жоми кўз олдида Мамбриннинг дубулғасига айланиб қолганидан сартарош ҳаммадан кўп ҳаяжонда эди. Уз эшагининг эгари ҳам ҳашамдор от эгарига айланиб қолишига унда шубҳа йўқ эди. Шунга қарамай, руҳонийнинг одамлардан уларнинг яширин фикрини қандай жиддийлик билан олаётганини кўриб ҳамма хахолаб юборди. Ҳозир бўлганларнинг ҳар қайсиси шунчалик тўполон чиқишига сабаб бўлган бу қимматбаҳо нарсанинг эгар ёки отнинг жабдуғи эканлигини руҳонийнинг қулоғига айтиши керак эди. Руҳоний дон Кихотни таниганларнинг ҳаммасидан уларнинг фикрини билиб олгач, жабрланган сартарошга ниҳоят шундай деди:

— Сизга гапим битта, ҳурматли зот. Одамларнинг фикрини олиш жонимга тегди, кимдан сўрамай ҳамма бирдек: жабдуқни, яна зотдор отнинг жабдуғини эшакнинг эгари дейиш бемаъниликдир, деб жавоб берди. Шундай қилиб, сеньор сартарош, ўзингизга ёки эшагингизга қанчалик алаам қилишидан қатъи назар, умум фикрига итоат этишга мажбурсиз; бу эшакнинг эгари эмас, отнинг жабдуғи вассалом, гап тамом.

— Агар ҳаммангиз, сеньорлар, янглишмаётган бўлсангиз мен жаннат бетини кўрмай; агар бу эгар эмас жабдуқ бўлса, худо ме-

ни бандам демай қўяқолсин. Ахир мен маст эмасман-ку, башарти бугун эрталаб шундай гуноҳ қилган бўлсам-да, бироқ нонуштага ичмагандирман-ку!

Сартарошнинг соддалигидан ҳамма қанчалик кулган бўлса, дон Кихотнинг:

— Шундай қилиб, энди ҳар ким ўзига тегишли нарсани олиши керак, — деб қилган телбалигидан ҳам шунча кулди.

Ўқчилардан бири шундай деди:

— Мен буларнинг ҳаммаси шунчаки ҳазил эканига аминман, кўринишидан анча ақлли бўлган кишиларнинг қаршимизда турган нарсаларни дубулға ҳамда отнинг жабдуғи деб жиддий айтишларига йўл қўйиб бўлмайди. Борди-ю улар бизнинг ҳис-туйғуларимизга қарши ўлароқ, буларни дубулға билан отнинг жабдуғи десалар, унда бунинг тагида бир сир бор. Буларнинг сартарошлик жоми билан эшакнинг эгари эмаслигига тирноқча ишонсам, турган еримда тил тортмай ўлай!

Бошқа ўқчи шундай хитоб қилди:

— Бу эгар бўлмаса отам боласи эмасман! Кимки бундай эмас деса, ўша гирт маст.

— Эй, пасткаш муттаҳам, ёлғон гапиряпсиз, ёлғончилигингиз учун қаттиқ жазоланасиз! — деб хитоб қилди дон Кихот. У шундай деб, найзасини кўтариб, ўқчининг бошига шунақанги зарб билан туширдик, у ўзини четга олиб қолмаганида турган жойида тил тортмай ўлган бўларди. Найза ерга қаттиқ урилганидан бўлак-бўлак бўлиб кетди. Шу орада ўз ўртоқларига нисбатан қилинган бу муомалани кўриб турган бошқа ўқчилар Санта Эрмандадга бўйсунишни дон Кихотдан талаб қила бошладилар.

Қўноқхона хўжайини югуриб кириб темир калтаги билан қиличини олиб чиқди-да, ўқчиларнинг ёнидан жой олди, у ҳам Санта Эрмандад жамиятининг аъзоси эди. Сартарош кўтарилган тўс-тўполондан фойдаланиб эгарига ёпишди, иккинчи томондан Санчо ўзини отди унга; дон Кихот эса ўз қиличини яланғочлаб, ўқчиларга ташланди. Рухоний қичқирар, бека додлар, унинг қизи чийиллар, Мариторнес йиғлар, Доротея ўзини йўқотиб қўйган эди. Сартарош Санчони, Санчо сартарошни дўппосларди; кабальеролардан бири унинг қўлини ушлашга журъат этган ўқчининг жағига шундай туширдик, ўқчининг оғзи қоп-қора қон бўлди. Бошқа бир кабальеро иккинчи ўқчини ерга қулатиб, ғазаби қайнаб, уни жон-жаҳди билан тепарди, хўжайин Санта Эрмандадни ёрдамга чақириб овозининг борича бақирарди; хуллас, бутун қўноқхона йиғи, қичқирик, дод-фарёдга кўмилди; ҳаммаёқда паршонлик, тўс-тўполон, саросима ҳукмрон эди. Қиличларнинг жаранглаши, таёқларнинг тақиллаши эшитиларди, қон дарёдай оқарди. Тўс-тўполон авжига чиққан бир пайтда дон Кихот ўзини тўсатдан Аграманте қароргоҳидаги<sup>46</sup> рицарлар жанжали устидан чиқиб қолган ҳис қилди, шу боисдан бутун карвонсаройни бошига кўтариб овози борича қичқирди:

— Тўхтанглар! Қиличларингизни қинига солинглар! Тинчла-



нинглар! Жонларингиздан умидларингиз бўлса менга қулоқ солинглар!

Унинг тўсатдан янграган овозини эшитиб ҳамма жим бўлди, дон Кихот сўзида давом этди:

— Бу қалъа сеҳрланган, унда беҳисоб иблислар жойлашиб олган, демабмида сизларга, сеньорлар? Энди бунга ўзларингиз ишонган бўлсаларингиз керак. Қаранглар! Аграманте қароргоҳида бўлиб ўтган машҳур жанжал жонланди бу ерда. Бунда биримиз қилич деб, иккинчимиз от, учинчимиз бургут, тўртинчимиз дубулгани деб жанг қиляпмиз. Жанг қиляпмиз-у, лекин нега ўзимизнинг ва бошқанинг қонини тўкаётганимизни ҳеч қайсимиз ҳам билмаймиз. Қон тўкишни бас қилинсин! Узаро тинчлик сулҳини тузамиз. Қодир худо ҳақи қасамёд этаманки, арзимаган баҳона билан бир-бировимизни ўлдириш биздек олижаноб унвонга эга бўлган зотлар учун бағоят уят.

Бироқ ўқчилар тинчланишни истамасди. Кабальеролар уларнинг роса таъзирини берганди, энди эса ўч олиш ўтида ёнардилар. Лекин муштлашиш пайтида соқоли юлиб олинган сартарош дон Кихотнинг чақирғидан хурсанд бўлиб кетди. Санчо олижаноб хизматкор сифатида ўз хўжайинининг биринчи сўзигаёқ итоат қилди. Фақат хўжайингина иккинчи марта бутун қўноқхонани остинма-устун қилаётган ана шу жиннини жазолаш кераклигини талаб қилиб қичқирарди.

Ниҳоят, шовқин аста-секин пасая бошлади. Шу орада ўқчилардан бири дон Кихотни ҳибсга олиш тўғрисидаги буйруқ ёнида эканини эслади: Санта Эрмандад каторгачиларни қонунга хилоф равишда озод қилиб юборгани учун уни ҳибсга олиш ҳақида қарор қабул қилган эди. Ўқчи буйруқни эсларкан, дон Кихотнинг белгиларини текшириб кўрмоқчи бўлди. У қўйнидан буйруқни олиб, унда кўрсатиб ўтилган белгиларни ҳижжалаб ўқиркан, дон Кихотга қараб-қараб қўярди. Ниҳоят, дон Кихотнинг қамоққа олиш ҳақида буйруқ берилган худди ўша одам эканига ишонч ҳосил қилгач, у қорозни ўраб чап қўлига олди-да, ўнг қўли билан дон Кихотнинг ёқасидан ушлаганча, бор овози билан қичқира бошлади:

— Санта Эрмандадга итоат қил! Башарти кимки менинг Санта Эрмандад номидан иш тутаётганимга ишонмаса мана бу буйруқни ўқисин: унда мана бу йўлтўсар қароқчини ушлашим зарурлиги ёзилган!

Руҳоний буйруқни ўқиб чиқди-да, ўқчининг ҳақ гапираётганига қаноат ҳосил қилди, чунки буйруқда дон Кихотнинг барча белгилари тўла-тўқис, аниқ кўрсатилган эди; у фақат уҳ тортиб, ғамгин бош чайқаб қўйди. Қандайдир бир муттаҳам ўзини ҳақорат қилаётганини кўрган дон Кихот эса ғазабга келди-да, иккала қўли билан ўқчининг томоғидан гиппа бўғиб олди. Агар ўртоқлари ёнини олмаганида-чи, шўрлик ўқчи балки дон Кихот бармоқларини ёзишидан олдин, бўғилиб қолган бўларди. Зиммасида ўз биродарлик жамияти аъзосининг ёнини олиш мажбурияти бўлган хўжайин шу ондаёқ жабрдийдага ёрдамга ташланди. Эрининг тагин

мушглашишга тушиб кетганини кўрган бека яна қичқира бошлади, қизи билан Мариторнес ҳам барча азиз авлиёлардан кўмак сўраб, унга жўр бўлишди. Бу ҳангомаларни кўрган Санчо эса шундай деди:

— Э худо, бу қалъадаги турли сеҳргарликлар ва мўъжизалар тўғрисида хўжайиним айтган гаплар чиндан ҳам ҳақ бўлиб чиқди-ку: бу ерда бир соат ҳам вақтни осойишта ўтказиб бўлмайди!

Ниҳоят, тўпланганлар дон Кихот билан ўқчини ажратиб қўйишга муваффақ бўлдилар. Бироқ ўқчилар жинойтчини ўз ихтиёрларига топширишларини талаб қилишда давом этдилар, тоғ сўқмоқларида ҳамда қатнов йўлларида одамларни тунаётган қароқчининг оёқ-қўлини боғлашда ўзларига ёрдам беришларини Санта Эрмандад номидан талаб қила бошладилар. Уларнинг бу гапини эшитган дон Кихот эса нафрат аралаш кулиб қўйди-да, ниҳоят, осойишта овоз билан гапга тугинди:

— Эй ярамас ва пасткаш одамчалар, қани менга яқинроқ келинглари-чи! Бечора бандиларнинг занжирини узиб ташлаб, тутқунларни озод қилаётган, бахтсизларга мадад бераётган, йиқилганларни оёққа тургазиб қўяётган, мазлумларнинг ёнини олаётган бир одамни йўлтўсар қароқчи дейишга журъат этиясизларми ҳали? О, ифлос махлуқлар, само сизларни жаҳонгашта рицарлининг улуғворлигидан тўғри бебахра этган, бунга сизлар чиндан ҳам муносиб эмассизлар! Сизлар нақадар зўр гуноҳ ва гафлатга ботгансизлар-а! Жаҳонгашта рицарнинг ўзи у ёқда турсин, унинг соясига кўрпача солишларинг керак. Санта Эрмандад номи билан катта йўлларда босқинчилик қилаётган ўқчи-қароқчилар, қани, яқинроқ келинглари, хўш айтинглари-чи, мени ушлаш ҳақидаги буйруққа имзо чеккан ўша нодоннинг номи нима? Жаҳонгашта рицарларнинг оддий судга берилмаслиги, уларнинг қонуни — қилич, уларнинг ҳукми жасорат, фармойишлари эса уларнинг шахсий иродаси эканлиги ҳали ўша жирканч қовоқбошга маълум эмас-ми? Буюк жаҳонгашта рицарлик ишига бутун ҳаётини бағишлаш тўғрисида тантанали қасам ичиб рицарликка ўтган бахтиёр кимсага, рицарлик номи берадигандай катта имтиёзларни бирорта дворянлик ёрлиги беролмаслигидан наҳотки беҳабар бўлса у? Рицарлардан қайси бири солиқ, ўлпон тўлайди, қироличага туфли пули беради<sup>47</sup>, ер-мулкига жарима, дарёда сузгани ёки йўлда юрганига ҳақ тўлайди? Қайси қалъа эгаси кўрсатган меҳмондўстлиги учун ундан ҳақ олади, қайси қирол уни ўз дастурхонига ўтказишдан бош тортади? Қайси олижаноб қиз уни севмайди? Ва, ниҳоят, тўрт юз ўқчи билан учрашганда қизларни таёқ билан тўрт юз марта туширишга журъати етмайдиган жаҳонгашта рицарь топиладими?

Дон Кихот гапираётганида руҳоний бу ишни ёпишга ўқчиларни ундамоқчи бўлди.

— Дон Кихотнинг ақли жойида эмаслигини наҳотки кўрмаётган бўлсангиз, — деди у. — Бечорани ушлаб олиб кетган тақдирингизда ҳам барибир жиннилиги учун қўйиб юборасизлар.

Қўлида буйруғи бўлган ўқчи дон Кихотнинг жинни ёки жин-

ни эмаслигини суриштириш унинг иши эмаслигини айтди. Мен бошлиқларимнинг буйруғини бажаришим керак, бошқаси билан ишим йўқ, деди у.

— Шунда ҳам, — деб жавоб берди руҳоний, — сизлар уни қамоққа ололмайсизлар; менимча, унинг ўзи ҳам бунга йўл қўйма-са керак.

Мунозара давом этаркан, бу орада дон Кихот ўзини шу қадар бемаъни тутдики, бечора идальгонинг жинниликка ўқчилар ишонмаган тақдирларида уларнинг ўзлари дон Кихотдай эси паст бўлиб чиқардилар. Шунинг учун ҳам уни ўз ҳолига қўйиб, ҳатто сартарош билан Санчо Пансани яраштириб қўйишга тутиндилар.

Одил суд нозирлари ишни кўриб, чиқарган ҳукмлари тортишаётган томонларни тўла яраштириб қўймаган бўлса-да, ҳар қолда уларни қаноатлантирди: рақиблар эгарларини алмашдилар, лекин ҳар ким ўз айили билан юганини олиб қолди. Мамбриннинг дубулғасига келганда эса шуни айтиш керакки, руҳоний сартарошга жоми учун дон Кихотдан яширинча саккиз реал берди, сартарош эса мени алдашди деб ҳозир ҳам, бундан кейин ҳам умр бўйи шикоят қилмаслик мажбуриятини олиб руҳонийга тилхат ёзиб берди.

Руҳонийнинг сартарошни тақдирлаганини хўжайин пайқамай қололмади. Фурсатни қўлдан бой бермаслик учун, дон Кихотдан тунагани, нобуд қилган мешлари билан виноси учун ҳақ тўлашни талаб қилиб туриб олди. У оладиган ҳақнинг сўнгги чақасигача тўланмагунича Росинантни ҳам, Санчонинг эшагини ҳам отхонадан чиқармаслигига қасам ича бошлади. Руҳоний хўжайиннинг кўрган ҳамма зарари учун унга дурустгина ҳақ тўлаб, буни ҳам тинчитди. Шундай қилиб, тинчлик тикланди, бу ерда ҳозир бўлганларнинг бари бунинг учун муруватли ҳамда шакаргуфтор руҳонийдан миннатдор бўлиш керак деган ягона хулосага келдилар.

Бу кўнгилсиз ишларнинг ҳаммаси бартараф қилинган, дон Кихот яна йўлга тушиш ҳамда зиммасидаги буюк жасоратни амалга ошириш вақти етди деган қарорга келди. Ана шунинг учун Доротеянинг олдида тиз чўкиб, шундай деди:

— Гўзал ва олий насаб сеньора! Тиришқоқлик — муваффақиятнинг онаси, дейилган бир ҳикматли мақол бор. Душман устидан қозониладиган галаба бутунича ҳужумкорлик ва тезкорликка боғлиқ бўлган ҳарбий иш юзасидан бу мақол айниқса, ҳаққоний айтилган. Ким душманининг ниятини олдиндан билиб, чора кўра олса, у жангда голиб чиқади. Эй, гўзал сеньора, бу гапни шунинг учун айтяпманки, фикримча бундан-буён бу қалъада қолишимиз фойдасиз ва ҳатто хавфлидир. Чунки Пандафиландо Ёвузкўз ўзининг махфий айғоқчилари орқали менинг у билан жанг қилмоқчи бўлаётганимни билиб олиши мумкин; ана унда бу ёвуз дев ҳар қанча ҳаракатим ва толмас билагимнинг забардастлигига қарамай, эгаллашга қудратим етмайдиган қўрғонга яшириниб олади. Шунинг учун ҳам унинг макрли ниятларига қарши чора кўриб улгурайлик ва тез йўлга тушайлик.

Дон Кихот гўзал маликанинг жавобини эътибор билан кутган-ча жим турарди. Доротея эса унга тақлидан шундай деди:

— Сеньор рицарь! Бошимга тушган катта мусибатни баргараф этишда менга мадад беришга тайёрлигингиздан миннатдорман. Умумий истагимизнинг амалга ошишида анбиёю авлиёлар ёр бўлсин. Ана ўшанда сиз олам олижаноб хотинлардан холи эмаслигини кўрасиз. Энди мен ҳаялламай йўлга тушишга тайёрман. Менинг инон-ихтиёрим сизда. Модомики тақдиримни сизга топширган эканман, ўтқир ақллари ниманики амр этса, мен бунга эътироз билдиришмайман.

— Ҳозироқ йўлга тушамиз! — хитоб қилди дон Кихот. — Сабр-сизлик мени йўлга шошироқда, чунки сусткашлик — бу ҳалокат келтиради, деб бекорга айтилмаган. Санчо! Росинантни эгарла, ўз эшагинг билан қироличанинг тулпорини юганла, қалъа эгалари билан хайрлашиб, мақсад сари интиламиз!

Санчо бош чайқаб кўйиб, гапга тутинди:

— Содиқ хизматчингиз ва яроқбардорингиз сифатида айтишга мажбур бўлган гапимни айтсам ранжимагайсиз, муҳтарам жаноблари.

— Тезроқ гапир, нима демоқчисан, — деб жавоб берди рицарь бу жумбоқли сўзлардан хавотирланиб.

— Муҳтарам жаноблари, ўзини Микомикон давлатининг қироличаси қилиб кўрсатаётган бу сеньоранинг менинг марҳум-онам қандай қиролича бўлса шундай қиролича эканини таг-томири билан яхши билиб олдим. Буни қаранг-а, марҳаматли жаноблари, шу ерлик кабалеролардан бири унинг қўнглини топмоқчи бўлиб уринса, сеньоранинг ўзи ҳам унга илтифот кўрсатапти. Биз тунлари ухламай, кунларни бугунгидай тўполонли ўтказиб йўл босиб, манзил ошиб юрганимизда, ана шу йигитча унга уйланиб, девдан тортиб олганларимизни ўзиники қилиб олиб, яна бизнинг устимиздан кулиб юрмасайди, деб қўрқаман! Шундай бўлгандан кейин, Росинантни юганлаб, эшакни эгарлашга шошилиб нима қиламан, яхшиси жойимиздан жилмаганимиз маъқул, ташвишини бошқалар тортаверсин, биз бўлсак шундоқ ҳам оч қолмасмиз.

Яроқбардорнинг шармандали гапини эшитиб дон Кихот қаттиқ ғазабланди, қошлари чимирилиб, кўзларида ўт чақнаб кетди, жаҳл билан хитоб қилди:

— Эй, ярамас, пасткаш одам! Эй нодон оғзи бузуқ! Қорангни ўчир бу ердан! Қироллар зотига мансуб одамнинг муборак номини булғармоқчи бўлган ёвуз, турган-битгани ёлғон, бемаза, жирканч ифвогар, туҳматчи! Қани, йўқол кўзимдан, ғазабимга дучор бўла кўрма!

Санчо Панса дон Кихотнинг қаҳр-ғазабидан шу қадар қўрқиб кетган эдики, ер ёрилса кириб кетишга тайёр эди. У ўзини оқлашга журъат ҳам қилолмай, хўжайинининг кўзидан яширинишга шошилди.

Бироқ Доротея дон Кихотнинг феълини яхши билгани учун рицаримизни тезда тинчита олди.

— Сеньор Ғамгин Қиёфа рицарь! Бемаъни гаплари учун яроқ-

бардорингиздан аччиғланиб ўтирманг! Санчонинг соғлом акли ва пок виждони унинг туҳмат қилганига шубҳаланишга йўл қўймайди. У ҳозир гапираётган гап жодугарларнинг сеҳри таъсирида кўзига ҳақиқатан ҳам шундай кўринган бўлса керак. Лекин бунинг шайтон васвасасидан бошқа нарса эмаслиги ўз-ўзидан тушунарли. Бу қалъада ҳамма нарса сеҳргарларнинг найранглари туфайли содир бўлади, деб сиз ўзингиз айтдингиз-ку, ахир, сенъор рицарь.

— Қодир худо ҳақи қасам ичаманки, — деб хитоб қилди дон Кихот, — ҳазрати олиялари жуда ҳақ гапни айтдилар! Ҳа, албатта, бу гуноҳкор Санчо ёвуз сеҳргар томонидан алданиб, жин урмай туриб кўриб бўлмайдиган шунақа нарсалар кўринган кўзига, бу шўринг қурғурнинг алдаш нималигини билмайдиган ҳалол ва беғуноҳ одамлигини мен биламан-ку, ахир.

Шундан кейин дон Кихот ўз яроқбардорининг гуноҳини кечиражагини айтди. Руҳоний Санчони чақирди; Санчо бўйнини эгганча ўз хўжайинига яқинлашди-да, унинг олдида тиз чўкиб, қўлини ўпишга изн сўради. Дон Кихот Санчонинг илтимосини қондиргач, насиҳатомуз шундай деди:

— Хўш, бўтам Санчо, ишонаманки, мен сенга бу қалъада ҳамма нарса сеҳрлаб қўйилган деб таъкидлаганимда ҳақ гапни айтганлигимга энди тушунгандирсан!

— Мен ҳам шундай фикрдаман, — деб жавоб берди Санчо, — чойшабда бардор-бардор қилиб осмонга улоқтиришдан бошқа ҳамма нарса сеҳрланган бу ерда. Сиз қандай изоҳласангиз ҳам, бу кўнгилсиз воқеа мутлақо табиий йўсинда рўй берганди.

Дон Кихот яроқбардорини барибир ўз фикридан қайтаролмаслигини кўргач, унинг бу сўзларига ҳеч қандай эътироз билдирмади.

### XXVIII БОБ

#### ЛАМАНЧЛИК ДОН КИХОТНИНГ ҒАЛАТИ УСУЛ БИЛАН СЕҲРЛАНГАНИ

Дон Кихот ўз ҳамроҳлари билан кўноқхонага келганининг иккинчи куни эди. Руҳоний билан сартарош йўлга чиқиш тўғрисида бош қотира бошлади. Дўстларимиз Доротеяни энди яна безовта қилиб ўтирмаслик ниятида ўз кучлари билан кифояланмоқчи бўлдилар. Иккита хўкиз қўшилган аравани ёллашди, кейин ичига бир одам бемалол сига оладиган ҳажмда тахтадан қафас ясашни буюришди. Руҳонийнинг илтимоси билан кабальеро, ўқчилар ва ниҳоят, хўжайиннинг ўзи дон Кихотни ана шу қафасга солишда руҳоний билан сартарошга кўмаклашишга киришишди. Улар рицарь таниб қолмаслиги учун ниқоб кийиб олиб, дон Кихотнинг хонасига киришди. Ўтган кечадаги тўс-тўполондан чарчаган дон Кихот қаттиқ ухлаб ётарди. Хонага кирганлар эҳтиёткорлик билан унинг олдида бориб, бирдан ушлаб олишди-да, оёқ-қўлини боғлашди. Бу шу қадар тез бажарилдики, рицаримиз ширин уйқудан уйғонганда қимирлашга ҳам ҳоли йўқ

эди. Унинг пароканда хаёлида бу ниқоб кийган одамлар шу ондаёқ шарпа бўлиб туйилди, ўзини эса уларга мафтун бўлиб гангиб қолган кишидай сизди, чунки на қимирлай олар, на ўзини ҳимоя қила олар эди. Хуллас, ҳамма иш руҳонийнинг режасидай бўлиб чиқди. Тўғри, бу кийимини ўзгартириб олган одамларни Санчо дарҳол таниди. Бироқ бу воқеа нима билан тамом бўлишини кутиб, оғиз очишга журъат этолмади. Бу ғалати саргузаштнинг пироварди қандай тугагини кўриш ниятида дон Кихот ҳам индамасди. Кўп кутишга тўғри келмади. Сирли нота-нишлар қафасни келтиришди-да, унинг ичига шўрлик рицарни солишгач, тахталарни шундай қаттиқ михлаб қўйишдики, уни бузиш учун ҳар қанча уринилганда ҳам фойдасиз бўларди.

Шундан кейин қафасни ҳовлига елкаларида кўтариб олиб чиқишди. Шу пайтда уста Николас даҳшатли овоз билан қичқириб юборди:

— О, Ғамгин Қиёфа рицарь, асрга тушдим деб ўпкаланма, мардлигингга ишониб интилаётган зафаринг тезроқ тугалланиши учун шундай қилиш керак. Зафаринг эса Тобосонинг қордай оппоқ каптари билан қаҳрли Ламанч шери қовушиб, уларнинг мағрур бўйинлари никоҳнинг лаззатли юклари остида эгилгандагина тугалланади. Ана шу ажойиб қўшилиш натижасида илоҳий жасур шербаччалар дунёга келади. Шербаччаларнинг тирноқлари шавкатли аталарининг тирноқларидай ўткир бўлади. Бу нарса қуёш яна бир карра жамол кўрсатишидан аввалроқ содир бўлади. Бир вақтлар белида қиличи, иягида соқоли, бурнида ис билиш қобилияти бўлган яроқбардорларнинг энг олижаноби, энг итоатлиси бўлган о Санчо, сен эса, жаҳонгашта рицарларнинг энг сарасини кўз олдингда шундай аҳволда олиб кетишаётганини кўриб қўрқиб, хафа бўлиб ўтирма! Чунки — агар парвардигори олам лозим кўрса — саховатли хўжайинининг сенга берган ваъдаси тезда амалга ошади, сен эса шу қадар юксак ва обрўли мартабага эришиб ўзингга ўзинг ҳайратда қоласан. Бундан ташқари, доно Ментирониана\* тегишли маошингнинг ҳаммасини тугал олишингни сенга айтиб қўйишни менга топширди. Шунинг учун сеҳрланган шавкатли рицарингнинг изидан юравер, чунки, манзилга етгунча бирга бўлишингиз керак. Доно Ментирониананинг истаги шундай бўлгани учун бошқа ҳеч нарса деёлмайман. Хўп хайр, ташвишланма, худо ёр бўлсин, мен бўлсам маликамнинг ҳузурига жўнайман.

Сартарош ўзининг авлиёнамо гапларини баланд товуш билан тугатаркан, охирида шу қадар майин пичирлашга ўтдики, ҳатто ана шу ҳазилдан хабардор бўлганларнинг ўзлари ҳам гўё авлиёнинг аста-секин аллақайёққа олислаб кетаётганига ишонишга тайёр эдилар.

Дон Кихот бу гапларни эшитиб юпанди, чунки башорат билан айтилган сўзларнинг мазмуни унга мутлақо равшан эди.

\* Ментирониана (mentra — «ёлгон» сўзидан олинган) — испанчасига — «ёлгончи» дегани.

Бу башоратга мувофиқ у маъшуқаси Дульсинея Тобосскаяга муқаддас ва қонуний никоҳ иплари билан қўшилажагини, улар шербачча ўғиллар кўражақларини, ана шу шербаччалар эса Ламанчни абадул абад улуғлаяжакларини фаҳмлаганди. Шунинг учун чуқур нафас олиб деди:

— Эй менинг мададкорим, ким бўлишингдан қатъи назар, сенга бир зорим бор, мени олиб кетишаётган зиндонда озиб-тўзиб кетишимга йўл қўймаслигини донишманд сеҳргар-қомиямдан илтмос қил! Энг аввало, мен ҳозир эшитган беқиёс ва қувончли ваъдалар амалга ошсин! Ана ўшанда мен асирликда чеккан ҳамма қийинчиликларимни роҳат, ўзим боғланган занжирни эрмак деб биламан; мен ётган тахталар эса менга зиндоннинг поли эмас, балки юмшоқ тўшак бўлиб туюлади. Яроқбардорим Санчо Пансани юпатганинг учун ҳам сенга ташаккур айтаман. Ишонаманки, у ўзининг олижаноблиги ва ростгўйлиги билан қувончли дамларда ҳам, қайғули пайтларда ҳам мени ташлаб кетмайди, борди-ю аччиқ қисмат туфайли мен унга орол совға қилиш ёки уни губернаторликка ўтказиш юзасидан берган ваъданинг устидан чиқмаган тақдиримда ҳам барибир маоши тураверади. Ўз васиятимда, мен, афсуски, унинг улуғ хизматларига қараб эмас, ўзимнинг кам маблағимга қараб унга мукофот белгилаганман.

Санчо Панса дон Кихот олдида зўр эҳтиром билан таъзим қилди-да, унинг иккала қўлини ўпди. Дарвоқе, у хоҳлаган тақдирида ҳам барибир бир қўлини ўпа олмас эди, чунки иккала қўли битта қилиб боғлаб қўйилган эди.

Шундан кейин шарпалар қафасни ҳўкизлар қўшилган аравага қўйишди. Дон Кихот аравага чиқарилиши биланоқ хитоб қилди:

— Мен жаҳонгашта рицарлар ҳақида жуда кўп ажойиб саргузаштларни ўқиганман-у, лекин сеҳрланган рицарларни лавашанг, бесўнақай ҳўкизлар қўшилган араваларда олиб кетишганини ҳеч қачон ўқимаганман ҳам, кўрмаганман ҳам, эшитмаганман ҳам. Одатда сеҳргарлар уларни икки ғилдиракли оташ араваларда ёки учар аждаҳоларда учуриб олиб кетишади. Лекин ҳўкиз қўшилган аравада олиб юриш, худо ҳақи, бу қулоқ эшитмаган нарса! Бунга ажабланса бўлади. Балки ҳозирги сеҳргарлар ўзларидан илгари ўтганларга қараганда бошқача йўл тутишар, эҳтимол, жаҳонгашта рицарларнинг унутилиб юборилган ишларини қайтадан рўёбга чиқарганим учун менга нисбатан сеҳрлаш ва ўғирлаб кетишнинг янги усуллари кашф этилгандир. Сен бунга нима дейсан, бўтам Санчо?

— Мен бу ҳақда нима дейишни ҳам билмай қолдим, сеньор, — деб жавоб берди Санчо. — Ахир мен рицарлик китобларини ўқимаганман, рицарлик ишларини сиз муҳтарам жанобларичалик билмайман. Лекин шунга қарамай, ёнимизда айланиб юрган шарпалар жуда ёмон католиклар эканига қасам ичардим.

— Католиклар! — хитоб қилди дон Кихот. — Улар қандай қилиб католик бўлишсин, азизим! Ахир булар — бошимга шу

савдони солиш учун ёлгондакам гавдага айланган иблисларку! Гапимнинг ростлигига ишонмоқчи бўлсанг, уларни ушлаб, тегиб кўргин, танлари ҳаводан эканлигини билиб оласан.

— Муҳтарам жаноблари, янглишаётганингизни айтишга ижозат беринг: бу иблисларнинг таналарини аллақачон ушлаб кўрганман. Ҳаводан эмас, ростакан тана. Мана бу ўнг томонда юрган шарпага қаранг, унинг танаси аллақандай атоқли ва бадавлат кабальеронинг танасидай силлиқ ва нозик, ўзидан ҳам роҳатижон анбар гуркираб турибди. Эшитишимга қараганда шайтонлардан нуқул олтингугурт сассиги келармиш.

— Бунинг ажабланидиган жойи йўқ, дўстим Санчо, — деб жавоб берди дон Кихот, — шуни билиб қўйилки, иблислардан ҳеч нарсанинг ҳиди келмайди, чунки улар руҳдан иборат. Лекин дўзахнинг жуда ёмон қўланса ҳиди ҳамма ерда улар билан бирга бўлади. Агар бурнингга ўша иблисдан анбар ҳиди анқиётгандек туйилган бўлса, унда сен ё янглишяпсан, ёки у ўзининг иблис эканини сен пайқаб қолмаслигинг учун анбар пуркаб олган.

Рицарь билан яроқбардор ўртасида ана шу суҳбат давом этар экан, руҳоний билан сартарош «найрангларимизни Санчо фош қилиб қўймасин тагин» деган хавфда тезроқ йўлга тушишга қарор қилишди. Хўжайинни бир чеккага чақириб олиб, унга иложи борича тезроқ Росинантни эгарлаш ва Санчонинг эшагини юганлаш ҳақида буйруқ беришди. Кейин руҳоний ўқчиларга яхши мукофот ваъда қилиб, уларни сеҳрланган асирни қишлоғигача кузатиб қўйишга кўндирди. Уста Николас Росинантнинг эгари қошига бир томондан қалқонни, иккинчи томондан сартарошлик жомини олиб қўйди-да, Санчога имо-ишора билан эшагига миниб, Росинантни етаклаб олишни буюрди. Ўқчилар араванинг икки томонида туриб олишди. Ана шу ҳозирлик ишлари тугаб, йўлга тушиш олдидан бека қизи ва Мариторнесни эргаштириб, ўзларини гўё дон Кихотнинг бошига тушган кулфатдан йиғлагудай хафа бўлган кишилардай кўрсатиб, у билан хайрлашгани чиқишди. Буни кўриб дон Кихот сўз қотди:

— Олижаноб ва раҳмдил хонимлар, менга қайғурманглар! Ҳақиқатга хизмат қилган кишининг бошига бундай мусибатлар тушаверади. Агар бошимга қора кунлар тушмаганида эди, унда мен ўзимни машҳур жаҳонгашта рицарь ҳисобламаган бўлардим. Зероки ҳеч нарса билан донг таратмаган рицарлар ҳеч қачон бунақанги фалокатларга йўлиқмайдилар, негаки, дунёда ҳеч ким уларни эсга олмайди. Бироқ шавкатли рицарлар ҳамиша оғир синовларга дуч келадилар, чунки ёвуз рақиблар бундай рицарларнинг мардлиги ва жасоратига ҳасад билан қараб, уларни ҳар қандай йўллар билан йўқотмоққа ҳаракат қиладилар. Лекин эзулик шу қадар қудратли нарсаки, у энг ўткир сеҳргар Зороастр<sup>48</sup> эга бўлган сеҳргарлик ақли билан қасдма-қасдикка синовларда голиб чиқади ҳамда куёшнинг шуъласи осмонда қандай порласа, унинг шуъласи ерда ҳам шундай порлайверади. Агар мен сизларни бирор нарса билан ранжитган ёки



хафа қилган бўлсам кечиринглар, гўзал хонимлар! Агар шундай бўлган бўлса, унда менинг ихтиёрим билан бўлмаганига ишонаверинг, чунки мен ҳеч қачон ҳеч кимни қасддан ва атайин хафа қилмаганман. Яна озодликка чиққанимдан кейин энг аввало бу қалъада менга кўрсатган жуда кўп марҳаматларингизни унутмаганимни сизларга исботлаш учун шошиламан ҳамда миннатдорчилик билдириб, ўзимнинг садоқатли хизматим ила сизларни тақдирлайман.

— Дон Кихот қалъа эгалари билан хайрлашаётганда руҳоний ва сартарош ўз хачирларига минишди. Йўлга тушиш тартиби шундай бўлди: олдинда арава; уни эгаси деҳқон ҳайдаб кетди, араванинг икки томонида эса, аввал айтганимиздек, мушкет кўтариб олган ўқчилар жўнашди, уларнинг кетидан Росинантни етаклаб эшикда Санчо Панса, энг орқада эса ўз хачирларида руҳоний билан сартарош боришарди. Улар яна дон Кихот таниб қолмасин деб чўчиганларидан ниқобларини ечишмаган эди. Қўллари боғланган рицарь қафасда панжарага суяниб, оёқларини узатганча чидам билан индамай борар экан, жонли одамдан кўра кўпроқ тош ҳайкални эслатарди. Улар аста-секин, жимгина икки тошга яқин йўл босиб, ниҳоят, кўм-кўк майсалар билан қопланган водийга етиб боришди. Шу ерга келганларида аравакаш тўхтаб, ўқизларни ўтлатиб олиш кераклигини айтди. Бироқ сартарош сал нарироққа боришни таклиф қилди, унинг сўзига қараганда бундан серўтроқ бошқа бир водийга яқин қолган эди, ҳамма сартарошнинг таклифига рози бўлиб, йўлларида давом этишди.

Шу пайт руҳоний қайрилиб қараб, узоқда бир неча башанг кийинган отлиқлар келаётганини кўрди. Улар бақувват йўрға хачирларга миниб олишгани учун йўловчиларимизга тез яқинлаб келишарди. Кейин маълум бўлишича булар съестада<sup>49</sup> олдин карвонсаройга етиб олиш учун шошилаётган толедолик каноник билан унинг хизматкорлари экан. Бу ғалати сафга етиб олиб, аравани, ўқчиларни, Санчо, Росинант, руҳоний, сартарошни, ниҳоят қўллари боғланиб қафасга ташланган дон Кихотни кўрган толедолик каноник (гарчанд ҳасса билан мушкет кўтариб олган ўқчиларни кўриб бу асир Санта Эрмандад жазоламоқчи бўлган хавфли қароқчи ёки бошқа бирорта жиноятчи эканини ўзи пайқаган бўлса-да) нега бу одамни ғалати усул билан олиб кетишаётганини сўради.

Каноникнинг саволига ўқчилардан бири шундай жавоб берди:

— Сеньор, бу рицарни нега қафасга ташлашганидан бизнинг хабаримиз йўқ, яхшиси, буни сизга унинг ўзи тушунтириб бера қолсин.

Уларнинг гапини эшитган дон Кихот шундай деди:

— Сеньорлар, сизлар жаҳонгашта рицарлар ишидан яхши хабардормисизлар? Агар хабардор бўлсанглар, унда ўз мусибатли саргузаштларимдан сўзлаб бераман, хабардор бўлмасанглар, унда сизлар билан гапиришиб ўтиришнинг фойдаси йўқ.

Шу пайт руҳоний билан сартарош уларнинг ламанчлик дон Кихот билан суҳбатга тушиб кетишганини кўриб, ўзларининг хийла-найранглари очилиб қолишидан кўрқиб яқинроқ келишди.

Дон Кихотнинг саволига каноник шундай жавоб берди:

— Ростини айтсам, бўтам, диний ақидалардан кўра рицарлик романларини кўпроқ ўқиганман, шундай бўлгач, агар ҳамма иш шунга боғлиқ бўлса, асло хавфсираб ўтирмай, истаган нарсангизни менга гапириб бераверишингиз мумкин.

— Ундай бўлса, — деди дон Кихот, — ҳасадгўй ва хиёнаткор афсунгарлар томонидан сеҳрланган мендек бир кимсани ана шу қафасда олиб кетаётганларини билиб қўйинг, сеньор рицарь. Негаки, ёвузларнинг ҳимматлиларга нисбатан қиладиган таъқиби, олижаноб кишиларнинг уларга нисбатан бўлган севгисидан кучли туради. Мен ҳасадга нисбатан қасдма-қасдлик билан ўз номини мангулик қасрига ёзиш қисматига эга бўлган жаҳонгашта рицарлар сафиданман, токи бундан келгуси авлодлар ибрат олсинлар ҳамда барча жаҳонгашта рицарлар буюк шухрат ва ҳурматга эришиш учун қайси йўлдан боришларини билиб қўйсинлар.

Шу пайт руҳоний гапга аралашди:

— Сеньор дон Кихот бор ҳақиқатни гапиряпти. У ўз гуноҳлари ва жиноятлари учун эмас, балки эзгуликни жуда ёмон кўрадиган, шон-шавкатни кўролмайдиган афсунгарларнинг ёвуз макрлари туфайли мана шу қафасга сеҳрлаб қамаб қўйилган. Қаршингизда Ғамгин Қиёфа рицарь турибди, сеньор. Унинг ҳақида эшитгандирсиз албатта. Унинг олқишга лойиқ хизматлари ва жасоратлари, ҳасад — емиришга, адоват хиралаштиришга қанчалик уринмасин, барибир бронза ҳамда мангу эсдалик мрамор тошига битилажак.

Каноник асир билан унинг ҳамроҳи қай тариқа гаплашаётганини эшитгач, ҳайратидан чўқиниб олишига сал қолди. Ҳа, унинг мулозимлари ҳам нима гаплигига тушунолмай, ҳаммалари анграйиб қолишди. Лекин гап нима ҳақда бораётганини эшитган Санчо Панса, сирни фош қилмоқчи бўлиб дадиллик билан сўзга аралашди:

— Сеньорлар, мени истаганларингча сўксанглар ҳам, мақтасаларинг ҳам, — деди у, — лекин энди индамай турулмайман. Онам қанчалик сеҳрланган бўлса, хўжайиним дон Кихот ҳам шунчалик сеҳрланган. Унинг ақли жойида; у ҳам бошқалар сингари, худди уни қафасга солишни ҳеч ким хаёлига ҳам келтирмаган кечаги кундагидай еб-ичиб, истаганини бажо келтириб юрибди. Шундай бўлгандан кейин унинг сеҳрлаб қўйилганига мени ишонтира олармидингизлар? Менга сеҳрланганлар емайди, гапирмайди ҳам дейишарди ҳамиша, менинг хўжайиним эса, агар уни тўхтатмасангиз, ўттиздан ортиқ стрепчийдан\* ҳам кўп гапирган бўларди.

\* Стрепчий — Москва Русида рўзгор ишларини олиб борувчи сарой ходими.

У шундай деб руҳонийга мурожаат қилди:

— Эҳ, сеньор руҳоний, сеньор руҳоний, наҳотки мени ўзингизни танимаяпти деб ўйласангиз? Наҳотки сизнингча бу янги сеҳргарликларнинг ҳаммаси нимага бориб тақалишини билиб, сезиб олмаган бўлсам? Қанчалик муғамбирлик қилманг, барибир ҳамма найрангларингизнинг учини тошиб олдим. Ҳа, қаерда ҳасад ҳукмрон бўлса, ўша ерда ҳимматга ўрин йўқ, сахийлик билан хасислик ўртасида мурося бўлмайди. Жин урсин барини! Агар сиздек тақсирим учраб қолмаганларида хўжайиним малика Микомиконга аллақачон уйланган бўларди, мен ҳам ҳозир камида граф бўлиб олардим. Одамлар: тақдир гилдираги тегирмон тошидан тез айланади, деб тўғри айтишаркан, мен буни энди тушуниб турибман: кеча арши аълода юрган одам бугун жаҳаннамда ётибди дейишади. Мен ўзимдан кўра рафиқам билан болаларим учун кўпроқ хафаман. Улар ўз оталари уйга бирорта оролнинг губернатори ёки вице қироли бўлиб қайтишига ҳақли равишда ишонилари мумкин эди, бунинг ўрнига энди уйдан қандай чиқиб кетган бўлса шундай қуруқ қайтади. Сеньор руҳоний, мен бу гапларни виждонингизни уйғотиш ҳамда хўжайиним шаънига қилаётган аҳмоқона муомалангиздан пушаймон бўлишингиз учун айтяпман. Эҳтиёт бўлинг! Сеньор дон Кихотни қафасга солиб, уни эзгу ишлар қилишдан ҳамда муҳтожларга кўмаклашишдан маҳрум этганингиз учун яна у дунёда парвардигор сизни жазога тортиб юрмасин.

— Роса одамига ишонган эканмиз-ку, — деди бунга жавобан сартарош. — Демак сиз ҳам ўз хўжайинингиз билан бир гўр экансиз-да, Санчо? Худо ҳақи, сизни ҳам қафасга солсамикан деган гап келяпти хаёлимга. Афтидан дон Кихотнинг рицарлик алаҳлашлари сизга ҳам юққан, сиз ҳам унга ўхшаб сеҳрлангандек кўринасиз. Унинг ваъдаларига беҳуда ишониб, ўзингизга ноёб туюлган оролни деб бошингизни қотириб юрибсиз.

— Хўш, орол нимага ёмон бўлар экан? — эътироз билдирди Санчо. — Дунёда ҳар қандай оролдан ҳам ёмонроқ нарсалар бор. Ҳар қайсимизнинг ўзимизга яраша ташвишимиз бор. Ахир мен одамман-ку, шундай бўлганидан кейин, фақат оролнинг губернаторигина эмас, ҳатто папанинг ўзи бўлишим, хўжайиним эса биттагина эмас, балки ҳаммага тортиқ қилинганда ҳам ортиб қоладиган даражада кўп оролни босиб олиши мумкин. Сеньор сартарош, сиз яхшиси аввал ўйлаб, кейин сўйланг, бу сизга соқол олиш эмас, бу ерда мураккаб нарса ҳақида гап боряпти. Очиғини айтсам, биз ҳаммамиз бир-бировимизни таниймиз, шундай бўлганидан кейин менинг кўзимни бўяшнинг ҳожати йўқ. Гўё сеҳргарлар менинг хўжайинимни сеҳрлаб қўйишган эмиш — бу ҳақда яхшиси гапирмай қўя қолайлик. Ким ҳақ, ким ноҳақ, бунинг ҳаммаси парвардигорнинг ўзига аён.

Сартарош, Санчонинг соддалик қилиб тағин сирларини очиб қўйишидан хавфсираб, унга ҳеч нарса демади. Руҳоний эса каноникка қафас ҳақидаги сир ва бошқа ғалати нарсалар тўғрисида ҳикоя қилиб беражагини айтиб, уни ўзи билан сал олдин-

роққа ўтишга таклиф қилди. Каноник рози бўлди, улар аравадан сал олдинроққа ўтиб кетишгандан кейин руҳоний унга дон Кихотнинг жинни бўлиб қолганини, уни қишлоғига олиб бориб, дори-дармон билан тузатиш ниятида тоғдаги дарадан қандай қийинчилик билан олиб чиқишга ҳам қафасга солишга муваффақ бўлишганини сўзлаб берди. Каноник руҳонийнинг сўзларини зўр эътибор билан тинглади, руҳоний сўзини тугатгандан кейин эса, шундай деди:

— Гапнинг чини, рицарлик романлари сингари бўлмағур уйдирмаларга қандай қилиб қизиқиб қолиш мумкинлигини мен асло тушунолмайман. Ахир орзу ҳақиқатга яқин, амалга ошиши мумкин бўлган тақдирдагина яхши орзу ҳисобланади. Уйдирма саргузаштларни шундай ёзиш керакки, улар мумкин бўлмайдиган нарсаларни сал эви билан ҳамда ҳар қандай лофларни силлиқлаштириб бериб, бизни ҳаяжонлантирсин ва қувонч бахш этсин. Рицарлик романларининг муаллифлари эса, худди атайлаб қилгандай, бунинг аксича иш тутишади: бир-бирларини бўлмағур гаплар ва даҳшатли уйдирмалар билан тўлдириб юборадилар, ҳақиқатни бузиб кўрсатадилар, унга яқин ҳар қандай нарсани йўққа чиқарадилар. Улар асардаги қисмларнинг ҳажм жиҳатидан баробар бўлиши, ҳикояларнинг бири-бири билан изчил боғланган ва бир бутун бўлиши ҳақида сира қайғурмайдилар, натижада ажойиб санъат асарларини эмас, балки қандайдир мудҳиш ва қўрқинчли хомхаёлларни тўқиб чиқарадилар. Бунинг устига улар ғоятда ғализ услубда, барча жанрлар борасида ниҳоятда жоҳиллик билан, шунингдек, дид жиҳатдан қўпол тарзда ёзадилар. Шунинг учун мен рицарлик романлари жамоатчиликка зарарли таъсир кўрсатади, бинобарин, ана шу асарларнинг муаллифлари христиан давлатидан қувғин қилишга лойиқ кимсалардир деб ҳисоблайман.

Руҳоний каноникнинг фикрига тўла қўшилди. Сўнгра у каноникка дон Кихотнинг китоблари қандай ёндириб юборилганини айтиб, уларни қандай қилиб синчиклаб кўздан кечириб чиққанини, қайсиларини олиб қолганини сўзлаб берди.

Каноник бундан роса маза қилиб кулди. Лекин рицарлик романлари ичида ҳам қадрлашга арзийдиган баъзи нарсалар борлигини уқдириб ўтди. Бу ўша асарларнинг мазмунидир, мазмун эса ёзувчи тасавури учун кенг йўл очиб беради. Ёзувчи жанрларни, кема ҳалокатларини, бўронларни, саёҳатларни тасвирлай олади; турли воқеаларни, хилма-хил табақа ва касбдаги кишиларнинг учрашувларини тасвирлаб бера олади; астроном, географ, физик, музикачи олимларнинг ролида чиқа олади. Агар буларнинг ҳаммаси яхши ўйлаб тўқилса-да, ёқимли услубда ҳикоя қилиб берилса унда ёзувчи чиндан ҳам ҳақиқий санъат асари ярата олади. Руҳоний ўзининг ҳурматли ҳамкасабасининг бу фикрларига қўшилди ҳамда улар ўртасида адабиёт ҳақида мароқли суҳбат бошланиб кетди. Худди шу вақт уларни қувиб етган саргарош бундай деди:

— Сеньор лицензиат, мен боя сизга айтган водий мана шу.

Бу ер овқатланиб, дам олиш учун қулай, ҳўкизларга ҳам кўк ўт сероб.

— Жуда соз, — деб жавоб берди руҳоний. — Бўлмаса шу ерда ҳордиқ чиқара қоламиз.

### XXIX БОБ

#### САНЧО ПАНСА БИЛАН УНИНГ ХўЖАИНИ УРТАСИДАГИ ОҚИЛОНА СУХБАТ, ШУНИНГДЕК, ДОН КИХОТНИНГ КАНОНИК БИЛАН ҒОЯТ ОҚИЛОНА БАХСИ

Руҳоний ва сартарошнинг канолик билан гапга киришиб кетганликларидан ҳамда улар дон Кихотни назоратсиз қолдирганликларидан фойдаланиб Санчо ўз хўжайини ўтирган қафас ёнига келди-да, шундай деди:

— Сеньор, ўз виждонимни қийнамаслик учун сизни қандай сеҳрлаб қўйишгани ҳақида бор ҳақиқатни маълум қилишим керак. Бизни кузатиб бораётган икки ниқобли киши ҳамқишлоғимиз руҳоний билан сартарош уста Николасдан бошқа ҳеч ким эмас. Менимча ҳасадлари келиб кетганлиги туфайли улар сизни ушлаб қафасга солганлар. Ўз жасоратларингиз билан сиз улардан устун чиққанингизни энди кўриб туришибди. Борди-ю, шундай бўлса унда сиз умуман сеҳрланмагансиз, балки шунчаки панд еб аҳмоқ қилингансиз деган маъно чиқади. Буни исботлаш учун сизга бир савол беришга рухсат этинг. Агар саволимга, кутганимдай жавоб қайтарсангиз, унда сира сеҳрланмаган, балки ақлдан озганлигингизга тажрибада ишонч ҳосил қиласиз.

— Истаган нарсангни сўрайвер, бўтам Санчо, — деб жавоб берди дон Кихот. — Саволларингга очиқчасига ва аниқ жавоб қайтаришга ҳаракат қиламан. Илло борди-ю, биз билан кетаётган мана бу махлуқларни ҳамқишлоқ эски танишларимиз руҳоний билан сартарош деб ўйласанг, унда катта хато қиласан. Чунки улар мени жодулаган сеҳргар бўлишгани сабабли сенга эски дўстларимиз бўлиб кўриниш учун уларнинг қиёфасига киришган. Улар сени чалғитиш ва менинг кимнинг қўлида эканимни англаб олишимга халал бериш ниятида дўстларимизнинг қиёфасига кириб олишган. Ҳа, айтгандай, руҳоний, уста Николас ҳақида нималар деб вайсасанг менга барибир. Мени асир олиб, қафасга солиш бу асло оддий одамларнинг эмас, балки сеҳргарларнинг қўлидангина келиши мумкинлигига қаттиқ ишонаман. Шундай экан, мен жаҳонгашта рицарлар туғрисидаги романларда ўқиганларимнинг баридан устун турган воситалар ёрдамидагина сеҳрланганман, деган хулоса ва натижа чиқаришим мумкин. Шунинг учун сен хотиржам бўлишинг ва бу тўғрида ўйлашни бас қилишинг мумкин: мен қанчалик туркка ўхшасам, улар ҳам руҳоний билан сартарошга шунчалик ўхшашади. Энди хоҳлаган нарсангни сўрайвер, эртага эрта-лабгача сўрасанг ҳам жавоб беравераман.

— Ё Биби Марьям, ўзинг мадад бер! — деб қичқириб юборди Санчо. — Дунёда сиз муҳтарам жанобларининг бошидан ҳам мус-

тахкамроқ ва миясиз бош бормикин! Бошингизга тушган кулфатда сеҳргарлик эмас, маккорлик кўпроқ айбдор, деб рост гапни айтсам-у, фарқига бормасангиз, ахир бу қанақаси. Хўп, яхши! Ҳеч қанақа сеҳрланмаганлигингизни ҳозир мен сизга очиқ-ойдин исботлаб бераман. Менга очигини айтинг — бу бахтсизликдан қутулиш ва тезроқ сеньора Дульсинеянинг қучоғига киришингизда сизга худо ёр бўлсин!...

— Мени аврашни бас қил,— унинг сўзини бўлди дон Кихот.— Қани бўл, маънаи саволларингни бер. Сенга айтдим-ку, ҳаммасига очиқчасига жавоб бераман деб.

— Менга шу керак,— маъқуллади Санчо,— сиз муҳтарам жанобларидек ўзини ҳарбий ишга бағишлаган ва жаҳонгашта рицарь унвонига эга бўлганлар борки, ҳаммасига ярашадиган ҳамда зарур бўлган даражада ҳеч нарсани қўшмай ва олиб ташламай менга бор ҳақиқатни айтиб беришингизни истаيمان, фақат...

— Ҳеч нарсани ёлғон гапирмайман деяпман-ку сенга! — деб хитоб қилди дон Кихот.— Қани саволингни берсанг-чи! Ўзингнинг борди-келди гапларинг билан жонимга тенгдинг-ку, Санчо!

— Мен эса ўз хўжайинимнинг ҳалол ва ростгўйлигига ишонаман; шундай экан, модомики, асосий масалага ўтдикми, сизга шундай саволим бор: муҳтарам жаноблари, қафасга ташланганингиздан бери ўз табиий заруриятингизни қондириш иштиёқи ёки эҳтиёжи туғилмадими?

— Тушунмаяпман, Санчо, қандай зарурият ҳақида гапирарсан. Агар мени очиқ-ойдин жавоб берсин десанг, аниқроқ айт.

— Сўзларимнинг маъносини муҳтарам жаноблари наҳотки тушунмаётган бўлсалар? Ахир буни мактабда она сути оғзидан кетмаган болаларга ҳам ўқитишади-ку. Яъни, бир сўз билан айтганда, қочиб қутулиб бўлмайдиган ишни бажаргингиз келмадими?

— Энди тушундим, Санчо. Албатта шундай қилгим келди, яна бир неча марта, мана ҳозир ҳам худди шундай хоҳишим бор. Биродар, менга ёрдам бергил! Нима қилишни ҳам билолмай қолдим, тагин бирор фалокат юз бермасайди, деб кўрқяпман.

— Аҳа! — тантанали хитоб қилди Санчо.— Қўлга тушдингизми?! Мен худди шуни билиб олмоқчи эдим-да! Қани энди айтинг-чи, сеньор, одамларнинг: «хайронман унга нима бўлган ўзи,— емайди, ичмайди, ухлолмайди, саволларга ҳам ўринсиз жавоб беради, тагин у сеҳрланган бўлмасин», деган гапларини наҳотки эшитмагансиз. Бундан эса ким еб-ичмаса, ухламаса табиий зарурияти бўлмаса, у сеҳрланган бўлади, деган маъно чиқади. Муҳтарам жаноблари сингари, таклиф қилишганда ичса, беришганда еса, нима ҳақда сўрасангиз ҳаммасига жавоб қайтарса, унда мутлақо бунинг акси бўлиб чиқади-ку!

— Сен оқилона фикр юритяпсан, Санчо,— деб жавоб берди дон Кихот,— лекин савдойиликнинг хиллари турлича бўлишини унутганга ўхшайсан чамаси. Эндиликда сеҳрланганлар илгари ҳеч ким қилмаган, лекин ҳозир мен қилаётган ҳамма ишлар-

ни қилаётган бўлишлари мумкин. Ҳар ҳолда мени сеҳрлашганига ишончим қатъий, мени хотиржам қилаётган нарса шу. Мен сеҳрланмаганман, балки шунчаки дунёда ошиб-тошиб ётган бахтсиз ва муҳтожларга қўлимдан келадиган ёрдамимни беролмай, худди бекорчи ва иродаси суст одамдай қафасда ўтирибман, деб ўйлаганимда қанчалик изтироб чеккан бўлардим.

— Менимча, — деб жавоб берди Санчо, — ҳар қалай муҳтарам жаноблари тўла хотиржам бўлишлари учун мана шу қафасдан қутулиб чиқиб, ажойиб Росинантингизга минишга уриниб кўрсалар бўлармиди. Қаранг, Росинантингиз ҳам гўё сеҳрлаб қўйилгандай, қандай ғамгин ва ўйчан. Бу ишда сизга ҳар томонлама кўмаклашишга ваъда бераман. Қафасдан қутулганингиздан кейин эса яна саргузаштлар излагани йўлга тушишга уриниб кўрамиз. Борди-ю, бахтга қарши ҳаракатимиз пучга чиқиб, бизларни ҳалок қилмоқчи бўлган ёмон ниятли кишилардан қочиб қутулолмасак, ваъдам шуки, содиқ ва олижаноб яроқбардорга хос равишда мен ҳам сиз марҳаматли жаноблари билан бирга қафасга кираман.

— Хўп, майли, биродар Санчо, — деди дон Кихот, — ана шу режани амалга ошириб, мени озодликка чиқариш учун қулай вазият топсанг, ҳамма гапингга бўйсунаман. Аммо бунинг амалга ошишига умидим йўқ. Бошимга тушган бахтсизликни сен жуда оддий қилиб тушунтириб беряпсан.

Аммо шу пайтда олдинда кутиб турган руҳоний, каноник ва сартарош ёнига арава етиб келди. Ҳамма уловидан тушди: аравакаш ҳўкизларни аравадан чиқариб ўтлагани кўм-кўк яйловга қўйиб юборди. Санчо руҳонийдан ўз хўжайинининг бир дақиқага қафасдан чиқишига рухсат беришини сўради, акс ҳолда шавкатли рицарнинг шаънига тўғри келмайдиган воқеа содир бўлиши мумкинлигини тушунтирди. Руҳоний гап нима ҳақида бораётганини пайқади, дон Кихотнинг озодликка чиққач яна ўз билганини қилиб, янги саргузаштларни излаб қочиб кетишидан қўрқмаганида Санчонинг илтимосини ҳозироқ бажонидил бажарган бўлишини айтди.

— Унинг қочиб кетмаслигига кафилман, — деди Санчо.

— Рухсатимизсиз биздан узоқлашмаслик ва қочиб кетмасликка рицарлик сўзини берса, — деб илова қилди каноник, — унда мен ҳам кафилман.

— Сўз бераман, — деб жавоб қилди бу гапни эшитиб турган дон Кихот. — Сеҳрланганларнинг эрклари, ўзлари истаганларидек, ўз ихтиёрларида бўлмагани учун ҳам жон-жон деб сўз бераман, чунки сеҳргар ундайларни уч юз йил бир жойда қотиб туришга мажбур қила олади, борди-ю, қочиб кетсалар, сеҳргар уларни ҳамаша тутиб кела олади. Шунинг учун ҳам мени бемалол қафасдан чиқараверишларинг мумкин.

Шунда каноник дон Кихотнинг қўлини ечиб, қафаснинг эшигини очиб юборди. Хурсанд бўлиб кетган дон Кихот эпчиллик билан ташқарига чиқди; энг аввал керишиб, оёқ-қўлларини

қимирлатди, кейин эса Росинантнинг олдига бориб сағрисиға шাপатилаб қўйди-да, шундай деди:

— Эй дунёдаги барча аргумоқларнинг ноёби ва фахри, аминманки, худо ва Биби Марьям бизларга мадад бериб, яқинда муддаомиз мустажо бўлади! Сен яна ўз хўжайинингни олиб юрасан, мен эса яна тангрининг амри билан адолатга хизмат қилавераман.

Шундан кейин дон Кихот нонушта қилиш иштиёқида майсазорда ўтирган гуруҳга қўшилди. Каноник дон Кихотни овқатланишга таклиф қилди, бунга идальгомиз бажонидил рози бўлди, у ўзини сеҳрланган деб ҳисоблаган бўлса ҳам анча очқаб қолган эди. Рицаримизнинг ғалати савдойилигига қизиқиб қолган каноник уни ўз ёнига ўтқазди-да, раҳмдиллик билан сўради:

— Сеньор идальго, наҳотки бемаъни ва бемаза рицарлик романларини ўқшдан таъсирланиб, ақлингизга путур етганидан ўзингизни чиндан ҳам сеҳрланганман деб ўйласангиз? Наҳотки, чин нарсадан ёлғон қанчалик йироқ бўлса, ҳақиқатдан шунчалик йироқ бўлган бу уйдирмаларга ишонасиз? Дунёда бунақанги сон-санокиз Амадислар, бунақанги трапезунд императорлари, Фелисарт Гирканскийлар, учар отлар, жаҳонгашта хонимлар, аждаҳолар, андриаклар, девлар, сеҳргарлар, жанглар, шайдои маликалар, граф бўлиб олган яроқбардорлар, кулгили пак-пакана одамлар, севги мактублари, турли сеҳру жодулар ва мўъжизалар — хуллас, рицарлик романларида тўлиб-тошиб ётган ана шу сафсаталарга инсон ақли ишониши мумкин? Шахсан ўзим уларни ўқиганимда, улар менга бирмунча завқ бағишлайди. Лекин ана шу бемаза гапларни ўйлай бошлаганимда менда тўсатдан ғазаб туйғулари пайдо бўлади. Бу романларнинг ҳаммаси жуда катта зиён келтирадики, уларни битта қўймай куйдириб юборса арзийди. Улар ҳаммаси бемаънигарчилик ва ёлғондан иборат бўлиб, инсон табиати қонунарига зиддир. Асосийси эса улар энг мулоҳазали ва олижаноб идальголарнинг онгини заҳарлайди. Сиз муҳтарам жанобларининг аҳволи буни кўрсатиб турибди. Ахир ўша асарлар сизни шундай аҳволга олиб келдики, натижада, бирор шер ёки йўлбарсни пулга кўрсатиб қишлоқма-қишлоқ олиб юргандек, сизни ҳам қафасга солиб, ҳўкизаравага солиб юришга тўғри келади. Эҳ, сеньор дон Кихот, ўзингизга раҳмингиз келсин, эс-ҳушингизни йиғиб олиб, худо ато этган ақлингизни бахт-саодатингиз йўлида ишга солинг. Ажойиб қолбилиятингизни бошқа китобларни ўқишга бағишланг, ана шунда жонингиз ҳам омон қолади, шуҳратингиз ҳам ошади! Борди-ю, тугма лаёқатингиз туфайли қахрамонларга бағишланган китобларга қизиқсангиз, унда муқаддас китоблардан бўлган Судейни ўқинг, мазкур китобда чинакамига буюк воқеалар ва жасоратлар ҳаққоний тасвирланганини кўрасиз. Мухтарам жанобларининг расо ақллари шундай китобларни ўқишга лойиқ, сеньор дон Кихот!

Дон Кихот каноникнинг сўзларини зўр эътибор билан тинг-



лади, гапани тамомлаганидан кейин эса, унга узоқ вақт қараб туриб, ниҳоят, шундай деди:

— Агар хато қилмасам, марҳаматли жаноблари дунёда жаҳонгашта рицарлар бўлмаган; рицарлик романларининг ҳаммаси уйдирма, давлатга зарарли ва фойдасиз, уларни ўқиб бекор қилгансиз, уларга ишониб бундан ҳам ёмон иш қилгансиз, уларнинг қаҳрамонларига эргашиб эса ўтакетган даражада бемаъни иш қилгансиз, деб ишонтиришга уриняптилар шекилли? Лекин, ана шу романларда қаҳрамонликлари ифодаси тўлиб-тошиб ётган Амадис Галльский билан Амадис Греческий ва бошқа рицарлар яшаб ўтганини наҳотки инкор этсангиз!

— Марҳаматли жаноблари менинг фикримни жуда тўғри талқин қиляптилар,— деб тасдиқлади каноник.

Дон Кихот эса сўзида давом этди:

— Муҳтарам жанобларининг бунга қўшимча қилиб айтишларича ана шундай китобларни ўқиш менга катта зиён келтирибди, чунки мени ақлдан оздириб, мана бу қафасга тушиб қолишимга сабаб бўлибди; башарти мен тузалсам-у, рицарлик романлари ўрнига кўпроқ ҳаққоний, кўпроқ мароқли ва ибратли китобларни ўқий бошласам яхши иш қилган бўлармидим?

— Мутлақо тўғри,— деб таъкидлади каноник.

— Модомики бутун дунёда,— деди дон Кихот,— ҳақиқат деб топилган нарсани қоралашга жазм этган экансиз, демак, сеҳрланган ва ақлдан озган сиз ўзингизсиз. Муҳтарам жанобларига ўхшаб рицарлик романларининг ҳаққонийлигини инкор этган киши, марҳаматли жаноблари ўзларига ёқмаган китобларни қандай қолга солмоқчи бўлсалар ўшандай жазога лойиқдир. Сиз саргузаштлар излаган Амадис ҳам, бошқа рицарлар ҳам дунёда яшамаган деб мени ишонтирмоқчи бўляпсиз, ваҳоланки, улар тўғрисида романларда очик-ойдин баён қилиб берилган! Бундай дейиш, қуёш нур сочмайди, муз — совуқ эмас, ер қаттиқ эмас деб исботлашга уриниш билан баробардир. Дунёда қайси одам инфант Флорипес ва Гюа Бургундский воқеасининг ёлғонлигига бизни ишонтира олади! Ёки Буюк Карл даврида Мантибль кўпригида Фьерабрас кўрсатган жасоратни олайлик! Бунинг ҳаммаси, ҳозир кундуз эканидай рост бўлмаса мени жин урсин! Агар бу ёлғон бўлса, демак унда на Гектор, на Ахилл, на Троя уруши, на Франциянинг ўн икки пәри, на қарғага айланиб ҳануз кўкда парвоз қилиб юрган қирол Артур Английский бўлган, зотан шу кунга қадар унинг қайтишини кутишяпти-ку, ўз қироллигида! Бир вақтлар Пьер ўзини осмонда учуриб юрган ёғоч арғумоқни бошқарган мурват то шу кунгача қироллик қурулхонасида сақланиб келган экан, Пьер билан гўзал Магеллона тарихини ким инкор эта олади. Бабъеканинг эгари ҳам ўша ерда; Ронсевалда эса Роланднинг<sup>50</sup> катталиги ҳодадай келадиган бурғиси сақланиб қолган. Демак, мана шулардан кўриниб турибдики, ўн икки пәр ҳам, Пьер ҳам, Сид ҳам, уларга ўхшаган бошқа рицарлар ҳам

дейиш керак.

Икки жасур испан — Педро Барба билан Гутьерра Кихадаларнинг<sup>51</sup> (ота томонидан мен ўшаларнинг авлодига бориб тақаламан) Бургундиядаги саргузаштлари ҳам тўқими, улар граф де Сен Полнинг икки ўғлини жангга чақириб, устларидан галаба қозонишмаганмиди ахир? «Пасо»да баён қилинган Суэро де Киньонес<sup>52</sup> турнири ҳам, Луис де Фальсеснинг кастилиялик рицарь дон Гонсало де Гусман<sup>53</sup> билан бўлган яккама-якка олишувини ҳам ва умуман бизнинг ҳамда чет эл христиан рицарларининг беҳисоб жасорат ва қаҳрамонликларининг барчасини ҳам уйдирма дерсиз. Ваҳоланки буларнинг ҳақиқатлиги юзасидан баҳслашиб ўтирган одамнинг ўзи ақлдан озганлиги ҳар кимга ҳам аёндыр.

Дон Кихотнинг ўзи севган жаҳонгашта рицарлар тарихига доир маълумотларни чуқур билиши каноникни қойил қолдирди.

— Сеньор дон Кихот,— деди у,— сиз келтирган мисолларнинг баъзилари тўғрилигини мен инкор эта олмайман. Масалан, Франциянинг ўн икки пэри чиндан ҳам бўлган деган фикрингизга қўшилишга тайёрман. Лекин архиепископ Турпиннинг улар тўғрисида ёзган ҳамма нарсани чиндан бажарганларига ишонмайман. Бизга улар фақат рицарлар бўлгани ва француз қироллари танлаб олиб, пэрлар\* деб ном беришганигина маълум, чунки бу рицарлар насл-насаб жиҳатдан, жасорат ва шон-шавкатда тенг бўлганлар. Муҳтарам жаноб айтган қирол қуролхонасида Бабьеканинг эгари ёнида сақланаётган граф Пьернинг мурватига келганда мен ўзимни гуноҳкор деб тан оламан: мен ё нодонман, ёки кўзим хира, эгарга яхшилаб разм солибман-у, аммо гарчанд муҳтарам жаноблари айтганидек унчалик кичик бўлмаса ҳам мурватни кўрмабман.

— Э йўк, мурват ўша ерда бўлса керак албатта! — деб хитоб қилди дон Кихот. — Мен, овозаларга қараганда, ана ўша мурват учун махсус чарм ғилоф ясаганини ҳам қўшимча қилишим мумкин.

— Ҳаммаси бўлиши мумкин,— деб жавоб берди каноник,— лекин диний мартабам ҳаққи қасам ичаманки, у ерда мурват кўрганам эсимда йўк. Боринги, мурват ўша ерда деб фараз ҳам қила қолайлик, шунда ҳам бу нарса менда романларнинг муаллифлари ёзган ўша Амадислар ва бошқа сон-саноксиз рицарлар тарихига ишонч туғдиrolмайди. Сиз ҳам муҳтарам жаноблари, ҳурматли ва бамаъни одам сифатида бемаъни рицарлик романларида тўлиб-тошиб ётган ҳамма аҳмоқона уйдирмаларни ҳақиқат деб билмаслигингиз керак.

— Яхши! — деб хитоб қилди дон Кихот. — Демак, қиролнинг рухсати ва маъмурларнинг маъқуллаши билан нашр этилган,

\* Paire — французча «тенг» дегани.

каттаю кичик, бою камбағал, олижанобу оддий кишилар завқ-шавқ билан мутолаа қилиб, тасаннолар ўқишаётган бу китобларни сиз ёлғон-яшиқ китоблар деяпсиз! Ахир бу китоблар мазмунида ҳеч қанақа тўқима йўқ — чинакам ҳақиқат ётибди-ку! Бундан бошқача бўлиши ҳам мумкин эмас! Ахир уларда ҳар қайси қаҳрамон ҳаётидан ҳамма аниқ маълумотлар келтирилади-ку: ота-онасининг номи, туғилган жойи тилга олинади; унинг кўрсатган қаҳрамонликлари батафсил ҳикоя қилиниб, у бўлган мамлакатлар баён этилади-ку. Бас, муҳтарам жаноблари, уларни таҳқирламанг! Яхшиси, менинг маслаҳатимга қулоқ солинг: бу китобларни қайтадан ўқиб чиқинг, сизга улар қандай завқ беришини кейин ўзингиз ҳам кўрасиз. Рицарлик романларини ўқишдан ҳам ортиқ роҳат борми! Сизнинг ақл порлаб турган кўз олдингиздан турли одамлар, қаҳрамонлар, баҳайбат махлуқлар, ажойиб қалъалар, мудроқ ўрмонлар ўта бошлайди, кутилмаганда эса биқирлаб қайнаб ётган қатрон тўла катта кўл намоён бўлади. Кўлда сон-саноксиз илонлар, калтақасаклар ва бошқа ваҳший ҳамда даҳшатли гизандалар биқирлаб ётган бўлади, тўсатдан кўлнинг қоқ ўртасидан кишининг кўнглини эзадиган мунгли нидо эшитилади: «Эй рицарь, сен ким бўлишингдан қатъи назар, агар бу қўрқинчли кўлнинг қоп-қора сувлари остида яшириниб ётган хазинани кўлга киритмоқчи бўлсанг, қудратли юрагингни ишга солиб, қоп-қора бўлиб қайнаб ётган сувга сакра. Ана ўшанда сен мана шу тим-қора тўлқинлар тагида қолиб кетган етти парининг етти қалъасидаги ажойиб мўъжизаларни кўрасан». Ана шу йўл кўрсатувчи мунгли овозни эшитиш биланок рицарь ҳеч нарсанинг фарқига бормаиди, хавф-хатарни ўйламаиди, огир, улкан яроғ-аслаҳаларни ечишни ҳам хаёлига келтирмаиди. Ўзини худога ва маъшуқасига топшириб, қайнаб турган кўлнинг қоқ ўртасига сакрайди, лекин тўлқинлар унга йўл очади, ниҳоят, қаршисида Елисей далалари ҳам тенглашолмайдиган ўтлоқ пайдо бўлади. Унга бу ернинг осмони янада тиниқроқ, қуёш янада ёрқинроқдек туюлади, соя-салқин дарахтзор уни мафтун этади, дарахтларнинг янги барглари шундай ялтирайдими, унинг кўм-кўк ранги кўзларига нур бағишлайди, париллаб шохдан-шохга учиб-қўниб юрган турли-туман қушчаларнинг сайрашлари қувончини оширади. Тип-тиниқ ариқча қумлар ва оппоқ тошларни оралаб оқади. Мана у хилма-хил яшма билан жило берилган мрамардан ясалган фонтанни кўради. Мана ялтираб турган турли-туман кристаллар билан аралаштирилган олтиндан, кунгуралари олмосдан бўлган мустаҳкам қалъа ёки ҳашаматли сарой намоён бўлади; унинг ҳаммаёғи қимматбаҳо тошлар билан қопланган бўлади, меъморчилик услуби эса уни янада мафтун этади, жимжимадор миноралари, осма кўшклари, қатор-қатор устунлари ва нарвонлари ундан ҳам жозибали. Қалъанинг дарвозаси тўсатдан очилиб кетади-ю, ичкаридан қўғирчоқдай ясанган гўзал қизлар турнақатор бўлиб келишади. Қизлардан бири рицарнинг қўлидан ушлайди-да, индамай,

уни ҳашаматли қалъага бошлайди. Рицаръ қалъага киргач ювинади, унинг баданларига муаттар нарса суришади, энг хушбичим қилиб тикилган хушбўй кийимлар кийгизишади, устига эса сербар узун уст кийим ташлашади, бу энг камида бир шаҳар баҳосидан қиммат туради. Кейин уни бошқа залга бошлаб киришади, у ерда тўкин дастурхон ёзилган, унинг қўлларига топ-тоза анбар ёки муаттар гулларнинг шираси қўшилган сув қўйиб юборишади, сўнгра фил суягидан ясалган тахтга ўтқозишади; қизлар унга лом-мим демай хизмат қилишади, кўплаб ширин-шарбат ноз-неъмат олиб келиб уни меҳмон қилишади. У овқатланаётганида қандайдир сирли музика янграб туради. У овқатланиб бўлиб, дастурхон йиғиштириб олинач, тўсатдан қаршисида ўз гўзаллиги билан бошқа ҳамма қизлардан устун турадиган яна бир қиз пайдо бўлади; у рицарнинг ёнига ўтиради-да, унга бу ернинг қандай сарой эканлигини айтиб ўзининг кимлигини таништиради. Уни ёвуз сеҳргар сеҳрлаб қўйганлигини, кўпдан буён ўз халоскорини орзиқиб кутаётганини сўзлаб беради... Бу ёгини давом эттириб ўтирмайман. Жаҳонгашта рицарлар ҳақидаги ҳар қандай роман ҳар қандай китобхонни ҳайратда қолдириши ва ҳаяжонлантириши кераклиги бусиз ҳам тушунарли. Шундай қилиб, гапимга қулоқ солинг, муҳтарам жаноблари, бу китобларни ўқиб чиқинг: агар хафақон бўлсангиз даволайди, кўнглингиз хира бўлса очиб юборади. Менга келганда, гапимга ишонаверинг, жаҳонгашта рицар бўлганимдан буён мен мард, эҳтиромли, сахий, одобли, ҳимматли, хушмуомалали кўркмас, дилкаш бўлиб олдим. Мен фалокатларга ҳам, бандиликка ҳам, сеҳрланишга ҳам сабр-тоқат билан чидайвераман! Ҳозир мени жиннига чиқариб қафасга солиб қўйишди, лекин агар олло-таоло менга мурувват қилса, бақувват қўлларимни ишга солиб, бирор мамлакатнинг қироли бўлиб олишимга аминман. Ушанда менинг қалбимда қанчадан-қанча шафқат ва сахийлик яшириниб ётганини кўрасиз. О, мен дўстларимга, айниқса бечора яроқбардорим Санчо Пансага яхшиллик қила оламан, мен яроқбардоримни дунёга энг яхши одам ҳисоблайман. Мен уни граф қилиб қўйишга аллақачон ваъда берганман, гарчанд графликни бошқара олмаслигидан кўрксам ҳам, буни амалга оширишни жуда-жуда истардим.

Санчо дон Кихотнинг энг кейинги гапларини эшитиб, шундай деди:

— Сизни ишонтириб айтаманки, сеньор дон Кихот муҳтарам жаноблари, менга бир неча марта ваъда қилганингиз графликни бошқаришга фаҳм-фаросатим етади. Бунга тезроқ эришсам бас!

— Иним Санчо, шунга унутмангки,— деди каноник,— ҳар қайси сеньор ўз мулкига ўзи қози бўлиши керак, бунинг учун эса билимли ва мулоҳазали бўлиш, энг асосийси — адолат юзасидан иш юрита билиш лозим, бусиз эса бошқаришингиз палапартиш бўлиб кетади.

— Бу фалсафаларингизга ақлим етмайди,— деб жавоб берди Санчо,— лекин мен фақат бир нарсани биламан, графликка

муяссар бўлсам, уни бошқара оламан. Ахир ҳар қандай одамда бор қалб менда ҳам бор, гавдам эса кўпларникидан каттароқ. Ҳа, мен ҳам ўз мулкимни ҳар қандай қиролдан яхши бошқара оламан, бошқараётганимда эса хаёлимга нима келса шуни қиламан, хаёлимга келганини қилар эканман, ўз ҳузур-ҳаловатимни ўйлаб яшайман, ўз ҳузур-ҳаловатимни ўйлаб яшарканман ҳаммадан хурсанд бўламан, кимки ҳаммадан хурсанд бўлса ҳеч нарсага муҳтож бўлмайди, ҳеч нарсага муҳтож бўлмагандан кейин эса гап тамом, вассалом.

Шу ерда дон Кихот гапга аралашди:

— Санчо графликни бошқара оладими, йўқми, буни келажак кўрсатади. Мен эса буюк Амадис Галльскийга эргашаётirman. У ўз яроқбардорини Қуруқлик оролига граф қилиб кўтарган. Шунинг учун мен жаҳонгашта рицарларга хизмат қилган энг яхши яроқбардорлардан бири Санчо Пансани ҳеч қандай виждон азобисиз графлик мартабасига кўтара оламан.

Каноник бўлмағур хаёлларга берилиб кетган рицарнинг телбалигигами ёки хўжайини айтган сўзларга ишонган хизматкорнинг соддалигигами — қайси бирига кўпроқ ажабланишини билмай қолди.

Улар шу қўйи гаплашишаркан, каноникнинг хизматкорлари гилам тўшаб, озиқ-овқатни ёйиб қўйишди, шундан кейин ҳаммалари овқатлангани ўтиришди.

### XXX БОБ

#### ЧЎПОН БИЛАН УЧРАШУВ, ЧЕРКОВ МАРОСИМИ БИЛАН БОҒЛИҚ БЎЛГАН САРГУЗАШТ ҲАМДА ДОН КИХОТНИНГ УЙИГА ҚАЙТИШИ

Улфатлар ўтлоққа ўтиришиб тинчгина овқатланишаётганда, қаердандир буталар орасидан қўнғироқчаларнинг жиринглаши қулоққа чалинди. Худди шу дақиқада буталар орасидан олабула эчки сакраб-сакраб чиқиб қолди; кегидан қичқириб қувиб келаётган чўпон уни яна подага қайтаришга беҳуда уринарди. Қўрқиб кетган қочоқ гўё ҳимоя талаб бўлгандай, довдираганча тўппа-тўғри одамлар томон югурди, уларга яқинлашгач эса худди қоққан қозикдек қаққайиб туриб қолди. Уни қувиб етган чўпон шохидан ушлаб олиб шундай деди:

— Эй, чипор шумтакам! Ҳали шўхлик ҳам қилмоқчи бўлдингми? Қайси бўри тишлаб олди сени, қизалоғим? Қайт дарров, қайт, жонгинам. Отар сенга ёқмаса-да, лекин ҳар ҳолда у ерда дугоналаринг орасида хатарсиз бўласан. Қўй-э, инжиқлигинг қуриб кетсин.

Чўпоннинг ўз эчкиси билан гўё у ақлли жонивордай гаплашгани ҳаммаларининг кўнглини очиб юборди ва каноник унга шундай деди:

— Ўтиниб сўрайман, иним, шошманг, эчкингизни подага ҳайдамай туринг, мана бу гўштни олинг-да, бир стакан майдан

ичинг, жаҳлингиздан тушасиз, эчкингиз ҳам нафасини ростлаб олади.

Каноник шундай деди-да, унга бир бурда яхна қуён гўшти узатди. Чўпон самимий миннатдорчилик билан қабул қилиб, каноникнинг ёнига ўтирди, винони ичиб гўшт билан тамадди қилгач, ниҳоят, шундай деди:

— Муҳтарам жаноблари, менинг мана бу эчки билан қандай гаплашганимга қараб, мени аҳмоқ экан деб ўйлашларини истамасдим. Гапимнинг тагида гап бор. Мен гарчанд деҳқон бўлсам ҳам, одамлар билан қандай, ҳайвонлар билан қандай муомала қилишни жуда яхши биламан.

— Бунга бажонидил ишонаман, — деб жавоб берди каноник, — чунки тоғларда олимлар, чўпонлар кулбасида эса файласуфлар етишишини ўз тажрибамдан биламан.

— Ҳар ҳолда, — деди чўпон, — у ерларда кўпинча бошидан кўп нарсаларни кечирган ва турмушни биладиган одамлар яшайди. Мен илгари чўпон эмас эдим.

— Қани, бошдан кечирганларингизни бизга ҳикоя қилиб беринг, — мурожаат қилди унга руҳоний. — Бажонидил тинглаймиз.

Унинг илтимосига шу ердагиларнинг ҳаммаси қўшилди.

— Менинг бошдан кечирганларим жуда оддий кечинмалар, муҳтарам сеньорлар, — деди чўпон. — Мен қўшни қишлоқдаги бадавлат бир деҳқоннинг ўғлиман. Тўқ ва фаровон турмуш кечирардим. Уша қишлоқда бир сулув қиз яшарди, у жуда обрўли ва бадавлат хонадоннинг қизи эди. У шу қадар сўқсур эдики, доврўги бутун музофотга ёйилган эди. Унинг қўлини сўраганлар жуда кўп бўлди, лекин совчи юборганлар орасида унинг отасига мен, шунингдек ўз қишлоғимизда туғилиб ўсган яна бир давлатманд ва кўҳлик йигит айниқса ёқиб қолган эдик. У иккаламиздан қайси биримизни яхши кўришни билмай, яхшиси қизнинг ўзи танлашини афзал ҳисоблаб, ундан қайси биримиз ёқишимизни сўради, у нима деганидан беҳабарман-у, лекин отаси қизим ҳали жуда ёш, уни эрга беришни кечиктиришга тўғри келади, деб жавоб қилди. Шу орада қишлоқда янги ошиқ пайдо бўлди. У бир деҳқоннинг ўғли эди, у урушда қатнашиб юртига қайтиб келган, ола-була кийимига хилма-хил шақир-шуқурларни ва занжирларни тақиб олган эди. У мақтанчоқ ҳам безбет эди. Узининг ажойиб қаҳрамонликлари: ўзи борган турли мамлакатлар, катта шаҳарлардаги қувноқ ва фаровон ҳаёт ҳақида усталик билан сўзлаб берарди. Бунга шуни ҳам илова қилиш керакки, у дурустгина музикачи бўлиб, гитарани жуда бошлаб чаларди, бунинг устига шоирлик ҳам қиларди, қишлоғимизда юз берган ҳар бир ҳодиса тўғрисида узунлиги бир ярим миля келадиган романслар ёзарди. Сулув қизнинг исми Леандра эди, у ана шу олифтага ёқиб қолиб, олифта унинг кўнглини овлашга ўтди. Биз, бошқа ошиқлари, қиз ғурури йўл бермай унинг сўзини рад этади деб ўйлаган эдик. Лекин кунлардан бир кун қиз ҳамма қимматбахо буюм-

ларини анчагина пулни олиб, у билан номаълум томонга қочиб кетганида бизнинг умидсизликдан ҳайрон бўлиб қолганимизни тасаввур қилиб кўринг-а, муҳтарам сеньорлар. Қизини жонидан яхши кўрган ота бошига тушган ғамдан нақ эсини йўқотиб қўяёзди, уни қидириб ҳамма ерга борди, бутун полицияни оёққа турғазишди, барча ўрмон ва ўтлоқларни ағдар-тўнтар қилиб юборишди. Қочоқ қизни ниҳоят тоғдаги бир ғордан топишди. Уни бор буд-шудидан маҳрум қилиб, ўз ҳолига ташлаб кетган экан ўша йигит. Олифта йигит ўғри экан-да, у қизнинг ҳамма кўйлаklarини, қимматбаҳо буюмларини ва пулларини тортиб олиб кетиб қолибди. Афтидан унинг ҳисобига бойишни истаган экан. Бу воқеа бутун музофот бўйлаб катта шов-шув кўтарилишига сабаб бўлди. Сулув қиз ўз дугоналарининг кўзига кўринолмай ноқулай ахволда қолган эди, отаси уни вақтинча қўшни монастирга олиб бориб қўйди. Ушандан кейин яшаш шундай жонимга тегиб кетдики, эчкиларни ҳайдаб тоққа жўнадим; ана шу қоялар орасида, дарахтлар соясида, сой бўйларида ёлғизликда яшаб чилпарчин бўлиб кетган муҳаббатимга ачиниб, енгилтак ва ўжар қизни қарғаб юрибман.

Чўпоннинг ҳикояси тингловчиларга жуда қаттиқ таъсир қилганидан ҳаммалари бир-бирларига гап бермай чуғурлашиб, унга ҳамдардлик изҳор қилишди.

Дон Кихот ҳаяжонланиб кетганидан хитоб қилиб юборди:

— Сизни ишонтириб айтаманки, эчкибоқар оғайни, агар мен ҳозир саргузаштлар излашга жўнай олганимда эди, энг аввало сизнинг Леандрани тавба-тазарру қилаётган монастирга борардим-да, хотинлар монастири бошлиғи ва бошқа менга тўсқинлик қилмоқчи бўлганларнинг қаршилигига қарамай, қизни халос этардим. Лекин, э воҳ, мен сеҳрланганман, шунинг учун бу дақиқада бирор чора кўришга қодир эмасман. Бироқ аминманки, олижаноб сеҳргар ёвуз жодугардан кучли чиқади ва тезда ўз ҳолимга қайтаман. Шунинг учун ҳам сизга кўмаклашиш ва ҳомийлик кўрсатишга қатъий ваъда бераман, чунки ожизлар ва мазлумларни ҳимоя қилувчилар зиммасига шундай вазифа юклатилган.

Чўпон дон Кихотга қаради-да, унинг устидаги аломат кийимлари ва ғалати сўзларидан ажабланиб, ёнида ўтирган сартарошдан сўради:

— Сеньор, бу одам ким? Гаплари жуда ғалати, кийимлари ҳам қизиқ.

— У,— деб жавоб берди сартарош,— таҳқирланганларнинг қасоскори, адолат ҳимоячиси, хонимлар ҳомийси, девларга даҳшат солувчи ва жангларда ғолиб чиқувчи машҳур ламанчлик дон Кихотдан бўлак ким бўларди.

— Гапингизнинг ҳаммаси,— деди чўпон,— жаҳонгашта рицарлар ҳақидаги уйдирмаларга ўхшайди. Бундай ишларни фақат ана ўша жаҳонгашта рицарларгина қилганлар, сиз муҳтарам жаноблари бўлсангиз, буларни сеньор дон Кихот номи

билан боғлаясиз. Менимча, ё муҳтарам жаноблари ҳазиллаш-  
яптилар, ё бу олижанов сенъорнинг боши қовоқроқ.

— Сиз сурбет муттаҳамсиз!— деб хитоб қилди дон Кихот  
қўзлари чақнаб.— Қовоқбош овсар сизнинг ўзингизсиз. Бировни  
ҳақорат қилиш мана бундай бўлади!

У шундай деб, олдида турган думалоқ нон билан чўпоннинг  
башарасига шундай туширдик, унинг бурни пачоқ бўлиб кетди.  
Чўпонга бу ҳазил унча ёқмади шекилли, у гиламни гилам, дас-  
турхонни дастурхон демай, овқатланаётганлар орасидан босиб  
ўтиб, дон Кихотга ташланди-да, икки қўли билан унинг томоғидан  
бўғиб олди. Агар Санчо Панса ёрдамга келмагандами, шўринг  
қурғур рицарнинг ҳоли хароб бўларди. Содик яроқбардор чў-  
поннинг елкасидан ушлаб олди-да, икковлари ҳам тагларида  
қолган дастурхонга ағдарилиб тушиб, тарелка, косаларни син-  
дириб, овқатларни сочиб, винони тўкиб юборишди. Нафасини  
ростлаб олган дон Кихот яна эчкибоқарга ташланди, қоп-қора  
қонга бўялган чўпон эса овқатланишда фойдаланиладиган би-  
рорта пичоқни олиш ниятида гиламда судраларди. Лекин бахтга  
қарши яқин орада бирорта ҳам пичоқ йўқ эди. Шунда сартарош  
дон Кихотни тагига босиб олиб эзишда чўпонга яширинча ёрдам  
берди, бечора дон Кихот калтакнинг типирлаётганини, чўпоннинг ала-  
мига чидаёлмай жикиллаётганини кўриб роса кулишарди; ўқчи-  
лар завқланиб сакрашар ва худди бир-бирини ғажиётган икки  
итни олқишлаётгандек гиж-гижлатишарди, бир Санчо Пансагина  
нима қилишини билмас, ўз хўжайинига ёрдамга ташланай деб  
шунча уринса ҳам каноникнинг хизматкори қўлидан қутулиб  
чиқиб кетолмасди.

Худди шу дақиқада сурнайнинг жуда мунгли овози эшитилиб  
ҳамма бирдан сесканиб кетди, дон Кихот ўз рақибига шундай  
деб бақирди:

— Менга қара, эй иблис, зотан мени энгишга кучинг ва жа-  
соратинг етган экан, иблиссан-да, сендан илтимос, ҳеч бўлмаса  
бир соатга ярашиб турайлик. Қулоғимга сурнайнинг мунгли  
овози чалинди, назаримда у мени янги саргузаштларга чорлаёт-  
ганга ўхшайди.

Мушт уриб, мушт ейиш жонига теккан чўпон обрўси борида  
муштлашишни тўхтатишга муяссар бўлишдан шодланиб, шу  
заҳотиёқ дон Кихотни қўйиб юборди. Рицарь ирғиб ўрнидан  
турди, сурнай овози эшитилаётган томонга бошини ўгирган эди,  
худди хаёлий шарпалардек оқ либосга ўралган кўпгина одамнинг  
тепаликдан тушиб келаётганликларини кўрди.

Ҳамма гап бу йил ёмғир ёғиб ерни тўйдирмаётганида эди,  
шунинг учун худо раҳм-шафқат қўлини чўзиб ерга ёмғир ёғди-  
риб, қурғоқчиликни тўхтатармикин деган умидда деҳқонлар бу-  
тун музофот бўйлаб диний маросимлар, ибодатлар, ўз-ўзини уриб  
тавба қилиш каби юришларни ўтказаяётган эдилар. Қўшни қиш-  
лоқ аҳолиси ҳам водий ёнбағрида қўнқайиб турган муқаддас  
бутхонага ана шундай юриш қилгандилар. Лекин дон Кихот



ўз-ўзини ураётганларнинг ғалати кийинганини кўрган заҳотиёқ, тақдир ўзига яна бир хавфли саргузаштни йўлаганини кўз олдига келтирди. Саф олдида бир неча киши қора чойшабга ўралган авлиё ҳайкалини кўтариб олган эди. Шу манзаранинг ўзиёқ дон Кихотнинг виждонсиз ва қабиҳ қароқчилар бирор машҳур сеньорани ўғирлаб кетаётибди деб ўйлашига етарли бўлди. Бошига шу фикр келиши биланоқ у Росинант томон югурди, эгар қошидан юганини олиб, уни бир зумда юганлади-да, Санчодан қилиб беришни талаб қилди, кейин лип этиб отига минди-ю, қалқонни қўлига олиб, ҳамроҳларига бақариб шундай деди.

— Нима учун оламда жаҳонгашта рицарлар бўлишни ана энди кўрасиз. Мен ҳозир анави қароқчилар ўғирлаган олижаноб сеньорани озод қилганимда, шавкатли орденимиз ҳурматга сазоворми, йўқми, билиб оласизлар!

Шу сўзларни айтиб у Росинантни оёқлари билан ниқтаган эди, Росинант ўзларини уриб тавба қилаётганларга қараб шаталоқ отиб кетди. Рухоний, каноник ва сартарош дон Кихотни ушлаб қолишмоқчи эди, лекин бунинг иложи бўлмади, уни Санчонинг дод-вой солиб қичқиришлари ҳам тўхтата олмади:

— Қаёққа кетяпсиз, сеньор дон Кихот? Қайси шайтоннинг васвасасига учиб муқаддам черковимизга қарши боряпсиз ахир! Будай тузукроқ қаранг — ахир бу диний маросим-ку! Нима қилаётганингизни бир ўйлаб кўринг, сеньор! Бошқаларнинг ишига тумшуғингизни тиқяпсиз деб, бу гал дангал айтса бўлади.

Бироқ Санчо бекорга зўр бериб бақираётган эди. Унинг хўжайини оқ либос кийганларга ҳужум қилиб, мотам чойшабига ўралган хонимни халос этишга шундай шошилардики, унинг бир оғиз сўзини ҳам эшитмади. Эшитганда ҳам барибир қайтмас, гарчанд қиролнинг ўзи шундай буйруқ берганда ҳам қулоқ солмасди.

Маросим устига от чоптириб бориб, роса ҳолдан тойган Росинантини тўхтатди-да, хириллаган овоз билан ҳовлиқиб хитоб қилди у:

— Ҳой! Кимсизлар ўзларингиз? Ҳалол одамлар юзларини беркитишмайди. Тўхтанглар! Гапимга қулоқ солинглар!

Биринчи бўлиб ҳайкални кўтариб бораётганлар тўхташди; диний оятларни куйлаб бораётган тўрт кишидан бири эса дон Кихотни ғалати ва кулгили қиёфада кўриб, унга шундай жавоб берди:

— Сеньор, бирор нарса демоқчи бўлсангиз, тезроқ гапиринг. Биродарларимиз қамчи билан аъзойи баданларини азоблаяптилар, тўхтаб гапингизни эшитишга фурсатимиз йўқ.

— Бўлди, ортиқча сўзнинг кераги йўқ, — деб жавоб берди дон Кихот, — дарҳол мана бу хонимни қўйиб юборинглар, кўз ёшлари ва ғамгин чехрасидан уни қаттиқ ҳақоратлаб, зўравонлик билан олиб кетаётганликларинг кўриниб турибди. Қаршингиздаги рицарь ана шунақанги озорлар учун қасос олгани дунёга келган, сизлар хонимнинг тилагиғич бажо кетириб уни ҳақли равишда

озод этмас экансизлар, рицарь сизларни бир қадам ҳам олға силжиттирмайди.

Дон Кихотнинг бу сўзларини эшитишиб ҳаммалари уни жинни деб ўйлашди-да, завқланишганидан хахолаб юборишди? Бироқ бу кулги дон Кихотнинг газабдан ёниб кетишига сабаб бўлган учқун эди. У индамай қиличини ўйнатганча тахтиравонга ташланди. Ҳайкални кўтаришиб бораётган деҳқонлардан бири тахтиравондан узун ёғочни олиб дон Кихотга юзланди. Рицарининг қиличи ана шу таёққа тегиб уни иккига бўлиб юборди, лекин деҳқон қўлида қолган бўлаги билан дон Кихотнинг елкасига шундай туширдик, рицарь ҳушдан кетиб отдан қулади. Шу дақиқада Санчо, хўжайинимга ҳеч ким тегмасин, хўжайиним умрида ҳеч кимга ёмонлик қилмаган, атиги бир сеҳрланган рицарь деб қичқира бошлади. Бу орада деҳқон дон Кихотни ўлдириб қўйдим деб ўйлаб, қўрқиб кетганидан кийикдан ҳам тез югуриб дала томонга тирақайлаб қоча бошлади.

Воқеа содир бўлган жойга дон Кихотнинг бошқа ҳамроҳлари етиб келишди. Маросим қатнашчилари мушкет кўтариб олган ўқчиларни кўриб аҳволимиз чатоқ, деб ўйлашди-да, мадонна ҳайкали атрофини зич ўраб ҳужумчиларга зарба бергани ҳозирланишди. Аммо иш кутилгандан яхши томонга бурилди. Маросимда қатнашаётган бошқа руҳоний бизнинг руҳонийни таниб қолди. Шунинг учун ҳам ҳар иккала душман томон бир-бирига туғдирган хавф тарқади қўйди. Маросимни кузатиб бораётган руҳонийга дон Кихотнинг кимлигини тушунтириб беришди, руҳоний қимирламай ҳамон ерда ётган бечора идальгонинг бошига келди. Санчо ўз хўжайинининг қимир этмай ётган гавдаси тепасида айтиб йиғлай бошлади.

— О, рицарларнинг гули, тақдиринг йўғон таёқнинг бир зарбасидан ўлиш экан-да! О, ўз наслининг чиройи, о, бутун Ламанч, бутун дунёнинг шухрати, ғурури! Сенсиз энди бутун олам ярамас одамлар билан тўлиб кетади, улар энди жазодан қўрқмай жиноят қилаверадилар. О, ҳамма Искандарлардан юз чандон сахий одам, чунки атиги саккиз ойлик хизмати эвазига яроқбардорингга атрофини денгиз ўраб олган оролларнинг оролини совға қилдинг-а. О, сен такаббурлар олдида камтар, камтарлар олдида мағрур, хавфдан қўрқмас, мусибатли кунларда бардошли, аллакимнинг хуштори, яхшиларга тақлидчи, ёвузларнинг офати, ҳар қандай пасткашликнинг душмани — хуллас чинакам жаҳонгашта рицарь!

Санчонинг нола қилиб ҳўнграб йиғлашидан дон Кихот ўзига келди-да, қадини сал кўтариб шундай деди:

— Эй, ширин-шакар Дульсинея, ким сиздан йироқда яшаса, у бундан ҳам ёмонроқ фалокатларга йўлиқади. Сеҳрланган аравага чиқишимга ёрдам бер, дўстим Санчо. Елкам дабдала бўлиб кетганидан Росинантга минолмайман?

— Бажонидил, сеньорим, — деб жавоб берди Санчо. — Биласизми, юринг, сизга яхшилик қилаётган мана бу сеньорлар билан бирга қишлоғимизга кетайлик. Борганимиздан кейин ўша

ерда янги саргузаштни ўйлаб топамиз, бу шундай сафар бўлсинки, ундан ҳам фойда топайлик, ҳам шуҳрат.

— Сен бамаъни гапни айтдинг,— деди дон Кихот.— Ақллилик устимиздаги юлдузлар туркумининг ёмон таъсири тугагунча кутишни тақозо этади?

Каноник, руҳоний билан сеньор Николас дон Кихотнинг қароридан хурсанд бўлиб кетишиб, рицарни аравага ўтқазишда Санчо Пансага кўмаклашишди. Дон Кихот шу қадар холдан кетиб қолган эдики, энди унга қафаснинг кераги ҳам йўқ эди? Шунинг учун қафасни йўлга ташлашиб, араванинг тагига бир қучоқ беда солишди, сўнгра вазмин аравакаш ҳўкизларига қамчи босди-да, карвон аста-секин йўлга тушди. Йўлда биринчи бўлиб чўпон қолди? У йўловчилар билан дўстона хайрлашди-да, ўз эчкисини етаклаб подага қайтди. Чўпондан кейин ўқчилар ҳам руҳонийдан ўзларига тегишли мукофотни олиб, шу атрофдаги энг яқин қовоқхонага жўнашди.

Ниҳоят каноник ҳам дон Кихот воқеаси нима билан тугашини кейин ўзига хабар қилишини руҳонийдан сўраб, унга ва ҳамроҳларига оқ йўл тилади-да, уйига жўнади. Шундай қилиб, ҳамма хар томонга тарқалиб кетди, энди руҳоний, сартарош, дон Кихот билан Санчо Пансанинг ўзлари йўлда давом этишди? Улар олти кун деганда дон Кихотнинг қишлоғига куппа-кундуз куни кириб боришди? Бахтга қарши якшанба куни бўлгани учун дон Кихот тушган арава ўтадиган майдон одамлар билан лиқ тўла эди? Ҳамма ким келаётганини кўриш ниятида арава томон югурди ва ўз ҳамқишлоғини таниб ҳайратда қолдилар. Қандайдир бир бола хўжайинлари ориқлаб, сарғайиб кетган ҳолда қайтиб кеганини, хўкйз қўшилган аравадаги бир қучоқ беда устида ётганини айтгани унинг экономаки билан жиянининг олдига югуриб кетди. Бу оққўнғил аёлларнинг уввос тортиб, лаънати рицарлик романларини қарғаб, кўкракларига муштлаб йиғлай бошлаганини кўрган кишиларнинг уларга раҳми келарди.

Дон Кихотнинг қайтганини эшитиб Санчо Пансанинг хотини ҳам югуриб келди? У эридан энг аввало эшакнинг соғ-саломатлигини сўради. Эшаги ўзини хўжайинидан ҳам яхши сезаётганини айтди Санчо.

— Вой худойим-эй, ўзингга шукур,— деб хитоб қилди Санчонинг хотини,— кўрсатган марҳаматингга шукур! Қани, дўстим, энди менга айтинг-чи, хизматингиздан бирор фойда бўлдимми? Менга қандай совғалар олиб келдингиз? Дўндикларингизга бошмоқ олиб келдингизми?

— Совға ҳам, бошмоқ ҳам олиб келганим йўқ,— деди Санчо,— лекин бундан ҳам муҳимроқ ва жиддийроқ нарса бор.

— Мени жуда хурсанд қилиб юбординг,— деди хотини,— қани ўша нарсангни кўрсат-чи, тезроқ бўл, жонгинам. Кўнглим тезроқ жойига тушсин, сен кетгандан буён куявериб ўлиб бўлаёздим!

— Уйда кўрсатаман, хотинжон, лекин ҳозир айтадиган гапим шуки, агар худо насиб қилиб яна саргузашт излаб йўлга тушсак,

тез орада менинг граф ёки бирор орол губернатори бўлишимни кўрасан, орол бўлганда ҳам унча-мунчаси эмас, дунёдаги энг ажойиби бўлади.

— Илоҳо омин, эржон, орол дейсанми, кошкиди, жуда қўл келади! Лекин оролинг нимаси, ҳеч нарсани тушунмаяпман, менга тушунтириб бер.

— Эшакка асал беришмайди, — деб жавоб берди Санчо, — вақти келганда буни ўзинг тушуниб оласан, хотинжон. Тобёларнинг сенга жаноб олиялари деб мурожаат қилишганда оғзинг очилиб қолишини тасаввур қилиб турибман.

— Нималар деяпсан ўзи, Санчо? Қанақа жаноб олиялари, анави орол, тобёлар деганинг нимаси? — деб сўради эридан Тереса Панса.

— Тереса, сен ҳамма нарсани бирдан билиб олишга шошилма. Мен айтган ҳақиқатни эшитишининг ўзи ҳам етарли. Дарвоқе, шуни айтишим мумкинки, саргузашт изловчи жаҳонгашта рицарнинг барчанинг ҳурматига сазовор яроқбардори бўлишдан кўнгиллироқ иш йўқ. Тўғри, бу саргузаштларнинг кўпчилиги кўнгилдагидек бўлиб чиқавермайди, бунга икром бўлиш керак. Мен буни ўз тажрибамдан биламан, чунки, мени чойшабда иргитдилар ҳам, роса калтакладилар ҳам. Аммо лекин, ҳар қалай бахт орқасидан тоғларга тирмашиш, ўрмонларда адашиш, қояларга чиқиш, қалъаларга кириш, қўноқхоналарда сурлик билан қора чақа ҳам тўламай тунаш, қуриб кетсин ҳаммаси, жуда антиқа ишлар-да!

Санчо Панса ва унинг хотини Тереса Панса шу зайлда суҳбатлашдилар. Бу орада идальгонинг жияни ва экономка у бечорани эпчиллик билан ечинтиришиб, эски каравотга ётқизишди. Идальгонинг кўзлари аланг-жаланг бўлиб уларга тикилар, қаердалигини билолмас эди. Руҳоний идальгонинг жиянига тоғасига яхшилаб қарашни тайинлаб, уйдан яна қочиб кетмаслиги учун барча тадбирларни кўриш зарурлигини илтимос қилди. Уни уйга қайтариб келгунча қандай қийинчиликларни бошдан кечирганларини гапириб берди. Буни эшитган ҳар икки аёлнинг фигони фалакка чиқди, бундай бемаъни рицарлик китобларини ва уларни ёзган кишиларни жаҳаннам қаърига тортсин деб худога илтижо қила бошладилар. Улар салгина тинчланганларидан сўнг бечора идальгога меҳр-шафқат кўрсата бошладилар. Елкаси шикастланган, ҳамма ёғи ғурра бўлган, озиб-тўзиб, сарғайиб кетган идальго бўлса каравотда қимирламай жимгина ётарди<sup>54</sup>.

### XXXI БОБ

#### ДОН КИХОТ БЕТОБЛИГИДА РУҲОНИЙ, САРТАРОШ ВА УНИНГ ОРАСИДА БЎЛИБ УТГАН ҲАНГОМАЛАР

Руҳоний билан сартарош, яқингинада бошдан кечирган воқеаларни тағин эсига солиб қўймайлик, деган андишага бориб, бетоб рицаримизни қарийб бир ойгача келиб кўришмади. Лекин улар дон Кихотнинг жияни ва экономкага тез-тез йўлиқиб, беморга

тузукроқ ғамхўрлик қилишни уқтирар, айниқса унга тўйимли, юраги ва миясига озуқа берадиган фойдали овқатлардан тайёрлаб беришларини тайинлардилар. Аёллар кечаю кундуз ўз хўжайинларини бетиним парвариш қилаётганликларини, у кишининг ҳам оз-оздан тузалиб бораётганини ва баъзи-баъзида ўзини эс-ҳуши жойида бўлган одамдек тутаётганини айтиб беришди. Буни эшитиб, дон Кихотнинг мухлислари ер-кўкка сиғмай суюнишди. Хайрият, уларнинг дон Кихотни деб чеккан машаққатлари зое кетмабди. Ахир уни Сиерра Морена тоғларидан излаб топишди, қовоқхона хўжайинию сипоҳлар билан ораларидаги можарони бар-тараф қилишди, ниҳоят, дон Кихотни аравада уйига олиб келишди. Лекин, шундай бўлса-да, улар дон Кихотнинг чиндан ҳам соғайиб қолганини ўз кўзлари билан кўришни жуда-жуда иста-шарди. Шу сабабдан улар дон Кихотни албатта кўришга қарор қилдилар, аммо бечора идальго билан суҳбатлашганда жаҳонгашта рицарлар ҳақидаги ҳар қандай ишоралардан йироқда туришликни, бинобарни, унинг ҳали битмаган ярасига яна туз сепмасликни келишиб олдилар.

Шу шартлар билан улар дон Кихот ҳузурига киришди. Идальгонинг эғнида пахтали яшил камзул, бошида қизил қалпоқ, болишга виқор билан суюниб ўтирди. Шунчалик ориқ, шунчалик сарғайиб кетган эдики, бир қарашда қуриб, қовжираб қолган му-миёга ўхшаб кетарди. Дон Кихот дўстларини илтифот билан қарши олди, соғлиги ҳақидаги саволларга ҳам самимий, оқилона, ҳатто юракка тегадиган сўзлар билан жавоб берди. Оддийгина, бамайлихотирлик билан бошланган суҳбат, ниҳоят, давлат иш-лари ва ҳукумат фармойишларига бориб тақалди. Бу фар-мойишлардан баъзиларини суҳбатдошлар танқид қилишди, баъзиларини эса, аксинча улуғладилар. Суҳбатдошларнинг ҳар бири ўзини янги қонуншунос, шу куннинг Ликурги<sup>55</sup> ёки Со-лони<sup>56</sup> деб биларди. Азбаройи тўлқинланиб кетганликларидан, оғиз кўпиртириб давлатни чунонам ағдар-тўнтар қилиб юбори-шардики, гўё давлат улкан бир темирчи қўрасига тушиб, эриб, қайта қуйилиб, бутунлай янги шаклга кирганга ўхшарди. Ўртага ташланган ҳамма масалалар юзасидан дон Кихот оқилона фикрлар айтарди, руҳоний билан сартарош буни кўриб, эс-ҳуши жойига келиб қолганига тамомила ишонч ҳосил қилди.

Бу суҳбатда дон Кихотнинг жияни билан экономика ҳам ишти-рок этишиб, хўжайинларининг шундай бамаъни фикр юритаёт-гани учун худога минг қатла шукрона келтириб ўтиришди. Ру-ҳоний дон Кихотнинг батамом соғайиб кетганлигига қатъий ишониш ниятида, аввалги, жаҳонгашта рицарлик хусусида гап очмаслик ҳақидаги қароридан воз кечди. У суҳбатни аста-секин пойтахтдаги энг сўнгги янгиликларга буриб, гап орасида, аниқ маълумотларга қараганда, турк султони кучли флот билан йўлга чиққанмиш, деб қистириб ўтди. Султоннинг мақсади нимаю бу даҳшатли уруш қаерга бошланади, буни ҳали-ҳозирча ҳеч ким билолмаяпти. Аммо-лекин бутун христиан олами тагин ташвиш-да. Ҳазрати олийлари ҳозирча, Неаполь, Сицилия қирғоқларини,

Мальта ороллари ни мустаҳкамлашни буюрди, деди. Бунга дон Кихот:

— Ҳазрати олийлари ўз салтанатларини олдиндан мустаҳкамлаб, жуда ақлли иш тутибдилар. Демак, душман давлатимизни ғафлатда қолдира олмайди. Башарти қирол мендан маслаҳат сўрашни лозим топганида эди, мен ҳазратларига ўта серҳикмат мушоҳидаларимни тавсия этган бўлур эдим, — деди.

Руҳоний бу сўзларни эшитгани ҳамоно, ўзича: «О, парвардигор сени ўз паноҳида асрасин, бечора дон Кихот! Афтидан, сен яна тубсиз телбалик чоҳига юз тутяпсан», деб қўйди.

Сартарош эса, руҳонийнинг фикрини дарҳол пайқаб, дон Кихотдан қиролга қандай чоралар кўришни маслаҳат этажagini сўради ва:

— Сизнинг бу таклифларингиз ҳам ҳукмдорларга бериладиган сон-санокиз, лекин бемаъни маслаҳатлардан бўлмасин тагин деб қўрқаман, — қўшиб қўйди у.

— Мен берадиган маслаҳатлар, — жавоб берди дон Кихот, — сира бемаъни эмас, аксинча, жуда бамаъни, сартарош афандим.

— Мен бирор ёмон фикр айтмоқчимасдим, — шоша-пиша эътироз билдирди сартарош, — фақат демоқчиманки, сон-саноксиз маслаҳатгўйлар томонидан ҳазрати олийларининг муҳокамасига тақдим этиладиган режаларнинг аксариятини ё юзага чиқариб бўлмайди, ёки улар қуруқ сафсата, ёинки қирол ва қиролликка катта зарар етказади.

— Мен тузган режа бемаъни, қуруқ сафсата ҳам эмас, амалга ошмайдиганлар хилига ҳам кирмайди, аксинча, жуда пишиқ ўйланган, амалга ошириш ҳам оппа-осон, — деди яна дон Кихот қатъий.

— Маслаҳатларингизни билишга жуда муштоқмиз, марҳаматли сеньор дон Кихот, — деди руҳоний.

— Ўз режаларимни бу ерда ва ҳозир ошкор қилишни истамасдим, чунки бу сир эртагаёқ қирол маслаҳатчиларининг қулоғига бориб етади-ю, ташаккурни ҳам, мукофотни ҳам менинг ўрнимга бошқа биров илиб кетади.

— Шахсан мен, — деди буни эшитиб сартарош, — худони ўртага қўйиб, олдингизда қасам ичаманки, сўзларингизни ер юзидаги биронта одам боласига етказмайман.

— Мен бунга ишонаман, сартарош афандим, — хитоб қилди дон Кихот, — сиз ваъдангизда қаттиқ турасиз.

— Гарчанд у унчалик ҳалол одам бўлмаганида ҳам тилини тишлаб, соқовдай жим юришига мен кафилман, — гапга аралашди руҳоний, — акс ҳолда мен уни судга бериб, суд чиқимларини тўлашга мажбур қиламан!

— Илтифотли афандимиз, сиз руҳоний жаноблари учун ким кафолат беради? — сўради дон Кихот.

— Менинг ному мартабам сўзларингизни махфий тутишни тақозо этади, — деди руҳоний.

— Унда жуда соз! — хитоб қилди дон Кихот. — Эшитинг, мен ўз режаларимни сизларга баён этай. Ҳазрати олийларига

менинг маслаҳатим шуки, у ўз жарчилари орқали эълон қилдириб ва маълум бир кунни белгилаб, Испанияда дайдиб юрган барча жаҳонгашта рицарларни пойтахтга тўпласин. Улар беш-ўн киши бўлса ҳам майли. Бунинг аҳамияти йўқ. Негаки, улар орасида шундай бир қаҳрамон топилиб қолиши мумкинки, бутун турк лашкарларини яксон қилиб ташлаш бир ўзининг қўлидан келар. Гапимга диққат билан қулоқ солиб, фикрларимни кузатиб беринглар, сеньорлар. Наҳотки сизлар битта жаҳонгашта рицарь икки юз минг кишини худди писта пўчоғидай қириб ташлай олиши ҳақида ҳеч қачон эшитмаган бўлсангизлар? Қани, менга айтингизлар-чи, рицарлар тўғрисидаги ҳар бир романда ана шундай мўъжизалар ёзилган эмасми? Агарда ҳозир машҳур дон Бельянис ёки шунга ўхшаш Амадис Галльскийнинг беҳисоб авлод-аждодларидан бирортаси тирик бўлиб турклар билан куч синашганида, онт ичаманки, ўзимни султон ўрнида кўришни унчалик орзу қилмасдим. Аммо, барибир, парвардигор ўз халқидан раҳм-шафқатини дариғ тутмайди ва эл ҳимоясига қадимий жаҳонгашта рицарларчалик қудратлиси бўлмаса-да, ҳар қолда довюракликда улардан қолишмайдиганини йўллайди. Тангрининг ўзи мени англайди — ортиқ гапим йўқ.

— Оҳ, пуштипаноҳим яна жаҳонгашталик савдосига мубтало бўлибди. Елғон бўлса тил тортмай ўлай, — деб қичқириб юборди жияни.

Бунга жавобан дон Кихот шундай деди:

— Мен жаҳонгашта рицарь бўлиб туғилганман, шундай бўлиб дунёдан ўтаман.

Гапга саргарош аралашди:

— Муҳтарам сеньорлар, сизлардан ўтиниб сўрайман, менга сўз беринглар. Севильяда бўлиб ўтган арзимас бир воқеани айтиб берай. Ҳозир жуда-жуда ўрнига тушарди-да.

Дон Кихот ижозат берди. Руҳоний ва бошқалар жим бўлишиб, диққат билан қулоқ солдилар, саргарош ҳикоясини бошлади:

— Севилья қишлоғидаги жиннихонада битта тентак ётган экан. Ақлдан озганлиги учун қариндош-уруғлари уни шу ерга келтириб ташлашибди. Бир неча йил азоб тортиб ётгач, ҳалиги жинни ўзининг соппа-соғ экани ва ақл-ҳуши жойига келганлигига ишониб, архиепископга мурожаат қилиб хат ёзибди ва ўз хатида марҳаматли тангри эс-ҳушини қайтарганини, энди уни бу зиндондан озод этишини илтижо қилиб ялиниб-ёлворибди. Яна хатида у, мени бу ерга қариндошларим қасддан, мени мол-мулкка шерик қилмаслик илинжида келтириб ташлашган, деб қўшимча қилибди. Бу жиннининг туппа-тузук, бир соғ-саломат одамчалик фикрлаб ёзган мактубларини олавериб, унинг соғайиб кетганига қаноат ҳосил қилган архиепископ жиннихона бошқарувчисининг хузурига ўз вакили — капелланни жўнатибди. Капеллан, бошқарувчидан бутун воқеани суриштириб билиши, ҳалиги жинни билан учрашмоғи, агар у жинни бўлмай, чиндан ҳам эс-ҳуши жойида бўлса, уни ўзи билан бирга олиб қайтиши лозим экан. Қисқаси, капеллан жиннихонага кепти. Бошқарувчини чақиртириб, нияти-

ни айтибди. Госпиталь бошлиғи: «Йўқ, ҳали эс-ҳуши ўрнига келган эмас. Ростдан ҳам у киши баъзан ўзини саломат одамдай тутади, анча-мунча бамаъни гаплар ҳам айтади. Лекин кўпинча гапларининг ниҳояси ҳуда-беҳуда, бемаъни вайсаш билан тугайди. Дарвоқе, бунга қаноат ҳосил қилиш учун ўзи билан гаплашиб кўрсангиз ҳам бўлади», дебди. Капеллан амалда синаб кўрмоқчи бўлиб, жинни билан хонани ичкаридан қулфлаб олиб, бир соатдан ортиқроқ суҳбатлашибди. Шу вақт давомида жинни бирор оғиз ножўя гап айтмабди, аксинча, жуда бамаъни, оқилона сўзлашибди. Буни кўриб, капеллан уни тамоман ақли жойида экан, деб тан олишга мажбур бўлибди. Гап орасида телба ўзининг бу касалхонада туришидан манфаатдор бўлган қариндошлари томонидан бошқарувчининг сотиб олинганини ҳам айтибди. Қисқаси у бошқарувчини порахўр, қариндошларини эса зикна, тошбағир одамлар, ўзини эса уларнинг ғаразли ҳийла найрангларининг бегуноҳ қурбони қилиб кўрсатибди. Капеллан беморнинг сўзларига ишонибди ва унинг тамоман соғайиб кетганини ўз кўзи билан кўрсин деб телбани ўзи билан бирга архиепископ ҳузурига олиб кетишга аҳд қилибди. Шунинг учун ҳам у бошқарувчидан беморга эски кийим-бошини беришини сўрабди. Бошқарувчи вакилнинг олдидан яна бир бор ўтиб, ундан ўз қарори ҳақида яхшилаб ўйлаб кўришни илтимос қилибди. Лекин капеллан бошқарувчининг маслаҳат ва огоҳлантиришларига қулоқ солмай, бечорани олиб кетаман деб туриб олибди. Энди бошқарувчининг ҳам жавоб беришдан бошқа чораси қолмаган эди, чунки архиепископнинг амри — госпиталь бошқарувчиси учун фармон-да. Телбага ўз кийимларини кийдиришибди. Шунда у озод бўлаётганига кўзи етиб, капелландан марҳамат қилиб, жинни ўртоқлари билан хайрлашувига рухсат беришини сўрабди. Вакил розилик берибди-ю, бироқ ўзи ҳам бу ерда қандай кишилар истиқомат қилаётганини бирров кўриб қўйиш ниятида, телбага эргашибди. Бу ерда ҳозир бўлганлардан баъзилари ҳам улар билан биргалашиб боришибди. Озод бўлаётган жинни ашаддий телба, лекин ҳозир жазаваси босилиб, хотиржам даври бошланган жинни ўтирган панжарали хонага яқинлашиб:

— Оға мен уйимга қайтяпман, менга биронта топшириқ-мопширигингиз йўқми? Гарчанд мен бунга лойиқ бўлмасам ҳам парвардигори оламнинг чексиз инояти ва муруввати туфайли ақлим жойига келди. Бир муддат ҳам умидингизни узмай яратганга илтижо қилаверинг. Вақти-соати келиб, агарда бутун ихлосингиз худога қаратилган бўлса, сиз ҳам мен каби дардингизга шифо топгайсиз, — дебди.

Жабрдидананг бу нутқини ҳалиги ашаддий жиннининг рўпарасидаги хонада ўтирган телба эшитиб қолибди. У ётган еридан ирғиб туриб, бақирибди:

— Соғайиб, ақли жойига тушиб уйига кетаётган ким ўзи?

— Бу мен, оға, қайтаётган. Энди бу ерда ўтиришимнинг хожати қолмади. Худонинг марҳаматига шукрона келтириб жўнаяпмиз! — деб жавоб берибди бояги жиннимиз.



— Мундоқ яхшилаб ўйлаб боқинг, нималар деётганингиз ҳақида. Тагин шайтон йўлдан урган бўлмасин,— жавоб берибди телба,— ҳовлиқишнинг кераги йўқ. Жойингизда жимгина ўтира-веринг. Кетган билан, барибир қайтиб келасиз!

— Имоним комилки, соппа-соғман,— эътироз билдирибди жўновчи,— бу ерга эса энди қадам босмайман. Шунча азоб-уқубат торганим етар.

— Сиз соппа-соғмисиз? Сиз-а? — дебди телба.— Ҳай, майли, кўрармиз ҳали, худо ёр бўлсин. Лекин, ўзим ердаги ноиби бўлган Юпитер ҳақи қасам ичаманки, сизни госпиталдан бўшатиб юбориб қилган биргина гуноҳи учун Севильяни шундай жазолайки, бу дунё-ю, у дунё сира ёддан чиқмайдиган бўлсин, илоҳо омин. Сен, ғариб кимса биласанки, бу — менинг қўлимдан келади, чунки мен — Чақмоқчақар Юпитердирманки<sup>57</sup>, жаҳонни қийратиб, унга ҳалокат ва даҳшат келтирадиган ўтли яшинларнинг бари менинг ихтиёримда! Мен бу нодон Севилья кишлоғининг шундай адабини берайки... Шу кун, шу соатдан бошлаб уч йилгача на шаҳару на қишлоққа, на бутун вилоятга бир томчи ёмғир юборайин! Хўш! Сен озодсан, сен соппа-соғсан, сенинг ақл-ҳушинг жойида-ю, мен бўлсам жинниман, касалман, тутқинман! Ҳа, ерга бир томчи ёмғир юборгунча осилиб ўламан, осили-иб!!

Атрофдагилар телбанинг қичқириқ ва сўзларини эътибор билан тинглаб туришибди. Фақат озод бўлаётган телбагина капелланнинг тирсагидан тортиб дебди:

— Аччиғингиз келмасин, марҳаматли сеньор, бу жиннини қўяверинг, сўзларига эътибор қилманг, ме, сув худоси ва отаси Нептун бўламан, модомики Юпитер далаларингизни сугормас экан, унда ўзим истаган вақтда, истаганимча ёмғир ёғдириб беравераман.

Капеллан бунга жавобан шундай дебди:

— Ҳар қандай бўлгандаям, сеньор Нептун, сеньор Юпитерни ранжитиш керак эмас. Марҳамат қилиб, ҳозирча шу ерда яшай туринг қачонки, бўш вақтимиз ва қулай фурсат келиб қолса, яна жанобларини сўроқлаб келармиз.

Бу манзарани кузатиб турган бошқарувчи ва бошқалар хаҳолаб кулиб юборишибди, бундан капелланнинг ғазаби қўзиб кетишига сал қолибди. Сўнгра бечора телбага қайтадан касалхона кийимини кийдиришибди, у яна госпиталда қолибди. Бу воқеа шу билан тугабди.

— Шу топда жуда-жуда ўрнига тушади, деб айтган воқеангиз шуми, жаноб сартарош? — деб сўради дон Кихот.— Эҳ, жаноб сартарош, жаноб сартарош, дарҳақиқат, ғалвирдан қараб туриб ҳам ҳеч нарсани кўролмаган кишини ҳақиқий сўқир дейиш керак! Мен, жаноб сартарош, Нептун ҳам, сув худоси ҳам эмасман. Ўзимни донишманд ҳам деёлмайман. Мен фақат инсонларга улар ер юзида жаҳонгашта рицарликнинг бахтиёр замонлари барқарор этилишини тиламасдан нақадар енгилтаклик қилаётганларини тушунтириб қўймоқчиман, холос. Эҳтимолки, бизнинг мажруҳ асримиз илгариги дориломонлик гаштидан маҳрум ва унга ноло-

йикдир. Бундай гашт ўтмишда, жаҳонгашта рицарлар давлатни мудофаа қилганларида, хотин-қизларни ҳимоя этганларида, етим-есир, ғарибу ғураболарга кўмаклашганларида, мағрурларни жазолаб, мўминларни сийлаганларида ҳақ ва барқарор эди. Ҳозирги рицарлар муқаддас совутларни ипағу барқутга алмаштирганлар. Улар ҳозир тақир, зах ерда тунамайдилар, очиқ ҳавода қолиб жазирама иссиғу аччиқ изғирин азобини тортмайдилар. Ҳозиргиларнинг биронтаси туни билан мижжа қоқмай найзага суяниб, оёғини узангидан олмай, соқчилик қилиб кўрсин-чи! Қилолмайди! Эҳ-ҳа, эски вақтларда қанақайди! Айтайлик, рицарь ўрмон чеккасига чиқиб қолди. У тоғдан ошиб ўтиб, кимсасиз денгиз бўйига тушарди. У ерда эшқаксиз, елкансиз, ҳеч қандай анжомлари ва мачтаси бўлмаган бирор қайиқ кўринса бас, таппа сакраб чиқарди-ю, боши оққан томонга қараб сузиб кетаверарди. Даҳшатли тўлқинлар қайиқни чархпалак қилиб кўкка итқитади, яна ҳалокат гирдобиди йўқ қилиб юбормоқчидек пастга ташлайди, лекин рицарь дадил туриб, асов тўлқинлар ва қутурган бўрон билан олишади, ниҳоят, қарабсизки, ватанидан минг-минглаб миля йироқларга бориб қолади. Бу бир умр кўрмаган олис ўлкаларда минг бир хил қийинчиликка гирифтор бўлади, зўр-зўр ёвлар билан олишади, кўрмаган азоб-уқубатларни кўради, аммо барибир, охирида ғалаба қилади ва келгуси авлодлар тилида дoston бўладиган жасоратлар кўрсатади. Бундай рицарларнинг бутун ҳаёти хавф-хатар, машаққату жангу жадалларда ўтган. Биз-чи? Биз нима кўряпмиз ҳозир? Шижоат устидан танбаллик, меҳнат устидан таралабедодлик, олижаноблик устидан нуқс, жасурлик устидан сурбетлик тантана қилган замон ҳозир! Жаҳонгашта рицарлик асрида гуллаб, камолга етган ҳарбий шоншавкат ўрнини эса маккорона ихтиролар эгаллади! Мабодо сўзларимга қўшилмайдиган бўлсангиз, қани менга айтинг-чи, машҳур Амадис Галльскийдан ким ботирроқ? Пальмерин Английскийдан ким оқилроқ? Ким Тирант Оқбадандан илтифотлироқ ва эвлироқ? Лисуарт Греческийдан ким хушмуомалалироқ? Дон Бельянисдан кўпроқ зарба еган ва зарба берган бирон кимса борми? Перион Галльскийдан довуракроқ киши борми оламда? Фелисмарте Гирканскийчалик хавф-хатардан кўп қутулиб кетган одам ким? Эспландиан каби самимий, дилкаш рицарни биласизми? Дон Сиронхилио Фракийскийдан шижоатлироқ ким бор? Жасоратда Родамонте билан кимни ёнма-ён қўясиз? Доноликда қирол Собрианога ким тенг кела олади? Рейнальдодан дадилроқ рицарь борми? Роланддек енгилмас кишини эшитганмисиз? Бу қаҳрамонларнинг ҳаммаси,— яна аллақанчасини мисол келтиришим мумкин,— жаноб руҳоний, жаҳонгашта рицарлар эди. Мен мана шунақа, ёки шуларга ўхшаган рицарларни тақлиф этишни қиролдоқат билан хизмат қилар, турк султони эса, алаmidан сочини юлган бўлар эди. Илло, назаримда, мен уйда қоладиганга ўхшайман, сабабки, жаноб капеллан мени олиб кетмайдиган кўринади. Сартарош афандим зикр этганидек, магарким Юпитер

бизни ёмғирдан маҳрум қилар экан уни истаган пайтимда ўзим ёғдираман... Буни «қирмакаш жом» синьор гапини тушунганимни билиб қўйсин деб айтяпман.

Гапга яна руҳоний аралашди:

— Сеньор дон Кихот, сўзларингизни тинглаб ўтириб, менда бир гумон пайдо бўлди. Боядан бери виждонимни кемириб, азоб берапти. Илтифот кўрсатиб шуни айтишга ижозат берсангиз.

— Сизга наинки буни, яна кўп нарсаларни ҳам айтишга ижозат бериш мумкин. Қани, бизга ўз гумонларингизни баён қилинг, чунки биронтамининг виждонимиз нимадандир оғрингани инсофдан эмас.

— Ундай бўлса, ижозатингиз билан шубҳаларимни ўртага ташлайман, — сўз бошлади руҳоний, — сеньор дон Кихот, менинг бир нарсага сира-сира ишонгим кемайди. Наҳотки, сиз ҳозиргина ном-баном санаб ўтган жаҳонгашта рицарларнинг яшагани рост бўлса? Наҳотки улар ҳақиқатан ҳам оддий одамлардай эт билан суяқдан тузилган бўлса? Аксинча, наздимда, бу гапларнинг бари уйдирма ва ёлғон, эзгу бир орзудирким, жабрдийда халқ қўпинча хаёл суриб, тўғрироғи уйқусираб сўзлаб келган улар ҳақида.

— Кўп одамлар гирифтор бўлган янглишувга сиз ҳам учрабсиз, — деб жавоб берди руҳонийнинг бу сўзларига дон Кихот, — лекин, ҳар қалай, сиз билан баҳслашишга ҳам ҳожат йўқ. Мен олдинданок айтиб қўйишим мумкинки, Амадис Галльскийни ўз кўзим билан кўрганман: у новча, рангпар, қоп-қора чиройли соқолли, камгап, одамларга гоҳ мулойим, гоҳида хўмрайиб қарайдиган, қаҳри жуда секин келадиган, лекин тез жаҳлдан тушадиган одам эди. Мана шу Амадисни қандай таърифлаган бўлсам, юқорида санаб ўтганим бошқа рицарларни ҳам худди шундай тасвишлаб беришим мумкин. Агар улар ҳақида ёзилган романларни диққат билан ўқиб чиқсангиз ва улар кўрсатган жасоратларни эсласангиз, уларнинг ташқи қиёфасини кўз олдингизга келтиришингиз осон, чунки кишининг ташқи қиёфаси ички дунёсига мос бўлади.

— Сеньор дон Кихот, хўш сизнинг фикрингизча Морганте полвоннинг бўйи қанақа бўлган, айтиб беролмайсизми? — сўраб қолди сартарош.

— Гарчандки муқаддас китобларда полвонлар дарҳақиқат яшаб ўтганлар, деб ёзишса-да, лекин бу масала ҳалигача чигал. Диний ривоятларда филистимлиялик Голиаф деган одам тўғрисида гап кетади. Унинг бўйи етти ярим тирсак бўлган. Демак, афсонавий паҳлавон дейиш мумкин эди. Бундан ташқари, Сицилия оролида болдир ва елка суяклари топилган. Бу суяклар бўй-бастии минорадек келадиган кимсага мансублиги аниқ. Шунда ҳам, барибир, гарчанд мен унчалик новча эмас деб ўйласам-да, Моргантеннинг бўй-бастини аниқ айтолмайман. Аммо унинг ҳаёти тафсилотлари берилган ривоятларда, Морганте бир неча бор уйда тунаган, дейилади, модомики у бемалол кира оладиган

уйлар бор экан, демак, уни айтарли даражада бахайбат гавдали дейиш ноўрин.

— Сиз ҳақсиз,— деди руҳоний. Дон Кихотнинг бемаъни мулоҳазалари унинг учун бир эрмак эди. Шунинг учун у рицаримиздан, Рейнальдо Монтальбанский, Роланд ва бошқа Франция пэрлари, собиқ жаҳонгашта рицарларнинг ташқи қиёфаси қанақалигини сўради.

— Менинг шу нарсага имоним комилки,— жавоб берди дон Кихот,— Рейнальдо кенг юзли, қирмизи ёноқли, сал ўйноқироқ бақакўзли бир одам бўлган; ниҳоятда гинахон ва қизиққон бу одам қароқчилар ва бузуқ, ярамас одамлар билан ошначилик қилган. Хўш, Роланд, Ротоланд ёки Орландга келганимизда эса — чунки у романларда мана шу уч ном билан аталади — менинг тахминимча, у ўрта бўй, ягриндор, сал маймоқ оёқ, бугдойранг, малла соқолли, бадани сертук, қарашлари даҳшатли, ўн гапирганда бир гапирмайдиган, лекин жуда одобли ва ниҳоятда хушмуомала одам бўлган.

Шу онда дон Кихотнинг эҳтиросли нутқи жияни билан эконоканинг шовқин-сурони туфайли узилиб қолди. Қичқирикни эшитган меҳмонлар ўринларидан ирғиб туриб, ҳовлига отилишди.

### XXXII БОБ

#### САНЧО ПАНСА БИЛАН ДОН КИХОТНИНГ ЖИЯНИ ВА ЭКОНОМКА ЎРТАСИДАГИ МОЖАРО

Бу орада ҳовлида аломат бир жанжал бошланиб кетган эди. Санчо ўз хўжайинининг олдига кирмоқчи бўлар, ўзини дон Кихотнинг ҳузурига киритишларини талаб қиларди. Бироқ дон Кихотнинг жияни билан экономка уни остонага ҳам яқинлатмай, ҳадеб:

— Бу дайдиваччага бизнинг уйда пишириб қўйибдими! Қани, марҳамат қилиб, бу ердан туёғингизни шиқиллатиб қолинг-чи. Сиз нимаям қилардингиз хўжайинимизнинг олдида, унинг миясини айнатишу яна қаёқларгадир етаклаб, сарсон-саргардон қилишдан бошқа нарса қўлингиздан келармиди?— дея бақиршарди.

— Елғон, алвасти экономка!— деб бақирди бунга жавобан Санчо,— мен эмас, бу сенинг хўжайининг миямни айнатиб, йўлдан оздирган. Уша — сенинг хаёлпараст хўжайининг мени уйимдан жудо қилди. Сенга фалон оролни совға қиламан, деб аллақайси гўрларга бошлаб борди. Уша оролига етишишни ҳануз кутиб ётибман.

— Худоё худовандо ўша лаънати орол бошингни есин, жувонмарг Санчо,— деб чийилларди дон Кихотнинг жияни.— Бошингга урасанми ўша оролни? Ё уни пишириб емоқчийдингми, очофат!

— Э-э-э, оролни ҳечам ейишмайди, уни бошқарадилар,— эътироз билдирарди Санчо.— Қани энди, пешонамга битганида-

ку, мен уни тўртта шаҳар кенгаши ё бўлмаса ўшанча пойтахт алкальдидан<sup>58</sup> кўра минг марта афзалроқ бошқарардим.

— Барибир сизни сеньоримизнинг олдига ҳечам қўймаймиз! Бу ердан яхшиликча жўнаб қолинг, сиз қаҳру ғазабнинг кони, бадхулқларнинг уччига чиққанисиз! Бориб ерингизни ҳайданг, рўзгорингизни тебратинг. Орол-поролларни каллангиздан чиқариб ташланг!

Бу даҳанаки жанг руҳоний билан сартарошга ёғдай ёқиб тушган, шунинг учун улар хаҳолаб кулишарди. Бироқ дон Кихот, Санчо бўлар-бўлмас гапларни вайсаб, шаънига доғ тушириб қўймаса эди, деган ташвишда хотинларга, меҳмонни ичкари ўтказиб юборинглар, деб кичқирди. Санчо хотинлар ўртасидан ғоз юриш қилиб уйга кирди. Руҳоний билан сартарош эса дон Кихот билан хайрлашиб, бечора идальгонинг жаҳонгашта рицарлик касалидан ўла-ўлгунча қутулолмаслигига қаноат ҳосил қилишиб, уйларига жўнашди.

— Мана, кўрасиз, ошнам,— деди руҳоний сартарошга,— биродаримиз тез кунда яна олам бўйлаб сафарга отланадилар.

— Менинг ҳам бунга имоним комил,— жавоб берди сартарош,— чунки мен рицарнинг аҳмоқлигидан кўра, яроқбардорининг лақмалигидан кўпроқ ажабланышман: йўқ оролдан шунчалик умид қиляптики, унинг қовоқ калласидан бу фикрни қандай чиқариб ташлаш мумкинлигига ҳайронман.

— Тангри шифосини берсин икковининг,— деди руҳоний.— Қани кўрамиз, рицарь ва яроқбардорининг бу телбалиги қандай оқибатларга олиб бораркин. Назаримда, улар бир-бировлари учун яратилгандек, хўжайиннинг тентаклигию хизматкорининг эса калтафаҳмлиги шундоқ мос тушганки, асти қўяверинг.

— Сиз ҳақсиз,— деди сартарош,— улар ҳозир нималар тўғри-сида суҳбат қуришайтганикин, билсак зап иш бўларди-да.

— Имоним комилки,— жавоб қилди руҳоний,— жиёни билан экономка кейин бизга ҳаммасини оқизмай-томизмай айтиб беришади. Барибир суҳбатларига қулоқ солишади, уларнинг табиати шунақа ўзи.

Дон Кихот бўлса, Санчо билан ёлғиз қолиб, эшикни қулфлади-да, шундай деди:

— Санчо, сени гўё мен уйингдан жудо қилган эмишман, бу менга оғир ботади. Ахир, биласан-ку, сен каби мен ҳам уйимни ташлаб кетганман. Бирга отландик, бирга дунё кездик, бошимизга тушган оғир-енгилликларни ҳам баҳам кўрдик ва, ниҳоят, башарти сени бир марта чойшабда осмонга улоқтирган бўлсалар, мени юз марта калтаклашди — мабодо менинг устунлик жойим бўлса, у ҳам мана шу.

— Аслида ҳам ўшанақа бўлиши керак эди-да,— жавоб берди Санчо,— чунки марҳаматли жанобимизнинг ўзлари айтганларидай, балои қазоларнинг аксарияти яроқбардордан кўра рицарнинг бошига кўпроқ ёғилади.

— Янглишяпсан, Санчо,— деди дон Кихот,— лотинларнинг, бош оғриси бутун аъзойи баданинг зирқирайди, деган мақолини

эслагин-а. Гарчандки, мен сенинг хўжайининг ва ҳомийинг эканман, демак, мен — бош, хизматкорим бўлмиш сен эса менинг аъзойимсан. Шундоқ экан, менинг кулфатим, бу — сенинг ҳам кулфатинг, мен сенинг дардингга шерик, сен эса менга ҳамдари бўлмоғинг лозим, Санчо.

— Ҳамиша-ку, худди шундоқ бўлиши кераг-а,— деди Санчо,— аммо-лекин сизнинг аъзойи баданингиздан бири бўлмиш мени чойшабга солиб осмонга иргитишганда, бош жаноблари ҳамдари бўлиш ўрнига девор ортида ҳеч қаерлари оғрмай қўл қовуштириб турдилар. Модомики, аъзолар бош оғриғини бирга тортишга мажбур эрсалар, унда бош ҳам аъзоларининг оғриғига шерик бўлсин-да.

— Наҳотки сени осмонга иргитишганда менга осон бўлди деб ўйласанг?— хитоб қилди дон Кихот.— Йўқ, бу таънанг ноўрин. Башарти сен ўша дақиқада жисман азоб чеккан бўлсанг, мен руҳан ундан кўра ортиқроқ эзилдим. Кел, бу нарсаларни қўя турайлик, кейинроқ, бафуржа ҳал қилармиз. Яхши-си, дўстим Санчо, менинг ҳақимда қишлоқда қандай сўзлар бор, шундан сўзла. Халқ, идальго ва кабальеролар қандай фикрда? Улиб, йўқ бўлиб кетган жаҳонгашта рицарлик даврини қайта тиклаш борасидаги менинг режаларим ҳақида нималар дейишяпти? Қисқаси, Санчо, қулоғингга қандай гап етган бўлса, ҳаммасини тўкиб сол. Фақат, яхшилиқни оширмай, ёмонлиқни яширмай, бари-барини сўзлаб беришинг шарт! Негаки садоқатли хизматкорлар ўз сеньорларига бор ҳақиқатни шундай гапириб беришлари лозимки, унда жанобимга ёқмай қолмай тагин, деган андиша ҳам ёки ортиқча ҳурмат-тавозе юзасидан андавалаш ҳам бўлмасин. Санчо, сен шуни бир билиб қўйки, агарда бизнинг ҳақгўй фикрларимиз мунофиқликсиз, бор ҳолича ҳукмдорларнинг қулоғига етиб борсами, у вақтда бутунлай бошқача замон бўлиб кетарди. Унда ўтган асрларни темир аср, бизнинг замонни эса олтин аср дейилса бўлаверарди. Бу сўзларни сенга даромад тарзда, сени огоҳлантириб, менга ҳақиқий аҳволни бўямай-нетмай айтиб берарсан, деган мақсадда гапирдим, Санчо.

— Илтимосингизни бажону дил адо этаман, сеньор,— деди Санчо,— лекин, марҳаматли жаноблари менинг сўзларимдан аччиғланмасликлари керак. Ахир, ўзингиз бор ҳақиқатни оширмай ва яширмай, қандай бўлса, шундайлигича айтиб бер, деясиз, тўғрими?

— Аччиғим чикмайди, деб ваъда бераман, Санчо, бемалол ва тўппа-тўғри гапираверишинг мумкин,— деди дон Кихот.

— Бўлмаса, тингланг,— деди Санчо,— халқ сиз марҳаматли жанобларини бутунлай ақлдан озган, мени эса, кам деганда савдойи бўлиб қолган, деяпти. Идальголар эса, сиз муҳтарам жанобни атиги бир-иккитагина тоқзору икки-уч акра ҳайдалади-ган ергагина эга бўлатуриб, ўзини дворян ва рицарь қилиб кўрсатмоқчи, бу тамомила қонунсиз, деган фикрдалар. Кабальеролар эса қандайдир бир идальгонинг, яна ҳамиша ковушини куяга бўяб, қора пайпоқни кўк ипак билан ямаб юрувчи бир идальго-

нинг ўзлари билан тенглашмоқчи эканлигидан норози бўляптилар. Хулласи калом, яроқбардорликкагина яроқли эмишсиз.

— Бу гапларнинг менга даҳли йўқ,— Санчонинг сўзини бўлди дон Кихот,— мен ҳеч қачон ямоқ кийим киймайман, ҳамма вақт яхши кийиниб юраман.

— Хўш, сизнинг шон-шавкатингиз, одобингиз, жасоратингиз, тадбиркорлигингизга келганда эса, турли хил фикрлар юрибди. Бировлар «тентаг-у, аммо эътиборингни ўзига тортади», деса, бошқа бировлар «ботир-у, лекин омади юришмаган», дейишяпти. Яна бир хил кишилар «тадбирли-ю, бироқ ақлдан озиб қолганда», деган фикрдалар. Буни эшитган одамлар бири олиб, бири қўйиб инчунун гап қияптиларки, натижада сиз иноятли жанобим билан иккимизнинг соғ жойимиз қолмайдиганга ўхшайди.

— Шу нарса ёдингда бўлсинки, Санчо,— деди бунга жавобан дон Кихот,— ҳаммаша бирор кимса саховат чўққисига чиқиб қолса борми, уни доим таъқиб этишга киришадилар. Ҳа, ҳа, ўтмишдаги машҳур ва манзур одамларнинг бирортаси ҳам тухмат ва ғийбатдан қутулолган эмас. Масалан, Юлий Цезарни олайлик. Ботирларнинг ботири, бағоят донишманд ва жасур лашкарбоши бўлган шундай одамни ҳам амалпарастлигу нопокликда айблаган. Ўз хизмати маҳоратлари билан Буюк деган ном олган Искандар ҳақида ароқхўр деб гап тарқатишган. Дон Галаорни ўтакетган жанжалкаш, унинг акаси, машҳур Амадис Галльскийни ҳатто йиғлоқи деб ғийбат қилганлар. Ана шунинг учун ҳам, Санчо, бундай ёлғон-яшиқ гаплар бир пақирга қиммат эканлигини ҳамма билади. Лекин эҳтимол, бор гапни ҳали айтиб бўлмагандирсан, Санчо?

— Ҳамма бало ҳам ана шунда-да, қуриб кетсин падари бузрукворим!— деб жавоб қилди Санчо.

— Демак, ҳамма гап бугина эмас, шундайми?— сўради дон Кихот.

— Йўқ, гапнинг нордони ҳали чиққани йўқ,— деди Санчо.— Шу тобгача айтганларимнинг бари холва эди. Мабодо, марҳаматли жаноб, ўзингиз ҳақингиздаги ғийбатларни тўла-тўкис эшитаман десангиз, мен ҳозир ҳузурингизга шундай бир кишини бошлаб келаманки, у сизга оқизмай-томизмай ҳамма нарсани айтиб беради. Кеча кечқурун Бартоломе Каррасконинг ўғли Саламанкадан қайтиб келди. У баккалавр<sup>59</sup> унвонини олибди. Мен уни табриклагани борсам, у «уддабурро идальго ламанчлик дон Кихот» деган китоб чиқди, деб қолди. Китобда сиз билан менинг бутун саргузаштларим тасвирланган эмиш. Ҳатто иккаламизнинг қандай воқеаларга қачон гувоҳ бўлганимиз, ўзаро суҳбатларимиз сўзма-сўз баён қилинганмиш. Бу гапларни эшитиб, буларни қаёқдан била қолибди, деб муаллифга ҳайрон қолдим. Айни пайтда қўрқиб кетганимдан бир неча марта чўқиниб ҳам олдим. Уша баккалаврни бир қўриб қўймадиларми, муҳтарам жаноблари, истасангиз кўз очиб-юмгунча бошлаб келардим-да.

— Агар чақириб келсанг, мени ниҳоят қувонтирган бўлар-

динг, дўстгинам, — деди дон Кихот. — Сўзларингга жуда қизиқиб қолдим. Энди бутун гапни аниқ-равшан билмагунимча, томоғимдан овқат ўтмайди.

— Бўлмаса, айтиб келақолай уни, — деди Санчо.

### XXXIII БОБ

#### ДОН КИХОТ, САНЧО ПАНСА ВА БАККАЛАВР САМСОН КАРРАСКО УРТАСИДА БЎЛИБ ЎТГАН СУҲБАТ

Дон Кихот ажойиб китоб тўғрисида батафсил гапириб берадиган баккалавр Карраскони кутиб, чуқур хаёл суриб ўтирди. У ўзи кўрсатган жасурликлар матбуотда ҳам чиққанлигидан ниҳоятда таажжубланар, бу китобни бирор донишманд-сеҳргар ёзган бўлса ажаб эмас, деб ўйларди. Кейин Дульсинея ҳам бу китобга киритилган бўлса керак, албатта, деган фикр хаёлига келиб, у ҳақда ортиқча бирор гап айтиб юборилмадимикин, деб ташвишлана бошлади.

У ана шундай хаёлларга чўмиб ўтирганида Самсон Карраскони эргаштириб Санчо ҳам етиб келди. Дон Кихот Самсонни камоли ҳурмат ва илтифот билан кутиб олди.

Баккалавр, гарчанд исми Самсон бўлса-да, паст бўйли, кулча юзли, пучуқ ва оғзи катта бир кимса бўлиб, кўринишидан ҳазилмutoйибага, ҳар хил шўхликларга ўчга ўхшарди.

Дон Кихотни кўриши биланоқ у дарров тиз чўкиб, шундай деди:

— О сеньор ламанчлик дон Кихот, қўлингизни ўпиш учун рухсат бериб, мени улуғ мурувватингиздан бахраманд қилғайсизки, зотан Саламанка университетининг баккалаври шаънига қасам ичиб айтаман, сиз марҳаматли жаноб, ер юзини қачонлардир кезиб чиққан ёки энди кезиб чиқадиغان ҳамма жаҳонгашта рицарларнинг энг машҳурисиз. Худоё худовандо сизнинг улуғ қаҳрамонликларингизни ёзиб чиққан Саид Амет Бененчелини<sup>(61)</sup> ўз паноҳида асрасин. Бу китобни араб тилидан ўзимизнинг испанчага ағдариб, жаҳон аҳлига эрмак топиб берган олиҳиммат одам боласига ҳам эгамнинг меҳр-шафқати ёғилсин.

Дон Кихот унга ўрнидан туришни буюрди ва:

— Наҳотки менинг тарихим ёзилгани рост, тагин унинг муаллифи донишманд араб бўлса? — деб сўради.

— Ҳа, худди шундоқ, олиҳиммат сеньор, — деди Самсон, — ҳозиргача бу китоб ўн икки мингга яқин нусхада босиб чиқарилди. Ўзингиз бир кўринг-а: китоб Португалияда, Барселонада, Валенсияда нашр этилди. Айтишларига қараганда, ҳозир Антверпенда ҳам нашр этилаётганмиш. Уйлайманки, ҳаш-паш дегунча дунёдаги халқларнинг ҳаммаси ўз тилларига таржима қилиб олишса керак.

— Саховатли ва олижаноб киши ўзи ҳаётлигидаёқ жаҳон бўйлаб яхши донг таратганидан шод бўлмоғи керак, — деди бунга



жавобан дон Кихот, — қайтариб айтаман: яхши ном чиқариш. Чунки ёмон ном чиқариш — бу ўлимдан ҳам баттар.

— Ҳеч қачон жаҳонгашта рицарларнинг бирортаси сизчалик яхши ном чиқариб, бунчалик донг таратган эмас, — такаллуф билан деди баккалавр. — Хавф-хатарларни енгишда сиз каби жасорат кўрсата оладиган, мушкулотларга, бахтсизлик ва жароҳатларга сиздек бардош бера оладиган матонатли, сеньора донья Дульсинея Тобосскаяга содиқликда марҳаматли жанобингизга тенг келадиган бирор кимса йўқ.

— Мен, — дарҳол гапга аралашди Санчо Панса, — сеньора Дульсинеяни «донья» деб аташганини ҳеч қачон эшитмаганман. У кишини тўғридан тўғри «сеньора Дульсинея Тобосская» деб аташади.

— Эътирозингиз ўринсиз, — деди Карраско.

— Албатта ўринсиз, — деб қувватлади уни дон Кихот, — лекин марҳаматли сеньор баккалавр, айтинг-чи менга, тарихимни ўқиганлар мен кўрсатган қаҳрамонликларнинг қай бирини кўпроқ мақташапти?

— Бу борада ҳар хил фикрлар бор, чунки кишиларнинг диди ҳам турли-туман бўлади: айтайлик баъзилар шамол тегирмонлари билан содир бўлган саргузаштларингизни мақташса, бошқаларга мовут дастгоҳлари билан рўй берган воқеалар кўпроқ ёқяпти; кўпчиликка эса, аслида қўй сурувлари бўлган икки лашкар ўртасидаги жанг айниқса маъқул тушапти; яна бошқа бировлар кўмиш маросими билан савдоларни кўкка кўтариб мақташапти. Шунингдек, бандиларни озод қилишдаги довьораклигингизу машҳур бискайли билан юзма-юз олишувингиз ҳам ҳамма-ни тонг қолдиряпти.

— Марҳамат қилиб айтинг-чи, сеньор баккалавр, — яна гапга аралашди Санчо, — янгузелик хачир ҳайдовчилар билан бўлган ғаройиб саргузаштларимиз, барака топгур Росинантнинг қариганда шўхлик қилмоқчи бўлганлариям китобга кирибдими?

— Бу китобда ҳамма воқеа бор! — хитоб қилди Самсон. — Доно муаллиф саргузаштларингизнинг биронтасини ҳам тушириб қолдирмабди. У киши ҳатто бағри кенг Санчонинг қандай қилиб чойшаба учганини ҳам ёзибди.

— Мен ҳечам чойшаба учмаганман, — шу заҳоти эътироз билдирди Санчо, — мен авваламбор ҳавода, шунда ҳам ўзим хоҳлаганимдан узоқроқ учганман.

— Менимча эса, — деди дон Кихот, — ҳар бир кишининг ҳаётида муваффақиятсизлик ва хунук кўргуликлари бўлади, айниқса, жаҳонгашта рицарнинг турмушида. Шундай экан, донишманд ёзувчи фақат муваффақиятлар тўғрисидагина эмас, катта-кичик камчилик ва хатоларни ҳам, албатта, айтиб ўтиши керак.

— Бироқ, — сўзини давом эттирди баккалавр, — баъзи ўқишшли китобхонлар жанг пайтида сеньор дон Кихот жаноблари армонсиз тотиб кўрган сон-саноксиз таёқ зарбларини муаллиф тасвирламаслигини маъқул кўришади.

— Ахир тарих деган ҳаққоний бўлиши керак-да! — деб қўйди Санчо.

— Тўғри-ю, лекин барибир бундай майда-чуйдалар ҳақида тўхтаб юрилмаса ҳам бўларди! — гап ташлади дон Кихот. — Қахрамоннинг обрўсига путур етказадиган баъзи бир тафсилотлар айтилмаса ҳам китобнинг ростгўйлиги сира бузилмасди. Ахир, ростини айтганда, Эней Виргилий айтганчалик тақводор, Улисс эса Гомер тасвирлаганидек унчалик ҳам уддабурро эмас-ку?

— Тўппа-тўғри, — жавоб берди Самсон, — аммо-лекин поэма бошқа-ю, тарих бошқа-да. Шоир ҳодисаларни ўзининг фикрича қандай бўлиши лозим бўлса, шундай ёзади. Тарихчи эса воқеаларни рўйирост, қай ҳолда ўтган бўлса, шундайлигича, қўшиб-чатмай, тушириб қолдирмай ёзиши керак.

— Хўш, модомики бу билимдон араб бор гапни оқизмай-томизмай ёзиши зарур бўлса, у ҳолда бизнинг хўжайин тотиб кўрган калтаклар каби мен еган таёқларни ҳам эслаган бўлмоғи керак. Зотан таёқ билан у улуг зотнинг елкаларигагина туширишган бўлса, каминага келганда марҳаматларини аямай аъзойи баданимни зирқиратиб савалашди. Дарвоқе, бунга ажабланмаса ҳам бўлади, хўжайиним айтганларидек шохга урганда туёқ зирқирайди.

— Шаккоксан-да, Санчо, — деди дон Кихот, — ўзингга керак бўлса хотиранг ярақлаб туради.

— Қани энди менга қолсаю тўқмоқларни унутиб юборсам, — жавоб қилди Санчо, — бироқ бадандаги мўматалоқ рашимга тегяпти, ханузгача биқинларим оғрияпти.

— Бир оз тинч тур, Санчо, — деди дон Кихот, — сеньор бакалаврнинг сўзини бўлма. Бу киши китобда мен ҳақимда яна нималар ёзганини айтиб берсинлар.

— Мен ҳақимда ҳам, — деди Санчо, — ахир мен бу тарихнинг асосий шахсларидан бириман-ку.

— Бу тарихда агар сиз иккинчи шахс ҳисобланмасангиз, Санчо, — деди бакалавр, — худонинг қаҳрига учраганим бўлсин. Ҳатто шундай одамлар ҳам учрайдики, улар бош қахрамондан кўра сиз ҳақингизда кўпроқ ўқишни истайдилар. Дарвоқе, баъзилар эса сизни ўзингизнинг ўта соддалигингиздан сеньор дон Кихот ваъда қилган орол губернаторлигига лаққа ишонган-қўйган, дейди.

— Яна бир оз сабр қилиш керак, бахт қуёшининг порлашига ҳали-ҳозирча фурсат бор, — деди дон Кихот. — Ииллар ўтиши билан Санчонинг тажрибаси ортади ва ана ўшанда оролни бошқаришга ҳозиргидан кўра анча уқувлироқ бўлиб қолади.

— Тангри ҳаққи қасамёд ётаманки, сеньор, — эътироз билдирди Санчо, — агар оролни бошқаришга ҳозир қодир бўлмасам, демак Мафусайл ёшига<sup>61</sup> кирганимда ҳам уни идора эта олмас эканман. Гап менинг уқувимда эмас, балки ваъда этилаётган оролнинг мавҳумлигидадир.

— Яратганга ишон, шукур қил, Санчо, — деди дон Кихот,

ҳамма нарса сен ўйлагандан ҳам зиёда бўлиши мумкин, зотан худойи каримнинг амрисиз дарахтдан бирор япроқ ҳам узилиб тушмайди.

— Ҳақ рост,— илова қилди Самсон,— худо марҳамат қилгудай бўлса, Санчо бир оролни эмас, балки минглаб оролни бошқариши мумкин.

— Мен кўп тоифа губернаторларни кўрганман,— деди Санчо,— ҳаммасини йиғиштириб келганда менинг бир тукимга ҳам арзимамайди, лекин уларни сеньор деб улуғлашади, улар қумуш идишларда овқатланишади.

— Улар орол губернаторлари эмас,— эътироз билдирди Самсон,— улар кичикроқ мулкни бошқарадиган кишилар; орол губернаторлари эса ҳеч бўлмаганда грамматикани билишлари керак.

— Бу соҳада мен ҳеч нарса билмайман,— деди Санчо.— Келинг, менинг губернаторлигимни худонинг ихтиёрига қўйиб қўяйлик. У мени қаерга раво кўрса, ўша ерга юборар. Бошқа масалага кўчсақ, сеньор баккалавр Самсон Карраско. Менинг қилмиш-кечмишларим китобхонга ёқиб тушганидан мамнунман. Умуман, агар одамлар бизнинг қиссамизни ўқиб, мақташаётган бўлсалар, жуда соз.

— Шундай, Санчо, хўжайинингизнинг қиссаси китобхонларга жуда ёқиб тушади. Бироқ улардан баъзилари доно Саид Бененчелидан хурсанд эмаслар, сабаби: сиз Сиерра Моренада топиб олган чамадондаги пулни нима қилганлигингиз ҳақида ҳеч нарса демаган. Ваҳоланки кўпчилик ўша пуллари нима қилганлигини билишни истайди.

Бунга Санчо шундай жавоб қилди:

— Сеньор Самсон, мен ҳозир ҳисоб-китоб қилишга қодир эмасман, нега десангиз, бирдан қорнимнинг жуда мазаси қочиб қолди, агар бир қултум бақувватроқ вино билан ўзимни сийлаб олмасам бўлмайди. Рухсатингиз билан уйга ғизиллаб бориб келаман — у ерда хотиним билан вино қуйилган фляга менга маҳтал бўлиб туришипти. Бир оз тамадди қилиб қайтиб келаман-да, сўнгра пуллари нима қилганимни сўзлаб бераман.

Санчо жавобни ҳам кутиб ўтирмай, шу заҳотиёқ уйга жўнаб қолди.

Дон Кихот баккалаврни қолишга ва озгинагина бўлса ҳам овқатни баҳам кўришни илтимос қилди. Баккалавр таклифни қабул қилди. Одатдаги таомга бир жуфт кабутар ҳам қўшилди; ўтиришда рицарлик ҳақида гап кетди ва айёр Карраско усталик билан дон Кихотнинг пинжига кириб, ғалати ишларига қойил қолгандек бўларди; зиёфатдан сўнг мезбон ва меҳмон ҳордиқ чиқариш учун ёнбошлади. Кўп ўтмай Санчо қайтиб келди ва бўлингаш суҳбат яна улааниб кетди.

Санчо биринчи бўлиб сўз бошлади:

— Сиерра Морена дарасидан топган пулларимизни нима қилганлигимни сеньор Самсон билмоқчи эдилар. Хўп, айтақолай, мен пуллари ўзимга, хотинимга ва болаларимга харж қилдим.

Шу сабабдан ўз хўжалигимни ташлаб жанобим дон Кихот билан бирга беҳуда дайдиб юрганим учун хотиним мени койимайди. Мабодо ҳамёним қуруқ қайтиб кўрай-чи уйга, унда ёруғ дунёдан қувлаб соларди. Мен ҳақимда яна бошқа бирор нарса билмоқчимисиз — марҳамат. Мана мен, каршингизда турибман, ҳатто қирол олдида ҳам жавоб беришга тайёрман. Дарвоқе, сирасини айтганда, менинг пул топганим ёки топмаганим, сарфлаганим ёки сарфламаганимнинг кимга қанчалик даҳли бор, ахир? Бу сафару саргузаштларимиз давомида бошимга ёғилган калтакларнинг ҳар бирига тўрт мараведисдан тўлаганда ҳам мен яна камида юз червонча олишим керак. Майли, аввало, ҳар ким қўлини кўксига қўйсин-у, сўнгра оқни қораю қорани оқ деб айтиб кўрсин. Ҳаммамиз ҳам худо қандай яратган бўлса ўшандайлигимизчамиз, баъзан эса ундан ҳам баттароқмиз.

— Марҳамат қилиб айтинг-чи, — деди дон Кихот ўзининг маҳмадона яроқбардорининг сўзини бўлиб, — муаллиф китобнинг иккинчи қисмини чиқаришни ваъда қилган эмасми мабодо.

— Ҳа, ваъда қилган, — жавоб берди Самсон. — Лекин китоб учун қаердан материал олишни билмайпти. Бўлмаса иккинчи ва ҳатто, учинчи қисмини ҳам бажонидил чиқарар эди у. Ахир китоб унга катта даромад келтиради.

Шу пайт Санчо яна гапга аралашди ва шундай деди:

— Майли, у сеньор мавр ёки бошқача аташадими уни, ҳар қалай яхшироқ ҳаракат қилсин. Биз бўлсак менинг хўжайиним билан унинг учун шундай саргузаштларни тайёрлаб қўямизки, у иккинчи қисминигина эмас, балки юз қисмининг барисини ёзиши мумкин. Уша олижаноб одам бизни бу ерда сомонга ағанаб мудраб ётишгандир деб ўйласа керак. У одам бизни туёқларимизни зингиллатишаётганларида кўрганда эди, қайси оёғимиз оқсанини билиб оларди. Ҳозирча шуни айтмоқчиман: сеньор рицарь маслаҳатимга қулоқ солганида, биз аллақачонлар баҳаво даладарда сайр қилиб, камситилганларни, адолатни ҳимоя қилиб юрган бўлардик.

Худди шу пайт Росинантнинг кишнаган овози суҳбатдошларимиз қулоғига чалиниб қолди. Дон Кихот отнинг бу кишнашани яхшиликдан нишона деб билди ва уч-тўрт кунлик осойишта ҳаётдан сўнг яна йўлга тушишга қарор қилди. У ўз қарорини баккалаврга айтиб, ундан қайси томонга юриш маъқул бўларкин деб маслаҳат сўради. Сеньор Карраско рицаримизни бундай жасорат учун мақтади. Лекин у имкони борича ўзини эҳтиёт қилиши зарурлигини таъкидлади, чунки идалгонинг ҳаёти ўзи учун эмас, балки унинг ёрдами ва ҳимоясига муҳтож бўлган бахтсизлар учун зарурлигини айтди. Сўнгра у дон Кихотга Арагон қироллигига, муқаддас Георгий куниди тантанали мусобақа бўладиган Сарагосса шаҳрига боришни маслаҳат берди<sup>62</sup>. У ерда дон Кихот арагон рицарлари билан мардонавор олишиши ва енгиши мумкин. Бу эса жаҳондаги жамики рицарлардан устун чиқиш ва шон-шухрат таратиш демакдир.

— Сиз, сеньор Самсон, билмасангиз керак, — гапга аралашди

шу заҳоти Санчо, — менинг хўжайиним мазахўрак бола бир тўп қовунни кўриб қолиб қандай ташланса, юзларча қуролланган душман устига шунчалик шоша-пиша ташланади. Бироқ, қуриб кетсин, нафсиламрини айтганда сиз ҳақсиз, сеньор баккалавр, ҳамма нарсанинг ўз вақт-соати бор! Баъзан ҳужум этмоқ, баъзан чекинмоқ керак. Бунинг устига мен, агар янглишмаётган бўлсам, худди хўжайинимнинг ўзгинасидан: ботирлик икки нарсанинг, яъни қўрқоқлик ва тентакликнинг қоқ ўртасида туради деган гапни эшитганман. Агар шундай бўладиган бўлса, бекордан-бекорга, сабабсиз қочиш, душман куч жиҳатидан устун турган бир пайтда ҳамла қилиш керак эмас. Ҳар эҳтимолга кўра олдиндан айтиб кўяяпман: агар хўжайиним мени ўзлари билан олиб кетишни ихтиёр қилсалар, мен фақат бир шарт билангина рози бўлишим мумкин: яъни жангни шахсан ўзлари қиладилар, мен бўлсам, у кишининг кийим-кечаги тоза ва қоринлари тўқ бўлишини ўз зиммамга оламан. У киши мени ҳеч бўлмаганда энг разил қароқчиларга қарши тиг кўтарар деб ҳам ўйламасин! Мен, сеньор Самсон, ўз жасоратим билан эмас, балки жаҳонгашта рицарларга хизмат қилган барча яроқбардорлар ичида ўзимнинг ўта ғамхўр ва содиқ яроқбардорлигим билан шуҳрат қозонмоқчиман. Агар хўжайиним дон Кихот узоқ вақт қилган садоқатли хизматларим эвазига — менга орол инъом этса, ундан ғоят миннатдор бўламан. Мабодо инъом этмаса, нима ҳам қилардим, мен — инсонман, инсон эса бу ёруғ дунёда худодан бошқа ҳеч кимдан умид қилмайди. Дарвоқе ким билсин, балки бир бурда нон губернаторга қараганда оддий кишига мазалироқ туйилиши муқаррардир. Ким билсин, балки худди ўша губернаторликда шайтон оғзидаги тишларим биттаси ҳам қолмай синсин деб мени чалиб юбормоқчидир? Мен Санчо бўлиб туғилганман, Санчолигимча оламдан ўтишни истаيمان. Лекин, мабодо ортиқча хавф-хатар, ташвиш орттирмай, осмондан тап этиб орол тушиб қолгундай бўлса, мен ундан воз кечадиган тентаклардан эмасман. Ахир, сигир берсалар — тизгинга чоп, оёгинг тагидан ёмби чиқиб қолса — тўппа-тўғри уйингга юмалат, деб бекорга айтмайдилар-ку.

— Сиз, биродар Санчо, ўз фикрингизни профессордек баён қилдингиз, — деди Карраско. — Худои таолога астойдил илтижо қилинг-у, сеньор дон Кихотга ишонинг: у киши сизга оролгина эмас, балки бутун бош қиролликни тортиқ қилади.

— Ҳа, майли, — деди Санчо, — сеньор Карраскога журъат этиб айтаманки, қиролликни ҳады этиш уни тубсиз жарга ташлаш деган гап эмас. Мен ўз аҳволимни биламан: саломатлигим қиролликлар ва оролларни бошқаришга бардош беради.

— Эҳтиёт бўлинг, Санчо, — деди Самсон, — мартаба феъл-атворни ўзгартиб юборди. Губернатор бўлиб олгандан кейин туққан онангиздан ҳам юз ўғиршингиз мумкин.

— Мен унақалардан эмасман, — деди Санчо. — Онам ҳақиқий христианка, мен ҳам ҳақиқий христианман, шундай экан ундан ҳижолат чекадиган жойим йўқ. Мен билан яқинроқ танишганингиздан сўнг нонкўрлардан эмаслигимни билиб оласиз.

— Худо хоҳласа, губернатор бўлганинда кўрамиз, губернаторлик эса узоқ эмас, — деди дон Кихот.

Сўнгра дон Кихот бир ҳафтадан кейин йўлга чиқишини айтди. У бу ишни айниқса руҳоний билан Уста Николасдан, шунингдек жияни ва экономадан сир тутиб туришни бақкалаврдан илтимос қилди, токи улар олижаноб ҳамда мардона режасига халал беришмасин. Карраско бунга ваъда берди ва дон Кихот билан хайрлашиб чиқиб кетди.

#### XXXIV БОБ

### САНЧО ПАНСА ВА УНИНГ ХОТИНИ ТЕРЕСА ПАНСА УРТАСИДА БЎЛИБ УТГАН ОҚИЛОНА ВА ҒАЛАТИ СУҲБАТЛАР

Санчо уйга шод-хуррам қайтди, буни олисданоқ сезган хотини дарҳол сўради:

— Нима бўлди сизга, дўстим Санчо, намуноча вақтингиз чоғ?

— Хотинжон, худо худолигини қилса-ю, сизга туюлгандек вақтичоғликдан мени халос этса қанийди энди.

— Тушунолмаяпман, эржон, — деди хотини, — ҳеч нарсани тушунолмаяпман — худо худолигини қилса-ю, сизни шодликдан халос этса, нима деганингиз. Гарчи мен саводсиз бир аёл бўлсам ҳам, ҳар ҳолда, хурсанд, мамнун бўлиш ҳар кимга маъқул тушишини биламан.

— Модомики тушунмас экансиз, Тереса хоним, ижозат этгайсиз, мен сизга тушунтириб бераман, — деди Санчо. — Қувончининг боиси шундаки, мен яна саргузашт излашни ихтиёр қилган хўжайиним дон Кихот хизматига қайтиб боришга қарор қилдим. Менинг яроқбардорлик лавозимим у билан бирга юришни тақозо этади, бундан ташқари, яна бир неча юз червон қўлга туширишни қаттиқ мўлжал қилганман. Айни вақтда сени ва болаларни ташлаб кетиш менга анча оғир бўляпти. Агар худо шафқат қилиб, бирор кимса оёқ босмаган йўлларда дайдимай, оёқларим тийилиб, ўз уйимда бир бурда нонни бемалол топа олганимда эди, қувончим барқарорроқ бўларди. Ҳозир бўлса ўртамызга тушадиган жудолик қувончни заҳар қиляпти. Мана шунинг учун мен худо худолигини қилса-ю, мени қувончдан халос этса кўнгилдагидек бўларди деган эдим.

— Биласизми, Санчо, — деди Тереса, — жаҳонгашта рицарликка кирганингиздан бери шундай тумтароқли гапирадиган бўлдингизки, сўзларингизни ҳеч ким тушуна олмайди.

— Тангри тушунадими, бас, хотинжон, — деди Санчо, — дарвоқе, дунёдаги ҳамма нарса унга аён. Онаси, маълумингиз бўлсинким, бир неча кун эшагимни яхшигина парвариш қилишларига тўғри келади, токи, у жангга шай бир ҳолга келсин. Сулини икки баравар кўпроқ беринг, эгар-жабдуқларини кўздан кечиринг — ахир биз тўй-томошага кетаётганимиз йўқ-да. Бутун жаҳонни айланишга, девлар ва даҳшатли махлуқлар билан олишишга, вишиллаган, ўқирган, маъраган, додлаган овозларни

эшитишга тўғри келади. Агар хачир ҳайдовчилар, подачилар ва сургундан қутқарилганларга дуч келганимизда-ю, булар ҳаммаси айтишга арзийдиган хавф-хатар бўла олмасди.

— Кўриб турибман, эржон,— деди Тереса,— жаҳонгашта рицарларнинг яроқбардорлари ейдиган нон ҳам ҳалол экан. Мен бундай фалокатлардан сизни тезроқ халос этишни илтижо қиламан тангридан.

— Ростини айтсам, хотинжон,— деди Санчо,— агар яқин орада орол губернатори бўлишга ишонмаганимда эди, яна сафарга чиқишдан кўра шу ерда ўлганим афзалроқ эди.

— Нималар деяпсиз, азиз эржоним,— хитоб қилди Тереса,— гапингизни ел учирсин-э! Илоё соғ-саломат бўлинг, ўша губернаторлигини кўтарсин. Губернатор бўлиб туғилганмидингиз, шу кунгача губернатор бўлмай яшаб келдингиз, вақт-соатингиз битганда губернатор бўлмай ҳам у дунёга кетасиз. Ахир ёруғ дунёдагиларнинг ҳаммаси губернатор эмас-ку! Шундай бўлса ҳам ҳар кимнинг куни ўтяпти, ҳамма ҳам бирдек одам. Менга қаранг, Санчо, борди-ю сиз тасодифан губернатор бўлиб қолсангиз, мени ва болаларингизни унутманг, яна шу нарса эсингизда бўлсин, Санчико ўн бешга кирди; ўғлимизнинг мактабга борадиган вақти келди. Аббат ота уни руҳоний қилишга ваъда берган. Қизингиз Марисанчани яқин орада узатишимиз керак, буни ҳам унутманг.

— Агар худо губернаторликка ўхшаш бир лавозимга етказса, хотинжон, ана ўшанда мен Марисанчани албатта шунақанги амалдор тўрага бераманки, қизимизни фақат сеньора деб чақиришадиган бўлишади,— деди Санчо.

— Э, йўғ-а, Санчо,— жавоб қилди Тереса,— уни оддий кишига беринг. Бўлмаса қизимиз ёғоч кавуш ўрнига баланд пошна туфли кийиши, мовут юбка ўрнига фижма ва ипак кўйлақлар кийиши зарур бўлиб қолади. Агар у Марикадан доньяю сеньорага айланиб қолса борми тамомила ўзини йўқотиб қўяди, ҳар қадамда панд ейди. Ана ўшанда унинг қўпол қишлоқи қиз эканини ҳар қанақа одам ҳам билиб олади ва юзига солади.

— Овозингни ўчир, тентак,— гапини бўлди Санчо,— майли икки-уч йил ипак ва бахмаллар кийиб юрсин, кейинчалик бундай мумтозлик, ҳашамат бинойидек ярашади-қолади, ярашмаса ҳам ҳечқиси йўқ! Аввало, бека бўлиб олсин, у ёғи ўз-ўзидан бўлаверади.

— Тенг-тенги билан, тезак қопи билан-да, Санчо,— деди Тереса,— осилсанг баланд дорга осил, деб оёғингиз ердан узилиб қолмасин тагин, кўрпангга қараб оёқ узат, деган мақолни эздан чиқарманг. Топган гапингизни қаранг-у, Марисанчани аллақандай графгами ёки рицаргами бериш керак эмиш, кейин эри уни қишлоқи, қўпол, тўнка деб камситсин-а. Йўқ, эржон, худо ҳақи мен бу мақсадда қиз ўстирганим йўқ! Сиз кўпроқ пул ишлашни билаверинг, Санчо, қизни узатишни эса менга қўйиб қўйинг, аралашманг. Қишлоғимизда меҳнаткаш, барваста йигитча бор, уни ҳамма билади, йигитча қизимизга тез-тез кўз ташлаб туради. Қизимизнинг тенги апа шу йигит, қизимизнинг бахти очилади,

кўз олдимизда бўлишади, ҳаммамиз: ота-оналар, болалар, куёву набиралар билан бир жойда бўламиз; ана шунда дунёнинг лаззатию худонинг марҳаматидан баҳраманд бўламиз. Уни пойтахтдаги ёки ҳашаматли саройдагиларга эрга беришнинг асло ҳожати йўқ, у ердагилар қизимизнинг сўзларини тушунишмайди, у ҳам ҳеч нарсани фарқ қила олмайди, ахир.

— Овозингни ўчир, шайтон! — Ушқирди Санчо. — Қизимизни мўътабар зотга беришимга қаршилиқ кўрсатиш фикри бошингга қаёқдан ўрнашиб олди ўзи? Ҳа, набираларимизни сенёр деб аташса сенга малол келадими? Биласанми, Тереса, эскиларнинг шундай гапи бор: «қўлингга келиб қўнган бахт қушидан фойдалана олмасанг, вақтни бой берсанг, кейинги аттангинг асқотмайди». Бахт — омаднинг ўзи эшигимизни тақиллатиб келган экан, очишимиз керак. Бахт отига минган эканмиз, қўявер, бизни илгари олиб кетаверсин. Агар мен сердаромад губернаторликни қўлга киритсам ва ниҳоят ботқоқликдан холи бўлсам, наҳотки бу сенга ёқмаса-я? — сўзини давом эттирди Санчо. — Ахир Марисанчани амалдор сенёрга берсак, ҳамма сени донья Тереса Панса деб улуғлайди-ку, ахир, черковда ўтирадиган жойинг гиламу пар ёстиқ бўлади, қишлоғимиздаги дворян аёлларнинг ҳасаддан ичлари ёниб ўлади-ку. Агар маъқул бўлмаса, ўтирган жойингда ўтиравер. Лекин шуни билгинки, хотин, ҳар қанча қаршилиқ қилмагин, барибир қизим Марисанча графиня бўлади.

— Нима деяётганингизни ўйлаб айтяпсизми, эржон, — деди Тереса. — Ишқилиб бу графлик қизимизнинг бошига ҳалокат келтирмаса гўрга эди! Хоҳлаганингизни қилинг, герцогга берасизми, шаҳзодага берасизми — кимга берсангиз бераверинг, лекин шуни билиб қўйингки, мен у дунёю бу дунё бунга рози бўлмайман. Мен оддий одамларданман, кибру ҳавога тоқатим йўқ. Чўқинтириш вақтида менга ўша дон-понларсиз оддийгина, покизагина Тереса деб ном қўйишган. Отамни Каскахо дердилар, қизлигимда Тереса Каскахо эдим, ҳозир эса Тереса Пансаман. Шуни ўзи менга кифоя, донья фалончи дейишларини ҳеч истамайман. Мени маломат, игво қилишларига тоқатим йўқ, ахир мен графиня ёки губернатор хоним бўлиб қолсам борми, шу заҳотиёқ: манави чўчқанинг кибру ҳавосини қаранг, кечагина эрта тонгдан зиғир поя арчиб, черковга мантилья ўрнига этагини бошига ёпиб борарди-ю, энди бўлса фижмаю гулдор кўйлак кийиб олиб, бурнини осмонга кўтариб юришини кўринг, деб гап-сўз қилишади. Шукурки, худойи карим ҳали ақлимдан оздиргани йўқ — мен ҳеч вақт бундай қилмайман. Сиз эса дўстим, губернаторми ё графми — ким бўлсангиз бўлаверинг, кўнглингиз кўтарганча кеккаяверинг. Аммо онам ҳақи қасам ичаманки, на мен ва на қизим қишлоқдан ҳеч қаёққа бир қадам ҳам жилмаймиз. Ҳалол, номусли аёл уйда гумдон бўлиб ўтиради, унинг учун ҳар қанақа иш бир оvinчоқ бўлади. Уша дон Кихотингиз билан янги саргузаштларга жўнайверинг, бизни ўз ҳолимизга қўйинг, инқиллаб-синқиллаб ўтираверамиз. Ҳалол яшаймиз, худонинг ўзи бизни қўллайди. Ҳа, дарвоқе, айтинг-чи, хўжайинингизни дон деб ким мартабаси-



ни ошириб юборди ўзи? Ахир на отаси, на бобоси дон эмасди-ку?

— Назаримда ичингга иблис кириб олганга ўхшайди,— деди Санчо.— Раҳим қил, эй худо, нималар деб вайсайсан, хотин, гапингнинг боши қаёқдаю оёғи қаёқда ақлим етмай қолди! Нима сабабдан аллақандай Каскахо, либослару мақолу кибру ҳаво ҳақида жавраб қолдинг. Берироқ кел-чи, тентак, лодон хотин. Агар мен қизимнинг минорадан калла ташлашини ёки дарбадар бўлишини ихтиёр қилаётган бўлсам бошқа гап эди. Ақсинча, мен қизимни донья ва мўътабар сеньорлар даражасига кўтаришни, тахтиравонда бахмал ёстиқларга ўтқазини чоғласам-у, сенинг доди войингга бало борми?

— Бунинг боисини биласизми, эржон?— деди Тереса.— Гап шундаки, кийим-бош сени ҳам ясантиради, ҳам ечинтиради, деган мақол бор. Камбағалга одамлар шунчаки бир назар ташлаб қўядилар, бойлардан эса кўз узмайдилар. Агар бу бой кечагина камбағал бўлган бўлса, ана унда иғво-маломатнинг кети узилмайди, нега десангиз кўчамизда иғвогарлар сон-саноқсиз.

— Тўхта, Тереса, гапларимга қулоқ сол,— деди Санчо.— Сен бунақа сўзларни умрингга эшитмаган бўлсанг керак. Дарвоқе, бу менинг сўзларим эмас, ўтган рўза кунлари қишлоғимизда бўлган воиз отанинг сўзларидан. Ана ўша дуохон отанинг кўзимиз тушган ҳамма нарса ўтмишни эслашдан кўра кучлироқ таъсир кўрсатади, деган гаплари ҳали ёдимдан чиқмайди. Шунинг учун ҳам башанг кийинган, атрофида хизматкорлари гирдикапалак бўлган эътиборли кишига кўзимиз тушса, ҳар ҳолда ҳурмат қиламиз, гарчи у одамни яқиндагина қашшоқ, ночор аҳволда кўрган бўлсак ҳам. Бу бизни ажаблантирмайди, негаки — булар ҳаммаси ўтмиш. Асосийси эса кўз олдимизда тургани. Агар кишининг толеи қулф уриб, уни ночорликдан халос этиб, фаровонлик, дориламонлик чўққисига кўтаргудек бўлса-ю, у одам хушфёъл, сахий бўлса, унда Тереса, у одамнинг ким бўлганлигини ҳеч ким хаёлига ҳам келтирмайди, бунга ишонаверишинг мумкин, албатта ҳасадгўйлардан бошқа ҳамма уни ҳурмат қилади, дарвоқе, улардан қочиб қаерга ҳам борардинг.

— Гапингизга тушунолмаяпман, эржон,— жавоб қилди Тереса,— билганингизни қилинг, ваъз-насиҳатларингиз билан бошимни қотираверманг ҳадеб. Агар ўз ваъдангизда қаттиқ турадиган бўлсангиз...

— Ваъдангизда эмас, хотинжон, аҳдингизда дейиш керак,— сўзини бўлди Санчо.

— Мен билан тортишаверманг, барака топгур,— деди Тереса,— худога қандай хуш келса, шундай гапиряпман, унақа нозикниҳол маъноларга ақлим етавермайди менинг. Яна такрор айтаманки, агар губернаторликни олиш ниятида қаттиқ турган бўлсангиз, Санчо, ўғилчангизни ўзингиз билан олиб кетинг, токи вақтни бой бермай уни губернаторлик ишларига ўргатинг. Ахир одатда бола ота касбини ўрганиши керак-да.

— Губернатор бўлганимдан кейин,— жавоб қилди Санчо,— ўғлимни олиб кетгани почта отларини жўнатаман, сенга эса пул

юбораман. Уша вақтда пулдан камчилигим бўлмайди, мабодо губернаторда пул бўлмай қолса, унга жони дили билан қарз берадиган одам ҳаммавақт топилади. Ушанда сен ўғлимизни шундай кийинтиргинки, унинг илгари қандай кун кечиргани билинмасин.

— Пул юборсангиз бас,— деди Тереса,— бошлаб кийинтиришни менга қўйиб бераверинг.

— Ниҳоят сен қизимиз графиня бўлиши керак деган фикримга қўшилдинг-да,— деди Санчо.

— Уни графиня ҳолида кўрган куним,— жавоб қилди Тереса,— мен уни қора ерга кўмган куним бўлади. Лекин, билганингизни қилаверинг; биз, хотинлар, эрларимизнинг, гарчи улар бекфаросат бўлсалар ҳам, раъйига қарашимиз керак.

Шундай деди-ю, худди Марисанчага мотам тутаётгандек йиғлай бошлади. Санчо хотинини овутишга киришди. Марисанчани барибир графга берса ҳам, лекин ҳали-ҳозирча бу ишни тўхтатиб туришини айтди. Эр-хотиннинг суҳбати шу кўйи тугади ва Санчо сафар хусусида келишиб олгани дон Кихот ҳузурига қайтди.

### XXXV БОБ

#### ДОН КИХОТ, УНИНГ ЖИАНИ ВА ЭКОНОМКА УРТАСИДА БЎЛИБ УТГАН ВОҚЕА, ЯЪНИ БУТУН ҚИССАНИНГ ЭНГ МУҲИМ БОБЛАРИДАН БИРИ

Санчо Панса ўз рафиқаси Тереса Панса билан суҳбатлашган вақтда дон Кихотнинг жияни ва экономка ҳам бекор ўтиришмаганди. Ҳар икки аёл тоға ва хўжайин бўлмиш идальгонинг юриш-туришидан унинг яна машъум саргузаштлар кетидан йўлга ҳозирланаётганини яққол кўриб туришар эди. Шунинг учун улар қандай бўлмасин уни бу зарарли фикрдан чалғитишга уринардилар. Бироқ уларнинг ҳамма насихат-ёлворишлари беҳуда кетди: дон Кихот бирор сўзни эшитишни истамас, ўз фикрида қатъий турарди. Ниҳоят, экономка жамики далил-баҳоналарини ўртага ташлаб хитоб қилди:

— Ҳақ сўзни айтаман сизга, сенъорим, агар муҳтарам жаноблари уйда тинчгина ўтирмай, тавбасига таянмаган кимсадек яна тоғу тошларда, водий-воҳаларда лаънати саргузаштлар кетидан тушадиган бўлсалар овозим борича дод соламан, йиғлайман, худога ва қиролга арз қиламан. Улар сизни бу йўлдан қайтаришсин, уйда ўтиришга мажбур этишсин.

Бунга дон Кихот шундай жавоб қилди:

— Экономка, сенинг арзингга худонинг берадиган жавобини, шунингдек қирол ҳазрати олийларининг нима дейишини билолмайман. Шуниси менга аёнки, мен қирол ўрнида бўлсам ҳар ёқдан ёғиладиган бетаъсир талаб-илтимосларга жавоб бериб ўлтирмас эдим. Қиролнинг ташвиши кўп бўлади, лекин унинг энг оғир вазифаси ҳамманинг гап-сўзини эшитиш-у, унга жавоб қилишдир. Шунга кўра мен ўз ташвишим билан безор қилмас эдим.

Бунга жавобан экономка деди:

— Айтинг-чи сеньор, қирол ҳазратларининг пойтахтида рицарлар борми?

— Бор,— жавоб қилди дон Кихот,— ва кўп, улар шоҳ саройининг дабдабаси, шон-шуҳрати учун ва қирол ҳукмининг улуғворлигини қўллаш мақсадида тутиб турилади.

— Нега бўлмаса жаноблари ўз қироли, сеньорига хизмат қилишни, пойтахтда тинчгина яшашни истамайдилар?

— Мўътабар хоним, билиб қўйингки,— жавоб қилди дон Кихот,— ҳамма рицарлар ҳам саройга киравермайдилар ва ҳамма сарой рицарлари ҳам жаҳонгашта рицарь бўлолмайдилар ёки бўлишлари шарт эмас. Албатта жаҳонгашта рицардан сарой рицарининг ҳаёти тинч ва роҳатда ўтади. Сарой рицари саройда тинчгина ўтиради, ширин таом ейди, мириқиб ухлайди, агар сайрни ихтиёр қилиб қолса, географик харитани ёзиб олиб, бутун жаҳон бўйлаб қўллари билан саёҳат қилади. Қалтис, хатарли ҳолга йўлиқмайди ва бундай саргузашт арзонга тушади. Биз, жаҳонгашта рицарлар бўлсак жазирама иссиққа, қаҳратон совуққа, селу бўронга қарамай, эртаю кеч демай яёвми, отлиқми ўз оёқларимиз билан ер юзини ўлчаб чиқамиз. Биз душманни сурат-расмлардангина фарқ қилмай, балки юзма-юз тўқнашамиз. Ҳар бир қулай фурсатда душманга унинг найзаси бизникидан узунмасмикин, сеҳрли тумори йўқмикин, қиличида сир йўқмикин деб ўйлаб ўтирмасдан, унга ҳужум қиламиз. Биз ким қуёшга қараб туриб олишиши кераклигини муҳокама қилиб ўтирмаймиз, сарой рицарлари олишуви учун белгиланган одат ва маросимларга риоя қилиб, бунақанги майда-чуйдаларга вақт сарфлаб ўтирмаймиз. Жаҳонгашта рицарь бўйи булутлардан баланд, оёқлари баҳайбат миноралардек, қўллари улкан кемаларнинг мачта устунларига ўхшаш, шиша эритилаётган қўрдек ярақлаган кўзлари тегирмон тошларидек келадиган ўнлаб девга дуч келганда ҳам саросимага тушмайди. Мана шундай маҳлуқларга дуч келганда жаҳонгашта рицарь мардонавор ташланади ва унинг эгни танга балиқ пўстидан бўлишига қарамай (айтишларича балиқ тангалари олмосдан қаттиқ бўлармиш) ва шамшир ўрнига дамашқ пўлатидан ясалган кескир қиличини писанд қилмай мағлуб этади. Шунинг учун ҳам олий фармон ҳукмдорлар жаҳонгашта рицарларни бошқалардан афзалроқ билсалар адолатдан бўларди. Кўпдан-кўп қиролликларнинг жаҳонгашта рицарлар туфайлигина сақланиб келганликларини тарихдан биламиз. Буларнинг ҳаммасини сенга айтишдан мақсад сарой рицарига қараганда жаҳонгашта рицарнинг номи нақадар мўътабарлигини билиб қўйинг демоқчиман, хоним.

— Оҳ, сеньорим,— хитоб қилди жияни,— ахир ўйлаб кўрсангиз-чи, жаҳонгашта рицарлар ҳақидаги қиссаларнинг ҳаммаси тўқилган афсона, холос-ку! Аслида бу китобларнинг ҳаммасини ёқиб юбориш, ҳеч бўлмаганда уларнинг қанақалигини билдириш учун тавқи лаънат тамғасини қўйиб қўйиш керак эди.

— Синглимнинг қизи, туғишганим, яъни жияним бўлганинг

учун худога шукурлар қилгин, акс ҳолда бундай беодоб сўзларинг учун таъзирингни бериб, бутун жаҳонга ошкор қилардим. Бу қанақаси? Кўк йўталдан қутулмаган бу қизча жаҳонгашта рицарлар тарихини қоралашга қандай журъат эта олади! Бу сўзларни сеньор Амадис эшитганда нима дерди! Дарвоқе, сени кечириши ҳам мумкин эди. Зотан у ўз даврининг кўнгилчан, хушфешъл рицари бўлган. Аммо сўзларингни бошқа бирортаси эшитиб қолса борми, ҳолингга вой, чунки ҳамма рицарлар ҳам баодоб ва сипо одам бўлавермайди. Улар орасида жоҳил ва кўрслари ҳам бор. Ахир ўзини рицарь деб юритган ҳар қандай киши ҳам бу номга муносиб бўлавермайди. Баъзилар асл олтиндан бўлса, баъзилари қалбаки олтиндан қилинган, кўринишдан ҳаммаси рицарь, аслида эса бунақа эмас. Паст табақадан чиққан ва рицарь бўлишга жон-жаҳди билан уринган кишилар, айни вақтда шавкатли рицарь бўлганлари ҳолда оддий одамлардек кўринишга ҳаракат қилганлар ҳам бор. Биринчи тоифа иззат-нафс ва саҳоват туфайли донг чиқарадилар; иккинчи тоифа эса заифлик ва қусури туфайли нуфузи кетади.

— Уз паноҳингда асра худойим! — деб хитоб қилди жияни. — Сиз, сеньор тоға, шунчалик кўп биласизки, мабодо зарур бўлиб қолса домлалик ёки олимлик қила олишингиз мумкин-у, лекин бошингиз айланиб довдираб қолгансиз, заифлашиб ва кексайиб қолганингизга қарамай жасоратингиз, кучингиз ҳақида гапирганингиз-гапирган. Қаддингизни йиллар букиб қўйипти-ю, сиз бўлсангиз оламдаги ҳамма эгри-бугри нарсаларни тўғриламақчисиз, лекин энг муҳими сиз рицарман деб даъво қиласиз. Бу мутлақо нотўғри. Тўғри, идальго баъзан рицарь бўлиши мумкин, лекин камбағал одам ҳеч вақт рицарь бўлолмайди!

— Сенинг гапларингда озгина жон бор, жиян, — деди дон Кихот. — Бироқ менинг гапларимга қулоқ сол. Албатта сен ҳақсан — мен камбағал идальгоман. Лекин бу мен рицарь бўла олмайман деган гап эмас. Тўғри, ҳаммани иқроп қилиш камбағал учун жуда оғир. Зодагонларга мансуб бўлмаган киши туғилиш расмига кўра бу оламдаги аъёнлар сафидан жой ололмайди. Бадавлат бўлмагандан сўнг у хотамлик, саҳоват шуҳратидан маҳрум бўлган бўлади. Камбағал рицарнинг шуҳрат қозониши ва ҳаммага танилиши учун фақат биргина йўл бор — бу яхшилик қилишдир. У хушмуомала, баодоб, илтифотли, хушфешъл, мўминқобил киши бўлмоғи керак. Айниқса марҳаматли бўлмоғи лозим, зотан агар очиқкўнгил билан камбағалга икки мараведис берса, катта бойликни ҳадя-инъом қилиб ҳаммаёққа жар солган кишидан саҳовати кам бўлмайди. Мана шундай яхшиликлар ортдирган киши шуҳрат қозонса керак ва ҳар қанақа одам ҳам унинг олижаноблигига иқроп бўлади. Ана ўшандагина у киши давлат ва ҳурмат ҳақида ўйлаши мумкин, холос. Бунга муяссар бўлиш учун эса икки йўлдан бормоқ зарур: бири илм-фан йўли, иккинчиси ҳарбий санъат йўли. Мен илм-фандан кўра ҳарбий санъатдан кўпроқ хабардорман ва шубҳасиз маре сайёраси белгиси остида туғилганман. Шунга кўра ҳам мен жангу жадал йўлини танла-

ганман ва бутун олам бунга монелик қилса ҳам шу йўлдан бораман. Винобарин, сиз беҳудага ўзингизни қийнаманг, мени осмон, тақдир даъват этаётган, ақл-идрок тақозо этаётган, бутун вужудим билан берилган бу йўлдан қайтаришга уринманг. Жаҳонгашта рицарнинг қандай оғир қийинчиликларга, муҳтожлик ва хавф-хатарларга дуч келишини биламан, лекин мен бу йўлда толеим ёр бўлиб беҳад бахт-саодатга эришишимни ҳам биламан. Яхшилик йўли тор бўлади-ю, ёмонликники кенг. Бироқ кенг ва яланг йўл ўлимга, яхшиликнинг тор ва машаққатли йўли эса ҳаётга, яъни мангу ҳаётга олиб келади. Буюк кастил шоиримизнинг қуйидаги сўзларини эсга олинг:

Абадийлик юксак аршининг  
Йўли доим хатарли, баланд —  
Унга чиқар фақат ботирлар!

— Ох, шўрим қурсин мен бахтсизнинг! — хитоб қилди жияни. — Охирида тоғам яна шеърхонлик қилиб юборди. Унинг ҳамма нарсага ақли етади, билади. Шунга кафилманки, агар тоғам гишт терувчи бўлишни истаганида эди, бошқаларга қуш уясини ясаш қанча осон бўлса, тоғам учун уй қуриш ҳам шунча осон бўларди!..

Шу пайтда эшикни кимдир қоқди. Жияни сўради:

— Ким у?

— Менман, Санчо, — жавоб эшитилди.

Экономка бу номни эшитган заҳотиёқ ўзини панага олишга шошилди. Унинг Санчо Пансани кўришга ҳеч тоқати йўқ эди. Жияни эшикни очди, дон Кихот чиқиб қулочларини ёзиб яроқбардорини қарши олди. Шундан сўнг улар хонада холи қолишди-да, қизгин суҳбатга киришиб кетишди.

### XXXVI БОБ

#### ДОН КИХОТ БИЛАН УНИНГ ЯРОҚБАРДОРИ УРТАСИДА НИМА ҲОДИСА БЎЛГАНИ ВА ҲАЙРАТДА ҚОЛДИРУВЧИ БОШҚА ВОҚЕАЛАР

Экономка дон Кихот билан Санчо Пансанинг хонани ичидан бекитиб олишганини кўрган заҳотиёқ рицарь билан яроқбардорнинг нима ҳақда маслаҳатлашмоқчи эканликларига дарҳол ақли етди. У ташвиш ва хафаликдан ўзини қаерга қўйишни билмай ёпинчиқ олиб, бакалавр Самсон Карраско ҳузурига югурди; унга хўжайинининг янги дўсти — ширинсўз одам — бу бемаъни ниятдан уни қайтара оладигандай бўлиб туюлди.

Карраско ҳовлисида сайр қилиб юрарди; экономка унинг ёнига чошиб борди-да, кўзларига филт-филт ёш олиб энтикканича унинг оёғи тагига ўзини ташлади. Бакалавр эса уни жуда ташвишли ҳолда кўриб, сўради:

— Сизга нима бўлди, сеньора экономка? Бошингизга қандай кулфат тушди? Сизни сўнги нафасини оляпти, деб ўйлаш мумкин-а.

— Менга ҳеч нарса бўлгани йўқ, марҳаматли сеньор Самсон, фақат хўжайиним ташлаб кетадиганга ўхшайди, ҳа, албатта ташлаб кетса керак.

— У кимни ташлаб кетади, ахир?— сўради Самсон.— Ўз танасини тарк этмоқчи эмасми? Нима, қаттиқроқ шикастландими у?

— Э, йўқ, танасини эмас,— жавоб берди у,— бизни ташлаб кетади. Азизим сеньор баккалавр, унинг бизни ташлаб кетиш ниятида эканлигини, тагин янги саргузаштлар ахтаришга жўнашини айтмоқчиман. Худо билади нега у бунини саргузашт деркин. Биринчи сафар ресса таёқ еб, эшакка ётқизиб олиб келишди уни, иккинчи гал аравада келтиришди, сомондай сарғайган, озиб-тўзиб кетган, кўзлари киртайиб қолганди, аҳволи шу қадар аянчли эдики, ҳатто тукқан онаси ҳам танимасди! Унинг сал ўзига келиб олиши учун олти юзта тухум сарфладим ахир, худо шоҳид, сўзларимнинг чинлигига товукларим ҳамда қўш-ниларимиз гувоҳ.

— О, бунга сўзсиз ишонаман,— деди баккалавр.— Товукларингиз шу қадар ажойиб, семиз ҳамда одоблики, ёлғон гапиришдан кўра ёрилиб ўлишни афзал кўришади. Бас, сеньора экономка, демак гап сизни сеньор дон Кихотнинг янги қилмишлари ташвишлантираётгани устида кетаётирми?

— Ҳа, сеньор,— жавоб қилди у.

— Ундай бўлса ташвишланманг,— деди баккалавр,— уйга кетаверинг, менга бирор иссиқроқ овқат ҳозирлаб қўйинг, йўл-йўлакай эса авлиё Аполлонияга илтижо қилиб боринг. Мен ҳозир ҳузурингизга бораман, ана шунда кароматларни кўрасиз.

— Вой, гуноҳкор бошим!— жавоб берди экономка.— Марҳаматли жаноб авлиё Аполлонияга илтижо қилишни буюряптиларми? Ахир, авлиё Аполлония тиш оғриғига шифо беради-ку. Хўжайинимнинг тишлари соппа-соғ, унинг боши касал.

— Нима деётганимни ўзим биламан, сеньора экономка. Мен билан баҳслашманг. Мен саламанкалик баккалавр эканлигим сизга маълум-ку, шунинг учун мен билан баҳслашиш ярамайди,— деди Карраско.

Экономка уйига жўнади, баккалавр эса, шўрлик идальгонинг янги ниятлари ҳақида маслаҳатлашгани тезликда руҳоний ҳузурига жўнади.

Бу орада дон Кихот билан Санчо Панса бўлажак сафарининг икир-чикирларигача қизгин муҳокама қилиб олишди.

— Сеньор, ниҳоят, сиз марҳаматли жаноб қаёққа жўнасангиз, мен ҳам сизга ҳамроҳ бўлишга мажбур эканимни хотинимга баён этишга муваффақ бўлдим,— деди Санчо ўз хўжайинига.

— Санчо, сен баён қилдим демасдан тушунтирдим деб айтишинг керак эди,— деди дон Кихот.

— Эсимда,— жавоб берди Санчо,— мен сиз марҳаматли жа-

нобга менинг хатомни тўғриламанг, деб икки марта илтимос қилган эдим. Агар менинг нима демоқчи эканимни тушунмасангиз, тўғридан-тўғри: «Санчо, шайтон, алвасти, мен сени тушунолмаяпман», денг. Агар дурустроқ сўзларни танлай олмасам, ана ундан кейин мени тўғриланг. Ахир, мен ройиш одамман-ку.

— Санчо, гапингга тушунмаяпман,— деди ўша заҳоти дон Кихот,— «мен ройиш одамман» дегани нима ўзи.

— Ройиш одам деб,— жавоб берди Санчо,— мен қандоқ бўлсам шу туришимни айтади.

— Энди ундан баттар тушунмаяпман,— норозилик билдирди дон Кихот.

— Модомики, сиз менинг гапимга тушунмаётган бўлсангиз,— деди Санчо,— қандай қилиб очикрок тушунтиришимни ҳам билмайман. Билмайман, вассалом. Мени парвардигорнинг ўзи кечирсин!

— Бўлди-бўлди, фаҳмладим,— деди дон Кихот,— сен ройиш, ювош, қобил, менинг ҳар қандай тузатишларимга кўнувчи, нима десам ҳаммасини бажо келтирувчи одамман демоқчисан.

— Бас бойлашаман,— деди Санчо,— сиз ҳамма нарсани дарҳол фаҳмлагансиз-у, лекин мендан яна биронта бемаъни гап эшитаман деб, мени адаштироқчи бўлгансиз, холос.

— Эҳтимол,— деди дон Кихот.— Шундай қилиб, Тереса нима деяпти?

— Тереса,— деб жавоб берди Санчо,— сен марҳаматли жаноб билан яқинроқ боғлан, чунки қалам билан ёзилганни болта билан чопиб бўлмас, узоқдаги думбадан яқиндаги ўпка яхши, қартани бўлгандан кейин уни чийлаб бўлмас, осмондаги турнадан қўлингдаги читтак афзал, дейди. Хотинларнинг маслаҳати сариқ чақага арзимаслигини биламан-у, бироқ кимки уларга қулоқ солмаса, ўша тентак.

— Фикрингга қўшиламан,— деди дон Кихот.— Гапир, дўстим Санчо, давом эт, бугунги ҳар бир сўзинг гавҳарга тенг.

— Гап шундаки,— давом этди Санчо,— ўлим ҳаммамизнинг бошимизда бор. Сиз марҳаматли жаноб бунини мендан кўра яхшироқ биласиз; бугун бормиз, эртага йўқмиз; кўзининг умри қўйниқидан узунроқ эмас; бу дунёда ҳеч ким бирор дақиқа худонинг иродасидан ортиқ яшай олмайди; ўлимнинг қулоғи кар, у ҳаёт эшигимизни тақиллатганда доимо шошилади; уни сиғиниш ҳам куч ҳам, салтанат ҳассаси ҳам, митра\* ҳам — ҳеч нарса тўхта-тиб қололмайди,— ҳамма шундай дейди, черковда ҳам шу ҳақида ваъз-насиҳат қиладилар.

— Бунинг ҳаммаси тўғри,— деди дон Кихот,— бироқ гапни қаёққа бураётганингга ақлим етмаяпти.

— Гапни шу томонга бурыпманки,— деди Санчо,— токи сиз марҳаматли жанобим маошни менга нақд пул билан тўлаб қўйсангиз, чунки мукофот учун хизмат қилишни истамайман, мукофот ё кеч, ё вақтидан ўтиб, ё бутунлай бўлмасдан қолиши мумкин.

\* Православ олий руҳонийларининг ибодат вақтида киядиган бош кийими.

Чинакамига бирон нарсага эга бўлсангиз худо ҳам лутфини аямайди. Гапнинг қисқаси озми-кўпми маошим қанчалигини билмоқчиман: ахир товуқ ҳам доналаб еб қорин тўлдиради, тома-тома кўл бўлур дейдилар, модомки бирор нарса ишлаб топган экансан, демак, ҳеч нарса йўқотмабсан. Албатта муҳтарам жаноблари ваъда қилган оролни инъом этгудек бўлсалар, гарчанд бунга кўпда ишонмасам-да, мен кўрнамак ҳамда хасис бўлиб қолмайман. Башарти маошимни шу оролдан келадиган даромадлардан ушлаб қолсангиз бир оғиз ҳам индамайман.

— Мен аллақачон мақсадингни тушундим, — жавоб берди дон Кихот, — фикрингнинг мағзи-мағзигача ҳам фаҳмладим, беҳисоб мақоллар билан қаёққа ўқ отаётганингни ҳам биламан. Қулоқ сол, Санчо, агар жаҳонгашта рицарлар ҳақидаги романларда жаҳонгашта рицарь ўз яроқбардорига маош тўлаган деган гапни бирор ерда учратган бўлсам, мен бажонидил сенга маош тайинлаган бўлардим. Бироқ мен ҳамма романларни битта қолдирмай ўқиганман-у, лекин бу ҳақда бирор ерда ёзилганини эслолмайман. Уларнинг ўз хизматлари эвазига мукофот олишгани менга маълум. Улар буни хаёлларига ҳам келтирмаган бир пайтда тўсатдан хўжайинларига бахт кулиб боққан-у, хўжайин ҳам уларга ё бирорта оролни ё шунга ўхшаган бирор нарсани, ёки жуда бўлмаса сеньор унвони каби мартабасини инъом этган. Агар шу умид ҳамда сабр-тоқат билан кутиш сизни қаноатлантирса, Санчо, ҳамда менинг хизматимга қайтишни хоҳласангиз — марҳамат! Бироқ сиз мени жаҳонгашта рицарларнинг қадимий одатларини бузади деб ўйлаган бўлсангиз, янглишасиз. Шунинг учун, дўстим Санчо, уйга қайтингу, менинг аҳдимни Тересангизга етказинг. Агар унинг розилиги билан фақат мукофот умидида менга хизмат қилмоқчи бўлсангиз — бош устига! Чунки сиз менинг тақдиримга шерик бўлишни истамасангиз, худо ёрингиз, бўлсин, тоат-ибодат қилиб ётаверинг. Бош омон бўлса, дўппи топилади, яхши ният ёрти мол, бунақа мунозарага чақа кетса арзийди каби мақолларни эслашингизни маслаҳат бераман, Санчо. Кўриб турибсизки, биродар Санчо, мақолга кўмиб ташлашда сиздан қолишмайман. Бу гапларни шунинг учун айтяпманки, сизга ўхшаган бесўнақай ҳамда сергапи бўлмаса, сиздан садоқатлироқ, серғайратроқ яроқбардор топилиб қолар.

Бечора Санчо бундай катъий ва узил-кесил рад жавобидан ҳайратда қолди. Кўз олди коронғилашди, дадиллик қанотлари дарҳол синди, чунки, у дон Кихот бошидан зар сочганларида ҳам сафарга менсиз бормаиди деб ишонарди. У хўжайинига нима дейишини билмай хижолат бўлиб, гангиганича хонанинг қоқ ўртасида туриб қолди; худди шу пайт уйга Самсон Карраско, экономка ҳамда жияни кириб келишди: хотинлар баккалаврнинг дон Кихотни бемаъни ниятидан қандай қилиб қайтаришини эшитишни истардилар. Карраско рицарга тантана билан яқинлашиб, олдинги галдагидек уни қучоқлади-да, баланд овоз билан хитоб қилди:

— О, жаҳонгашта рицарлар кўрки! О, ҳарбий маҳоратнинг



чароғон қуёши! О, испан халқининг шон-шуҳрати! Парвардигори оламдан илтижо қиламанки, кимки сизнинг учинчи сафарингизга тўсқинлик ҳамда монелик қилмоқчи бўлса, ўз ниятлари калавасига ўралашиб қолсинлар ва уларнинг макрли найранглари ер билан яксон бўлсин.

Сўнг экономкага мурожаат қилиб, давом этди:

— Сеньора экономка авлиё Аполлонияга илтижо қилмаса ҳам бўлади, чунки сеньор дон Кихотнинг ўз улуғвор ҳамда мисли кўрилмаган ниятларини амалга оширишни давом эттиришига худои таолодан амр бўлганлиги менга аён. Бу рицарни янги қаҳрамонликлардан воз кечишга ишонтирсам, ўз бошимга мислсиз гуноҳ орттирган бўламан, чунки бугунги кунда ёлғиз угина жаҳонгашта рицарлар бурчини бажаришга даъват этилган, зотан у сусткашлик қиларкан, етим-есирлар ҳимоячисиз азоб-уқубат чекаверади, ёмонлик жазосиз, бева-бечоралар ҳомийсиз қолаверади; шундай экан, қани олға, олижаноб, жасур сеньор дон Кихот! Бир соат ҳам фурсатни ўтказманг, марҳаматли жаноблари шу бугуноқ сафарга отлансинлар. Башарти сафарга ҳозирлик кўрмаган бўлсангиз, кўлимдан келганича хизматингизга тайёрман; агар сизда аҳтиёж сезилса-ю, сизга яроқбардор бўла олсам ўзимни бениҳоя бахтиёр ҳисоблардим.

Шунда дон Кихот Санчога мурожаат қилиб деди:

— Энди нима дейсан, Санчо, ахир мен сенга яроқбардорлар доимо топилади деб айтмовдимми? Кўрйасизми, менга ким ўз хизматини таклиф қилаётир: Саламанк университетининг кўрки ва шуҳрати, ёш, навқирон, хушчақчақ, эпчил, камгап, иссиқ ҳамда совуққа, очлик ҳамда ташналикка бардош бера оладиган, хуллас, жаҳонгашта рицарбоп яроқбардор, оламда тенги йўқ баккалавр Самсон Каррасконинг ўзи-я. Бироқ ўз ҳузур-ҳаловатини кўзлаб, бу билим пешвоси ҳамда олимлик тимсолини йўлдан уришимга тангри ҳам рози бўлмайди. Мазкур Самсон ўз ватанида қолиб, унинг шуҳратини, шунинг қаторида ўзининг қариб қолган, соч-соқоли оқарган ота-онасининг шуҳратини ёяверсин, башарти Санчо мени кузатиб боришни лозим кўрмас экан, истаган яроқбардорни ўз хизматимга олишга розиман.

— Йўқ, йўқ, марҳаматли жаноб! — деб қичқирди ҳаяжонланган Санчо кўзларидан шашқатор ёш оқиб. — Лозим кўраман. Тузини ичиб кўрнамаклик қилган одам, деб айтмасинлар мени. Менинг аждод-авлодим ҳеч қачон ўз шаънига кўрнамаклик доғини туширмаган. Бутун олам, айниқса бизнинг қишлоғимиз авлодларим — Пансалар кимлигини яхши билади. Бундан ташқари, сизнинг хайрли ишларингиз ҳамда бебаҳо сўзларингиздан англадимки, сиз марҳаматли жанобимнинг мени албатта мукофотлашингизга ишондим. Модомики, мен қанча маош беришингизни сўраган эканман, буни хотинимнинг истагига мувофиқ қилгандим. Унинг миясига бир ўй келганидан кейин, албатта ўз айтганини қилдириш учун бидиллайвериб миямни қоқиб кўлимга беради. Хуллас, эркак-эркаклигича, хотин-хотинлигича қолиши керак, демак мен эркак эканман, уйимда ҳам эркакли-

гимча қолавераман. Хотинимнинг эса ҳар қанча жаҳли чиқса чиқаверсин! Шундай қилиб, марҳаматли жанобим, васиятни ёзаверинг-у, фақат қайд қилишни унутманг — тезроқ сафарга жўнайлик! Виждон амрини бажариб сиз марҳаматли жанобни сафарга шонилтираётган сеньор Самсоннинг кўнгли заҳмат чекмасин. Сиз муҳтарам жанобимга ҳалоллик ҳамда садоқат билан хизмат қилишга сўз бераман. Мана кўрасиз, шундай яроқбардорингиз бўламанки, бунақасини ҳеч қайси жаҳонгашта рицарь умрида кўрмаган бўлсин.

Санчо сўзларига қулоқ соларкан, бу яроқбардор рицарга жуда муносиб экан, деган қарорга келиб, дунё бунақа тентакларни ҳали кўрмаган, деб кўнглидан ўтказди баккалавр. Ниҳоят дон Кихот билан Санчо қучоқлашиб ярашишди. Эндиликда қахрамонларимиз учун каромат қилувчи улуғ бир зот даражасига кўтарилган баккалаврнинг маслаҳатига кўра сафар уч кундан кейинга тайинланди. Баъзи бир тайёргарликларни кўриш, аввало сипарли дубулға топиш зарур эди, чунки дон Кихот бунингсиз илож йўқлигини айтди. Самсон ўз танишларидан ажойиб дубулға топиб беришни бўйнига олди.

Бу орада дўстларимизнинг суҳбатини эшитиб турган экономка билан жияни аввалига ҳайрон бўлишди, кейин эса умидсизликка тушиб, ғазаблари қўзиб кетди. Уларнинг баккалавр Карраскони қаргаган қарғишларини санаб адо қилиб бўлмайди; улар, ёланиб олинган йиғловчилардай, ўз хўжайинларининг кетишини эшитиб, гўё унга аза тутаётгандек, сочларини юлиб, юзларини тирнаб ув тортардилар. Бироқ Самсон Карраско экономка ва жияннинг назарида хоинларча иш тутгандай кўринса-да, руҳоний ва саргарошнинг маслаҳати билан ҳаракат қилган эди. Уларнинг режаси қандайлигини китобхон кейинроқ билади.

Шундай қилиб, дон Кихот билан Санчо уч кундан кейин барча тайёргарлик ишларини битказишди. Ниҳоят, учинчи куни кечга яқин уларни ярим миля жойгача кузатиб қўймоқчи бўлган баккалаврдан ташқари ҳаммадан яширин ҳолда Тобосо шаҳри томон йўлга тушдилар. Санчонинг сафар халтаси озиқ-овқатга, дон Кихот берган кармони эса пулга тўла эди. Хайрлашиш пайтида Самсон рицаримизни қучоқлади ва рўй берадиган барча муваффақиятлари ҳамда муваффақиятсизликлари ҳақида хабар қилиб туришни илтимос қилди. Дон Кихот унинг илтимосини бажо келтиришга ваъда берди, шундан сўнг Самсон қишлоққа, икки йўловчи эса азм шаҳар Тобосо томонга қараб йўлга тушди.

### XXXVII БОБ

#### САНЧОНИНГ ҲИЙЛА-НАИРАНГ ЙУЛИ БИЛАН СЕНЬОРА ДУЛЬСИНЕЯНИ АВРАГАНИ

Баккалаврнинг қораси кўздан йўқолиб, дон Кихот билан Санчо Панса ёлғиз қолиши биланоқ Росинант кишнаб, эшак эса ҳанграй бошлади. Рицарь билан яроқбардор буни яхшилик нишо-

наси деб билдилар. Бироқ, ростини айтганда, қирчанғи отнинг кишнашидан эшакнинг ҳанграши қаттиқроқ эди, шу сабабли Санчо хўжайинидан кўра ўзига бахт кўпроқ қулиб боқади деб ҳисоблади. Шундай бўлса-да, ўз тахминини эшиттириб айтишга юраги дов бермади. Анча вақт иккови ҳам — рицарь билан яроқбардор — индамай боришди, ниҳоят дон Кихот жимликни бузиб: деди:

— Дўстим Санчо, эртага Тобосога етиб борамиз деган умиддаман. Янги саргузаштлар ахтаришдан олдин у ерга боришга аҳд қилганимдан хабаринг бор-ку ахир. Мен у ерда беқиёс Дульсинейдан оқ йўл оламан. Шу оқ фотиҳа билан ҳар қандай хавфли можарода ҳам албатта ғалаба қозонаман, чунки оламда маъшуқанинг марҳаматичалик ҳеч нарса жаҳонгашта рицарга жасорат бахш эта олмайди.

— Мен ҳам шундай фикрдаман,— деди Санчо,— бироқ мен марҳаматли жанобларининг маликам билан фотиҳа оладиган қулай жойда учрашишларига шубҳа қиламан; у молхона девори орқали фотиҳа берадими сизга: мухтарам жанобларининг Сиерра Морена тоғида ақлдан бегона бўлганлигингиз ҳақидаги мактубни келтирганимда уни худди ана ўша ерда кўришга муваффақ бўлганман.

— Наҳотки, шундай беқиёс, мақтовга тил лол қоладиган гўзалларнинг гўзали турган жой сенга молхонага ўхшаб кўринган бўлса! — деб хитоб қилди ғазабланган дон Кихот. — Сен адашибсан, Санчо, сен кўрган нарсалар унинг маликаларга хос ҳашаматли саройининг нақшин аркию пешайвонлари.

— Эҳтимол, шундайдир, марҳаматли жанобим,— жавоб берди Санчо Панса.— Булар арк бўлса бордир, бироқ хотиримдан кўтарилиб кетмаган бўлса, кўзимга молхонага ўхшаб кўринган эди.

— Нима бўлса ҳам ўша ёққа борамиз, Санчо! — деди дон Кихот.— Деразадами, девор ёнидами, тешик-тирқаш орқалими ё боғ панжараси орасиданми — уни қаердан кўрсам ҳам барибир: унинг ҳусн қуёшининг заррача нури кўзларимга етиб келса кифоя, ўша заҳоти ақлим равшанлашади, руҳим тетиклашади. Ушанда ҳеч ким мен билан ақлда ҳам, ботирликда ҳам тенг-лашолмайди.

— Ростини айтганда, сеньор,— эътироз билдирди Санчо,— ўша қуёшни — сеньора Дульсиней Тобосскаяни кўрганимда у унчалик ёрқин эмас эди, ҳеч қандай нур ҳам таратмаётган эди, у марҳаматли хоним буғдой элаётгани учун юзини чанг булутдек қоплаб олган эди.

— Демак, сен Санчо, сеньора Дульсиней буғдой элапти деган фикрингда турмоқчи ҳамда шуни тасдиқламоқчи бўляпсан,— деди дон Кихот.— Бундай ишларни қилиш аслзода ҳамда олижаноб хонимларга ярашмайди, чунки улар бошқа машғулотлар учун яратилганлар. Тўртта малика ўзларининг биллурдай қасрларида қандай машғулот билан шуғулланганлари ҳақида ҳарқоя қилувчи шоиримизнинг шеърларини эсла. Улар зар, ипак ҳамда дур билан қимматбаҳо матоларга гул тикканлар! Эҳтимол менинг

сеньорам ҳам сен кўрганингда, агар ёвуз сеҳргар менинг жасур-ликларимни кўра олмай, олижаноб, кўрганда кўз қувонадиган чехрасини қабиҳ ҳамда жиркантирувчи нарсага айлантириб юбормаган бўлса, ўшандай иш билан машғул бўлиши керак, албатта. Муаллиф тарихимни битаркан, шуҳратимга ҳасад билан боқиб, бир воқеани иккинчиси билан алмаштирмаса, кўрсатган қаҳрамонликларимни ҳикоя қила туриб ҳақиқатга кўпгина бемаъни ҳамда уятга қолдирадиган уйдирмаларни аралаштириб юбормаса деб қўрқаман. О, беҳисоб кулфатларнинг кони, яхши-ликни кемирувчи қурт бўлган ҳасад!

— Ростини айтганда мен ҳам шундан чўчийман, — деб жавоб берди Санчо. — Фикримча, баккалавр Карраско айтган ўша китобда менинг ор-номусим ҳам гўё, йўлдан четга бураман, деб тихирлик қиладиган қайсар тўнғизни койигандай роса ерга урилган-ов. Ҳолбуки, мен бирорта сеҳргар ҳақида ёмон гапирганим йўқ, ҳасад билан боқадиган даражада бойлигим ҳам йўқ. Айбимни яширишнинг нима кераги бор, мен ичидан пишган ва хиёл муғомбирроқ одамман, бироқ буларнинг ҳаммаси табиий сод-далигим пардаси остида яширинган. Майли, ким нима деса дея-версин. Одамлар мен ҳақимда ҳар қанча гапирсалар ҳам парво-йимга келтирмайман.

— Аммо-лекин, Санчо, — эътироз билдирди дон Кихот, — шуҳратга бўлган иштиёқимиз ҳеч қачон сўнмайди. Сен қандай ўйлайсан, тиш тирноғигача қурулланган Гораційни<sup>63</sup> кўприкдан Тибр дарёсига ўзини ташлашга нима мажбур қилган? Нега Му-ций<sup>64</sup> ўз қўлини куйдирган? Цезарни Рубикондан<sup>65</sup> ўтишга нима ундаган? Шон-шуҳрат иштиёқида қилинган бу ҳаракатларнинг ҳаммасини бандалар олий мукофот ҳамда абадийлик деб билган-лар. Бироқ шон-шуҳратга интиларканмиз, биз ор-номус ҳамда яхшилик чегарасидан чиқиб кетмаслигимиз керак. Полвонларни енгиш билан, биз ғурурни йўқотишимиз, олижаноблик билан ҳа-садни, босиқлик билан ғазабни, овқатдан ўзимизни тортиш билан очкўзликка мойилликни, тинимсиз дарбадарлик билан ялқовлик-ни енгишимиз лозим. Доимо ҳақиқий шуҳратга ҳамроҳ бўладиган мақтовга сазовор бўлишга ана шундай эришилади, Санчо.

— Асли шундайку-я, марҳаматли жанобим, — эътироз бил-дирди Санчо, — лекин мен сиз марҳаматли жанобдан ўзим шубҳа қилган бир нарсани сўрамоқчиман.

— Бош устига, — деди дон Кихот. — Гапир, қўлимдан келган-ча жавоб бераман.

— Айтинг-чи, сеньор жаноблари, — деб гап бошлади Сан-чо, — нима муҳимроқ: паҳлавонни ўлдиришми ё ўлганни тирил-тиришими?

— Албатта, ўлганни тирилтириш, — деб жавоб берди дон Кихот.

— Мана шу ерда сизни қўлга туширдим! — Хитоб қилди Санчо. — Демак, ўлганларни тирилтириш, кўр кўзларни даволаш, чўлоқларни тузатиш, беморларни соғайтириш — буларнинг ҳам-

масини қилиш жаҳонгашта рицарларнинг улуғвор қаҳрамонлик шуҳратига соя солиб қўяди-ку!

— Фикрингга батамом қўшиламан, — деди дон Кихот, — бироқ бундан қандай хулоса чиқармоқчисан?

— Хулоса шуки, — деди Санчо, — сиз билан мен авлиё бўлишимиз керак экан. Шундагина интилаётганимиз ҳақиқий шон-шуҳратга эга бўламиз. Виласизми, сеньор, кеча ё илгари кун иккита қашшоқ роҳибни авлиёликка ўтказишди. Энди уларни белидаги занжир белбоққа қўл текизиб қўйишнинг ўзи катта бахт. Энди бу занжирлар Роланднинг қиличидан ҳам мўътабарроқ. Шунинг учун, сеньор жаноблари, жаҳонгашта рицарь бўлишдан кўра, бирор диний орденнинг итоаткор роҳиби бўлиш афзалроқ.

— Бу тўғри, — жавоб қилди дон Кихот, — лекин ҳамма ҳам роҳиб бўла олмайди-да. Бундан ташқари, рицарлик ҳам диний орден ҳисобланади, рицарлар орасида ҳам авлиёлар бор.

— Наҳотки? — деди Санчо. — Бироқ мен арши аълода жаҳонгашта рицарларга қараганда роҳиблар кўнроқ деб эшитганман.

— Чунки рицарлардан роҳиблар кўн.

Шунга ўхшаш ибратли суҳбатлар билан қаҳрамонларимиз бутун кечани ва эртанги кунни ҳам ўтказдилар. Кун ботиш олдидан азм шаҳар Тобосо кўзга ташланди. Шаҳарга кўзи тушиши биланоқ дон Кихот жуда суюниб кетди, Санчо эса аксинча нима қилишини билмаганидан маъюс бўлиб қолди. Шундай қилиб, иккови ҳам: бири ўз маъшуқасини кўришга зор бўлганидан, иккинчиси эса, ўз ёлғонининг ошкора бўлишидан ҳаяжонланар эди. Бироқ, Санчонинг бахтига дон Кихот қоронғи тушгунча шаҳарга кирмасликка қарор қилди; улар Тобосо яқинидаги эманзордан чиқиб осойишта сукунат чўмган қишлоққа кириб келишди, қишлоқ аҳолиси кун бўйи қилган меҳнатларидан кейин қаттиқ уйқуга кетган эди.

Фақат итларгина жон-жаҳдлари билан ҳуриб дон Кихотнинг қулоғини қоматга келтирар ва Санчонинг юрагини ёргудек бўлишарди. Гоҳ-гоҳ эшак ҳанграр, чўчқалар хўриллар, мушуклар миёвлар эди ва бу турли-туман овозлар тун сукунатида ёриб, янада ваҳималироқ эшитилар эди. Ошиқ рицаримиз буни ёмонлик нишонаси деб билди, шундай бўлса ҳам Санчога:

— Қани, биродар Санчо, мени Дульсинея қасри томон бошла. Ким билади, эҳтимол, у аллақачон уйғонгандир, — деди.

— Жин урсин мени, қайси қасрга бошлаб бораман сизни? — жавоб қилди Санчо. — Жаноби олияларини қасрда эмас, кичкинагина бир кулбада кўрганман.

— Демак, — деди дон Кихот, — сен келган пайтда аслзода сеньорлар ҳамда маликалар муҳитида бўлганидек, у ҳам ўз сарой хонимлари билан биргаликда қасрнинг кичик хоналарининг бирида дам олаётган экан.

— Сеньор, — деди Санчо, — сеньора Дульсинеянинг кичкинагина кулбаси ҳашаматли қаср бўлишини жуда-жуда истасангиз, мен сиз билан баҳслашиб ўтирмайман. Майли, марҳаматли жа-

нобларининг кўнгиллари нимани хоҳласа, шундай бўлсин. Наҳот-ки шундай бемаҳалда қаср дарвозаси очиқ бўлса. Агар биз дарвозани тақиллатсак, бутун маҳаллани чўчитиб, оёққа турғазамиз.

— Аввало сен мени қаср ёнига олиб бор,— деди дон Кихот,— нима қилишимиз лозимлигини шунда айтаман сенга, Санчо. Қара, Санчо, ҳов анави ерда катта иморат кўриняпти: бу иморат Дульсинеянинг қасри эканлигига шубҳам йўқ.

— Қани, олға юраверинг бўлмаса, марҳаматли жаноб,— гудуллади Санчо.— Ким билсин, эҳтимол ўшадир. Мен эса, бу қасрни кўзим билан кўриб, қўлим билан ушлаганимда ҳам, барибир, ҳозир кундузи эканлигига қанчалик ишонсам, бунинг ўша қаср эканига ҳам шунчалик ишонаман.

Дон Кихот Санчони бошлаб кетди. Бироқ, қоп-қорайиб турган иморатга яқинлашарканлар, улар балки черков биноси эканини дарров қаршиларидаги қаср эмас, балки черков биноси эканини пайқадилар. Шунда дон Кихот:

— Биз черковга келиб қолибмиз, Санчо,— деди.

— Кўриб турибман,— жавоб берди у,— илоҳим ўз қабримизга рўпара келиб қолмайлик, чунки шундай бемаҳалда черков қабристонига санжиб юриш яхши қилиқ эмас. Лекин, эсимда бор, марҳаматли жанобларига айтган бўлсам керак, сеньорамизнинг уйи боши берк тор кўчага жойлашган.

— Худо ургур, каллаварам!— деб қичқирди дон Кихот.— Қаср ҳамда саройларнинг боши берк тор кўчаларда қурилганини қаерда кўргансан?

— Сеньор,— жавоб берди Санчо,— ҳар қайси юртнинг ўз таомили бор, эҳтимол бу ерда, Тобосода сарой ҳамда ҳашаматли биноларни тор кўчаларга қуриш расмдир. Шунинг учун, муҳтарам жанобим, шу яқин ўртадаги тор кўча ҳамда боши берк кўчаларни ахтариб чиқишга изн берсалар. Эҳтимол, бирор жин кўчада ўша лаънати ит ғажигур қасрга дуч келиб қоларман.

— Бундай одобсизларча сўзлашга қандай журъат этдинг!— ғазаб билан қичқирди дон Кихот.— Маъшуқамга тегишли ҳамма нарса ҳақида ҳурмат-эҳтиром билан гапиришга мажбурсан.

— Ҳаракат қиламан, марҳаматли жаноб,— деди Санчо,— бироқ, бир мартанинг ўзидаёқ бекамизнинг уйи қаерда эканлигини эслашимни, бунинг устига ярим кечада уни ахтариб топишимни талаб қилиб турсангиз, албатта сабр косам тўлиб кетадида. Ахир ўзингиз уни юз минг марта кўрган бўлсангиз ҳам тополмаяпсиз-ку!

— Санчо, қонимни қайнатиб юборяпсан,— деди дон Кихот.— Қани бу ёққа кел-чи, муттаҳам, мен сенга оламда яккаю ягона Дульсинеяни ҳеч қачон кўрмаганимни, унинг қасри остонасига ҳам қадам босмаганимни минг марталаб айтмаганмидим? Унинг ақли заковати ҳамда ҳусни малоҳати ҳақидаги оламга таралган мақтов ва овозаларни эшитиб, унга ғойибона ошиқ бўлганман.

— Ундай бўлса,— жавоб берди Санчо.— сиз марҳаматли жанобим олдида бўйнимга олиб айтаман: сиз, сеньорим, уни ҳеч

қачон кўрмаган бўлсангиз, мен ҳам ҳеч қачон кўрмаганман.

— Бундай бўлиши мумкин эмас!— кичқирди дон Кихот.— Ахир сен унга бериб юборган мактубимга жавоб келтирган эдинг-ку. Яна унинг бугдой элаётганини, хайрлашиш пайтида сенга нималар берганини беками кўст айтиб бергандинг-ку!

— Бунинг унчалик аҳамияти йўқ, сеньор,— жавоб қилди Санчо,— иқрор бўлишим керакки, мен ҳам уни овозаларга қараб кўрганман, жавобини ҳам овозаларга қараб келтирганман.

— Санчо, Санчо,— деди дон Кихот,— ҳазил қилишнинг ўз вақти бор, акс ҳолда у бемаъни, ноўрин чиқиб қолади. Майли, кўнглимни асир қилган маъшуқам билан ҳеч қачон суҳбатлашмаган, кўришмаган бўлай. Бироқ нега энди сен ҳам у билан кўришмаганман ва суҳбатлашмаганман деб ўтирибсан? Ахир, бунинг қип-қизил ёлгонлигини биласан-ку!

Улар суҳбатлашиб турган пайтда қандайдир бир киши омоч кўшилган иккита хачирни етаклаб келаверди.

Омочни кўриб дўстларимиз, бу киши деҳқон, ишга шошилганидан тонг сахарда турибди, деган хулосага келишди. Деҳқон йўл-йўлакай бир романсни куйлаб келарди:

Французлар, юришмади ишингиз

Ронсевалнинг зўр жангларида.

— Санчо, шу ерда тил тортмай қолайки,— деди дон Кихот кўшиқни эшитиб,— шу туннинг ўзида қандайдир ҳайрли ҳодиса рўй беради. Анави деҳқоннинг нимани куйлаётганини эшитяпсанми?

— Эшитишга-ку эшитяпман-а,— жавоб берди Санчо,— лекин бизнинг ишларимиз билан Ронсеваль жанги ўртасида қандай ўхшашлик борлигига ақлим етмаяпти.

Шу пайт деҳқон улар билан тенглашди ва дон Кихот ундан сўради:

— Худо омадингизни берсин, яхши одам, Тобосонинг оламда тенги йўқ маликаси донья Дульсинеянинг қасри қаердалигини айтиб беролмайсизми?

— Сеньор,— деб жавоб берди йигит,— мен бу ерлик эмасман: шу қишлоқлик бир катта ер эгасининг қароли бўлиб ишлаётганимга бир неча кун бўлди, холос. Қарши томондаги уйда ерлик руҳоний билан унинг ёрдамчиси яшайди; улардан бири, эҳтимол иккови ҳам сиз марҳаматли жанобга ўша сеньор малика ҳақида ахборот бериши мумкин, чунки уларнинг дафтарыда Тобосо аҳолисининг ҳаммаси ёзилган. Бироқ, менинг билишимча, бу ерда битта ҳам малика йўқ. Дарвоқе, бу ерда кўпгина эътиборли хонимлар яшайди, уларнинг ҳар бири ҳам ўз уйида ўзини маликалардай сезиши мумкин-ку.

— Эҳтимол сендан сўраётганим малика шу эътиборли хонимлардан бири бўлса керак, дўстим,— деди дон Кихот.

— Бўлиши мумкин,— жавоб берди йигит,— хўп, яхши қолинглар, тонг отиб қолаётир.

У шундай деб кейинги сўраб-суриштиришларни кутмай, хачирларини ҳайдаб кетаверди.

Санчо эса, хўжайинини боши қотган ҳамда норози ҳолда кўриб деди:

— Ҳақиқатан ҳам, сеньор, тонг отаётир. Тонгни ўрта кўчада кутиб олиш бизга ярашмайди. Шаҳардан чиқиб кетганимиз маъқул эмасми? Сиз марҳаматли жанобим яқинроқдаги чакалакзорлардан бирортасига яшириниб турасиз, мен бўлсам бу ёққа кундузи қайтиб келиб, бекамизнинг уйи, саройи ёки қасрини топмагунча ҳамма жин кўчаларни ахтаравераман. Агар тополмасам, демак, пешонам шўр экан дейман, топсам, у марҳаматли маликага сизнинг Тобосода эканлигингизни, у кишини кўришга рухсат сўраётганингизни айтаман.

— Санчо,— хитоб қилди дон Кихот,— икки оғиз сўз билан кўп доно гапларни айта олдинг, маслаҳатингни бажонидил қабул қиламан. Шундай қилиб, жигаргўшам, ўрмонга кетдик. Мен ўша ерда қоламан, сен бўлсанг шаҳарга қайтасан, маъшукамни топиб, у билан гаплашасан. Унинг ақли заковати ҳамда илтифотидан ажойиб марҳаматлар кутаман.

Дон Кихот билан Санчо Тобосодан чиқиб, қишлоқдан икки миля нарида бир хилватгина чакалакзорни топишди. Дон Кихот шу ерда тўхтаб, Санчога қишлоққа қайтишини, токи кўнглини асир қилган рицари у билан кўришишга зор эканлигини ҳамда келажакдаги улуғвор, машаққатли жасоратлар кўрсатишига оқ фотиҳа беришини илтимос қилаётганини, сеньора Дульсинеяни топиб айтмагунча кўзига кўринмасликни буюрди. Санчо бу топшириқни бажо келтиришга ҳамда олдинги галдагидек хушхабар келтиришга ваъда берди.

— Қани, энди йўлга туш, жигаргўшам,— деди дон Кихот,— магар у хонимнинг ҳусни кўзларингни қамаштирса сира хижолат чекма. О, дунёдаги барча яроқбардорларнинг энг бахтлиси! Тенги йўқ малак Дульсинея билан бўладиган учрашувнинг икир-чикирларигача ёдингда тут. Менинг топширигимни айтаётганингда унинг чеҳрасида ўзгариш бўладими, номимни эшитиб, ҳаяжонга тушиб уялиб кетармикин, шуларга эътибор бер. Агар ўз олий мартабасига яраша ҳашаматли кўшқда пар ёстиқларга ботиб ўтирган бўлса, безовталикдан қўзғалиб қўярмикин, бунга ҳам диққат қил, башарти тикка турган бўлса, қара, оғирлигини оёқдан-оёққа соладими, ўз жавобини икки-уч марта такрорлайдими, гарчанд сочлари силлиқ таралган бўлса ҳам, ажойиб қўллари билан сочини силайдими, шуларни ҳам билгин; гапнинг қисқаси, жигаргўшам, унинг ҳам бир хатти-ҳаракатини эсингда сақлаб қол, агар сен ҳаммасини қандай бўлса ўшандайлигича айтиб берсанг, шу белгиларга қараб, унинг кўнгли хилватгоҳида нималар яширинганини ҳамда менинг муҳаббатимга қандай қарашини билиб оламан. Қани, йўлга туша қол, дўстим. Йқболинг меникидан ҳам баланд бўлсин.

— Бораману тезда қайтаман,— деди Санчо,— сиз эса, марҳаматли жанобим, кўнглингизни хотиржам қилишга ҳаракат



қилинг. Эҳтимол, юрагингиз сиқила-сиқила ёнғоқдай бўлиб қолгандир. Жасурлик ёвуз тақдирни енгади, кимда думба ёғи бўлмаса, уни осгани илмоғи ҳам йўқ, яна, қуролсиз овга чиқсанг, оёғинг остида қуён ўрмалар деган мақолларни ёдингизда тутинг. Мен буни шунинг учун айтяпманки, сеньорамизнинг саройи ҳамда қасрларини кечаси ахтариш қийин бўлган эди, бироқ кундузи уни топишга ишонаман. Модомики, топар эканман, у билан болаб гаплашиш қўлимдан келиб қолар.

Шундай деб, Санчо эшагини буриб, шитоб билан ҳайдаб кетди. Дон Кихот эса, Росинантдан тушмай найзасига суянганча ғамгин ўйларга берилиб кетди. Санчо чакалакзордан чиқиб, атрофга кўз югуртирди-да, дон Кихотнинг кўринмаётганига ишонч ҳосил қилгач, эшагидан таппа сакраб тушди. Сўнгра серсоя дарахтнинг тагига ўтириб олиб, ўз-ўзича мулоҳаза юрита бошлади:

— Қани, энди айт-чи, ошнам Санчо, мухтарам жаноблари қаёққа кетаётгидилар? Мабодо йўқолган эшагингни ахтаргани эмасми?— Йўқ, албатта.— Бўлмаса нимани ахтаряпсан?— Хўжайинимнинг айтишига қараганда, қуёш ва кўкдаги барча юлдузларни бирга қўшиб олганда ҳам тенг келадиган, гўзалликда беқиёс маликани излашга кетаётирман.— Уни қаердан топомқчисан, Санчо?— Қаердан? Азим шаҳар Тобосодан.— Хўп, майли, уни излашни сенга ким топширди?— Адолат ўрнатувчи, чанқоқларга сув, очларга нон берувчи машҳур рицарь ламанчлик дон Кихот.— Буларнинг ҳаммаси яхши, Санчо, ўша маликанинг уйи қаердалигини биласанми ўзи?— Хўжайиним у қирол саройида, ҳашаматли қасрда яшайди, деб айтаётир. Бу қаср эса Тобосода.— Хўп, борди-ю, Тобосо аҳолиси сенинг номаълум қаср ҳамда номаълум маликани излаб юрганингни билиб қолиб, қовурғаларингни пачақлаб, баданингда бирорта ҳам соғ жойингни қолдирмаса-чи? Сенинг таъзирингни бериб, терингни ёнғоқ пўстидай шилиб олишса, улар ҳақли деб ўйламайсанми?— Шубҳасиз улар ҳақ бўлади. Лекин улар менинг бор-йўғи биргина вакил эканлигимни ҳисобга олишлари керак:

Чопар бўлиб келдингиз фақат,  
Йўқ, сиз айбдор эмасиз, дўстим.

Бироқ бунга ортиқча умид боғлама, Санчо, чунки ламанчликлар шу қадар жиззаки, шу қадар ҳалол бўладиларки, ўз устларидан бировнинг кулишига сира чидаёлмайдилар. Худо шоҳид, агар улар сени фош қилиб ташлашса, ҳолингга вой.— Менга тегма, жим! Момақалдирик, гулдурайвер, лекин нарироқда гулдура! Бировнинг ҳузур-ҳаловатини деб бундай мушкул аҳволда қолишга қайси фалокат йўлдан урди мени? Шайтон, худди шайтоннинг ўзи мени шу балоларга грифтор қилди!

Санчо қуйидаги оқилона қарорга келгунча узоқ вақт ўз-ўзи билан суҳбатлашиб ўтирди:

— Хўп, майли,— деди у ўз-ўзига,— умримиз охирида биз

бўйинтуруғини кўтариб юрадиган ажалдан бошқа, дунёда ҳамма нарсанинг иложи бор. Бутун қилмишидан хўжайинимнинг қўлоёғи кишанлаб қўйиладиган жинни эканлиги кўриниб турибди. Аммо мен ҳам ундан қолишмайман. Мен ундан ҳам бешбаттар жинниман, нега деганда унга ўз ихтиёрим билан хизмат қилаётирман. Ахир, мақолларда, қозонга яқин юрсанг қораси юқади, ёмонга яқин юрсанг балоси юқади дейилган, гап зотинг кимлигида эмас, балки ким билан ош-қатиқ бўлганингда экан. Хулласи калом, у — жинни. Шунинг учун кўзига йўқ нарсалар бор бўлиб кўринаверади: оқни қора, қорани оқ дейди, шамол тегирмонларини — девлар, попларнинг хачирларини — туя, қўйлар сурувини — душман кўшинлари деб ўйлаганини эслашнинг ўзи кифоя бунга. Шундай экан, биринчи учраган деҳқон аёлни сеньора Дульсинея деб уни ишонтириш унча қийин бўлмайди. Агар ишонмаса, мен қасам ичаман: агар унинг ўзи ҳам қасам ича бошласа, мен яна қасам ичаман; у эътироз билдира бошласа, мен ўз айтганимда қаттиқ туриб оламан. Эҳтимол менинг қайсарлигимдан аччиқланиб, мени яна шунга ўхшаш топшириқлар билан ҳеч қаёққа жўнатмас. Аниқроғи, бирор ёвуз сеҳргар унинг гўзал маъшуқасини деҳқон аёлга айлантириб қўйган, деб ўйлайди.

Бу ўйлардан Санчонинг кўнгли таскин топиб, ишим битди деб ҳисоблади. Дон Кихот Тобосода бўлганлигига шубҳа қилмасин учун кечгача дарахт тагида ўтирди. У энди эшагига минаман деб турганда, Тобосо томондан учта деҳқон аёлнинг эшак миниб келаётганини кўриб қолди. Санчо ўша заҳоти ҳадеб ош-воҳ қилиб, муҳаббат азобидан тўлиб-тошиб турган хўжайин олдига шошилди. Яроқбардорга олисданоқ кўзи тушган дон Кихот:

— Қалай, дўстим Санчо, бугунги кунни оқ тош билан нишонлайми ё қора тош биланми? — деди.

— Яхшиси,— жавоб берди Санчо,— марҳаматли жанобим, Саламанкадаги студентлар шуҳрат қозонган профессорларини қизил ҳарфлар билан нишонлаганидек, сиз ҳам қизил тош билан нишонлай қолинг.

— Демак,— деди дон Кихот,— хушхабар келтирибсан-да! — Энг аъло хушхабар! — жавоб берди Санчо.— Муҳтарам жаноблари фақат Росинантни қичаб, икки канизак кузатувида сиз марҳаматли жанобим билан учрашгани келаётган сеньора Дульсинея Тобосскаяга пешвоз чиқсангиз бас.

— Худонинг марҳамати беадад! — хитоб қилди дон Кихот.— Нималар деясан ўзи, дўстим Санчо? Менга қара, мени алдама, ёлғондакам хурсандлик билан чинакам қайғумни енгиллаштиришга уринма.

— Сиз марҳаматли жанобни алдашимдан нима фойда? — эътироз билдирди Санчо.— Ёлғон ё чин гапирётганимни шу ернинг ўзидаёқ текшириб кўришингиз мумкин. Отингизни ниқтанг-ҳ, орқамдан юринг. Сиз маликаи ҳазрати олияларини ўз улуғлигига муносиб ҳашаматда кўрасиз. У ҳам, унинг канизаклари ҳам заррин, дуру жавоҳир, олмос, ёқутлар, зарвароқ кийимларга бурканиб, кўзни қамаштириб келишяпти, елкаларига ёйилиб

тушган сочлари қуёшдек нур сочиб турибди. Улар оламда ўзларига тенг кела олмайдиган оқ тулпорларда келишяпти.

— Улар йўрға отларни миниб келишяпти демоқчимисан, Санчо?

— Тулпорми — йўрғами, фарқи унча катта эмас, — эътироз билдирди Санчо, — улар нимада келишаётган бўлса ҳам, дунёда ҳалигача бунақа гўзал хонимлар бўлмаган. Айниқса малика Дульсинея ниҳоятда чиройли; унга бир қараш билан ақлдан озиш мумкин.

— Кетдик, дўстим Санчо, — деди дон Кихот. — Мана шундай кутилмаган хушxabарларинг учун дастлабки саргузаштимдаёқ қўлга туширган энг яхши ўлжани сенга ҳадя қиламан. Агар бу ҳам озлик қиладиган бўлса, учта биямдан туғиладиган тойчоқларимни ҳам инъом этаман, уларнинг тез кунда қулунлашидан хабаринг бор-ку, ахир.

— Менга тойчоқлар кўпроқ ёқади, — деди Санчо, — чунки дастлабки саргузаштингиздаёқ қўлга туширадиган ўлжангизнинг яхши бўлишига унча ишонмайман.

Улар ўрмондан чиқиб, учта деҳқон аёлни кўрдилар. Дон Кихот Тобосо йўлини синчиклаб қаради, деҳқон аёллардан бошқа ҳеч кимни кўрмай, Дульсинея ўз ҳамроҳлари билан шаҳардан йўлга чиққанига яроқбардорининг ишончи комил эканлигини Санчо Пансадан ҳаяжонли оҳангда сўради.

— Йўлга чиққан! — қичқирди у. — Нима деб алжираяпсиз, сеньор? Нима, марҳаматли жанобларининг кўзлари орқаларидами дейман? Ахир, уларнинг тушги қуёшдай ярқираб биз томон келаётганларини наҳотки кўрмайпсиз?

— Мен фақат учта эшакка миниб келаётган учта деҳқон аёлни кўряпман, холос, — жавоб берди дон Кихот.

— Э худо, бизни шайтон васвасасидан ўзинг асрагин! — деди Санчо. — Наҳотки, осмондан янгигина ёққан қордек оппоқ уч йўрға сиз марҳаматли жанобга эшак бўлиб кўринаётган бўлса? Э худойим, ўзинг кечиргин, бу гап рост бўладиган бўлса, соқолимни битталаб юлишга тайёрман.

— Сенга айтяпман-ку, дўстим Санчо, — эътироз билдирди дон Кихот, — қаршимиздан келаётган эркак ёки урғочи эшаклар. Бу, мен — дон Кихот, сен — Санчо Панса эканлигидай равшан.

— Жим бўлинг, сеньор, — деди Санчо, — бундай гапларни гапирманг, яхшиси кўзингизни каттароқ очинг-у, ўй-фикрингизни банд этган маъшуқангизни кутиб олишга шошилинг, у жуда яқинлашиб қолди, ахир.

Шу сўзлар билан Санчо деҳқон аёлларга яқинлашди, шошилиб улардан бирининг эшаги юганидан ушлади. Тиз чўкиб туриб, деди:

— О, гўзаллик қироличаси, маликаси, герцогиняси, ҳазрати олиялари сизга асир бўлган рицарга ўз марҳаматингизни кўрсатгайсиз. Гўзаллигингиздан кўзи қамашган бу шўрлик лол қолиб, худди мраммар ҳайкалдек қимирламай турибди. Мен унинг яроқ-

бардори Санчо Пансаман, унинг ўзи эса Ғамгин Қиёфа лақабли рицарь, яъни ламанчлик рицарь дон Кихотдир.

Дон Кихот ҳам Санчонинг ёнига тиз чўкди. У Санчо сеньора ва қиролича деб атаган аёлга хира тортган кўзларини катта очиб қаради. Эвоҳ! Унинг қаршида хунуқкина, кулча юзли, қаншари паст, оддийгина кийинган оддий бир деҳқон аёл турарди. Шўрлик рицарнинг ҳафсаласи пир бўлди, бироқ бир оғиз ҳам гапиришга журъат қилолмади. Аёл эса, оғзи очилиб, анграйганча бу ғалати одамлар ўзидан нимани талаб қилаётганини тушунмай, тиз чўкиб турган рицарь ва яроқбардорга тикилиб турарди. У фақат биргина нарсани, бу тентакларнинг йўлларини тўсиб турганларинигина фаҳмлаган эди, холос.

Шунинг учун ҳам у жаҳл билан қатъий қичқирди:

— Йўлни тўсманг, лаънатилар, бизни қўйиб юборинглар. Биз шошиляшмиз.

Санчо бунга жавобан:

— О, Тобосонинг маликаси ҳамда олий ҳукмдори! Наҳотки жаҳонгашта рицарлар орасида энг машҳурининг сиз марҳаматли хоним қаршида итоаткорлик билан тиз чўкиб турганини кўриб шафқат тўла қалбингиз юмшамаса? — деди.

Бу сўзларни эшитиб, бошқа бир деҳқон аёл деди:

— Бу жанобчаларнинг қишлоқи қизларни масҳара қилишини қаранг-а. Эҳтиёт бўлинг, сеньорлар! Бўлмаса бизнинг ҳазилимизнинг оқибаги ёмон бўлади! Ўз йўлларингга кетаверинглар-у, бизни тинч қўйинглар.

— Тур ўрнингдан, Санчо, — деди дон Кихот шунда. — Тақдир ҳали менинг бахтсизликларимга тўймаганини, фақир кўнглим учун барча хурсандчилик йўллари кесилганини кўриб турибман. О, қалблар орзуси, саховатли малика, — деб давом этди у биринчи деҳқон аёлга мурожаат қилиб, — сен ишқингда куйиб-ёнган ғамгин кўнглининг яккаю ягона қувончисан, шуни билгинки, мени таъқиб қилиб юрувчи ёвуз сеҳрларнинг иродаси билан кўзларим қоп-қора парда билан қопланди, уни ваҳимали туман қуршаб олди, ҳуснда тенги йўқ жамолингни кўриш ўрнига бир камбағал деҳқон аёлнинг юзини кўриб турибман. Шундай бўлса ҳам, ёлвораман, менга мулойим ҳамда ошиқона бир қиё боқ. Қара: қаршингда бўйнимни эгиб, тиз чўкиб турибман. Наҳотки менинг чексиз ҳамда итоаткорона садоқатим билан муҳаббатимга ишонмайсан?

— Бу гапларни катта бувангизга айтинг! — қичқирди деҳқон аёл. — Бунақа хушомадингизга кўзим учиб тургани йўқ! Яхшиликча айтяпман: жўнанг, йўлни тўсманглар.

Санчо четга чиқиб, деҳқон аёлга йўл берди ва ўз нияти муваффақият билан тугалланганидан хурсанд бўлди. Сеҳрланган Дульсинея ўз «тулпор»ини кучининг борича калтак билан уриб дала бўйлаб ҳайдаб кетди. Бироқ эшак оғриқнинг зўридан шаталоқ ота бошлади ва эгасини ерга қулатди. Буни кўриб, дон Кихот уни турғизиб қўйгани отилди, Санчо эса эшакни тутиб, эгарини ростлай бошлади. Айил тортилиб бўлингач, идальгомиз

ўз маликасини қўлида кўтариб, эшакка ўтқизмоқчи бўлган эди, бироқ сеньора уни бу ишдан хориж қилди: ўрнидан тургач; югуриб келиб, эшакнинг сағрисига қўлини қўйиб, лочиндек эпчиллик билан эшакка ирғиб миниб олди. Шунда Санчо:

— Авлиё Роке номи билан қасам ичаманки, бекамиз шунқордан ҳам чаққон экан. У энг чаққон кордуанликни ёки мексикаликни ҳам чавандозликка ўргата олади! Бир сакрашда эгарнинг орқа қошидан учиб ўтиб миниб олди, энди бўлса ўз йўрғасини худди зебрани ҳайдагандай ҳайдаб кетяпти, канизлари ҳам ундан ортда қолмаётирлар. Уларнинг шамолдан ҳам тез елиб бораётганликларини қаранг-а.

Санчо тўғри гапирган эди, чунки Дульсинеянинг эгарга сакраб минганини кўрган икки деҳқон аёл ҳам жон-жаҳдлари билан унинг кетидан эшакларини йўрғалатиб кетдилар.

Дон Кихот уларни кўзлари билан кузатиб қолди, уларнинг қораси ўчгач, Санчога мурожаат қилиб деди:

— Буни қара-я, Санчо, сеҳргарларнинг макри ҳамда душманлигининг оқибати қаергача бориб етаркан: улар мени маъшукамнинг рухсорини бутун гўзаллиги латофати билан кўриш қувончидан маҳрум қилишди. Дарҳақиқат, мен оламдаги барча бахтсизликларга намуна бўлиш учун хизмат қилишга, ёвуз тақдирнинг ўтқир ўқларига нишон бўлиш учун яратилган эканман. Санчо, бу хоинлар менинг Дульсинеяни сеҳрлаш билан қаноатланишмабди, — йўқ, унга яна кўпол деҳқон аёл киёфасини бериш ҳам зарур экан. У ҳатто олий мартабали сеньораларга хос бўлган муаттар ҳид таратишдан ҳам маҳрум бўлибди. Чунки, тўғриси айтганда, мен йўрғасига миндириб қўяй деб яқинлашганимда, ундан ниҳоятда бадбўй саримсоқ ҳиди димоғимга уриб, бўғилиб ўлишимга оз қолди.

— Нақадар аблаҳ одамлар! — хитоб қилди Санчо. — Эҳ, шум ният, маккор сеҳргарлар, томоғингиздан гиппа бўғиб, ҳаммангизни балиқлардай ипга терса. Оҳ ярамаслар! Хўжайинимдан нақадар заҳарханда кулдиларинг! Сеньорамнинг гавҳардай тиниқ кўзларини мози, соф олтиндай сочларини сариқ новвоснинг думи қилиб кўрсатдиларинг жанобимнинг кўзига! Унинг гўзал рухсорини ҳам ўзгартирдингиз, бироқ бу ҳам сизга озлик қилибди. Ундан таралиб турадиган муаттар бўйларни бадбўй саримсоқпиез ҳидига айлантирибсиз. Шундай бўлса-да, онг ичаманки, қаршимизда оламдаги энг сулув қиз турган эди.

— Сенга ишонаман, дўстим, — деди дон Кихот, — чунки табиат Дульсинеяга беқиёс ҳусн бахш этган. Аммо, Санчо, менга шуни айт-чи, унинг йўрғасида оддий эгармиди ё суянчиқли эгармиди?

— Йўғ-е, — деди Санчо, — бу калта узангили, нархи ярим подшоликка тенг зарҳал ёпқичли сафар эгари эди.

— Мен шуларни ҳам кўрмабман! — деди алам билан дон Кихот. — Минг бора такрор-такрор айтаманки, Санчо, мен бандаларнинг энг бахтсизиман.

Алдоқчи Санчо эса ўз хўжайинининг бу бемаъни сўзларини

эшитиб, уни усталик билан лақиллатгани учун кулгидан ўзини аранг тийиб турарди. Ниҳоят, улар бир оз тинчланишгач, ўз йўрғаларига миниб, Сарагосса томон йўлга тушдилар. Дон Кихот бу ажойиб шаҳарда ҳар йили ўтказиладиган тантанали байрамларда қатнашиш ниятида эди. Бироқ кўз кўрмаган, қулоқ эшитмаган кўпгина саргузаштлар йўловчиларимизнинг у ерга етиб боришларига монелик қилганини китобхон пастроқда ўқиб билди.

### XXXVIII БОБ

#### ДОН КИХОТНИНГ ЖАСУР РИЦАРЬ БИЛАН ҒАЛАТИ УЧРАШУВИ ВА ИККИ ЯРОҚБАРДОРНИНГ ШИРИН СУҲБАТИ

Чуқур ўйга ботган дон Кихот гўзал сеньора Дульсинеяни хунук бир деҳқон аёлга айлантириб қўйган сеҳргарларнинг ёвуз ҳазили ҳақида хаёл суриб борарди. У қандай қилиб ўз маъшуқасини асл қиёфасига келтириш ҳақида астойдил бош қотирарди. У ўз ўйларига шу қадар берилиб кетдики, Росинантнинг жилловини қўйиб юборганини ҳам сезмади, от ўзининг эркинлигини сезиб, ҳар қадамда тўхтаб, кўм-кўк ўтдан чимдирди. Санчо хўжайинининг бундай ноумидликка тушганини кўраркан, унга бир оз далда бермоқчи бўлиб, шундай деди:

— Сеньор, ғам-қайғу жониворлар учун эмас, инсонлар учун яратилган, бироқ кишилар ғамга ҳаддан ташқари берилиб кетсалар, улар ҳам ҳайвонга айланадилар. Ўзингизни қўлга олинг, марҳаматли жаноб, руҳингиз тушмасин, эс-ҳушингизни йиғинг, жаҳонгашта рицарларга муносиб равишда бардам бўлинг. Бу нима деган гап! Нега шунчалик ғам чекиш? Менга деса оламдаги барча Дульсинеяларни жин урсин; дунёдаги ҳамма сеҳр-жодудан битта жаҳонгашта рицарнинг саломатлиги қимматроқ.

— Жим бўл, Санчо,— унинг гапини қаҳр билан бўлди дон Кихот,— сенга айтяпман, жим бўл, сеҳрланган гўзал сеньорамиз ҳақида бундай гапирма: унинг бошига тушган мусибатларга фақат мен айбдор. Мен ўз қаҳрамонликларим билан ёвуз душманнинг қудратли сеҳргарнинг қалбида ҳасад уйғотганим учун унинг бошига шундай бахтсизликлар тушди.

— Мен ҳам шунини айтяпман-да,— жавоб берди Санчо,— кимки унинг илгари қандайлиги ҳамда кейин қандай қиёфага кириб қолганини билса, юраги ағдар-тўнтар бўлиб кетади.

— Сенга-ку унчалик эмас-а, Санчо. Сен уни бутун ҳусну малоҳати билан кўрдинг-ку, ёвуз афсунлар сенга таъсир қилмади, кўзларинг туманлашмади, унинг чиройи сендан яширинмади. Сеҳргарнинг бутун кучи фақат менга қаратилган эди. Қулоқ сол, Санчо. Унинг кўзлари гавҳардай тиниқ, деганинг эсимда. Бундай кўзлар аёлларда эмас, балки балиқларда бўлади. Менимча, Дульсинеянинг кўзлари икки кўм-кўк зумрадга, қошлари эса соя ташлаб турган иккита пештоққа ўхшаса керак. Гавҳар эса

албатта тишлари. Шундай, Санчо. Сен, эҳтимол, адашиб унинг кўзларини тиши деб ўйлаган бўлсанг керак.

— Шундай бўлиши ҳам мумкин,— жавоб берди Санчо.— Унинг хунуклиги сизни қандай ҳайратда қолдирган бўлса, гўзаллиги мени ҳам шундай ҳайратда қолдирди-да. Буни қўя турайлик. Виласизми, марҳаматли жанобим, ҳаммадан ҳам нима мени кўпроқ ташвишга соляпти? Сиз биронта девни ё рицарни енгиб, унга сеньора Дульсинея ҳузурига бор деб буюрдингиз, дейлик. Бу шўрлик дев ёки енгилган бахтсиз рицарь қандай қилиб уни қидириб топади? Гўё маъна ҳозир унинг Тобосо кўчаларида тентаклардай сандироқлаб, сеньора Дульсинеяни ахтариб юрганини яққол кўриб тургандайман. У билан кўчанинг қоқ ўртасида бетма-бет рўпара келиб қолганида ҳам, барибир уни танимайди.

— Санчо, эҳтимол, сеҳр-жоду мен енгган дев ҳамда рицарларга таъсир этмас,— жавоб берди дон Кихот.— Мана сенга таъсир этмади-ку, сеньора Дульсинеяни бутун гўзаллиги билан кўра олдинг-ку ахир. Буни амалда синаб кўриш қийин эмас: дастлаб енгган рицарларимни Тобосога юбораман ҳамда қайтиб, у ерда нималар кўрганини айтиб беришини буюраман. Ушанда бутун ҳақиқатни биламиз-қўямиз.

— Сиз буни яхши ўйлаб топдингиз, сеньор,— деди Санчо.— Бундай ҳийла билан зарур бўлган ҳамма нарсани билиб оламиз. Агар сеньора Дульсинеянинг асл қиёфаси фақат сиз марҳаматли жанобгагина кўринмаса, унда кулфат унинг бошига эмас, фақат сизнинг бошингизга тушган бўлади. Ишқилиб, у соғ-саломат бўлса бас, биз бўлсак яна бирорта саргузашт ахтариб, бир йўлини топармиз. Қолган ҳамма нарсани вақтга ҳавола қиламиз, у — бизнинг дардимиздан ҳам оғирроқ дардларни даволовчи табиб.

Шу кўйи суҳбатлашганча рицарь билан яроқбардор йўлда давом этдилар. Ниҳоят, вақт ярим кечадан оғанда Санчо озгина мизғиб олмоқчилигини айтди. Йўловчилар уловларидан тушдилар. Санчо эшагининг эгарини олиб, ўтлоққа қўйиб юборди. Росинантнинг эгарини олмади. Дон Кихот унга сафар пайтида ва очиқ ҳавода тунаганларида Росинантнинг эгарини олиб қўйишни қатъиян ман қилган эди. Ҳаммага маълумки, юганини ечиб, эгарнинг қошига илиб қўйиш жаҳонгашта рицарларга одат бўлиб қолган, бироқ эгарни олишдан эса худо сақласин! Санчо худди шундай қилиб, Росинантни эшак билан бирга ўтлагани қўйиб юборди. Ҳар иккала ҳайвон ўртасида ўзларига хос қалин ва ягона дўстлик пайдо бўлган эди. От билан эшак бирга бўлишлари биланоқ бир-бирини ялай бошлар, сўнгра чарчаган ва мамнун бўлган Росинант бошини эшакнинг бўйнига қўйиб, ўйчан ҳолда ерга тикилиб, токи қоринлари очмагунича шу алфозда бир неча соатлаб туришаверарди. Улар одамлар орасида ҳам камдан-кам учрайдиган даражада қалин дўст эдилар. Китобхон муаллиф одамларни ҳайвонлар билан таққослаётгани учун хафа бўлмасин, чунки бунинг хафа бўладиган жойи йўқ.

Одамлар ҳайвонлардан кўпгина фойдали сабоқларни олганлар: масала, итлар одамларни миннатдорчилик билдиришга, чумолилар эҳтиёткорликка, филлар одоблиликка, отлар садоқатликка ўргатганлар ва ҳоказолар.

Ўз қахрамонларимизга қайтайлик, Санчо кечки овқатни еб, улкан пўкак дарахт тагига чўзилди ва шу заҳотиёқ хуррак ота бошлади, дон Кихот эса азм туп-эман дарахти тагига чўзилди, кўзи уйқуга бориб-бормай, орқа томонда қандайдир шовқинни эшитди. У ўрнидан ирғиб туриб, шовқин қаёқдан келаётганини билиш мақсадида тикилиб қараб, диққат билан қулоқ сола бошлади. Шу вақт у икки отлиқни кўрди. Улардан бири отдан сакраб тушди-да, шеригига деди:

— Отдан туш, дўстим, отларнинг сувлигини чиқар; менимча бу ердан уларга ширали ўт топилади, менга эса — муҳаббатнинг ширин хаёлларини суриш учун сукунат ҳамда танҳолик даркор.

Шундай қилиб номаълум киши ўзини шартта кўкат устига ташладики, қурол-аслаҳалари жаранглаб кетди. Дон Кихот бу номаълум кишининг жаҳонгашта рицарь эканлигини дарҳол пайқади. У тош қотиб ухлаб ётган Санчога яқинлашиб, қўлидан тортди, уни зўрға тебратди, кейин шивирлаб деди:

— Биродар Санчо, мана саргузашт ҳам бошланди!

— Илоҳим яхши саргузашт бўлсин! — деди Санчо. — Қани ўша саргузашт?

— Бошингни буриб қара, — деди дон Кихот, — ҳов анави ерда кўкат устида бир жаҳонгашта рицарь ётибди. Билишимча, у унча хурсанд эмас. У нимадандир хафа бўлиб, отидан қандай сакраб тушганини ҳамда ерга ётиб олганини кўрдим.

— Нега энди марҳаматли жанобларига ҳозир бирор саргузашт содир бўладигандек туюлади? — сўради Санчо.

— Саргузашт содир бўляпти демоқчи эмасман, — деди дон Кихот. — Йўқ, бу фақат унинг бошланиши, чунки барча саргузаштлар шундай бошланади. Қулоқ сол, у удни ё виолани\* созляпти, худди ашула айтишга ҳозирланаётгандай томоғини қириб, тупураётганга ўхшайди.

— Гапингиз ҳақ рост, — жавоб берди Санчо, — бу ошиқ рицарнинг ўзгинаси.

— Жаҳонгашта рицарнинг ошиқ бўлмай иложи йўқ, — деди дон Кихот. — Қани, бир қулоқ солайлик-чи, унинг ашуласидан кўнглида нима борлигини билиб оламиз.

Санчо ўз хўжайинига ҳали жавоб бермасданок номаълум киши ашула бошлаб юборди. У ўртамиёна куйларди. Шундай бўлса-да, дўстлар ашулани эътибор бериб эшитдилар.

## С О Н Е Т

Хоним, сиздан ўтинчим фақат:  
Хоҳишингиз айлангиз баён.

\* Виола — катта скрипкага ўхшаган қадимги музыка асбоби.



Бажаргумдир уни шу замон  
Ўтказмайин заррача фурсат.  
Е дилдаги аламни шу вақт  
Ичга ютиб, берайинми жон.  
Қолмасинми азоб ҳам пинҳон  
Амур\* уни етказар албат.  
Дилда ҳарир каби ҳисларим,  
Олмос сабрим ҳаммаси сизга.  
Топширайин қўлларингизга  
Ғусса тўла юрак дафтарин.  
Истагингиз ёзингиз унга,  
То ўлгунча асрайин барин.

Номаълум рицарь ашуласини тугатиб, оҳ урди. Унинг охи қалбининг энг ичкарисидан узилиб чиққандай бўлди. Бирпасдан сўнг у дардли ва ғамгин овоз билан гап бошлади:

— О, дунёдаги барча хотинларнинг энг гўзали ҳамда энг шафқатсизи! Наҳотки, сен — Касильдея Вандальская, ўзингга асир бўлган рицарнинг абадий дарбадарликда ҳамда оғир, мушкул заҳматлар остида ҳалок бўлишига йўл қўясан? Наҳотки, менинг буйруғим билан ҳамма рицарлар: Наварра, Леон, Тартезия, Кастилия ва ниҳоят ламанч рицарлари сени оламдаги энг гўзал хоним деб таниганлари сенга етарли эмас?

— Бу ёлғон!— деб қичқирди дон Кихот.— Мен ламанчлик рицарман, буни ҳеч қачон тан олган эмасман, тан олмайман ҳам, чунки бу менинг маъшуқам шаънига доғ туширади. Ана, кўряпсанми, Санчо, бу рицарь алаҳляпти. Майли, давомини ҳам эшитайлик, эҳтимол у янада равшанроқ гапирар.

— Албатта, гапирди,— деди Санчо,— афтидан бир ойгача тинмай қўшиқ айтадиган кўринади.

Бироқ иш Санчо ўйлагандан бошқачароқ бўлиб чиқди. Номаълум рицарь яқинроқда кимдир гапирётганини эшитиб, нолаю илтижоларини тўхтатиб, ўрнидан турди-да, хушмуомалалик билан деди:

— Ким бор у ерда? Кимсиз? Хушчақчақ одамларданмисиз ё ғам чекувчилардан?

— Ғам чекувчиларданмиз,— жавоб берди дон Кихот.

— Ундай бўлса менга яқинроқ келинглар,— деди номаълум рицарь,— шуни билингики, сиз қайғу билан ғамнинг тимсоли бўлган бир кимсага яқинлашмоқдасиз.

Бундай дўстона ва назокатли жавобни эшитган дон Кихот яқинроқ келди, Санчо унинг орқасидан юрди. Нола чекаётган рицарь дон Кихотнинг қўлидан ушлаб, деди:

— Мана бу ёққа ўтиринг, сеньор рицарь, чунки мен сизнинг жаҳонгашта рицарлар орденига мансуб эканингизни фаҳмлаб турибман. Сизни шу ерда танҳолик ҳамда беғубор осмон ҳамроҳ бўлиб турган жойда учратганимдан кўриниб турибди бу. Фа-

---

\* А м у р — муҳаббат худоси.

қат жаҳонгашта рицаргина тунагани мана шундай кимсасиз жойни танлайди.

Дон Кихот бунга жавобан деди:

— Гапингиз тўғри, ҳақиқатан мен шу орденнинг рицариман; кўнглимга, худди ўз бошпанасидек, ғам-қайғу ҳамда кулфат уя қуриб олган, бироқ шунга қарамай, қалбимда бошқаларнинг ғамига ҳамдард бўлиш учқуни ҳам сўнмаган. Сизнинг азоб-уқубатларингиз ҳозиргина айтган ашулангизда нолаю илтижо қилаётганингиз шафқатсиз малакнинг муҳаббати туфайли туғилган деб билдим.

Эрталаб бир-бирлари билан муштлашишларини хаёлларига ҳам келтирмай, ёнма-ён ўтириб, шу алфозда дўстона суҳбатлашардилар.

— Энди менга айтинг-чи, сеньор рицарь,— деди номаълум рицарь дон Кихотга,— сиз ошиқ эмасмисиз?

— О, албатта! Бахтга қарши ошиқман,— жавоб берди дон Кихот.— Дарвоқе, ўзимизга муносиб хонимни севиб, муҳаббат азобларини кулфат деб билмай, балки лаззат деб ҳурматламоғимиз лозим.

— Агар ўша хонимларимизнинг бениҳоя нафратлари,— деди номаълум рицарь,— ақл ҳам фикрларимизни хиралаштирмаганда эди, сиз тамомила ҳақ эдингиз.

— Менинг маъшуқам ҳеч қачон менга нафрат билан қарамаган,— эътироз билдирди дон Кихот.

— Албатта, нафрат билан қарамаган,— тасдиқлади яқингинада турган Санчо,— чунки бекам қўйдаи ювош, момикдай майин.

— Бу сизнинг яроқбардорингизми?— сўради номаълум рицарь.

— Ҳа,— жавоб берди дон Кихот.

— Мен ўз хўжайини гапираётган вақтда,— деди номаълум рицарь,— унинг гапига суқилишга журъат эта оладиган яроқбардорни ҳеч қачон кўрмаганман. Мана, менинг яроқбардорим: бўйи отасиникидан паст бўлмаса-да, бироқ дадил айтишим мумкинки, у умрида мен бор жойда ҳеч қачон гапга аралашмаган.

— Мен гапиравераман,— деб эътироз билдирди Санчо,— бундақалар олдида гапиришдан қўрқмайман... Хўп, майли, гапимни охирига етказмай қўя қолай. Жим туришим ҳам мумкин.

Шунда номаълум рицарнинг яроқбардори Санчонинг қўлидан ушлаб, деди:

— Чекарроққа чиқайлик, дўстим, кўнглимиздагиларни холироқ жойда гаплашайлик, қўявер, сеньорлар — хўжайинларимиз бир-бирларига ўз муҳаббатлари ҳақида сўзлайверишсин. Эҳтимол, улар саҳаргача гаплашса ҳам гаплари тамом бўлмас.

— Бош устига,— жавоб берди Санчо,— сиз марҳаматли жанобимга ўзимнинг кимлигимни гапириб бераман, ўшанда мени баъзи маҳмадона яроқбардорлар билан тенглаштириш мумкин эмаслигини билиб оласиз.

Улар чеккароққа чиқиб, сершоҳ эман тагига ўтирдилар, уларнинг ўртасида қизғин суҳбат бошланди.

— Жаҳонгашта рицарларнинг яроқбардорлари бўлган бизлар энгил ҳаёт кечираётганимиз йўқ, — деди номаълум рицарнинг яроқбардори. — Мана, тер тўкиб ҳалол нон еймиз, бу эса тангрининг ота-боболаримиз бошига солган тавқи-лаънатлардан бири.

— Хўрлик-зорлик тортиб еяётган бир бурда нонни деб айтишингиз ҳам мумкин эди, — жавоб берди Санчо, — чунки жаҳонгашта рицарларнинг иссиқ ҳам совуқдан азоб тортаётган яроқбардорларидан бахтсизроқ яна ким бор? Бироқ шу нон доимо бўлса гўрга эди-я, кўпинча кун бўйи қорнингни ел билан қаппайтириб юраверасан киши.

— Бироқ бизда инъом олиш умиди бор-ку! — эътироз билдирди номаълум рицарнинг яроқбардори. — Бунинг ҳаммасига чидаш ҳамда сабр-тоқат қилиш мумкин, зотан, агар яроқбардор хизмат қилаётган жаҳонгашта рицарнинг озгина омади юришиб қолса, унинг хизматкори бирорта ажойиб орол ёки кўнгилдагидек графликни инъом қилиб олишига дадил ишонавериши мумкин.

— Ўз хўжайинимга, мен бир оролга ҳукмронлик қилсам ҳам бўлаверади, деб айтганман, — деди Санчо, — хўжайиним эса шундай саховатли ҳамда сахийки, орол беришни менга бир неча бор ваъда қилган.

— Агар хизматларим эвазига, — деди рицарь Леса (янги рицарни шундай деб атаймиз)нинг яроқбардори, — менга кононик\* рутбасини беришса ҳам розиман. Хўжайиним менга энг яхши черков қавмини ваъда қилган.

— Демак, — деди Санчо, — муҳтарам жанобимнинг хўжайинлари ҳалол яроқбардорига ана шундай инъомларни ваъда қилган бўлса, у киши диний орден рицарларидан эканлар-да. Менинг хўжайиним — дунёвий одам. Тўғри, ақлли кишилар уни архиепископ бўлишга кўндиришга уриниб кўрдилар. Яхшики у кўнмади, мен бўлсам диний унвон ёқиб қолмаса эди деб даҳшатдан қалтираб турдим, чунки диний лавозимларни бажо келтиришга ўзимни лаёқатсиз деб биламан.

— Ҳақиқатан, сиз адашяпсиз, марҳаматли жаноб, — эътироз билдирди иккинчи яроқбардор. — Диний лавозим баъзи ороллардан сердаромадроқ бўлиши мумкин, негаки ҳамма ороллар ҳам бирдай эмас: улар орасида қашшоқ ҳамда кишини диққат қилиб юборадиганлари ҳам бор. Бунинг устига, энг ҳосилдор ҳамда бой ороллар ҳам уларни бошқараётган бахтсиз кишининг бошига оғир кулфат юки ҳамда ташвиш солади. Мен ўйлайманки, яроқбардорликдан дармони қуриган сиз билан менга ўхшаган одамлар бу ниятлардан воз кечишимиз фойдалироқ. Яхшиси хў-

---

\* Католиклар ибодатхонасида черков уставига бўйсунган, лекин роҳибликка қасамёд қилмаган руҳоний.

жайинларимиздан ҳеч қандай орол, графлик ҳамда диний лавозимларни кутмай, келган жойимизга қайтиб, дурустроқ иш — масалан, овчилик ёки балиқ тутиш билан машғул бўлганимиз маъқулроқ; ҳар қандай яроқбардорда ҳам бир-икки този ит билан қармоқ топилади; ўз қишлоғида у шуғулланадиган бирор иш топилиб қолади, албатта.

— Буларнинг ҳаммаси бор менда,— жавоб берди Санчо,— фақат отим йўқ; бироқ хўжайинимнинг отидан кўра яхшироқ эшагим бор. Тангри яқинлашиб келаётган қайитдан бенасиб қилса қилсинки, устига тўрт пақир арпа берганда ҳам эшагимни унинг отига алишмайман. Агар эшагимнинг фазилатларини санай бошласам, сиз марҳаматли жаноб мени ҳазиллашяпти деб ўйлайсиз. Тозилар ҳам бемалол топилади, ахир қишлоғимизда уларнинг таги мўл, бировнинг ҳисобига ов қилишнинг эса гашти ўзгача бўлади.

— Онт ичиб айтаманки, сеньор яроқбардор,— деб жавоб қилди Санчога унинг суҳбатдоши,— мен бу бемаъни рицарлик хизматларини ташлаб, ўз қишлоғимга қайтишга аҳд қилдим,— учта бола бор, ҳаммаси ҳам шарқ гавҳарларига ўхшайди.

— Менда эса иккита,— деди Санчо,— шундай ажойиб болаларки, уларни, айниқса қизимни саройга — папанинг ҳузурига олиб боришга ҳам тортинмайди киши. Онасининг қаршилигига қарамай, худо хоҳласа уни графиня қилмоқчиман.

— Графиня бўлажак сеньоранинг ёши нечада?— сўради Лесанинг яроқбардори.

— Ўн бешга бориб қолди, аммо бўйи-баста найза тенги, мусаффо баҳор тонгидек сўлим, куч-қувватда баркамол. Мен парвардигори оламдан тезроқ бола-чақам билан дийдор кўришиш, кечирилмас гуноҳдан қутқаришни ёки хавфли яроқбардорлик хизмати (бу ҳам ўшанинг ўзи) дан халос этишни илтижо қиламан. Мен бу ҳунарни бир марта қилиб кўргандим, иккинчи марта қилишга истагим йўқ эди. Мени ўтган сафар кимсасиз Сиерра Морена дарасидан топиб олганим олтин тангалар тўла ҳамён йўлдан оздирди. Ушандан бери шайтон мени олтин тангалар билан ҳавасимни кўзгайди. Олтинлар кўз олдимдан сира нари кетмайди, ҳар дамда бир халта олтин топиб олиб шаҳзодалардай кун кечириётганга ўхшайман. Шу ҳақда ўйларканман, ақлдан озган хўжайинимнинг қўлида хизмат қилаётиб бошимга тушган азоб-уқубатларга қийналмай бардош бераман. Чунки, виждонан айтганда, хўжайиним рицардан кўра тентакка кўпроқ ўхшаб кетади.

— Шунинг учун ҳам,— деди иккинчи яроқбардор.— «Менинг нафсим балодур, ёнар ўтга солодур», деганлар. Гап тентаклар ҳақида борадиган бўлса, мен сизга айтсам, оламда менинг хўжайинимдан аҳмоқроқ одамни топиб бўлмайди. У мурувватидан эшак ҳаром ўладиган қабилидаги одамлардан. Ўзингиз ўйлаб кўринг, бир рицарнинг ақлини киргизгунча ўзи ақлдан озди ҳамда оқибати аввало ўзи учун ёмон бўладиган нарсани ахтариб кетди.

— Эҳтимол, у биронтасини севиб қолгандир? — сўради Санчо.

— Ҳа, — жавоб берди номаълум рицарнинг хизматкори, — у Касильдеа Вандальская деган хонимни севади, бунақа феъли тез сенъорани оламни изласангиз тополмайсиз. Ҳар қалай, бу билан уни қўрқитолмайсиз. Унинг мияси ҳар хил ният ҳамда макрга тўлиб ётибди. Сиз тезда бунга ишонч қиласиз.

— Ҳар тўқиснинг бир айби бор, — деди Санчо. — Бошқаларникида «тош қизиги» гоҳ-гоҳ бўлса, меникида ҳар куни. Доноликдан тентаклик кўпроқ бўларкан. Бебахт дўстлар учрашса мушкул осонлашар қабилидаги мақол ҳақ бўлса, демак сиз марҳаматли жаноб билан суҳбат қурганимдан мамнунман, зотан, сиз хизматини қилаётган рицарь ҳам менинг хўжайинимдай тентак эканлиги мени овутади.

— У тентак бўлса ҳам, жуда довжорак, — эътироз билдирди шериги, — тентаклик ҳамда ботирликдан кўра унда айёрлик кўпроқ.

— Лекин менинг хўжайиним унақа эмас, — жавоб берди Санчо, — унда ҳийла-мақрдан нишона ҳам йўқ. У кўнглида кири йўқ одам, ҳеч кимга ёмонликни раво кўрмайди, ҳаммага яхшилик қилади. Унда заррача ҳам айёрлик йўқ: ҳар қандай ёш бола ҳам қоқ пешин пайтида ҳозир кечаси деб уни ишонтира олади. Мана шу соддадиллиги учун уни чин кўнглимдан яхши кўраман, ҳар қандай телбаликларига қарамай, уни ташлаб кетолмайман.

— Шундай бўлса ҳам, биродарим сенъор, — эътироз билдирди, рицарь Лесанинг хизматкори, — бир кўр иккинчисини етакласа, икковининг ҳам чуқурга йиқилиш хавфи туғилади. Саргузашт ахтарувчилар баъзан кўнгилсиз, ҳатто хавfli саргузаштларга ҳам дуч келиб қолади. Шунинг учун ҳам рицарларимизни ташлаб уйга қайтганимиз маъқул эмасмикин?

Суҳбат давомиди Санчо дам ўтмай тупуриб ўтирди. Шериги буни сезиб, деди:

— Гапни ниҳоятда кўп гапирганимиздан тилимиз танглайимизга ёпишиб қолганга ўхшайди дейман. Андак сабр қилинг, биродар: эгаримнинг қошига бундай пайтларда асқотадиган дори илиб қўйибман.

У ўрнидан турди ва ҳаял ўтмай каттагина бир мешда вино билан узунлиги бир газ келадиган пирог олиб қайтди. Пиронинг хамирига шундай каттакон куён ўраб пиширилибдики, Санчо уни ушлаб кўриб, бу куён эмас, эчки деб ўйлади. Бундай тўкин зиёфатни кўриб, у сўради:

— Сенъор, шунақа таомларни доим олиб юрасизми?

— Сиз нима деб ўйловдингиз? — жавоб берди у. — Мен аллақандай паст яроқбардорларга ўхшайманми? Менинг отимга юкланган озиқ-овқатларни биронта генерал ҳам сафарда олиб юролмайди.

Санчо мезбонни қистатмай, муштдай-муштдай бўлакларни оғзига солиб, шоша-пиша ютинаркан, деди:

— Бу эртақлардагидек антиқа зиёфатингиздан кўриниб ту-

рибдики, сиз, марҳаматли жаноб, ҳалол, садоқатли яроқбардор экансиз. Мен бахтсизнинг кўрган куним қурсин: халтамда бори-йўғи бир урганда ҳар қанақа девнинг ҳам калласини ёриб юборадиган бир бўлак қаттиқ пишлоқ, озгина ёнғоқ ҳамда бир бойлам ширин пўстлоқ бор холос. Чунки менинг хўжайиним жаҳонгашта рицарлар қуруқ мева ҳамда далада ўсадиган гиёҳдан бошқа нарса емасликлари керак деган қоидага амал қилади.

— Номусимни ўртага қўйиб онт ичаман, биродар,— эътироз билдирди бошқа яроқбардор,— менинг ошқозоним ёнғоқ, ёввойи нок ва ўрмондаги ўсимлик томирларига мувофиқлашмаган. Хўжайинларимизнинг кўнглига нима маъқул келиб, қандай қоидаларга амал қилишса қилишаверсин, халтамда доимо яхна гўшт, эгаримда вино тўла меш илиғлиқ бўлади. Мен уни шу қадар яхши кўраманки, баъзан бағримга ҳам босиб оламан.

Шундай сўзлар билан у мешни Санчонинг қўлига берди, у эса мешнинг оғзини оғзига қўйганича, юлдузларга боқиб чорак соатча ётди. Ичиб бўлган, бошини ён томонга қийшайтириб, оғир хўрсинган ҳолда деди:

— Жуда ажойиб вино экан-да, биродар. Азиз авлиёлар ҳурмати, менга айтинг-чи, сеньор, винонгиз Сьюдад Реаль вносидан эмасми?

— Сиз винонинг пири экансиз!— хитоб қилди униси.— Бу ҳақиқатан ўша ернинг вноси, ўзиям жуда кўп йиллик.

— Хўш, вино масаласида,— деди Санчо,— ҳеч қачон адашмайман. Шуни бир тасаввур қилиб кўринг-а, сеньор яроқбардор, мен вино билишда шундай қобилиятга эгаманки, фақат ҳидласам кифоя, ўша заҳотиёқ қайси вилоятнинг вноси, нави қанақа, мазаси қандай, неча йиллик эканлигини айтиб бераман. Ҳар ҳолда, ажабланидиган жойи йўқ, менинг авлодимдан винони билувчи икки киши бўлган, Ламанчада кўп йиллар мобайнида бунақа одамлар бўлмаган. Қулоқ солинг, бир куни улар билан шундай ҳодиса содир бўлибди: кунлардан бир куни уларга бочкадан татиб кўргани вино қуйиб беришибди ҳамда унинг фазилати ҳам нуқсонини айтиб беришларини илтимос қилибдилар. Биринчиси винони тилининг учи билан татибди, иккинчиси фақат ҳидлаб кўрибди, холос. Биринчиси винодан темирнинг мазаси келяпти деса, иккинчиси чармнинг ҳиди анқиб турипти дебди. Хўжайин эса бочка топ-тоза, биринчи марта вино солинган бўлса ундан қанақасига темир ёки чарм ҳиди келиши мумкин дебди. Бироқ ҳар иккала машҳур вино танувчи ўз сўзида қаттиқ туришибди. Орадан бир оз вақт ўтгач, вино сотилиб, бочкани бўшатишганда унинг ичидан чарм ипли калит чиқибди. Энди тушунарсизми, марҳаматли жаноб, бундай тоифадаги одам вино ҳақида бирон нарса билади.

— Нима ҳам дердим,— жавоб берди иккинчи яроқбардор,— шунинг учун ҳам биз ҳеч қандай саргузаштга аралашмаслигимиз керак деб ҳисоблайман. Узоқдаги думбадан яқиндаги ўпка яхши эмасми? Яхшиси ўз кулбамаизга қайтаверайлик, худо бераман деса, ўша ерда ҳам марҳаматини аямайди биздан.

— Мен ўз хўжайинимни Сарагоссагача кузатиб боришим керак,— деди Санчо,— ана ўша ерда нима қилишимизни ўйлаб кўрамиз.

Ниҳоят қадрдон яроқбардорларимиз шунчалик кўп гапириб, кўп ичишдики, оқибатда уйқу уларнинг тилини боғлаб қўйди. Тишлаган пироглари оғзиларида қолди, деярли бўшаган мешни кучоқлаганларича ухлаб қолишди. Энди буларни қўйиб, номаълум рицарь билан Ғамгин Қиёфа рицарь нималар ҳақида суҳбатлашганини китобхонга маълум қилиб ўтайлик.

### XXXIX БОБ

#### НОМАЪЛУМ РИЦАРЬ ВА УНИНГ ЯРОҚБАРДОРНИНГ АСЛИДА КИМЛАР ЭКАНЛИГИ АНИҚЛАНГАНИ

Номаълум рицарь дон Кихот билан узоқ суҳбатлашгандан сўнг ниҳоят шу нарсага иқрор бўлди:

— Сеньор рицарь, сизга маълум бўлсинки, фалакнинг гардиши биланми ё аниқроғи ўзимнинг дид-фаросатим биланми ҳусн бобида тенги йўқ Касильдея Вандальскаяни яхши кўриб қолдим. Шунинг учун ҳам тенги йўқ деб айтаётирманки, бўйчанликда ҳам, зотининг улуғлигида ҳам, ҳуснда ҳам ҳеч ким у билан тенглашолмайди. Менинг тошбағир, мағрур Касильдеям Геркулеснинг<sup>66</sup> ўғай онасидан менга кўпгина қаҳрамонликлар кўрсатишни амр қилди. Бир синовдан ғалаба билан ўтган пайтимда, бундан кейинги синов охиргиси, унда ҳам ғалабага эришсам ўшанда садоқатим учун мени тақдирлаяжагини айтди. Бироқ қаҳрамонликларим бир-бирига уланиб кетяпти, уларнинг ҳисобидан ҳам адашдим, синовларим қачон тамом бўлишини ҳам билмай қолдим. Бир куни у менга Севилья паҳлавони Хиральдани<sup>67</sup> яккама-якка жангга чақиритишни амр қилди. Бошқа сафар эса, рицарлардан кўра юк ташувчиларга муносиброқ иш — Гисандонинг<sup>68</sup> азамат тош буқаларини кўтариб, тарозуда тортишни буюрди. Ундан кейин эса Кабра<sup>69</sup> тоғидаги тубсиз жарликка ўзимни ташлашни, кейин у зимистон жарликда нималар кўрганимни сўзлаб беришни амр қилди. Мен барча қаҳрамонликларни ўринлатдим: Хиральдани ҳам енгдим, Гисандо буқаларини ҳам кўтардим, Кабра жарлигига ҳам ўзимни ташладим. Кўрдингизми? Буларнинг ҳаммаси у кишига озлик қиялпти. Яқинда у менга Испаниянинг ҳамма вилоятларини кезиб чиқиш ҳамда йўлимда учраган барча жаҳонгашта рицарларни ўзининг ҳусн бобида оламдаги аёллар орасида яккаю ягона эканини, менинг эса жасур ҳамда дунёда энг кетворган ошиқ рицарь эканимни тан олишга мажбур қилишимни топширди. Унинг истагини бажо келтириб, бутун Испанияни кезиб чиқдим, менга қаршилик кўрсатишга журъат қилган кўпгина рицарларни енгдим. Ҳаммасидан ҳам шуҳрат қозонган рицарь ламанчлик дон Кихотни яккама-якка жангда енгиб, унинг Дульсинеясидан менинг Касильдеям гўзал эканлигига уни

икрор бўлишига мажбур қилолганим билан фахрланаман. Менимча, биргина шу ғалабининг ўзи дунёдаги барча рицарлар устидан қозонилган ғалабага тенг келади, чунки мен сизга ҳикоя қилаётганим дон Кихот уларнинг ҳаммасини енгган, шундай экан, мен уни енгиманми, демак унга тегишли шон-шуҳрат, улуғворлик ҳам меники бўлади.

Ғанимларнинг шавкати бўлса қанча юқори,  
Ғолибининг ҳам шунчалик баланд бўлар виқори.

Дон Кихот номаълум рицарь ёлгон гапираётгани учун қичқириб, унинг гапини минг мартача бўлишга ҳозирланиб, ажабланиб қулоқ солди. Бироқ у сабр қилди; ёлгон гапираётганига суҳбатдошининг ўзи икрор бўлишини хоҳлади. Шунинг учун у хотиржамлик билан жавоб қайтарди:

— Эҳтимол марҳаматли зот сеньор рицарь, Испаниянинг, ҳатто бутун жаҳоннинг жаҳонгашта рицарларини енгандирсиз. Бу хусусда сиз билан тортишиб ўтирмайман. Лекин ламанчлик дон Кихотни енганлигинизга шубҳаланаман. Гарчанд, унга ўхшаш одамнинг топилиши амри маҳол бўлса-да, эҳтимол, сиз ўшанга ўхшаш бирор бошқа одамни енгган бўлсангиз керак.

— Қанақасига бошқа одамни! — қичқирди рицарь Леса. — Само ҳақи онт ичаманки, яккама-якка жангда худди дон Кихотнинг ўзи билан олишдим, уни енгдим ҳамда мендан шафқат сўрашга мажбур қилдим. Хоҳлайсизми, мен унинг қад-қомати ва туси қанақалигини тасвирлаб бераман. У — новча, ориқ ҳамда бесўнақай, қотма юзли, қирғийбурун; сочлари мош-гуруч, мўйлови қора, паства осилган одам. У рицарь Ғамгин Қиёфа номи билан жанг қилади, унинг яроқбардори Санчо Панса исмли деҳқон; биқинини қисиб юради. Остида Росинант номли от, ниҳоят унинг маъшуқаси бир вақтлар Альдонса Лоренсо деб аталган Тобосская Дульсинеядир. Башарти сиз ҳозиргача гапларимга ишонмаётган бўлсангиз, мана қиличим — у ишонмаслик тимсоли бўлсангиз ҳам ишонишга мажбур қила олади.

— Ўзингизни босинг, сеньор рицарь ва сўзларимга қулоқ солинг, — деди дон Кихот. — Даставвал, сиз гапираётган дон Кихот менинг энг яқин дўстим эканлигини билиб қўйинг. Биз шу қадар кадрдонмизки, у билан мен бир одамдаймиз. Сиз ўша рицарни шунчалик аниқ таърифладингизки, зотан ўшанинг худди ўзини енгганингизга ишонишим керак. Бироқ кўзларим билан қўлларим бунинг тамоман аксини айтиб турибди. Биронта душман сеҳргар бу шуҳрат қозонган рицарнинг қиёфасига кириб, унинг устидан ғалаба қозонишингизга ҳамда оламшумул шуҳратидан маҳрум қилишга имкон берган деб тахмин қилиш қолади, холос. Бир неча кун бурун улар бекорга гўзал Дульсинея Тобосскаянинг қиёфасини ўзгартириб, қўпол ҳамда бесўнақай деҳқон аёлга айлантирмаган. Улардан биронта дон Кихот қиёфасига кириб, унинг устидан ғалаба қозонишингизга имконият туғдиргани эҳтимолдан ҳоли эмас. Мабодо сўзларимга



ишонмасангиз, мана, қаршингизда дон Кихотнинг ўзи турибди. У буни қўлда қурол билан, қандай хоҳласангиз ўшандайига, пиёда ё отда жанг қилиб кўрсатиб қўяди.

Шундай дея у сакраб ўрнидан турди ва қиличига қўл узатди. Суҳбатдоши ҳам ўрнидан туриб, хотиржамлик билан жавоб берди:

— Яхши қарздор, сеньор дон Кихот, гаров қўйишдан ҳеч қачон қўрқмайди. У ким бўлишидан қатъи назар, сизнинг қиёфадошингизни енгган одам ўзингизни ҳам енгшдан умидвордир. Бироқ ҳозир тун, ўғри ҳам қароқчиларга ўхшаб қоронғида жанг қилиш рицарлар шаънига муносиб эмас. Шу сабабли тонг отишини кутайлик; токи кўрсатадиган жасоратимизга қуёш гувоҳ бўлсин. Бироқ менинг яккама-якка олишув олдидан зарурий шартим бор, мағлуб ғолибнинг иродасига, агар унда рицарнинг шаънини ерга урадиган ҳеч гап бўлмаса, бўйсунини керак.

— Шартингизни қабул қиламан,— деди дон Кихот.

Шундан сўнг иккови виноли меш олдида донг қотиб ухлаб ётган яроқбардорлари олдига жўнадилар. Рицарлар уларни уйғотиб, отларни ҳозирлашни буюрдилар, чунки саҳар пайтида улар ўртасида кўз кўриб қулоқ эшитмаган, қонли, даҳшатли жанг бўлади. Бу хабарни эшитиб, Санчо ташвишга тушди, номаълум рицарнинг яроқбардори ўз хўжайинининг қаҳрамонликлари ҳақида шунча гапирдики, у дон Кихотнинг ҳаёти учун чинакамига хавфсиради. Шундай бўлса-да, иккала яроқбардор бир оғиз ҳам гапирмай, бир-бири билан дўстлашиб, бирга ўтлаётган отлар томон кетдилар.

Йўлда рицар Лесанинг яроқбардори Санчога деди:

— Сизга шуни маълум қиламанки, биродар, бизда, Андалузияда рицарлар жанг қилаётганда уларнинг яроқбардорлари қўл қовуштириб, тек турадиган одат йўқ. Шуни билиб қўйингки, хўжайинларимиз яккама-якка жанг қилаётганда биз ҳам олишишимиз керак.

— Бу одат, сеньор яроқбардор,— жавоб берди Санчо,— фақат урушқоқларгагина ёқади, жаҳонгашта рицарларнинг яроқбардорларига эса асло алоқаси йўқ. Хўжайиним жаҳонгашта рицарлик қонун-қоидаларини ёддан билишига қарамай, бунга ўхшаш одатлар ҳақида лоақал бир марта ҳам гапирмаган. Хўп, бунинг ҳаммаси тўғри ҳам бўлсин; ўз хўжайинлари яккама-якка жанг қилаётган пайтда яроқбардор ҳам уришади деган қоида ҳақиқатан бор дейлик, барибир буни бажармасликни афзал кўраман. Мен яхшиси тинчликсевар яроқбардорларга солинадиган жаримани устамаси билан тўлашга розиман. Ишонаманки бу икки фунт шамнинг баҳосидан ҳам ошмайди, мен бу икки фунтни бажонидил бераман: у жароҳат боғланадиган титилган ип билан бинтга қараганда арзонроққа тушади. Мен ҳозирданоқ ўзимни пешонам ёрилгандай ҳис қилаётirman. Бундан ташқари, менинг қиличим йўқ, умрим бино бўлиб тақмаганман ҳам.

— Бунинг ҳам чорасини топамиз,— деди иккинчи яроқбар-

дор, — ўзим билан иккита бир хил қоп оливолганман; сиз биттасини, мен биттасини оламан, бир хил қурол билан уришаверамиз.

— Майли, бунисига розиман. Бунақа жангда ярадор ҳам бўлмайди. Биз бир-биримизнинг чангимизни қоқамиз, холос, — жавоб берди Санчо.

— Йўқ, жуда ҳам бунчали эмас, — эътироз билдирди униси. — Шамол қопларимизни учуриб кетмаслиги учун ичига олти донадан силлиққина тош соламиз. Ана шундагина бир-биримизни ҳаётимизга ҳеч қандай таҳдид солмайдиган ҳамда бу кўнгилли учрашув узоқ эсда қоладиган қилиб тушираамиз.

— Буни қаранг-а, отамнинг кули кўка созурилаверсин-э, — хитоб қилди Санчо, — бошимиз омон кўлиши, суюгимиз толқон бўлмаслиги учун қопни қанақа момифу пахта билан тўлдирарканлар-а. Йўқ, йўқ! Қопингизни ипак пилла билан тўлдирганингизда ҳам, барибир, уришмайман. Роса аҳмоқни топибсиз-у! Худо хўжайинларимизга куч-қувват берсин, ўзлари уришаверишсин, биз эса ҳузур қилиб еб-ичиб ўтираверамиз. Вақт ўзи умримизни қисқартириш учун жон куйдиради, ажалимиздан беш кун бурун ўлишга шошилишимизнинг нима ҳожати бор.

— Ҳар ҳолда, — яна эътироз билдирди иккинчи яроқбардор, — ҳеч бўлмаса ярим соатгина уришишимиз керак.

— Асло! — жавоб берди Санчо. — Нега сиз билан уришаман? Ҳозиргина биров билан нон-қатиқ бўлиб, дарров жанжал чиқарадиган кўрнамак нодонлардан эмасман. Бунинг устига, сиз мени бирон важдан хафа ҳам қилганингиз йўқ.

— Э, иш бунга қараб қолмайди, — деди у. — Хўжайинларимиз жангга киришганда мен сиз марҳаматли жанобга яқинлашиб уч ё тўрт тарсаки тушираман. Ана шунда суғурдек донг қоғиб ухлаётган бўлсангиз ҳам эҳтимол, ғазабингиз қўзаб кетар.

— Бундай илтифотга, — жавоб берди Санчо, — мен ҳам ҳозир-жавоблик билан жавоб қайтараман: сиз марҳаматли жаноб ғазабимни қўзғашга улгурмаслариданоқ қўлимга таёқ олиб, шундай тушураманки, ғазабингиз босилиб, у дунёга борганда қўзғалмаса дейман. Мен қитиқ патимга тегдириб ўтирадиган одамлардан эмасман. Ҳамма ўнг қулоғи билан ҳам, чап қулоғи билан ҳам эшитиб қўйсин, энг муҳими, ҳеч ким ўз яқинини ғазаблантирмасин. Бировнинг кўнглида нима борлигини ҳеч ким билмайди-ку, ахир. Баъзан қўйнинг жунини қирқтирмакчи бўлсанг, ўзингнинг соч-соқолингни қиртишлаб қўйишади. Ҳатто бечора мушукнинг ҳам ғашига тегиб, бурчакка қисиб борсангиз шердай олишади. Ахир, мен одамман-ку, агар менинг ғашимга тегилса, қўлимдан нималар келиши бир худонинг ўзига аён. Шунинг учун сиз марҳаматли жанобга, сеньор яроқбардор, олдиндан айтиб қўяяпман; бизнинг олишувимиздан етадиган зарар ҳамда қусурлар учун жавоб берасиз.

— Хўп, майли, — деди у, — кечаси ётиб ўйла, эртаси туриб сўйла, дейдилар.

Бу орада дарахтларда мингларча ранг-баранг қушчалар сайрай бошлади. Улар ўз қўшиқлари билан чехрасидан заррин соч толаларидай нур таралиб, шарқ томонда оқариб келаётган гўзал тонгни табриклаётганга ўхшарди. Тонгни қаршилаб толлар чак-чак ширин маннасини<sup>70</sup> тўқар, чашмалар кулар, ариқчалар чулдураб, ўрмонлар шод-хуррам чайқалар, далалар яна ҳам кўм-кўк бўлиб яшнарди.

Бироқ бу кўз қувонтирадиган тонг Санчо Пансага хурсандлик бахш этмади. Дастлаб, тонг ёриши билан номаълум рицарь яроқбардорининг ҳаддан ташқари катта бурнига кўзи тушди. Бу баҳайбат бурун нафармон рангда бўлиб, ўртаси букир, ҳамма ёғи сўгалга тўла эди; буруннинг учи оғзидан икки энлик пастга тушиб турар, бундан яроқбардорнинг қиёфаси шунчалик жирканчли кўринардики, Санчо худди тутқалоғи тутиб қолган боладай қалтираб кетди. У ўша заҳоти бу махлуқ билан муштлашиш у ёқда турсин, ҳатто унинг аччиғини келтириб қўйишдан кўра икки юз шапалоқ ейишга ҳам рози бўлмоқчи бўлди.

Дон Кихот ҳам ўз навбатида рақибига қаради, бироқ у аллақачон сипарини тушириб олгани учун рицаримиз унинг юзини кўра олмади. Фақат номаълум кишининг калтабақай, ўрта бўй одам экани кўриниб турарди. Совути устида ёпинчиқ бўлиб, гўё асл зар ипларидан тўқилгандай эди, ярим ой шаклидаги ҳисобсиз кичкина ойначалар билан безатилганлиги учун ёпинчиғи ҳаддан ташқари нафис ҳамда салобатли кўринарди. Унинг дубулғасидан яшил, сариқ, оқ рангдаги укпарлар ҳилпираб турарди; унинг каттакон найзаси дарахтга суяб қўйилган эди.

Дон Кихот буларнинг ҳаммасига диққат билан разм соларкан, рақибим жуда кучли бўлса керак, деган қарорга келди. Бироқ бу нарса уни заррача бўлсин даҳшатга солмади; аксинча у рицарь Лесага менсимай ҳамда дадил мурожаат қилди:

— Башарти жанговарлик гайрати жўш уриб турган сиз марҳаматли жанобга малол келмаса, сеньор рицарь, сипарингизни кўтаришингизни ҳамда юзингизда ҳам бутун қиёфангиздаги сингари жасорат белгилари намоён эканини кўришга ижозат беришингизни илтимос қиламан.

— Жангимиз қандай тугамасин, сеньор рицарь, — хоҳ сиз энгманг, хоҳ энгилманг, барибир мени кўришга етарли вақтингиз бўлади, — жавоб берди рицарь Леса. — Бироқ ҳозир истагингизни қондира олмайман: — менимча, сипаримни кўтариб вақтни буҳуда сарфлайдиган бўлсам гўзал Касильдея Вандальскаяни ошкора хафа қилган бўламан. Менинг ишим унинг бошқа ҳамма хонимлардан афзал эканлигига сизни дарҳол иқроқ қилишдир.

— Ҳар ҳолда, — эътироз билдирди бизнинг рицарь, — гапингиз бўйича сиз энгган ўша рицарь ҳақиқатан ҳам мен — ламанчлик дон Кихот эканлигимни таъкидлашга мажбурсиз.

— Бу гапингизга шундай жавоб бераман, — деди рицарь Леса, — сиз мен энгган рицарга бир олманинг иккинчи палласидек ўхшайсиз. Бироқ айтганингиздай, сизни, рицарь ламанчлик

дон Кихотни ёвуз сеҳрғар таъқиб қилиб юрган экан, ўша одам билан сизнинг бир кимса эканликларингизни исботлаб ўтирмайман.

— Сизнинг адашаётганингизга шунинг ўзи етарли, — деди дон Кихот, — бироқ отларимизни келтиришлари биланоқ бу нарса янада ойдинлашади; — тангрининг, маъшуқам ҳамда қиличимнинг ёрдамида юзингизни кўриш учун менга сипарингизни кўтаришга зарур бўлган вақтдан ҳам озроқ вақт керак бўлади. Ана ўшандагина сиз енгган рицарь мен эмаслигимга ишонасиз.

Шу билан гап тамом бўлди. Улар отларига минишди, дон Кихот ўз рақибига ҳамла қилаётганда кўнгилдагидек от қўйиш учун Росинантни орқага бурди; — рицарь Леса ҳам шундай қилди. Дон Кихот йигирма қадамча юришга ҳам улгурмай, рицарь Леса унга қичқирди:

— Шартимиз эсингизда бўлсин, сеньор рицарь, мағлуб бўлган ўзини ғолибининг ихтиёрига топширади.

— Эсимда, — жавоб берди дон Кихот, — бироқ ғолиб мағлубга рицарлик қоидаларига зид келадиган нарсаларни буюрмайди.

— Албатта, — деди рицарь Леса.

Шу пайт дон Кихотнинг кўзи қўққисдан яроқбардорнинг ғалати бурнига тушиб қолди, унинг катталиги ҳамда рангини кўриб Санчодан ҳам баттар ҳайратга тушди. У бунини эртақларда тасвирланган қандайдир махлуқ ё ҳали ҳеч қаерда учрамаган янги одам жинсидан бўлса керак деган қарорга келди. Санчо эса, дон Кихотнинг бир чеккага кетаётганини кўриб, ўзи билан жанжал чиқармаслиги учун бурни катта одам билан ёлғиз қолишни истамасди. Шунинг учун у хўжайини орқасидан диконглаб югурди. Дон Кихот Росинантни орқага қайтариб, ўз рақибига ташланишга фурсат етган бир пайтда Санчо қичқириб қолди:

— Ялинаман, марҳаматли жанобим, рақибингизга қарши ташланишдан олдин менинг манави эманга чиқиб олишимга ёрдамлашиб юборсангиз. Бу ердан анови рицарь билан якка-якка олишувингизни яхшироқ кузатаман.

— Тўғриси айтганда, Санчо, — жавоб берди дон Кихот, — баландга — сўрига чиқиб олиб, буқалар жангини хавф-хатарсиз бемалол томоша қилмоқчисан-да.

— Ростини айтсам, — деди Санчо, — анови яроқбардорнинг баҳайбат бурни кўнглимга шунчалик ваҳима соляптики, у билан ёлғиз қолишдан қўрқаётиман.

— Ҳа, унинг бурни шунақа экан, — деди дон Кихот, — агар дон Кихот бўлмаганимда мен ҳам қўрққан бўлардим. Майли, бу ёққа кел, дарахтга чиқиб олишингга ёрдамлашиб юбораман.

Дон Кихот ўз яроқбардорини эманга ўтқазиб бўлгунича рицарь Леса керакли масофага бориб олди. У дон Кихот жангга тайёр деб ўйлаб, отини орқага буриб, рақибни устига от солди. Бироқ дон Кихотнинг Санчони дарахтга ўтказётганини кўриб, югани тортди, ярим йўлда тўхтади. Аммо дон Кихотга рақибни

бостириб келаётгандай бўлиб туюлди. Шунинг учун у шпорларини Росинантнинг ориқ биқинига шунчалик жон-жаҳди билан қададики, от умрида биринчи марта елиб кетди. Отини учириб келаётган дон Кихотни кўрган рицарь Леса Росинантдан ҳам хароброқ отини бор кучи билан ниқтай бошлади.

Бироқ от ўжарлик қилиб, жойидан жилишни истамади; у ўжарлик қилаётган от билан овора бўлиб турганда дон Кихот унга шундай шитоб билан ташландики, бечора рицарь ҳатто найзасини жангга ҳозирлай олишга ҳам улгурмади. У кўкрагидан қудратли зарба еб, от сағриси оша ерга шу қадар гурсиллаб тушдики, ўлган одамдай қўлини ҳам, оёғини ҳам қимирлатолмай қолди.

Санчо дон Кихотнинг рақибни қулаганини кўрган заҳоти эмандан туша солиб, ҳовлиққанча хўжайини томон югурди. Дон Кихот Росинантдан сакраб ерга тушди, рицарь Леса ёнига чопиб келиб, унинг ўлган-ўлмаганини билиш мақсадида дубулгасини еча бошлади, бирдан... у кимни кўрганлигини китобхонда ажабланиш, ҳайрат ва ваҳима туғдирмасдан қандай гапириш керак? У бақкалавр Самсон Каррасконикига ўхшаш юз, қиёфа, сиймони кўрди! Ҳайратдан ўзини йўқотиб кўяёзган дон Кихот қичқирди:

— Югур бу ёққа, Санчо, манови одамга қара! Сен ўз кўзларингга ишонмайсан. Тезроқ, жигаргўшам, қарагин, сеҳр-жоду одамни нималар қиларкан, жодугар ҳамда сеҳргарларнинг қудрати нақадар зўр-а.

Санчо чопиб, енгилган рицарнинг юзига қаради ва азиз авлиёларни бирма-бир ёдга олиб чўқина бошлади. Сўнг ҳаддан ташқари қўрққан ва ҳайрон қолган Санчо дон Кихотга шундай деди:

— Менинг фикрим шундай, сеньорим, ўзини бақкалавр Самсон Карраско қилиб кўрсатган бу жодугарнинг оғзига қилич солмоғингиз лозим эди. Ким билсин! Эҳтимол душман сеҳргарларингиздан бирини ўлдирарсиз.

— Гапинг тўғри, Санчо,— жавоб берди дон Кихот,— чунки душманинг қанча оз бўлса, шунча соз бўлади.

У Санчонинг маслаҳатини бажо келтириш учун қиличини яланғочлаган ҳам эдики, шу пайт рицарь Лесанинг яроқбардори югуриб келиб қолди. У бутунлай ўзгариб кетибди; унинг нафармонранг баҳайбат бурни қаёққадир ғойиб бўлибди. Яроқбардор бақирди:

— Тўхтанг, марҳаматли жаноб сеньор дон Кихот. Нима қил-япсиз ўзи? Ахир, оёғингиз остида дўстингиз бақкалавр Самсон Карраско ётибди-ку, мен эса унинг яроқбардориман.

— Бурнинг қани? — ҳайратдан ўзини йўқотган Санчо унинг сўзини бўлиб қичқирди.

— Ёнимда, чўнтагимда,— жавоб берди у ва чўнтагидан локланган, маскарада киядиган бурунни олди.

Санчо бу яроқбардорга яхшироқ тикилиб, ҳайратланиб сўради:

— Е авлиё Мария, ўзинг кечир мени! Ахир, бу менинг қўш-ним ҳам оғайним Томе Сесьял-ку.

— Бўлмаса кимман? — жавоб берди ўзининг баҳайбат бур-нидан халос бўлган яроқбардор. — Ҳа, мен Томе Сесьялман, дўс-тим Санчо Панса. Бу ёққа қандай қилиб келганимни кейин ай-тиб бераман. Бироқ, худо ҳақи, хўжайинингиздан илтимос қи-линг, у рицарь Лесани ўлдириб қўймасин. Барча авлиёлар ҳақи онт ичаманки, бу ҳамқишлоғимиз беадаб ҳамда телба баккалавр Самсон Каррасконинг ўзгинаси.

Бу орада рицарь Леса ўзига келди. Шунда дон Кихот унинг томоғига яланғочланган қилич дамини қадаб деди:

— Агар ҳуснда тенги йўқ Дульсинея Тобосская ўз чиройи билан сизнинг Касильдея Вандальскаянгиздан ортиқ эканлигига иқроор бўлмасангиз жонингиздан ажраласиз, рицарь. Шунинг-дек сиз Тобосо шахрига жўнашингиз ҳамда маъшуқамга бўл-ган воқеани сўзлаб беришингиз керак. Сўнгра менинг олдим-га қайтиб келасиз — шухратимнинг овозаси мени топиб оли-шингизга ёрдам беради — кўнглим мулки ҳоқони билан бўл-ган учрашув ҳақида мени хабардор қиласиз. Кўриб турибсиз-ки, менинг талабларим жаҳонгашта рицарлар қондасига ҳам, бизнинг шартимизга ҳам зид эмас.

— Сеньора Дульсинеянинг ифлос, йиртиқ кавуши Касильдея-нинг таралмаган, аммо озода сочларидан дурустроқ эканига иқроорман, — деди енгилган рицарь, — шунингдек маъшуқангиз ҳузурига бориб келишга ҳамда мендан талаб қилаётганингиздай тўлиқ ҳисоб беришга ваъда қиламан.

— Бундан ташқари, — давом этди дон Кихот, — бир замонлар сиз енгган рицарь ҳатто менга ўхшаган бўлса-да, ҳеч вақт ла-манчлик дон Кихот бўлмагани ҳамда бўла олмаслигига ҳам иқ-роор бўлишингизни талаб қиламан. Ўз навбатида ҳам сиз бакка-лавр Самсон Карраскога ўхшасангиз-да, ҳар ҳолда у эмас-у, бошқа одам эканлигингизга иқроор бўламан. Душманларим ме-ни шафқат қилсин деб сизни унинг қиёфасига киритганлар.

— Буларнинг ҳаммасига иқроорман, йўл қўяман ҳамда қа-бул қиламан, — жавоб берди ерда ётган рицарь. — Энди кучим етадиган бўлса ўрнимдан туришга рухсат беринг. Роса шалоғим чиқди, ўзимни жуда беҳол ҳис қилаётирман.

Дон Кихот Томе Сесьяль билан биргаликда унинг ўрнидан туришига кўмаклашишди. Бу орада Санчо ўз ошнасидан кўзи-ни узмас ҳамда ҳар хил саволлар билан уни кўмиб ташламоқда эди. Яроқбардорнинг жавоблари Санчонинг қаршисида ҳақиқа-тан ҳам ҳақиқий Томе Сесьяль турганини тўлиқ исбот қиларди. Бироқ дон Кихотнинг рицарь Лесани баккалавр Самсон Каррас-кога айлантриб юборган ёвуз сеҳргарларнинг қилмишлари ҳа-қидаги гаплари Санчони шу қадар шубҳага солиб қўйган эди-ки, ҳатто ўз кўзларига ҳам ишонмасди. Ўз шубҳасини батамом ҳал қилишга улгурмай қолди. Рицарь Леса ўрнидан зўрға туриб, отига минишга шошилди ва яроқбардорини эргаштирганча ўша заҳотиёқ яккама-якка жанг бўлган майдонни ташлаб кетди.

Рицаримиз яккама-якка олишувнинг натижасидан жуда мамнун эди. У рицарь Лесани ажойиб жангчи деб билгани учун уни энгганидан жуда мағрурланди. Бундан ташқари, рақибининг рицарларга хос сўзига ишониб, ўз маъшуқаси ва унинг тақдири ҳақида ишончли ахборотлар олишга умид боғлади. Дон Кихот шундай жасур рицарь ваъдасига вафо қилиб, Дульси-нея билан бўлган учрашуви ҳақида сўзлаб бериш учун қайтиб келишига сира шубҳа қилмасди.

Бироқ дон Кихот бир нарсани ўйласа, рицарь Леса тамоман бошқа нарсани ўйларди. Бу рицарь аллақачон ўз ваъдаларини унутиб, тезроқ жароҳатларини боғлашни ўйларди.

Юқорида зикр этилган ҳодисаларни англаш учун китобхон баккалавр Самсон Карраско ўз вақтида экономка ва жияннинг умидларини йўққа чиқариб, дон Кихотга жаҳонгашта рицарлик ҳаётини давом эттиришни маслаҳат берганини хотирласин. Гап шундаки, сафарга даъват этишдан олдин у дон Кихотни машъум саргузаштлар излаб дайдийвермасдан уйда тинчгина ўтиришга мажбур қилиш ҳақида поп ва сартарош билан узоқ маслаҳатлашишди. Бу йиғилишда, дон Кихотни ҳеч қандай панд-насихат ниятидан қайтариб бўлмади, майли, боши оққан томонга кетаверсин, деган қарорга келишганди ҳаммалари. Самсон Карраско жаҳонгашта рицарь кийимини кийиб, унинг кетидан жўнайди. Гўё дон Кихот билан қўққисдан учрашиб қолгандай, уни яккама-якка жангга чақиради — бунга албатта баҳона топилади — ва шак-шубҳасиз енгади. Жанг олдидан рицарь-баккалавр ўз рақибини билан энгилган ўз ихтиёрини энгган кишига бутунлай топширади деб шартлашади, сўнгра дон Кихотни энгиб, унга қишлоққа қайтишни ва икки йилгача ундан ҳеч қаёққа чиқмасликни буюради. Ҳеч ким энгилган дон Кихотнинг рицарлик қоидасини бузмаслигига ва бу буйруқни муқаддас билиб бажаришига шубҳа қилмасди. Мажбуран қишлоқда яшаган бу давр орасида эса, у эҳтимол, ўзининг тентакликларини ташлар ё дўстлари унинг тентаклик дардига бирор даво топишар.

Баккалавр рицарлик ролини ўз устига олди, Санчо Пансанинг хушчақчақ, тентактабиат қўшнисини ва ошнаси Томе Сесьяль эса яроқбардор сифатида хизмат қилишни таклиф қилди. Самсон рицарлик яроқ-аслаҳаларини тақиб, совутларини кийди, Томе Сесьяль эса Санчо таниб қолмасин деб сохта бурун ясаб олди. Сўнгра дон Кихот кетган йўлдан бориб, ўрмонзорда уларга етиб олдилар. Бу бемаъни эрмакнинг оқибати қандай бўлганини зийрак китобхон аллақачон билади. Баккалавр баккалавр эмас-у, балки унинг қиёфасига кирган рицарь эканлигига дон Кихотнинг имони комил бўлмаганда, бечора Карраско лицензиат уновинини олиш имкониятидан абадий маҳрум бўлган бўларди, чунки у қуш ахтарган жойдан ҳатто унинг уясини ҳам топа олмади.

Саёҳатнинг бундай ачинарли тугалланглигини кўрган Томе Сесьяль баккалаврга шундай деди:

— Тўғриси, сеньор Самсон Карраско, биз қилмишимизга яраша жазоландик; қайси ишни осон бошласанг, унинг чига-лидан қутулиш қийин, деб бекорга айтмаганлар. Дон Кихот — тентак, бизни бўлса ақлимиз расо, бунинг устига у соғ-саломат қолиб, устимиздан қулаётир, сиз марҳаматли жаноб эса ҳамма ёғингиз моматалоқ бўлиб қайтаётирсиз уйга. Айтинг-чи, ким тентакроқ: ўз айбисиз ақлдан озган кишими ё ўз ихтиёри билан жин-依лик қилаётган кишими?

Бунга Самсон шундай жавоб берди:

— Бу тентаклар ўртасидаги фарқ шундан иборатки, ихтиёр-сиз равишда ақлдан озган тентак ўшандайлигича қолаверади, ўз ихтиёри билан бўлган тентак эса, хоҳлаган пайтида ақлини йиғиб олаверади.

— Шундай экан, — жавоб берди Томе Сесьяль, — сиз марҳаматли жанобнинг яроқбардори бўлиш билан ихтиёрий тентак бўлдим, энди кўнгилли равишда бу хизматни ташлаб, уйга қайт-моқчиман.

— Билганингизни қилинг, — деди Самсон. — Дон Кихотни бошлаб дўппосламагунимча ҳеч қачон уйга қайтмайман. Энди мен ақлини киритиш учун эмас, балки ўзимнинг таҳқирланганим учун ўч олиш мақсадида таъқиб қиламан уни. Қовурғаларим шу қадар оғрияптики, унга ҳамдард бўлиш хаёлимдан ҳам кў-тарилиб кетди.

Бир неча миля юришгач, ниҳоят улар бир қишлоққа етиб бордилар, бахтларига у ерда бахти қаро Самсонни даволайди-ган суяк солувчи табибни топдилар. Томе Сесьяль уни ташлаб, уйига қайтди, бақкалавр эса ёлғиз қолиб, келажакда қандай қилиб ўч олиш ҳақида бош қотира бошлади.

## **XL BOB**

### **ДОН КИХОТНИНГ ШЕРЛАР БИЛАН БЎЛГАН САРГУЗАШТДА КЎРСАТГАН МИСЛСИЗ ҚАҲРАМОНЛИКЛАРИ**

Биз ҳикоя қилгандек, дон Кихот мамнун ва мағрур ҳолда йўлида давом этди, чунки у қўлга киритган ғалабам билан жа-ҳонгашта рицарлар орасида энг шон-шавкатлиси бўлиб қолдим, деб ишонарди. Энди уни душман сеҳргарларнинг қилмишлари кўрқитолмас эди: у олдинги сафарларида бошига ёғилган ҳи-собсиз калтаклар, тишининг ярмини ўпириб кетган тош, сургун қилинганларнинг кўрнамаклиги, уни сўйил билан калтаклаган янгуэслик хачир ҳайдовчиларнинг сурбетлиги — буларнинг ба-рини унутди. У ўз-ўзига эндиликда зиммасида битта иш: сеньора Дульсинеяни ҳар қандай қилиб бўлса ҳам сеҳргарлар-нинг сеҳридан қутқазиб қолганини таъкидларди, ана ўшанда ўтган асрлардаги машҳур рицарларнинг биронтасидан ҳам қолишмайди. Шундай ўйларга берилиб бораркан, Санчо та-содифан гапириб қолди:

— Сеньор, ошнам Томе Сесьялнинг каттакон бурни сира кўз олдимдан кетмаётгани жуда қизиғ-а?



— Наҳотки сен, Санчо, чиндан ҳам рицарь Леса — баккалавр Карраско, унинг яроқбардори — оғайнинг Томе Сесьяль деб ўйлайсан?

— Нима дейишга ҳам ҳайронман, — жавоб берди Санчо, — ундан бошқа ҳеч ким уйим, хотиним, болаларимни шунчалик аниқ таърифлаб беролмасди. У бурнини олганда Томе Сесьялнинг нақ ўзгинаси бўлди-қолди. Ахир мен у билан қишлоқда доимо учрашиб тураман, ахир у билан ёнма-ён яшаймиз-да.

— Санчо, кел, сал оқилона фикр юритайлик, — деди дон Кихот. — Бу ёққа яқинроқ кел-чи. Айт-чи, нега баккалавр Самсон Карраско жаҳонгашта рицарь сингари кийиниб, ўзига қурол топиб, мени жангга чақирдийкин? Наҳотки бирон вақт мен унга душманлик қилган бўлсам? Наҳотки мен унинг душманман? Менинг шухратимга ҳасад қиляпти десак, у ҳеч қачон жангчи бўлмаган-ку?

— Ҳаммаси шундайку-я, марҳаматли жаноб, лекин сиз рицарь Лесанинг худди қуйиб қўйгандай баккалавр Карраскога ўхшашини, унинг яроқбардорининг эса ошнам Томе Сесьялдан бир туки ҳам фарқ қилмаслигини қандай тушунасиз? Борди-ю, сиз марҳаматли жаноб ўйлагандек буларнинг ҳаммаси сеҳргарлик бўлса, нега энди улар албатта ўша иккала азаматга ўхшашиди?

— Ишонавер, биродар, буларнинг ҳаммаси ёвуз сеҳргарларнинг васвасаси ҳамда ҳийлаи макрлари, — жавоб берди дон Кихот, — бу жангдан ғолиб чиқишимни улар олдиндан билишган, шунинг учун ҳам бизни бир-биримизга боғловчи дўстлик иплари менинг кўнглимни юмшатсин, қиличимнинг дами билан дўстимнинг шафқатсизлиги ўртасига раҳна солсин деб мағлуб рицарни дўстим баккалаврнинг қиёфасига киритишган. Шундай қилиб, улар мени озодликдан маҳрум қилмоқчи бўлган маккор душманнинг ҳаётини ҳийла ва найранг билан сақлаб қолдилар. Санчо, сеҳргарлар учун гўзал чехрани хунукка, хунук юзини эса чиройликка айлантириш ҳеч нарса эмаслигини тасдиқлай оласан-ку. Ҳуснда тенгсиз Дульсинеянинг чиройи ҳамда латофатини ўз кўзинг билан кўрганингга, менга эса у саримсоқ пиёз ҳиди анқиб турган, кўзлари хира, қўпол ҳамда таъвия деҳқон аёл бўлиб кўринганига ҳали икки кун ҳам бўлгани йўқ-ку, ахир. Модомики жинояткор сеҳргар Дульсинеяни ана шундай жирканч, бадбашарага айлантирган экан, қўлимдан ғалаба шухратини тортиб олиш учун рицарь Лесани Самсон Карраскога, унинг яроқбардорини эса оғайнингга айлантириши ҳеч гап эмас-ку.

— Бор ҳақиқат бир худонинг ўзига аён, — Санчо мужмал жавоб берди.

Дульсинеянинг бошқа қиёфага киргани ўзининг ҳийлаи найранги самараси эканини у жуда яхши биларди; шунинг учун ҳам дон Кихотнинг аҳмоқона далиллари уни бунга ишонтира олмасди. Бироқ Санчо ортиқча гапириб қўйиб, ўз ёлғонининг ошкора бўлишидан қўрқиб, индамасликни афзал билди. У яқинларида юрган подачиларни кўриб, улардан сузма ё

пишлоқ сотиб олиш мақсадида йўлдан бурилиб, улар томон юрди. Бу орада чуқур ўйга ботган дон Кихот йўлида давом этди, иттифоқо бошини кўтариб, қирол байроқлари билан безатилган араванинг ўзи томон келаётганини кўриб қолди. Тақдир янги саргузашт юборди деб ўйлаб, яроқбардорини бақириб чақирди. Санчо хўжайинининг бетоқат хитобини эшитиб, ўзини йўқотди. Сотиб олинган сузмани шоша-пиша дон Кихот яқиндагина ечиб, унга бериб қўйган дубулғага солиб, хўжайини томон шошилди.

— Тезроқ, дўстим, — деди дон Кихот, — дубулгани бер. Мен жангга ҳозирланишим керак, чунки узокда кўринаётган арава албатта менга янги саргузашт ваъда қилди.

Санчо ичидаги сузмани тўкишга ҳам улгурмай, шошилиб дубулгани узатди. Дон Кихот у ёқ-бу ёғига қарамай дубулгани шартта бошига кийди. Сузма эзилиб, зардоби юзига оқиб тушди. Эсхонаси чиқиб кетган рицарь хитоб қилди:

— Бу нима ўзи, Санчо? Менинг бош суягим юмшаб, миям эриб кетганга ўхшайдими? Эҳтимол, бу тердир. Бироқ, ҳозир даҳшатли бир можаро бўлишига шубҳа қилмасам-да, модомики терлаган эканман, бу албатта кўрқувдан эмас. Юзимни артишга бирон нарса бер, бўлмаса бу тер кўз очгани қўймайди.

Санчо индамай унга рўмолча узатди ва хўжайини нима бўлганини билмай қолгани учун худога шукур қилди. Дон Кихот юзини артди ва нима гаплигини билиш учун дубулғасини ечди. Дубулға ичидаги оқ бўтқага кўзи тушиб, ҳидлаб кўриб, деди:

— Сеньорам Дульсинеянинг ҳаёти билан онт ичаманки, сен хоин, дайди, сурбет яроқбардор дубулға ичига сузма солиб қўйибсан.

Санчо унга пинагини бузмай жавоб берди:

— Марҳаматли жанобим, агар шу сузма бўладиган бўлса, беринг, мен уни еб қўя қолай. Айтгандай, яхшиси буни шайтон есин — эҳтимол, унинг ўзи қилгандир бу ишни. Сиз марҳаматли жанобнинг дубулғасини ифлос қилгани қандай ҳаддим сиғарди! Биласизми, сеньор, марҳаматли жанобларига хизмат қилаётганим учун мени ҳам қандайдир сеҳргарлар таъқиб қилаётган бўлса керак, деб ўйлайман. Шубҳасиз, улар сизнинг жиғингизга тегиш, мени дўппослатиш учун дубулғага шу ифлос нарсани солиб қўйишган. Бироқ ишонаманки, бу сафар улар икки қўлини бурнига тиқиб қолишаверади, чунки хўжайинимнинг оқилона фикр юритишига ишонаман. Агар қатик ё сузма бўлганида уни дубулғангизга солгандан кўра қорнимга гумдон қилиб қўя қолардим.

— Эҳтимол, тўғри айтаётгандирсан, — деб унга қўшилди дон Кихот. Сўнгра яна бир марта бошини, юзини, соқолини артди, сузмани тўкиб ташлаб, дубулгани яна кийди, узангига оёғини яхшироқ тираб, хитоб қилди:

— Мана энди шайтоннинг ўзи билан жанг қилишга ҳам тайёрман!

Шундай деб у арава томон от қўйди. Араванинг олд томонида

бир қуролсиз киши ўтирарди. У билан хачир ҳайдовчидан бошқа ҳеч ким кўринмас эди. Дон Кихот олдинга ўтиб, сўради:

— Йўл бўлсин, биродарлар? Бу қанақа арава, унда нима олиб кетяпсизлар ва бу қандай байроқлар?

Хачир ҳайдовчи жавоб берди:

— Арава меники, Оран губернатори олий ҳазратларига совға учун пойтахтга юборётган ваҳший шерларни катакка солиб олиб кетаётимиз, манови байроқлар қирол жаноблариники, улар қирол мулкини олиб кетаётганимизни англатади:

— Шерлар каттами? — сўради дон Кихот.

— Жуда баҳайбат, — жавоб берди арава олдида ўтирган киши. — Мен ҳайвонот боғида қоровулман, шерларга қараб тураман, бироқ бунақа шерларни ҳеч кўрмаганман. Бу ерда ҳам эркаги, ҳам урғочиси; бугун уларга овқат бермаганимиз учун ҳозир иккаласи ҳам жуда оч. Шу сабабли бизга йўл беринг, марҳаматли жаноб, уларни овқатлантириш мумкин бўлган бирор жойга тезроқ етиб олишга шошиляпмиз.

Буни эшитиб, дон Кихот мийғида кулиб қўйди-да, деди:

— Демак, шундай қилиб, сеҳргарлар энди менга қарши шерларни ҳам юборибди-да! Худо номи билан қасамёд қиламанки, шерлар билан мени қўрқитолмасликларини ҳозир кўриб қўядилар! Қани, эй яхши одам, аравадан тушинг-чи! Катакларни очиб, шерларни озод қилинг, ламанчлик дон Кихотнинг кимлигини уларга кўрсатиб қўяман. Манови шерларни менга гижгижлаган сеҳргарлар аламларидан ёрилиб ўлсинлар.

Ўтакаси ёрилаётган Санчо дон Кихотнинг олдига чопиб бориб, шерлар билан ҳазиллашмаслигини сўраб ялина бошлади.

— Худо ҳақи, сеньор, қирол шерларини ўз ҳолига қўйинг, ахир улар ҳаммамизнинг дабдаламизни чиқариб ташлайди-ку.

Аммо дон Кихот Санчонинг гапларига заррача ҳам эътибор бермай, назоратчига қичқирди:

— Ҳой, жаноб бекорхўжа, жин урсин сизни, тезроқ катакларни очиб юбормасангиз, манови найза билан сизни аравага санчиб қўяман.

Аравакаш бундай қаҳрли бақирикдан қўрқиб кетиб, деди:

— Сеньор жаноблари, сиз марҳаматли зотнинг амрини бажо келтираман, лекин шафқат қилиб дастлаб хачирларни бўшатиб, улар билан биргаликда хавфсиз жойга бекиниб олишга рухсат беринг. Агар бу йиртқичлар эркинликка чиқиб, хачирларимни тилка-пора қилиб ташлагудек бўлса, мен гадо бўлиб қоламан; ахир, менинг бутун бойлигим — хачирларим билан аравам, холос.

— Э, ноумид банда! — хитоб қилди дон Кихот. — Тезроқ ерга тушиб, хачирларингни бўшатгин-у, билганингни қил. Бироқ, сен тезда беҳуда уринганингни ҳамда бунчалик эҳтиёткорлик қилиб овора бўлганингни кўрасан.

Аравакаш шошилиб пастга тушди-да, хачирларини бўшатди, назоратчи эса баланд овоз билан қичқирди:

— Шу ердаги ҳамма одамларни гувоҳликка чақириб айтаманки, катакларни ихтиёримдан ташқари мажбурият орқасида очиб,

шерларни қўйиб юбораётирман. Бундан ташқари, манави сенъор-га эшитдириб айтаманки, шерлар келтирган зиённи, бунинг устига менинг маошимни ҳам у ўз чўнтагидан тўлайди. Бироқ, эшикларни очиб юборишимдан олдин ҳамма яхшироқ яшириниб олсин. Мен ўзим йиртқишлардан қўрқмайман, уларнинг менга ҳеч қандай ёмонлик қилмасликларига ишонаман, бироқ бошқаларни ғажиб ташлашлари мумкин.

Бу сўзларни эшитиб, Санчо кўзларига ёш олиб, шамол тегирмонлари билан бўлган, мовут босиладиган жойдаги, умуман ҳаётларида қилган ҳамма қилмиш ва саргузаштлари бунинг олдида болалар ўйинидай нарса эканини айтиб, бу аҳмоқона ниятдан қайтишни ўз хўжайинидан илтимос қила бошлади.

— Сенъор, шуни билинги,— деди Санчо,— бу ерда ҳеч қанақа сеҳр йўқ. Булар одатдаги, жонли арслонлар. Темир қафасга назар ташлаган эдим, улардан бирининг панжасини кўриб қолдим, бунақа тирноқли арслон тоғ баробар бўлса керак дейман.

— Қўрқувдан у сенга ярим дунёдек бўлиб кўринган бўлиши мумкин,— жавоб қилди дон Кихот.— Наридан бор, Санчо, менга ҳалакят берма. Мабодо мен ҳалок бўлсам, бизнинг илгариги ваъда-мизни эсдан чиқармагин: бундан Дульсинейани хабардор қилгин.

Сўнгра бизнинг рицарь назоратчини яна шошилтира бошлади ва дўқ-пўписаларини такрорлай кетди. Санчо ўз эшагини, ҳачир ҳайдовчи ўз ҳачирларини арслонлар юкланган аравадан имкони борича нари ҳайдашди. Бечора яроқбардор ўз хўжайинининг бу гал асло омон қолмаслигини англаб обдон йиғлар, йиғлаш-сиқташлар, дуолар орасида кучи борича эшагини «хих-хих» лаб борарди.

Назоратчи бу одамларнинг анча узоқлашиб, бехатар бўлишганини кўргач дон Кихотдан арслонлар билан олишиш ниятидан қайтишни илтимос қилиб ёлвора бошлади. Бироқ рицарь кескин жавоб қилиб, ёлвориш ва аврашлардан фойда йўқ деди ва қафас эшикларини очишни буюрди. Назоратчи биринчи қафасни очиш билан овора бўлаётганида дон Кихот қандай жанг қилишни — пиёдами ёки отлиқми фикр қилди. Ниҳоят арслонлар қиёфаси Росинантни кўрқитиши мумкин деди-да, пиёда жанг қилишга қарор қилди. Шунинг учун отдан ирғиб тушди-да, найзани бир четга улоқтирди, қалқонни қўлга олиб, қиличини ялонғочлади. Сўнгра ўзини аввало худога, кейин эса сенъора Дульсинейга бағишлаб ажиб жасорат ва қатъият билан арава томон аста қадамлай бошлади.

Дон Кихотнинг жангга шайланганини кўрган назоратчи арслонларни барибир қўйиб юриш кераклигини билиб биринчи қафас эшикларини ланг очиб юборди. Катакда ғоят баҳайбат ва даҳшатли арслон ўтирарди.

Бироқ бу йиртқиш қафасдан ирғиб чиқиб дон Кихотга ташла-ниш ўрнига тескари боқди, оёқларини кериб бутун гавдаси билан чўзилди. Сўнгра оғзини катта очиб эснади, тилини чиқариб юз-кўзини ялай кетди. Бетини ялаб бўлгандан сўнг бошини қафасдан чиқариб қоп-қора, кўмирдек ялтироқ кўзлари билан чор-атрофга

қаради. Унинг мағрур, ҳайбатли гавдаси ва ваҳшиёна қараши ҳар қандай довурак одамни даҳшатга солса-да, дон Кихот пинагини бузмай унга тик қараб турар ва биргина нарсани истарди: арслон аравадан тезроқ тушса-ю, у билан яккама-якка олиша қолса, чунки бизнинг рицарнинг арслонни тилка-пора қилиб ташлашга имони комил эди.

Аммо мурувватли арслон човқар эмас эди. У дон Кихотнинг бемаъни гердаишига парво ҳам қилмай чор-атрофга қаради, ўгирилиб бизнинг рицарга орқасини кўрсатди, сўнгра бепарво ва бемалол чўзилди. Буни кўрган дон Кихот назоратчига арслонни калтаклаб ғазабини келтириб, қафасдан ҳайдаб чиқаришни буюрди.

— Йўқ, буни мутлақо қилолмайман,— деди назоратчи.— Агар мен унинг жиғига тегсам борми, даставвал менинг ўзимни бурдалаб ташлайди. Шуларнинг ўзи ҳам керагидан зиёда, муҳтарам зот. Сиз ўз жасоратингизни исбот этдингиз. Тавақкалига иш тутиш ярамайди. Довюрак жангчининг иши душманни жангга чақириш ва уни майдонда кутиш. Менимча жангчидан талаб этиладиган нарса шу бўлса керак. Мабодо душман жанг майдонига келмаса, демак унинг қўрққани ва енгилгани шу бўлади. Майдонда кутган мард эса ғалаба тожини кияди.

— Эҳтимол ҳақ гапни айтаётирсиз, дўстим,— деди дон Кихот.— Ундай бўлса, эшикларни бекитинг ва менга гувоҳнома беринг. Эшикларни қандай бекитганингизни, қафас олдида менинг дадил турганимни, арслоннинг эса чиқмаганини, мен уни узоқ кутганимни, лекин у менга орқасини ўгириб, катакда бемалол ёнбошлаб олганини — ҳаммасини батафсил ёзинг. Мен ўз бурчимни адо этдим; ҳар қандай сеҳр-жодулар барҳам топди. Тангрининг ўзи ақл, адолат ва ҳақиқий рицарликни ато қилсин! Хуллас, қафасни бекитинг, мен эса қочоқларга имо-ишора қилай, қайтишсин. Менинг қаҳрамонлигимни улар сизнинг ўз оғзингиздан эшитишсин.

Назоратчи темир қафасни бекитди, дон Кихот эса сузма томчисидан сўнг юзини артган рўмолни найза учига илди-да, қочоқларни чақириш учун уни ҳавода айлантира бошлади. Дон Кихотнинг ишорасини кўрган Санчо хитоб қилди:

— Хўжайиним ваҳший ҳайвонларни ўлдирмаган бўлса, жонимни олинг. Ахир у бизга қайтинглар деган ишорани қияп-ти-ку.

Аравакаш қайрилиб қаради ва ҳақиқатан ҳам дон Кихотнинг орқага қайтинглар деб чақираётганини кўрди. Улар анча енгил тортиб орқага қайтдилар. Аравага яқин келишганда дон Кихот хачир ҳайдовчига деди:

— Биродар, сиз хачирларингизни қайтадан аравага қўшиб, йўлингизда давом этишингиз мумкин. Сен эса, Санчо, бу кишига ва назоратчига кетган вақтлари эвазига бир тилла эскудодан совға бергин.

— Жоним билан, — деди Санчо, — ҳа, арслонлар нима бўлди? Яраландими ёки ўлдирилдими?

Шунда назоратчи дон Кихотнинг мардлиги ва жасоратини таърифлаб ва жангнинг натижаси хусусида шошилмай батафсил сўзлай кетди. Бу кишига арслоннинг кўзи тушар-тушмас қути ўчди, қафас очиб бўлса ҳам у ташқарига чиқишга журъат этмади. Рицарь арслоннинг жигига тегишни буюрди, лекин назоратчи арслонни гижгижлаб қафасдан зўрлаб чиқариш худога ҳам хуш тушмаслигини айтди. Ана шундан сўнггина рицарь ноилож қафас эшикларини бекитишга рухсат этди.

— Хўш, сен нима дейсан, Санчо? — сўради дон Кихот. — Ҳақиқий жасоратга яна қандай сеҳр бардош бера олиши мумкин? Сеҳргарлар мени омаддан маҳрум қилишлари мумкин, бироқ улар мендаги мардлик ва жасоратни йўқота олмайдилар.

Санчо икки эскудони берди, хачирчи хачирларини қўшди, назоратчи катта ҳада учун миннатдорчилик билдириб, дон Кихотнинг қўлларини ўпди ва пойтахтга боришлари биланоқ унинг қаҳрамонлигини қиролнинг ўзига сўзлаб беришга ваъда қилди.

— Мабодо жаноб олийлари бундай қаҳрамонлик кўрсатган одам ким ўзи, деб сўраб қолгудай бўлсалар, — деди дон Кихот, — унда у кишига: арслонлар рицари деб айтинг, зотан, шу кундан бошлаб мен ўз номимни Ғамгин Қиёфа рицарь эмас, балки Арслонлар рицари деб айтмоқчиман.

## XLI БОБ

### ЛАМАНЧ ВИЛОЯТИНИНГ ҚОҚ КИНДИГИДАГИ МОНТЕСИНОС ҒОРИДА<sup>71</sup> СОДИР БЎЛГАН АНТИҚА САРГУЗАШТЛАР

Дон Кихот ва унинг яроқбардори шерлар билан бўлган шавкатли саргузаштдан сўнг Сарагоссага қараб йўл олдилар. Аммо рицаримиз йўл-йўлакай Ламанч вилоятининг қоқ киндигидаги машҳур Монтесинос ғорига албатта кириб ўтишни хоҳларди. Шуниси ачинарлики, унинг ўзи ҳам, яроқбардори ҳам ғорга борадиган йўлни билмасди. Лекин, уларнинг бахтига тез орада йўлда руҳонийнамо икки талаба ва улар билан бирга икки деҳқон учраб қолди. Тўртовлари ҳам эшак миниб олишганди. Талабалар ҳам, деҳқонлар ҳам дон Кихотга таажжубланиб қарар ( у билан биринчи марта учрашган ҳар бир киши шу ҳолатга тушарди), оддий одамларга ўхшамайдиган бу ғайритабиий кишининг ким эканлигини тезроқ билиб олишни истардилар. Дон Кихот улар билан саломлашди ва йўллари бир эканини билиб, ҳамроҳ бўлишни таклиф этди. Йўловчиларнинг савол ёғдиришининг олдини олиб, ўзининг номи ламанчлик дон Кихот, лақаби эса Шерлар рицари эканини; унвони ва машғулотига кўра етти иқлимда саргузаштлар изловчи, жаҳонгашта рицарь эканлигини қисқа қилиб тушунтириб берди. Деҳқонлар учун бу гаплар бориб турган бемаъниликдек туюлган бўлса, талабалар ўша ондаёқ дон Кихотнинг ақл-

дан озганини сезиб олдилар. Шунга қарамай, улар дон Кихотга ажабланиш ва ҳурмат билан қарадилар.

Дон Кихот уларга машҳур Монтесинос ғорига бориб, унинг мақталган мўъжизалари чиндан ҳам мавжудлигини ўз кўзлари билан кўриш истаги борлигини изҳор қилди ва ғорга қандай қилиб боришни сўради. Талабалардан бири уни ғорга бошлаб борадиган бўлди ва ўзининг рицарь романларини севишини, ламанчлик дон Кихотдек машҳур рицарга ҳамроҳ бўлишни ўзи учун шон-шараф деб билишини айтди.

Йўлда дон Кихот бу талабадан ўз ҳаётини қайси фанларни ўрганишга бағишляягагини қизиқиб сўради. У, ўзининг ижтимоиётчи эканини, шунингдек жамиятнинг ҳузур-ҳаловати ва фойдасини кўзлаб нашр эттириш мақсадида китоб ёзаётганини айтди. Унинг китобларидан бири «Либослар ҳақида» деб аталаркан. Унда етти юз уч хил либоснинг нухаси, ранги ва бичиғи тасвирланаркан. Сарой аёнлари ана шунга асосланиб ҳар қандай байрамга ҳам бош қотириб ўтирмай уст-бош танлай оларкан.

— Менинг,— қўшиб қўйди талаба,— «Виргилий Полидорга қўшимча»<sup>72</sup> номли бошқа китобим ҳам бор. Унда турли кашфиётлар ҳақида ҳикоя қилинади. Бу китобга мен жуда кўп меҳнат ва илм сарф этганман: мен унда Полидор батафсил тўхталиб ўтмаган барча масалаларни очиқ-ойдин тушунтираман ва ниҳоятда лўнда қилиб баён этаман. Масалан, у одамлардан биринчи марта ким тумов бўлгани, ким биринчи бўлиб жароҳатга суртадиган шифобахш малҳамни кашф этганлиги ҳақида маълумот беришни унутган. Мен йигирма бешдан ортиқ муаллифларнинг асарларига суяниб, бу масалани мукамал тушунтираман. Муҳтарам жаноблари менинг қанчалик заҳмат чекканим ва бу китобларнинг одамлар учун қанчалик фойдали эканини билиб олишлари мумкин.

Талабанинг ҳикоясини диққат билан тинглаб бораётган Санчо унинг сўзини бўлди:

— Қани айтинг-чи, сеньор, илоё китобингизни бостиришда худо омадингизни берсин, биринчи бўлиб ким ўз бошини қашиганини айтиб беролмайсизми? (Дарвоқе албатта айтиб бера оласиз, чунки сиз ҳамма нарсани биласиз.) Шахсан мен ўйлайманки, бу ишни биринчи бўлиб Одам Ато қилган.

— Эҳтимол, ўшадир,— жавоб берди талаба,— чунки Одам Атонинг боши ва сочи бўлгани шубҳасиз. Модомики у оламга биринчи келган одам экан, демак у биринчи бўлиб бошини қашиган-да, албатта.

— Мен ҳам шундай деб ўйлагандим,— жавоб берди Санчо,— энди шуни айтинг-чи, ким биринчи акробат бўлган?

— Ростини айтсам, биродар,— жавоб берди талаба,— бу масалани ўрганиб чиқмай туриб, сизга тезда жавоб бера олмайман. Мен ўз китобларимга қайтгач, мана шу масалалар устида ҳам бош қотираман ва яқин кунлардаги учрашувимизда сизнинг истагингизни қондираман, чунки бу учрашувимиз охирги учрашув бўлиб қолмаслигига аминман.

— Менга қаранг, сеньор,— эътироз билдирди Санчо,— сиз

ташвишланмай қўя қолинг, ўз саволимга аллақачон ўзим жавоб топдим. Биласизми, биринчи марта сакраган ва ўмбалоқ ошган Люцифер. Уни осмони фалакдан ташлаб юборганларида то жаҳаннамга етиб олгунча сакраб ва ўмбалоқ ошиб борган.

— Сен ҳақсан, дўстим, — тасдиқлади талаба.

Дон Кихот гапга аралашди:

— Албатта, Санчо, бу савол ва жавобни ўзинг ўйлаб чиқармагансан. Сен уни бирон жойда эшитгансан.

— Худо ҳақи, сеньор, агар мен сўроқлаш ва жавоб беришга тушиб кетсам, эртагача ҳам тугатолмайман. Сизни ишонтириб айтманки, мен бемаънигарчиликлар ҳақида сўраш ва ҳар хил ёлғон-яшиқлар билан жавоб бериш учун ёрдам сўраб қўшниларга чиқиб юрмайман.

— Санчо, сен ўзинг биладигандан кўра кўпроқ нарсани гапириб бердинг, — жавоб берди дон Кихот, — чунки шундай кишилар ҳам борки, улар турли масалаларни ҳал этиш устида бош қотирадилар, ечилганидан сўнг эса сариқ чақага арзимайдиган бўлиб чиқади бу масалалар.

Дон Кихот, Санчо ва талаба бутун кунни мана шунақанги кўнгилли суҳбатлар билан ўтказишди, кечқурун эса кичикроққина бир қишлоққа тушдилар. Эрталаб талаба дон Кихотга Монтесинос ғоригача сал кам икки миля қолганлигини, агар унинг қарори қатъий бўлса, чуқур ғорнинг тушиши учун арқон олволиш зарурлигини айтди. Дон Кихот у ерда нима борлигини билиш учун тубсиз жаҳаннамга ҳам тушишга тайёр эканлигини айтди. Улар юз саржиндан узунроқ арқон сотиб олиб, ғор томон йўл олдилар. Ғорга кириладиган йўл кенг ва катта эди, лекин қалин буталар билан қопланганидан ғорнинг оғзи мутлақо кўринмай кетган эди. Ғорни кўргач ҳамроҳлар уловларидан тушдилар. Санчо ва талаба рицаримизни арқон билан маҳкам қилиб боғлай бошлади. Дон Кихотни чирмаб боғлашаркан, Санчо уни бу ниятдан қайтаришга уриниб кўрди.

— Нима қилаётганингизни ўйлаб кўринг, марҳаматли жанобим, ўзингизни тириклайин гўрга тикманг ва муздек бўлсин деб қудуққа тушириладиган шишага ўхшатманг. Бу ғорни текшириш сизнинг ишингиз эмас, нима қиласиз ташвиш орттириб ўзингизга, сеньорим, бу ҳар қанақанги мусулмон зиндонидан ҳам даҳшатлироқ ахир.

— Бас қил, дўстим Санчо, — жавоб берди дон Кихот. — Бемаъни гапларни алжияпсан: бу машҳур ғорни текшириш фақат менга насиб қилган.

Шунда йўл бошловчи:

— Муҳтарам жаноб, сеньор дон Кихот, сиздан ўтиниб сўрайман, у ерда нимаики учраса ҳаммасини яхшилаб кўриб олинг. Эҳтимол, менинг ўзгаришлар тўғрисидаги бўлажак китобимга ярайдиган бирор нарса топилиб қолар, — деди.

— Хотиржам бўлинг, сеньор, — гапга қўшилди Санчо. — Чилдирма яхши чилдирмачининг қўлида, унинг гумбурлашини кўрасиз.



Барча тайёргарликлар тугагач, дон Кихот шундай деди:

— Ҳе аттанг, қўнғироқчалар оливолмай, яхши иш қилмабсиз: мен уларни арқонга боғлаб қўярдим-да, вақти-вақти билан жиринглатардим, сизлар менинг тириклигимни ва ҳамон пастга қараб тушиб бораётганимни билиб турардинглар. Лекин, энди вақт ўтди. Мен ўзимни худога топширдим, унинг ўзи мадад берсин.

Шундан сўнг дон Кихот тиз чўкиб, худога илтижо қилди, ундан бу хавфли, ғайритабиий саргузаштни муваффақиятли яқунлашда мададкор бўлишни сўради. Кейин у баланд овоз билан:

— О, қалбимнинг ҳоқони, гўзалликда беқиёс Дульсинея Тобосская! Бахтиёр қулингнинг илтимос ва илтижолари етиб борса, оламда танҳо ҳусни-малоҳатинг ҳақи ёлвораман: мени эшит. Сендан бир нарса илтимос қиламан: оғир дақиқаларда мени илтифотинг ва ҳимоянгдан маҳрум этма, мен унга ташнаман. Ҳозир мен ўзимни кўз олдимдаги тубсиз жаҳаннамга ташлайман. Мен бун шунинг учун ҳам қилаётирманки, агар сен менга мададкор бўлсанг, дунёда мен қўл урмаган, амалга оширмаган жасорат ва қаҳрамонлик йўқлигини ҳаммага маълум қилиб қўймоқчиман.

Дон Кихот ана шу сўзларни айтиб, ғор оғзига яқинлашди. Шунда у ғорнинг оғзига ўз билак кучи билан йўл очиб бора олиши мумкинлигини кўрди. У қиличини яланғочлаб чирмашиб кетган буталарни чопа бошлади. Ғорга уя қурган қарға-қузғунлар шовқиндан безовталаниб, бирданига «гурр» этиб кўтарилди. Улар қўққисдан, шиддат билан барараварига кўтарилганидан рицаримизни гуппа ерга қулатиб юбордилар. Лекин, дон Кихотни бунақанги арзимас нарсалар довдирата олмасди. Қушлар учиб чиқиб кетгач, у бир учини Санчо билан талаба ушлаб турган арқонни тортиб, даҳшатли ғорнинг остига тушишга ҳозирланди, Санчо хайрлашаркан, унга оқ йўл тилаб, қайта-қайта чўқинтирди ва шундай деди:

— Худованди каримнинг ўзи мадад берсин, азиз-авлиёлар қўлласин, эй барча жаҳонгашта рицарларнинг гули, кўрки, қаймоғи! Оқ йўл, ер юзининг пўлат қалбли, мис билак аъло баходири! Сенга худонинг ўзи ҳамроҳ бўлсин, такрор айтаманки, у сени ўз хоҳишинг билан тушаётган даҳшатли жаҳаннамдан яна ёруғ дунёга олиб чиқсин.

Талаба ҳам у билан шу тариқа хайр-хўшлашди. Шундан сўнг дон Кихот ер остига тушаркан, арқонни аста-секин бўшатаётган ҳамроҳларига вақти-вақти билан мурожаат қилиб турди. Дон Кихотнинг овози аста-секин пасая борди ва ниҳоят ғор қаърида ўчиб кетди. Арқон охиригача бўшатиб бўлингач, Санчо билан талаба бир оз кутиб туриш, кейин дон Кихотни яна тепага тортиб олишга қарор қилдилар. Ярим соатдан сўнг улар арқонни торта бошладилар. Арқон шундай энгил тортилар эдики, гўё унга ҳеч қандай юк боғланмагандек эди. Улар дон Кихот ғорда қолиб кетди деб ўйлашди ва Санчо шоша-пиша арқонни тортар экан, йиглаб юборди. Аммо арқонни ярмидан кўпини тортиб бўлгач, улар унда

қандайдир бир юк осилиб турганини сезиб, жуда хурсанд бўлиб кетдилар. Ниҳоят, чуқурлик ичидан дон Кихот кўринди:

— Хуш келибсиз, марҳаматли сеньорим! Биз у ерда мангу қолиб кетдингиз деб, қўрқиб юрибмиз!— деди баланд овоз билан Санчо.

Лекин дон Кихот жавоб бермади. Зудлик билан рицарни ғор ёқасига тортиб олишаркан, унинг кўзлари юмуқ, ухлаб ётганини кўрдилар. Шундан сўнг талаба билан Санчо уни қимирлатиб, силкий бошладилар. Ниҳоят дон Кихот ўзига келиб, узоқ ва қаттиқ уйқудан тургандек керишди, чор атрофга ваҳима билан аланглаб, шундай деди:

— Дўстларим, мени инсон боласига насиб этмаган ажойиб бир манзарани томоша қилишдан маҳрум этганларинг учун сизларни худонинг ўзи кечирсин! Дарҳақиқат мен ҳаётнинг барча лаззатлари худди соя ва уйқудек ўтиб кетаётганини тушуниб етдим. О, бахтсиз Монтесинос! О, қаттиқ жароҳатланган Дурандарте! О, бадбахт Белерма! О кўз ёши дарё бўлган Гвадиан ва Руидеранинг бахти қаро қизлари!

Санчо билан талаба дон Кихотнинг сўзларини диққат билан тингладилар, афтидан у машаққат билан аранг гапирарди. Улар дон Кихотдан бу дўзахда нималарни кўрганини батафсил гапириб беришни илтимос қилишди.

— Сизлар бу ғорни дўзах деяпсизларми?!— хитоб қилди дон Кихот.— Уни бундай деманглар, бунга у муносиб эмас, ҳозир ўзларингиз ҳам ишонч ҳосил қиласизлар.

У жуда очқаб қолганлиги учун ейдиган бирон нарса беришларини сўради. Майса устига талабанинг плашини ёйиб, тўрвадан овқат олиб, бирданига ҳам тушлик, ҳам кечки овқат қилишди. Ҳамма нарса йиғиштириб бўлингач, дон Кихот ҳикоя қила бошлади:

— Мана энди, дўстларим, диққат билан қулоқ солинглар. Ўн икки ёки ўн тўрт саржин чуқурликда, ғорнинг ўнг томонида бутун бошли арава хаचери билан жойлашадиган ўнгири бор экан. Уни сизлар мени арқонда пастга тушираётганларингизда пайқадим. Пастга тушишдан чарчаганим сабабли у ерга кириб бир оз дам олишга қарор қилдим. Мен сизларга арқонни бошқа бўшатманглар деб бақирдим, лекин сизлар чамамда эшитмадингизлар. Мен пастга тушаётган арқонни йиғиштириб ўрадим-да, устига ўтириб чуқур ўйга ботдим. Мен дам олгунча сизлар ҳамма арқонни тушириб бўлган эдингизлар, шунинг учун энди қандай қилиб пастга тушаман деб бош қотира бошладим. Мен ана шу нарса ҳақида ўйлаб ўтирганимда, қўққисдан қаттиқ уйқу босди, ухлаб ётганимда нима воқеалар содир бўлганини билмайман, лекин уйқудан кўзимни очсам, ақл бовар қилмайдиган бир ажойиб чаманзор ичида турибман. Ҳайратда қолганимдан тушимми бу, ўнгимми деб, кўзларимни уқалай бошладим. Шу заҳоти кўз олдимда ҳашаматли қирол саройи пайдо бўлди: саройнинг девор ва миноралари оқ ва шаффоф биллурдан қилинганга ўхшарди; кутилмаганда улкан

дарвозалар ланг очилиб кетди, ичкарида узун сафсарранг плаш кийган нуроний қария кўринди. Плашининг устида коллеж муаллимлари киядиган кўк атласдан калтагина ёпқич. Бошида қора қалпоқча: қордай оппоқ соқоли кўкрагини қоплаб турибди; кўлида ўрмон ёнғоғидан каттароқ донали тасбех. Унинг қади-қомати, қадам босишлари, улуғвор қиёфаси мени ҳайратда қолдириб, унга нисбатан иззат-ҳурмат ҳиссини уйғотди. У ёнимга келиб, мени бағрига босиб: «Баҳодир рицарь ламанчлик дон Кихот, бу сеҳрланган дашту биёбонда узоқ йиллардан бери сени кутиб ётибмиз, сен Монтесинос номли бу чуқур ғор сирларини дунёга маълум қилишинг керак. Бу қаҳрамонлик сенга насиб қилган, чунки фақат сенгина ўзининг энгилмас жасоратинг ва ажойиб қаҳрамонлигинг билангина бу ишга бел боғлай оласан. Қани ортимдан юр, шуҳратли сеньор, мен сенга сеҳрланган бу саройдаги мўъжизаларни кўрсатаман. Мен бош соқчиман, исмим Монтесинос, ғорга ҳам менинг номим берилган», деди. Шунда мен: «Бизнинг қўшигимиздагидек Ронсевалда ўлдирилган сизнинг ўз дўстингиз Дурандартенинг юрагини ханжар билан кесиб олиб, сеньора Белермага совға қилиб келтириб берганингиз тўғрими?» деб сўрадим. У менга, ҳаммаси тўғри эканлигини, фақат оддий ханжар билан эмас, балки бошлаб чархланган учқиррали ханжар билан шундай қилганини айтди.<sup>73</sup>

— Эҳтимол,— гапга аралашди Санчо,— бу севильялик Рамон де Осес ясаган ханжарлардандир.

— Билмайман,— жавоб берди дон Кихот,— лекин, ҳар ҳолда бундай бўлмаса керак, чунки пичоқчи Рамон де Осес яқиндагина ўтган, Ронсеваль жанги эса бир неча асрлар муқаддам бўлиб ўтган. Умуман, бу унчалик муҳим эмас.

— Тўғри айтасиз,— деди талаба,— давом эттиринг, муҳтарам сеньор дон Кихот, мен ҳикоянгизни зўр мамнуният билан тинглаётирман.

— Мен ҳам худди ана шундай мамнуният билан ҳикоя қилаётирман,— таъкидлади дон Кихот.— Шундай қилиб, ҳурматли Монтесинос мени биллур саройга олиб кирди. Бу ерда ганч билан пардоз берилган, паст ва муздаккина залда мрамор сағана турарди. Шу сағананинг қопқоғида рицарь ётарди, лекин у одатдаги сағаналарга қўйиладиган ёдгорлик тошларидагидек мис ва яшмалардан эмас, балки барча кишилар каби суяк ва гўштан иборат эди. Унинг ўнг кўли юраги устида турибди. Менинг марҳум рицарга нақадар ҳаяжон ва қизиқиш билан қараётганимни кўрган Монтесинос, савол беришимни кутиб турмай ўзи гапира кетди: «Бу ерда ўз замонасидаги ошиқ ҳамда шавкатли рицарларнинг гули ва шон-шарафи, менинг дўстим Дурандарте ётибди. Уни иблис фарзанди, француз сеҳргари Мерлин<sup>74</sup> сеҳрлаб қўйган. Бу ёвуз сеҳргарнинг нима мақсадда Дурандартени, мени ва бошқа кўп рицарлар ва хонимларни сеҳрлаб қўйганини ҳозирча ҳеч ким билмайди. Аммо мени тамоман бошқа нарса қизиқтиради: аниқ биламан-

ки, Дурандарте менинг кўлимда жон берган; унинг ўлимидан кейин ўз кўлим билан унинг юрагини кесиб олганман, унинг оғирлиги, тўғрисини айтсам, икки фунтча келарди, чунки табиётшуносларнинг фикрича юраги катта кишилар кичик юракли одамларга қараганда анча-мунча жасоратли бўлишади. Ҳақиқатан бу рицарь ўлган бўлса-ю, яна қанақасига у худди ҳаёт одамдай гоҳ нола қилиб, гоҳ хўрсинади?» Монте-синос мана шу сўзларни айтиб бўлар-бўлмас, бахтсиз Дурандарте қаттиқ нола қилиб, гапира бошлади:

Монтесинос, инижон,  
Дилдан сенга илтимос:  
Куним битиб ногаҳон  
Ажалим етса паққос,  
Дарров ёриб кўксимни  
Юрагим олинг албат,  
Ҳамда элтингиз уни  
Белерма томон фақат.

Бу сўзларни эшитган Монтесинос рицарь олдида тиз чўкиб, кўзларидан ёш оқиб жавоб берди: «О, сеньор Дурандарте, азиз биродарим, мағлубиятга учраган кунимиз менга буюрган топширигингизни аллақачоноқ бажарганман. Мен сизнинг юрагингизни кесиб олиб, тўр дастрўмол билан артиб, уни олиб бор кучим билан Францияга қараб чопдим. Аммо, бунгача мен сизнинг жасадингизни ерга қўйдим ва шу қадар кўз ёши тўкдимки, кўкрагингизни тилиб, юрагингизни узиб олганда қўлларимга теккан қонни унинг нами билан ювдим. Ронсевалдан чиққандан сўнг йўлда учраган биринчи қишлоқда сасиб кетмасин ва сеньора Белермага бузилмай етказай деб юрагингизга туз сепдим. Зотан шу нарсани билиб қўйингки, севимли дўстим ва биродарим, сеньора Белерманинг ўзлари ҳам шу ердалар. Сеньора Белермани, сизни, мени, сизнинг яроқбардорингиз Гвадианани, дуэнья\* Руидера ва унинг етти қизи билан икки жиянини, сизнинг беҳисоб таниш-билишларингиз ва дўстларингизни доно Мерлин ўз сеҳри ҳукми остида сақлаб келмоқда бу ерда. Беш юз йилдан бери шу ерда азоб чекамиз, лекин ҳанузгача биронтамиз оламдан ўтганимиз йўқ. Фақат Руидера, унинг қизлари ва жиянларигина орамизда йўқ. Холос. Улар доим йиғлардилар, Мерлиннинг уларга раҳми келиб, ачинганидан бўлса керак, дарё бўғозига айлантриб юборган бўлиши керак; ҳозир тириклар оламида, Ламанч вилоятида уларни Руидера бўғозлари дейишади. Шунингдек сизнинг яроқбардорингиз Гвадиана ҳам орамизда йўқ: у ўз номи билан аталадиган дарёга айланган.<sup>75</sup> Бу дарё ёриқ дунёга чиқибди, лекин сизни соғинганидан яна ер қаърига кириб кетибди. Аммо, у Мерлин амрини бажаришдан батамом бош торта олмайди. Шунинг учун у вақти-вақти билан қуёш ва одамларга кўриниш беради.

\* Дуэнья — канизак.

Руидера бўғозлари ана шу дарёни ўз сувлари билан таъминлаб туришади. У сонсиз жилғаларни ўзига бирлаштириб, улуғворлик билан денгиз томон ошиқади. Лекин ғам ва қайғу унинг сувини заҳарлаган, унда Тахо дарёсининг зилол шалолаларида биланглаб юрадиган балиқларга тамоман ўхшамайдиган, қуруқ суякдан иборат бемаза балиқлар яшайди. Бу гапларнинг ҳаммасини сизга жуда кўп сўзлаб берганман. Аммо сиз менга жавоб бермайсиз. Эҳтимол, сиз менга ишонмаётгандирсиз ёки гапларимни эшитмаётгандирсиз. Бу менинг учун нақадар оғир эканини худодан бошқа кимса билмайди. Лекин мен бугун сизга шундай бир хабарни етказаманки, у сизнинг қайғунгизни енгиллаштирмасанда, ҳар ҳолда уни орттирмайди ҳам. Билиб қўйинг, доно Мерлин бир неча марта башорат этган ўша улуғ рицарь сизнинг қаршигизда турибди! Мен ламанчлик дон Кихот ҳақида гапираётирман! У аллақачонлар унутилиб кетган жаҳонгашта рицарликни қайта тирилтирди ва уни шундай шон-шарафларга буркадики, рицарлик ўтган замонларда ҳам бунчалик машҳур бўлмаган. Мен умид қиламанки, унинг ёрдами ва ҳимоясида бу машъум сеҳру жодулардан қутуламиз.— «Агар бу воқеа содир бўлмаганда ҳам,— жавоб берди ғамгин Дурандарте секин, эшитилар-эшитилмас,— азиз дўстим, ҳар қалай умидсизликка тушмаслик керак.

Қани кел, яна бир карта ўйнайлик!»

Шундай деб у ёнбошига ағдарилиб, яна ўзининг одатдаги индамаслик ҳолатига тушди.

Шу пайт қаттиқ қичқирик, нолаю фарёд ва йиғи эшитилди. Мен орқамга қарадим ва биллур девор оша нариги залда оқ салла ва мотам либосида дафн маросимига турнақатор тизилиб бораётган гўзал қизларни кўрдим. Маросим охирида салобатли, мотам либосидаги аллақандай бир сеньора нутқ сўзлади. Унинг бошидаги оқ чойшаби этагига тушиб турар, ҳашаматли салласи эса бошқа қизларникига қараганда иккита келарди. Қошлари пайваста, бурни гўё чимчилаб қўйгандек, оғзи катта ва лаблари ялтираб турар эди. Унинг қўлида жуда нафис сочиқ бўлиб, унда мўмиёдай ранглари ўчиб, буришиб, қуриб қолган юрак ётарди. «Бу қизлар ўз хўжайинлари Дурандарте ва сеньора Белерма билан мана шу ерда азобланаётган канизлардир», деди Монтесинос. Энг ортда бораётган хоним эса, сеньора Белерманинг ўзи. У ҳар ҳафтада ўз канизлари билан саройни тўрт марта айланиб чиқади. Ана шу пайтларда Дурандартенинг эзиб ташланган юраги ва жасади узра фарёд чекиб нола қилишади. Монтесинос шуни ҳам таъкидладики, зероки Белерма қўшиқларда тавсифланганидек гўзал ва латофатли кўринмас экан, боиси бадбахтларча ҳалок бўлган рицарини дам-бадам хотирига тушириб турадиган қўлидаги юракдир. Агар шундай бўлмаганида, бизнинг ўлкамизда, умуман бутун дунёда шон-шухратга сазовор бўлган Дульсинея Тобосская ҳам гўзаллик ва назокатда унга бас кела олмасди.

«Ўтиниб сўрайман, сеньор Монтесинос,— дедим мен,— таққослашдан ҳамиша қочиб керак, чунки бу ҳамиша ҳам кўнги-

дагидек бўлавермайди. Дульсинея Тобосская ҳам худди сенъора Белерма сингари гўзалликда беқийёсдир, шунинг учун бу ҳақдаги гапни бас қилайлик». У менга бундай жавоб берди: «Мени кечирасиз, сенъор дон Кихот. Мен сенъора Дульсинеяни сенъора Белермага ўхшатиб, нотўғри гапириб қўйганимни тан оламан. Тўғриси айтганда, муҳтарам жаноблари ўша хонимнинг измида эканликларини фахмладим, шунинг учун тилимни тишлаб, уни самодан бошқа нарсага қийёс қилмаслигим лозим эди». Улуғ Монтесиносинг бу узурини эшитиб, менинг сенъорамни қандайдир бир хоним билан таққослаганида пайдо бўлган жаҳлим бир оз пасайди.

— Ажабо, марҳаматли жаноб,— гапга аралашди Санчо,— ахир қандай қилиб сиз ўша чолнинг суяқларини мажақлаб ташламадингиз, соқолларини битталаб юлмадингиз?!

— Йўқ, дўстим Санчо,— жавоб берди дон Кихот,— биз барча оқсоқолларни, айниқса сеҳрланган рицарларни ҳурмат қилишимиз керак.

Шу пайт талаба гапга аралашди:

— Сира тушунолмаяпман, сенъор дон Кихот, сиз қандай қилиб ер остида бу қадар кўп нарсани кўриб, улар ҳақида сўраб-гаплаша олдингиз. Ахир сиз у ерда узоқ бўлмадингиз-ку?!

— Мен горга тушгандан бери қанча вақт ўтди?— сўради дон Кихот.

— Бир соатдан сал ошди,— жавоб берди Санчо.

— Бундай бўлиши мумкин эмас,— эътироз билдирди дон Кихот,— мен у ерда уч кеча-кундуз бўлдим.

— Менинг хўжайиним тўғри гапиряптилар,— тасдиқлади Санчо.— Ахир у киши сеҳрланган горга тушганлар-да, шунинг учун бизнинг бир соатимиз ер остида уч кеча-кундузга тўғри келади.

— Бўлмасам-чи, худди шундай,— жавоб берди дон Кихот.

— У ерда бирон нарса едингизми, сенъор?— сўради талаба.

— Туз тотмадим,— жавоб берди дон Кихот,— ҳатто очиққанам ёдимдан кўтарилиб кетибди.

— Сеҳрланганлар овқатланишарканми?— яна сўради талаба.

— Йўғ-э,— жавоб берди дон Кихот.— Аммо баъзи одамларнинг таҳмин қилишича, уларнинг тирноғи, соч-соқоллари доим ўсаверармиш.

— Ухлашлари мумкин эканми, сенъор?— сўради Санчо.

— Албатта йўқ,— жавоб берди дон Кихот,— ҳар ҳолда мен улар билан бирга бўлган уч кеча-кундуз давомида ҳеч ким мижжа қоқмади.

— Бу ерда бир мақолни эслаш жойиз бўлиб қолди,— деди Санчо:— яхшига яқин юрсанг етарсан муродга, ёмонга яқин юрсанг қоларсан уятга. Муҳтарам жаноблари овқат емайдиган ва ухламайдиган сеҳрланганлар билан дўстлашибдилар, модомики, ҳамма вақт улар билан бирга бўлган бўлсангиз сиз ҳам овқат емагансиз, ухламагансиз. Бунинг ҳеч қанақа ажабланадиган жойи йўқ. Дадиллигим учун кечирасиз-у, жаноб сенъо-

рим: мен сизнинг ҳикояларингизга заррача ишонган бўлсам худо урсин (шайтон урсин дейишга сал қолди).

— Нега ишонмайсиз?!— хитоб қилди талаба.— Наҳотки дон Кихот ёлғон гапирса? Башарти бирон қизиқарли уйдирма билан бизни овунтирмоқчи бўлган бўлса, у вақтда бу ҳикояни тўқишга фурсати ҳам етмасди.

— Ҳайламанки, хўжайиним ёлғон гапирмайди,— жавоб берди Санчо.

— Унда нима деб ҳайлаяпсан бўлмаса?— сўради дон Кихот.

— Мен ҳайламанки,— жавоб берди Санчо,— ўша Мерлинми ё бошқа бирор жодугарми ҳикоя қилаётган воқеангизни сизнинг миангизга қўйиб қўйган.

— Сенинг тахминларинг ҳақиқатга ўхшаб кўринса-да, биродар Санчо, барибир сен янглишаётирсан,— қатъий жавоб берди дон Кихот,— шу нарса ёдингда бўлсин, мен нимани айтган бўлсам, ҳаммасини ўз кўзим билан кўриб, қўлларим билан ушлаганман. Монтесинос турли-туман мўъжизалар билан бир қаторда ажойиб ўтлоқларда худди оҳулардек сакрашиб-ўйнашиб юрган уч деҳқончани кўрсатди. Бунга нима дейсан? Мен ўша заҳотиёқ ҳеч тенги йўқ Дульсинея Тобосская ва ҳамроҳларини танидим. Мен Монтесиносдан, буларнинг кимлигини биласизми, деб сўрадим. Ҳурматли оқсоқол билмаслигини айтди «Эҳтимол,— қўшиб, қўйди у,— булар яқин орада Мерлин сеҳрлаган атоқли сеньорлардир. Бу яйловларда сеҳргарнинг ёвуз сеҳру жодуси қурбони бўлган янги сеньора ва хонимлар тез-тез пайдо бўлиб турадилар».

Санчо Панса хўжайиннинг бу сўзларини эшитганда кулгидан ёрилиб кетаманми деб кўрқди: чунки у Дульсинеянинг бошқа қиёфага кириши сирини ҳаммадан кўра яхшироқ биларди, ахир бу ишнинг ягона сеҳргари ва гувоҳи бўлганди-да у! Энди у хўжайиннинг ақлдан озганлигига чиндан ишонди.

— Ҳайламанки, сиз ер ости шоҳлигига тушган кунга лаънатлар бўлсин, марҳаматли хўжайин жаноблари,— деди Санчо,— сеньор Монтесинос бемаврид учраб, бошингизни тамоман айлантириб қўйибди. Марҳаматли жаноблари, мана шу ерда ўтириб, ҳар бир қулай фурсатда ҳикматли панд-насихатлар қилиб, ақлга сиғмайдиган бемаъни гапларни йиғиштирганингиз маъқул эди!

— Сени бу беодоблигинг учун адабингни бериб қўйиш керак эди-ю,— деди дон Кихот,— лекин мен сени ва сўзларингнинг қийматини яхши биламан.

— Мен сизникини, сеньор,— эътироз билдирди Санчо.— Хоҳласангиз, ўлгунимча калтакланг, марҳаматли жанобим. Барибир мен то сиз ақлингизни йиғиб, тузалмагунингизча сўзимдан қайтмайман. Муҳтарам жаноблари, жанжаллашиб қолмасимиздан бурун менга шуни айтинг-чи, сиз сеньора Дульсинеяни қандай танидингиз? Сиз у билан гаплашганингизда нима деб жавоб берди?

— Мен уни шунинг учун таний олдимки,— жавоб берди дон Кихот,— ўша куни уни Тобосо яқинидаги ўтлоқда кўрганимдаги

кийимларида экан. Мен гапирсам у индамай шартта орқасига бурилди-ю, камон ўқидай учиб кетди. Мен унинг орқасидан қувмоқчи бўлдим, лекин Монтесинос бу ҳаракатим зое кетишини айтди. Бунинг устига ғордан чиқадиган вақтим ҳам яқинлашмоқда эди. Монтесинос менга белгиланган вақт-соат етиб, Белерма, Дурандарте ва бошқаларни сеҳр-жодудан халос этиш учун қандай қаҳрамонликлар кўрсатишим кераклиги ҳақидаги сирни очажагини айтди. Мен ер ости подшолигида кўп қайғули нарсаларни кўрдим, айниқса, Дульсинеянинг ҳамроҳларидан бирининг олдига келиб, кўзларидан дув-дув ёш тўкиб паст товуш билан: «Менинг маликам Дульсинея Тобосская сиз марҳаматли жанобларнинг қўлларини ўпишни ва сиҳат-саломатлигингизни сўрашни буюрдилар. Маликам сиздан бундай оғир муҳтожлик дамларида сиз мухтарам жанобларининг илтифот кўрсатишингизни ва мана бу йўл-йўл юбка бадалига олти реал қарз бериб туришингизни ўтиниб сўради. У бу қарзни сизга тез кунда қайтариб беришга ваъда бераётир», дейиши юрак-бағримни эзиб юборди. Бу илтимос мени ҳаддан ташқари ҳайратда қолдирди. Мен сеньор Монтесиносга мурожаат қилиб, сўрадим: «Сеньор Монтесинос, сеҳрланган аслзода хонимлар ҳам муҳтожлик тортиши мумкинми?!» «Менга ишонинг, мухтарам сеньор ламанчлик дон Кихот жаноблари,— жавоб берди у,— муҳтожлик ҳамма ерда учрайди, у ҳатто сеҳрланганларга ҳам шафқат қилмайди. Модомики, сеньора Дульсинея Тобосская ишончли гаров билан олти реал қарз сўраган экан, унинг илтимосини бажаришингиз лозим: афтидан, аҳволи жуда тангга ўхшайди». «Менга гаров керак эмас,— жавоб бердим,— олти реални ҳам бера олмайман, чунки ёнимда атиги тўрт реал бор». Мен бу пулларни қизга бериб шундай дедим: «Азизим, маликангизга айтингки, унинг бахтсизлиги қалбимни азоблаётир. Мен унинг оёқлари остига сочиш учун беҳисоб бойликка эга бўлиш иштиёқидаман. Яна шуни ҳам етказингки, мен ундан йироқда яшай олмайман, усиз ўзимни хурсанд ҳис этолмайман. Мен гўзал сеньордан ўтиниб сўрайман, илтифот кўрсатиб, доғида куйган рицари билан суҳбатлашсин. Токи сеньора Дульсинеяни сеҳр-жодудан халос этмагунча дастурхондан туз тотмасликка, уй ичида ётмасликка қасамёд қиламан. Онт ичиб айтаманки, уни озод этиш учун бутун дунёни кезиб чиқишга тайёрман». «Бугина эмас, марҳаматли жаноблари, маликангиз учун ҳали жуда кўп нарсаларни қилишингиз зарур», деди қиз, сўнгра у тўрт реални олди-да, менга таъзим қилиш ўрнига, беҳосдан осмонга шундай сакрадики, ердан бир саржин баландга кўтарилди.

— Ё худо! — хитоб қилди баланд овоз билан Санчо. — Наҳотки бу жодугарлар ёруғ дунёда шунчалик кучга эга бўлса, соғлом ақлли хўжайинимни тентакка айлантириб қўйса-я. О сеньор, худо ҳақи ақлингизни йиғиб олинг, ўз қадр-қимматингизни ўйланг, сизни ақлдан оздирган бу бемаъниликларга ишонманг!

— Сен, Санчо, бу гапларни менга яхшилик қилиш учун айтяпсан,— деди дон Кихот,— аммо сен сеҳргарликнинг нималигини



билмайсан, шунинг учун ўзинг тушуниб етмаган нарсаларнинг мавжудлигига ишонмайсан.

Санчо Пансанинг беадаблиги ва хўжайиннинг сабр-тоқатлилиги талабани ҳайратда қолдирганди. Лекин у дон Кихотнинг бу мулойимлигига сабаб, гарчанд сеҳрланган бўлса-да, сеньора Дульсинея Тобосская билан учрашуви шодиёнаси бўлса керак, деб ўйлади. Унинг ўзи эса, бизнинг тентак рицаримиз ҳикоя қилган нарсаларнинг ҳаммасига чиндан ишонди.

— Мен ўйлайманки, сеньор дон Кихот,— мурожаат қилди рицарга,— саёхатим жуда муваффақиятли, кўнгилдагидек бўлди. Биринчидан сиздек муҳтарам жаноб билан танишдим. Иккинчидан, Монтесинос горининг сирини, Гвадиананинг ва Руидера бўғозининг тарихини билдим, буларнинг ҳаммаси менинг испан Овидиямга керак бўлади. Учунчидан, ўйин карталари Буюк Карл замонида ҳам мавжуд эканини аниқладим, чунки буни Дурандарте эслатиб ўтибди. Бу кашфиётни мен ўзимнинг янги китобим «Полидорга қўшимча»га киритаман.

— Марҳаматли жаноблари тўғри айтадилар,— деди дон Кихот.— Мен сизга яна жуда кўп қизиқ ва фойдали маълумотларни айтиб берардим. Лекин бу ҳақда кейинроқ гаплашамиз, ҳозир эса қаерда тунаш ҳақида бош қотириш керак.

— Бу ердан сал нарироқда бир дарвиш яшайди,— жавоб берди талаба.— Айтишларига қараганда, у олижаноб ва раҳмдил одам эмиш. Унинг бизга тунагани жой беришига шубҳам йўқ, бир стакан яхшигина вино ҳам топилиши мумкин.

Вино ҳақидаги гапни эшитиши биланоқ Санчо ҳамроҳларини тезроқ йўлга тушишга шошилтира бошлади. Дон Кихот ўз Росинантига, Санчо эса талаба билан эшакка миниб, шошилиб йўлга тушдилар.

## **XIII БОБ**

### **ИККИ ДУСТНИНГ ИУҚОЛГАН ЭШАКНИ ИЗЛАШГАНИ**

— Сизга маълум бўлмайди, муҳтарам жаноблари,— деб ҳикоя қила бошлади ҳикоячи,— бу ердан тўрт ярим миля йироқдаги бир қишлоқда рехидорнинг<sup>78</sup> эшаги йўқолиб қолди. Бу ҳол рехидорни чуқур қайғуга солди. У эшагини роса ахтарди, бироқ қанча ахтармасин жонивордан ном-нишон йўқ эмиш. Шу аҳволда икки ҳафта ўтиб кетди. Кунларнинг бирида рехидор майдондан ўтиб кетаётганида ўша қишлоқлик бошқа бир рехидор унинг орқасидан етиб келиб: «Суюнчига нима берасиз, оғайни? Эшагингиз топилди!» дебди. «Жуда ажойиб суюнчи беришга ваъда қилман,— дебди у,— фақат қаердан топилганини айтсангиз бас». «Мен уни бугун эрталаб ўрмонда кўрдим,— дебди иккинчи рехидор,— у югансиз эди, шу қадар ориқлаб кетибдики, кўрган одамнинг раҳми келади. Мен уни олдингизга ҳайдаб келай дедим-у, лекин у шу қадар ёввойилашиб кетибдики, мени кўрибқоқ шаталоқ отиб қочиб кетди. Бутазорлар ичида кўздан йўқолди. Истасангиз

бирга борамиз, бироқ олдин эшагимни отхонага боғлаб қўйай, ҳозир қайтаман.» «Сиз мени кўп хурсанд қилдингиз,— дебди биринчиси,— сизга ҳам бу яхшилигингизни қайтараман.» Хуллас икки рехидор қўлни-қўлга бериб ўрмонга жўнашибди. Эрталаб иккинчи рехидор эшакни кўрган жойда ҳеч нарса кўринмабди, уларнинг қидиришлари натижасиз тугабди. Эшакнинг йўқолганига ишонч ҳосил қилган иккинчи рехидор оғайнисига мурожаат қилибди: «Менга қаранг, оғайни, қочоқ ўрмонда адашиб қолиш у ёқда турсин, ҳатто ер тубига кириб кетган бўлса ҳам уни қўлга тушириш йўлини топдим. Мен эшаққа ўхшаб жуда яхши ҳанграйман, агар бу иш сизнинг қўлингиздан ҳам оз-моз келса ишимиз юришиб кетди деяверинг». «Оз-моз эмиш! Нималарни алжираяпсиз, оғайни,— дебди у.— Худо ҳақи, ҳанграшда эшакнинг ўзини ҳам йўлда қолдириб кетаман.» «Жуда соз,— дебди иккинчи рехидор,— энди шундай қилайлик: сиз ўрмон ичидан буёққа мен эса мана бу ёққа кетаман. Шундай қилиб бутун ўрмонни кезиб чиқамиз, вақти-вақти билан ҳанграб қўямиз. Эшак эса бизнинг ҳанграшимизни эшитиб, ажаб эмаски, ҳанграб жавоб қилса.» Бунга эшагини йўқотган рехидор шундай жавоб қилибди: «Ажойиб фикр, оғайни, ақлингизга тасанно». Шу ерда улар ажралишибди. Бир оздан сўнг уларнинг иккови шундай қойиллатиб ҳанграшибдики, эшак топилиб, ҳар бирига жавоб бераётгандай бўлиб туюлибди. Ҳар иккови алданганича бир-бирига қараб чопишибди. Улар дуч келишгач, биринчи рехидор: «Оғайни, наҳотки ҳанграган эшак меники эмас?» дебди. «Йўқ,— дебди шериги,— ҳанграган мен эдим.» «Эътироф қилиб айтаманки,— дебди биринчиси,— сиз билан эшакнинг ўртасида қилча ҳам фарқ йўқ экан. Умрим бино бўлиб бунчалик чиройли ҳанграшни эшитмаганман.» «Сиз ҳам ана шундай мақтовга лойиқсиз,— дебди бу режани ўйлаб топган рехидор.— Яратганнинг номи билан онт ичиб айтаманки, энг моҳир эшакни ҳам ҳанграшда уядтириб қўяркансиз. Овозингиз шу қадар баландки, уни ўрнида баландлатиб, ўрнида пастлатяпсиз; хуллас, бу масалада ўзимни енгилган деб ҳисоблайман, нодир санъатингизга таҳсин ўқийман.» «Биласизми, оғайни,— дебди биринчи рехидор,— эндиликда ўзим ҳақимда жуда яхши фикрдаман. Ўйлайманки, менда шундай истеъдод бор экан, қўлимдан ҳар нарса келади. Илгари ҳам дурустгина ҳанграй олишимни билардим, лекин шу кунгача бу санъатни етук даражада эгаллаганимни ҳеч ким айтмагани.»

Улар яна ажралишиб, ҳанграшга тушишибди, лекин бир-бирларини эшак гумон қилишиб, яна адашаверишибди. Ниҳоят улар эшак эмас, балки ўзлари ҳанграётганликларини ажратиш учун кетма-кет икки мартадан ҳанграшга шартлашиб олишибди. Шундай қилиб, ҳаммаёқни бошларига кўтариб ҳанграшганича ўрмонни кезиб чиқишибди, лекин йўқолган эшакдан ҳамон дарак йўқ эмиш. У ўзининг борлиги ҳақида жавоб ҳам беролмас экан, негаки рехидорлар ўрмоннинг энг қалин жойидан унинг суяк-саёқларини топишибди. Бўрилар уни аллақачон чавақлаб кети-

шибди. Буни кўрган эшакнинг эгаси: «Мен бўлсам нега жавоб бермаяпти деб хайрон бўлиб юрибман. Агар тирик бўлганида бизнинг ҳанграшимизга албатта жавоб берарди, ҳар ҳолда у эшакда. Ишқилиб, оғайни, вақтимиз беҳуда кетмади. Сизнинг қоматини келтириб ҳанграшингизни эшитдим». «Қуллук, оғайни, — дебди униси, — аббат авжга яхши чиқади, лекин роҳиба ҳам ундан қолишмайди.» Улар тарвузи қўлтиғидан тушган, чарчаган, томоқлари қирилган ҳолда қишлоққа қайтиб келишибди ва бўлган воқеаларни дўстларига, таниш-билишларига айтиб беришибди; ҳар қайсиси оғайнисининг эшакка ўхшаб бошлаб ҳанграганини шавқ-завқ билан ҳикоя қилибди. Бу ҳақдаги хабар бутун вилоятга тарқалибди. Буни эшитганларнинг ҳаммаси ичаклари узилгундай кулишибди, доимо сергак, ҳамиша душманлик уругини сепиб юривчи шайтон эса данакдай хамиртурушдан бир тоғора жанжал, игво тайёрлабди. Эндиликда қўшни қишлоқдан бирорта одам ҳамқишлоқларимиздан бирор кишини кўриб қолса эшак бўлиб ҳанграй бошлайди. Бора-бора бу ҳазил чинакам кулфатга айланди: эшак бўлиб ҳанграш қишлоқдан қишлоққа таралаверибди, теварак-атрофдаги қишлоқлардагилар бизнинг қишлоқликларни оқ одамлар орасидан негрни осонгина ажратгандай ажратиб оладиган бўлишибди. Қишлоғимиз масхараловчиларга қарши бир неча бор жангга отланди. Ҳозир ҳам ҳамқишлоқларим бизни доим таъқиб қилаётган қўшни қишлоқликларга қарши юриш қилишга ҳозирланмоқда. Жангга қуруқ бормаслик учун мени найза, ойболта олиб келишга юборишди. Сизларга айтадиганларим шу холос. Бу ғаройиб бўлиб туюлмаса ғазабланманглар.

Саховатли деҳқон ўз ҳикоясини ана шундай тугаллади.

Дон Кихот ва унинг ёнидагилар деҳқоннинг ҳикоясини қизиқиш билан эшитдилар. Кўп ўтмай ҳамма бир-бирига хайрли тун тилаб дам олгани тарқади. Тун тинч ўтди. Деҳқон қурол-аслаҳа билан тонг отмасдан жўнади. Кун ёйилганда талаба билан маҳрам ўрнидан туришиб, дон Кихот билан хайрлашгани боришди. Талаба ўз қишлоғига қайтиши, маҳрам эса йўлда давом этиши керак эди, шу сабабли дон Кихот унга йўл харажати учун анчагина пул берди. Узининг очиққўллиги билан қўноқхона эгасини ҳам хайратга солди. Лекин у Санчо хўжайинининг буйруғи билан кечки овқат ва тунашгани учун кўпгина пул тўлаганида баттар севиниб кетди. Ана шу ишларни тугаллагач, дон Кихот ўз яроқбардори билан яна узоқ сафарга равона бўлди.

Қўноқхонадан чиққач, дон Кихот Эбро дарёси соҳили билан кетмоқчи бўлди, кейин Сарагосса томон отланишга чоғланди, чунки мусобақанинг бошланишига анча бор эди. Улар икки кунгача осойишта йўл юришди, ҳеч қандай саргузаштлар бўлмади. Учинчи кун дон Кихот аллақандай тепаликка кўтарилаётганда карнай, ноғораларнинг гулдуросини, пилта милтиқлардан отилган ўқ товушларини эшитди. Аввалига нарироқдан аскарлар отряди ўтаётгандай бўлиб туюлди. Лекин тепалик устига чиққач, пастда калта найзалар, ойболта ва пилта милтиқлар

билан қуролланган оломон тўпланганини кўрди. Баъзиларининг қўлларида пилта милтиқ, кўплари думалоқ қалқонлар кўтариб олишган. Пастга тушгач, байроқни, ундаги тамғани кўриб қолди. Унинг диққатини ҳангровчи эшак тасвирланган оқ шоҳи байроқ кўпроқ тортди. Эшакнинг атрофига шундай сўзлар ёзилган эди:

Эшак бўлиб бемақсад  
Ҳангради икки аҳмоқ.

Шу пайт дон Кихот улар ўзларига озор берганларга қарши жангга отланган ҳангровчиларнинг ҳамқишлоқлари эканлигини фаҳмлади.

Бундай ҳодисаларга аралашишга тоқати бўлмаган Санчонинг ранжишига қарамай дон Кихот сипарини кўтариб, олижаноб ва жасур қиёфада эшак тасвири туширилган байроққа яқинлашди. Аскарбошилар бу одам ўз тарафдоримиз деб ўйлаб, унинг атрофини қуршашди. Улар дон Кихотга индамай ҳайрат билан тикилиб туришаверди. Дон Кихот ҳеч ким гапиришга журъат қилолмай индамай турганидан фойдаланиб, баланд овоз билан шундай гап бошлади:

— Саховатли сеньорлар, сизларга бир-икки оғиз гап айтмоқчиман ва ўтиниб илтимос қиламан: гапимни бўлманглар. Борди-ю гапларим сизга унча ёқмаса ишора қилиб қўйсаларинг бас, ўша заҳотиёқ оғзимга муҳр босиб, тилимни жиловлаб қўяман.

Ҳамма эътибор билан қулоқ солишга ваъда берди. Шундан сўнг дон Кихот гапида давом этди:

— Сеньорлар, мен — жаҳонгашта рицарман, касбим — ҳарбий машғулот, вазирам — ожизларга ҳомийлик қилиш, бахтсизларга ёрдам бериш. Бундан бир неча кун муқаддам бошингизга тушган қулфатдан ҳамда қўлга қурол олиб ўзларингизни хафа қилганлардан ўч олиш ниятингиз борлигидан хабар топдим. Сизларнинг ишингиз ҳақида жуда кўп, узок мулоҳаза юритдим, ниҳоят ўзларингизни ҳақоратланган деб ҳисоблашга ҳеч қандай асосларинг йўқ деган хулосага келдим, чунки якка бир киши ҳеч қачон бутун бир жамоани таҳқирлай олмайди. Обод мамлакатдаги ақлли кишилар фақат тўрт хил тақдирдагина қилич яланғочлаб ўз жонини, молу мулкни фидо қилиши мумкин: биринчидан, католик динимизни ҳимоя қилганда; иккинчидан, ўз ҳаётини муҳофаза қилганда, чунки илоҳий ҳамда азалий қонун амри ҳам шу; учинчидан, ўз номусини, оиласини, молу мулкни ҳимоя қилганда; тўртинчидан, ватанни ҳимоя қилганда. Албатта, бунга яна қўлга қурол олиб ҳимоя қилишга арзийдиган адолатли, оқилона нарсаларни ҳам қўшиш мумкин. Бироқ сира ранжита олмайдиган, арзимаган нарса, ҳазил, пичинг учун соғлом ақлдан маҳрум кишиларгина қуролланиши мумкин. Бунинг устига адолатсиз ўч олишни излаш (адолатли ўч олиш умуман йўқ) душманларга яхшилик қилиш, бизни кўролмайдиганларни севишни талқин қилувчи муқаддас динимизга қарши бориш демакдир. Кўпларга ана шу тариқатга риоя қилиш қийин-

га ўхшаб кўринади, фақат бу кишилар худодан кўра бу дунё ишларини кўпроқ ўйлаганидан шундай бўлади.

— Жин урсин мени,— деди Санчо Панса ўзича,— хўжайиним кип-қизил художўйнинг ўзгинаси экан-ку. Иккита тухум бир-бирига қандай ўхшаса, у ҳам художўйга шунчалик ўхшайди.

Дон Кихот эса озгина нафасини ростлаб олди, ҳамма одамлар гапга жим қулоқ солиб турганларини кўриб сўзида давом этмоқчи бўлди. Лекин шу пайт ўз донолигини кўрсатишга ошиққан Санчо сабри чидамай хўжайинининг гапини бўлди.

— Хўжайиним ламанчилик дон Кихот,— деб гап бошлади у,— бир вақтлар Ғамгин Қиёфа рицарь, хозир эса Шерлар рицари деб аталган жуда ақлли идальго, у лотин тилини ҳар қандай баккалаврдан ҳам яхши билади. Бундан ташқари, у тажрибали жасур жангчи, яккама-якка жангнинг барча қонун-қоидаларини беш қўлда билади. Шу сабабли унинг маслаҳатига кирганларинг маъқул. Аҳмоқ одамлар эшак бўлиб ҳанграб ғашларингга тегишса хафа бўлмасаларинг ҳам бўлади. Эсимда бор, ёшлигимда ҳеч ким сўрамаса ҳам жуда қойил қилиб ҳанградим. Буни эшитиб қишлоғимиздаги ҳамма эшаклар ҳанграб юборишарди. Бироқ бу ишим хурматли ота-онамга ўғил бўлиб қолишимга заррача бўлсин халақит бермасди, аксинча қишлоқнинг ҳамма ёшлари менинг санъатимни ҳавас қилишарди. Агар менинг бу гапимга қаноат ҳосил қилмоқчи бўлсаларинг сабр қилиб қулоқ солинглар. Эшакка ўхшаб ҳанграшни ўрганиш сузишни ўрганишдай бир гап: кимки бу санъатни яхши эгаллаган бўлса, ҳеч қачон унутмайди.

Шу пайт у бурнини қўли билан беркитиб шундай ҳанградики, унинг акс садоси қўшни водийларгача таралди. Лекин унинг бу қилиғи жуда қимматга тушди. Қандайдир бир деҳқон Санчо масхара қилиб ҳангради деб ўйлаб, таёғини кўтариб шундай туширдик, Санчо Панса ерга ўликдай гушпа қулади.

Дон Кихот яроқбардорига кўмаклашишга ташланди, лекин бир гала деҳқон бир зумда уларни ажратиб ташлади. Рицаримизнинг бошига тош ёмғири ёғилди, кўплаб пилта милтик ва ой-болталар унга ўқталинди. Ғазабга минган деҳқонларга бас келолмаслигини билган дон Кихот Росинантнинг бошини орқага буриб қочиб қолди. У бирорта дайди ўқ орқамга келиб тегмасин деб худога илтижо қилиб борарди. Лекин оломон унинг қочиб қолганидан қаноат ҳосил қилганди: орқадан ҳеч ким ўқ узмади. Деҳқонлар Санчога ҳам шэфқат қилишди: у ўзига келиши биланоқ эшакнинг устига ортишиб, келган томонига ҳайдаб юборишди. Яроқбардорнинг эшакни ҳайдагани мадори йўқ эди, лекин у Росинантнинг изидан ўзи аста бормоқда эди. Бу орада дон Кихот анча масофага бориб, ҳеч ким орқасидан қувмаётганига ишонч ҳосил қилгач, Санчони кута бошлади. Деҳқонлар далада қоронғи тушгунча ўтиришди; душманларининг жанг қилишдан бош тортганларини кўриб, ўз қишлоқларига дабдаба билан кириб келишди. Агар улар қадимий юнонларнинг удумига амал қилишганда эди, ўша жойга ҳайкал ўрнатишарди.

Санчо эса эшагига аранг тармашганча, хўжайинининг олдига базўр етиб борди-ю, Росинантнинг оёғи тагига йиқилди. У қаттиқ калтакланганидан зўрға нафас оларди. Дон Кихот унинг жароҳатларини кўргани отидан тушди, лекин ҳеч қандай жароҳат нишонасини кўрмай ғазаб билан қичқирди:

— Жуда бемаҳалда ҳанградилар-да, Санчо! Ўзини осган одамнинг уйида арғамчидан гап очмаслик лозимлигини унутдингизми? Эшакчасига куйлашингизга таёқ жуда ҳам жўр бўлди-да. Шунчалик осон қутулиб қолганингиз учун худога шукур қилинг, Санчо.

— Жавоб қайтаришга ҳолим йўқ,— деди Санчо,— чамамда оғзим билан эмас, орқам билан гапираётгандайман. Тезроқ кетайлик. Энди эшак бўлиб ҳанграмайман, лекин жаҳонгашта рицарларнинг жанг майдонидан қочиб, саховатли яроқбардорларини душманнинг қўлига ташлаб кетишлари ҳақида индамай қололмайман.

— Чекиниш — қочиш эмас,— эътироз билдирди дон Кихот,— Санчо, шуни яхши билингки, ақл ишлатмай қилинган жасоратни аҳмоқлик дейдилар, ақлсиз одамнинг қаҳрамонлигини мардликдан кўра омад деб билиш керак. Мен чекиганимни, тан оламан, бироқ қочганим йўқ. Мен ўзини янада улуг ишлар учун эҳтиётлаган ботирларнинг йўлини тутдим, холос.

Шундан сўнг Санчо дон Кихотнинг ёрдамида эшагига миниб олди, дон Кихотнинг ўзи Росинантга минди, улар яқинроқда кўриниб турган бутазор томон кетишди. Гоҳ-гоҳ Санчо «ох», «воҳ» деб инграб қўярди. Нега инграшини сўраб дон Кихот берган саволга Санчо умуртқаси чидаб бўлмайдиган даражада оғриётганини айтди.

— Хўш,— деди дон Кихот,— нега оғриётганини уқдириш унча қийин эмас: сени йўғонроқ таёқ билан уришди, агар таёқ ундан ҳам каттароқ бўлганида оғриқ ҳам зўрроқ бўларди.

— Худо сақласин! — хитоб қилди Санчо. — Муҳтарам жаноблари катта бир шубҳани ҳал қилдилар. Ҳайрон қоласан киши, ўзим ҳам таёқ тегиб ўтган жойим оғриётганига шубҳа қилмайман. Чиндан ҳам, сеньор хўжайин, танаси бошқа дард билмас экан. Мен кундан-кунга муҳтарам жаноблари билан дарбадарликда юришдан ҳеч қандай наф кўрмаслигимга кўпроқ ишонмоқдаман. Бугун мени таёқлашларига йўл қўйдингиз, эртага эса бошимга яна чойшабда ўмбалок ошиш ёки шунга ўхшаш болалар ўйини тушар. Бугун орқамни таёққа тутган бўлсам, эртага худо кўрсатмасин, кўзим хиралашиб қолар. Бас энди, муҳтарам жаноблари, мен ўйлайманки хотиним, бола-чақаларим олдига қайтганим, уларни худо берган ризқи рўз билан боққаним маъқулроқ. Сиз муҳтарам жаноблари билан оч-наҳор қолиб, ташналик азобини тортиб қадам етмаган сўқмоқлар, одам боласи юрмайдиган йўлларда тентирамаганим яхши. Уйқу ҳақида гапирмасам ҳам бўлади! Яроқбардор оғайни, озгина мизғиб олгингиз келмаяптими? Ўзингизга етти қарич ер ўлчам олинг, кўпроқ керак бўлса яна етти қарич олақолинг. Марҳамат, тортинманг. Кўнглингиз қанча

тиласа, шунча жойни эгаллаб ўрнашиб олинг. Кимки жаҳонгашта рицарликни ўйлаб чиқарган бўлса, айниқса ким ўтган асрлардаги бефаҳм жаҳонгашта рицарларга яроқбардорлик қилишга розилик берган бўлса, оловда ёниб кули кўкка совурилсин. Ҳозиргилари ҳақида индамайман, чунки уларни жуда ҳурмат қиламан, сиз муҳтарам жаноблари ҳам шулар жумласига кирасиз, менга маълумки, ақлингиз зўр, шайтонга ҳам дарс бера оласиз.

— Гаров бойлашиб айтаманки, Санчо,— деди дон Кихот,— ҳозир сизнинг гапингизга ҳалақит бермай турганимда ҳар қандай оғриқни ҳам унутдингиз. Оғзингизга келганини валдирайверинг. Фақат сизнинг ҳеч қаерингиз оғримаса бўлгани, мен эса ҳар қандай қўполлик қилсангиз ҳам бажонидил бардош бераман. Лекин уйга, бола-чақангиз олдига қайтишни истасангиз, худо урсин агар, йўлингизни тўсмайман. Пулларим ўзингизда: қишлоқдан учинчи сафарга чиққанимизга неча кун бўлганини, хизматингиз учун қанча пул тегишини ҳисобланг-да, ўзингизга ўзингиз ҳақ тўланг.

— Сиз яхши танийдиган, баккалавр Самсон Каррасконинг отаси Том Карраскода хизмат қилганимда,— деди Санчо,— еган овқатимдан ташқари ойига йигирма реал ишлардим. Лекин сиз муҳтарам жанобларидан қанча ҳақ сўрашга ҳайронман; шуни биламанки, деҳқоннинг батраги бўлишдан жаҳонгашта рицарнинг яроқбардори бўлиш анча оғир. Тўғри, деҳқоннинг қўлида кундузи ишлаб, кечқурунлари овқатланиб бўлиб, тўшакда ётардик, марҳаматли жанобларининг хизматларига ўтганимдан бери кўрпа-ёстиқ нималигини билмайман. Доим шамол-бўронларга бардош бериб, очиқ ҳавода, қуруқ ерда ётиб ухлайман; қаттиқ нон, қуруқ пишлоқ билан тирикчилик қилдим, йўлимизда учраган ариқлардан сув ичдим.

— Тан оламан,— деди дон Кихот,— Санчо, сиз айтган гапларнинг ҳаммаси чин ҳақиқат. Фикрингизча, Том Карраско сизга тўлаган ҳаққа яна қанча қўшимча қилишим мумкин?

— Менимча,— жавоб қилди Санчо,— агар муҳтарам жаноблари ҳар ойга икки реалдан қўшиб берсалар етарли бўлади. Лекин бу фақат ойликнинг ўзи. Бундан ташқари муҳтарам жаноблари биронта орол губернаторлигини ҳам ваъда қилгансиз. Ана шунинг ўзига адолатли равишда яна олти реалдан қўшиш керак, ҳаммаси бўлиб ҳар ойга яхлит ўттиз реалдан тўғри келади.

— Жуда соз,— деди дон Кихот.— Биз қишлоқдан йигирма беш кун муқаддам йўлга чиққанмиз. Энди сиздан қанча қарздорлигимни ҳисобланг, Санчо, ҳамда ўзингизга тўланг.

— Эҳ, худо ярлақагур! — деди Санчо.— Муҳтарам жаноблари ҳисоблашда қаттиқ адашяптилар. Ваъда қилинган орол учун тўловни ваъда берган кунингиздан то шу бугунгача бўлган даврни ҳисоблаб тўлаш лозим.

— Ваъда берганимдан буён қанча вақт ўтди? — сўради дон Кихот.

— Агар янглишмасам,— деди Санчо,— йигирма йил бўлди ёки икки-уч кун ортиқроқ ҳам.

Дон Кихот пешанасига шапиллатиб урди, қаҳ-қаҳ уриб кулганича шундай деди:

— Ахир сафарларимизнинг ҳаммаси икки ойдан ҳам ортгани йўқ. Санчо, сен бўлсанг оролни йигирма йил илгари ваъда қилгансиз деб ўтирибсан! Энди билсам сенга омонат топшириб қўйган пулларимнинг ҳаммасини ўзингга олмоқчисан. Агар шундай бўлса дарров ол, худо омадингни берсин. Сенга ўхшаган ярамас яроқбардордан қутулсам чўнтагимда сариқ чақа қолмаса ҳам хурсандман. Жаҳонгашта рицарлик томонидан ёзилган қонунни бузган ҳой яроқбардор, қани айт-чи, жаҳонгашта рицарга, ўз хўжайинига хизмат қилиб туриб тўсатдан: «Менга қанақа ойлик белгилайсиз?» деб талаб қилган яроқбардорни бирор ерда кўрган ё ўқиганинг борми? О қароқчи, қўрқоқ, расво махлуқ! Агар бирорта рицарлик романида сен айтган гапларни айтган ёки кўнглига келтирган бирорта яроқбардорни учратган бўлсанг, ана шу сўзларни пешонамга ўйиб ёзишингга, яна бир неча тарсаки ҳам тортиб юборишингга рухсат бераман. Эшагиннинг жиловини торт-у, уйингга қайтиб кетавер. Энди мен билан бир қадам ҳам йўл юрмайсан. Тузимни оқлаганинг шуми! Сендақа одамга ваъда бериб юрибманми ҳали! Эҳ, ҳайвонга ўхшаган одам! Бу қандай бўлди? Хотинингнинг қаршилигига қарамай сени сеньор қиламан деб қаттиқ аҳд-паймон этган бўлсам-у, сен мени ташлаб кетсанг? Бир вақтлар эшакни асал билан боқмайдилар деб ҳақ гапни айтган экансан. Ўзинг эшак эдинг, ҳозир ҳам эшаксан, умрингнинг охиригача ҳам эшаклигингча қоласан.

Дон Кихот Санчони сўкаётганда яроқбардор унга кўзини лўқ қилиб қараб турди. Ниҳоят у шундай виждонан азобландики, кўзларида ёш йилтиради, у ожиз, ҳаста овоз билан гап бошлади:

— Сеньорим, тан бериб айтаман, менда дум йўқ холос, бўлмасам чинакам эшакнинг ўзиман. Истасангиз, муҳтарам жаноблари, менга дум улаб қўйинг, шунда уни ўз жойига тушди деб биламан ва муҳтарам жанобларига умримнинг охиригача эшакдай хизмат қиламан. Мени афв этинг, марҳаматли жанобим, мен аҳмоққа раҳмингиз келсин. Билимим камлигини эътиборга олинг, кўп гапирганим алаимдан эмас, ожизлигимдан; кимки гуноҳ қилиб қўйиб уни ювиб юборса, худо уни кечиради.

— Санчо, мақолсиз гапирганингда ажабланган бўлардим. Майли, агар тузалишга ваъда бераётган бўлсанг сени кечираман; лекин шуни билиб қўйки, олдиндан ўз манфаатинг учун бунчалик жон куйдирма. Жасур, сабрли бўл, гарчи ваъда қилинган нарса анча кечикиб кетаётган бўлса ҳам бардам бўл, ноумид бўлма.

Санчо итоаткор бўламан, ҳар қандай кулфат юз берганда ҳам бардам бўламан, деб жавоб қилди. Шундай қилиб, рицарь билан яроқбардор ярашишди ва яна йўлларига равона бўлишди. Кўп ўтмай улар серсоя бутазорга етиб боришди-да, қайрағоч ҳамда шамшод дарахтлари тагида дам олиш учун чўзилишди. Санчо тунни зўр азобда ўтказди, тунги шабада унинг кўкарган жойларини зирқиратиб огритарди. Дон Кихот эса одатдагидек ўз хаёл-



ларига берилди. Лекин бора-бора уларнинг кўзлари юмилди ва иккови ҳам қаттиқ уйқуга кетишди.

### XLIII БОБ

#### СЕХРЛАНГАН ҚАЙИҚДАГИ ҒАРОИИБ САРГУЗАШТ

Икки кундан сўнг дон Кихот билан Санчо Эбро дарёси соҳилига етиб келишди; рицаримиз дарёнинг кўз қамаштирувчи тўлқинларини ва бир текисда оқишини ҳузур қилиб томоша қилди. Бу роҳатбахш манзара унда кўпдан-кўп севги туйғуларини уйғотди; айниқса Монтесинос ғорида кўрганлари кўз олдида яққол гавдаланди. Гарчи маъса Педронинг маймуни унинг кўзига кўринган нарсаларнинг ҳаммаси ҳам ҳақиқат эмаслигини айтган бўлса-да, у ҳанузгача буларни чин ҳақиқат деб ишонарди. Лекин Санчо унинг ҳикоялари бутунлай уйдирма эканлигини ҳадеб таъкидларди. Улар дарё соҳилида аста-секин юриб боришаётиб соҳилдаги боғлаб қўйилган эшкаксиз, чоғроққина қайиққа кўзлари тушди. Яқин ўртада ҳеч кимса кўринмасди, уй ҳам йўқ эди, қайиқнинг эгаси ким бўлдийкин? Дон Кихот атрофга назар ташлади; атрофда ҳеч кимни кўрмагач, Росинантдан сакраб тушди-да, Санчога эшакдан тушиб, ҳар иккала ҳайвонни яқинроқдаги теракка боғлашни буюрди.

Ҳайрон бўлган Санчо рицардан бу буйруқнинг маъносини сўради. Дон Кихот шундай жавоб қилди:

— Шуни билгинки, Санчо, қирғоққа сузиб келган бу қайиқ мени бирорта рицарга ёки бошига қулфат тушган бошқа бир аслзода хонимга ёрдам бериш учун шошилишга чақирмоқда. Рицарлик романида доим шундай бўлади: борди-ю, бирорта рицарга ҳалокат даф қилаётган бўлса, уни бошқа бир рицарь қутқариши керак, сеҳргарлар унга ажойиб қайиқни юборади, қайиқ бир зумда ёрдам зарур бўлган жойда пайдо бўлади. Санчо, ана шунинг учун ҳам сен қайиқни кўриб турибсан: бу қайиқ менга юборилган, албатта; бу кундай равшан ҳақиқат, хуллас, ҳали кун ёруғ экан, эшак билан Росинантни дарахтга боғла, худо ҳамиша бизга ёр бўлади.

— Нима ҳам дердим,— деди Санчо,— муҳтарам жаноблари янги бир телбанамо ишни бошлаган бўлсалар, у кишининг буйруқларини бажаришдан ўзга иложим йўқ, бир мақолда, хўжанг амрига итоат қилу у билан бир дастурхонда ўтир, дейиларди, шу сабабли қуллуқ қилиб бош эгаман. Бироқ нима бўлса-да, виждонимни поклаш учун сизга маълум қиламанки, қайиқ менимча сеҳрланмаган. Буни қандайдир балиқчилар дарахтга шунчаки боғлаб қўйишган, ахир бу дарёда балиқ жуда кўп-да.

Шундай бўлса-да, Санчо дон Кихотнинг буйруғини бажо келтирди. Эшагини сеҳргарларнинг ҳомийлигига ташлаб кетиш унга жуда малол келди.

— Мана, ишлар битди,— деди Санчо.— Энди нима қиламиз?

— Нима қиламиз дейсанми?— деди дон Кихот.— Чўқиниб олиб, қайиққа ўтирамизу арқонни кесиб юборамиз.

Шундай деб у қайиққа сакраб чиқди, Санчо ҳам чиқиб олгунча кутиб турди-да, кейин арқонни кесиб юборди, қайиқ эса соҳилдан аста-секин узоқлаша бошлади. Дарёнинг ўртасига борганда Санчо юз бериши лозим бўлган ҳалокатни ўйлаб даҳшатдан қалтираб кетди. Лекин эшагининг ҳанграшини, Росинантнинг бойлоқ турган ерида депсинишини кўриб аламига алам қўшилди. У дон Кихотга юзланиб, хитоб қилди:

— Бечора эшагим! У ташлаб кетганимизга ҳанграяпти. Росинантингиз бўлса тизгинни узиб орқамиздан чопишга ошиқяпти. О, азиз дўстларим, соғ-саломат қолинглар! О, агар худонинг иродаси билан сизларни ташлаб кетаётган бўлсак, бу — тентакликнинг ўзгинаси! О, тезроқ ёнларингга қайтсак эди!

Шу пайт у аччиқ-аччиқ йиғлай бошлади, дон Кихотнинг эса жаҳли чиқиб, ғазаб билан бундай деди:

— Ҳой кўрқоқ махлук, нимадан кўрқясан? Ҳой латта юрак, нега йиғляясан? Ким сени таъқиб қилиб, ким орқангдан қувапти, каламуш юрак? Сенга нима кам, нимага муҳтожсан, ахир мўлкўлчиликда роҳат қилясан-ку? Сен яланг оёқ бўлиб тоғ-тошда кетясанми, худди ҳукмдор князь сингари ажойиб қайиқда бир текисда сузиб кетясан-ку ахир? Тўлқинлар ҳадемай бизни очиқ денгизга олиб чиқади. Дарвоқе, биз аллақачон денгизда бўлсак керак, ахир саккиз юз миляча сузиб қўйдик-ку. Афсуски ёнимда астролябиям йўқ, бўлмасам қанчалик улкан масофани босиб ўтганимизни аниқ айтиб берардим сенга. Эҳтимол, биз икки қутбдан баробар масофада ерни ажратиб турадиган минтақадан ўтган бўлсак керак.

— Роҳат-фароғат минтақасига қачон етамиз, — сўради Санчо, — унда қанча миля босиб ўтамиз?

— Кўп юрамиз, — деди дон Кихот, — чунки космографларнинг энг машҳури бўлган Птолемей<sup>79</sup> ҳисобига кўра сув ва ер сатҳи уч юз олтмиш градусга тенг, сен билан мен юқорида зикр қилинган чегарадан ўтарканмиз, ропша-роса ўша масофанинг ярмини босган бўламиз.

— Чакки эмассиз, — деб хитоб қилди Санчо, — аллақандай графми ё шунга ўхшаган бир муҳтарам зотнинг гапига амал қиляпсиз-а!

Дон Кихот Санчонинг космограф Птолемейнинг номини айта олмаганидан кулиб шундай деди:

— Менга қара, Санчо, қачонки бизнинг испанлар Кадиксдан Шимолий Ҳиндистон томон сузиб боришса, ер шарининг тенг иккига бўлинадиган чегарасини осонгина билиб олишади, ўшанда саёҳатчилардаги ҳамма битлар ўлади, уларни кема ичида ахтариб пулга ҳам топа олмайсан. Санчо, уёқ-буёғингни қара-чи, агар ҳеч нарса тополмасанг, демак биз ўша чегарадан ўтиб кетган бўламиз.

— Бу нарсага ҳеч қачон ишонмайман, лекин буйруғингизни бажараман, — деди Санчо. — Мен тушунолмай қолдим, бу тажрибаларнинг нима кераги бор? Ахир, гуноҳкор кўзларим кўриб турибди, биз қирғоқдан бир неча саржин узоқлашдик, холос. Ана, Росинант билан эшак ҳам турибди. Бир кўзингиз билан

чамалаб кўрсангиз, тошбақадай имиллаб кетаётганимизга ишонасиз-қўясиз.

— Санчо, сен мен айтган тажрибани бир қилиб кўр, бошқасини қўявер: барибир сен колурия, параллеллар, бурж, қутблар, эклиптика деган нарсаларни билмайсан. Бўлмаса биз қанча параллелни босиб ўтганимизни, қанча бурж белгиларини кўрганимизни, анчагина юлдузлар туркуми орқада қолиб кетганини аллақачонлар билган бўлардинг. Шунинг учун гап ташламай, ўзингда бит бор ё йўқлигини текшир. Ишончим комилки, сен оқ қоғоздан ҳам пок, мусаффосан.

Санчо астагина оёгини пайпаслай бошлади. Ниҳоят у бошини кўтариб, ўз хўжайинига қаради ва шундай деди:

— Ё сизнинг тажрибангиз икки пулга арзимаиди, ё мухтарам жаноблари айтган жойга ҳали анча миля бор.

— Қандай?— деб сўради дон Кихот.— Сен бирорта битни ушладингми?

— Битга эмас, анчагина ушладим,— деди Санчо.

Шу пайт у қўлига илашган нарсани силкиб ташлади, қўлини сувга чайқаб олди. Бу орада қайиқ дарёнинг ўртасида аста сузиб борарди, уни сирли куч ҳам, кўзга кўринмас сеҳргар ҳам эмас, балки текис ва силлиқ дарё оқими ҳаракатга келтирмоқда эди.

Шу пайт узоқдан тўғон билан бир неча тегирмон қораси кўринди. Бунга кўзи тушган дон Кихот қичқириб юборди:

— Кўряпсанми, дўстим, ана, қаршимизда азоб чекаётган рицарь, ўғирланган қиролича ёки малика сақланаётган шаҳар қаср ё қалъа кўринмоқда, мен уларга ёрдам бериш учун юборилганман.

— Э жин урсин, қанақа шаҳар, қаср ё қалъа ҳақида гапиряпсиз, сеньорим?— деди Санчо.— Ахир, булар буғдой тортадиган сув тегирмонлари эканлигини наҳотки кўрмаётган бўлсангиз?

— Жим бўл, Санчо,— деди дон Кихот,— улар тегирмон бўлиб кўрингани билан аслида тегирмон эмас, ахир сенга айтганман-ку, сеҳргарлик кучи ҳар қандай нарсани ҳам ўзгартириб кўрсатади деб. Мен бир нарсани чиндан ҳам иккинчи бир нарсага айланиб қолади демоқчи эмасман, улар бизнинг кўзимизга бошқача бўлиб кўринади. Барча орзу-умидларимнинг бирдан-бир паноҳи Дульсинеянинг бошқа одам қиёфасига кириб қолганини эслагин.

Бу орада оқим қайиқни ўз оғушига олиб, чирпирак қилиб оқизиб кета бошлади. Тегирмонда ишлаётган тегирмончилар қайиқнинг гирдобга тушиб қолганини, ҳадемай дабдала бўлишини билиб, саёҳатчиларимизни ўз вақтида ушлаб олиш учун тўғон бошига чиқишди ва қўлларига узун чангаклар олишди. Уларнинг ҳаммаси бошдан-оёқ унга беланганидан узоқдан ажиналарга ўхшаб кўринишарди. Улар саёҳатчиларга қичқиришди:

— Ҳой, қаёққа кетяпсизлар? Жонларингдан тўйдиларингми? Тегирмон парраги тагида ўлгиларинг келдимиз?

— Хўш, сенга нима деб эдим, Санчо!— деди дон Кихот.— Мана, ниҳоят бутун кучимни, ботирлигимни кўрсатадиган жанг

бўлади. Қара, йўлимизни қанчадан-қанча махлуқлар тўсиб тир-жайиб туришибди! Ҳозир, ҳаммангнинг таъзирингни бераман, ярамаслар!

Сўнгра у қайиқда типпа-тик турганича тегирмончиларга ўшқирди:

— Ёвуз, маккор махлуқлар, зиндонингизда азобланаётган кишини дарҳол озод қилинг. У эрақкми ё хотинми, аслзодами ё оддий одамми — менга барибир: мен азобланувчининг дарҳол озод қилинишини талаб қиламан. Мен — ламанчлик дон Кихот, бошқача номим Шерлар рицариман, мана шу саргузаштни хайрли ниҳоясига етказиш менга насиб қилган.

Ана шу сўзларни айтгач, қиличини қинидан суғуриб, ҳавода ўйната бошлади. Тегирмончилар эса бу алжишларнинг маъносига тушунмай, гирдоб билан тегирмон парраги тагига кириб кетаётган қайиқни чангак билан ушлаб қолишга интилишди.

Санчо тиз чўкиб, халос этишини сўраб худога илтижо қила бошлади. Чиндан ҳам у қутулиб қолди, ўша заҳоти тегирмончилар қайиқни чангаклар билан ушлаб, тўғон томонга тортишди. Бироқ турткининг зарби билан қайиқ ағдарилиб кетди, дон Кихот билан Санчо шалоп этиб сувга тушишди. Гарчи дон Кихот сузишни ўрдақдан яхши билса ҳам қуроолларининг вазминлигидан сувга гарқ бўлишига сал қолди. Санчо эса сузишни мутлақо билмасди. Агар тегирмончилар ўзларини сувга ташлаб, уларни қутқариб қолмаганларида, рицарь билан яроқбардор шу ернинг ўзидаёқ ҳалок бўлишарди. Ўзини соҳилда кўрган Санчо яна тиз чўкиб, қўлини кўтариб, кўзларини осмонга тикканича худога узундан-узқ илтижо қила бошлади ва дон Кихотнинг бемаъни қилмишларидан асрашни ёлвориб сўради.

Шу пайт қайиқнинг эгаси бўлмиш балиқчилар етиб келишди. Тегирмончилар дўстларимизни қутқаргунча оқим қайиқни тегирмон парраги тагига оқизиб кетди, натижада қайиқ пачақ-пачақ бўлди. Ҳазабдан ўзини йўқотган балиқчилар Санчога ташланишди ва унинг кийимларини ечиб ола бошлашди. Дон Кихотни ҳам ҳақорат қилишиб, ундан товон тўлашни талаб қилишди. Рицаримиз тегирмончилар ва балиқчиларга совуққонлик билан, агар улар қалбаларидаги асир ёки асирани бўшатиб юборишса, товонни бажонидил тўлашга тайёр эканлигини айтди.

— Қанақа қалъаю қанақа асирларни гапиряпсан, каллаварам?— деди тегирмончилардан бири.— Тегирмонда ун тортиш учун келган иккита деҳқон бор, холос.

— Ба!— деди дон Кихот ўз-ўзига.— Бу ёвузларни яхшилик қилишга ишонтириш фойдасиз. Бу тошга азон айтиш билан тенг нарса. Бу саргузаштда икки қудратли сеҳргар бир-бирига дуч келиб қолганга ўхшайди. Ҳар қайсиси иккинчисига халал беришга интилади: бири орқамдан қайиқ юборган бўлса, иккинчиси унинг пачоғини чиқарди. Олам бекорга душман ҳийлалари, фитнес-фасодларига тўла эмас. Бу ерда фақат худо қўллаши мумкин, ўзим ҳеч нарса қилолмайман.

Сўнгра тегирмонга юзланиб шундай деди:

— Бу зиндонга қамалган дўстларим, ким бўлсангиз ҳам мени афв этинглар. Ўзингиз ва менинг бахтимга қарши сизларни бу ёвуз асирликдан қутқара олмайман. Бундай жасоратни кўрсатиш бошқа бир рицарга насиб қилса керак.

Кейин, бир оз тинчлангач, балиқчилар билан гаплашди, қайиқ учун эллик реал берди. Санчо бу пулни пўнғиллаб, афтини бужмайтириб аранг узатди.

— Агар сувда яна бир марта шунақа сайр қиладиган бўлсак ҳамма пулларимиз сувга чўқади.

Балиқчилар билан тегирмончилар иккала ажойиб оғайнига ҳайрат билан боқишар, дон Кихотнинг нималар ҳақида гапираётганини тушунолмасдилар. Ниҳоят, буларнинг тентаклигига ишонч ҳосил қилиб, уларни ўз ҳолига қолдиришди-да, ҳар ким ўз жойига — баъзилар тегирмонга, баъзилар балиқчи кулбасига қайтишди. Дон Кихот билан Санчо бўлса ташлаб келган ақлсиз жониворларини қидириб кетишди. Китобхон кўриб турибдики, ҳар иккала дўстимиз ҳам ақллилик даъвосини қила олмасалар керак.

#### XLIV БОБ

##### ДОН КИХОТНИНГ ГЎЗАЛ ОВЧИ АЕЛ БИЛАН УЧРАШГАНИ

Рицарь ва яроқбардор жуда маънос ҳолда ўз йўрғалари ёнига келишди. Айниқса Санчонинг таъби хира эди: балиқчиларга берилган пулга ниҳоятда ачинарди. Хўжайин киссасидан пул чиқариб оладиган бўлса юраги нақ ҳиқилдоғига келарди, пулдан айрилгандан кўра кўзларини ўйиб бериш осонроқдай туюлар эди унга. Бир-бирларига бирон сўз қотмай иккала дўстимиз Росинант ва йўрғатойни ечишиб, машҳур дарё соҳилини тарк этишди. Дон Кихот ўз муҳаббати хаёлига, Санчо бўлса порлоқ келажаги ҳақидаги орзуга чўмиб кетди. Бироқ, Санчога бу ширин орзулар айниқса шу пайтда бефойда, пучдек туюлар эди. Чунки, Санчо гарчи анқовроқ бўлса ҳам ўз хўжайинининг ҳамма ёки деярли барча хатти-ҳаракатлари бошдан-оёқ тентакликдан иборат эканлигини яхши биларди. Шунинг учун унинг бошига дон Кихот билан хайр-маъзурни насия қилиб, ўз ҳақидан кечиб уйга жўнаб қолиш фикри тобора кўпроқ кела бошлади. Аммо воқеалар унинг ўйлаганидан бошқача бўлиб кетди.

Иккинчи куни кечга яқин дон Кихот ўрмон этагида бир гуруҳ овчиларни кўриб қолди. У яқинроқ борди, шунда уларнинг орқасидаги гўзал аёлга кўзи тушди. У аёл устига яшил ёпинчиқ тўшалган, эгарлари кумушдан жимжимадор безатилган оппоқ от устида ўтирарди. Аёлнинг ўзи ҳам бошдан-оёқ яшилга бурканган эди, бунинг устига шундай кўркам ва гўзал эдики, гўё нафосат, назокат мужассамлангандек туюларди; унинг чап қўлида лочин бор эди. Дон Кихот бу аёлнинг мўътабар зот эканлиги ва бошқалар унинг хизматқори эканлигини англади. У Санчога шундай деди:

— Югур, бўтам Санчо, оқ от устида чап қўлига лочин қўндириб ўтирган ўша аёлга менинг Шерлар рицари эканлигимни, унинг беқийс гўзаллиги олдида эҳтиром билан таъзим этаётганимни айт. Агар муҳтарама хоним рухсат этсалар, қўлларини ўпиш ва зоти олийлари нимаики буюрсалар бажо келтиришга қодир ҳолда ҳузурларига бораман. Лекин, билиб қўй, Санчо, одоб сақлаб сўзла, гапинга бирор бемаъни мақол қўшишни хаёлингга келтира кўрма.

— Хўп масхаравозни топибсиз-да! — жавоб қилди Санчо. — Сиз буни кимга гапиряпсиз? Мўътабар ва ёши улуг хонимлар ҳузурига биринчи бор бораётганим йўқ-ку!

— Мен сени фақат сеньора Дулисинея олдига юборганман, холос, — деди дон Кихот. — Назаримда менда хизмат қилаётганингдан бери бошқа ҳеч қандай топшириқ бермаган бўлсам керак.

— Буниси-ку тўғри-я, — жавоб қилди Санчо, — тўлаб турсанг бир меъёр, қанча бўлса қарз тайёр, тўкин уй — тўкин уй. Мен сизга айтмоқчи бўлганим: панд-насиҳатларга ортиқча эҳтиёжим йўқ, ҳамма нарсани яхши биламан ва бинобарин ҳамма вақт беҳато иш тутаман.

— Бунга имоним комил, Санчо, — деди дон Кихот, — бора қолгин энди, — худонинг ўзи ёр бўлсин.

Санчо елдек учиб, гўзал аёл ёнига келди, йўрғасидан ирғиб тушиб таъзим қилди-да, деди:

— Гўзал сеньора, ҳу анови ерда Шерлар рицари номли рицарь турибди. У менинг хўжайиним, мен эса унинг яроқбардориман, исмим Санчо Панса. Яқингача Ғамгин Қиёфа рицарь деб, ҳозир эса Шерлар рицари деб аталган ана шу рицарь мени йўллаб, муҳтарама хонимнинг ҳузурларига боришимга ва орзуларини ўринлатишга рухсат этиш-этмасликларини билиб келгин дедилар. У кишининг орзулари, айтишларига қараганда ва менинг ҳам ўйлашимча, сиздек ифбатли ва гўзал зотга содиқ хизмат қилишдир. Сизга хизмат қилиш у кишига насиб этгудек бўлса, мамнун бўласиз, зотан менинг хўжайиним илтифотингизни юксак марҳамат, катта бахт деб ҳисоблайди.

— Садоқатли яроқбардор, зиммангиздаги вазифани бундай вазият тақозосига кўра беками-кўст ижро этдингиз, — жавоб қилди аёл. — Ўрнингиздан туринг! Биз кўп нарсалар эшитган Ғамгин Қиёфа буюк рицарь яроқбардорининг бундай тиз чўкиб туриши ярашмайди. Туринг дўстим, хўжайинингизга бориб айтингки, у киши айни вақтда келганлар, мен ва эрим герцог ҳурматли рицарни шу яқиндаги ёзги саройимизда қабул қилиш билан ўзимизни бахтиёр деб биламиз.

Санчо ўрнидан турди. У саховатли сеньоранинг чиройи, лутф-карамидан ҳайратда қолган эди. Аммо аёлнинг Ғамгин Қиёфа рицарь ҳақида кўп нарса эшитгани Санчони айниқса ажаблантирган эди. Тўғри, у идальгони Шерлар рицари деб атамади, бу дон Кихотнинг янги лақабни яқиндагина олганлигидандир.

Санчо Пансанинг султ турганини кўриб герцог хоним ўз таклифини қайтарди:

— Борақолинг, иним Панса, хўжайинингизга айтингики, биз учун бундай жасоратли рицарнинг ташриф буюришларидан ортик дунёда шодлик бўлмас, мулки паноҳимизга хуш келсинлар.

Бу жозибали сўзларни эшитган Санчо хурсанд бўлиб хўжайини ёнига шошилди ва олиҳиммат сеньора нима деган бўлса, ҳаммасини унга етказди. Санчо содда, самимий ибораларда хонимнинг гўзаллиги, мулойимлиги ва лутф-карамани кўкларга кўтариб мақтади. Дон Кихот қаддини ростлаб оёқларини узангига қўйди, сипарини тўғрилаб, Росинантнинг биқинига ниқтади ва сиполик билан герцогиня томон, унинг қўлларини ўпиш учун жўнади. Герцогиня бўлса эрини чақириб дон Кихотнинг элчи йўллаганини айтиб берган эди. Улар майнавозлик, эрмак қилиш учун унинг ғалати қилиқлар, телбалик қилишга қўйиб беришмоқчи, токи меҳмон бўлиб турар экан, у нима деса маъқуллаб, унга жаҳонгашта рицарга хос муомала қилмоқчи, рицарь романларида тасвирланган барча маросимларга риоя қилишмоқчи бўлишди — улар рицарь романларини кўп ўқишар ва бундай китобларга ихлосманд эдилар.

Шу орада дон Кихот сипарини кўтариб уларнинг яқинига келиб қолди ва шошилаётганини билдириб, Санчога узангиларни ушлаб туришга ишора қилди. Лекин Санчо танг ҳолда қолди: у эшагидан тушаркан, эгар-жабдуқларига ўралишиб боши ерга осилганича қолди. Дон Кихот эса Санчо келиб узангини ушлаб турибди деган хаёлда оёғини даст кўтарган эди, бўш тортилган эгар билан отдан ерга гупиллаб ағдарилиб тушди. Хижолатдан довираб, жаҳл билан тупроққа беланиб типирчилар, оёқларини чиқаролмай ҳамон куймаланаётган бахти қаро Санчони сўқар, лаънатлар эди. Герцог рицарь ва яроқбардорига тезда кўмаклашишни овчи йигитларга буюрди. Улар дон Кихотни кўтариб турғизишди, у герцогиня ва герцог қаршисида қуллуқ қилиб тиз чўкмоқчи бўлганида герцог бунга эътироз билдирди ва отидан ирғиб тушиб дон Кихотни кучоқлар экан, шундай деди:

— Ғамгин Қиёфа рицарь сеньор, мулкимга муборак пойқадамингиз энди етганда бундай фалокатнинг содир бўлганидан ғоят афеусланаман. Лекин, яроқбардорларнинг эҳтиётсизлиги кўпинча бундан баттароқ фалокатларни ҳам бошга солади.

— Сиз билан учрашувни муваффақиятсизлик, фалокат деб бўлмайди, шавкатли ҳоким, — жавоб қилди дон Кихот. — Сизни кўриш шарафига муяссар бўлишни билгудай бўлсам жаҳаннам қаърига қулаганимда ҳам чиқиб келишга тайёрман, шавкатли ҳоким! Менинг яроқбардоримга тавқи лаънат бўлсин, найрангбозлик қилиб кўп валдирайди-ю, лекин қоринбоғни тарангроқ тортиб эгарни маҳкамлаш қўлидан келмайди. Бироқ ҳечқиси йўқ: оёқда тураманми, чалқанча ётаманми, отлиқми ёки пиёдами — барибир мен сизга бу ҳурматли рафиқангиз, гўзаллик ва беғубор лутф-иффат маликаси сеньора герцогиняга содиқ хизмат қилавераман.

— Ортиқча мақтаманг, сеньор ламанчлик дон Кихот. Биз сизнинг қахрамонликларингизнигина эмас, шунингдек гўзал Дульсинея Тобосскаяга бўлган садоқатингиз ҳақида ҳам кўп эшитганмиз. Донья Дульсинея бўлган жойда бошқа гўзаллар ҳақида гап юритишнинг ҳожати йўқ.

Шу орада Санчо оёғини сиртмоқдан бўшатиб олиб, суҳбатдошларининг ёнига келди. Дон Кихот герцогга ҳали жавоб қилишга улгурмасданоқ унинг яроқбардори гапга тушиб кетди:

— Сеньора Дульсинея Тобосскаянинг гўзаллигини рад этиб бўлмайди. Бироқ, кутмаганда олдиндан суқсур чиқиб қолади. Ахир биз табиат деб билган нарсани баъзи лойдан идиш ясайдиган кулолга ўшатишади, агар кулол лойдан бир идиш ясаган бўлса, у бундай идишдан иккитасини, учтасини ва юзтасини бемалол ясаши мумкин. Буни шунинг учун айтяпманки, худо ҳақи сеньора герцогинянинг хоними сеньора Дульсинея Тобосскаядан ҳеч қолишадиган жойи йўқ.

Дон Кихот герцогиняга мурожаат қилди:

— Рухсати карамингиз билан ахбори олиянгизга маълум бўлсинки, бирорта ҳам жаҳонгашта рицарнинг меникидек бунақа вайсақи, аскияга муккасидан кетган яроқбардори бўлмаган. Агар сиздек мўтабар зотга атиги бир неча кун хизмат этиш насиб бўлса, гапимнинг ростлигини биласиз:

Бунга герцогиня жавоб қилди:

— Агар барака топгур Санчо ҳазил-мутойибани яхши кўраркан, бунинг ҳеч ёмон томони йўқ. Аксинча, бу унинг нодон эмаслигини кўрсатади. Ўзингиз яхши билсангиз керак, муҳтарам сеньор дон Кихот, фаҳмсиз кишиларнинггина ҳазил-мутойибага майли бўлмайди, бинобарин хушкўнгил Санчо ҳазил-аскияни яхши кўраркан, демак у ақли расо одам.

— Ва маҳмадона одам, — илова қилди дон Кихот.

— Яна яхши, — сўзини илиб олди герцог, — кимки ҳазилкашлик қилмоқчи бўлса, у кўпроқ гапириши керак. Дарвоқе, гап-сўз билан вақт ўтказмайлик, илтимос қиламан, Ғамгин Қиёфа буюк рицарь, марҳамат қилинг...

— Жаноблари, яхшиси Шерлар рицари денг, — унинг гапини бўлди Санчо, — энди Ғамгин Қиёфа йўқ, бизда фақат шерларгина бор.

Герцог сўзида давом этди:

— Ҳа, сеньор Шерлар рицари, қалъамизга марҳамат қилсинлар. У ерда зоти олийларига муносиб марҳамат кўрсатишади.

Шу орада Санчо Росинантнинг эгарини қаттиқ тортиб тўғрилади. Дон Кихот отга минди, герцог чиройли отига сакраб чиқди-да, ҳаммалари қалъа томон кетишди. Яроқбардорнинг оқилона сўзлари беҳад ҳузур бағишлагани учун герцогиня Санчога ёнма-ён боришни буюрди. Санчо ортиқча ялентирмай, бирга боришга кўнди-да, толмас тилига эрк берди. Герцог ва герцогиня ўз қалъаларида машҳур жаҳонгашта рицарь ва унинг ажиб яроқбардорини қабул қилишни буюк бахт деб ҳисобладилар.



ДОН КИХОТ ВА ЯРОҚБАРДОРНИ ГЕРЦОГ ҚАСРИДА ҚАНДАЙ  
КУТИБ ОЛГАНЛАРИ

Герцог дон Кихотни яроқбардори билан бирга ўз қасрига таклиф қилди-ю, рицарни тантана билан кутиб олиш учун зарур бўлган фармойишларни бергани олдинроқ от чоптириб кетди. Мана, ниҳоят рицарь герцогиня билан қаср дарвозасига яқинлашар экан, ҳарир қизил шоҳидан башанг қилиб тикилган уқали кийим кийган икки малай ёки отбоқар пешвоз чиқди. Улар рицаримизни қўлтиғидан олиб Росинангдан туширишди-да, шундай дейишди:

— Жаноби олийлари, марҳамат қилиб сеньора герцогинянинг отдан тушишларига кўмаклашиб юборсалар.

Дон Кихот герцогиня томон ошиқди ва улар ўртасида ўзаро иззат-икром мусобақаси бошланди. Герцогиня машҳур рицарни овора қилишга ҳадди сиғмаслигини айтди. Рицарь тавозе билан унга жилмайиб, сўзида туриб олди. Герцог шахсан ўзи герцогинянинг узангисини ушлаб турди-ю, бу баҳсга чек қўйди. Сўнгра улар кенг, ичкари ҳовлига киришди. Бу ерда икки гўзал қиз улар ёнига келиб дон Кихотнинг елкасига ҳарир қизил мовутдан тикилган плаш ташлашди. Шу дақиқада ичкари ҳовлининг йўлагу пешайвонлари герцогнинг хизматкорлари билан тўлган эди, улар:

— Хуш келибсиз, жаҳонгашта рицарлар султони! — деб қичқир шарди.

Шу билан улар герцог ва унинг хотини ҳамда дон Кихотнинг устидан муаттар атирларни сепишарди. Бундай тантана билан кутиб олинишидан гоят таъсирланган рицаримиз ўзининг қандайдир бир сохта рицарь эмас, балки ҳақиқий жаҳонгашта рицарь эканлигига бутунлай ишонди. Чунки, романларда тасвирланганидек, ўтган асрларда жаҳонгашта рицарларга қандай муомала қилишса, ҳозир ҳамманинг у билан худди шундай муомалада бўлишаётганини кўриб турарди.

Герцогинянинг мулоим гапларидан эриб кетган Санчо эса, ундан сира ажралгиси келмас эди. У эшагини ташлаб, дон Кихот, герцог ва унинг хотинига эргашиб қасрга кирди; аммо ўзининг қадрдон эшагини ўз ҳолига ташлаб келгани ҳақидаги ўй унга бир зум тинчлик бермас эди. У герцог ва герцогиняни кутиб олувчилар орасида бир муҳтарама дуэньяга кўзи тушиб, унга яқинроқ бориб пичирлади:

— Сеньора Гонсалес ёки жаноби олияларининг исмлари...

— Менинг исмим донья Родригес де Грихальба, — жавоб берди дуэнья, — қандай ишингиз бор эди, иним?

Бунга Санчо шундай жавоб қилди:

— Менинг муҳтарама зотдан бир илтимосим бор эди. Қасрнинг ташқарисига чиқсангиз менинг кулранг эшагимни кўрасиз. Зоти олиялари мендан илтифотларини аямасалар, эшагимни

отхонага олиб кириб қўйишларини буюрсалар, ёки ўзлари олиб келақолсалар. Эшагим қурғур бир оз ҳурковучроқ, бечора ёлғиз қолишни асло ёқтирмайди.

— Агарда хўжайинингнинг ақли ҳам сеникига ўхшаса,— деб жавоб берди дуэнья,— роса меҳмонларга ёлчибмиз-ку! Иним, сизни бу ерга ким бошлаб келган бўлса, ўша билан бу ердан туёғингизни бир шиқиллатиб қолинг-чи, тўрт томонингиз қибла. Эшагингизга ўзингиз қарайверинг ва шуни билиб қўйингки, бу қасрдаги дуэньялар бундай ишларга ўргатилмаган.

— Бу қандоқ бўлди,— жавоб берди Санчо,— рицарь романларини яхши билувчи хўжайиним менга Британиядан келган сеньор Ланцелот ҳақида ҳикоя қилиб:

Қарашади хонимлар унга,  
Тулпорига — канизлар,—

деб ишонтирган эдилар-ку? Мен эшагимни сеньор Ланцелотнинг қирчангисидан кам дея олмайман.

— Иним,— деди дуэнья,— агарда сиз масхарабоз бўлсангиз, ҳазилингизни бозори кўтарадиган жойда айтасиз, шилқимларга тоқатим йўқ. Мендан олмурутдан бошқа нарса ололмайсиз.

— Бу ҳам чакки эмас, хоним,— деди Санчо,— олмурутлари ўзларига ўхшаш анча етилиб қолган бўлса керак дейман, ойимча?

— Эй қуриб кеткур, беодоб аҳмоқ! — жаҳл билан қичқириб юборди дуэнья,— мен ёшманми, қариманми худога аён, менинг ёшим билан сен саримсоқхўр сассиқ муттаҳамнинг нима иши бор?!

У шундай қаттиқ қичқирдики, герцогиня қайрилиб қараб, дуэньянинг жаҳлдан кўзига қон тўлганини кўриб, нима гаплигини сўради.

— Мана бу муттаҳамни қаранг,— жавоб берди дуэнья,— дарвоза олдида қолдириб келган эшагини, отхонага олиб кириб қўй, дейди безбетларча. Яна қандайдир Ланцелотга аллақандай хонимлар хизмат қилганмишу унинг тулпорига канизлар ем беришган эмиш. Устига устак мени кампир деб масхара қилди.

— Кейинги сўзини мен ҳам оғир ҳақорат деб билган бўлардим,— деди герцогиня. Сўнгра у Санчога юзланиб, илова қилди:

— Дўстим Санчо, шуни билиб қўйингки, донья Родригес ҳали жуда ёш. Сиз унинг бош кийимини кўриб адашган бўлишингиз мумкин, аммо бу кийимни ёши ўтиб қолганидан эмас, балки улуғ унвони туфайли кийиб юрибди.

— Ўлай агар,— қичқирди Санчо,— мен уни хафа қилмоқчи эмас эдим! Мен бу гапни ўз эшагимни жуда яхши кўрганымдан оламда энг мулоим хонимга ишониб топширмоқчи бўлгандим, сеньора донья Родригес менга худди ана шундай зотга ўхшаб кўринди.

Бу баҳсни бошдан-оёқ эшитиб турган дон Кихот Санчога деди:

— Санчо, ҳозир бундай гапларнинг ўрнимикин?

— Сеньор, — жавоб берди Санчо, — киши қаерда бўлмасин ўз эҳтиёжи ҳақида гапиради: эшагим эсимга тушиб кетди-ю, шу ерда гапиравердим. Агар мен отхонада бўлганимда, эшагим тўғрисида бу ерда эмас, ўша ерда гапирган бўлардим.

Гапга герцог аралашди:

— Санчонинг гапи тўғри. Уни айблаб бўлмайди. Қўй, Санчо, ташвишланма: эшагинга хоҳлаганича ем берилади, унга худди ўзинга қилингандек муомала қилишади.

Дон Кихотдан бошқа ҳамма қизиқиб қолган бу англашилмовчиликни бартараф этиб, мезбонлар меҳмонлар билан биргаликда зинапоядан юқори кўтарилишди ва рицаримизни қимматбоҳо кимхобу зарбофлар ҳамда ипак гиламлар билан безатилган залга олиб киришди. Бу ерда уни олтига ёш хизматкор қиз кутиб олишди. Улар ўз хўжайинларидан янги меҳмонни қандай кутиб олиш тўғрисида батафсил кўрсатма олишган эди. Дон Кихот кириши билан қизлар унинг эғнидан қурол-аслаҳаларини ечиб олишди. Тор иштон ва туя жунидан тўқилган камзулда қолган рицарь худди йўнилган таёқдай новча, қоқсуяк бўлиб кўринар, чаккалари бир-бирига шундай ёпишиб кетган эдики, гўё улар ичкари томондан бир-бирларини ўпишаётгандай эди. Дон Кихотнинг туриши шу қадар ичак узадиган эдики, қизлар ўзларини кулгидан тўхтатаман деб, нақ нафаслари қайтиб кетаёзди (хўжайинлари уларга кулиб юбормасликни қаттиқ тайинлаган эдилар).

Сўнгра дон Кихот ясан-тусанини битириш учун ҳузурига Санчони юборишларини ва икковларини ҳоли қолдиришларини илтимос қилди. У ўзи учун герцогнинг буйруғи билан ҳозирлаб қўйилган чип-чиннидай юпқа кўлакни кийиб олди-да, ўз яроқбардорини тергай кетди:

— Қани, менга айт-чи, янги чиққан масхарабоз ва кўҳна анқов, сен бундай муҳтарам ва ҳурматли дуэньяни ҳақорат қилишга қандай журъат этдинг? Наҳотки эшагингни эслашга бошқа вақт тополмасанг? Эки сен бизни шунчалик дабдаба билан кутиб олган уй эгалари бизнинг ҳайвонларимизни қаровсиз ташлаб қўядилар, деб ўйладингми? Худони ўртага солиб ёлвораман, Санчо, ўзингга ҳушёрроқ бўл, кўполлигингни ҳар ерда кўрсат-верма. Эй гуноҳкор банда, шуни эсингдан чиқармаки, одобли, ақлли хизматкорлар хўжайинини иззат-ҳурмат қилади. Тўраларнинг хосияти шундаки, улар худди ўзлари сингари муносиб кишиларнинг хизматларидан баҳраманд бўлишади. Наҳотки сен — хомкалла тушунмасанг, уй эгалари сенинг сурбет ва бефаҳм масхарабоз эканлигингни кўриб, мен бечорани ҳам разил фирибгар деб ўйлашлари мумкин-ку, ахир! Йўк, йўк, дўстим Санчо, бундай қалтис ишдан, татардан қоч, ҳамиша қоч! Маҳмадоналик қилиб бачканабозликка ўтдингми, бас, шу ондаёқ қоқилиб тушасан ва аянчли масхарабозга айланиб қоласан. Тилингга эҳтиёт бўл! Гапиришдан олдин ҳар бир сўзингни ўйлаб, мағзини чақиб кўр, шуни унутмаки, биз ниҳоят шундай жойга келиб

тушдикки, бу ерда худонинг инояти ва менинг қудратли қўлларим ёрдамида шуҳратимизга-шуҳрат, бойлигимизга бойлик қўшилажак.

Усал бўлиб қолган Санчо: «Бирор марта бўлса-да ўйламай, ноўрин сўз айтганимдан кўра, оғзимни тикиб қўяман ва тилимни тишлаб узиб ташлайман», деб ваъда берди. У буйруқларини бажаришга ва ўз хўжайинини безовта қиладиган бирор сўз айтмасликка дон Кихотни зўр бериб ишонтирарди.

Дон Кихот кийинди, қиличи осилган тасмасини елкасидан ўтказиб эгнига қизил мовутдан тикилган плашини, бошига яшил шойи қалпоғини кийиб, катта залга чиқди. Бу ерда икки саф бўлиб тизилган қизлар қўл ювдиргани идишларда сув тутиб туришарди. Бу расм-русм ҳам узоқ тантаналар билан бажо келтирилди. Сўнгра эшик оғаси бошчилигида ўн икки маҳрам рицарни ошхонага олиб кетгани келишди. У ерда қаср эгалари кутиб туришарди, тўрт киши учун тузалган столда ноз-неъматлар тўла эди. Герцог ва герцогиня рицаримизни бўсағада кутиб олишди, уларнинг ёнида руҳоний ҳам турарди. Улар ўзаро минг бир такаллуф билан саломлашишгач стол томонга юришди. Герцог дон Кихотни тўрға ўтишга таклиф қилди, у кўнмай туриб олди, герцог яна қистади ва ниҳоят рицарь рози бўлди. Руҳоний рўпарага, герцог билан герцогиня эса дон Кихотнинг ўнг ва чап томонига ўтиришди.

Бу дақиқада шу ерда ҳозир турган Санчо шундай муҳтарам зотларнинг ўз хўжайинига бунчалик иззат-икром кўрсатишаётганини кўриб, оғзи очилиб қолди. У дон Кихотни тўрға ўтказиш учун герцог қанчалик овора бўлганлигини кўраркан, шундай деди:

— Агар марҳаматли жаноблар рухсат этсалар, бир куни қишлоғимизда тўрда ўтириш хусусида бошланган жанжал нима билан тугаганлигини айтиб берардим.

Санчо сўзини энди тамомлаган ҳам эдики, дон Кихот Санчо тагин бирор бемаъни нарсани гапириб ўтирмасин, деб типирчилаб қолди. Санчо унга қараб, дарров бунини фаҳмлади-ю, гапга тушди:

— Марҳаматли жанобим қуюқшондан чиқиб кетади деб ташвишланмасинлар, бўлар-бўлмас гапларни айтмайман. Мен, сиз марҳаматли жанобнинг оз ёки кўп, яхши ёки ёмон гапириш хусусида боягина берган маслаҳатларини унутганимча йўқ.

— Санчо, нима деганим эсимда йўқ,— жавоб қилди дон Кихот,— хоҳлаган нарсангни гапиравер, аммо гапни қисқароқ қил.

— Сизларга айтмоқчи бўлган нарсам — бўлган воқеа, аини ҳақиқат,— деди Санчо,— ахир мен хўжайиним дон Кихотга маълум нарсани бошқача қилиб гапира олармидим.

— Санчо, менинг ҳақимда истаганингча сўзлайвер,— деди дон Кихот,— мен сенга халақит бермайман, лекин аввал ўйла, сўнгра сўйла, деганларидек, гапни жойига қараб гапир.

— Ҳа, мен у ёғини ҳам ўйладим, бош қотирдим, чумчуқдан

қўрққан тариқ экмайди, мана ҳозир буни ўзларингиз амалда кўрасизлар.

— Жаноби олийларига шундай маслаҳат берардим,— деди дон Кихот,— бу лақмани бу ердан ҳайдаб юборсангизлар, акс ҳолда у қаердаги бўлмағур гаплар билан бошни қотиради.

— Йўқ, йўқ,— эътироз билдирди герцогиня,— мен Санчони ўзимдан бир қадам ҳам нарига жилитмайман. Мен уни яхши кўраман ва унинг ақлли эканини биламан.

— Сиздек муҳтарам зотнинг менинг ҳақида яхши гаплар айтганлигингиз учун, гарчи мен бу таърифга мушарраф бўлмаган бўлсамда, ўла-ўлгунингизча бахтиёр яшашингизни худованди каримдан сўрайман. Мен сизларга шуни айтиб бермоқчиман: қишлоғимизда бир бадавлат ва аслзода идальго яшарди (Медина дель Кампо деган жойдан, Аламос уруғидан эди). У донья Менека де Киньеста уйланган бўлиб, Менека эса Сант-Яго орденининг рицари Эррадурда чўкиб ўлган Алонс де Мариньоннинг қизи эди. Ана шунинг дастидан бундан кўп йил бурун қишлоғимизда катта жанжал бўлиб, унда айтишларига қараганда менинг хўжайиним дон Кихот ҳам қатнашган, ўшанда темирчи Бальбастронинг саёқ ўғли Томасильо ярадор бўлган эди... Хўш менинг марҳаматли хўжайиним, айтинг-чи, бу гаплар ёлғонми? Сиздан ўтиниб сўрайман, менинг гапларимнинг ростлигини айтинг, бу аслзода жаноблар мени вайсақи ёки ёлғончи деб ўйлашмасин.

— Хўш, ҳозирча сиз ёлғончи эмас, фақат вайсақига ўхшаб турибсиз назаримда,— деди руҳоний,— қани кўрармиз, бу ёғи қандай бўларкин.

— Сен, Санчо,— жуда кўп гувоҳларнинг номларини тилга оляпсан, эҳтимол гапларинг ростдир,— деди дон Кихот.— Ҳикоянгни давом эттир-у, лекин қисқароқ қил, чунки бошлашингга қараганда уни икки кунда ҳам тамомламайдиганга ўхшайсан.

— Йўқ, қисқартирмасин! — эътироз билдирди герцогиня.— Билганича айтиб бераверсин. Агар у ўз ҳикоясини олти кунда тугатолмаса ҳам майли, бу олти кунни ҳаётимдаги энг бахтиёр кунлар деб ҳисоблайман.

— Шундай қилиб, сеньорлар,— яна ҳикоясини бошлади Санчо,— мен беш қўлда биладиган ҳалиги идальго, чунки унинг уйи меникидан бир камон ўқи етгунчалик жойда, битта қашшоқ, аммо софдил деҳқонни уйга меҳмонга чақирибди.

— Тезроқ, биродар,— унинг сўзини бўлди руҳоний.— Бу аҳволда қиёмат-қойимгача ҳам тугатолмайдиганга ўхшайсиз.

— Ярим йўлда, мабодо худо хоҳласа, ундан ҳам бурунроқ тугатаман. Шундай қилиб, сеньорлар, ҳалиги деҳқон уни меҳмонга чақирган идальгоникига келибди, ҳалиги идальго, жойи денг, худди фариштада-я, фариштадай, менга шундай деб айтишди, ўлганини ўзим кўрганим йўқ, у пайтда Тембекеда пичан ўраётгандим...

— Бўтам,— хитоб қилди руҳоний,— худо ҳақи Тембекедан

тезроқ қайтинг-у, ҳикоянгизни идальгони дафн қилмасдан илгарироқ тугата қолинг, бўлмаса бизни ҳам дафн этадиганга ўхшайсиз!

— Шундай қилиб, — ҳикоясини давом эттирди Санчо, — улар дастурхонга ўтираётганларида, ҳозир ҳам худди тирикдай кўз ўнгимда туришибди...

Герцог билан герцогиня Санчонинг ҳикоя буёқда қолиб, сон-саноксиз майда-чуйда гапларга чалғиётгани руҳонийнинг гашига тегаётганини, дон Кихотнинг эса ғазабдан жигибийрон бўлаётганини кўриб, ичларида ҳузур қилиб кулишарди.

— Шундай қилиб, ҳалиги денг, — давом этди Санчо, — улар ҳали айтганимдай дастурхонга ўтиришмоқчи бўлишди, аммо деҳқон идальгони идальго эса деҳқонни тўрға ўтишга қистаган, у ўз уйида ўзи хўжайин эканлигини, меҳмон мезбоннинг измига кириши кераклигини айтган. Бироқ, ўзини хушмуомала ва одобли деб ҳисоблаган деҳқон тўрға ўтишга сира кўнмаган. Ниҳоят аччиғи чиққан идальго: «Ўтираверсанг-чи, каллаварам, мен қаерда ўтирмайин ўша ер уйнинг тўри-да, ахир», деб уни елкасидан босиб мажбуран ўтиргизган. Айтмоқчи бўлган гапим шу, холос, менимча ҳозир бу гапим жуда ўринли бўлса керак.

Дон Кихот қизариб-бўзариб кетди, уй эгалари эса дон Кихот Санчонинг айёрлик билан қилган шамасини тушуниб, бутунлай жаҳли чиқмасин деб хавотирланиб, ўзларини кулгидан зўрға тийиб ўтиришарди.

Герцогиня дон Кихот учун ноқулай бўлган бу суҳбатни бошқа томонга буриб юбориш учун, дон Кихотдан унинг сеньора Дульсинеядан хат-хабар олиб турганини, кейинги кунларда сеньора ҳузурига кўплаб дев ва сеҳрларни совға қилиб юбордими-йўқми, шуни сўради: «Чунки, — деб илова қилди у, — сеньор рицарь уларнинг аллақанчасини енгган бўлсалар керак». Бу саволга дон Кихот шундай жавоб берди:

— Менинг бахтсизликларимнинг, сеньора, боши бор-у, асло ниҳояси кўринмайдиганга ўхшайди. Мен девларни енгдим унинг измига қароқчилар ва ёвузларни юбордим, аммо улар маликамини излаб топиша олмабди, чунки у сеҳр билан хунук би деҳқон аёлга айлантириб қўйилган.

— Билмадим-у, — унинг сўзини бўлди Санчо, — у менга дунёдаги энг кетворган гўзалдай бўлиб туюлганди. Ишқилиб, у шундай эпчилки, сакрашда дорвозлардан қолишмайди. Гапим рост, сеньора герцогиня, мен унинг эшакка бир сакрашда мушукдек сапчиб миниб олганини ўз кўзим билан кўрдим.

— Уни бошқа қиёфага киргандан кейин кўрдингизми, Санчо? — деб сўради герцог.

— Кўрганда қандай! — жавоб берди Санчо. — Ахир мен биринчи бўлиб унинг сеҳрланганини билдим-да. У худди менинг марҳум отам сингари сеҳрлаб қўйилган.

Девлар, қароқчилар ва сеҳргарлик ҳақидаги бу суҳбатни эшитган руҳоний охири рўпарасида ламанчлик дон Кихот ўтирганини фаҳмлади. Герцог телба идальгонинг буюк қаҳрамонлик-

лари ҳақидаги яқинда пайдо бўлган китобдан шундай завқланар эдики, бу валломат жаҳонгашта рицарь ҳақидаги ўз ҳиқоялари билан руҳонийни безорижон қилган эди. Руҳоний ўзининг гумони тўғри чиққанига ишонч ҳосил қилгач, у қаср хўжайинига жаҳл билан шундай деди:

— Марҳаматли сенъорим, бу олиҳиммат одамга қилган муомалангиз учун худо олдида жавоб берасиз. Сиз бу дон Кихот ёки, тўғрироғи, дон Овсарнинг телбалигини бекорга рағбатлантиряпсиз. Сиз ўз тентаклиги ва телбаликларини давом эттириш учун унинг қўлига барча воситаларни бериб қўяпсиз.

Руҳоний дон Кихотга мурожаат қилиб сўзида давом этди:

— Айтинг-чи, менга, эй тентак одам: жаҳонгашта рицарсиз, девларни енгиб, ёвузларни асир қилиб оласиз деган бемаъни гапларни ким қуйди миянгизга? Яхшиси уйингизга қайтинг-да, хўжалигингизга тузукроқ қаранг, эҳтимол таназзулга юз тутган бўлса керак у. Икки жаҳон овораси бўлиб юриб, учраганга масҳара бўлишни бас қилинг. Дунёда жаҳонгашта рицарлар бўлган ва улар ҳозир ҳам бор деган гапни қаердан олдингиз? Испаниянинг қаерида девлар ёки Ламанчда сеҳргарлар бормиш? Сеҳрланган Дульсинея қаёрда-ю, сиз кўпиртириб гапирган ҳамма уйдирмаларингиз қаёқда?

Дон Кихот бу муҳтарам зотнинг сўзларини диққат билан эшитди, аммо у сўзини тугатиши биланоқ, герцог ва герцогиняга бўлган ўзининг ҳурмат-эҳтиромига қарамасдан, сакраб оёққа турди-да, ғазабидан титраб шундай деди:

— Бу уй эгаларига бўлган чуқур ҳурматим ҳамда марҳаматли дин пешвосининг мартабасига нисбатан бўлган эҳтиромим менинг ҳаққоний ғазабимни босиб туришга мажбур этмоқда. Бунинг устига дин пешволарининг заҳарли тилларидан бошқа қуроллари йўқ: аммо улар бу қуролдан худди аёллардек усталик билан фойдаланадилар. Шунинг учун мен бундан бошқа қуролни қўлламасдан, сиз марҳаматли зот билан тенгма-тенг жангга киранман. Аввало шуни айтايин, руҳоний зотдан ўринсиз ҳақоратлар эмас, балки яхши маслаҳатлар эшитиш лозим эди. Хайрихоҳлик қилиш, дўстона панд-насиҳатлар одоб билан, мулойимлик билан изҳор этилиши лозим эди. Сиз бўлсангиз мени ҳаммага эшиттириб дағаллик билан койиб, оқилона панд-насиҳат қилишнинг барча чегарасидан чиқиб кетдингиз. Ҳали ўзи билмайдиган гуноҳларни очатуриб, гуноҳкорларни овсар ва тентак дейиш руҳонийга муносибми? Қани менга шу нарсани тунтириб беринг-чи, марҳаматли жаноб, мени жинни деб аташга ва хўжалигимга қараш учун жўнаб қолишимга маслаҳат беришга мендаги ва менинг юриш-туришимдаги нималар ҳуқуқ берди сизга? Жаҳонгашта рицарлик ва унинг урф-одатлари ҳақида ўзбошимчалик билан ҳакамлик юргизмоқ учун наҳотки аллақандай қашшоқ бир коллежда ўқиб, бир бало қилиб бегона оилага руҳоний бўлиб киришнинг ўзигина кифоя қилса? Наҳотки сиз дунёнинг ҳузур-ҳаловатларидан кечиб, минглаб машаққатли синовлардан ўтиб абадийликка етишув учун дунёни жа-

қонгашталиқ билан кезишни бекорчи ва бемаъни иш деб ўйла-сангиз? Башарти мени бирор олижаноб рицарь ёки ҳурматли тўра овсар деб атаганида мен буни кечирилмас ҳақорат деб ҳисоблаган бўлардим. Лекин мени умрида рицарлик йўлидан юриб кўрмаган бир қироатхон тентак деб атар экан, унинг вайсаганини бир пулга олмайман. Мен рицарман ва худо хоҳласа рицарлигимча ўламан. Баъзи бир кишилар такаббуруна шухратпа-растлик йўлидан, бошқалари эса пасткашлиқ ва қулларча хушомадгўйлик йўлидан, учинчи хиллари алдаш, мунофиқлик, тўртинчилари эса ҳақиқий эътиқод йўлидан борадилар. Мен эса ўз юлдузим раҳнамолигида жаҳонгашта рицарликнинг тор сўқмо-ғидан бораман, бунинг учун мен дунёнинг ҳузур-ҳаловатларидан ҳазар қилсам-да, номусдан ҳазар этганим йўқ. Мен ранж-алам-лар учун ўч олдим, адолатни тикладим, сурбетларни жазола-дим, девларни енгдим, ёвузларни поймол қилдим. Жаҳонгашта рицарлик қонунлари талаб қилгани учун ҳам ошиқман мен ва бу севгим ҳар қандай иллатдан ҳоли, чунки у мусаффо ва пок-дир. Менинг барча орзу-умидларим доимо олижаноб мақсадга — ҳаммага яхшилик қилиш ва ҳеч кимга ёмонликни раво кўрмас-ликка қаратилган. Жаноблар, олий зот сеньорлар, герцог ва гер-цогиня, энди ўзларингиз ўйлаб кўринглар, шундай ўйлаган, шунга амал қилувчи ва шундай гап гапирадиган кимсага аҳмоқ деган лақаб тўғри келадими?

— Худо ҳақи, ажойиб гап бўлди! — кичқириб юборди Сан-чо. — Сеньорим, ўзингизни оқлаш учун бундан бошқа ҳеч нарса деманг! Барибир бундан ортиқроқ бирон нарса дейиш ёки ўйлаб топиш мумкин эмас. Манави сеньорнинг гўё дунёда жаҳонгашта рицарлар бўлган эмас, ҳозир ҳам йўқ дейишининг ўзиёқ унинг ўйламай гапираётганлигини кўрсатиб турибди.

— Сиз, биродар,— сўради руҳоний,— дон Кихот орол ваъда қилган ўша Санчо эмасмисиз?

— Худди ўша,— жаноб берди Санчо,— мен совғага орол олиш учун бошқа ҳар қандай одамдан кам хизмат қилганим йўқ. Яхшига яқин юрсанг етарсан муродга деганлар. Мен туғишга-нимни эмас, тутунганимни дейдиган одамларданман. Мен яхши хўжайинга эргашдим, мана кўп ойлардан бери унинг ёнидаман. Худо унга ва менга узоқ умр берсин; у бирор давлатга албатта император, мен бўлсам бирор оролга ҳукмдор бўлаемиз.

— Жуда тўғри, дўстим Санчо,— унинг сўзини бўлди гер-цог,— сеньор дон Кихотга бўлган ҳурматим туфайли мен шу пайтгача губернаторлигига лойиқ киши топа олмаган анчагина катта оролни сизнинг бошқарувингизга топшираман.

— Марҳаматли зот олдида тиз чўк, Санчо,— деди дон Ки-хот,— сенга кўрсатилган илтифот учун қўлларини ўп.

Санчо айтилганларни бажо келтирди, буни кўрган руҳоний дарғазаб бўлиб ўрнидан тураркан, шундай деди:

— Эгнимдаги жуббам ҳаққи, жаноби олийлари ҳам худди мана шу иккала бадбахт гуноҳкордек тентакка ўхшайдилар чамамда. Модомики ақли расо кишилар уларнинг тентакликла-



рига ҳайбаракаллачилик қилиб туришса, улар бошларини йўқотмай нима қилишсин! Жаноб олийлари, сиз улар билан қолинг, аммо улар қасрда эканлар мен остонангизга қадам ҳам босмайман. Мен танбеҳ беришим лозим бўлган, аммо ўзгартиришга кучим етмаган нарсага гувоҳ бўлишни истамайман.

Руҳоний шу сўзларни айтиб зиёфат тугамасданоқ залдан чиқиб кетди. Герцог ундан қолишни илтимос қилди-ю, аммо астойдил қистамади. Ичида у руҳонийнинг кетишидан жуда мамнун эди.

— Марҳаматли сенъор Шерлар рицари,— деди герцог дон Кихотга мурожаат қилиб,— сиз тақсиримизга шундай боплаб жавоб қилдингизки, дабдурустдан қараганда ҳақорат бўлиб кўринадиган бундай сўз учун бундан ортиқроғи ортиқчалик қиларди. Ахир, на дин пешволари, на аёлларнинг ҳақорат қилмаслиги бизга маълум-ку!

— Гапингиз тўғри,— деб жавоб берди дон Кихот.— Улар бизни хафа қилиши мумкин, аммо ҳақорат қила олмайдилар. Марҳаматли жанобларига маълумки, хафа қилиш билан ҳақоратнинг ўртасида катта фарқ бор. Ҳақорат қилган киши ўз ҳақоратини зўр куч кўрсатиш билан тан олдиради, ана шундагина ҳақоратлаган бўлади, хафа қилиш эса ҳар кимнинг ҳам қўлидан келверади. Масалан, бир кимса кўчадан кетяпти дейлик, қўққисдан унинг олдига биров югуриб келади-ю, таёқ билан уриб, қошиб қолади. Қалтак еган унинг кетидан қувади-ю, лекин етолмайди. Бу одам тўғрисида айтиш мумкинки, уни хафа қилишди-ю, аммо ҳақоратлашгани йўқ, чунки ҳақоратланган киши қилган ҳақоратини зўр куч билан мустаҳкамлаши лозим. Шундай қилиб мен ўзимни хафа қилинган деб ҳисоблашим мумкин, чунки ҳурматли руҳоний ўзининг ҳақоратомуз сўзларини мустаҳкамлай олмайди. Шунинг учун бу сўзларда менинг шаънимга тегадиган ҳеч нарса йўқ. Мен унинг биз билан бирга қолмаганлигидан афсусланман, холос, зотан у, дунёда жаҳонгашта рицарлар йўқ ва бўлган эмас, деб ўйлаб, катта хато қилаётганлигини балки тушуниб оларди. Башарти бу сўзларни Амадис ёки беҳисоб жаҳонгашта рицарлар намояндаларидан бирортаси эшитиб қолганида, мухтарам тақсирим осонликча қутула олмас эди.

— Қасамёд қиламанки, шундай бўларди,— деди Санчо.— У қиличи билан уни худди анор ёки қовун сўйгандай икки паллага бўлиб ташларди. Улар жиғларига тегишса жим турадиганлардан эмас эдилар. Худо ҳақи, мабодо Рейнальдо Монтальбанский бу жанобнинг сафсатасини эшитганида борми, унинг жағига шундай мушт туширардики, уч йилгача оғзини ҳам очолмасди.

Санчонинг мулоҳазаларини эшитиб герцогиня қотиб-қотиб куларди; унга яроқбардор хўжайинга қараганда тентакроқ ва ғалатироқ туюларди. Дарвоқе, дўстларимиз билан учрашганларнинг аксарияти ана шу фикрда эди.

Шундай қилиб, дон Кихот жаҳлидан тушди, зиёфат тугади, дастурхонни йиғиштириб олишди. Шу пайт тўрт қиз пайдо бўлди: улардан бири кумуш жом, иккинчиси кумуш кўзача кўта-

риб олган, учинчисининг елкасига иккита оппоқ сочиқ ташланган, энги тирсагигача шимарилган тўртинчи қизнинг қўлида эса бир кулча юмалоқ неаполитан совуни бор эди. Биринчи қиз жомни усталик билан ва беозоргина дон Кихотнинг соқоли остига тутди. Рицаримиз бу расм-русумдан жуда таажжубланди, аммо, у бу мамлакатда эҳтимол қўлни эмас, соқолни ювдириш одати бордир, деб ўйлади. Шунинг учун у ҳеч нарса демасдан бўйнини олдига чўзди; шу дақиқада кўзчадан сув қуйилди ва совун ушлаган қиз эса унинг соқолинигина эмас, балки бутун юзи, кўзларига тез-тез совун суркай бошлади. У ғайрат билан совун суртарди денг, оппоқ кўпиклар гўё қор парчаларидек ҳар томонга сачарди. Дон Кихот кўзларини беихтиёр юмишга мажбур бўлди. Герцог ва герцогиня кутилмаган бу ювинишни ҳайронликда кузатишиб туришарди, чунки буни қизларнинг ўзлари, хўжайинларининг буйруғисиз қилишмоқда эдилар. Бу орада дон Кихотнинг бутун юзи совун кўпиги билан қопланди; шунда қиз гўё сув тамом бўлгандай қилиб, рицардан бир оз кутиб туришни сўради-да, шерикларидан бирини сувга юборди. У «хўп» деб югуриб кетди, дон Кихот эса совун кўпигига беланганича тоқат қилиб ўтирар, бундан ҳам ғалати, бундан ҳам кулгили башарани тасаввур этиш мумкин эмас эди. Бу ерда ҳозир бўлганлар унинг оқ кўпикка беланиб, узун, қорачадан келган бўйнини олдинга чўзиб, кўзларини юмиб ўтиришини индамай томоша қилишарди. Шуниси ажабланарли эдики, ҳеч ким кулмади. Бу ҳазилни ўйлаб топган қизлар хўжайинларига қарашдан кўрқиб, кўзларини ерга қадаб туришарди, хўжайинлар эса бу ўзбошимча шўхликлари учун уларни жазолаш керакми ёки бу кулгили ва ғалати томоша учун мукофотлаш керакми, шуни билмасдан ҳайрон эдилар. Ниҳоят сувга кетган қиз келди, дон Кихотни ювинтириш тугади; сочиқ ушлаган хизматкор қиз унинг юзини артиб қўйди; сўнгра тўртовлари унга таъзим қилиб чиқиб кетмоқчи бўлишди. Аммо герцог, бу ювинтириш атайлаб қилинганини дон Кихот сезиб қолмаслиги учун, жом ушлаган қизни қақриб, шундай деди:

— Қани, энди мени ювинтиринглар, аммо сувинглар етмай қолмасин тагин.

Муғомбир ва фаросатли қиз герцогга яқин келди-ю, худди дон Кихотга тутгандек унга ҳам жом тутди. Хизматкор қизлар унинг юзини яхшилаб ювишди-да, сўнгра чиқиб кетишди. Кейинчалик герцог агарда қизлар уни ҳам худди дон Кихотдек ювинтиришмаса уларни шумликлари учун жазоламоқчи бўлганини айтди. Аммо қизлар нима қилиш керак эканлигини фаҳмлашиб, унинг чаккаларини бинойидек қилиб ювишди.

Санчо ювинтириш маросимини диққат билан кузатаркан, ўзича мингирлади:

— Оббо, жин урсин! Эҳтимол бу мамлакатда фақат рицарларнигина эмас, уларнинг яроқбардорларининг ҳам соқолларини ювиш одати бордир. Худо ҳақи, жуда жойида бўларди-да.

Агарда шу билан бир вақтда чаккаларимни ҳам бир қиртишлаб қўйишса савобнинг ўзгинаси бўларди-да.

— Нима деб гулдираяпсиз, Санчо? — деб сўради герцогиня.

— Гап шундаки, сеньора,— жавоб қилди у,— менга маълум бўлишича тўраларнинг саройларида овқатдан сўнг меҳмонларнинг қўлларини ювдиришарди, аммо соқолларини ювдиришганини сира эшитмаган эдим. Аммо, менимча, бу — айниқса яроқбардорларга ҳам расм бўлса жуда яхши одат экан.

— Хафа бўлманг, дўстим Санчо,— жавоб берди герцогиня,— мен ҳозир буйруқ бераман, қизларим сизни ювинтирибгина қолмай, агар лозим бўлса, ҳатто қиртишлаб ҳам қўйишди.

— Улар менинг соқолимни ювиб қўйишса ҳам жуда миннатдор бўлардим,— деди Санчо,— у ёғига эса худонинг айтгани бўлар.

— Эшик оғаси,— деди герцогиня,— эсингизда тутингки, олижаноб Санчо нимани сўраса дарҳол бажаринглар.

Эшик оғаси сеньор Санчонинг ҳар қандай хизматига доим тайёр эканини айтди. Шундай деди-ю, у Санчони бошлаб овқатлангани кетди, герцог, герцогиня ва дон Кихот эса шу ерда қолиб ҳарбий иш ва жаҳонгашта рицарликка доир турли нарсалар ҳақида гапиришиб ўтиришди.

Герцогиня дон Кихотдан мишмишларга қараганда гўзалликда дунёда тенги йўқ сеньора Дульсинеянинг ташқи кўринишини тасвирлаб беришни сўради. Дон Кихот герцогинянинг илтимосини тинглаб бир хўрсиниб қўйди-да, шундай деди:

— Башарти яқинда бошқа қиёфага кириши натижасида унинг тимсоли хотирамда ўзгариб кетмаганида эди, мен илтимосингизни бажо келтирган бўлар эдим. Бахтсизлигим шу қадар каттаки, мен ўз хонимимни тасвирлаш эмас, балки унга мотам тутишим керак. Жаноб олияларига маълум бўлгайким, бундан бир неча кун муқаддам қўлини ўпиб учинчи сафаримга фотиҳа оламан деб унинг ҳузурига йўл олган эдим. Афсуслар бўлсинки, излаб борган еримда бутунлай бошқа бир ҳолга дуч келдим; уни сеҳрлаб қўйишибди: малика эди, деҳқон хотинга айлантиришибди, гўзални хунукка, фариштани шайтонга, ширинсуханни қўполга, басавлат хонимни дикир-дикир сакрайдиган енгилтак аёлга, нурни зулматга — хулласи калом Дульсинея Тобосскаяни оддий бир қишлоқ хотинга айлантиришибди.

— Худоё ўзинг раҳм қил! — қичқириб юборди герцог.— Бундай кўз кўриб, қулоқ эшитмаган ёвузлик қилган ким, ахир? Борлиқни чиройга ўраб қувонч бахш этган гўзалликдан, оламни шодликларга тўлдирган қувончдан ифбат ва ҳикматда тенги йўқ фариштадан маҳрум этган ким?

— Ким дейсизми? — жавоб қилди дон Кихот.— Менга ҳасад қилиб, таъқиб этиб юрувчи беҳисоб ёвуз сеҳргарлардан бири бўлмай ким бўларди? Бу лаънати қабила ҳаққоний одамларнинг ишларини қоралаш ва мурдорларнинг ишларини кўкка кўтариш учун дунёга таралиб кетган. Жодугарлар мени таъқиб қилишган, жодугарлар мени таъқиб қилишяпти. Жодугарлар то мени

ва менинг юксак рицарлик ишларимни йўққа чиқариб юбормагунларича мени таъқиб қилишаверади. Улар менинг нозик жойимни билишади ва ўша томонимдан кетма-кет зарба беришяпти. Негаки жаҳонгашта рицарнинг кўнглини банд этган хонимни ўғирлаш, унинг кўзини, йўлларига нур-зиё сочган қўшини ўғирлаш, учарга қанотини қайириш, юрарга мадорини куритиш демакдир. Мен илгари ҳам айтганман, яна айтаманки, маъшуқаси бўлмаган жаҳонгашта рицарь бамисоли япроқсиз дарахт, пойдеворсиз бино-ю, танаси тарк этган сояга ўхшайди.

— Бу айтганларингизга қўшилмай бўлмайди,— деди герцогиня,— аммо дон Кихот ҳақидаги мишмишларга ишонилса, унда сиз муҳтарам жаноблари ҳам сенъора Дульсинеяни ҳеч қачон кўрмагансиз. Айтишларича у ҳеч қачон бўлган ҳам эмас, у марҳаматли жанобларининг тасаввуридаги ҳаёлий бир мавжудот эмиш.

— Бу хусусда кўп нарса айтиш мумкин,— деди дон Кихот,— Дульсинеянинг дунёда бор-йўқлиги, ҳаёлийми ёки ҳақиқийми бу биргина худога маълум. Хулласини айтганда бунинг унчалик аҳамияти йўқ: Ҳар қалай, мен қалбим ҳоқонини барча эзгуликлардан баҳраманд, гўзалларнинг гўзали, такаббурликдан ҳоли бўлган ақлли, вазмин, хушмуомала ва ширинсухан, одобли ва ниҳоят зоти насаби улуг бир аёл деб ўйлайман.

— Гапингиз рост,— жавоб қилди герцог,— аммо сенъор дон Кихот рухат берсалар, мен ўз фикримни айтсам. Албатта, Дульсинея ҳақиқатан ҳам бор ҳамда дунёдаги ҳеч бир аёл гўзалликда унга тенг келолмайди. Аммо у рицарлик романларида кўп тилга олинадиган, масалан, Ориана, Аластрахария ёки Медасималар билан насл-насабда тенглаша олмайди...

— Бунга мен қўшила олмайман,— деди дон Кихот,— Дульсинея — ўз ишининг қули. Фақат эзгуликни олижаноблик келтиради, насаби юқори бўлмаса-да, олиҳиммат киши юқори насаблию, аммо беодобга қараганда кўпроқ ҳурмат-эҳтиромга сазовар бўлади.

— Сенъор дон Кихот,— деди герцогиня,— сўзларингиз бағоят донолингиздан дарак бериб турибди. Сиз мени ишонтирдигиз; энди бундан буён Дульсинея Тобосскаянинг борлигига ва дон Кихотдай машҳур рицарь хизматини қилса арзийдиган даражада гўзал ва аслзода эканлигига ўзим ҳам ишонаман, бошқаларни ҳам бунга ишонишга мажбур қиламан. Мен унинг мақтовига муносиб сўз тополмайман. Аммо мени битта шубҳа қийнаброқ турибди. Санчо Пансанинг айтишига қараганда, у марҳаматли жанобларининг мактубларини сенъора Дульсинеяга олиб борганида, гўё у дон элаётган эмиш: ана шу ҳол унинг олижаноб хонимлигига менда шубҳа уйғотяпти.

Дон Кихот бамайлихотир шундай жавоб қилди:

— О сенъорам, жаноби олияларига ҳам маълум бўлгайким, душманларим бўлмиш сеҳргарлар мен учун жаҳонда энг қимматли бўлган нарсадан ўчларини олишяпти. Идло ҳаёт-мамотим бўлган Дульсинеяни таъқиб қилиш билан улар мени ёруғ жаҳон-

дан маҳрум қилишмоқчи. Яроқбардорим Дульсинеяга менинг мактубимни олиб бориши биланоқ, уни дон элаётган оддий деҳқон аёлга айлантириб қўйишибди. Аммо мен аминманки, ўша дон — шарқ марвариди бўлиши керак. Бу фикримнинг ҳақноҳақ эканлигини жаноб олийлари, ўзингиз ўйлаб кўришингиз мумкин. Бундан бир қанча вақт муқаддам мен Тобосода бўлиб, Дульсинеянинг саройини ҳеч топа олмаган эдим. Ваҳоланки, менинг яроқбардорим Санчо эртасига уни ҳақиқий қиёфасида, яъни жаҳонда ягона гўзал қиёфада кўрибди. Менга эса у қўпол ва хунук деҳқон аёл қиёфасида, гарчанд ўзида жаҳоннинг бутун донишмандлиги мужассам бўлса-да, аҳмоқона бир тусда кўринди. Аммо мен сеҳрланмаган эканман, демакки, у сеҳрланган, ранжитилган, қиёфаси ўзгартирилган; демак душманларим ундан ўч олишибди, мен эса то у ўзининг асл қиёфасида кўринмагунча абадий кўз ёши тўкишим лозим. Шунинг учун Санчонинг дон элаш тўғрисидаги гаплари ҳеч кимни хижолат қилмаслиги керак. Ахир менгаки Дульсинеямнинг қиёфасини ўзгартиб кўрсатганларидан кейин, унга ҳам бошқа қиёфада кўрсатишганига донишмандлиги мужассам бўлса-да, аҳмоқона бир тусда кўринди. Аммо мен сеҳрланмаган эканман, демакки, у сеҳрланган, ажабланмаса ҳам бўлади-ку. Дульсинея — машҳур ва аслзодалар насабидан. Жаҳонда ҳеч кимнинг толеи менинг сеъборамнинг толеидай эмас, чунки Троя Елена билан, Испания эса Кава<sup>50</sup> билан шуҳрат қозонганидек, унинг номи ҳам она шаҳрини келгуси асрларга машҳур қилади. Бундан ташқари, марҳаматли сенъора, Санчо Панса бир пайтлар жаҳонгашта рицарларга хизмат қилган барча яроқбардорларнинг энг ғалатиси. Унинг соддадил қилиқлари баъзан ниҳоятда ўткир бўлади: баъзан у шундай шумки, айёр деб ҳам ўйлаш мумин; баъзан шундай овсарки — бефаҳмга ўхшайди. У ҳамма нарсадан шубҳаланади ҳамда ҳамма нарсага ишонаверади: у менга гўё бемаънилик жарига қулагандай бўлиб кўринганда, яна бирдан осмонга сапчийди. Хулласи калом, мен устига шаҳар қўшиб беришганда ҳам уни бошқа ҳеч қандай яроқбардорга алишмайман. Аммо, ҳар қалай жаноби олийлари ҳадя қилган оролни бошқаришни унга ишониб топшириб бўлармикин, буни билмадим.

Герцог, герцогиня ва дон Кихот ўртасида бораётган суҳбат ана шу ерга келганда қўққисдан тўс-тўполон, шовқин-сурондан бўлиниб қолди. Залга бўйнига озода сочиқ ўрнига қандайдир кир латта боғлаган, қути ўчган Санчо ҳансираганча отилиб кирди, унинг кетидан кир неча ошхонада хизмат қиладиган болалар қий-чув қилиб чопишиб келишди. Улардан бири мағзава тўла кир тоғора кўтариб олган ва зўр бериб уни Санчонинг ияги остига тутишга уринарди.

— Бу нимаси, дўстларим, — сўради герцогиня. — Бу нима ўзи? Бу яхши одамни нега қийнаёпсизлар? И-е, ҳали сизлар унинг губернатор қилиб тайинланганини унутдиларингизми?

Бунга жавобан ошпаз шогирди — сартарош бола шундай жавоб қилди:

— Бу сеньор бизнинг расм-русумимиз бўйича соқолини ювдирмаяпти. У жаноб герцог ва ўз хўжайинидан ибрат олишни истамаяпти.

— Ёлгон гапирма, жудаям хоҳлайман-да,— жаҳл билан жавоб берди Санчо,— аммо мен сочиқ оқроқ, сув тиниқроқ, қўлинг тозароқ бўлишини хоҳлардим. Мен билан хўжайиним ўртасидаги фарқ унчалик катта эмаски, уни фариштанинг суви билан, мени эса шайтоннинг мағзаваси билан ювишса. Турли мамлакатларнинг ва князь саройларининг одатлари ҳеч кимнинг кўнглига тегмасагина яхши бўлади, аммо бу ювиниш одати ўз-ўзини қўйнашдан бошқа ҳеч нарса эмас. Менинг соқолим тоза ва бунақанги ювишнинг ҳеч ҳожати йўқ; кимки менга қўл тегизгудек бўлса, унинг миясини қоқиб қўлига бераман. Чаккага совун суркаладиган бу расм-русумлар мазах қилишдан бошқа ҳеч нарса эмас.

Ошхона малайларининг ўз яроқбардорига қилган қўпол ҳазиллари дон Кихотга унчалик ёқмади. Шунинг учун у герцог ва герцогиняга, гуё улардан жанжалга аралашишга рухсат сўраётгандек, чуқур таъзим қилиб, хизматкорлар тўдасига ўшқирди:

— Эй, сеньор жўралар, қани бу йигитни тинч қўйиб бир жўнаб қолинглар-чи. Менинг яроқбардорим бошқалардан исқирт эмас, бу тоғора унга унчалик тўғри келмайди. Менинг гапимга киринглар-у, унга тега кўрманглар, чунки у ҳам, мен ҳам бундай ҳазилни ёқтирмаймиз.

Санчо эса унинг сўзини илиб кетди:

— Бундай ҳазилларни фақат дарбадарларга қилинади. Бундай ҳазилларингизга кўниб бўпман. Майли, тароқ олиб келишиб, соқолимни тараб кўришсин, агарда зиғирча кир топилса қўйнинг жунини олгандек сочимни қиртишлаб таълай қолишин.

Шу пайт ўзини ҳамон кулгидан тўхтата олмаётган герцогиня гапга аралашди:

— Санчо Панса тамоман ҳақ, умуман у нимаики деса, доим ҳақ бўлади. У ювинтириб қўйишга муҳтож эмаслигини айтяпти. Бизнинг одатларимиз унга ёқмаса — на чора, бу унинг иши, аммо тозалик ҳомийлари, шундай сеньорга соф олтин жом билан кўза тутиш, немисча сочиқ ўрнига аллақандай исқирт тоғора билан ошхона сочиқларини тутиб яхши қилмабсизлар. Сизлар жаҳонгашта рицарнинг яроқбардорига бўлган ҳасадларингизни яшира олмангизлар, нима деган одам бўлдиларингиз?

Ошхона пикаролари<sup>81</sup> ҳам, эшик оғаси ҳам герцогиня жиддий гапиряпти, деб ўйлашди. Улар дарров Санчонинг бўйнидан исқирт латтани олишди-ю, хижолат бўлиб чиқиб кетишди. Санчо эса, хавф-хатар тугаганини кўриб, герцогиня олдида тиз чўкди:

— Улуғ сеньорадан доимо улуғ марҳаматлар кутиш мумкин. Аммо зоти олияларнинг ҳомийликлари эвазига миннатдорчилик билдириш учун менга тезроқ жаҳонгашта рицарлик унвонини беришларини хоҳлар эдим. Ана ўшанда мен бутун ҳаётимни, улуғ сеньора, сизнинг хизматингизга бағишлаган бўлардим. Мен

оддий деҳқонман, исми шарифим Санчо Панса, уйланганман, болаларим бор, яроқбардорлик хизматидаман, аммо жаноби олияларига бирор манфаатим тегадиган бўлса, хизматингизга доим тайёрман, бир оғиз айтсангиз бас.

— Кўриниб турибдики, Санчо,— деди герцогиня,— сиз одобни энг яхши кишилардан ўрганибсиз. Ҳар бир одам сизни хўжайинингиз дон Кихотнинг содиқ шогирди деб танийди. Бундай хўжайин ва унинг бундай хизматкорларига шон-шарафлар бўлсин. Урнингиздан турунг, Санчо. Сизнинг одобингиз учун хукмдорим герцогдан иложи борича тезроқ сизни губернаторлик билан мукофотлашни сўрайман.

Шу билан суҳбат тугади. Дон Кихот овқатдан сўнг дам олиш учун кириб кетди, герцогиня эса Санчодан агар унчалик уйқуси келмаётган бўлса овқатдан сўнгги вақтини ўзи ва қизлари билан ўтказишни сўради. Санчо, ростини айтганда, ёзда овқатдан кейин тўрт соатларча ухлаб олишга одатланганини, аммо у герцогинянинг марҳаматидан жуда миннатдорлиги туфайли бутунлай ухلامасликка аҳд қилганини айтди.

Шу сўзлар билан тушки овқатини тугатгани жўнади.

Санчо ўз сўзига амал қилиб, овқатдан кейиноқ герцогинянинг олдига келди. У ёнигинасидаги пастаккина курсига ўтиришни таклиф қилди. Аммо чинакам хушодоб киши бўлган Санчо бунга кўнмади. Шунда герцогиня бўлажак губернатор сифатида ўтира олиши, яроқбардор сифатида бемалол гапиравериши ва бу ҳар икки унвон унга ҳатто Сиднинг ҳам ўриндигига ўтиришга ҳуқуқ беришини айтди. Санчо елкасини қисиб, итоаткорона ўтирди, барча дуэньялар ва герцогинянинг канизлари уни ўраб олишиб, унинг нима дейишини кутиб, жимгина туришарди. Герцогиня биринчи бўлиб сўз бошлади:

— Энди, биз ёлғиз ва бизни ҳеч ким эшитмас экан, мен хоҳлардимки, сеньор губернатор Дульсинея Тобосскаяга доир баъзи шубҳаларимни ечиб берсалар. Аввало, эй соф юрак Санчо, бизга айтинг-чи, сиз уни кўрмаган ва унга дон Кихотнинг ҳеч қандай мактубини бермаган бўлсангиз ҳам сеньора Дульсинеянинг жавобларини ичидан тўқиб чиқаришга ва уни гўё дон элаяпти, дейишга қандай журъат этдингиз? Ахир, буларнинг ҳаммаси дунёда тенги йўқ Дульсинеянинг обрў-эътиборига путур етказувчи ва соф юракли яроқбардорнинг садоқати ҳамда шаънига ярашмайдиган сурбетларча уйдирма-ку!

Буни эшитиб Санчо индамай курсидан турди-да, бармоқларини лабига босиб, дераза ва унинг пардаларини бир-бир кўздан кечирганча зални аста айланиб чиқди. Сўнгра яна ўз жойига келиб ўтиргач, сўз бошлади:

— Сеньорам, бизни ҳеч ким пойлаб эшитиб турмаганига қаноат ҳосил қилганимдан сўнг, сизнинг саволларингизга қўрқмасдан жавоб бера оламан ва ростини айтаманки, мен жанобим дон Кихотни ақлдан озгагина ҳисоблайман. Тўғри, баъзида у шундай ақлли гаплаётган бўлишига айтонинг ўзи ҳам бунчалик

гапира олмайди, барибир, чин виждоң билан айтганда, унинг жинилигига имоним комил. Модомики, бу фикр миямга ўрнашиб қолган экан, мен унга Дульсинеянинг жавоби ёки унинг бошқа қиёфага кирганлиги каби ҳар қандай бемаъни гапларни гапиришдан уялмайман. Яқингинада мен хўжайинимни Дульсинеянинг сеҳрланганлигига ишонтирган эдим, аммо бу гап нок дарахтида олхўри пишади, деган билан баб-баравар.

Герцогиня Санчодан Дульсинеянинг бошқа қиёфага кириши ҳақидаги найрангни батафсилроқ айтиб беришини сўради, у эса воқеа аслида қандай бўлганини айтиб, тингловчиларга анча ҳузур бағишлади. Аммо герцогиня роса кула-кула, шундай деди:

— Соф юракли Санчонинг ҳикояси менда шубҳа уйғотди. Боринги ламанчлик дон Кихот ақлдан озган ва жинни одам деб фараз қилайлик. Аммо Санчо Панса буни билатуриб, унинг аҳмоқона ваъдаларига учиб унга хизмат қилиб юрибди? Демак, у хўжайинига қараганда ҳам ақлсизроқ экан-да? Мен ўзимча ўйлаб қолдим: бундай одамга оролни бошқаришни ишониб топшириб бўладими? Зотан ўзини эпалай олмаган одам бошқаларни қандай қилиб бошқара олади?

— Худо ҳақи, сенъора,— деди Санчо,— сиз марҳаматли зотнинг шубҳаларингиз бутунлай тўғри. Агарда мен доно, фаросатли одам бўлганимда, ўз хўжайинимни аллақачонлар ташлаб кетган бўлардим. Аммо менинг аччиқ қисматим шунда: ҳар қанча уринмайин уни ташлаб кетолмайман, биз у билан бир қишлоқданмиз, унинг тузини тотдим, уни яхши кўраман, хўжайиним буни билади, у менга ўз хўтиklarини тақдим қилди, энг муҳими мен содиқ одамман, шунинг учун бизни гўргина ажрата олади. Агарда олий ҳазрат маликам менга орол беришни истамас эканлар, нима ҳам дея олардим, худо мени қашшоқ қилиб яратган экан, шундайлигича қоламан. Даладаги паррандалар ризқини худонинг ўзи беради, ўзи парвариш қилади, тўрт газ қалин мато шунча газ энг юпқа матога қараганда яхшироқ иситади. Эҳтимол, менга орол бермасликлари мумкин, бу менга яхши бўлади, чунки чумолига ҳам қанот битади деганлар, тентак бўлсам ҳам бу гапнинг тагини тушунаман. Эҳтимол яроқбардор Санчо губернатор Санчога қараганда тезроқ аршу-аълога жўнаб қолар. Биз бу дунёдан сафар қилар эканмиз, шоҳ ҳам, гадо ҳам битта сўқмоқдан ўтишади; папа сўфидан қанча азиз бўлмасин, иккаласи учун ҳам икки газ ер етади, холос. Шунинг учун такрор айтаманки, жаноб олиялари менинг тентаклигим учун менга орол тақдим этишни истамас эканлар, мен зиғирча бўлса-да хафа бўлмайман ва бу билан ўзимнинг ақлли эканлигимни исбот қиламан. Бут ости ва шайтонлар уя қурган; ялтираган билан ҳамма нарса олтин бўлавермайди, дейдилар. Агарда ёски байтларга ишонгудай бўлинса, деҳқон Вамбани қўш ҳайдаб турган жойидан олиб келиб Испания қироли қилиб кўтаришган, Родригони эса мол-мулкдан маҳрум этиб, илонларга ем қилишган.



Герцогиня Санчонинг мулоҳазалари ва айтган мақолларини эшитиб ҳайратда қолди.

— Соф кўнгил Санчога маълум бўлса керак,— деди у,— агарда рицарь нимадир ваъда қилгудек бўлса, бу ваъдасининг устидан чиқиш учун жонини ҳам аямайди. Менинг эрим ва ҳукмдорим бўлмиш герцог — ҳақиқий рицарь, шунинг учун ҳам у ҳар қандай бўлса-да ўз ваъдасини бажаради. Шундай қилиб, Санчо, кўнглингиз тўқ бўлсин. Асло кутмаган бир пайтингизда сизни берилажак орол ва давлат тахтига кўтаришади. Сиздан фақатгина бир нарсани илтимос қиламан: ўз фуқароларингизни адолат билан бошқаринг, чунки улар софдил ва олижаноб кишилар.

— Адолат билан бошқариш масаласига келганда,— жавоб берди Санчо,— мендан илтимос қилиб ўтиришнинг ҳожати йўқ, чунки мен табиатан раҳмдил одамман, камбағалларга ачинаман; тер тўкиб, меҳнат қилган кимсанинг ҳақиға хиёнат қилмайман. Мен ов кўрган кекса тозилардан бўламан, шитир этган нарсани биламан, пайтига қараб, кўрсам ҳам кўрмасликка оламан. Лекин олдимда каламушларнинг югургилаб юришига йўл қўйиб қараб ўтиролмайман, чунки қайси кавуш оёғимни сиқаётганини сезаман, ер тагида қимирлаган илонни билиб тураман. Буни шунинг учун айтяпманки, яхши одамлар учун ёрдамга тайёрман, ёмонлар учун эса эшигим ёпиқ, остонамга йўлатмайман уларни. Фикримча, ҳукмдорликда энг муҳими — аввало ишни бошлаб олиш. Эҳтимол, мен губернаторлик лавозимида икки ҳафтача ишласам балки беҳуда қўш ҳайдаган деҳқондан афзалроқ губернатор бўлиб олишим мумкин.

— Гапингиз рост, Санчо,— деди герцогиня,— ҳеч ким онасининг қорнидан олим бўлиб туғилмайди, ҳатто епископларнинг оддий кишилардан ортиқ ери йўқ. Аммо, яна Дульсьинеяга қайтамиз. Менимча, Санчо қармоққа илинган. Ўз хўжайини устидан кулиш мақсадида, Дульсьинеяни бошқа қиёфага киргани учун таниб бўлмайди, деб унга айтган. Аммо бу айёрликни унга дон Кихотни таъқиб этиб юрган сеҳргар уқтирган. Менимча эшакка сакраб миниб олган ўша аёл Дульсьинея Тобосская бўлса керак. Соф кўнгил Санчо хўжайинни алдайман деб, ўзи ҳам алданиб қолган. Ўзимиз кўрмаган нарсадан асло шубҳаланмаслигимиз керак. Шунинг билинми, сеньор Санчо Панса, бу ерда ҳам дунёда бўлиб турган ишлардан бизга хабар бериб турувчи сеҳргарлар бор. Ҳали шошмай туринг, ўйламаган ва кутмаган бир пайтда Дульсьинеянинг ҳуснижамолини кўриб ҳам қолармиз. Қандай адашиб юрганлигингизни ўшанда биласиз.

— Шундай бўлиши мумкин,— деди Санчо Панса.— Эндликда хўжайинимнинг сеньора Дульсьинея Тобосскаяни Монтесинос ғорида гўё сеҳрлаш менинг хаёлимга келиб қолган пайтдаги кийимида кўрганман, деган гапига ҳам ишонаман. Ахир, ўзингиз ўйлаб кўринг, мен бечоранинг шу ожиз ақлим билан бундай айёрлик қўлимдан келармиди? Хўжайиним ҳам менинг тўқиганларимга ишониб кетаверадиган анойилардан эмас. Аммо, саодати

олиялари, сизнинг мени маккор одам деб ўйлашингизни истамайман. Мен, хўжайиним савалаб қолмасин тагин, деб бу ёлгонни ишлатганман. Аммо мен ҳеч қандай ёмонликни раво кўрмоқчи эмас эдим. Демак, ҳамма иш ёвуз сеҳргарлар айтганидек бўлган экан-да. Сиз айтмасангиз, ҳеч қачон ақлим етмас экан бунга.

— Энди, Санчо, сиз эслаб ўтган Монтесинос ғорида нима ҳодиса содир бўлганини гапириб берсангиз. Бу ҳақда эшитишни жуда истардим.

Санчо бу воқеани бор тафсилотлари билан тўла-тўқис сўзлаб берди. Уни тинглаб бўлиб, герцогиня шундай деди:

— Мана энди ҳамма нарса равшан. Демак, улуг дон Кихот Санчо Тобосодан чиқаверишда кўрган деҳқон аёлни ғорда кўрдим деяётган экан, бу ҳақиқий Дульсинея, сеҳргарлар эса жудаям ҳийлакор ва уддабурро эканлар.

— Мен ҳам шундай деяшман-да,— унинг гапини илиб кетди Санчо Панса.— Башарти сенёра Дульсинея сеҳрланган экан, ўзига қийин. Аммо хўжайинимнинг душманлари билан пачакилашишга тобим йўқ; улар жуда кўп, бунинг устига жуда ёвуз бўлишлари керак. Ростини айтганда, мен деҳқон аёлни учратганман ва уни деҳқон аёл деб билганман, албатта. Модомики у Дульсинея экан, бунга менинг даҳлим йўқ, вассалом.

— Бажонидил ишонаман сизга,— деди герцогиня.— Ана энди дам олмоқчи бўлсангиз, марҳамат, боринг, Санчо, мен эса сизга губернаторликни тезроқ беришлари учун эрим билан гапиришай.

Санчо герцогинянинг қўлларини яна ўпди-да, унга бир марҳамат кўрсатишини — худди ўз ўғлидек яхши кўрадиган кулрангидан хабар олишини илтимос қилди.

— Кулрангингиз нимаси?— деб сўради герцогиня.

— Менинг эшагим,— деди Санчо.— Уни бу ном билан атамаслик учун, мен кўпинча уни «кулранг» деб ўрганиб қолганман. Биз бу ерга келганимизда мен мана бу сенёра дуэньядан унга қараб туришни сўраган эдим, у бўлса, худди мен уни хунук ёки қари деб ҳақорат қилгандек мени жеркиб ташлади. Аммо-лекин, менимча, дуэньялар учун саройларда савлат тўкиб ўтиришдан кўра ҳайвонларга қараш жуда боп келадиган иш.

— Хавотир олманг, сенёр Панса,— жавоб берди герцогиня,— кулрангизга ўзим ғамхўрлик қиламан, чунки у Санчо учун шунчалик қимматли экан, мен уни кўз қорачиғимдай асрайман.

— Уни отхонага киритиб қўйишса кифоя,— деди Санчо,— чунки у ҳам, мен ҳам сизнинг бунчалик овора бўлишингизга арзимаймиз. Бундан кўра мени ханжар билан чавақлаб ташлаганлари яхшироқ. Менинг хўжайиним одоб бобида камтакаллуф бўлгандан сертакаллуф бўлган афзал деса деяверсин, аммо эшак ва отлар масаласида мезондан чиқмаслик лозим.

— Эшагингизни ҳам губернаторлигингизга олиб кета қолинг,— деди герцогиня,— у ерда сиз уни роса боқасиз, ишлатмайсиз.

— Жаноб олиялари, ўйлайманки, бу бутунлай кўз кўрмаган, қулоқ эшитмаган гап,— деб жавоб қилди Санчо.— Мен губер-

наторликка эшакларини юбораётганликларини биринчи марта кўраётганим йўқ, башарти мен ҳам уни олиб кетгудек бўлсам, бунинг ҳеч қанақа янгилик жойи йўқ.

Санчонинг сўзларидан герцогиня роса кулди.

Санчони дам олишга йўллаб, у Санчо билан ўзи ўртасида бўлган суҳбатни етказиш ва дон Кихотга худди рицарлик романларига мос тушадиган бирон ҳазил қилишни ўйлаб бир фикрга келиш учун герцогнинг ҳузурига жўнади.

#### XLVI БОБ

### ДУЛЬСИНЕЯ ТОБОССКАЯНИ СЕҲРДАН ОЗОД ҚИЛИШ ИУЛИНИНГ ҚАНДАЙ ТОПИЛГАНИ

Герцог ва герцогиня дон Кихотнинг Монтесинос ғори ҳақидаги ҳикояларидан фойдаланиб, дўстларимизни боплаб аҳмоқ қилишга аҳд қилишди (гарчи ҳамма нарсани ўзи ўйлаб топган бўлса-да, Дульсинеяни сеҳрланган деб ишонган Санчонинг гўллиги герцогиняни жуда мамнун қиларди). Улар хизматкорлар ўртасида олдинданок ролларни тақсимлаб чиқишди, уларга нима гапириш ва нима қилиш кераклигини айтишди, керакли ниқоблар ва либосларни тайёрлаб қўйишди. Ҳамма нарса тайёр бўлгач, герцог жуда кўп мерганлар ва този итлар қатнашадиган катта ов ташкил қилди. Дон Кихотга овчилар кийими, Санчога эса юпқа мовутдан яшил кўйлак тайёрланган эди. Рицарь бир неча кундан кейин ҳарбий ишга қатнашажаги ва шунда у либос мутлақо кераксиз бўлиб қолишини айтиб, совғадан бош тортди. Санчо дастлабки қулай фурсатдан фойдаланиб, уни пуллашни ўйлаб, кўйлакни хурсандчилик билан олди.

Белгиланган кун келгач, дон Кихот ўзининг қурол-анжомларини тақди, Санчо эса герцог берган овчилар кийимини кийиб олди. Аммо унга яхши от таклиф қилишса ҳам эшагидан ажралишни истамади. Герцогиня ясан-тусан билан чиқди, дон Кихот, герцогинянинг норозилигига қарамасдан, у отга минаётганида боодоб ва илтифотли кавалердек узангисини ушлаб турди. Ниҳоят улар балан тоғлар орасидаги водийда жойлашган ўрмоннинг чеккасига етиб боришди. Овчилар жой-жойларига тарқалиб, ҳамма сўқмоқ ва йўллар тўсиб олингач, итларни қўйиб юборишди. Водий шовқин, қийқирик ва итларни олқишлаш овозлари билан шундай тўлиб кетдики, ов қатнашчиларининг қулоқлари бита-ёзди. Герцогиня отдан тушиб, қўлига ўткир найза олиб, кўпинча ёввойи тўнғизлар ўтадиган сўқмоқ йўлнинг чеккасида туриб олди. Дон Кихот билан герцог ҳам отдан тушиб герцогинянинг ёнида туришди, Санчо эса эшагидан тушмасдан уларнинг орқасига туриб олди: у бирон кор-ҳол бўлмасин деб дўстини ташлаб кетишни истамади. Уларнинг ёнидан жуда кўп хизматкорлар жой олишди. Овчилар ҳали жой-жойларига туриб олмаслариданок мерган ва тозилар қувлаб келаётган катта тўнғиз ўрмондан югуриб чиқиб қолди. У тишларини даҳшат билан такиллатар,

тумшуғини кўпик босган эди. Дон Кихот тўнғизни кўриши биланок қалқонини ростлаб, қиличини яланғочлади-да, унга рўбарў чиқди. Герцог ҳам найзасини кўлига олиб, олдинга интилди. Агарда герцог ушлаб қолмаганида, герцогиня ҳар иккаласидан ҳам олдинроқ тўнғизга ҳужум қиларди. Санчо эса даҳшатли ҳайвонни кўриши биланок, эшагидан туша солиб жонҳолатда қоча бошлади. У йўлда учраган биринчи дарахтга етибоқ, унга тирмашиб юқорига интилди. Аммо тақдир бечора билан бу сафар ҳам қаттиқ ҳазиллашди. Санчо қўрққанидан жуда ингичка шохга тирмашиб олган экан, шох қарс этиб синиб, у пастга қараб учиб кетди. Бахтига эғнидаги камзули йўғон бутоққа илиниб, бечора ҳавода муаллақ осилиб қолди. Яшил мовутдан тикилган камзул узоқ чидаш бера олмай йиртилиб кетиб, ерга қулайман-у, овчилардан қочиб бораётган — қутурган махлуқ шартта менга ташланади, деб хавотирланган Санчо жон-жаҳди билан бақира бошладики, ҳамма уни ваҳший ҳайвоннинг панжасига тушиб қолибди, деб ўйлади. Ниҳоят баҳайбат тишли махлуқ мерганлар найзалари зарбидан қулади. Шу пайт дон Кихот Санчонинг овозини эшитиб қайрилиб қараркан, унинг эман شوхида оёғи осмондан бўлиб осилиб ётганини ва остида эса хўжайинини фалокат юз берганда ташлаб кетмаган эшагини кўрди. Дон Кихот шошилиб келиб яроқбардорини дарахтдан тушириб олди. Санчо ўзини хавф-хатарсиз сезгач, йиртилган камзулига жуда ачина бошлади. Овчилар тўнғизнинг гўштини хачирларга ортиб, турли хушбўй гиёҳлар билан ўраб, ғалаба ўлжаси сифатида ўрмон ўртасидаги ўтлоққа тикилган чодирга олиб боришди. Бу ерда дастурхон тузалиб шундай қуюқ зиёфат ҳозирланган эдики, хўжайинларнинг нақадар сахийликлари ва бадавлатликларидан дарак бериб турарди. Санчо ўзининг янги либосининг йиртилганини герцогиняга кўрсатаркан, шундай деди:

— Агарда биз қуён ёки парранда овлаганимизда, эҳтимол менинг камзулимга бало ҳам урмасди. Ҳайронман, ханжардек тиши билан бир урса одамни нариги дунёга равона этадиган ҳайвоннинг орқасидан қувишнинг нима кераги бор-а? Тўралар ва қироллар ўз ҳузур-ҳаловатларини деб ўзларини бунақа хавф-хатарларга нега рўпара қилишар эканлар-а? Ахир, ҳеч қандай ёмонлик қилмаган ҳайвонни ўлдиришдан қандай ҳузур-ҳаловат қилиш мумкин?

— Йўқ, Санчо, сиз хато қиялсиз, — деди герцог, — қироллар ва тўралар учун тозилар билан ов қилишдан аълороқ машғулот бўлиши мумкин эмас. Ов ҳам урушнинг худди ўзи: бунда овчи ҳам душманни енгиш учун турли ҳийла-найранг ишлатиши, пистирмалар қўйиши керак. Овда биз қаҳратон совуққа ҳам, жазирама иссиққа ҳам чидаймиз. уйқудан кечамиз, кучимизни янада мустаҳкамлаймиз, машқ қилиб янада пишиқ, эгчил бўламиз. Бунинг устига този билан овга чиқиш шундай машғулотки, ҳеч кимга зарари тегмайди, кишига ҳузур бағишлайди. Энг муҳими, буни ҳамма ҳам уддасидан чиқа олмайди. Шундай қилиб, Санчо, губернатор бўлганингиздан кейин ов ҳақидаги ўз

фикрингизни ўзгартиришингиз лозим бўлади. Ушанда сиз овнинг қанчалик фойдали эканини билиб оласиз.

— Йўғ-э,— деди Санчо,— яхши губернатор худди оёғи синган одамдек доим уйида ўтириши керак. Башарти арзғўйлар унинг олдига зарур иш билан келишса-ю, у бу вақтда қаердадир ўрмонда ўзини овутиб юрса қандай бўларкин? Унақада ишлари чаппасидан кетади-ку! Сеньор ростини айтсам, ов ва бошқа дилхушликлар губернатордан кўра бекорчиларга кўпроқ ярашади. Йўқ, яхшиси мен катта байрамларда кисса — ҳамён, яқшанба кунлари эса чиллак ўйнаганим маъқулроқ. Сизнинг бунақа овларингиз менга сира тўғри келмайди, виждоним қабул қилмайди.

— Санчо, илоҳим сўзингизда турунг,— деди герцог,— чунки сўз бошқа-ю, иш бошқа бўлмасин тағин.

— Ҳарқалай,— деди Санчо,— инсофли тўловчига ҳеч қандай гаров қўрқинчли эмас. Югурганникимас, буюрганники, дейдилар. Мен худо хоҳласа ўз бурчимни соф кўнгил билан бажараман, худди лочиндек бошқараман. Ишонмасангиз бармоғингизни оғзимга солиб кўринг, тишим бор-йўқлигини биласиз-қўясиз.

— Худо ургур, Санчо,— қичқириб юборди дон Кихот.— Аҳмоқона маталларингни қачон ташлайсан, ахир? Сенга буни неча марта айтдим! Жаноби олийлари, қўйинг бу лақмани. У ўзининг мақоллари билан қулоғингизни қоқиб қўлингизга беради. Сўз бошлади дегунча минглаб мақолни тўкиб солади. Яна ўринлими, йўқми ишлатаверади. Худо жазосини берсин унинг, гапларига қулоқ солсам мени ҳам.

— Тўғри, Санчонинг мақоллари кўп, аммо бу мақоллар менга ёқади,— эътироз билдирди герцогиня,— улар лўндаю ўткир, ҳар қанча мақтаса арзийди.

— Шундай қизиқарли суҳбат билан тушки овқат ҳам тугади. Кеч кира бошлади. Ҳамсуҳбатлар тоза ҳаво олиш учун ташқарига чиқишди, шу пайт бирдан ўрмоннинг тўрт тарафидан ловуллаб аланга кўтарилди. Дам у ердан, дам бу ердан, гоҳ чап, гоҳ ўнгдан мугуз ва карнайларнинг овозлари эшитила бошлади, гўё ўрмондан минглаб отлиқ аскарлар келаётгандай эди. Утларнинг шуъласи ҳамда жанговар карнай товушлари келаётгандай овчиларни ҳанг-манг қилиб қўйди. Тез орада маврларнинг ҳарбий наъраси: «лелили!» деган ҳайқариқлар эшитилди. Карнай ва сурнайлар чалиниб кетди, ноғоралар гумбуради, бундай дахшатли музикадан ҳамманинг қулоғи қоматга келди. Герцог қотиб қолди, дон Кихот таажжубланди, Санчо дағ-дағ титрарди, ҳатто гап нимадалигини билганлар ҳам қўрқиб кетиб, нафаслари ичларига тушиб кетди. Шу дақиқада уларнинг олдига иблис кийимидаги отлиқ пайдо бўлди, у каттакон мугузни ваҳимали қилиб чаларди.

— Ҳой, биродар,— қичқирди герцог,— сиз кимсиз, қаёққа кетяпсиз, ўрмонимиздан қанақа қўшин ўтяпти?

Бунга отлиқ момақалдироқ сингари овози билан шундай жавоб қилди:

— Мен — иблисман ва ламанчлик дон Кихотни излаб юриб-

ман. Урмондан эса гўзалликда бекиёс Дульсинейя Тобосская билан баҳодир Монтесиносни олиб боришаётган сеҳргарлар келишяпти. Улар дон Кихотга бу аслзода сеньорани қандай қилиб қайтадан ўз қиёфасига киритиш мумкинлигини айтгани келишяпти.

— Модомики сиз иблис бўлсангиз, рўпарангизда турган дон Кихотни нега танимадингиз?

— Худо ва виждоним ҳақи, — деб жавоб қилди иблис, — мен унга қарамабман ҳам. Ишим ниҳоятда кўплигидан энг муҳимини унутиб қўйибман.

— Шубҳасиз, — деб қўйди Санчо, — бу иблис — яхши одаму соф кўнгил христиан экан, акс ҳолда у худонинг номини тилга олармиди? Энди мен дўзахда ҳам яхши одамлар топишимга ишонаман.

Иблис эса отидан тушмасдан дон Кихот томонга бурилиб шундай деди:

— Эй Шерлар рицари (илоё тезроқ уларнинг панжасига тушкур), мени ҳузурингга бахтиқаро, аммо баҳодир рицарь Монтесинос юборди. Уни шу ерда кутиб туришингни илтимос қилишимни буюрди. У Дульсинейя Тобосскаяни олиб келяпти ва уни сеҳрдан қандай ҳалос қилиш йўлини сенга айтади. Сенга етказишим керак бўлган сўзлар мана шу. Бу ерда ортиқ қолишимнинг ҳожати йўқ. Сенга мендек иблислар, бошқаларга эса фаришталар ёр бўлсин.

У шу сўзларни айтди-ю, ўзининг баҳайбат мугузини чалганича, жавобни ҳам кутмасдан ўрмонга от чоптириб кириб кетди.

Бу воқеадан ҳамма, айниқса Санчо билан дон Кихот ҳайратда қолган эди, Санчо — Дульсинейянинг ҳақиқатан ҳам борлиги, демак, унинг сеҳрлаб қўйилгани ростлигидан, дон Кихот эса Монтесинос ғорида бўлиб ўтган воқеаларга унчалик ишонмаганлиги учун ҳанг-манг бўлиб қолишган эди. Герцог уларнинг хаёлини бўлди:

— Хўш, сеньор дон Кихот, муҳтарам жаноблари уни кутиб турадиларми, ё йўқми?

— Албатта кутаман, — деди у. — Бутун дўзахилар бошимга ёпирилса-да, мен асло чўчимасдан бардош бераман.

— Агар яна бирорта шайтонни кўрсам ёки тагин ўшанақа карнай овозини эшитсам, мени Фландриядан топасизлар, — деди Санчо.

Бу орада тамоман қош қорайиб қолди; ўрмон бўйлаб беҳисоб ўтлар порлаб кетди, шундай шовқин-сурон кўтарилдики, гўё хўкиз қўшилган минглаб араваларнинг гилдираклари гижирлаётгандай эди. Бирдан шовқин-сурон янада кучайди: бир томонда қудратли замбараклар гумбурлар, иккинчи томонда минглаб милтиқларнинг «тасир-тусири» эшитилар, яқинроқда жанг-сурон қилаётганларнинг ҳайқириқлари, олисда эса маврларнинг наъраси — «лелили» янграётгандек туюларди. Хуллас калом, мугузлар, ов карнайлари, сурнайлар, ногоралар, замбараклар, милтиқлар, араваларнинг гижирлаши шундай ваҳимали

шовқин-сурон бўлиб эшитилардики, дон Кихот ҳам ўзини йўқотиб қўймаслик учун бор вужуди билан бардам туришга тиришарди. Герцогиня ҳушдан кетиб оёғи остига йиқилиб қолган Санчонинг юзига сув сепишни буюрди. Унинг буйруғи ўша заҳотиёқ бажарилди, Санчо ғилдираги ғижирлаган аравалардан биттаси тўппатўғри улар устига бостириб келаётган дақиқада ҳушига келди.

Аравага тўртта ялқов ҳўкиз қўшилган бўлиб, ҳўкизларнинг устига қора мато ёпилган, шохларига боғланган машғаллар ёниб турарди. Араванинг устига баланд тахт ўрнатилган бўлиб, унда оппоқ соқоли тиззасига тушиб турган мўйсафид чол савлат тўкиб ўтирарди, унинг эғнида қора бўздан тикилган кенг кийими бор эди. Жуда кўп машғаллар аравани ёритиб турганидан ундаги ҳамма нарса кўзга яққол ташланарди. Араванинг олдида қора рўдапо чопон кийган икки бадбашара иблис ўтирар, уларнинг башаралари шундай хунук эдики, Санчо бир қарашдаёқ қўрқиб, кўзларини чирт юмиб олди. Арава овчилар турган жойнинг рўпарасига келганда нуруний мўйсафид ўрнидан турди-да, баланд овоз билан қичқирди:

— Мен — донишманд Лиргандео бўламан.

У бошқа ҳеч нарса демади ва арава ўрнидан қўзғалди. Биринчи араванинг кетидан иккинчиси пайдо бўлди, унда ҳам худди ҳалигидай мўйсафид чол ўтирарди. У аравакашларга тўхташ ишорасини қилди-да, қичқирди:

— Мен тутқич бермас Ирганданинг дўсти — донишманд Алькифо бўламан.

У ҳам йўлида давом этди. Сўнгра учинчи арава яқинлашди: унда чол эмас, балки қовоғи солиқ бақувват йигит ўтирарди; яқинроқ келгач у ҳам ўрнидан сакраб турди-да ваҳимали дўриллаган овоз билан қичқирди:

— Мен Амадис Галльский ва унинг авлод-аждодининг аёвсиз душмани сеҳргар Аркалаус бўламан.

Юқорироққа ўтиб учала арава ҳам тўхтади ва ғилдиракларнинг ғашга тегувчи ғижирлаши тинди. Тасир-тусир, гумбурлаш тугаб, нозик ва дилрабо куй янгради. Санчо бу бирон яхшилик далолати деб, жуда хурсанд бўлиб кетди.

Герцогинянинг ёнидан бир қадам ҳам силжимаган Санчо унга шундай дейди:

— Сенъора, қаерда музика чалинса, ўша ерда ҳеч қандай ёмонлик бўлмайди.

— Еруғлик ҳақида ҳам шундай дейиш мумкин, — деб жавоб қилди герцогиня, — чунки ундан барча инсу жинс қочади.

Бунга Санчо эътироз билдирди:

— Тўғри, аммо қаерда еруғлик бўлса, у ерда олов бўлиши мумкин. Марҳаматли хоним, қаранг, атрофимизда қанча ўт ёнапти. Ишқилиб, бизни ёндириб юборишмаса бўлгани. Музика эса ҳамиша байрам ва шод-хуррамликни англатади.

— Ҳали бунга кўрармиз, — деди уларнинг суҳбатини эшитиб турган дон Кихот.

Бу орада дилрабо музика садолари остида тўртинчи арава

ҳам яқинлашиб кела бошлади, бу аравага устларига оқ ёпқич ёпилган олтита тўриқ хачир қўшилган бўлиб, ҳар қайси хачир устида оқ кийимда, қўлига катта машғал тутган тавба-тазарру этувчи кишилар ўтирарди.

Бу арава аввалгиларидан икки, ҳатто уч баравар катта эди. Унга қараган одам ҳам ҳайратда қолиши, ҳам даҳшатга тушиши мумкин эди; аравада эгниларига оқ кийган, қўлларига машғала тутган тавбасига таянувчи ўн икки киши ўртасидаги баланд тахтда қават-қават заррин гулли кумушранг ёпқичларга бурканиб пари фаришта ўтирарди. Юзидаги ҳарир парда остидан ёш, гўзал чеҳраси кўриниб турарди. Унинг ёнида юзига қора парда тутган, қора кийим кийган бир кимса ўтирарди. Арава герцог, герцогиня ва дон Кихотларнинг олдига келиб тўхтаганда, музика овози ҳам тинди. Номаълум кимса ўрнидан турди-да, пардасини кўтарди. Шу он ҳозир бўлганлар олдида Ажалнинг шундай қўрқинчли қиёфаси намоён бўлдики, дон Кихот ҳам қовоғини солиб олди, Санчо эса қўрқиб кетди, герцог ва герцогиня сал-пал титраб кетишди. Тирик Ажал эса қаддини ростлаб, уйқусираган товуш билан шундай деди:

Иблис туққан зот деганлари  
Менман ўша! Мерлинман ўша!  
Жодугару сеҳргар бари  
Шох тақади бошига қўша.  
Мен-чи, бироқ бутунлай бошқа,  
Қалбимда бор туйғулар илиқ.  
Тобосолик Дульсиняе ҳақда  
Хабар келди қайғуга тўлиқ.  
Эмишларким, ёвуз куч қаттол  
Унинг руҳин босиб олганмиш.  
Шундай бир зот шаддот ва қўпол  
Дехқон қизи бўлиб қолганмиш.  
Раҳм қилурман мен унга ҳозир  
Ва руҳимни солгум дилига.  
О, жасур зот, ҳайиқмай тақир,  
Пешвоз чиқиб тургин йўлига.  
Тобосолик Дульсиняе қайта  
Ўз ҳолига келмоғи учун  
Жасур мерган Санчо ўзига...

Шу ерга келганда Ажал бирдан жим қолди; ҳамма нафасини ичига ютиб, унинг яна нима дейишини кутиб турарди. Бир неча дақиқадан сўнг, ўзини Мерлин деб атаган Ажал шундай деди:

— Бунинг учун яроқбардор ўзини ўзи дарра билан уч минг уч юз марта саваласин!

— Даф бўл-э!— қичқириб юборди Санчо.— Уч минг у ёқда турсин дарра билан уч марта уришнинг ўзи мен учун ханжар билан чавақлагандай гап. Агарда бошқача йўл билан сеҳрдан



халос эта олмасанг, тур йўқол! Ҳайронман, менинг бечора баданим билан бунақа сеҳргарликларнинг нима алоқаси бор экан? Худо урсин, агар сеньор Мерлин сеньора Дульсинея Тобосскаяни бошқача йўл билан сеҳрдан халос қилолмас экан, уни шундай-лигича дафн эта қолишсин.

— Эй сурбет, қўпол, ҳозир ёқангиздан гиппа бўғаман-у да-рахтга боғлаб қўйиб, уч минг уч юзта эмас, олти минг олти юзта қамчи ураман,— деди дон Кихот.— Агар қаршилиқ кўрсатгудай бўлсангиз, жонингизни суғуриб оламан.

— Йўқ, эй олижаноб рицарь,— эътироз билдирди Мерлин,— бундай қилиш ярамайди. Санчо ўз ихтиёри билан, ўзи хоҳлаган пайтда ўзини саваласин. Бунинг учун аниқ муддат белгилаш керак эмас. Дарвоқе, башарти у бу зарбаларни қўли оғирроқ бошқа одам уришига рози бўлса, зарбалар сони ярмига қисқариши мумкин.

— Бегонасиям, ўзимникиям, оғириям, енгилиям, хулласи калом, ҳеч қандай қўл менинг баданимга тегмайди,— деди Санчо.— Ахир бу қанақаси бўлди — нима, мен Дульсинеянинг отасиманмики, унинг гуноҳкор кўзлари учун мен танзим билан жавоб берайин?— Мана, менинг хўжайиним уни ҳар бир қадамида ҳаётим, таянчим, ишончим, дейди. Уни сеҳр-жодудан ҳам ўша озод қилаверсин. Аммо мен ўзимни ўзим савалашга келганда эса, *abernuncio*\*.

Санчо бу сўзларни айтиб бўлмаган ҳам эдики, Мерлиннинг ёнида турган пари ўрнидан турди-да, гўзал юзидаги пардани олиб ташлаб, Санчога қараб жаҳл билан гапира кетди:

— Эй, бадбахт яроқбардор, бедаво кўнгил, тошбағир киши! Агар сенга, эй қонхўр қароқчи, баланд минорадан ўзингни пастга ташла дейишса, агар сенга, эй инсон зотининг душмани, бир дюжина қурбақа, икки дюжина калтакесак ва уч дюжина илонни е дейишса, башарти сундан хотининг ва болаларингни қилич билан сўй деб илтимос қилишса — сенинг бундай инжиқлигинг, ўжарлигингга ҳеч ким ҳайрон қолмас эди. Аммо қандайдир арзимаган уч минг уч юз дарра учун шовқин солиб, тортишиб туришинг,— ҳолбуки черков мактабидаги ҳар қандай бола ҳар ойда бундан кам таёқ емайди,— бутун раҳмдил одамларни ҳайратда қолдирди, ранжитди. Назар сол, эй аянчли ва беҳис ҳайвон! Менга қарасангчи, эй хуркак бойўғли, сен менинг шахло кўзларимдан иссиқ кўз ёшлари тўкилаётганини кўрасан. Наҳотки менинг ўн гулмдан бир гулим очилмаган давримда — ўн тўққиз ёшимда оддий қишлоқ аёлининг қўпол қиёфасида хазон бўлаётганимни кўриб заррача бўлса-да ачинмасанг? Эй ёвуз махлуқ? Мабодо сен мени чиройли қиёфада кўраётган бўлсанг, бу сеньор Мерлиннинг сенинг кўнглингга раҳм-шафқат солиш учун марҳамат қилиб ўз ҳуснимни қайтариб берганлигидан. Жафокаш гўзалнинг кўз ёшлари қояларни уводага, йўлбарсларни қўзичоққа айлан-

\* *Abrenuncio* лотинча *abrenuncio* — ҳеч қачон қилмайман, воз кечаман, сўзининг бузиб айтилиши.

тиради. Савала ўзингни, саваласанг-чи, эй қаттол ҳайвон, бир довжораклик қилиб ўзингнинг мечкайликдан бошқа ҳам ҳунаринг борлигини кўрсат. Менга теримнинг майинлиги, феълимнинг но-зиклигини, юзимнинг гўзаллигини қайтариб бер. Башарти менинг гўзаллигим ва бахтсизлигим сенинг юрагингни юмшатоламаса, ёнингда турган фикри-ёдини мен банд этган бахтсиз рицарь учун, хўжайининг учун бу ишни қил. Унинг жони ҳалқумига тиқилиб турибди, агар сен ўжарлик қилаверсанг, бечора жонидан мангу ажралади.

Дон Кихот бу сўзларни эшитиб, томоғини силаб қўйди-да, герцогга мурожаат қилди:

— Худо ҳақи, сеньора Дульсинея рост айтяпти, менинг жоним худди замбаракнинг ўқидек томоғимга қадалиб турибди.

— Сиз бунга нима дейсиз, Санчо?— сўради герцогиня.

— Бояги айтганим айтган,— деди Санчо,— ўзимни ўзим уриш — abernuncio.

— Санчо, abrenuncio дейиш керак,— деди герцог.

— Мени тинч қўйинг, жаноби олийлари,— жавоб берди Санчо.— Ҳозир сўзлардаги ҳарфларни санаб ўтиришга вақтим йўқ. Ахир гап ё ўзимни ўзим, ёки биров мени савалашни устида боряпти. Мен ҳаяжонланиб сўзларни адаштириб юборган бўлишим мумкин. Сеньора Дульсинея, сизга қараб тўймаяпман. Сиз мени дарра билан ўз теримни ўзим шилиб олишимга ундаяпсиз-у, айна вақтда мени тўнгак, беҳис ҳайвон, тошбағир ва иблис ҳам тоқат қилолмайдиган бошқа ҳақоратлар билан койияпсиз. Ёки сиз менинг баданимни бронзадан ясалган деб ўйлаяпсизми? Сал шафқат қилинг! Сиз менинг кўнглимни овламоқчисиз-у, аммо мени бош-оёқ ясантириш ўрнига антиқа ҳақоратлар билан сий-лаяпсиз. Ахир сиз, олтин эшак тоққа ҳам кўтариб чиқади, совғалар эса қояларни ҳам нуратади, худодан тила-ю, ҳарака-тингдан қолма, деган ажойиб мақолларни билсангиз керак, албатта. Бунинг устига хўжайиним ҳам дарахтга боғлаб икки баравар қилиб савалайман, дейди, Йўк, йўқ! Бу сеньорларга шуни эслатиб қўйишга тўғри келадикки, бу ерда гап оддий бир яроқбардорнигина эмас, губернаторни савалаш устида кетяпти. Бу эса, мен сизларга айтсам, бўёқчининг нили эмас. Йўк, йўқ, сеньорлар. Аввало тузукроқ илтимос қилиш ва кўндиришни ўрганиб олинглар. Бунинг устига уйнинг гапи кўчага тўғри кел-майди: кишининг авзойи доим бир хил бўлавермайди. Мана ҳозир,— бусиз ҳам менинг яшил камзулим йиртилиб кетганидан фиғоним фалакка чиқиб турибди-ку, бунинг устига кела солиб, «Ўз ихтиёринг билан ўзингни савала», дейишларига ўлайми буларнинг. Ўз ихтиёрим билан эмиш-а! Ҳали-замон ўз ихтиёринг билан қозиққа ўтир дерсизлар.

— Лекин, дўстим Санчо,— деди герцог,— агар сиз бу бечорага ачинмасангиз, сизга оролни бошқариш насиб қилмайди. Ахир мен жафокаш қизларнинг кўз ёшлари ҳам, оқил ва фозил одамларнинг ҳамда сеҳргарларнинг илтимослари кор қилмайдиган тошбағир одамни губернатор қилиб тайинласам менинг тўғ-

римда нималар дейди одамлар? Хулласи калом, Санчо: ё сиз ўзингизни савалайсиз, ёки бўлмаса сизни савалайдилар, ёки сиз губернаторликдан воз кечасиз.

— Сеньор,— деди Санчо,— менга ўйлаб олиш учун икки кун муҳлат бермайсизми?

— Ҳеч қачон,— эътироз билдирди Мерлин.— Сиз дарҳол жавоб беришингиз керак. Дульсинея яна Монтесинос ғорига қайтиб, қишлоқи аёл қиёфасида азоб чекаверади, ё сиз ўзингизга кўрсатилган миқдордаги даррани урмагунингизча Елисей далаларига<sup>8</sup> учиб бориб, худди сиз ҳозир кўриб турганингиздай гўзал қиёфада юраверади.

— Хўш, соф кўнгил Санчо,— деди герцогиня,— қани, бир қарорга келинг. Дон Кихот берган туз-намакни оқланг. Биз ҳаммамиз олижаноблиги ва мардликлари учун бу қаҳрамон рицарга доимо хизмат қилишимиз керак. Тезроқ розилик бера қолинг ўзингизни савалашга. Илоё шайтоннинг бўйни узилсин, кўрқокларнинг юраги ёрилсин. Ҳар қандай фалокат қаҳрамон юракка бас кела олмайди.

Аммо Санчо вақт ўтказиш учун гапни бураркан, Мерлиндан сўради:

— Марҳаматли сеньор Мерлин: айтинг-чи, ахир бу ерга чопар қиёфасида келган иблис сеньор Монтесиноснинг номидан гапириб, уни шу ерда кутиб туришимизни ва сеньор Монтесинос менинг хўжайинимга Дульсинея Тобосская қандай қилиб сеҳрдан халос этиш йўлини айтади деган эди, ҳолбуки шу пайтгача бу сеньорни кўрганимиз йўқ.

Бунга Мерлин шундай жавоб қилди:

— Дўстим Санчо, ўша иблис нодон ва ўтакетган ярамас. Мен уни сизнинг хўжайинингизнинг ҳузурига Монтесинос номидан эмас, ўз номидан юборган эдим. Монтесинос қачон мени сеҳрдан халос этишаркан деб ғорида интизор бўлиб кутиб ётибди. Қани, энди савалаш учун розилик беринг, ахир. Менга ишқинг, савалаш баданингизга ҳам, қалбингизга ҳам катта фойда келтиради: қалбингизга фойдаси шуки, у кишини раҳмдил қилади, баданингизга фойдаси шундаки, кўриб турибманки, серқон одам экансиз, озгина қонингиз кетса ҳеч нарса бўлмайди.

— Дунёда жуда табиблар кўп-да,— жавоб қилди Санчо,— сеҳргарлар ҳам шу иш билан машғул бўлгандан кейин... Хўш, ростки ҳамма мени кўндиришга уринаётган экан, гарчанд ўзим бошқача фикрда бўлсам-да, ўзимга уч юз минг уч юз дарра уришга розиман, аммо битта шартим бор: бу аҳмоқона ишни ижро этишнинг ҳеч қандай муддати белгиланмайди, қачон хоҳласам шунда ўзимни-ўзим савалайман. Айтгандай бутун дунё сеньора Дульсинеянинг гўзаллигидан баҳраманд бўлсин деб бу қарзни тезроқ узишга ҳаракат қиламан. Ростини айтсам, уни шунчалик соҳибжамол деб ҳеч ўйламаган эдим. Яна шуни айтиб қўяйки, мен ўзимни қон чиққунча савалашга мажбур эмасман, баъзан урганларим пашша чўчитгудай бўлса ҳам ҳисобга қўшилаверади. Борди-ю ҳисобдан адашиб кетсам, ҳар

нарсдан хабардор бўлган сеньор Мерлиннинг ўзлари ҳисоблаб, менга қанча кам-ортиқлигини айтиб туради.

— Бу тўғрида ташвиш тортманг, — деди Мерлин, — чунки сиз белгиланган калтакни еб бўлишингиз биланоқ, сеньора Дульсинея сеҳрдан халос бўлиб, яхшилигингиз учун миннатдорчилик билдиргани ва сизни тақдирлагани хузурингизга келади. Шунинг учун ҳисобдан адашиб кетаман деб қўрқманг: тақдирнинг ўзи сизнинг қилча адашувингизга йўл қўймайди.

— Ундай бўлса ўзимни худонинг ихтиёрига топшираман, — деди Санчо. — Мен аччиқ қисматимга бўйсуниб, ўзимни савалашга кўнаман. Майли, бўлганича бўлар.

Санчо бу сўзларни айтиб тугатмасданоқ сурнай оҳанглари янграб кетди, сон-саноқсиз милтиқлардан ўқ варанглади, дон Кихот эса Санчони қучоқлаб ўпа бошлади. Герцог, герцогиня ва аёнлар ўзларининг ғоятда мамнун бўлишганини билдиришди. Дульсинея герцог ва герцогиня, кейин Санчога икки букилиб таъзим қилди-ю, арава жўнаб кетди.

Бу пайтда тонг отай деб қолган эди. Дала гуллари ўзларининг қуйи солинган бошларини яна кўтардилар, ариқлардаги зилол сувлар чулдираб, оқ ва сариқ майда тошлар орасидан ўтиб, ўз ўлпонларини тўлагани олисларда кутиб турган дарёлар сари илгарилаб кетишди. Қувноқ ер, мусаффо осмон, шаффоф ҳаво, ёрқин ёруғлик куннинг ёруғ ва очиқ бўлишидан дарак бериб турарди. Яхши ов ва дон Кихотнинг устидан қилинган ўтқир ҳазилдан мамнун бўлишган герцог ва герцогиня яна қандайдир янги ҳазил топиш истаги билан қасрга қайтишди, чунки дунёда ҳеч нарса уларга бунчалик хузур бахш эти олмас эди.

## *XLVII БОБ*

### **ДУЭНЬЯ ДОЛориДА ЕКИ ГРАФИНЯ ТРИФАЛЬДИНИНГ АЖОЙИБ САРГУЗАШТЛАРИ, ШУНИНГДЕК, САНЧОНИНГ ЎЗ ХОТИНИ ТЕРЕСА ПАНСАГА ЕЗГАН МАҚТЎБИ**

Герцогнинг жуда қизиқчи ва ғалати эшик ораси бор эди. Маҳрамлардан бирига Дульсинея ролини топширишни ўйлаб топган ва бу томошаларни ўрмонда ижро этган ҳам ўша эди. Тез кунда у яна бир янги ажойиб томошани ташкил этди.

Ўрмондаги антиқа воқеанинг эртасига герцогиня Санчо Дульсинеяни ёвуз сеҳргарлар сеҳру жодусидан халос этиш учун тавба-тазарру машқини — яъни ўзини ўзи савалашни бошлаган, бошламаганлигини сўради. Санчо эса бошлаганини, аллақачоноқ ўзига беш марта зарба берганлигини айтди. Герцогиня нима билан зарба берганини сўради.

— Шундай, қўлим билан, — жавоб берди Санчо.

— Бу қандай савалаш бўлди! — деди герцогиня. — Ишончим комилки, сизнинг ўзингизга қилаётган бу мурувватингиз донишманд Мерлинга ёқмайди. Сиз, Санчо, ўзингизни бошлаб қамчилашингиз керак. Ўзингизни шাপатилаш билангини сеньора Дуль-

синеяни сеҳр-жодудан ҳалос этиб бўлмайди. Шуни яхши билингики, Санчо, кўнгилчанлик орқали ношудлик билан бажарилган ишнинг аҳамияти бўлмайди ва ҳеч қачон ҳисобга ўтмайди.

Бунга Санчо шундай жавоб берди:

— Бўлмаса сиз, ҳазрати олиялари, менга боп келадиган қамчи ҳадя қилсангиз. Агар у жуда ҳам оғритмайдиган бўлса, мен уни ишлатаман. Рухсатингиз билан шуни айтишни лозим топанки, марҳаматли бекам, гарчанд мен оддий деҳқон бўлсам-да, баданим дағал эмас, пахтага ўхшайди, шунинг учун ҳам бошқаларнинг фойдаси деб ўзимни майиб қилишим ярамайди.

— Бош устига,— жавоб берди герцогиня,— эртагаёқ сизнинг нозик баданингизга боп қамчи ҳадя қиламан.

Санчо бир дақиқа жим қолиб, кейин гапни бошқаёққа буриш мақсадида шундай деди:

— Ҳазрати олияларига маълум бўлсинким, қимматли сеньора мен хотиним Тереса Пансага хат юборишга қарор қилдим. Хатимда саяҳат пайтида юз берган воқеаларнинг ҳаммасини айтаман. Хатни юборишдан аввал доноларнинг доноси бўлмиш сиз ҳазрати олияларининг у билан танишиб чиқишингизни жуда истардим. Менимча хат худди губернаторлар ёзадигандек қилиб ёзилган.

— Ким тўқиган уни? — сўради герцогиня.

— Мен гуноҳкор бандадан бошқа ким ҳам тўқирди? — жавоб берди Санчо.

— Хатни ҳам ўзингиз ёздингизми? — давом этди герцогиня.

— Вой-бўй, нималарни истамайсиз-а, бекам! — жавоб берди Санчо. — Ахир мен ўқишни ҳам, ёзишни ҳам билмайман-ку. Бир амаллаб ўз исмиمنى ёзаман, холос. Хатни мен айтиб турдим, эшик оғангиз ёзди.

— Қани беринг-чи, кўрайлик,— деди герцогиня.— Эҳтимол у жуда мазмунли ва қизик мактуб бўлса керак.

Санчо қўйнидан ҳали беркитилмаган хатни олиб, герцогиняга берди.

### *Санчо Пансанинг хотини Тереса Пансага мактуби*

*Шундай қилиб, азизам Тереса, энди менинг губернатор бўлишимга озгина қолди. Фақат у мени савалаш эвазига қўлга киритилади. Қимматли рафиқам, сен ҳозирча бунга тушунмайсан, лекин кейинроқ сенга ҳаммасини бирма-бир айтиб бераман. Шу нарсани билиб қўйки, Тереса, энди сен каретада юришинг керак, сичқон қувган мушукларгина яёв юрсин, ҳа, мен шундай қатъий қарорга келдим. Сен губернаторнинг хотинисан, билиб қўй, сени оёқости қилувчиларга йўл қўйма. Хат билан бирга сенга яшил ов кийми жўнатаянман, уни менга герцогиня ҳадя қилди. Уни қизимизга белбоғли юбка қилиб беришга ҳаракат қил. Жанобим дон Кихотни эса бу ердаги ўлкаларда жинни бўлса ҳам доно, тентак бўлса ҳам ажойиб дейишади. Мени, сеньоридан сира қолишмайди, деб қўшиб ҳам қўйишади. Виз Монтесинос ғорида бўлдик.*

Донишманд Мерлин ўз ватанида оддийгина қилиб Альдонса Лоренсо деб юригиладиган Дульсинея Тобосскаяни ёвуз сеҳргарлар билан уч минг уч юз марта савалашим керак, шундагина у озод қилинади. Билиб қўй, тагин бу ҳақда ҳеч кимга оғиз оча кўрма. Агар қилган ишларингни одамларга айтсанг, биров сени қора деса, иккинчиси оқ дейди. Яна бир неча кундан сўнг ўз оролимга жўнайман. Кўпроқ пул тўплашни жуда-жуда истайман. Айтишларига қараганда, умуман, янги тайинланган ҳамма губернаторлар ҳам ана шу орзу билан яшашаркан. Янги ерга бориб бир оз кўникиб, у-бу орттирганимдан кейин бу ёққа келсанг бўладими ёки йўқми, ҳаммасини албатта ёзиб юбораман. Кулрангим ўзини яхши ҳис этапти, у сенга салом йўллаётир. Башарти, мени турклар султони қилиб кўтарганларида ҳам ундан асти ожралмайман. Герцогиня, менинг валинеъматим, сенинг қўлларингни минг марта талаб ўпади, сен унга икки ёки уч минг марта бўса инъом қил. Хўжайиним айтганидек, ширин сўз билан давлатинг камаймайди. Бу сафар худойим менга бир чамадон ақча ато қилишни раво кўрмади. Лекин бунга ачинма, азизим Тереса. Сал сабр қил: губернатор бўлганимдан сўнг тувагимиз ҳам олгиндан бўлиб кетади. Хуллас, бир сўз билан айтганда, қандай бўлмасин сени бойвучча қиламан.

*Эринг, губернатор Санчо Панса.*

Герцогиня хатни ўқиб бўлгач деди:

— Жуда яхши ёзилибди-ю, лекин бир жиҳатдан марҳаматли губернаторимиз хиёл ҳақ йўлдан чиқиб кетибдилар: бир ерда тамагирлик, очкўзлик яққол билиниб қолибди. Гуллар очилмай туриб сўлиб қолишидан кўрқаман. Нафси ёмон ҳайитда ўлади дейдилар. Ғаразгўй, тамагир ҳукмдор эса адолат билан иш юритолмайди.

— Ахир мен сира ҳам бундай демоқчи эмас, эдим, сеньора, — жавоб берди Санчо. — Марҳаматли бекам хат нотўғри ёзилипти деб ўйласалар, келинг, яхшиси йиртиб ташлай қоламиз. Фақат бошқаси бундан ҳам баттар чиқиб қоладими деб кўрқаман. Ўз миямга ишонишим қийин.

— Йўк, йўк, — эътироз билдирди герцогиня, — хат жуда яхши ёзилган, шунинг учун ҳам мен уни герцогга кўсатишни истайман.

У шу сўзларни айтди-ю, бугун тушки овқатланишга қарор қилинган боққа қараб кетди.

Герцогиня хатни герцогга кўрсатган эди, у ҳузур қилиб ўқиб чиқди. Овқатланиш шод-хуррамлик билан ўтди. Ниҳоят дастурхонни ҳам йиғиштиришди. Бироқ, герцог билан герцогиня Санчонинг ажойиб қизиқчилигидан роҳат қилиб ҳали ҳам жойларидан қимирлагилари келмасди. Сокин ва осойишта оқшом эди. Бирдан найнинг мунгли садоси ва дўмбираларнинг бўғиқ, хавотирли садолари эшитилди. Бу жанговар ва мунгли музика товушидан ҳамма ҳайратда қолди. Айниқса дон Кихот ҳаяжондан

жойида ўтиролмади. Санчо эса қўрққанидан одатланиб қолган панагоҳига — герцогинянинг ортига ўтиб олди. Тўғриси айтганда боғдан келаётган музыка садоси ҳақиқатан ҳам хатарли ва мунгли эди. Бу ерда ҳозир бўлганлар ҳаммаси ҳайрон бўлиб анграйиб турган бир пайтда, боққа кенг ва узун мотам либосидаги икки киши кириб келди, уларнинг этаклари ер супуриб келарди. Улар ҳадеб қора мато сирилган катта дўмбирани чалар эдилар. Уларнинг кетидан худди шулардек бошдан-оёқ қора кийиниб олган найчилар, найчиларнинг ортидан эса этаги ерга судралиб юрадиган қоп-қора чакмон кийган баҳайбат гавдали бир киши ҳам келарди; чакмони устидан сербар қора белбоғ боғлаб олган бўлиб, унда қора қинли каттакон қилич осиглиқ турарди. Юзига юлқа қора ниқоб тутилган бўлиб, унинг устидан узун қордек оппоқ соқоли кўриниб турарди. У дўмбира оҳанглари остида салобат билан қадам ташларди. Унинг ҳайбатли қомати, виқорли одим ташлаши, қоп-қора либоси ва атрофидаги мулозимлари ҳар қандай одамни, айниқса, бу кишиларнинг кимлигини билганларни лол қолдирмай қўймас эди.

Бу номаълум одам аста тантанали равишда ўз яқинлари даврасида уни кутиб турган герцогга яқинлашиб, тиз чўкди. Герцог эса ўрnidан туришни буюрди. Шундан кейингина улкан гавдали киши ўрnidан туриб, ҳали инсон кўзи кўрмаган даҳшатли, серсоқол башарасини очиб юборди. Кейин герцогга тикилиб туриб секин, лекин оҳангдор қилиб деди:

— Улуғ, қудратли сеньор, мени Трифальди Оқ Соқол дейдилар; мен — дуэнья Долорида деб аталувчи графиня Трифальдининг яроқбардориман. У мени сиз ҳазрати олийларининг ҳузурларига ўзининг бағоят мусибатли қайғу-аламини билдириш учун рухсатингизни сўрагани чопар қилиб юборди. Лекин ҳаммадан олдин у жасур ва енгилмас рицарь ламанчлик дон Кихотнинг сизнинг қасрингиздами, йўқми, шуни билишни истайди. Бу шавкатли рицарни қидириб у ўзининг олисдаги қироллигидан гоҳ яёв, гоҳ оч-наҳор қолиб сизнинг мамлакатингизга етиб келди. Графиня саройингиз дарвозаси олдида турибди, агар сиз мақбул жавоб берсангиз, у киши ҳузурингизга ташриф буюрадилар. Гапим тамом.

У шундай деди-ю, йўталиб олиб, қўллари билан соқолларини тутамлаб, герцогнинг жавобини сабрсизлик билан кута бошлади. Герцог эса шундай жавоб берди:

— Графиня Трифальдининг бошига оғир мусибатлар тушганлиги, яъни ёвуз сеҳргарлар уни дуэнья Долорида деб аташга мажбур қилганликлари ҳақидаги хабар бизга аллақачоноқ етиб келган эди. Унга шуни айтингки, жасур ламанчлик рицарь дон Кихот шу ердадир, у албатта ҳар қандай ёрдам ва ҳимоясини аямайди. Менинг ўзим ҳам унга ёрдам беришга тайёрман, зероки рицарлик шаъним тақозо этади буни.

Трифальди бу сўзларни эшитиб яна тиз чўкиб таъзим қилдида, найчи билан дўмбирачига ишора қилиб боққа қандай қилиб

кириб келган бўлса, худди шундай тантанали вазиятда орқага қайтди. Герцог эса дон Кихотга мурожаат қилиб деди:

— О, машҳур рицарь, сизнинг шарафли жасурлигингиз нақадар улуг! Ҳали бизнинг паноҳимизга келиб улгурмасингизданок узоқ мамлакатларнинг ҳар чеккасидан кишилар сизнинг ёрдамингиз ва ҳимоянгизни сўраб келишмоқда. Чунки улар сизнинг ҳиммат ва жасоратингизнинг ниҳояси йўқлигини яхши билишади.

— Худойимга шукроналар ўқийман,— жавоб берди дон Кихот,— чунки у менинг жаҳонгашта рицарь бўлишимга ижозат берди. Бу йўлда бошимга қанчадан-қанча кулфату алам тушмасин, қанчалик қийинчиликларга дуч келмай, барибир уларнинг фойдали бўлишига имоним комил. Фақат шуниси ачинарлики, шу топда бу ерда ҳурматли руҳонийнгиз йўқ. Эсингиздами, жаҳонгашта рицарлар ҳақида у қанчалик нафрат билан сўзлаганди. Ҳозир у барча ҳасрат-надоматга ботган, мазлумларнинг худди ана шу жаҳонгашта рицарлардан нажот истаб келишларига ишонч ҳосил қилган бўларди. Майли, ўша дуэнья мендан истаганини сўрай қолсин: билакдаги бор кучим ҳамда қўрқув билмас руҳим унинг бошига тушган фалокатдан қутулишига хизмат қилсин.

Герцог ва герцогиня дон Кихотнинг улар ўйлаб топган ҳазилини ҳақиқат деб билиб, бунга қанчалик соддадиллик билан ишонганидан хурсанд бўлиб кетдилар. Санчо ўйлаб туриб шундай деди:

— Бу сеньора дуэнья менинг губернатор бўлишимга халал бермаса деб қўрқаман. Толедолик бир аптекачи танишим: «башарти ишга дуэньялар аралашдими, тамом, бундан яхшилик кутма», деган эди. Тагин бу дуэнья Долорида\* ёки графиня Трифальди, ё бўлмаси Уч думли (қадимги испан тилида фалди ҳам дум деган маънони англатарди) бизга бирор касофат келтирмасин деб чўчияпман.

— Бас қил, дўстим Санчо,— уни сўзлашдан тўхтатди дон Кихот,— бу сеньора дуэнья шунчалик узоқ мамлакатдан келибдими, демак у сенинг аптекачинг айтган дуэньялардан эмас, бунинг устига у графиня. Графинялар эса қиролича ёки маликаларгагина дуэньялик хизматини қилади. Ўз уйларида бўлса улар аслзода хонимлар ҳисобландилар, уларга бошқа дуэньялар хизмат қилишади.

Бу гапни эшитган Донья Родригес шундай деди:

— Менинг сеньора герцогиням дуэньялари орасида шундай хонимлар борки, агар тақдир ёр бўлса улар ҳам графиня бўлишлари мумкин эди. Ҳеч ким дуэньялар ҳақида аҳмоқона гап гапирмасин. Шуниси ҳам борки, яроқбардорлар ҳар маҳал ҳам бизнинг душманамиз бўлиб келишган, улар пойгаҳда қолиб кетиб, доим ғийбатимизни қилишади, бекорчиликдан бизнинг шон-ша-

\* Долорида испанчада ғамгин, шикоятгўй деган маънони англатади, йиғлоқи деса ҳам бўлади.



рафимизга чуқур қазимоқчи бўлишади. Илоё бошлари банди эшкакчиликдан чиқмасин, биз бўлсак қасдма-қасдликка яшай-верамиз, тагин очликдан ўлиб кетиш ёки қора рўдапога ўралиб юриш ўрнига ҳашаматли қасрларда яшаймиз.

Най ва дўмбиралар садоси остида дуэнья Долориданинг боққа кириб келиши билан суҳбат узилиб қолди. Мехмон ҳар ҳолда графиня ва аслзода хоним бўлгани учун герцогиня эридан, унга пешвоз чиқмаймизми, деб сўради. Герцог бунга жавоб бергунча бўлмай Санчо сўзга аралашди:

— У графиня бўлгани учун ҳам, ҳазрати олийлари, пешвоз чиқсаларингиз бўларди, лекин у дуэнья экан, жойларингиздан кўзгалмасангизлар ҳам бўлаверади, деб ҳисоблайман.

— Сенга биров бу ишга аралашсин деяптими, Санчо?— деди дон Кихот.

— Ким сўраяпти?— жавоб қилди Санчо.— Мен ҳаққим бўлгани учун аралашяпман: ахир мен бекорга сизнинг яроқбардорингиз эмасман-ку, бу одоб-муомалани марҳаматли жанобларининг ўзларидан ўрганганман, ахир сизни энг одобли, яхши тарбия кўрган рицарь деб айтиш мумкин-ку.

— Санчо ҳақ,— деди герцог,— олдин қанақа графиня эканини кўрайлик-чи, кейин унга қандай муносабатда бўлиш лозимлигини ҳал қиламиз.

Шу дақиқада боққа кириб келаётган музикачилар билан бирга жун матодан тикилган узун кўйлакли ва пешлари ерга теккудек оппоқ халат ёпинган йигирма чоғли дуэньялар пайдо бўлишди. Уларнинг кетидан яроқбардори Трифальди Оқ Соқолнинг қўлига суянган ҳолда графиня Трифальдининг ўзи кириб келди. У гоаят узун, уч тарам этакли ҳарир қора матодан кўйлак кийиб олган унинг орқасидан эса барининг учидан тутган мотамсаро либосдаги уч этақбардор келарди. Бу кесма учбурчак чиройли математик шакл касб этган эди. Шунинг учун ҳам ҳамма шу замонок графиня Трифальдининг худди ана шу безаклар ифодалаб турганини, яъни, унинг графиня Уч фальд эканлигини англади.

Бу сенъора дуэньялар қуршовида салобат билан одим ташлаб келарди, дуэньяларнинг бетларига тортилган қора чодирлар Трифальдиникидек юпқа ва ҳарир бўлмагани сабабли ҳеч нарса кўринмасди. Бу ҳолни кўрган герцог, герцогиня ва дон Кихот, улар кетидан эса бошқалар ҳам ўринларидан туришди. Дуэньялар яқинлашгач тўхтаб, Трифальдининг қўлига суяниб келаётган Долоридани олдинга ўтказиб юбордилар. Герцог, герцогиня ва дон Кихотлар унга томон йигирма қадамча юрдилар, Долорида эса тиз чўкиб бўғиқ ва хириллаган товуш билан сўзлай кетди:

— Ҳазрати олийлари, илтифот кўрсатиб ўзларининг содиқ хизматкорларига, кечирасиз, оқсочларига, бунчалик иззат-икром кўрсатмасалар. Сўздан адашиб қолаётганим учун ажабланманг. Мени ҳозир шундай бир қайғу азобляптики, баландпарвоз гапларни айта олмайман. Кутилмаган фалокат ақлимни олиб, эҳтимолки нариги дунёга равона қилди, шунинг учун уни қанча қидирмай, барибир топа олмайман.

— Дарҳақиқат, сеньора графиня, — деди герцог, — олижаноб ва яхши тарбия кўрган кишиларга нисбатан кўрсатиладиган ҳурмат-эҳтиромга лойиқ эканлигининг фаҳмига етмаслик учун ақлдан озмоқ лозим.

Герцог шундай деди-ю, қўлини тутиб, унга ўзидан кам мулозамат қилмаётган герцогиня ёнидаги креслодан жой кўрсатди. Дон Кихот жим эди, Санчо эса Трифальдининг ёки унинг дуэньяларидан бирортасининг башарасини кўриш иштиёқида ёнарди. Лекин ўзининг бу сезгисини сира билдиргиси келмади, шунинг учун ҳам токи уларнинг ўзлари бетларини очишларини кутиб туришга тўғри келди.

Ҳамма ҳам ўртадаги жимликни бузиб қўймаслик учун сукут сақлаб турарди. Ниҳоят, дуэнья Долорида сўз очиб қолди:

— Аминманки, қудратли сеньор, гўзал сенора, қолган ҳамма оқил ва фозил жаноблар, менинг дарду аламин қалбларингизда мурувват уйғотади, дардимга ҳамдард бўласизлар, зероки, бошимга тушган надоматлар шу қадар зўрки, у совуқ мраммарни ёради, олмосни юмшатади, пўлатни эритади. Аввало бу ажойиб жамоатчилик орасида енгилмас рицарь дон Кихот ва унинг яроқбардори Санчо Панса борми, йўқлигини билишни истардим?

Бунга бошқалар ҳали жавоб бермаслариданок, Санчонинг ўзи оғиз жуфтлаб қолди:

— Киройи яроқбардор Панса жаноблари шу ерда, айти дон Кихот зоти олийлари ҳам. Таъблари неники истаса, бемалол сўзлайверсинлар, зотан сизнинг амри олийларингизга мушток хизматкорингизмиз.

Шундан кейин дон Кихот ўрнидан туриб, Долоридага қараб деди:

— Агар сизнинг чексиз уқубатларингиз, сеньора, жаҳонгашта рицарнинг жасорати ҳамда забардаст билаги сизга ёрдам бера олишига бўлган умидингизни йўқотмаган бўлса, у қолда мен бор кучимни, у қанчалик ожиз ва назарга илмайдиган даражада бўлмасин, сизнинг хизматингизга ишлатишга тайёрман. Мен ламанчлик дон Кихот бўламан — менинг бурчим барча ночорларга ёрдам кўрсатишдир. Бизга йиғи-сиғи билан арз қилиб ўтиришнинг ҳожати йўқ. Уқубатларингизни тўғри ва очиқ-ойдин айтиб беринг, биз сизга қулоқ солиб, ёрдам беришга ёки ҳеч бўлмаганда дардингизга ҳамдард бўлишга тайёрмиз.

Буни эшитган дуэнья Долорида креслодан ирғиб турди-да, ўзини дон Кихотнинг оёқларига ташлаб деди:

— О, енгилмас рицарь, барча жаҳонгашта рицарлик остоналарига бош эккандек сизнинг оёқларингизга бош қўяман, бошимга тушган кулфат-уқубатларни топтаб мени мусибатлардан холи қилишга қодир оёқларингизни ўпмоқчиман. О, шавкатли жаҳонгашта рицарь, сизнинг улугвор жасоратларингиз Амадислар, Эспландианлар<sup>84</sup> ҳамда Бельянисларнинг барча афсонавий жасоратларидан минг чандон ошиб тушади.

Кейин у Санчо Пансага мурожаат қилиб, унинг қўлларига маҳкам ёпишиб олган ҳолда деди:

— О, жаҳонгашта рицарлар яроқбардорлари орасида энг содиғи сенинг шон-шавкатинг ва эътиборинг менинг ҳамроҳим Трифальдининг соқолидан ҳам каттадир. Сен улуг дон Кихотга хизмат қилиш билан фахрлансанг арзийди, чунки унинг тим-солида қадимги барча рицарларга хизмат қилаётирсан. Сенинг садоқатингга офаринлар ўқийман, токи сен мен билан жанобинг ўртамизда ҳакамлик қил, токи у мени, итоатли ва бахти қаро графиняни ўз ҳимоясига олсин.

Санчо эса бунга шундай жавоб қилди:

— Менинг шон-шавкатим ҳамда эътиборим ҳақида гапиришнинг ҳожати йўқ, сенъора. Мен бундай ёлворишларсиз ҳам жанобимдан сизга ёрдам беришни сўрашга тайёрман. Фақат бошингизга тушган кулфатларни тезроқ очиқ-ойдин айтиб берсангиз бўлгани, марҳаматли хоним, иннайкейин кўп хафа бўлаверманг. Биз жанобим билан сизга қандай ёрдам бера олишимиз ҳақида ўйлаб кўрамыз.

Бу гапларни эшитаркан герцог ва герцогинялар кулавериб ичаклари узилаёзди. Ичларида графиня Трифальдининг ўткир зеҳни ва ишни усталик билан олиб бораётганига таҳсин ўқирдилар. У эса гапида давом этди:

— Улуг Трапобана ҳамда Жанубий денгиз оралиғидаги Коморин бурунидан икки миля наридаги шонли Қандайя қироллигида донья Магунсия — қирол Арчипьелининг бева хотини ҳукмронлик қиларди: унинг Антономасиа исмли гўзал қизин бор эди. Онасининг барча дуэнья энагалари ичида энг муътабари ва машҳури бўлганим учун у менинг назоратим остида тарбияланарди. Биз тинч-хотиржам, бахтли яшардик. Йиллар кетидан йиллар ўтиб борарди. Ниҳоят Антономасиа ўн тўрт ёшга кирди. У шу қадар чиройли эдики, худди табиат бундай гўзалликни бошқа яратолмайдигандай. Унинг бу гўзаллиги бутун ер юзига ёйилди, ўз ўлкамизга ҳамда бегона юртлардан келган ботир шаҳзодалар эшигимизга танда кўя бошладилар. Улардан бири — оддий бир рицарь маликамнинг қалбини ром қилмоқчи бўлибди. У ўзининг навқиронлиги ҳамда ҳусни, зеҳнининг ўткирлиги ҳамда қўлидан ҳар қандай иш келишига ишонган эди. Лекин шунини айтиб қўйишни истайманки, олий ҳазратлари, агар ҳикоям сизни зериктириб қўймаган бўлса, ўша йигит гитара чалганида унинг торлари тилга кириб кетарди: бунинг устига у ҳам шоир, ҳам ажойиб рақс тушадиганлардан эди, ҳатто у қушчалар учун қафаслар ясашни, лозим бўлса тирикчилик учун пул ҳам ишлашни биларди.<sup>85</sup> У шундай қобилияти билан нозиккина бир қизнинг қалбини ром этиш у ёқда турсин, тоғни ҳам ўрнидан суриб қўя оларди. Бироқ у қотил ва қароқчи дон Клавихо аввал ҳийлагарлик билан мени тузоққа илинтириш пайига тушмаганида эди, унинг гўзаллиги ҳам, жозибаси ҳам, истеъдоди ҳам шогирдимни асир қилолмасди. Бу маккор саёқ аввалига менинг юрагимни ўзига қаратиб олмоқчи бўлди. У қаёқдаги ёлғон-яшиқ гаплар билан қўйнимни пуч ёнғоққа тўлдириб, мени йўлдан оздириб, ўзига оғдириб олди. Шундан кейин менинг ёрдамим орқасида

Автономасиа билан танишиб, уни ўзига ром қилди. Менинг эҳтиёкорлигим ва сезгирлигим сабабли дастлабки учрашувларини ҳеч ким сезмади, лекин барибир уларнинг муҳаббати қачон бўлмасин ошкор бўлиши керак эди. Қандай бўлмасин ишни йўлга солиш лозим эди. Дон Клавихо руҳонийдан Автономасианинг қўлини сўрайдиган маликанинг унга тегишни истаб ёзган хатини кўрсатадиган бўлди. Руҳоний хатни ўқиб, маликани чақиртириб унинг гапини эшитди, шундан кейин ҳурматли альгвасиллардан<sup>86</sup> бирининг уйига яширинишни буюрди...

Шу ерга келганда Санчо ҳикоя қилувчининг сўзини бўлди:

— Қандайда альгвасиллар, шоир ва дуэньялар бор экан, қасамёд қилиб айтаманки, дунёдаги ҳамма ер ҳам бир хилда экан. Лекин, сеньора Трифальди, тезроқ айта қолинг, кеч бўлиб қолди, мен бўлсам бу ишнинг оқибати қандай тугаганини билишни жуда-жуда истаيمان.

— Ҳозир билиб оласиз, — деди графиня.

Санчонинг ҳар бир сўзи герцогиняни ҳайратда қолдирар, дон Кихотнинг эса фиғонини оширарди. У яроқбардорига гапни бас қилишни буюрди. Долорида эса ҳикоясини давом этдирди:

— Руҳоний Автономасианинг олдига бир неча марта бориб, у билан узоқ-узоқ суҳбатлашди. У ниҳоят маликанинг ўз фикрида қаттиқ турганига ишонч ҳосил қилгач, Клавихо билан никоҳ ўқитишга розилик берди. Ниҳоят у дон Клавихо томонига оғиб Автономасиани унга шаръий жуфти ҳалолликка беришди. Бундан маликанинг онаси — қиролича донья Магунсия ич-этини еб, шу қадар куйиб кетдики, уч кундан кейин оламдан ўтди, уни кўмдик.

— Ростдан-а, — деди Санчо.

— Ҳаммаси аён гап, — жавоб берди Трифальди — Ахир, Қандайда тирикларни эмас, мурдаларнигина кўмилади-да.

— Шундай воқеалар ҳам бўладики, сеньор яроқбардор, — эътироз билдирди Санчо, — баъзан ҳушидан кетиб қолган одамни ҳам ўлиб қолган деб кўмиб юборадилар. Менимча, қиролича Магунсия ўлиб қолмай, ҳушидан кетиб йиқилиши керак эди. Киши ҳаётлигида ҳамма ишни тўғриласа бўлади, бунинг устига маликанинг гуноҳи шунчалик хафа қиладиган эмас экан. Агар сеньора ҳаётда учраб турадиганидек ўз махрамига ёки бўлмаса бирор хизматкорига текканда эди, буни тўғрилаб бўлмасди. Бироқ, дуэньянинг таъбири билан айтганда, шундай ақлли ёш рицарга тегиш, худо ҳақи, сира ҳам аҳмоқлик эмас. Хўш, у граф ёки маркиз эмас, оддий дворян бўлса нима бўпти! Жанобимнинг айтишича, ҳар бир олим епископлик, ҳар бир рицарь эса, айниқса жаҳонгашта рицарь қирол ёки императорлик умидидан баҳраманд бўлиши мумкин.

— Сен ҳақсан, Санчо, — деди дон Кихот, — жаҳонгашта рицарь, башарти ёвуз сеҳргарлар тўсқинлик қилмасалар, дунёда энг улуғ сеньор бўлиб олиши ҳеч гап эмас. Сиз давом этаверинг, сеньора Долорида. Менимча, сиз бу воқеанинг ачинарли тугаланишини гапириб беришингиз керак.

— Ачинарли бўлганда қандоқ!— жавоб берди графиня.— Бунинг олдида ҳатто аччиқ турп ширинлик қилади, толгул яхроғи эса ундан ҳам мазаликка ўхшайди. Шундай қилиб, қироличча қушидан кетиб қолмади, балки ўлди, биз уни кўмдик. Унинг устига тупроқ тортиб, сўнгги бор видолашмасимизданоқ қироличанинг қабри тепасида Магунсиянинг ёғоч от минган амакиваччаси — ўтакетган ёвуз, шу билан бирга сеҳргар Маламбруно пайдо бўлиб қолди. Ўз опаси учун қасд олиш, дон Клавиони бу қилғилиги, Антономасиани енгилтаклиги учун жазолаш мақсадида у қабрнинг ўзидаёқ маликани сеҳрлаб, бронза маймунга, унинг эрини эса қўрқинчли тимсоҳга айлантириб қўйди. Улар ўртасига аввал кандайчасига, сўнгра эса испанчасига таржима қилганда: «Бу тентак келин-куёвлар фақатгина жасур ламанчлик мен билан яккама-якка олишувда куч синашиб кўргандагина ўз аслига келиши мумкин, зероки тақдир уларнинг кўз кўриб, қулоқ эшитмаган саргузаштини фақат унинг шон-шавкатлари учун ато этган», деган сурияча сўзлар ёзилган устун ўрнатиб қўйди. Шундан кейин Маламбруно эгри қиличини қинидан суғуриб, менинг сочларимдан ушлаб олди-да, бошимни шартга узиб ташламоқчи бўлди. Қўрқиб кетганимдан гангиб қолдим. Тилим танглайимга ёпишиб қолган бўлса-да, бир амаллаб ўзимни ўнглаб олиб, дағ-дағ титраганимча ялиниб-ёлвориб илтижо қила бошладим, Маламбруно мени кечирди. У қиличини қинига солаётиб, ҳозир рўпарангизда турган дуэньяларнинг ҳаммасини олиб келинг, деб буюрди. Ҳаммамизни ўлимга эмас, оғир жазога — узоқ ва шармандали жазога маҳкум этажagini айтди. У гапни тугатмай турибоқ чаккаларимиз ва даҳанларимизга минглаб ўтқир игналар санчила бошлаганини сездик. Биз беихтиёр қўлларимизни ёноқларимизга олиб бордиг-у, ҳозир сиз кўрадиган аҳволни англадик...

Шу замонда Долорида ва бошқа дуэньялар чодирларини очиб юбордилар-у, бу ердагиларнинг бари ғалати бир томошанинг гувоҳи бўлдилар. Ҳамма дуэньяларнинг соқоллари бўлиб, бир хиллариники кулранг, бошқалариники қора, оппоқ яна бир хиллариники мош-гуруч эди. Герцог ва герцогиня ҳайратда, дон Кихот билан Санчо Панса таажжубда, бошқалар бўлса довдираб қолишди. Графиня Трифальди эса гапида давом этди:

— Мана, бадбахт Маламбруно биз учун қандай жазо ўйлаб топибди. У бизнинг нозик юзларимизни дағал соқол билан қоплатди. Чеҳрамизни бунақа намат билан қоплагандан кўра ўлдиргани афзал эди. Лекин шуниси ҳам борки, бунақа соқолли дуэньялар кимнинг кўзига ҳам кўрина оларди? Бунга қайси ота-она чидаши мумкин? Ким унга ёрдам бера олади? Борди-ю, дуэньяларнинг юзи силлиқ бўлиб, уларнинг териси упа-элик билан чапланганда ҳам бошқаларга манзур бўлиши қийин-у, бетига мана бунақа ўрмон униб чиққанда, у нима ҳам қила олади? О, менинг дугоналарим, дуэньялар, бадбахт онларда дунёга келибмиз, оналаримиз бевақт туққан экан бизларни.

У шундай деди-ю, ҳамманинг кўз ўнгида ҳушидан кетиб қолди.

Шунда Санчо беҳуш ётган Долоридага қараб деди:

— Одобли кишилар ва бутун авлод-аждоғларим номидан қасамд қиламанки, умрим бино бўлиб бунақа воқеани эшитмаганман, ҳатто жанобим ҳам бундай ишлар бўлишини сира айтмаган эди. Ахир, бу унинг хаёлига ҳам келмаганди. Сен, сеҳргар ва баҳайбат Маламбрунога абадий лаънатлар бўлсин! Наҳотки бу бахтиқаро бечораларга соқолдан бўлак жазо бўлмаса? Менимча бу бечораларнинг сартарошнинг ҳақини тўлашга ҳам ҳеч нарсалари бўлмаса керак.

— Тўғри айтасиз, сеньор,— жавоб берди ўн икки дуэньянинг бири,— агар сеньор дон Кихот бизни бу соқоллардан халос этмаса, гўрга ҳам соқол билан кирамиз.

Шундан кейингина дон Кихот уларни юпатиш учун сўз қотди:

— Сизни шу аҳволга ташлаб қўйгандан кўра, маврлар юртида менинг соқолларимни битталаб юлиб олганлари маъқул.

Шу топда ҳушига келиб қолган графиня Трифальди шундай деди:

— О, шавкатли рицарь! Бизга қувончли умид бахш этаётган ёқимли товушингиз мени ҳаётга қайтарди. Шухратли ва қудратли жаҳонгашта сеньор, олиҳимматлик билан берган ваъдангизнинг устидан чиқишингизни ўтиниб сўрайман.

— Мен ишни бу ҳолда қолдирмайман,— жавоб қилди дон Кихот,— фақат айтинг-чи, сеньора, нима қилишим керак, зероки бор жасоратим сиз учун хизмат қилишга мунтазир.

— Иш шундаки,— жавоб қилди Долорида,— бу ердан Кандайя қироллигигача агар қуруқлик орқали борилса, беш минг миль. Мабодо учиб борилса, уч минг икки юз йигирма етти миль. Бундан ташқари, Маламбруно айтдики, мабодо тақдир мени сиз халоскор рицаримизга йўлиқтиргудек бўлса, от юборармиш, от бўлганда ҳам аллақандай қирчанғи эмас, балки шавкатли Пьер гўзал Магелонани олиб кетган қойилмақом ёғоч отни юборармиш. Бу отни қаншаридаги мурватни бураб бошқарилади, у осмонда шу қадар тез учадики, худди уни шайтонлар қичаб ҳайдаб бораётганга ўхшайди. Ривоятларга кўра, бу отни доно Мерлин ясаган, уни фақат дўсти Пьерга фойдаланишга бериб турган. Лекин Мерлин ўз отини кимни кўнгли хоҳласа ёки ким яхши ҳақ тўласа шунгагина берарди. Маламбруно ўз сеҳру жодулари ёрдами билан қўлга киритган бу отни эндиликда ўзи миниб, оламни кезиб юрибди: бугун бу ерда, эртага Францияда, индинга эса Америкада. Ҳаммадан қойили шуки, бу от ҳеч нима емайди, ухламайди, тақаси ҳам ейилиб кетмайди, қанотсиз ҳам шундай текис учадики, устида кетаётган чавандоз бир пиёла сув кўтариб олганда ҳам бир томчиси тўкилмайди.

Гап шу ерга етганда Санчо бундай деди:

— Енгил ва равон училишга келганда шуни айтиш керакки, менинг кулрангим ҳам осмонда учолмаса-да, қаттиқ ерда ҳеч қандай йўрғадан қолишмайди.

Ҳамма кулиб юборди, Долорида эса гапида давом этди:

— Шундай қилиб, агар Маламбруно бизни бошимизга тушган балодан қутқармоқчи бўлса, қоронғи тушгандан кейин ярим соат ўтгач от шу ерда ҳозир бўлади.

— Сиз айтаетган отга неча киши миниши мумкин?— деб сўради Санчо.

Долорида шундай деб жавоб берди:

— Икки киши: бири эгарга, иккинчиси отнинг сағрисига. Одатда рицарь бирор хонимни олиб қочаетган бўлса, унга яроқбардори билан икки кишилашиб минадилар.

— Мен шуни билишни истардимки, сеньора Долорида, — деди Санчо, — бу отнинг исми нима экан-а?

— Унинг исми, — жавоб қилди Долорида. — Беллерофонт<sup>87</sup> отиникига ўхшаб Пегас ёки Буюк Искандарнинг отиникига ўхшаб Буцефал эмас, Баярд лақабли Рейнальд Монтальбанскийникига ҳам ўхшамайди.

— Бу отнинг номи машҳур рицарларнинг тулпорлари номи шарафига қўйилмаган экан, демак у менинг жанобимнинг Росинанти номи билан ҳам юритилмас экан-да.

— Мутлақо тўғри, — деди серсоқол графиня, — у от ўзининг тезкорлиги билан Учар Клавиленьо деб аталади.

— Бу ном менга ёқади, — давом этди сўзида Санчо. — Уни қандай бошқарилади, жилов биланми, жиловсизми?

— Мен сизга айтдим-у, жилов билан эмас, алоҳида мурвати билан деб, — жавоб қилди графиня Трифальди. — Унга минган рицарь мурватини гоҳ бу тарафга, гоҳ у тарафга бураб, истаган томонга учиради: от ёки кўкка парвоз қилади, ёки ерга тушади.

— Бу сеҳрли отни бир кўришга қарши эмасман, — деди Санчо, — лекин сиз мени унга минади деб чучварани хом санамай қўяқолинг. Сиз менинг отнинг ёғоч яғринига минишимни истайсизми, тагин тўшаксиз ёки ёстиқсиз-а. Жин урсинки, аллақандай нотаниш дуэньяларнинг соқолини йўқ қилишга кўмаклашиш учун ичак-чавоғимни ағдар-тўнтар қиларканманми. Шуниси ҳам борки, албатта, уларга менинг ёрдамим керак ҳам эмас.

— Жуда керак-да, дўстим, — эътироз билдирди Трифальди, — шундай керакки, сизнинг иштирокингизсиз ҳеч нарса қилолмаймиз.

— Мени қутқаринглар, саховатли кишилар! — хитоб қилди Санчо. — Хўжайинларнинг қилмиш-қидирмишлари билан яроқбардорларнинг қанчалик иши бўлсин? Борки иззат-икром, шон-шуҳрат рицарларга раво кўрилади, биздақа яроқбардорлар ўз ҳаддини билиб ишини қилаверсин. Ҳатто тарихчилар ҳам жаҳонгашта рицарларнинг қаҳрамонликларини тасвирлар эканлар ҳеч қачон яроқбардор ҳақида лом-мим демайди, гўёки яроқбардор зоти ёруғ оламда бўлмаган. Йўқ, сеньорлар, такрор айтаманки, жанобимнинг ёлғиз ўзи бораверади, худо омадини берсин, мен бўлсам шу ерда сеньора герцогиня ҳузурда қолиб, сеньора Дульсинеяни сеҳр-жодудан халос этиш билан шуғулланаман. Менга шунинг ўзи ҳам етади.

— Ҳар ҳолда, саховатли Санчо,— деди герцог,— лозим бўлса сиз ўз жанобингизга ҳамроҳ бўлиб боришингиз керак. Сизнинг бе-маъна қўрқоқлигингизни деб бу сеньорларнинг юзи шундай бад-башара бўлиб қолишига йўл қўйиб бўлмайди. Ахир, бу одобдан эмас.

— Яна илтижо қиламан: қутқаринглар мени!— хитоб қилди Санчо.— Башарти таркидунё қилган ёш қизалоқларга раҳм-шафқат кўрсатиш лозим бўлса бошқа гап эди. Лекин дуэньяларни соқолдан холи қилиш учун азоб чекайми? Ҳе, жин урсин уларни! Уларнинг каттасидан тортиб кичигигача, биринчи таманносидан тортиб, сўнгги қийшангисигача соқол билан юраверсин.

— Дуэньяларни яхши кўрмас экансиз, дўстим Санчо,— деди герцогиня.— Бироқ онт ичаманки, сиз ноҳақсиз. Менинг уйимда ибрат олса арзигулик дуэньялар бор. Мана, масалан, олдингизда турган донья Родригесни олайлик.

— Кулаверинг, кулаверинг, ҳазрати олиялари,— деди донья Родригес.— Дуэньяларни ҳам худо яратган, демак уларни нимага яратганини ўзи билади. Яратган тангрим марҳаматини даруғ тутмасин, майли, бу қўпол яроқбардорнинг барча ҳақоратларига чидайман ва...

— Дуэньялар ҳақидаги гапларни бас қилайлик,— деди сабр-тоқати тугаган дон Кихот.— Қани, ўша Клавильеню келсин-чи, шу замоноқ унга миниб ўша Маламбруно билан жангга кираман-у, сизнинг соқолларингизни устара билан олишдан ҳам осонроқ йўл билан калласини танасидан жудо қиламан-қўяман, Санчо бўлса, албатта, ниманики буюрсам ҳаммасини бажаради.

— Қойил!— деб юборди Долорида.— О, шавкатли рицарь, самовий мавжудодлар лутф айлаб, сиздек улуг зотга зафар ва жасорат йўлласинким, токи сиз шармандаи шармисор қилинган ҳамда эзилган дуэньяларнинг ҳомийси, таянчи бўлғайсиз: уни аптекачилар кўролмайдди, яроқбардорлар лаънатлайди, маҳрамлар гийбат қилади. О, баҳайбат Маламбруно, бу укубатдан халос бўлиш учун тезроқ тенги йўқ Клавильенюни юборақол!

Трифальди бу сўзларни шундай ҳаяжонланиб айтдики, бу ердагиларнинг ҳаммасининг кўзидан ёш чиқиб кетди, Санчо ҳам кўзига ёш олиб, шу замоноқ ичида дон Кихот билан ҳатто дунёнинг у четига ҳам боришга қарор қилди.

Бу орада тун чўкиб, тенги йўқ Клавильеню етиб келадиган пайт ҳам бўлди. Бироқ, ҳалигача ундан дарак йўқ эди. Дон Кихот безовталана бошлади. Маламбруно у билан яккама-якка олишишдан воз кечиб, бошқа рицарь билан курашишга аҳд қилиб, айниб қолган бўлса-я, деб хавотирлана бошлади. Бироқ, тўсатдан боққа тўрт ваҳший одам кириб келди. Улар елкаларида катта ёғоч отни кўтариб келардилар; ваҳшийлар дон Кихотнинг олдига келиб отни ерга қўйдилар, сўнгра улардан бири:

— Қани, бу улкан отга ботирлиги етадиган рицарь минсин,— деди...

— Ҳар қалай мён минмайман,— сўзни бўлди Санчо,— менинг ботирлигим ҳам етмайди, рицарь ҳам эмасман.



Ваҳший сўзида давом этди:

—...борди-ю, ўша рицарнинг яроқбардори бўлса, отнинг сағрисига минсин. Отнинг қаншаридаги мурватни буралса бас, у шу замоноқ парвоз қилиб, чавандозларни кутиб турган Маламбруно олдига бир зумда етказиб қўяди. Аммо учиш олдидан чавандозлар кўзларини албатта боғлаб олишлари керак. Бўлмаса бошлари айланиб, ерга йиқилиб тушишлари мумкин. Токи от кишнаб, парвоз тугаганини билдирмагунча чавандозлар кўзларини очмасликлари лозим.

Шу гаплардан кейин ваҳшийлар Клавиленьони қолдириб, таъзим қилиб чиқиб кетдилар. Долорида бўлса кўз ёши қилиб дон Кихотга шундай деди:

— Шавкатли рицарь, Маламбруно ўз ваъдасининг устидан чиқди — мана, от қаршингизда турибди. Соқолларимиз эса тобора ўсиб боряпти, сенга ёлворамиз, бизни қутқар ундан. Бунинг учун сен отнинг сеҳрли кучига ишониб ўз яроқбардоринг билан унга миниб олсанг бас.

— Мен буни бажони дил бажараман: ахир мен, сиз сеньора ва барча дуэньяларингизнинг нозик чеҳраларини топ-тоза ва силлиқ ҳолда кўриш иштиёқида ёняпман.

— Мен бўлсам бу ишни бажонидил ҳам, бебажонидил ҳам, умуман ҳеч қанақасига бажармайман,— деди Санчо.— Борди-ю, бу хонимларнинг соқолини тўкиш учун от сағрисига мингашиш зарур бўлса, унда жанобим бошқа яроқбардор ахтара қолсин ёки бўлмаса бу сеньоралар ўз юзларини текислаш учун бирорта бошқа йўл топишсин. Нима, жодугармидимки осмону фалакда учиб юрсам? Ахир, ороликлар губернаторларининг осмонда учиб юрганини пайқаб қолишса нима деб ўйлашади! Бундан ташқари, Қандайягача уч минг миль учиб борилса. Борди-ю, отимиз чарчаб қолса ёки паҳлавон Маламбрунонинг жаҳли чиқиб кетса қандай қилиб қайтамиз? У ҳолда ҳеч қандай орол мени кўролмайди. Ахир, кишилар сигир ҳадя қилишдими, дарров арқонга чоп, деб бекорга айтишмаган-ку. Шунинг учун сеньораларнинг соқоллари мени кечирсин, менга шу ер ҳам яхши. Бу хонадонда мени эркалашади, қаср соҳиби эса зўр марҳамат кўрсатиб мени губернатор қилиб тайинлашга ваъда қилган.

Герцог эса бунга шундай жавоб қилди:

— Дўстим Санчо, ҳар қандай унумли ва юқори мансаб маълум хизмат эвазигагина қўлга киритилади. Буни мендан кўра ўзингиз яхшироқ билсангиз керак. Маълумингиз бўлсинки, сеньор дон Кихотга ҳамроҳ бўлиб йўлга тушганингиздан кейингина мендаги губернаторликни қўлга кирита олишингиз мумкин. Клавиленьодан эсон-омон қайтиб келасизми ёки шум тақдир тақозоси билан қаландарнамо дарбадар, беҳуда тентийсизми — ҳуллас қачон қайтманг барибир орол ва губернаторлик сизники бўлади. Қарорим қатъий: сўзларимнинг тўғрилигига ишонинг, Санчо, акс ҳолда мен ўзимни қаттиқ ҳақоратланган ҳисоблайман.

— Бошқа бир оғиз ҳам гап керак эмас, сеньор, мен оддий бир яроқбардорман ва ҳеч қачон сўзларингизнинг тўғрилигига ик-

киланмайман,— жавоб берди бечора Санчо.— Майли, жанобим отга мина қолсин, кўзимни боғланг, ҳақимга дуо қилиб, тангрига илтижо қилинг, шу нарсани айтинг-чи, руҳимни қодир эгамга топшириб, фалакда учиб кетаётиб фариштаю малоикаларни кўмакка чақирсам бўладими?

Бунга Трифальди шундай жавоб қайтарди:

— Албатта, Санчо, сиз ўз жонингизни худога ёки истаган кишингизга топширсангиз бўлавереди. Ахир, Маламбруно ҳам сеҳргар бўлгани билан ҳар ҳолда христиан-ку.

Шу пайт дон Кихот Санчони ёнига чақириб, гапни бўлди.

У Санчо билан чеккароқдаги бир дарахт остига келди-да, унинг қўлидан ушлаб туриб деди:

— Кўрдингми, биродар Санчо, биз олис сафарга отланишимиз керак. Қачон қайтишимиз ва сен бемалол, шошмасдан Дульсинеяга берган ваъдангни бажаришга киришишинг бир худонинг ўзига аён. Шунинг учун ҳозир ўз хонангга жўнашингни истардим. Йўлга нима олишинг кераклигини айтгин. Бориб, ҳеч бўлмаганда беш юз қамчи туширсанг ҳам майли. Бунинг учун озгинагина вақт керак, холос, бу билан эса менга катта тасалли берган бўласан. Бунинг мен учун қанчалик муҳимлигини ўзинг биласан-ку.

— Йўқ, марҳаматли жанобим,— хитоб қилди Санчо,— бунақаси кетмайди. Ҳозир мен қип-яланғоч ёғочга ўтирарканман-у, марҳаматли жанобим бўлса ўз-ўзимни савалашни истар эканларда! Олдин бу дуэньяларнинг соқолини тўккани жўнайлик, қайтиб келишимиз биланоқ ўз ваъдамни бажаришга киришишга ва сизга тўла-тўкис тасалли беришга сўз бераман. Гап тамом шу билан.

Дон Кихот эса жавоб қайтарди:

— Майли, олижаноб Санчо, ваъданга қониқиш билдириб, гапингнинг устидан чиқасан деб ишонаман.

Шундан кейин улар Клавиленьонинг ёнига бордилар. Дон Кихот отга мина туриб деди:

— Кўзингни боғлаб, отга мингаш, Санчо, шундай олис мамлакатдан йўқлатишган экан, демак бу бизни алдаш учун эмас, дарвоқе ишонувчан кишиларни алдаш уят. Ҳатто, бу саргузаштимиз мен ўйлагандек бўлиб чиқмаса ҳам, ҳар қалай бундай жасоратга отланиб, жаҳондаги ҳеч қандай ёвузлик доғ туширолмайдиган шон-шуҳратга эришамиз.

— Қани кетдик, сеньор,— жавоб берди Санчо,— бу сеньорларнинг соқол ва кўз ёшлари қалбимни пора-пора қилиб юборай деяпти. Улар бу балодан қутулмагунларича томоғимдан ҳеч нарса ўтмайди. Сиз олдин мийнинг, марҳаматли жанобим ва кўзингизни боғлаб олинг. Мен ахир сағрисига мингашаман-ку, эгарга минадиган одам олдин миниши ҳаммага аён-ку.

— Ҳа, тўғри айтасан,— деди дон Кихот.

Шундан сўнг у чўнтагидан рўмолчасини олиб, Долоридадан кўзини яхшилаб боғлаб қўйишни илтимос қилди, кейин ёғоч

Клавиленьога лип этиб миниб, қаншаридаги мурватни ушлади. Эгарнинг узангиси йўқлигидан дон Кихотнинг оёғи ҳавода осилиб қолди. У худди фламандача гиламга тўқилган, зафар қозонган римлик чавандозга ўхшаб кетди.

Санчо эринибгина ва истар-истамас тузукроқ жойлашиб олгач, бундай ўтириш ниҳоятда қийинлигидан нолиб кўйди. У герцогдан, сеньоранинг ётоғидан ёки бирор маҳрамнинг ўрнидан биронта ёстиқ ёки тўшакча олиб отнинг сағрисига солинса қандай бўларкин, деб сўради. Бунга Трифальди Клавиленьонинг ўз сағрисига ҳеч қандай ёстиқ ва намат солишларига йўл қўймаслигини, жуда бўлмаса Санчонинг отга аёлчасига мингашишини, шундай қилса бунчалик қаттиқ ботмаслигини айтди. Санчо шундай қилиб ўлтирди-да, хайрлашиб бўлиб кўзини боғлаб қўйишларига ижозат берди. Бу иш бажарилгач, у яна кўзини очиб, бу синолда мадад беришларини ва уларнинг ҳар бири «отче наш» ҳамда «богородица» дуоларини ўқишларини кўзига ёш олиб улардан илтижо қилди.

— Эҳтимол,— деб илова қилди у,— улар ҳам бир вақт келиб шундай мушкулликка тушиб қолишар, ўшанда худо улар учун ибодат қиладиган киши юборади.

Шунда дон Кихот деди:

— Бу қанақа аҳмоқчилик! Худди сени дор ёки ўлим кутяпти, деб ўйласа бўлади-я. Нима кераги бор бунақанги илтижоларни? Э, уятсиз, қўрқоқ махлук, ахир сен бир вақтлар гўзал Магелона мингашган жойда ўлтирибсан-а, агар тарихчилар алдамаган бўлса, бу отдан тушиб у лаҳадга кирган эмас, Франция тахтига ўтирган. Наҳотки мен, бир вақтлар шавкатли Пьер ўлтирган жойда, яъни ёнингда ўлтирган каминаю камтаринлари ўша жасур рицарга тенглаша олмасам? Боғла кўзингни, юраксиз махлук. Бундан буён ҳеч бўлмаганда мен борлигимда ваҳима сенинг тилинг билан сўзламасин.

— Ҳа, майли, боғланг кўзларимни,— деди Санчо итоаткорона,— ибодат қилишимга ҳам, бошқаларнинг мен учун ибодат қилишларига ҳам қўйишмайди, тагин йўлда бизга шайтонлар галаси учраб, бизларни дўзахга равона қилишмаса деб қўрқяпти, деб ҳайрон ҳам бўлишади.

Ниҳоят Санчонинг кўзини боғлашди, дон Кихот ҳам ҳамма иш битганини кўриб, отнинг мурватини буради. У шундай қилиши биланоқ ҳамма дуэньялар ва тўпланган бошқа одамлар қичқириб қолишди:

— Худо ҳамроҳингиз бўлсин, шавкатли рицарь!

— Худо ёр бўлсин, қўрқмас яроқбардор!

— Мана, ҳозир кўкка кўтарилиб, ўқдек учиб кетасиз.

— Маҳкам ушла, довюррак Санчо, лапанглама. Эҳтиёт бўл, йиқилиб тушма, нақ санинг йиқилишинг ўз отаси — Қуёшни<sup>88</sup> ғилдиратиб юбормоқчи бўлган йигитнинг қулашидан бўлмасин тагин.

Буни эшитган Санчо жанобига маҳкамроқ ёпишиб олди-да, қўллари билан уни кучоқлаб олиб деди:

— Сенъор, улар нега бундай дейишяпти, нима, биз жуда осмонга кўтарилиб кетдикми, уларнинг товуши худди ёнгина-мизда туришгандек яхши эшитиляпти-ку ахир?

— Шуни унутмагинки, Санчо, сеҳргарлик аралашган ерда ҳеч қутилмаган ишлар бўлади. Лекин менга бунчалик ўзингни ташлаб олма, отдан ағдариб юборасан мени, тавба, нега бунчалик хавотирланасан-а, сира тушунолмайман; имоним комилки, ҳеч қачон шу қадар текис ва равон учадиган отда юришга тўғри келмаганди. Худди бир жойда қимирламай турганга ўхшаймиз. Шундай қилиб, дўстим, кўрқма, ишимиз жойида, орқадан эсган шамолнинг ўзи учириб кетяпти.

— Ҳа, бу тўғри, — жавоб берди Санчо, — шунинг учун бўлса керак, менинг бир биқинимдан шундай шамол қаттиқ уряптики, худди ёнимда минглаб босқончилар ишлаётганга ўхшайди.

Ҳақиқатан ҳам шундай эди. Герцог хизматкорлари билан олдинданок саргузаштнинг ҳамма тайёргарлигини кўриб қўйган, ҳозирлаб қўйилган босқонларнинг дами тўғри жасур сайёҳларга қаратилган эди.

— Биз шунчалик шиддат билан учяпмизки, Санчо, дам ўтмай оловли ерга етамиз. Бу сеҳрли от бизни ловиллаб турган олов ичига олиб кириб, бу совут-қалқонли баданларимизни куйдириб кулга айлантирмасин учун нима қилишни ҳам билмай қолдим.

Шу пайт герцогнинг хизматкорлари таёқлар учига боғланган, ёниб турган машъалаларни худди уларнинг бурунлари остида силкита бошладилар. Санчо иссиқдан қичқириб юборди:

— Агар биз оловли ерга келмаган бўлсак, жонимни суғуриб олинг. Ярим соқолим куйиб бўлди. Мен кўзимни очиб, қаерда турганимизни билмоқчиман.

— Бундай қила кўрма, — эътироз билдирди дон Кихот, — агар Маламбрунонинг амрини бузсак, ким билсин, бизни қандай фалокатлар кутяпти. Эҳтимол, биз шундай юксакликка кўтарилагандирмизки, баландга кўтарилиб туриб, пастдаги қарқарага ўқдек ташланадиган бургут ёки шунқор каби тўппа-тўғри Кандайя қироллигига тушармиз. Гарчанд боғдан чиқиб кетганимизга ярим соат бўлган бўлса-да, ишонтириб айтаманки, биз жуда узок масофани босиб қўйдик.

— Сира тушунолмай қолдим, — жавоб берди Санчо, — ўйлайманки Магальянес ёки Магелони шу отнинг сағрисида ўтириб учган экан, демак у унчалик нозиктабиат эмас экан.

Герцог, герцогиня ва ҳамма мулозимлар қаҳрамонларимизнинг суҳбатини эшитиб кулгидан ўзларини аранг тутиб туришарди. Ниҳоят, герцог бу ажойиб саргузаштга хотима бериш учун портловчи ракетали ловиллаб турган машъалани Клавиленъонинг думига тутишни буюрди. Ракета портлаб кетиб, от гумбурлаб осмонга отилди. Сал-пал куйган дон Кихот билан Санчо ерга думалаб тушишди. Улар ўзларига келанларида, ўзлари жўнаган боғда турганликларини кўриб лол бўлиб қолишди, уларнинг атрофида эса герцог, герцогиня ва бошқалар ҳушдан кетиб ётишарди. Графиня Трифальди бошлиқ серсоқол дуэнья-

лар эса қаёққадир ғойиб бўлишибди. Улар шундоқ ёнгиналарида ерга санчилган, учига зангори ипак билан сув ўтказмайдиган оппоқ қоғоз боғлаб қўйилган узун найзани кўриб айниқса ажабланишди, қоғозга катта-катта зарҳал ҳарфлар билан шундай сўзлар ёзилган эди:

*Машҳур ламанчлик рицарь дон Кихот графиня Трифальдини халос этиш йўлидаги улкан ишни қойил қилди. Ундан фақат бу жасоратга отланиш талаб қилинган эди. Маламбруно шуни таъкидлайдики, у шавкатли рицарнинг бу жасоратидан қониқди. Дуэньяларнинг юзи сип-силлиқ, текис ва топ-тоза бўлди, қирол дон Клавихо билан қиролича Антономасианинг ҳаёти, озодлиги қайтариб берилди. Барча сеҳргарларнинг сеҳргари донишманд Мерлин шунга қарор қилдики, яроқбардор ўзини ўзи савашни тугатгани ҳаманоқ оқ кабутар қийнаб азоб бераётган ваҳший қирғийлар чангалидан озод бўлди.*

Дон Кихот буни ўқиб, унда Дульсинеянинг озод қилиниши ҳақида гап бораётганлигини тушунди ва шундай арзимас хавфхатарни бошдан кечириш билан шунчалик улуг ишни осонгина бажарганлиги ҳамда ҳурматли дуэньяларнинг бетлари дастлабки нозик териларига қайтганлиги учун тангрига шукроналар ўқиди. Шундан кейин у ҳамон ҳушсиз ётган герцог ва герцогинянинг олдига келди-да, герцогнинг қўлидан ушлаган ҳолда деди:

— Бас энди, дадил бўлинг, эй олиҳиммат сеньор, буларнинг бари арзимаган бир гап. Саргузаштимиз мана бу сув ўтказмайдиган қоғозда ёзилгандек тўла ғалаба билан тугади.

Герцог худди қаттиқ уйқуда ётган кишидек аста-секин ўзига келди. У қоғоздаги ёзувни ўқигач дон Кихотни қучоқлаб олди ва ажойиб ғалаба билан табриклади; ерда ётган герцогиня ва бошқалар ҳам уйғонишди. Уларнинг чеҳраларида шундай қўрқинч ва ҳайрат акс этиб турардики, гўё бу воқеа ажойиб ҳазилга эмас, балки чин ҳақиқатга ўхшарди. Санчо бўлса Долоридани қидирар, унинг соқолсиз чеҳрасини, ҳақиқатан ҳам гўзал эканлигини кўргиси келарди. Лекин унга оловга буркалган Клавильенё ерга гурсиллаб қулаши биланоқ барча дуэньялар Трифальди билан ғойиб бўлиб қолишганини, аммо уларнинг соқоллари худди энг моҳир сартарош қириб ташлагандек топ-тоза бўлиб қолганини айтишди. Герцогиня Санчодан бу узоқ сафар давомида ўзини қандай ҳис қилганини сўради, Санчо шу замоноқ ҳикоя қилишга киришди:

— Сеньора, биз оловли ердан учиб бораётганимизда кўзим боғланган рўмолчани сал суриб пастга — ерга қарадим. У худди горчица уруғича, ерда юрган одамлар эса ёнғоқдек бўлиб кўринди. Шунинг ўзиданоқ нақадар баландликка кўтарилганимизни билиб олишингиз мумкин.

Бунга герцогиня шундай жавоб қилди:

— Дўстим Санчо, нима деяётганингизни ўйлаб кўринг. Агар

сизга ер горчица уругидек, одамлар эса ёнғоқдек кўринган бўлса, унда бу одамлар ерга қандай қилиб сиғишади?

— Шунинг билиб олингки, жаноби олиялари, — деди Санчо, — бизнинг учишимиз сеҳр орқали бўлди. Демак, мен бутун ер юзи ва одамларни сеҳрланган ҳолда кўрдим. Борди-ю, марҳаматли бекам ишонмасалар, демак, бундан бу ёғига ҳам ишонмайдилар. Кўзимдаги рўмолчани сурганимда осмон худди мендан бир ярим футча нарида турганлигини кўрдим, сўзларимга ишонинг, у ниҳоят улкан эди. Самода яна етти улоқни<sup>89</sup> кўрдим. Сизга шунинг айтишим керакки, ёшлигимда мен эчкибоқар эдим, шунинг учун ҳам бу эчкиларни шунақанги эркалагим келдики, нақ юрагим ёрилиб кетай деди. Мен ўз хўжайинимга лом-мим-ҳам демай, Клавиленъодан астагина тушдим-да, жажжи, шум-така улоқлар билан чоракам бир соатча ўралашиб қолдим, Клавиленъо бўлса бу вақт ичида бир қадам ҳам силжимамай жойида тек тураверди.

— Олижаноб Санчо улоқлар билан овора бўлиб юрган чоғда сенъор дон Кихот нима билан машғул бўлди? — деб сўради герцогиня.

Бунга дон Кихот шундай жавоб қилди:

— Узим ҳақимда гапирай, мен кўзимдаги рўмолчани баландга кўтармадим ҳам, пастга туширмадим ҳам, шу сабабли на осмонни, на ерни, на денгизни кўрдим. Тўғри, ҳаво қатлами-ни ёриб ўтганимизни, ҳатто оловли ерга яқинлашганимизни ҳис қилдим, бироқ тўхтаганимизни, Санчонинг Клавиленъодан тушганини сезмадим. Шунинг учун ҳам у ё алдаяпти, ёки бўл-маса хаёл суряпти.

— Алдаётганим ҳам йўқ, хаёл ҳам сурмаётирман, — жавоб берди Санчо, — ишонмасангиз мендан ўша улоқларнинг қанақалигини сўраб кўринг, иннайкейин ишонасиз гапларимнинг тўғрилигига.

— Қани, уларнинг қанақалигини тасвирлаб берингчи бизга, Санчо, — деди герцогиня.

— Улардан иккитаси яшил тусли эди, — жавоб берди Санчо, — иккитаси қизил, иккитаси зангори, биттаси ола-була эди.

— Бу қанақанги улоқлар бўлди? — деди герцог. — Ер юзида бунақанги ранг-баранг эчкилар бўлмайди-ку.

— Тушунарли, — жавоб берди Санчо, — ер эчкиси билан осмонникининг фарқи бўлиши керак-ку, ахир.

Шундан сўнг бу саёҳат ҳақида бошқа савол беришмади унга, чунки Санчо боғдан бир қадам ҳам жилмасданоқ етти қават осмонни айланиб, у ерларда бўлаётган ҳамма нарсани айтиб бера олиши равшан эди. Шу билан герцоглар оиласини мамнун қилган ҳамда Санчо, башарти абадий барҳаётликка эриша олса, тоабад олди-қочди гапларни тўқиб чиқариши мумкин бўлган дуэнья Долорида саргузашти тугади. Дон Кихот Санчонинг қулоғига энгашиб деди:

— Санчо, агар сенинг кўкда кўрганларингнинг ҳаммасига ишонганимизни истасанг, унда менинг Монтесинос ёри ҳақидаги

ҳикоямга ҳам ишонишинг лозим. Сенга айтмоқчи бўлган гапим шу, холос.

### XLVIII БОБ

#### ДОН КИХОТНИНГ ОРОЛНИ БОШҚАРИШГА ЖЎНАБ КЕТИШ ОЛДИДАН САНЧО ПАНСАГА ҚИЛГАН ПАНДУ НАСИХАТЛАРИ

Долорида саргузашти герцог ва герцогиняга шунчалик ёқиб қолган эдики, улар энди бу соддадил дўстлар устидан яна бир неча қизиқ ҳангомалар уюштиришга аҳд қилишди. Шунинг учун ҳам Клавиленьо учган куннинг эртасига герцог Санчога губернаторлик вазифасини бажаришга киришиш кераклигини, чунки ороликлар унинг келишини худди баҳор ёмғиридек орзиқиб кутишадиганлигини айтди.

Санчо таъзим қилиб, деди:

— Осмондан туриб ернинг нақадар кичкина эканлигини кўрганимдан бери губернатор бўлиш иштиёқи бир қадар сўнди. Горчица уруғидек ерга эга бўлишу беш-олти нафар ёнғоқдек ёнғоқдек одамларга бошчилик қилишдек шарафга муяссар бўлиш нима деган гап экан. Агар жаноб олийлари осмоннинг бир чеккасинигина, майли ярим миль бўлса ҳам, ҳады этганларида эди, оламдаги энг катта оролдан кўра ўшани бажонидил қабул қилган бўлардим.

— Дўстим Санчо, — жавоб берди герцог, — мен осмоннинг бир қаричини, ҳаттоки тирноқчасини ҳам ҳеч кимга совға қилолмайман, бунга яккаю ягона худонинг ўзигина қодир. Мен сизга қўлимдан келадиганини ҳады қиламан, энг яхши, дум-думалоқ ва теп-текис, серҳосил, тўкин-сочин ажойиб бир оролни бераман. Агар ишларни яхши ўринлата олсангиз борми, ернинг нознеъмати билан етти қават осмону фалак айшини сурсангиз бўлади.

— Майли, орол бўлса орол-да, — жавоб берди Санчо. — Мен губернаторликни шундай олиб борайки, руҳим барча муттаҳамларни доғда қолдириб, тўппа-тўғри арши аълога учсин. Мен ишга ғараз ёки кибр билан, ёки қўлимдан келмайдиган юқори мартабани эгаллаш иштиёқи билан киришмоқчи эмасман, аксинча, бу губернаторлик мансаби қанақалигини шунчаки бир кўриб қўймоқчиман, холос.

— Бу ишнинг мазасига бир марта тушуниб олсангиз, Санчо, — жавоб берди герцог, — кейин мазахўракка ўрганиб қоласиз, чунки оламда буйруқ қилишдан ва ҳамманинг амрингизга итоат этишини кўришдан ҳузурлироқ иш йўқ, ахир. Имоним комилки, хўжайинингиз император бўлиб олгач, дарвоқе, бу кун узоқ эмас, албатта, ҳеч ким ҳокимиятни унинг қўлидан тортиб ололмайди ва шунча йилдан бери императорлик қилмаганлигига ич-ичидан ачинади.

— Сеньор, — жавоб берди Санчо, — мен ҳатто қўйлар сурувига бўлса-да, буйруқ қилиш ёқимли эканлигини тушуниб турибман.

— Иккаламиз бир хил эканмиз, Санчо, — деди герцог. — Ҳамма нарсага ақлингиз етади, ишонаманки, оролни ҳам ақл билан

мулоҳаза юритганингиздек оқилона бошқарасиз. Билиб қўйинг, эртагаёқ губернаторлик қилишга жўнайсиз, бугун эса сизга лозим бўлган либосларни беришади.

— Қандай қилиб кийинтиришса ҳам майли,— жавоб берди Санчо.— Кийимим қандай бўлишидан қатъи назар, барибир мен Санчо Пансалигимча қоламан.

— Мутлақо тўғри,— деди герцог,— бироқ одам ўз мансаби ва мавқега қараб кийиниши лозим. Ахир, юристга аскарнинг кийими, аскарга эса руҳоний жуббаси муносиб эмас-ку. Сиз, Санчо, бир йўла ҳам олимона, ҳам ҳарбийча кийнасиз, зероки мен сизга ҳади қилган оролни бошқариш учун қанча билим зарур бўлса шунча ҳарбий санъатни билиш зарур ва аксинча.

— Билимим йўқроқ,— эътироз билдирди Санчо,— мен ҳатто алифбени ҳам билмайман, бироқ кўрасиз, ҳазрати олийлари, бу ҳол яхши губернатор бўлишимга халал бермайди. Ҳарбий санъатга келганда, агар менга қурол берсалар, худонинг ирода-си билан то йиқилиб қолмагунимча уни қўлимдан қўймайман.

— Бундай қатъий қарор билан, эҳтимол, ҳеч қачон биронта ҳам хатога йўл қўймассиз, Санчо,— жавоб берди герцог.

Шу пайт дон Кихот кириб келди. У Санчонинг пировардида оролга губернатор қилиб тайинланганини билгач, герцогнинг рухсати билан унинг қўлидан ушлаб панд-насихат қилгани ўз хонасига бошлади. Хонага киргач, эшикни ёпиб, Санчони мажбур қилиб ёнига ўтказди-да, вазминлик билан гап бошлади:

— Дўстим Санчо! Фалакка минг-минг ташаккурки, менинг бахтим кулиб боқмасданоқ сенинг омадинг келиб қолди. Мен содиқлик билан қилган хизматинг эвазига сени мукофотлаш учун тақдирнинг марҳаматидан умидвор эдим, мана мен эндигина юксакликка кўтарила бошладим-у, сенинг эса фурсати етмаёқ барча ақл-идроқ қоидаларига тамоман хилоф равишда орзуларинг ушалапти. Бошқалар эса пора берадилар, ялиниб-ёлворадилар, жонга тегадилар, уйқуларини харом қиладилар, ўжарлик қиладилар, лекин барибир ҳеч нарсага эришолмайдилар, сен бўлсанг ҳеч нима қилмай туриб, шундай мансаб ва мавқега эришдингки, унинг ишқибозлари ҳаммавақт ҳам топилади. Сен азонлаб турмадинг, тунларни бедор ўтказмадинг, сира уринмадинг ҳам, шунга қарамай жаҳонгашта рицарнинг руҳи қўллаб, ҳеч нарсадан-ҳеч нарса йўқ сени оролга ҳукмдор қилиб тайинлашди. Мен буни шунинг учун айтаётirmanки, Санчо, бу марҳамат қилган меҳнатларим эвазига кўрсатиляпти деб ўйлама асло. Йўқ, бунинг учун сен аввало ишимизни аста-секин олдинга бостирган тангрига, қолаверса шундай катта кучга ва улуғворликка эга бўлган жаҳонгашта рицарь орденига ҳамду санолар ўқи. Бу гапларимга ишонмоққа мажбур эт қалбингни, эй бўтам, сўнгра диққат билан кулоқ сол: сен жўнаб кетаётган тўфонли денгизнинг осойишта қўлтиғига етиб олишингда йўлингни ёртиб турувчи йўлчи юлдузинг бўлиб қолишни истайман, чунки юқори мартабалар йўлдан оздирувчи тубсиз бир гирдобдир.



Аввало, эй бўтам, худодан қўрқининг керак, чунки худодан қўрқсанг, ақл билан иш юритсанг хато қилмайсан.

Иккинчидан, ўзлигингни билишга ҳаракат қил, шунда сен мағрурлиб кетмайсан, ҳўкизга ўхшамоқчи бўлган қурбақага ўхшаб шишиб кетмайсан, укпар думлик ва хунук оёқли товусга ўхшаб қолмайсан. Илгарилари чўчқа боққанлигингни унутма асло.

— Бу тўғри,— жавоб берди Санчо,— аммо у пайтларда мен ёш бола эдим, йигитча бўлиб қолганимдан сўнг чўчқа эмас, гоз боққанман. Лекин, менимча бунинг аҳамияти бўлмаса керак, ахир, ҳамма ҳукмдорлар ҳам қироллар авлодидан эмас-ку.

— Бу ҳам тўғри,— деди дон Кихот,— бироқ паст табақадан чиққан одам ўзининг юқори вазифасини адо этаркан, камтар ва мурувватли бўлиши керак. Бу эса уни ҳукмдорлар қочиб қутулиши амримаҳол бўлган ғаразли ғийбату бўҳтонлардан сақлайди. Сен оддий деҳқон оиласида туғилганингни унутма. Буни бўйнингга олишдан уялма, агар сен бундан уялмасанг, бошқалар ҳам сени бу билан уялтирмайди. Аллақандай тақаббур зот эмас, балки ювош тақводор одам бўлишга ҳаракат қил. Шуни унутмаки, қашшоқ бўлиб туғилиб, олий ҳурматга, папа ва императорликка сазовор бўлганлар сон-саноқсиз. Мен бундай мисолларни келтираверсам, тинглайвериб чарчаб қолишинг мумкин.

Шу нарса ёдингда бўлсинки, Санчо: сен бундай саховат ва мурувват йўлидан борсанг, ўзингни ҳеч қандай князь ёки қиролдан кам ҳис қилмайсан, зероки мурувватлилик аслзодалик насл-насабидан юқори туради. Борди-ю, сен губернаторлик қилиб турган пайтингда қавм-қариндошингдан биронтаси келиб қолса, уни ҳайдама, хафа қилма, аксинча самимий қабул қил. Хотинини чақиртириб олгач — ҳукмдор ўз хотинини узоқ вақт изтироб чектириб қўйиши керак эмас — унга туғма қўполлигини ташлашни, одобли бўлишни ўргат, кўпинча шундай ҳам бўладики, хотинининг аҳмоқона хатти-ҳаракати натижасида ақлли губернаторнинг бутун ҳурмати чипакка чиқади, топган-таянгани нес-нобуд бўлади. Унинг ҳеч қачон ҳукмдорликка аралашшига йўл қўйма. Билиб қўй, тагин у лойқа сувдаги балиқни овлайдиган қармоқ бўлиб юрмасин. Очиғини айтайки, хотини арзғўйдан олган озгинагина пора учун ҳам эри даҳшатли суд олдида жавоб беради.

Ҳеч маҳал ўзбошимчалик билан иш тутма, ўзини ақлли сановчи нодонларгина шундай қиладилар.

Қашшоқларнинг кўз ёши кўнглиннга раҳм солсин, аммо бу шафқат бадавлат кимсанинг арзу шикоятига ўхшаб адолат меъеридан ошиб кетмасин.

Доим ҳақиқат йўлида бўл, бунинг учун сенга совғалар ҳам, бойларнинг ваъдалари ҳам, камбағалларнинг ёлвориш ва дуола-ри ҳам ҳалақит беролмайди.

Қаердаки беғаразлик мавжуд бўлса, жавобгарни қаттиқ жазолама, зероки тошкўнгил судьянинг шон-шарафи ҳожатбарор судьянинг шарафидан ортиқ эмас.

Агар қонунни енгиллаштирмоқчи бўлсанг, буни фақат сенга ваъда қилган совғалар ҳаққи эмас, балки гуноҳкорга раҳм-шафқат юзасидан қил.

Агар қачон бўлмасин ўз душманингнинг даъвосини текширадиган бўлсанг, унга нисбатан бўлган душманлигингни ёдингдан чиқариб юбор, ҳақиқат қайси томондалигини ўйла фақат.

Бошқаларнинг ишини текширишда шахсий манфаатингни кўзлама, йўқса ҳеч қачон тўғрилаб бўлмайдиган хатога йўл қўясан. Агар ҳузурингга бирор гўзал аёл адолат талаб қилиб келиб қолса, унинг кўз ёшларига ва оҳ-воҳларига қарамай қаттиқ туриб унинг талабларига қулоқ сол. Акс ҳолда бутун фикру зикринг унинг оҳ-воҳию кўз ёшлари билан банд бўлиб қолади.

Борди-ю, бировни жазоламоқчи бўлсанг, уни қаттиқ сўкма, чунки бу бахтиқорнинг ғами ўзи бир жазо.

Айбдорга гуноҳкор бандасининг заиф табиати йўлдан оздирган бир бахтиқаро одам деб қара ва шу сабабли унга нисбатан раҳм-шафқатли бўл; ёдингда тут, раҳм-шафқатли бўлиш — ҳар қандай саховатлиликдан устун туради.

Бу насиҳатларимнинг ҳаммаси юрагингга тегишли. Энди танангга тегишли бўлган бир қанча насиҳат қиламан. Аввало, доим тоза юришни маслаҳат қиламан, соч тараб, соқол-мўйловингни, тирноқларингни тез-тез олиб тур, акс ҳолда улар калта-кесақхўр қирғийнинг ўткир тирноқли панжаларига ўхшаб кетади. Ҳеч қачон бошқаларнинг кўзига йиртиқ ва ирkit кийимда кўринма, чунки фақат дангаса ва бебош одамларгина шундай юришади, Санчо.

Агар юксак мартабанг хизматчиларингнинг уқали кийим кийишини тақозо этса, у ҳолда бу либос жуда ҳам ҳашамдор ва ярқираган бўлмасин, уларни хизматкорларинг ҳамда камбағалларга баб-баравар бўлиб бер, олти маҳрамни кийинтиргандан кўра уч камбағал билан уч маҳрамни кийинтир, шунданига бу дунёнинг ҳам, у дунёнинг ҳам бут бўлади.

Пиёз ҳам, саримсоқ ҳам ема, токи унинг ҳадидан келиб чиқишинг деҳқон эканлигини пайқаб қолишмасин.

Юрганда оҳиста қадам ташла, вазмин-хотиржам сўзла, лекин ўзингга ўзинг гапираётгандек минғирлама, чунки ҳар қандай баландпарвозлик ярамас одат.

Туш пайтида камроқ овқат е, кечқурун ундан ҳам камроқ, чунки танимизнинг саломатлиги ошқозонга боғлиқ.

Ичкиликни хурмачангга қараб ич, билиб қўй, меъеридан ортиқ ичган киши сир сақлолмайди, сўзининг устидан ҳам чиқолмайди.

Сен, Санчо, гапираётганингда кўп мақол келтиришга одатлангансан, бундан қоч, гарчи мақол акллилик тимсоли бўлсада, сен кўпроқ уларни ноўрин ишлатасан, шунинг учун ҳам ақлли гап эмас, шунчаки бемаъниликка айланиб қолади.

— Бу масалада менга биргина худонинг ўзи ёрдам бериши мумкин,— жавоб берди Санчо,— чунки менинг калламда китоблардагидан ҳам кўпроқ мақол бор. Гап бошладимми, тамом,

ҳаммаси бирданига тилимга келаверади ёпирилиб. Шунда мен тилимга келиб қолган дастлабки мақолнинг ўринли-ўринсиз эканлиги билан ҳисоблашмай туриб, айтиб юборавераман. Лекин бундан-буён мавқеимга мос тушадиган мақолни айтаман, чунки бадавлат хонадонда суҳбат қурмоқ қийин эмас, карта улашлайётган пайтда чийланмайди, кимки бонг урса хатардан холи туради. Олиш-беришнинг ҳисобини қилишга бош ишлаши керак.

— Жуда тўғри, Санчо! — хитоб қилди дон Кихот. — Хўп майли, мақолларингни мунчоқдек ипга тизсанг тизавер, ҳеч ким қўлингдан ушлаётгани йўқ: онанинг кўнгли болада, боланинг кўнгли далада, деганлар! Мен сенга мақол ишлатишдан қоч десам, сен бўлсанг бирпасда унинг бир қанорини тизиб ташладиңг. Ёдингда тут, Санчо, мен агар мақоллар ўз ўрнида келтирилса асло қарши эмасман, бордию улар ўринсиз қалаштириб ташланаверса, гапнинг тузини кетказиб қўяди.

Давомини эшит, Санчо, отга минганигда оёғингни узангига тираб гавдангни орқага ташлаб, гўдайиб ўтирма, худди эшақда кетаётгандай букчайиб ҳам ўтирма. Билиб қўй, отга қандай минганинга қарабоқ, кабалъеромисан ёки отбоқармисан, дарров билиб олиш мумкин.

Кўп ухлама, кимки қуёш билан баравар уйғонмаса куннинг гўзаллигидан баҳраманд бўлолмайди. Шуни ҳам унутмаки, Санчо омад калити — ҳаракат эмас, аммо танбаллик билан орзуга эришолмайди киши.

Кийиминг узун лозим, узун камзул ва ундан ҳам узунроқ плашдан иборат бўлиши керак, чолворни ҳаёлингга ҳам келтира кўрма, зероки у рицарларга ҳам, губернаторларга ҳам ярашмайди.

Ҳозирча сенга айтмоқчи бўлган гапларим шу, Санчо. Агар бу насиҳатларимга амал қилсанг узоқ умрли, сўнмас шуҳратли бўласан, бахтинг доим ёр бўлади. Болаларингни истаганингча уйли-жойли қиласан, ўғилларинг ва невараларинг олиҳиммат аслзодалар ҳисобланади, сен эса атрофингдаги ўзингга хайрихоҳ кишилар билан тинч-тотув яшайсан, узоқ умринг тугагач, ўлимни эса қариб-чуриб кутиб оласан, чевараларингнинг кичкина, нозик қўллари кўзларингни юмиб қўяди.

— Сеньор, — деди Санчо, — сиз муҳтарам жанобларининг менга холис ният билан яхши панду насиҳат қилиб, саховатли, фойдали ишларни ўргатаётганлигингизни яхши тушунапман, лекин ҳозирнинг ўзидаёқ унутиб қўйсам, улар қандай қилиб наф келтириши мумкин менга? Албатта тирноқни ўстириб юбормаслик, овқатланиш ҳақидаги маслаҳатларингизни эслаб қолдим, лекин қолган майда-чуйдаларини эсда сақлаб қололмайман... Шунинг учун ҳам бу насиҳатларни менинг қўлимга қоғозга ёзиб берсангиз ёмон бўлмас эди. Саводсиз бўлсам ҳам ҳечқиси йўқ, хатни руҳонийимга бериб қўяман, у зарур бўлган чоғда сизнинг бу қоидаларингизни менга уқтириб туради.

— Ўйлаб кўр, Санчо! — деб қичқириб юбораёзди дон Кихот. — Ахир саводинг бўлмаса қандай губернаторсан ўзинг. Мен ҳеч

бўлмаганда ўз исмингни ёзишни ўрганиб олишингни маслаҳат қилардим.

— Буни биламан,— деди Санчо,— қишлоғимизга оқсоқол эканимда юк тойларига ёзиб қўйилгандақа ҳарфлар чизишни ўргатиб, сенинг отинг шундай ёзилади дейишган. Лекин бунинг унчалик аҳамияти йўқ: доим ўнг қўлим оғрийди деб айтаман ва мен учун бошқа киши имзо чекишини буюраман. Дунёда ўлимдан бошқа ҳамма нарсани тўғриласа бўлади: қўлимда губернаторлик таёқчаси бўлгач, ҳушимга келганини қилавераман. Отанг алькальд бўлгандан кейин ўзингга ўзинг хўжайинсан, деб бекорга айтишмаган-ку... Мен эса губернатор бўламан-ку — бу алькальдликдан баланд мартаба, ахир! Мушугимни «пишт» дейишга кимнинг ҳадди сиғаркан. Кимки менга чуқур қазиса, ўзи қулайди, худога хуш келган киши юзага чиқади. Оғзи қий-шиқ бўлса ҳам бойнинг ўгли гапирсин дейдилар, мен ҳам бой бўламан, ахир, губернаторлар ҳамиша бойлик орттирадилар. Де-мак асалдай ширин бўлишим керак эмас, йўқса мени пашшалар шимиб қўяди: «борники фармон билан, йўқники армон билан» деярди бувим, бадавлат одам билан эса ҳеч ким тенг бўлолмайди.

— Минг лаънат!— ўзини тутолмай қичқириб юборди дон Кихот.— Э, ўша мақолларинг билан қўшмозор бўлгур! Бир соатдан бери мақолларинг билан жиғимга тегасан. Шуну билиб қўйки, бир кун эмас бир кун бу мақоллар сени дор остига олиб боради, қўл остингдагилар сени ё оролдан ҳайдаб юборишади. Ёки улар орасида қўзғолон кўтарилади. Сен бу мақолларни қаёқдан топаётирсан, эй нодон? Кези келиб қолганда бирор мақол ишлатмоқчи бўлсам, уни топгунча худди ер қазитган кишидек терга ботиб кетаман.

— Худо ҳақи, сеньор,— деди Санчо,— марҳаматли жанобимнинг бекорга жаҳллари чиқяпти. Мен ўз бисотимдаги мақолларни ишлатганимга намунча ўзингизни қийнамасангиз? Ахир, менинг мақоллардан бўлак ҳеч қандай давлатим йўқ-ку. Мана ҳозир ҳам хаёлимга бир неча бўлак мақол келиб қолди, худди ўз ўрнида тағин, гўё саватдаги ноклардек терилиб турибди, лекин айтмайман, нега десангиз, вақтида ўзимни тийиб тура оламан.

— Утакетган маҳмадонасан, Санчо, бироқ ҳозир калланга қандай мақол келиб қолганлигини ва ўринли эканини билгим келяпти. Мен бўлсам хотирамни ҳар қанча жамламай, хотирам эса ёмон эмас, лекин бирортасини тополмайман.

— Манави мақоллардан яхшисини тополмайсиз,— деди Санчо,— бармоғингни ақл тиши остига суқма; юрган йўлингдан қолма, суймаганга суйканма дейишса, бир оғиз сўз қайтарма; хурмачани тошга урасанми, тошни хурмачага — барибир. Айни ҳолга монанд мақол бундан ортиқ бўлмайди. Бу мақолларнинг мазмуни шундай: губернатор ёки бошқа бирор амалдор билан баслашиш — бармоқни озиқ тишлар орасига қўйишдир — ахир бунда жонинг оғрийди-ку. Тўрт томонинг қибла, йўлинг-

дан қолма деганда жимгина кетгандек, губернаторга ҳеч вақт эътироз билдирма. Хурмача ва тош хусусидаги мақол алихўжа, хўжаали — барибир деган гап, бу ҳар қанақа одамга аён. Хуллас, ўзгада нуқсон кўрсанг, ўзингни бенуқсон дема, акс ҳолда дарчанинг эшикдан кулиши бўлади, сиз марҳаматли жанобларига маълумки, аҳмоқ ўз уйида бегоналарникида турувчи донадан кўра кўпроқ нарсани тушунади.

— Тўғри эмас, Санчо,— эътироз билдирди дон Кихот.— Аҳмоқ ўз уйида ҳам, бегона ерда ҳам ҳеч нарсага шунинг учун ҳам тушунмайдики, аҳмоқлик асосида ақллилик биносини қуриб бўлмайди. Бу ҳақдаги гапимиз етар, Санчо, борди-ю, сен ёмон ҳукмдор бўлсанг, ўзинг айбдор бўласан, уяти эса менга тегади. Бироқ сенга қилишим керак бўлган панд-насиҳатни бериб, ўз бурчимни бажардим. Мен ваъдамнинг устидан чиқдим ва шу билан зиммамдаги вазифа тугади. Худо ёр бўлсин, Санчо, у сенинг мушкул ишингда мадад бергай. Ишқилиб тезроқ кўнглимдаги хавотирлик кўтарилсин. Губернаторликдан қуламагин тагин деб қўрқаман. Бироқ, сенинг семизлигинг ва сипо важоҳатингга қарамай, мақол ва ёлғон-яшиқ тўла бўш қоп эканлигингни герцогга очик айтиб, сени бу бахтсизликдан қутқариб қолишим ҳам мумкин.

— Нима ҳам дердим, сеньор,— эътироз билдирди Санчо,— марҳаматли жаноблари мени губернаторликка муносиб эмас деб ҳисобласалар, у ҳолда мен бу мансабни қабул қилмайман. Нонни пиёз билан қўшиб чайновчи оддий деҳқон бўлиб қолаверганимда ҳам мазза қилиб ахта хўроз ва какликни ейдиган ҳар қандай губернатордан ёмон яшамайман. Бундан ташқари, уйқуга кетганимизда ҳаммамиз ҳам: аслзодалар ҳам, фуқаро ҳам, бойлар ҳам, камбағаллар ҳам тенгмиз. Фақат бир нарсани айтиб ўтмоқчиман, агар сиз, сеньорим, яхшилаб ўйлаб кўрсангиз, губернаторликка ўзингиз даъват этганингизни эслайсиз. Ахир мен губернаторлик ва ороллар ҳақидаги гапнинг маъносини ёввойи қирғийчалик ҳам фаҳмламайман-ку. Борди-ю, губернаторлик учун шайтон мени дўзахга рўпара қилади деб қўрқсангиз, унда Санчолигимча қолиб, жаннатга тушганим тузук. Жонимнинг тирноқ учичалик бўлаги мен учун бутун танамдан қиммат туради.

— Очигини айтсам, Санчо,— деди дон Кихот,— ҳозирги гапларингга қараганда, минглаб оролларни бошқаришга лойиқсан. Ажойиб юрагинг бор, усиз ҳар қандай билим ҳам уч пул. Ўзингни худонинг марҳаматига топшир ва ҳар доим кўнглингга келганини қил. Энди тушлик овқат қилгани борамиз, менимча, хўжайинлар бизни кутишаётган бўлишса керак.

САНЧОНИНГ ҮЗ ОРОЛИГА ҚАНДАЙ БОРГАНИ ВА УНИ БОШҚАРИШГА  
КИРИШГАНИ

Тушки овқатдан сўнг дон Кихот Санчонинг илтимосига кўра барча панд-насихатларни қоғозга тушириб, янги губернаторга топширди. Бироқ, Санчо шу заҳотиёқ уни йўқотиб қўйди, хизматкорлардан кимдир уни топиб олиб герцогга топширди. Герцог герцогиняга дон Кихотнинг бу фикрларини ўқиб берди, икковлари ҳам рицарнинг ақл-заковати ҳамда тентаклигидан ҳайратда қолишди. Улар шу замоноқ ўзларининг аломат режаларини амалга оширишга аҳд қилиб, Санчо учун орол вазифасини ўтайдиган бир қишлоққа мулозимлар кузатувида дабдаба билан жўнатиш тараддудига тушишди. Герцог Санчога ақлли ва чаққон, Трифальди ролини бошлаб ўйнаган эшик оғасини қўшиб қўйди. Унинг бу ишни аъло даражада бажаришига шубҳа қилмаса ҳам бўларди. Бироқ, Санчо эшик оғасига кўзи тушиши билан унинг Трифальдига жуда ўхшашини пайқаб қолди. У дон Кихотга мурожаат қилиб, деди:

— Сенъор, мана бу эшик оғасининг кўриниши қуйиб қўйгандай Долоридага ўхшамаса шу ердан ўлигим чиқсин.

Дон Кихот эшик оғасига тикилиб қарагач, Санчога деди:

— Ҳалинингнинг ҳеч ҳожати йўқ, дўстим Санчо. Ҳақиқатан ҳам эшик оғаси дуэнья Долоридага ўхшайди. Лекин бу эшик оғаси чиндан ҳам Долориданинг ўзи деган гап эмас. Яхшиси бундай тахминни хаёлингга ҳам келтирмаганинг маъқул. Ўзинг бир ўйлаб кўргин-а, борди-ю, шундай бўлса бошимизга қандай маломатлар тушиши мумкин. Икковимиз ҳам худога илтижо қилиб, бу ёвуз жодугар ва сеҳгарлардан халос этишни сўрамоғимиз лозим эди.

Бунга Санчо шундай жавоб қилди:

— Мен ҳозиргина у билан гаплашган эдим, қулоғимга худди Трифальдининг овози чалингандай бўлди. Ҳа, майли, индамай қўя қоламан, лекин ҳар қалай эҳтиётдан ҳар нарсадан кўз-қулоқ бўлиб тураман. Эҳтимол, шубҳаларим тасдиқланар, балки йўқолар.

— Худди шундай қил, Санчо,— деди дон Кихот,— илло бор гапни менга хабар қил, шунингдек барча губернаторлик ишларинг ҳақида ҳам ёзиб тур.

Ниҳоят, Санчо бир талай мулозимлар қуршовида йўлга чиқди: эғнида олимлар камзули, унинг устидан эса олтин уқали сарғимтил мовут плаш кийиб олган эди. Бошида ҳам худди шу матодан қалпоқ. У хачирга миниб олган, кетидан эса герцогнинг буйруғига биноан устига шойи ёпғич ташланиб, турли тақинчоқлар билан безатилган эшаги борарди. Санчо дам-бадам орқасига ўгирилиб кулрангига қараб-қараб қўярди: содиқ дўстининг ёнида бўлиши губернаторимизга шундай ҳузур баҳш этардики, у бу ҳузур-ҳаловатни ҳатто Германия императорлигига

ҳам алишмасди. У герцог ва герцогинянинг қўлларини ўпиб хайрлашиб бўлгач, дон Кихотдан оқ йўл тилашни илтимос қилди. Дон Кихот кўзига ёш олиб унинг илтимосини адо этди, Санчо эса унинг оқ фотиҳасини оларкан, пиқиллаб йиглаб юборди.

Герцог Санчога бошқаришни топширган қишлоқ герцог қасридан унчалик олисда эмас эди, шунинг учун ҳам губернатор ўз мулозимлари билан бу ерга тезда ва ҳеч қандай саргузаштсиз етиб келди. Қишлоқ дарвозаси олдида уларни ерлик маъмурлар кутиб олишди. Шу замоноқ қўнғироқлар чалинди, йиғилган аҳоли янги губернаторни шод-хуррамлик билан қутлади ва шукроналар ўқигани уни зўр тантана билан бош ибодатхонага бошлаб кетдилар. Турли кулгили тантаналардан сўнг Санчога шаҳарнинг калитини топшириб, уни Баратария оролининг абадий губернатори деб эълон қилдилар. Янги губернаторнинг либоси, соқоли ва катта қорни янги губернатор тайинлашнинг сиридан воқиф бўлмаганларнинг ҳаммасини ҳайратга солди. Ибодатхонадан Санчони суд залига олиб кириб, креслога ўтқазишди, герцогнинг эшик оғаси гап бошлади:

— Сеньор губернатор, бизнинг оролимизда қадимий бир удум бор: кимки бу ажойиб оролга ҳукмдор бўлиб келса, ўзига бериладиган мураккаб ва чалкаш саволларга жавоб қайтариши керак. Унинг жавоблари орол аҳолисига янги губернаторнинг қанчалик доно эканини кўрсатиши лозим, чунки фуқаро унинг губернатор қилиб тайинланганидан қувониши ёхуд қайғуриши керак.

Эшик оғаси сўзлаётганда Санчо рўпарасидаги деворга катта харфлар билан ёзилган ёзувга кўз ташлади. У саводсиз бўлганлиги учун нима деб ёзилганини сўради.

— Сеньор, у ерга шундай деб ёзилган: «Бугун фалон йил, фалон ойнинг фалон кунидан бошлаб дон Санчо Панса оролга ҳукмронлик қила бошлади. Илоё кўп йиллар ҳукмронлик қилсин!» — деб жавоб беришди.

— Дон Санчо Панса ким ўзи? — деб сўради Санчо.

— Сиз, жаноб олийлари, — деди эшик оғаси, — ахир оролга яккаю ягона Санчо қадам ранжида қилган холос, мана, у кўз олдимизда креслода ўтирибди.

— Шуни яхши билиб қўйингки, биродар, — эътироз билдирди Санчо, — мен ҳам, менинг авлод-аждодимдан бирор кимса ҳеч қачон дон бўлмаган. Мени оддийгина Санчо Панса дейдилар, отамнинг ҳам исми Санчо, бувамнинг ҳам исми Санчо бўлган, хуллас, ҳаммалари ҳеч қандай дон-понсиз Панса деб аталганлар. Оролингизда донлар чақиртошдан ҳам кўпми дейман. Бу ҳақдаги гап тамом; худойимнинг ўзи мени тушуниб турибди, агар мен бу ерда бир неча кун бўлса-да губернаторлик қила олсам, бундай донларнинг ҳаммасини йўқотаман. Улар бу ерда ғужғон ўйнаб ётган чивиндек ҳаммангизнинг жонингизга теккан бўлса керак. Қани бўлмаса, сеньор эшик оғаси, саволларингизни беринг, мен фуқаромни

хурсанд қиламанми, ачинтираманми, ақлим етганича жавоб берман.

Шу пайт суд залига икки киши кириб келди, улардан бири деҳқон, иккинчиси тикувчи кийимида бўлиб, унинг қўлида каттакон қайчиси ҳам бор эди. Тикувчи шундай деди:

— Сеньор губернатор, биз манави деҳқон билан бирга марҳаматли жаноблари ҳузурига бир иш юзасидан келган эдик: бу саховатли кимса кеча дўконимга кириб, бир парча мовутни узатиб: «Мана бу мовутдан менга қалпоқ чиқармикин?» деб сўради. Мен мўлжаллаб кўриб, чиқади, дедим. Шунда бу киши мовутимдан бир парчасини ўғирлаб қолмоқчига ўхшайди, деб шубҳаланиб: «Эҳтимол, иккитага етар?» деди. Шунда унинг нимани ўйлаётганини фаҳмлаб, етади, дедим. У эса баттар шубҳаланиб, қалпоқ ёнига қўшаверди, мен ҳаммасига рози бўлавердим. Ниҳоят, у билан беш қалпоққа келишдик. Бир неча кундан кейин у қалпоқни олиб кетгани келди. Қалпоқлар тайёр бўлган эди, лекин у ҳақ тўлаш у ёқда турсин, ҳатто матони қайтариб беришимни ёки пулини тўлашимни талаб қилди.

— У тўғри гапиряптими, биродар? — деб сўради Санчо.

— Ҳа, сеньор, — жавоб берди деҳқон, — лекин у менга тикиб қўйган қалпоқларни кўрсатишни буюринг, муҳтарам жаноб.

— Бажонидил, — деди тикувчи ва ҳар бир бармоғида биттадан қалпоқ бўлган қўлини плаш чўнтагидан чиқариб давом этди: — Мана, бу саховатли киши менга буюрган бешта қалпоқча. Худо ҳақи ва виждонан айтаманки, менда бир парча ҳам мовут қолмади, мен ўз ишимни цех вакилларига ҳам кўрсатишга таёрман.

Тикувчининг бу аломат гапларидан ҳамма хахолаб кулиб юборди. Санчо бир дақиқа ўйлаб туриб, деди:

— Менинг ҳукмим шундай: тикувчи ўз иши учун ҳақ олмайди, деҳқон эса — бузиб қўйилган мовутининг пулини, қалпоқчалар қамоқдагиларга берилади, вассалом, иш тамом.

Бу ерда ҳозир бўлганлар кулиб юборишди, бироқ губернаторнинг қарорини тўғри деб тан олиб, шу ондаёқ уни бажаришга киришдилар.

Шу пайт залга икки чол кириб келди. Улардан бири йўғон ҳасасига таяниб, виқор билан қадам ташларди. Иккинчиси эса астагина унинг кетидан келарди. Уларниг иккинчиси Санчога таъзим қилиб, гап бошлади:

— Сеньор губернатор, мен мана бу кишига сўраган замоним қайтариб бериш шарти билан ўнта олтин эскудо қарз берган эдим. Бунга кўп вақт бўлди, мен ҳам сўрамадим, чунки у мендан қарз олган пайтда қийин аҳволда бўлса, қарзимни тўлагач, бешбаттар мушкулликка тушиб қолишини тушунардим. Ниҳоят, назаримда у қарзини бутунлай нутиб юборганга ўхшаб қолди: шундан кейин мен унга бунга эслатиб қўймоқчи бўлдим, у бўлса қарзини бериш у ёқда турсин, сендан ҳеч қачон пул олмаганман, олган бўлсам ҳам аллақачон тўлаганман, деб туриб олди. Мен марҳаматли жанобларидан илтимос қилардимки, бу одамга қасам ичдирсан-



гиз, агар қарзимни тўлаганман деб қасам ичса, шу ердаёқ худо шохидлигида ҳақимдан кечишга тайёрман.

— Бунга нима дейсиз, эй ҳассали чол? — сўради Санчо.

Чол шундай жавоб қилди:

— Сеньор, ундан пул олганлигимни тан оламан. Лекин ростини айттайки, қарзимни аллақачоноқ тўла-тўқис тўлаганман. Даъвогарнинг айтишича, у қасамимга ишонар эмиш, майли, марҳаматингиз билан асонгизни ўпиб қасам ичишга тайёрман.

Губернатор асосини тутди. Шунда чол ўз ҳассасини қасам ичиб бўлгунча ушлаб туришни илтимос қилиб даъвогарга берди ва қўлини асонинг хочига қўйиб ҳақиқатан ҳам ўн эскудо қарз олганлигини, лекин ўз қўли билан қўлига берганини, лекин қарз берувчи фаромушхотирлиги сабабли ундан қарзини бир неча бор сўраганини айтди.

— Хўш, энди нима дейсан? — деб сўради губернатор даъвогардан.

У эса ўз қарздорини ҳалол ва саховатли христиан деб ҳисоблашини билдирди. Эҳтимол ўша ўн эскудони қачон қайтариб берганини ростдан ҳам унутгандир. Лекин, ҳар ҳолда, бунини энди ҳеч қачон талаб қилмайди.

Қарздор ҳассасини олди-да, таъзим қилиб, суддан чиқиб кетди. Боядан бери чолни зийраклик билан кузатиб турган Санчо эса бошини эгиб, ўнг қўлининг кўрсаткич бармоғини бурнига қўйганича бир оз ўйланиб турди-да, кейин ҳассали чолни қайтаришни буюрди.

Уни қайтариб олиб киришганда Санчо унга қараб туриб деди:

— Қани, саховатли қария, ҳассангизни беринг-чи менга!

— Жоним билан,— деди чол,— мана, сеньор.

У ҳассасини берди. Санчо ҳассани олиб иккинчи чолга тутқазаркан, шундай деди:

— Мана, ҳақингиз ҳам тўланди. Кетаверинг энди.

— Нима учун, сеньор!— хитоб қилди чол.— Ахир шуни ўн олтин эскудога оладими?

— Олади,— жавоб берди губернатор,— ёки, худо ҳақи қасам ичаман, дунёдаги энг аҳмоқ одамман. Бутун бошли қиролликни эплай оламанми-йўқми, ҳозир кўрасиз.

У ҳассани синдиришни буюрди. Ҳассани синдиришган эди, ичидан олтин тангалар тушди. Ҳамма губернаторнинг худди подшо Соломондек донолигига қойил қолди ва Санчодан ўн эскудо шу ҳассага яшириб қўйилганини қандай билиб олганини сўрашди. Санчо бунга чолнинг қасамёд қилаётиб ўз рақибига ҳассасини тутқазганини ва қарзини тўла ҳамда алдовсиз тўлаганлигини айтди, деди. Қасам ичиб бўлгандан кейин эса яна ҳассасини қайтариб олди. Бунини пайқаган Санчо жанжалга сабаб бўлган ўн эскудонинг ҳассага яширилганини тушунган эди.

— Бундан хулоса шуки,— қўшимча қилди Санчо,— губернатор энг каллаварам одам бўлса-да, агар у виждонли ва адолатли бўлса, худонинг ўзи ҳақиқатни топишга мадад беради. Дарвоқе, қишлоғимиз руҳонийси шунга ўхшаган бир воқеа

хақида гапириб берган эди, менинг хотирим эса жуда яхши. Агар хотиримда сақлаш керак бўлган нарсани кўпинча унутиб қўймаганимда эди, эҳтимол бундай хотира бу оролни бошдан-оёқ излаб чиққанда ҳам топилмасди.

Шундай қилиб, чоллар бири таъби тирриқ, иккинчиси эса мамнун бўлиб чиқиб кетишди. Йиғилганларнинг ҳаммаси ҳамон ҳайратда эди, Санчонинг фаолияти, хатти-ҳаракати ва нутқларини ёзиб бориш вазифаси топширилган котиб эса янги губернаторни аҳмоқ деб ёзишни ҳам, ақлли деб ёзишни ҳам билмасди.

Суд тугагач, губернаторни ҳашаматли саройга олиб киришди. Бу ердаги катта залда Санчо қиролларга ясатиладигандек тузалган дастурхонга кўзи тушди. Нафис гулдор дастурхонда турли хил таомлар, вазаларда эса турли хил ҳўл мевалар ва гуллар бор эди. Санчо ҳозир бўлиши билан музика садолари янгради, тўрт маҳрам қўл ювишга сув тутди, у улугворлик билан қўлларини ювди. Музика садолари тингач, Санчо тўрга ўтиб ўтирди, унинг ёнига қўлида кит мўйловидан ясалган таёқча ушлаган қандайдир бир киши келиб турди. Кейин маълум бўлишича, у доктор экан. Дастурхон усти очилгач, кўринишидан руҳонийга ўхшаган бир киши таом учун дуо ўқиди. Маҳрамлардан бири Санчонинг кўкрагига гулдор, рўмолча тутди, бошқаси эса бир товоқ ҳўл мева келтириб қўйди<sup>90</sup>. Бироқ Санчо битта ҳам тотиб кўрмасдан туриб, доктор таёқчасини товоққа тегизган эди, шу замоноқ уни олиб чиқиб кетишди, унинг ўрнига бошқасини келтириб қўйишди. Санчо ундан тотиб кўрмоқчи бўлиб, қўл узатиши биланоқ бояги таёқча яна товоққа келиб тегди, маҳрам мевани қандай эпчиллик билан олиб чиқиб кетган бўлса, уни ҳам шундай олиб кетди. Буни кўрган Санчо довдираб, агрофлагиларга бир-бир кўз югуртириб, наҳотки бу овқатни кўз бойлогичлик томошаларидагидақа қилиб ейилса, деб сўради. Бунга таёқчали киши шундай жавоб қилди:

— Йўқ, сеньор губернатор, бу оролда бошқа губернаторлар бошқараётган оролларда қандай овқатланилса худди шундай овқатланилади. Мен докторман, сеньорим, катта маош бадалига губернаторга шахсий хизмат қилиш учун тайинланганман. Унинг соғлигига ўзимнинг соғлигимдан ҳам яхшироқ ғамхўрлик қиламан. Мен губернаторнинг тоби қочиб қолган тақдирда даволаш учун унинг бутун аъзойи баданини туну кун ухламай ўрганаман; аммо асосий вазифам тушлик ва кечлик овқат пайтида ҳозир бўлиб, ўз тушунишимча губернаторга ёқадиган овқатни беришга рухсат этиш ва менимча унинг ошқозонини бузадиган таомларни дастурхондан йўқотишдир. Мана шунинг учун ҳам ҳўл меваларни олиб кетишларини буюрдим, чунки уларда сув кўп, кейингиси бўлса ҳаддан ташқари аччиқ ва зираворланган эди, бу эса ҳаммага аёнки, кишини чанқатади. Кўп суюқлик ичиш эса ҳаёт қувватимизни қирқади.

— Ундай бўлса манави қовурма какликлар-чи, кўринишдан жуда мазаликка ўхшайди, эҳтимол менга зарар қилмас.

Бунга доктор шундай жавоб қайтарди:

— Токи мен хаёт эканман, сеньор губернатор бу таомга қўл теккиза олмайдилар.

— Нега ахир?— сўради Санчо.

— Чунки, тиббиёт оламининг юлдузи ва машъали, устод Гиппократ ейиладиган ҳамма нарса ҳам зарарли, айниқса каклик ейиш зарарли деган.

— Унда, сеньор доктор,— деди Санчо,— таёқчангиз билан столдаги товоқни тиқиллатгандан кўра, марҳамат қилиб менга кўпроқ фойда, озгинагина зарар келтирадиган овқатлардан бирини танласангиз-да, уни ейишга рухсат берсангиз, чунки губернатор ҳаёти ҳаққи қасамёд қиламанки,— худонинг ўзи узайтирсин умримни!— очдан ўлай деяпман. Нима десангиз денг, қанчалик жаҳлингиз чиқса чиқсин, сеньор доктор, олдимдан овқатимни олиб қўйиб, умримни узайтириш у ёқда турсин, аксинча, қисқартиряпсиз.

— Марҳаматли сеньор губернатор мутлақо тўғри айтадилар,— деди доктор,— шунинг учун ҳам куён гўшти солинган манави қовурдоқдан емасликлари керак, марҳаматли жаноблари, негаки бу таом бадҳазмдир. Мана бу бузоқ гўшtidан эса агар қовуриб ва димлаб пиширилмаганда есангиз бўларди, бироқ бу туришда емаганингиз маъқул.

— Мана бу катта товоқдаги буғи чиқиб турган таом гўшт ва қўйруқ солинган димламага ўхшайди-я чамамда, унга одатда турли нарсалар қўшилади. Эҳтимол ундан дилимга ёқадиган ва фойдали бирор нарса чиқиб қолар.

— Худо сақласин!— хитоб қилди доктор.— Бундай хавfli фикрдан қочинг, дунёдаги ҳеч қайси таом ҳам мевали димламачалик соғлиққа зарар қилмайди. У руҳонийларга, ўқув юрларининг ректорига, деҳқонларнинг тўйларига муносиб, губернаторнинг дастурхонига эса тўғри келмайди. Губернатор юмшоққина, тез ҳазм бўладиган таомлар билан овқатланиши керак. Йўқ, сеньор губернатор ўз соғлигини сақламоқни ва янада мустаҳкамламоқни истасалар, мен хаамири юпқа қилиб кесилган қайла билан бир неча тишлам беҳи ейишларини маслаҳат берардим — бу овқатлар ошқозонларини бақувват қилади ва енгил ҳазм бўлади.

Буни эшитиб Санчо кресло суянчиғига суяниб, докторга диққат билан тикилиб турди-да, жиддий товуш билан унинг отини ва қаерда ўқиганини сўради.

Доктор жавоб берди:

— Сеньор губернатор, исми-шарифим доктор Педро Ресио де Маль-Агуэро, Альмодавар дель Камподаги Каракуэла йўлининг ўнг томонидаги Тиртеафуэра\* деган ерда туғилганман, тиббий унвоини Осун университетига олганман.

Жон-пони чиқиб кетган Санчо қичқариб юборди:

— Бўлмаса, гап бундай, Тиртеафуэрада туғилиб, Осун уни-

\* Испанча нариги дунёга жўна, ер ютсин, дегани.

верситетида докторлик унвонини олган доктор Педро Ресио де Маль-Агуэро, тезроқ бу ердан жўнаб қолинг! Бўлмаса қуёш ҳаққи, қўлимга сўйил олиб, сиздан бошлаб, оролдаги барча докторларни қувиб чиқараман. Мен кўзимга жоҳил бўлиб кўринадиганлар ҳақида гапиряпман. Ақлли, тажрибали ва билимдон докторларни кўз қорачиғидек асрайман ҳамда энг улуғ валинеъматлардек иззат қиламан. Қани, жўнаб қолингчи бу ердан, Педро Ресио, бўлмаса манави ўтирган креслом билан бошингизни ёраман. Агар мени жавобгарликка тортгудек бўлсалар, ўз ҳамшаҳарларининг жаллоди бўлган бемаъни бир докторни ўлдириб, худога маъқул тушадиган иш қилдим деб айтаман. Қани, энди ейишга овқат беринг ёки унинг қорнини тўйғиза олмайдиган ва икки дона ловияга ҳам арзимайдиган губернаторлик мансабини олиб ташланг!

Губернаторнинг жаҳли чиқиб кетганини кўриб хижолат чеккач доктор энди жуфтакни ростлаб қолмоқчи бўлиб турган эдики, бирдан кўчадан чопар бурғусининг садоси эшитилиб қолди. Эшик оғаси деразадан ташқарига қаради-да, Санчо ёнига келиб шундай деди:

— Сеньор герцог ҳузуридан чопар келди, бирор муҳим топшириқ билан келган бўлса керак.

Терга ботган чопар ҳансираб кириб келди-да, қўйнидан хат олиб, губернаторга топширди. Санчо уни эшик оғасига тутқазиб, кимга юборилганини ўқишни буюрди.

Хатнинг устига шундай деб ёзилган эди:

«Баратария оролининг губернатори дон Санчо Пансанинг ўз қўлига ёки котибига тегсин.»

Буни эшитган Санчо:

— Ким бу ерда менинг котибим? — деб сўради.

Тўпланганлардан бири жавоб берди:

— Мен, сеньор, чунки ўқиш ва ёзишни биламан.

— У ҳолда, — деди Санчо, — сиз ҳатто императорнинг ҳам котиби бўлишингиз мумкин. Хатни очиб, унда ёзилганларни ўқиб чиқинг.

Янги тайинланган котиб топшириқни бажарди, хатни ўқиб, мутлақо махфий эканлигини айтди.

Шунда Санчо баковул билан эшик оғасинигина ўз ҳузурида олиб қолиб, бошқаларга чиқиб кетишни буюрди. Ҳамма, шу жумладан доктор чиқиб кетгач, котиб герцогнинг хатини ўқиб берди:

*Сеньор дон Санчо Панса, менга шу нарса маълум бўлдики, менинг ва сизнинг душманларимиз яқин кечалардан бирида оролимизга бостириб киришга тайёргарлик кўраётган эмиш. Сизни гафлагда қолдирмасликлари учун уларни кутиб огоҳ бўлиб туринг. Бундан ташқари, ишончли айғоқчилар орқали шуни ҳам билиб олдимки, қиёфасини ўзгартган тўрт чоғли нияти бузук жиноятчи жонингизга қасд қилиб, оролингизга кириб олган, зероки сизнинг ақл-заковатингиз уларнинг кўнглига ғулғула со-*

либ қўйган. Ҳушёр бўлинг, заҳарлаб қўймасликлари учун берган таомларини асло ея кўрманг. Башарти бирор хавф-хатар таҳдид қилгудек бўлиб қолса, тезда ёрдамга етиб бораман.

Ушбу хат августнинг ўн олтинчи куни, эрталаб соат тўртда қасримиздан жўнатилди.

Дўстингиз  
Герцог.

Санчо ҳайратга тушиб қолди, бошқалар ҳам ўзларини ҳайрон бўлганга ўхшаб кўрсатишга уринишди. Санчо бир оз сукут сақлаб тургач, баковулга деди:

— Менимча, бу ердаги энг хавфли одам доктор Ресио; у мени энг оғир ҳалокатга — очликдан ўлишга маҳкум этмоқчи.

— Лекин, ҳар холда, — деди эшик оғаси, — марҳаматли жаноблари, дастурхонга қўйилган таомларга қўл урмасликларини маслаҳат берардим, нега деганингизда буларни роҳибалар тайёрлаган, уларга ишониб бўлмайди.

— Сиз билан ади-бади айтишиб ўтирмайман, — деди Санчо, — ҳеч бўлмаганда менга бир бурда нон билан тўрт фунт узум беринглар. Бундан заҳарланаман деб чўчимаса ҳам бўлади, тўғриси айтсам, асло чидаб туролмайман. Вунинг устига, ҳимояга тайёрланишимиз керак, бунинг учун эса яхшилаб тўйиб олиш лозим, ахир қорин довюракликка эмас, довюраклик қориннинг тўқлиғига боғлиқ-ку. Сиз эса, котиб, сеньор герцогга, топшириқларингизнинг ҳаммаси тўла-тўқис бажарилади, деб жавоб ёзинг ҳамда сеньора герцогиняга қўлларини ғойибдан ўпажагимни, бир йўла жанобим сеньор дон Кихотнинг ҳам қўлини ўпиб қолишимни ҳам ёзиб қўяқолинг, тагин у мени nonкўр экан деб юрмасин. Қолганини эса моҳир котиблардек боплайсиз. Хаёлингизга келган ҳамма ўринли гапларни қўшиб қўяверасиз. Энди, қани, столдаги нарсаларни йиғиштириб, егани бир нима беринглар, борди-ю, қандайдир айғоқчи, қотил ёки сеҳргарлар менга ёхуд оролимга ҳужум қилгудек бўлсалар, бемалол даф қила оламан уларни.

Шу пайт залда яна доктор Педро Ресио ҳозир бўлди, у Санчонинг газабидан қўрқиб, тиббий қоидаларини бузиб бўлса-да, кечқурун овқатланишга руҳсат беражагини айтди. Губернатор бу гапдан қаноатланиб, кечқурунги овқат соатини сабрсизлик билан кута бошлади. Ниҳоят кутилган вақт ҳам етиб келди: кечки овқатга пиёзли димлама мол гўшти ва қайнатилган бузоқ гўшти қўйдилар, бу жонивор ҳам роса эскириб қотиб кетган экан. Санчо уларни худди Милан макиёни, Рим қирғовули, Сорренто бузоғи, Морон тустовуғи ёки Лавах ғози гўштидек зўр иштаҳа билан ея бошлади. Овқат ўртасида докторга мурожаат қилиб, деди:

— Эшитиб қўйинг, сеньор доктор, бундан кейин мени бунақанги ажойиб ноз-неъматлар ва лаззатли таомлар билан меҳмон қила кўрманг, бу билан ошқозонимни бузасиз, барака топкур.

Мен эчки, мол гўшти, думба, сур гўшт, шолғом, пиёз билан овқатланишга одатланганман. Агар мени нуқул сарой овқатлари билан боқадиган бўлсангиз, у ҳолда ошқозоним яхши қабул қилмайди, озор чекади. Яхшиси ҳар қуни менга гўшту ҳар хил кўкат ҳамда сабзавотлар солинган димлама тайёрлашгани тузук, унга қанчалик кўпроқ ноз-неъмат солинса шунчалик мазали бўлади, лекин мени майна қилгани ҳеч кимга йўл қўймайман. Шундай қилиб, келинг, дўстона яшаб, дўстона овқатланайлик. Ахир, худонинг тонги ҳамма учун барабар отади-ку. Мен оролни шундай бошқараманки, ўлпоннинг тийинини ҳам йўқотмайман, пора ҳам олмайман, сиз ҳаммангиз атрофга кўз-қулоқ бўлиб турунглар. Бўлмаса мен умрингизда кўрмаган ғаройиботларни кўрсатиб қўяман.

— Виждонан айтаманки, сеньор губернатор, — деди эшик оғаси, — муҳтарам жаноблари мутлақо тўғри гапиряптилар.

Шу ороллардаги барча ороликлар номидан ваъда бераманки, уларнинг бари сиз марҳаматли жанобларига сидқидиллик билан, муҳаббат ва ихлос билан хизмат қиладилар. Сиз ҳукмдорликнинг бошланишиданоқ ўзингизнинг шу қадар саховатли эканлигингизни кўрсатдингизки, марҳаматли жанобларига хуш келмайдиган биронта номаъқул иш қилишни ҳатто хаёлларига ҳам келтирмайдилар улар.

— Албатта, — жавоб берди Санчо, — бўлмаса улар аҳмоқ бўлган бўлур эдилар. Лекин, такрор айтаманки, менинг ва кулранг эшагимнинг овқатимиз ҳақида ғамхўрлик қилиб турунглар: мен учун ҳамма нарсидан ҳам зарур, кечиктириб бўлмайдиган иш бу. Қоронғи тушиши билан оролни айланиб чиқамиз, чунки мен ҳар қандай бекорчи дайдилар ва йўлдан озган кимсалардан тозаланоқчидан уни. Шунини билиб қўйингларки, дўстларим, дангасалар ва бекорчилар ишламай тишлайдиган текинхўрлардир. Деҳқонларга ҳомийлик қилиш, идальголарнинг ҳақ-ҳуқуқини ҳимоя этиш, саховатлиларни мукофотлаш, айниқса динни ҳурматлаш, дин пешволарини эъзозлаш ниятидадирман. Хўш, бунга нима дейсизлар, дўстлар. Тўғри гапиряпманми ёки бемаъними?

— Сиз шундай гапиряпсизки, сеньор губернатор муҳтарам жаноблари, — жавоб берди баковул, — қандай қилиб шундай оми одамнинг — билишимча муҳтарам жаноблари саводсиз-ку ахир — шундай ақлли гапларни ва оқилона панд-насиҳатларни ўйлаб топаётганларидан ҳайратда қолдим. На сизни бу ерга юборганлар, на ҳузурингизда турган бизлар сиз муҳтарам жанобларидан бундай истеъдодни кутган эдик. Токи ҳаёт экансан, ҳар қуни бирор янгиликнинг шоҳиди бўларкансан: ҳазиллар жиддий ишга айланар экан, мазах қилувчилар эса майна бўлиб қоларканлар.

Шундай қилиб, губернатор баковул, котиб, эшик оғаси ва зиммасига Санчо фазилатларини хатга тушириб, келгуси наслларга етказиш вазифаси юкланган солномачи ҳамроҳлигида орол бўйлаб тунги саёҳатга отландилар. Уларнинг кетидан шу қадар кўп котиб ва альгвасиллар борардики, улардан бир кичикроқ

ҳарбий отряд тузса бўларди. Асосини ушлаб олган Санчо ўртада шахдам қадам ташлаб борарди. Унга қараган саринг қарагинг келарди. Улар бир неча кўчани айланиб ўтгач, тўсатдан қулоқларига қиличларнинг жарангги чалиниб қолди. Ҳаммалари шовқин келаётган томонга отилдилар. Улар бир неча қадам чоғиб боришгач, қилич билан яккама-якка олишаётган икки номаълум кишига дуч келишди. Тартиб сақловчи нозирларга кўзи тушган рақиблар тўхтаб қолишди, улардан бири хитоб қилди:

— Худо ва қирол ҳақи! Бу қишлоқда ҳамманинг кўзи олдида бировларни талаб, кўчанинг қоқ ўртасида ўтган-кетганга тажовуз қилиш қанақаси бўлди?

— Тинчланинг, эй саховатли одам, — деди Санчо, — қани менга айтинг-чи, жанжалингиз нимадан чиқди; мен — губернаторман.

Шунда иккинчи рақиб гап бошлади:

— Сеньор губернатор, мен сизга жанжал нимадан чиққанлигини қисқача гапириб беришга ҳаракат қиламан. Муҳтарам жанобларига маълум бўлсинки, манави йигит ҳозиргина соққа ўйнаб икки минг реалдан ортиқроқ ютиб олди. Албатта, у қандай ҳийла ишлатиб ютди, бу фақат худогагина аён. Мен ўйиннинг гувоҳиман, гарчанд виждоним азобланиб турса-да, бир неча марта шубҳали отишни унинг фойдасига ҳал қилдим. Ниҳоят ўйин тугаб, у ютуқларини йиғиштириб олди. У менга чўтал беради деб ўйласам, ютуғини чўнтагига солди-ю, индамай кўчага чиқиб кетаверди. Хафа бўлганимча орқасидан бориб, яхшиликча, мулозимлик билан ҳеч бўлмаганда саккиз реал беришни сўрадим. У менинг ҳалол одам эканимни, амал-тақалим, топар-тутарим йўқлигини билади. Чунки ота-онам мени ҳеч нарсага ўргатмаган ҳам, мол-дунё қолдирмаган ҳам. Бу қаллоб бўлса, атиги тўрт реалгина чиқариб берди. Сеньор губернатор, ўзингиз бир ўйлаб кўринг-а, бу қандай ҳаёсизлик, ноинсофлик! Виждонан айтаман, муҳтарам жаноб, агар сиз етиб келмаганингизда унинг ютуқларини зўрлаб тортиб олган бўлардим.

— Бунга сиз нима дейсиз? — сўради Санчо қиморбоздан.

Қиморбоз бу қаллоб тамагирнинг тўғри гапираётганини, ҳақиқатан ҳам унга тўрт реалдан ортиқ беришни истамаганини, чунки унинг ҳар кунини чўтал сўрашини гапириб берди. Чўтал ва садақа билан кун кўрадиган одам эса мулозим бўлиши, омадли қиморбоз билан савдолашиб ўтирмай, берганини олиши керак, деди у.

— Борди-ю, мен чиндан ҳам ғирром бўлганимда эди, — деди қиморбоз, — сал сахийроқ бўлардим, негаки ғирромлар бунақа фирибгарларга кўпроқ пора беришга мажбур, чунки уларнинг ҳийласини чўтал олувчиларга аён. Мен оз чўтал беришманми, демак шунинг ўзи ҳалол ўйнаганимни кўрсатиб турибди.

— Тўппа-тўғри, — деди баковул. — Сеньор губернатор, бу иккала йигитчага нисбатан қандай фармойиш берадилар?

— Фармоним шундан иборатки, — жавоб берди Санчо: — сиз,

сеньор киморбоз, ҳозироқ маниви жанжалкашга юз реал берасиз, яна бунинг устига қамоқдагилар фойдасига ўттиз реал бағишлайсиз. Сиз бўлсангиз, амал-тақал, топар-тутарсиз йигитча, юз реални олинг-у, эртадан кечикмай жўнаб қолинг, сиз ўн йилга бадарға қилинасиз. Визнинг оролда бекорчиларга ўрин йўқ, агар қайтиб келгудек бўлсангиз ё ўз қўлим билан, ёки жаллод ёрдамида дорга осаман. Гап қайтарманг, менинг қаҳримни келтирманг.

Рақибларнинг бири пулни чиқариб иккинчисига берди, уларнинг бири бадарға, иккинчиси уйига йўл олди, губернатор эса шундай деди:

— Ё менинг салтанатим сариқ чақага ҳам арзимай қолади, ё бу киморхоналарнинг ҳаммасини ёпаман, чунки назаримда уларнинг фойдасидан кўра зарари кўпроққа ўхшайди.

Шу пайт уларга полициячи яқинлашиб, бир йигитчани Санчонинг ёнига бошлаб келди:

— Сеньор губернатор, — деди у, — манави йигитча рўпарамиздан келаётиб, полициячи эканлигимизни пайқаб қолиши биланоқ орқасига қараб худди кийикдек қоча бошлади. Бу қилиғи жуда шубҳали кўринди. Мен уни қува бошладим, агар қоқилиб йиқилиб тушмаганда, эҳтимол ушлай олмаган бўлардим.

— Нега қочдинг, ошна? — деб сўради Санчо.

Бунга йигитча шундай жавоб берди:

— Чунки полициячилар ҳадеб сўраб-суриштираверади, жавоб беришга эса менинг ҳушим йўқ.

— Нима иш қиласан?

— Тўқувчиман.

— Нима тўқийсан.

— Ҳазратимнинг рухсати олийлари билан айтсам, найзаларнинг учини тўқийман.

— Э-ҳа, масхарабозга ўхшайсан-ку? Маҳмадоналикка ёзилганмисан? Ҳа, майли. Қаерга кетаётган эдинг?

— Шундай айланиб, шамоллаб юрувдим.

— Оролингизнинг қаерида шамоллаш мумкин?

— Қаерда шамол бўлса ўша ерда.

— Яхши, жавобларинг қофияли. Кўриниб турибди, ақли расо йигитчага ўхшайсан; шу нарсани кўз олдингга келтиргин-а, мана мен шамолман, ортингдан пуфлаб тўппа-тўғри турмага ҳайдайман. Ҳой, қани олинглар буни, қамоққа жўнатинг. У ерда бир неча кун ётсин, шунча шамоллаб юргани етар.

— Худо ҳақи, марҳаматли жанобим, — эътироз билдирди йигитча, — мени қамоқда ухлашга мажбур қилишдан кўра, қирол қилиб кўтариш осон тушади сизга.

— Хўш, нима учун мен сени қамоқда ухлашга мажбур қила олмас эканман? — сўради Санчо. — Сени қамашга ёки фелим келиб қолса қўйиб юборишга қудратим етмайдими-а?

— Муҳтарам жанобларининг ҳукми амаллари ҳар қанча улуғ бўлса-да, — жавоб берди йигитча, — барибир мени қамоқда ухлатишга кучингиз етмайди.



— Қанақасига кучим етмасакан?— кичқирди Санчо.— Олиб боринг уни, янглишганига амалда ишонч ҳосил қилсин. Алькальдга айтинг, агар бу йигитчани қамоқдан чиқариб юборса, унга икки минг дукаат жарима соламан.

— Мен ўз сўзимда қатъий тураман, муҳтарам жаноб,— так-рорлади йигитча,— дунёда мени ҳеч ким қамоқда ухлашга маж-бур қилолмайди.

— Нима деб жавраяпсан, тушунолмаяпман ёки амрим билан оёгингга уриладиган кишан занжирларини парчалаб, сени қа-моқдан олиб чиқиб кетадиган бирор фаришта турибди деб ўйла-япсанми?

— Сеньор губернатор,— деди ҳазиломуз йигитча,— келинг, ўйлаб иш қилайлик. Фараз қилайлик, муҳтарам жаноблари турмага олиб бориб, оёқ-қўлимга кишан уриб зиндонга таш-лашга фармон бердилар. Борингки, алькальд мени қамоқдан чиқариб юборгудек бўлса, қаттиқ жазо тортади, шунинг учун у фармонингизни аниқ бажаради ҳам дейлик. Лекин, барибир, мен агар тун бўйи мижжа қоқмай кечани бедор ўтказмоқчи бўлсам, муҳтарам жаноблари, сиз ўзингизнинг ҳукми амрингиз билан мени ухлашга мажбур қила оласизми?

— Албатта йўқ,— деди котиб,— йигитча жуда қойил гапни топди.

— Бинобарин, сен менинг гапимга монелик қилиш учун эмас, балки ўз инжиқлигингни деб ухламоқчи эмасмисан? — сўради Санчо.

— Албатта, сеньор,— деди нотаниш йигитча,— бундан бошқа ҳеч нарса келгани йўқ калламга.

— Ундай бўлса йўлингдан қолма,— деди Санчо,— уйингга бориб ухла, худо сенга ажойиб тушлар йўлласин. Мен сенинг оромингни бузмоқчи эмасман. Аммо, бундан буён адолат суди билан ҳазиллашмаслигингни маслаҳат бераман, акс ҳолда бу-нақа майнавозчилигинг учун бошингда калтак синиши мумкин.

Нотаниш йигитчани қўйиб юбораркан губернатор шу билан оролни айланиб чиқишни бас қилишга қарор қилди. Икки кундан сўнг эса губернаторликнинг ҳам куни битди, оролни бошқариш-ни тубдан ўзгартиш ва яхшилаш ҳақидаги Санчо Пансанинг хаёл қилган режалари чиппакка чиқди.

### L БОБ

#### САНЧО ПАНСАНИНГ ХОТИНИ ТЕРЕСА ПАНСАГА ГЕРЦОГИНЯ МАҲРАМИНИНГ ҚАНДАЙ ҚИЛИБ МАКТУБ ОЛИБ БОРИБ ВЕРГАНИ

Санчо Панса Баратария оролида губернаторлик қилиб турган бир вақтда герцогиня унинг хотини Тереса Пансага эри ва ўз но-мидан мактуб юборди, бу мактубни ўрмонда ўйналган ғалати томошада Дульсинея ролини бошлаб ижро этган ўша маҳрам олиб борди. Герцогиня мактубга ажойиб совға — бир шода марварид қўшиб жўнатди.

Уддабурро, эпчил маҳрам хўжайинларининг илтифот ва мар-

ҳаматиға сазовор бўлмоқ вазифани адо этишга бажонидил киришиб, шу ондаёқ Санчонинг қишлоғи томон йўл олди. Қишлоққа яқинлашаркан сой бўйида кир юваётган бирталай аёлларга дуч келди, шунда маҳрам улардан ламанчлик дон Кихот деган машҳур рицарнинг яроқбардори Санчо Пансанинг хотини Тереса Панса қаерда яшайди деб сўради. Бу сўзларни эшитиб, кир юваётган аёллар орасидан бир қиз қаддини ростлаб:

— Тереса Панса менинг онам, сеньор Санчо Панса — отам, сиз айтган рицарь эса хўжайинимиз,— деди.

— Ундай бўлса яқинроқ келинг, қизча,— деди маҳрам,— мени онангиз ҳузурига бошлаб боринг, мен онангизга падари бузрукворингиздан мактуб ва совға-салом келтирдим.

— Бош устига, сеньор,— деди кўринишидан ўн тўрт ёшларда бўлган бу қиз.

Қизча шундай деди-да, юваётган кирларини дугоналаридан бирига қолдириб, бир ҳатлаб маҳрамнинг оти ёнига келиб қолди, қиз оёқ яланг, сочлари тўзғиған эди. У:

— Тўғрига қараб юраверинг, муҳтарам жаноб. Кулбамиз шундоққина қишлоққа кираверишда, онам шўрлик отамдан кўпдан бери хабар бўлмагани учун қайғу надомат чекиб, қон йиғлаб ўтиргандилар,— деди.

— Мен яхши хабарлар олиб келдим,— деди маҳрам,— онангиз бунинг эвазига тангрига ҳамду санолар ўқиб, шукроналар айтади.

Қизча сакраб, ирғишлаб уйгача чопқиллаб борди-да, остонаданок:

— Бу ёққа чиқинг, ойижон, тезроқ чиқинг бу ёққа, отажонимнинг олдидан бир сеньор келибди, у отамдан мактуб ва ҳар хил совға-саломлар олиб келибди,— деб қичқира бошлади.

Қизчанинг овозини эшитиб уйдан Тереса Панса отилиб чиқди. Унинг эғнида кулранг юбка, белидаги тасмаси ҳам, калта кўйлағи ҳам кулранг эди. Бу жуда бақувват, ғозқомат, зуваласи пишиқ, бугдоймағиз, қирқ ёшлар чамасидаги аёл эди. Қизи ва унинг ёнидаги маҳрамга кўзи тушган ҳамоноқ:

— Нима гап, қизим, бу сеньор ким экан? — деб сўради у.

— Каминалари донья Тереса Панса хонимнинг содиқ қулларидир,— деб жавоб берди маҳрам.

Шундай деярган, у отдан сакраб тушди-да, эҳтиром билан таъзим бажо келтириб, сеньора Тересанинг оёқларига бош уриб тиз чўқди.

— Қўлингизни ўпмоққа руҳсат этинг, сеньора донья Тереса,— деб гапини давом эттирди маҳрам,— мен ҳазрати олияларини Баратария оролининг губернатори сеньор дон Санчо Пансанинг шаръий жуфти ҳалоллари сифатида чин қалбимдан табриклайман.

— Вой, сеньор, қўйинг, бас! Нима қиялсиз ўзи? — деди Тереса.— Мен ҳеч қандай сарой хонимларидан эмасман, ҳеч қанақа губернаторнинг эмас, балки ўлкама-ўлка кезиб юрган бир жа-

ҳонгашта рицарь яроқбардорининг хотини, камбағал деҳқон аёлман.

— Йўқ, марҳаматли хоним, — деди маҳрам, — сиз энг ҳурматли губернаторнинг ҳурматга лойиқ бекасидирсиз. Бу сўзларимнинг ҳақлиги учун манави мактуб ва совға-саломларни қабул этгайсиз, муҳтарама бекам.

Шундай деб у чўнтагидан олтин шарчалари бор марварид шодасини олиб, Тересанинг бўйнига тақди-да, сўзини давом эттирди:

— Манави мактуб сизга сеньор губернатордан, мана буниси мени сизнинг қошингизга юбориб, бу марваридларни тортиқ қилишни буюрган олиҳиммат бекамдан.

Тереса билан қизи ҳайратда донг қотиб қолишди. Ниҳоят қизалоқ тилга кириб:

— Бу хўжайинимиз сеньор дон Кихотнинг иши бўлмаса, турган жойимда тил тортмай ўлай. Эҳтимол у отамга кўпдан бери ваъда қилиб юрган бирор губернаторлик ёки графлик мансабни ҳадя қилгандир.

— Жуда тўғри, — деди маҳрам. — Сеньор дон Кихотнинг кўрсатган юксак хизматлари эвазига сеньор Санчо айна вақтда Баратария оролининг губернаторидирлар.

— Марҳамат қилиб ўқиб беринг бу мактубни, муҳтарам сеньор, — деди Тереса, — чунки мен, ип йигиришга қанчалик уста бўлмай, бирорта ҳам ҳарфни танимайман, ўқишни мутлақо билмайман.

— Мен ҳам билмайман, — деб қўшиб қўйди Санчика, — бирпас шошмай туринг, ҳозир бирорта ўқишни биладиган одамни — ё руҳонийни, ё бақкалавр Самсон Карраскони чақириб келаман. Улар отам ҳақидаги бирор янгиликдан бохабар бўлгани бажонидил келишади.

— Уларни чақиришнинг ҳожати йўқ, — деди маҳрам, — гарчанд ип йигириш қўлимдан келмаса-да, лекин ўқишни биламан, сизларга мактубни ўзим ўқиб берамак.

Шундан сўнг у юқорида зикр этилган, китобхонга маълум бўлган, Санчо Пансанинг мактубини ўқиб берди.

Санчо Пансанинг мактубини ўқиб бўлгач, маҳрам чўнтагидан герцогинянинг мактубини чиқарди. Герцогиня ўз мактубида Тереса Пансага мана бундай деб ёзган эди:

*Уртоқжоним Тереса, эрингиз Санчонинг ҳалол, софдил одамлиги, унинг ақлу заковати мени ўзига ром этиб, беҳисоб оролар ҳукмдори бўлган умр йўлдошим герцогдан бу оролардан бирортасини бошқаришни Санчога тортиқ этишни илтимос қилишга мажбур этди. Визга хабар беришларича Панса бу оролни шунқорона бошқараётган эмиш. Ана шу бошдан мен ва ўз-ўзидан равшандирким, герцог Санчодан беҳад миннатдоримиз. Мен ана шундай одил ҳукмдорни танлашда янглишмаганим учун оллога беҳисоб ҳамду санолар ўқийман; сиз, сеньора Тереса, яна шу нарсадан бохабар бўлмогингиз жоизки, одил губернаторни топиш*

гоят мушкулдир, зотан Санчо ўз мулкида қандай одиллик кўрсатаётган бўлса, тангридан менга ҳам шундай ато этишини илтижо қиламан.

Мен сизга, қимматли дугонам, олтин шарчалари бор марварид шодаси тухфа қиларканман, бу марвариб ўрнига Шарқ дурру инжулари совға қила олганимда беҳад бахтиёр бўлурдим. Лекин шу йилда қуйидаги мақолни ёдга олайлик: Сенинг бошингни силаган одам сенга ўлимни ҳеч раво кўрмайди. Вақти соати келиб танишиб, дўстлашиб кетармиз деган умиддаман, яна ким билади дейсиз, келажакда нима бўлиши бир худонинг ўзига аён. Мендан қизингиз Санчикага дуо денг, қизингизга яна шу нарсани айтиб қўйингки, унга етти ухлаб тушига кирмаган бадавлат қаллиғ топиб бераман.

Эшитишимча, сизларнинг ўлкангизда йирик-йирик чўчкаён-ғоқлар жуда кўп бўларкан. Ана шу чўчкаёнғоқлардан икки дюжинасини юборсангиз; ўз қўлларингиз билан терилган бўлса мен беҳад хурсанд бўлардим. Соғлигингиз, турмушингиз ҳақида батафсил ёзишингизни ўтиниб сўрайман, мабодо бирор етишмовчилигингиз бўлса, бир оғиз сўзингиз кифоя, ҳар қандай тилагингизни қаноатлантирурмиз. Илоҳо тангри сизни ўз паҳолида асрасин.

Бу мактуб менинг мулкимдан жўнатилди.  
Сизни чин қалбдан севувчи дугонангиз герцогиня.

— Оҳ! — деб фарёд уриб юборди Тереса бу мактубни эшитиб, — қандай сахий, оддий ва камтарин сеньора экан-а! Бунақанги сеньора билан битта гўрда бирга ётишга ҳам розийдим. Бу сизга қишлоғимиздаги сиркаси сув кўтармайдиган, ўзгага шамолни раво кўрмайдиган, дворян бўлгани учун сени оёқ учида кўрсатадиган бегойимлардан эмас: улар черковга шунчалик виқор, дабдаба билан боришадики, худди маликаю кироличалар дейсиз, деҳқонларнинг аёлларига ҳатто қиё ҳам боқишмайди, буни ўзларига иснод деб билишади. Бу олиҳиммат сеньора ўзи герцогиня бўла туриб, мактубида мени ўртоқжон деб ёзибди, менга худди ўз тенгидек муомала қилибди. Илоё унинг мартабаси Ламанчдаги энг юксак қўнғироқхонадан ҳам баланд бўлсин. Чўчкаёнғоқларга келсак, сеньор, герцогиня ҳазрати олияларига бир дунёсини юбораман, юборганда ҳам шунақанги йирикларини юборайки, уларни томоша қилгани барча келсин, кўриб оғизлари очилиб қолсин. Энди, Санчика, бу сеньорни зиёфат қилгани ҳозирлик кўр. Оғилхонадан тухум олиб чиқ, чўчка мойидан кўпроқ тўғраб, уни шоҳона меҳмон қил. Ўзи ҳам бўйи-баста келишган одам экан, олиб келган хабари ҳам хушхабар, шунинг учун у зиёфат қилишга лойиқ. Отига ҳам яхшилаб қара. Мен ҳамсояларни кига кириб, бу қувончли хабарни етказаман, руҳоний ота билан сартарошхонага, уста Николаснинг олдига ҳам кираман, ахир улар отангни юракдан маъзур кўришарди-ку.

— Ҳаммасини ўрнига қўяман, ойижон, — деди Санчика, —

лекин анави марвариднинг ярмини менга берасиз-а. Марвариднинг ҳаммасини сеньора герцогинянинг биргина сизга юборганига сираям ишонмайман.

— Ҳаммаси сеники, — деди Тереса, — бир неча кунгина тақиб юрсам бас. Ростини айтсам, уни кўрсам кўнглим қувончга тўлиб, юрагим ёрилиб кетаёзпти.

— Мен сизга олиб келган бошқа совғани кўрсангиз қандай суюниб кетаркинсиз! — деди маҳрам. — Бу жуда ҳарир яшил матодан тикилган камзул — уни сеньор губернатор қизчаси Санчикага бериб юборди.

— Эй худо, бахтимга минг йиллар саломат бўлсин отам! — деди Санчика ҳаяжонланиб. — Буни олиб келган одам ҳам минг йил, кам бўлса, икки минг йил умр кўрсин.

Бу орада Тереса марваридни бўйнига тақиб олиб, қўлидаги мактубларни чирманда чалаётгандек чалиб кўча бўйлаб чопиб бораркан, руҳоний ва Самсон Карраско билан тасодифан тўқнашиб қолди-да, ўйинга тушиб:

— Ҳа, мана энди биз қашшоқ эмасмиз, биз энди губернатор оиласимиз. Ишонмаяпсизларми, унда энг олий насаб дворян аёлни олиб келинглар бу ёққа, унинг ўрни қаердалигини кўрсатиб қўяман.

— Ўзи нима гап, Тереса Панса? Намунча хурсандсиз, қўлингиздаги қанақа қоғозлар?

— Қўлимдаги герцогиня ва губернатордан келган мактублар, шунинг учун хурсандман, бўйнимдаги эса олтин шарчалари бор марварид, энди мен губернатор хотиниман.

— Нималар деяпсиз, Тереса? Тангридан бўлак ҳеч зоғ тушуна олмайди сўзларингизга.

— Мана, ўзларингиз кўринглар, — деди-да, Тереса қўлидаги мактубларни узатди уларга.

Руҳоний овозини чиқариб мактубларни ўқиди. Самсон билан руҳоний эсанкираб, бир-бирларига қараб олишди, кейин баккалавр, бу мактубларни ким олиб келди, деб сўради. Руҳоний бўлса Тересанинг бўйнидаги марваридини олиб, у ёқ-бу ёғини кўздан кечиргач, унинг асл эканлигига ишонч ҳосил қилиб, янада ҳайратда қолди.

— Зиммамдаги лавозимим ҳақи қасамёд этаманки, бу мактублар ва совғаларга асло тушунолмадим. Мен асл марваридларни кўриб, ўз қўлларим билан ушлаб турибман, айти вақтда аллақандай бир герцогинянинг икки дюжина чўчқаёнғоқ юборишларини илтимос қилиб ёзган мактубини ҳам ўз кўзим билан ўқиб турибман.

— Қани юринг-чи, бу мактубларни олиб келган одамни бир кўрайлик, балки у ҳамма шубҳаларимизга барҳам берар.

Улар шундай қилишди ҳам, Тереса ҳам уйига қайтди. Бу пайт маҳрам отига арпа солиш билан банд, Санчика бўлса чопарни зиёфат қилиш учун чўчқа мойи тўғрамоқда эди. Маҳрамнинг қиёфаси ва чиройли, ҳашамдор уст-боши уларга жуда ёқди. Самсон таъзим қилиб, эхтиром-ла меҳмон билан саломлашгач,

ундан дон Кихот ҳамда Санчо Панса ҳақидаги янгиликларни сўзлаб беришни илтимос қилди ва Санчо билан герцогинянинг мактубларини ўқиганларини, аммо Санчонинг қайси оролда ҳокимлик қилаётганини тушунолмаганларини айтди. Бунга маҳрам шундай жавоб берди:

— Манави хонимнинг сеньор Санчо Пансанинг хотини эканлиги қанчалик ҳақ бўлса, унинг ҳозир губернаторлиги ҳам шунчалик ҳақ. Аммо унинг қаерни ва нимани — оролни, орол эмасми — бошқараётгани ҳақида аниқ бир нима деёлмайман; у қишлоқнинг аҳолиси минг кишидан ортиқроқ эканини айтсам ҳам кифоя. Чўчқаёнғоқларга келсак, бекам герцогиня жуда камтарин ҳамда гоътада хушмуомала аёл, у ҳар қандай деҳқон аёлдан чўчқаёнғоқ юборишини сира тортинмай илтимос қилаверади.

Этагига тухум солиб олган Санчика пайдо бўлиши билан уларнинг суҳбати бўлиниб қолди.

— Шуни айтинг-чи, сеньор, — дея мурожаат қилди маҳрамга у, — губернатор бўлгандан кейин отам узун иштон киядиган бўлиб қолгандир?

— Бунга эътибор бермабман, — деб жавоб қилди маҳрам, — эҳтимол узунини кийиб юргандир.

— Вой худойим-эй! — деди «Санчика». — Ушанақа кийимда юрганини бир кўрсамийди! Отамнинг узун иштон кийганини кўришни ёш болалигимдан орзу қилиб юардим. Қизик эмасми ахир бу?!

— Албатта кўрасиз, муҳтарам хоним, — деди маҳрам, — омон бўлсангиз кўрасиз. Виждоним ҳақи қасамёд этаманки, унинг губернаторлиги яна икки ой давом этса — отангизни иштондагина эмас, балки сайёҳлар қалпоғини кийиб юрганини ҳам кўрасиз.

Руҳоний билан баккалавр маҳрамнинг Санчикани мазах қилаётганини жуда яхши англаётган бўлсалар-да, уларни марвариднинг ҳақиқийлиги ва Тереса аллақачон ҳамма кўз-кўз қилган, Санчо юборган ов кийими чалғитиб қўйган эди. Улар Санчиканинг орзу-истагидан мириқиб кулишди, лекин Тересанинг қўйидаги сўзларидан янада қотиб-қотиб кулишди:

— Сеньор руҳоний, қишлоғимиздан бирорта одам Мадрид ёки Толедога кетаётгани йўқмикин, шуни билиб берсангиз, баракка топкур, мен унга ҳозирги кунда расм бўлган ҳақиқий думалоқ фижма сотиб олиб келиб беришни буюрардим. Мен губернатор эримнинг шон-шарафини сақлашга, шаънига доғ туширмасликка қўлимдан келганича тиришаман, эҳтимол қишлоқда яшаш кўнглимга тегар, шунда мен саройга бораман ва файтон сотиб оламан. Губернатор хотинига файтон сотиб олиш учун ружсат бор-ку, ахир.

— Бўлмаса-чи, ойижон, — деди Санчика, — эй худо, шу кунга эртага эмас, бугун етказ. Мен ойижоним билан бирга файтонда юраман, майли, қўшнилар: «Анави деҳқон қизнинг файтонда худди графиняларга ўхшаб талтайиб ўтиришини қаранглар», дейишса дейишаверсин. Қўяверинг, улар лойга беланиб юраверипсин, мен файтонда юраман; Илоё дунёдаги гийбатчилар,

фиски фасодчилар қирилиб битсин. Мен иссиққинада ўтирсам бўлгани, одамлар кулса кулавермайдиларми? Нима, ёмон гапни гапиряпманми, ойижон!

— Йўқ, қизим, жуда яхши гапиряпсан,— деди Тереса,— менинг сахий, оқкўнгил Санчом шундай бўлишини олдиндан айтганди: кўрарсан ҳали, қизим, мен графиня бўламан. Энг муҳими — бахт йўлига дастлабки қадамни қўйиш. Оқкўнгил, сахий отанг, уни мақоллар отаси деса ҳам бўлади, менга нуқул: «Сенга сигиринъом қилсалар — тизгинини ҳам сўра» дерди, бу эса, сенга губернаторликни берибдиларми, дарров уни қабул эт, графликни тақдим этсалар — унга қўшқўллаб ёпиш, агар бирор тузуроқ совға туҳфа этсалар — олу чўнтакка ур, агар ишёқмас дангаса бўлсанг, бахт ва омад эшигингни қоқиб турса ҳам бунга қулоқ солмай, гумдон ошиб ухлаб ётаверасан, деганидир.

— Энг сўнги расм бўлган кийимларни кийиб ясаниб юрганимга одамлар нималар деб вайсашса вайсашаверишсин, менинг нима ишим бор? — деб илова қилди Санчика. — Одамга либос, эшакка тўқим; ўзингни бил, ўзгани қўй, деган мақоллар бор-ку, ахир. Бу гапларни эшитиб:

— Пансалар авлод-аждоди билан мақолчи бўладиларми деб қўйдим: улардан бирортасининг ҳам, қачон гаплашманг, сўз орасида мақол ёки матал қистирмай суҳбатлашганини кўрмаман-а,— деди руҳоний.

— Мутлақо ҳақ гапни айтдингиз,— деди маҳрам,— губернатор Санчо жаноблари ҳам нуқул мақоллар билан гапирадилар. Зотан бу мақоллар ҳамма вақт ўрнига тушавермаса ҳамки, менинг хўжайинларим — герцог билан герцогиня уни жуда мақтайдилар.

— Шундай қилиб, муҳтарам сеньор,— деди баккалавр,— Санчонинг губернаторлиги ва унинг хотинига мактуб ҳамда совға-салом юборган герцогиня оламда ҳақиқатан ҳам бор эканлиги ҳақ гапми? Гарчанд бу совға-салом ва мактублар кўз ўнгимизда турган бўлса-да, ҳар ҳолда биз бунга ишонқирамаётирмиз, инчунун биз бу ишлар ҳамқишлоғимиз дон Кихотнинг ажойиб саргузаштларидан бир кўриниши бўлса керак деб ўйлаймиз. Зероки унинг, ҳаётимда нимаики содир бўлса, фақат сеҳр-жоду натижасида рўй берадир, деб ҳисоблаши бежиз эмасди. Ана шу боисдан, ҳурматли жаноб, очигини айтсам, мен сизни ўз қўлларим билан пайпаслаб тутиб кўрмоқчидурман: қани, хаёлий шарпамикинсиз ёки эт ва суякдан иборат оддий одаммикинсиз.

— Муҳтарам сеньорлар,— деди маҳрам,— мен сизларга ёлғиз биргина нарсани далолат этмоғим мумкин, каминалари чиндан ҳам элчидирлар, сеньор Санчо Панса ҳам чинакам губернатордир, хўжайинларим герцог ва герцогиня унга губернаторлик инъом қилишга қодирдирлар, шундай қилдилар ҳам, овозаларга қараганда Санчо Панса ўз ишини ҳамин қадар ўрнига қўяётган эмиш. Буни сеҳргарлик деб ўйлайсизларми ё бошқами, ўзларингиз биласизлар, илло мен ўзимга аён бўлган гапларнигина айтдим, бу гапларнинг барҳақлигига севимли ва ҳурматли ота-

онамнинг ҳаёти ҳақи қасамёд этаман. Башарти менга дуруст сўзламаётирсан деб ишонмайдиган бўлсанглар, майли, бирор кимса мен билан борсин-да, ўз кўзи билан кўрсин, зероки қулоқ билан эшитиб ишонмагандан кўра, кўз билан кўриб ишонмоқ мақбулдир.

— Келинг, мен сиз билан бирга бораман, — деди Санчика. — Мени отингизга мингаштириб олсангиз, муҳтарам сеньор, падари бузрукворимни кўргани бажонидил бораман.

— Губернаторларнинг қизлари файтонсиз, тахтиравонсиз, хизматкорларсиз ёлғиз ўзлари юрса ярашмайди, бу мумкин эмас.

— Файтонда юраманми ёки эшақдами, худо ҳақи, менга барибир, — деб жавоб берди Санчика, — мен унақа нозиктабиат инжиқлардан эмасман.

— Ўчир овозингни, қизим, — дея унинг гапини бўлди Тереса, — нималар деётганингни ўзинг ҳам билмайсан. Бу жаноб ҳақ гапни айтяпти: илгариги пайтларинг ўтиб кетди. Энди ўзгача вақт, ўзгача даврон. Илгари отанг шунчаки Санчолигида сен оддийгина Санчика эдинг, ҳозир отанг губернатор — энди сеньорасан. Тўғри гапираётган бўлсам керак-а, жаноблар?

— Сеньора Тереса ўйлаганидан ҳам ортиқроқ бамаъни гапларни гапиряпти, — деди маҳрам. — Қани, энди қорнимни тўйғазинглар-у, тезроқ жавоб беринглар, кун ёруғида йўлга чиқа қолай.

Бунга жавобан руҳоний деди:

— Бизникига марҳамат қилсинлар, тақсир, ҳоли қудрат таомларимизни баҳам кўрурмиз, зероки сеньора Тереса бундай олий насаб меҳмонни чинкўнгилдан зиёфат қилмоқчи бўлса-да, бироқ бирор тузукроқ нимарса тополмайду.

Маҳрам хийла маҳалгача руҳонийнинг таклифини рад этиб турди-да, ниҳоят кўнди, бундан мамнун бўлган руҳоний дон Кихот ҳақида ва унинг кўрсатган қахрамонликлари ҳақида батафсилроқ сўраб-суриштириш ниятида қувоч билан уни уйига бошлаб кетди.

Баккалавр эса олган мактубларига жавоб ёзиб бермоқни таклиф этди Тересага. Лекин Тереса уни ҳаммани мазаҳ қиладиган одам ҳисоблагани учун баккалаврнинг бу ишларга аралашшини хоҳламади ва рози бўлмади, у озгина нон билан иккита тухум териб черков хизматчисига жавоб ёздиришни маъқул кўрди.

Бу орада қорнини тўйғазиб, дон Кихот ва унинг содиқ яроқбардори Санчо Пансанинг ишлари ҳақида мириқиб гаплашиб олган маҳрам Тересаларникига қайтиб кетди. У хўжайинларига мактубларни тезроқ етказиш ва дон Кихот ҳамда Санчоларнинг қишлоғида кўрган эшитганларини сўзлаб беришга шошилди. Шунинг учун ҳам чопар иккита жавоб хати билан Тересанинг совға-саломини — бир тўрва чўчкаёнғоқни олдию йўлга тушди. Унинг уйга етиб келиши дон Кихот ва беҳисоб сарой аъёнлари улфатчилигида вақтларини хушчақчақлик билан ўтказаетган герцог ҳамда герцогиняни гоятда қувонтириб юборди. Маҳ-



рамга олисдан кўзлари тушиши биланоқ уни саволларга кўмиб ташлашди, лекин маҳрам бегоналар олида сўзлаш мушқул эканини айтиб, ёлғиз хўжайинларнинг ўзларигагина сўзлаб беришни илтимос қилди. Ҳозирча эса, олий ҳазратларим, Тересанинг мактубини эрмак қилиб турунглар, дея иккала мактубни чиқариб герцогиняга узатди. Улардан бирига: «Мактуб сеньора герцогиняга тегсин, исм шарифларини эса билмаймай», иккинчисига: «Баратария оролининг губернатори эрим Санчо Пансага тегсин — илоҳо танграм унга меникидан кўра зиёдроқ умр ато қилсин», деб ёзилган эди. Герцогиня сабри чидамай типирчилаб қолди, у мактубни тезроқ очиб ўқишга ошиқарди. Ниҳоят у ўзини тутиб туролмади, мактубни шартта очди. Герцогиня унга бир кўз югуртириб, бемалол овоз чиқариб ўқиса бўларкан, деган қарорга келди:

### *Тереса Пансанинг герцогиняга мактуби:*

*Сиз ҳазрати олияларининг менга ёзган мактубингиздан беҳад хурсанд бўлдим, зероки у айнан менинг кўнглимдаги мактуб экан. Бериб юборган бир шода марваридингиз жуда яхши, чиройли экан, эрим юборган овчилар кийими ҳам ундан қолишмайди. Гарчанд ҳеч ким, айниқса руҳоний, саргарош Николас ва баккалавр Самсон Каррасколар бунга ишонмаса ҳамки, менинг умр йўлдошим Санчони губернатор қилиб тайинлаганингиз, ҳазрати олиялари, бутун қишлоғимиз учун катта қувончдир. Ишонмаса ишонмасин, бунинг мен учун ҳеч қанақа аҳамияти йўқ, ахир шу рост бўлгандан кейин ҳар ким кўнгли тусаганини гапиравермайдими. Ростини айтсам, марварид билан овчилар кийими бўлмаганида, ўзим ҳам ишонмасдим, чунки қишлоғимиздагиларнинг ҳаммаси эримни бефаросат овсар ҳисоблашади, шу кунгача эчки боқидан бўлак иш қўлидан келмаган, шунинг учун ундан бирор тузукроқ ҳоким чиқишиши ҳатто тасаввур ҳам қила олишмайди. Илоё тангри мададкор бўлиб, болалари бахтига иши ўнгидан келсин!*

*Мен бўлсам, муҳтарам сеньора, ҳазрати олияларининг ижозатлари билан фойтонда талтайиб ўтирганча пойтахтгача боришга аҳд қилдимки, токи минг-минглаб ҳасадчиларнинг кўзлари касасидан чиққудек бўлиб ўйнасин, ана шу боисдан сиз зоти олияларига таъзим этиб ёлвораманким, эрим, иложи борича кўпроқ пул юборсин, қанча кўп юборса шунча яхши — ахир пойтахтда харажатлар жуда катта бўлади-ку: нон бир реал, бир фунт гўшт эса ўттиз мараведис турса — бу, ахир, хонавайрон бўлиш эмасми, борди-ю у ёққа боришим эримга ноқулай бўлса, унисини ҳам тезда ёзиб юборсин, чунки бир ерда кўним топиб туролмаяман, тезроқ йўлга чиқсам дейман, оёқларим ўз-ўзидан йўлга тортиб кетяпти. Бундан ташқари қўшнилари ҳам, қизинг икковинг пойтахтга ясаниб-тусаниб, башанг кийиниб борсанглар сен туфайли эринг жуда машҳур бўлиб кетади, деб ҳоли-жонимга қўйишмаяпти, чунки ҳамма, албатта: «Фойтонда кетаётган бу*

хонимлар ким?» деб сўрашармиш, менинг хизматкорим бўлса: «Булар — Баратария ороли губернатори Санчо Пансанинг хотини билан қизи», деб жавоб берармиш. Ана шундай қилиб ҳаммамиз — мен ҳам, эрим ҳам иззат-икромда бўлармишимиз.

Бу йил чўчқайғоқнинг жуда кам бўлганига шундай ачиндимки, буни қандай изҳор қилишимни ҳам билмай қолдим. Шунга қарамай, сиз ҳазрати олияларига майдаларидан бўлса ҳам, ярим халта юбордим — уларни битталаб ўрмондан ўз қўлим билан тердим, афсуски, йирикроқларини тополмадим, ҳар биттаси туяқушнинг тухумидай бўлса кўнглимдагидек бўларди-да!

Жавоб ёзиш ёдингиздан чиқмасин, муҳтарам хоним, мен бўлсам, албатта сизга жавоб ёзаман, соғлиғим, қишлоқда содир бўлаётган бари ишлар ҳақида хабар қиламан, ҳозирча ўз уйимда истиқомат қилиб турарканман, сиз ҳазрати олияларини ўз панаҳида асрашини ва марҳаматидан дарил тугмаслигини тангридан илтижо қилгайман. Қизим Санчика, уни яна Марисанча ҳам дейишади, ва ўғилчам сиз ҳазрати олияларининг қўлингизни ўпиб қоладилар.

Сиз олий насаб хонимга мактуб ёзишдан кўра, ўзингизни кўришга кўпроқ муштоқ бўлган дугонангиздан деб билурсиз.

*Содиқ қулингиз Тереса Панса.*

Бу ерда ҳозир бўлганларнинг ҳаммаси Тереса Пансанинг мактубини ҳузур қилиб тинглашди. Кейин герцогиня дон Кихотдан губернаторнинг номига юборилган мактубни очиб ўқисак бўлармикин, ўзиям жуда қизиқ бўлса керак, сиз нима деб ўйлайсиз, деб сўради. Дон Кихот бундай қилишга ўзи тайёр эканини айтиб, хатни қўлига олди-да, баланд овоз билан ўқий бошлади.

*Тереса Пансанинг эри Санчо Пансага мактуби:*

Хатингни олиб, азизим Санчо, христианлик ва католиклигим ҳақи қасамёд қилиб сени ишонтириб айтаманки, қувониб кетганимдан ақлдан озиб қолаёздим. Виласанми, жонгинам, сенинг губернатор бўлганингни эшитиб, юрагим қоқ ёрилиб ўлиб қолишимга сал қолди; сен, ахир, кутилмаган бахт тўсатдан бошга тушган кулфатдан ортиқроқ таъсир қилишини биласан-ку одамга. Олдимда сен юборган овчилар кийими турса, бўйнимда сенъора герцогиня юборган марварид бўлса-ю, қўлимда ёзган мактубларингизни ушлаб турсам, уларни олиб келган чопар қаршимда бўлса ҳамки, кўриб-ушлаб турганларимнинг бари наздимда тушга ўхшарди. Эчкибоқар чўпоннинг бир оролнинг губернатори бўлишини ким хаёлига келтирибди дейсан? Жонгинам, бечора онаминки: «Кўп яшаган кўпни кўради», дегани ёдингдадир. Буни шунинг учун айтапманки, агар ҳаёт бўлсам, бундан ҳам ортиқроғини кўришдан умидворман. Ростини айтсам, сени ижарадор ёки солиқ йиғувчи ўрнида кўрмагунимча кўнглим тинчимайди. Албатта, кимки солиқ йиғаётганида мансабидан

фойдаланиб хиёнат қилса, дўзахга тушиши шубҳасиздир, бироқ чўнтагидан пул аримайди. Герцогиня хоним сенга пойтахтга бормоқчи бўлганимни хабар қилади. Бу сенга маъқулми ё йўқми, ўйлаб кўриб жавоб ёз, у ёққа бориб, фойтонда юрарканман сени шарманда қилмасликка ҳаракат қиламан.

Қишлоғимиз руҳонийси, саргарош, баккалавр ва ҳатто руҳонийнинг ёрдамчиси ҳам сенинг губернатор бўлганингга сира ишонимсиз, буларнинг бари шайтоннинг васвасаси ёки дон Кихотнинг ҳамма саргузаштлари каби сеҳргарлик дейишяпти. Самсон бўлса олдига бориб, бошидаги бу кўкнори ҳаёл губернаторликни, дон Кихотнинг миясидаги телбаликни улоқтириб ташлайман дейди, лекин мен унинг гапларидан кулиб, бўйнимдаги марваридга қараб-қараб қўяман ва сен юборган овчилар кийимидан қизимга қанақа кўйлак чиқишини чамалайман.

Мен герцогиня хонимга озгина чўчкаёнгоқ юбордим, очиғини айтсам, уларнинг соф олтидан бўлиб қолишини истардим. Агар оролингдагилар дур тақшиса, бир нечтасини юбор. Қишлоғимиздаги янгиликлар қуйидагича. Берруэна қизини қишлоғимизга аллақайёқлардан келган, ким нимани буюрса ўшани чизиб-чаплайверадиган бир лапашанг расомга узатди. Дон Педронинг ўғли бўлса бир амаллаб унвон олиб, энди диний унвон олишга тайёрланяпти. Бундан Минго Сильватонинг невараси Минтилья хабар топиб, арз қилти, чунки у Минтильяга уйланаман деб сўз берган экан.

Бу йил зайтун ҳосил бермади, бутун қишлоқдан бир томчи сирка излаб тополмайсан.

Санчика тўр тўқияпти, ҳар куни нақд саккиз мараведис пул топиб, қутгичага солиб ўзига сеп ҳозирляяпти. Худога шукрлар бўлсинким, энди унинг бу ҳақда қайғуришининг ҳожати йўқ.

Майдончамиздаги фонтаннинг суви қуриб қолди, доримизни яшин уриб куйдириб юборди, илоё бошқа жойдагилари ҳам шундай бўлсин.

Пойтахтга боришим ҳақида қандай фикрда эканингни орзиқиб кутаман; илоё тангри мендан кўра сенга зиёдроқ умр ато қилсин ёки кам деганда сени бу фоний дунёда ёлғиз ташлаб кетгим келмагани учун менинг умримни берсин.

*Хотининг Тереса Панса.*

Бу мактублар тингловчиларни завқлантирди, кулгиларини қистатди, уларнинг олқишларига сазовор бўлди ва ҳайратга солди. Шундан кейин герцогиня маҳраמידан Санчонинг қишлоғида қандай ҳодисалар бўлганини сўраб-суриштиргани чиқиб кетди, маҳрам унга ҳаммасини батафсил ҳикоя қилиб берди, бундан ташқари у герцогиняга Тереса бериб юборган чўчкаёнгоқ билан пишлоқни ҳам топширди. Герцогиня буларни бажонидил олди, шу ерда биз буюк Санчо Пансанинг губернаторлик ҳукмронлиги қандай тугаганини ҳикоя қилмоқ ниятида у билан хайр-маъзур қиламиз.

САНЧОНИНГ БАРАТАРИЯ ОРОЛИДАГИ ХУКМРОНЛИГИНИНГ ДАВОМИ ВА  
ГУБЕРНАТОРЛИГИНИНГ ҚАЙҒУЛИ ТУГАШИ

Санчо ўзига идора қилиш учун топширилган оролни мулозимлари билан бирликда айланиб, кўздан кечириб чиқиб, саройга қайтди-да, шу замоноқ уйқуга кетди, у бугунги бурчини адо этганидан мамнун бўлиб, эрталабгача мириқиб ухлади. Санчо Пансанинг гаплари ва хатти-ҳаракатидан ҳайратга тушган баковул эса туннинг қолган қисмини ўз хўжайинларига хат ёзиш билан ўтказди. Ниҳоят, губернатор жаноблари ҳам уйғондилар. Доктор Педро Ресионинг буйруғига биноан унга нонуштага озгина мураббо билан уч-тўрт томчи совуқ сув келтиришди — буларнинг барини Санчо бир бурда нону бир бош узумга жон-жон деб алишган бўларди. Аммо кўнгли ҳар қанча ранжимасин, қорни қанчалик таталамасин, бу парҳезга риоя қилишга мажбур бўлди, чунки Педро Ресио енгил овқат кишининг фикрлаш қобилияти ва зеҳнини ўстиради, жисмоний иш қилмай ақлий меҳнат билан шуғулланувчи катта лавозимдаги улуг зотларга шундай овқат муносибдир деб ишонтирган эди.

Санчо очликдан азобланир, ичида губернаторликка ва ҳатто уни инъом этганларга лаънатлар ўқирди. Шунга қармай, мураббонинг ўзинигина танаввул қилиб, қорни очлигича қолаверган бўлса-да, у бугун ҳам суд ишлари билан машғул бўлди. Биринчи бўлиб бир келгинди унинг ҳузурига кириб, баковул ва бошқа мулозиму хизматкорлар ҳозирлигида Санчога шундай илтимос билан мурожаат қилди:

— Сеньор, жуда муҳим ва жуда чалкаш бир иш юзасидан маслаҳат сўрагани келдим. Бир катта амалдорнинг мулкидан серсув дарё оқиб ўтади; унда кўприк ёнига дор қурилган ва бир бино солинган. Бу бинода тўртта судья иш кўришади. Бу судьялар ер эгаси томонидан эълон қилинган қонунларнинг қатъиян бажарилишини назорат қилиб туришлари лозим. Бу қонунда шундай дейилади: «Ушбу кўприкдан ўтувчи ҳар бир кимса қасамёд этиб қаёққа ва нима мақсадда кетаётганини айтишга мажбур. Агар у ростини айтса, ҳеч қандай монеликсиз ўтказиб юборилади, башарти ёлғон гапирадиган бўлса ўлимига ҳукм этилиб, кўприк ёнидаги дорга осилади». Ана шу шафқатсиз қонун эълон қилингандан буён кўприкдан озмунча одам қатнамади, йўловчиларнинг ҳақ гапираётганлари аниқланган замоноқ судьялар уларни, тўрт томонинг қибла, хоҳлаган тарафинга кетавер, деб қўйиб юборишарди. Яқинда аллақандай бир йўловчи қасамёд этиб, мени ана шу дорга осинлар деб келдим бу ерга, дебди. Унинг бу қасамёди судьяларни додиратиб қўйибди, улар қуйидагича мулоҳаза юритишибди: «Агар биз бу одамни қўйиб юборсак, унда йўловчи ёлғон қасам ичган бўлади, у ҳолда қонун бўйича осилиши лозим. Борди-ю, осишга ҳукм қилсак, унда йўловчи тўғрисини гапирган бўлиб чиқади,

чунки у, бу ерга осинглар деб келдим, деб қасам ичди — бинобарин, яна юқоридаги қонунга биноан у озод этиб юборилиши керак». Ана шу масалада мен сиз билан маслаҳатлашиб, мухтарам губернатор жаноблари, судьялар бу одамни нима қилсинлар, деб сўрамоқчийдим, чунки судьялар шу дамгача нима қилишларини билмай хуноб бўлиб ётишибди. Сиз мухтарам жанобларининг буюк ақл, ўткир зеҳн эгаси эканлигингизни эшитиб, улар мени ўз номларидан бу чалкаш ҳамда мужмал иш юзасидан сиз марҳаматли жанобнинг ҳукмингизни билгани ҳузурингизга юборишди.

Санчо шундай жавоб қилди:

— Менимча, бу ишни икки калима сўз билан ҳал қилса бўлади, мана бундай қилиб. Уша одам, мени осинглар деб қасам ичган. Шундай қилиб, агар осилса ичган қасами ҳақ бўлиб чиқади, шунинг учун уни қўйиб юбориш керак. Лекин уни қўйиб юборилгудек бўлса, у пайтда ичган қасами ёлғон бўлиб, дорга осилиши лозим бўлиб қолади.

— Жаноб губернатор жуда тўғри гапиряптилар,— деди судьялар юборган вакил,— сиз бу ишни, шубҳасиз, жуда яхши тушуниб, мағзини чақибсиз.

— Шундай экан,— деди Санчо,— судьялар у одамнинг рост гапирган бўлагини қўйиб юборсинлар-у, ёлғон гапирганини осийсин: ана шундай қилинганда қонунга қатъиян риоя қилинган бўлади.

— Унақада, губернатор жаноблари, у одамни икки нимта — ростгўйини бир нимта, ёлғончисини бир нимта қилиб нимталаш керак-ку, бу ҳолда унинг ўлиши муқаррар, қонун бузиладик-ку,— деб эътироз билдирди вакил.

— Гапимга қулоқ солинг, қимматли сеньор,— деди Санчо,— мабодо менинг миям айниб қолмаган бўлса, ўйлайманки, ўша йўловчингизнинг ўлимга қанчалик асоси бўлса, ҳаёт қолиш ва кўприқдан ўтишга ҳам ўшанча асоси бор — чунки ёлғон гапиргани уни қанчалик ўлимга маҳкум этса, ҳақ гапиргани унга шунчалик ҳаёт эҳсон қилади. Шунинг учун ҳам сизни бу ерга жўнатган жанобларга менинг номимдан бориб айтинг-ким, ўша йўловчига озодлик бахш этишсин, чунки яхшилиқ қилиш ёмонлик қилишдан кўра ҳаммавақт кўпроқ мақтовга лойиқдир. Агар саводим бўлганида бу қарорнинг остига ўзим имзо чекардим. Бу гапларнинг барини ўз миямдан чиқариб айтаётганим йўқ, хўжайиним дон Кихотнинг бу оролга келишим арафасида қилган насиҳатларидан бири шунчаки эсимга келиб қолди, холос. У менга шубҳали, мужмал ишларда раҳм-шафқат йўлидан бориб, марҳаматли бўлишимни насиҳат қилган эди.

— Губернатор. жаноблари,— деди баковул,— бу ишни энг машҳур қонуншунослардан ҳам ортиқроқ қилиб, донишмандлик ва фозиллик билан оқилона ҳал этдингиз. Шу билан эрталабки мажлисимизни тугатсақ, мен ҳозирроқ жаноб губернаторни кўнгиллари тусаган таомлар билан зиёфат қилишларини буюраман.

— Шуниси керак-да, менга, очигини айтсам! — деди Санчо жонланиб. — Аввал қорнимни тўйғазинглар, кейн майли, бунақа чалкаш ва мужмал ишлар дўлдай ёғилиб турса ҳам бирпасда қотириб ташлайман.

Санчодек ақли губернаторни оч қўйиб тинкасини қуритаётгани учун баковул виждонан азоблана бошлаган эди, ана шу боисдан у Санчо Пансани яхшилаб зиёфат қилиб, шу куни кечқуруноқ сўнгги масхарабозликдан кейн бу антиқа томошага барҳам бермоққа аҳд қилди.

Шундай қилиб, ўша куни Санчо тиртеафураллик докторнинг кўрсатмаларига хилоф равишда бўкиб қолгудек мириқиб овқатланди.

У энди дастурхон ёнидан тураман деган пайтда чопар дон Кихот номидан губернаторга мактуб олиб келиб қолди. Санчо котибга, аввал ичингда ўқиб чиқ, агар хатда махфий сақланиши лозим бўлган хабар йўқ бўлса, овозингни чиқариб ўқи деб буюрди. Котиб Санчонинг айтганини бажо келтириб, аввал хатга кўз югуртириб чиқди-да:

— Бу мактубни эшиттириб ўқиб берса бўлади, чунки дон Кихот жанобларининг сиз жаноби олийларига ёзган гапларини ҳамманинг эътиборига етказиш учун уни олтин ҳарфлар билан бошиб чиқариш лозим экан, у мана бундай деб ёзибди:

**Ламанчлик дон Кихот жанобларининг Баратария оролининг губернатори Санчо Пансага мактуби:**

*Дўстим Санчо, мен ҳаммавақт сенинг ноўрин хатти-ҳаракатинг ва йўл қўйган хатоларинг ҳақида бирор гап қулоғимга чалиниб қолмаса гўрга эди, деган хавотирда эдим. Лекин, аксинча, ҳамма сенинг фаҳм-фароситинг ва ўткир зеҳнингга тасанно ўқиб мақтаяпти. Бу гапларни эшитиб, гўннга беланиб ётган бир бечора камбағални шундай кўкларга кўтариб мақтагани ҳамда бир калтафаҳм, бефаросат кимсани шу қадар донолик чўққисига миндиргани учун тангрига ҳамду санолар ўқидим. Менга айттиларича, сен ҳақиқий инсонлардек ҳокимлик қилаётган эмишсан, шунингдек, камтаринлик ва баодоблик намуналарини кўрсатиб, шахсий эҳтиёжларингни қондиришда худди тилсиз жониворлардай сабрқаноатли эмишсан. Яна шу нарсани айтиб қўймоғим лозимдирки, ҳоким одам обрў-эътиборни мартабасига муносиб равишда сақламоқ учун кўпинча ўз хоҳиш-иродасига тамоман қарши иш тутмоққа мажбур бўлади. Шунинг учун ҳам ўзингнинг ҳаддан зиёд жўн ҳамда ярамас хатти-ҳаракатларингни, диди пастлик нуқсонингни йўқотишга ва ўзингнинг юксак мавқеингга муносиб тутишга ҳаракат қил. Одамга либос, эшакка тўқим деганларидек, ҳамиша яхши кийиниб юр. Бу билан ҳар турли бачкана кийимлар кийиб, минг хил бемаза нарсалар тақиб ясаниб-тусаниб юр демоқчи эмасман. Асло ундай эмас! Лекин ўз мартабангга муносиб уст-бош кий, шуни ҳам унутмаки, у доим чинидай озода ва покиза бўлсин.*

Қўл остингдаги фуқароларингга ёқиш ва уларнинг ҳурмат-эътиборини қозонмоқ учун қуйидаги икки қоидага амал қил: биринчидан, ҳамма билан хушмуомалада бўл, иккинчидан фуқароларингнинг ҳамиша қорни тўқ, усти бут бўлсин, чунки ҳеч нарса камбағалларнинг ғзабини очлик ва муҳтожликчалик қўзғаб, ғалаёнга келтиролмайди.

Ҳар хил буйруқ ва фармонлар чиқараверма, борди-ю, шундай қиладиган бўлсанг бамаъни ва ўринли бўлишига, энг муҳими уларга риоя қилишлари ҳамда бажаришларини назорат қилиб туришга ҳаракат қил. Башарти қонунларга риоя қилинмаса, унда фуқароларингнинг кўнглига ҳокимимизнинг бу фармойишларни чиқаришига ақли етибди-ю, амалга ошишини назорат қилиб боришга қўли қисқалик қилиб, ҳукми ўтмабди-да, деган фикр туғилади. Шу нарса ёдингда бўлсин, энг қаттиқ, энг шафқатсиз қонунлар, агар у бажарилмаса, унга риоя қилинмаса, қонун чиқарган ҳоким анави қурбақаларга подшо бўлиб олган аҳмоқнинг кўнига тушади: олдин ундан қўрқшади, кейин эса нафратланишади, назар-писанд қилмай қўйишади. Айни вақтда доим бирдек қаттиққўл бўлиш ҳам ҳамиша оққўнғил ва мулойим бўлиш сингари ярамас бир ҳол: ана шу икки йўлнинг ўртасидан бор. Чинакам донишмандлик, энг оқилона йўл шу. Турма, кушхона ва бозорларни бориб кўр, яхшилаб кўздан кечир, бу жуда муҳим масала: шундай қилганингда ўз ишларининг тез кунларда ҳал бўлишини интизорлик билан кутиб ётган маҳбусларнинг кўнгли кўтарилади, сени кўриб қассоблар қўрққанларидан тарозини тўғри тортадиган бўлишади, бозордаги қаллоб чайқовчи хотинларни йўқотасан. Оролга жўнашинг арафасида ёзиб берган ўғитларимни ёдингда тут, шунга қараб, йўлаб иш юрит. Агар ўша насиҳатларимга амал қилсанг губернаторлар ҳар қадамда йўлиқиб турадиган ҳар қандай оғир ва мушкул аҳволдан қутулиб кетишингга беҳад ёрдам беражагига ишонч ҳосил қилурсан. Герцоғ билан герцогиняга ўз миннатдорчилигингни юбор, чунки қадр билмаслик, яъни нонкўрлик — мағрурлик арзандасидир, оламда мавжуд бўлган гуноҳларнинг энг азимидир, лутф айлаб яхшилик қилган одамга нисбатан миннатдорчилик билдирган кимса ўзининг яхшиликни билувчи, тангнинг кўрсатган марҳаматига шукроналар ўқувчи олижаноб киши эканлигини намойиш қилади.

Сеньора герцогиня хотининг Тереса Пансага чопар орқали кўйлак ва махсус совға-салом бериб юборди. Ҳол-аҳволларинг қандайлигини менга батафсил ёзиб юбор. Бу ишни тезроқ бажар, чунки мен тез орада бу дабдабали ҳаётни тарк этмоқчиман, зотан мен бунақа дабдабали саройда яшаш учун туғилган эмасман.

Алвидо, дўстим, қодир эгам кўнглингга шафқат солсин, одамларга зулм қилишдан ўзи асрасин.

Дўстинг  
ламанчлик дон Кихот.

Санчо дон Кихотнинг мактубига зўр диққат билан қулоқ солди, шу ерда ҳозир бўлганларнинг ҳаммаси бир оғиздан мактубни жуда оқилона ёзилган деб мақташди. Кейин Санчо ўрнидан турди-да, котибни ёнига олиб, ётоғига кириб кетди; у ишни орқага чўзиб ўтирмай, ўз хўжайини дон Кихотга шу заҳотиёк жавоб ёзиб юбормоқчи бўлди. У котибга айтиб туриб қуйидаги мазмунда хат ёздирди:

### **Санчо Пансанинг ламанчлик дон Кихотга мактуби:**

*Ҳозир ташвиш ва ишим ошиб-тошиб ётибдики, бош қашигани, ҳатто ўсиб кетган тирноғимни олгани қўл тегмайди.*

*Ана шу важдан оролда қандай яшаётганим ҳақида сизга ҳанузгача мактуб ёза олмаганим учун жаҳлингиз чиқмаслигини ўтиниб сўрайман, қимматли сеньор. Шу кунларда мен бу ерда иккаламиз биргаликда ўрмону саҳроларда кезиб юрган вақтлардагидан ортиқроқ очлик азобини тортяпман.*

*Кунни кеча жаноб герцогдан мактуб олдим. У оролга мени ҳалок этиш мақсадида аллақандай жосуслар борганмиш деб ёзибди. Мен ҳозирча фақат биргина жиноятчини аниқлай олдим, холос, у ҳам бўлса бу ерга келган ҳамма губернаторларни жонидан тўйдириб, безор қилувчи бир табибдир, у шу хизмати эвазига маош оларкан, унинг исми шарифи Педро Ресио, ўзи тиргеафүэралик экан, тақсир ўзингиз бир ўйлаб кўринг-а, бу қанақа исм бўлди! У яна одамни нобуд қилиб қўймасин деб азият чекмай бўладими? Бу табиб, менинг ишим касални даволаш эмас, балки унинг олдини олишдир, деб минғиллагани минғиллаган, дори-дармон ёзиб бериш ўрнига нуқул парҳез қилишни буюради, шунинг учун ҳам унинг беморлари бунинг оқибатида эти устихонига ёпишиб қоқсуяк бўлиб қоладилар, ахир ориқлик ҳар қандай касалликдан ҳам бешбаттар-ку. Хуллас, у очликдан тинкамни қуриятпти, ғазабим қайнаб, жоним ҳиқилдоғимга келиб қолди. Мен тентак, губернатор бўлиб олганимдан кейин бошлаб мазали овқатлар ейман, танам яйрайдиган ҳузурбахш муздеқ ичимликлар ичиб роҳат қиламан, голландча чойшабу паргўшакларда мацца қилиб ётаман деб чучварани хом санаб юрган эканман, бунинг ўрнига аллақандай қаландарларга ўхшаб жуда қашшоқ кун кечиряпман.*

*Ҳанузгача бирон чақа солиқ тушгани ҳам, бирон танга пора олгани ҳам йўқ. Нима гаплигига сира ақлим етмай қолди, бу ерлик одамлар одатда оролга бирон янги губернатор тайинланадиган бўлса, у етиб келмасидан бурун орол аҳолиси унга анча-мунча пул совға қилиб юборади ёки қарзга беради, бундай одат фақат бизнинггина губернаторларга расм бўлмай, балки умуман барча ҳукмдорлар ҳам шундай қилишади, дейишади.*

*Муҳтарам жанобларининг насиҳат ва йўл-йўриқларига амал қилиб бозорларга бориб турибман, кеча бир ёнғоқфуруш хотинни кўрдим, у янги ёнғоқ сотаётган экан, қарасам, янги ёнғоққа пучқоқ, қуртлаб кетган эски ёнғоқларни аралаштириб сотапти,*



буни пайқаб қолиб, ёнгоқларни мактаб болаларига улашиб беришни буюрдим,— ахир болалар ёнгоқларнинг пуч ё тўқлигини бирпасда ажратиб ташлашади-да,— ёнгоқфуруш хотиннинг бозорга чиқишини икки ҳафтагача май қилиб қўйдим. Одамларнинг фикрича тўғри иш қилибман. Елғиз сиз марҳаматли жанобимгагина бир нарсани айтмоқчиман: бу ерлик халқнинг фикрича бозорчи аёлларнинг барчаси оламдаги энг ярамас аёллар, чунки уларнинг ҳаммаси беномус, шарм-ҳаёсиз, тошбағир ва безбет, мен ҳам бу фикрга қўшиламан, чунки бошқа шаҳарларда ҳам бунақаларнинг кўпини кўрганман.

Герцогиня хонимнинг маҳбубам Тереса Пансага мактуб ёзгани ва сиз тақсирим айтган совға-саломни юборганидан беҳад миннатдорман. Вақти келиб мен герцогиня хонимга ўз миннатдорчилигимни билдиришга ҳаракат қилурман, муҳтарам жанобим, мен учун у улуғ хонимнинг қўлларини ўпиб қўйинг ва совғасаломингиз беҳуда кетмайди деб қўйинг, бунга у олий насаб хоним амалда ишонч ҳосил қилажаклар.

Башарти маҳбубам Тереса менга мактуб ёзадиган бўлса, уни йўл кирасини тўлаб, бу ёққа жўнатинг, чунки уй-жойим, бола-чақамнинг ҳол-аҳволи қандайлигини билишни жуда-жуда истайман. Илоҳо тангри сиздек жанобимни ёвуз сеҳргарлар таҳдидан асрагай, гарчанд бунга ишонмасам-да, чунки табиб Педро Ресионинг менга кўрсатаётган ғамхўрлиги шарофати билан бу ердан эсон-омон қутулиб кетолсам керак деб ўйлайман, илоҳо губернаторлик муддатимни соғ-саломат тугатай.

*Марҳаматли жанобларининг содиқ қуллари губернатор  
Санчо Панса.*

Котиб мактубни сурғичлаб, келган чопарни ўша заҳотиёк жўнатиб юборди-ю, эшик оғаси ва баковул ҳузурига жўнади. Санчонинг губернаторлигидек масҳарабозликни тугатиш муддати етганди, ана шунинг учун улар ўзаро кенгашиб, буни қандай қилиб амалга оширилса маъқулроқ бўлишини маслаҳатлашиб олишди. Санчо бўлса бу кеч орол аҳолисининг фаровонлигини янада юксалтириш умидида янги фармонлар ижод этмоқда эди. У озиқ-овқат моллари савдоси устидан қатъий назорат белгилади, ҳар тарафдан вино олиб келиб сотишга руҳсат бериб, бу ишда ҳар қандай қаллоблик ва товламачилик қилганларга қарши қаттиқ жазо чораларини белгилади; пойабзал нархини айниқса унинг фикрича жуда қиммат бўлган бошмоқ нархини пасайтирди; хизматкорларга тўланадиган маош миқдорини белгилади: кўзи ожизларнинг ҳар турли мўъжизалар ҳақида куйлашларини ман этиб, агар улар бу мўъжизаларнинг дарҳақиқат содир бўлганини исботлай олмасалар уни куйламасинлар деб фармойиш берди; камбағал бечоралар ҳолидан хабардор бўлиб туриш мақсадида альгвасил лавозимини таъсис этди, у камбағалларни таъқиб этмай, балки уларнинг чиндан ҳам қашшоқ эканликларини текшириш лозим, зотан кўпинча майиб-

мажриқ жойларини ҳамда яра-чақаларини рўкач қилиш, ҳамма-нинг раҳмини келтириш замирида ўғирлик ва майхўрлик иллоти яширинган бўлади. Хулласи калом, у аллақанча ажойиб фармойишлар ижод этдики, бу фармойишларга ўша юртларда то шу кунга қадар амал қилинади ва у буюк Санчо Пансанинг қонунлари деб аталиб келинади.

Буюк губернатор ҳозирча ўзининг оқилона қонун-қоидалари устида бош қотираркан, бу ёқда унинг тақдири ҳал қилин-моқда эди. Ҳаёт, тақдир ўзгармас, қотиб туради, деб ўйлаш ярамайди. Аксинча, оламдаги ҳамма нарса ҳаракатда, ўз ўқи теварагида айланади. Баҳордан кейин ёз келади, ёздан кейин куз, куздан кейин қиш, қишдан кейин эса яна баҳор — ана шундай қилиб вақт бетўхтов ўтаверади, ҳаракатининг чеки-чегараси йўқ, чархпалакдек тинимсиз айланаверади. Инсон умри ўз интиҳоси томон шамолдан тезроқ елади, ҳеч ёққа қарамайди, ҳеч нарсага қулоқ қоқмайди. Биз бу гапларни ўз донишманд-лигимизни кўз-кўз қилиш ва таҳсинга лойиқ бўлиш учун айтаёт-ганимиз йўқ, балки Санчо Пансанинг таърифи оламга таралган губернаторлик даврининг қанчалик тез тугаганини, инқирозга юз тутганини ва тутундек тарқалиб кетганини китобхонга етказ-моқчимиз, холос.

Ўз ҳукмронлигининг еттинчи кечасида Санчо қорнини нону вино билан эмас, балки суд ҳукмлари чиқариш, фармойиш ҳамда қонунлар чиқаришдек машаққатли ишлар билан тўйгазган ҳолда ётарди ўрнида. Қорни ғоятда оч бўлишига қарамай энди уйқу элтиб бораётган бир пайтда қулоқни батанг қиладиган шовқин-сурон ва қўнғироқларнинг жаранг-журунги эшитилди, унинг назарида бутун орол ағдар-тўнтар бўлиб кетаёт-гандек туюлди. У қаравотида ўтириб, бу олағовурнинг сабабини англашга ҳаракат қилиб диққат билан қулоқ сола бошлади. Лекин ҳеч нарсага тушунолмади, чунки кўп ўтмай шовқин-сурон ва қўнғироқлар садосига карнай ҳамда дўмбираларнинг гумбури жўр бўла бошлади, бу ҳол Санчонинг янада ўтқасини ёриб юборгудек бўлди. Шунда у ўрнидан сакраб турди-да, уй зах бўлгани учун оёғига кавушини илиб, камзулини елкасига ташлаб улгурмаёқ эшик олдига югуриб бориб, очиб юборган-ди, қўлларида машъала ушлаб, қиличларини яланғочлаб олган оломоннинг бостириб келаётганига кўзи тушиб кўрқиб кетди. Оломон овозини барала қўйиб қичқириб келарди:

— Қуролланинг, қуролланинг тезроқ, жаноб губернатор! Оро-лимизни ёв босди, ўзингиз жасорат ва маҳорат кўрсатмасангиз омон қолмаймиз, ҳаммамиз ҳалок бўламыз.

Шундай дея жазавага тушган оломон бақириб-чақириб, шовқин солиб, кўриб турган ва эшитганларидан ҳангу манг бўлиб эсанкираб қолган Санчонинг ётоғига бостириб кирди. Улардан бири:

— Ҳалок бўлмайин, орол хароб бўлмасин десангиз, тезроқ қуролланинг, сеньор! — деб қичқирди энтикиб.

— Қуролланиб нима қиламан? — деди Санчо. — Қуролланга-

нимда қўлимдан нима келади? Бунақа ишни хўжайиним дон Кихот жаноблари ўрнига қўядилар. У киши бир зарб билан ҳамма душманларни забун қилган, ҳаммамизни хатардан халос этган бўлурдилар, мен бир гуноҳкор бечора ҳарбий ишда ҳеч ниманинг фарқига бормайман.

— О, губернатор жаноблари, — деди бошқа биров, — бу қандай журъатсизлик! Тезроқ, қуролланиб, майдонга чиқинг, муҳтарам жаноб, бизга йўлбошчи бўлинг, губернаторимиз бўлганингиз учун ҳам бу унвон сизга мансуб.

— Ундай бўлса, қуроллантиринг мени! — деди Санчо маъюслик билан.

У шундай деган заҳотиёқ жангчилар иккита қалқонни ола солиб, Санчонинг уст қўйлагини кийишга ҳам йўл қўймай, бирини олдига, иккинчисини орқасига қилиб, арқон билан шундай чирмаб ташладиларки, бечора губернатор на тиззасини бука олар, на бирор қадам юра оларди. Унинг қўлига найза тутқиздилар, йиқилиб кетмаслик учун ана шу найзага таяниб қолди. Кейин бирон дақиқани ўтказмай, шу ондаёқ қўшинга қўмондонлик қилинг, олдинги сафга ўтиб, жангчиларга далда беринг, дейишди унга. «Вашарти улуғ губернаторимиз раҳнамо бўлиб, машғала каби йўлимизни ёритиб бизни жангга бошлаб борсалар, ишимиз ўнғидан келади», дейишарди улар бараварига.

— Манави лаънати қалқонлар қимир этгани йўл бермаса қандай қилиб юрай мен шўрлик! — деди Санчо. — Мени даст кўтариб бирорта дарвоза ёки эшик олдига олиб бориб қўйинглар, мен душман ҳамласини найза билан қайтариб, йўлига танамни қалқон қилай.

— Қани, юра қолинг, сеньор губернатор, — деди жангчилардан бири, — юришингизга қалқонлар эмас, қўрқоқлик халал беришти дейман. Тезроқ бўлинг, фурсат ўтиб кетяпти, ёв тобора кўпаяпти, эшитяпсизми, уларнинг шовқин-сурони борган сайин кучайяпти, хавф тобора ортяпти.

Оломон уни шунчалар шошилтириб, шунчалар койий бошладики, бечора губернатор ниҳоят юришга уриниб кўрди, бир одим ташламасданоқ зарб билан ағдарилиб тушди, назарида этлари парча-парча бўлиб бурдаланиб, атрофга сочилиб кетгандай бўлди. У шу ҳолатда, қопқоқлари орасида қисилиб қолган тошбақа ёки ичига қум тўлиб қолган қайиқдек, қаддини рост-лолмай узала тушиб ётаверди. Атрофдаги масхарабозларнинг ҳатто шунда ҳам тирноқча раҳмлари келмади унга, ачинмадилар ҳам. Улар қўлларидаги машғалларни ўчириб, янада бешбаттароқ шовқин сола бошладилар, Санчони тепкилаб, топтаб, тезроқ қуролланинг деб бақиришиб, унинг қалқонларига қиличлари билан бетиним туширавердилар. Бошини қалқонлар ичига тортиб, ғужанак булиб олмаганида, бахти қаро губернаторнинг ҳолига маймунлар йиғларди. Топталган, нафаси бўғзига тиқилиб қолган, терлаб-пишиб кетган Санчо ўзини худонинг паноҳига топшириб, ўзинг соғ-саломат асрагин деб чин юрагидан тангрига илтижо қилиб ётаверди. Тўс-тўполон кучайгандан-кучайиб бо-

рарди. Баъзилар унга атайин қоқилишар, бошқалари тўппа-тўғри унинг устига йқирилишар, бир сўлоқмондай йигит эса худди қўриқчи минорасига чиққандек, Санчонинг кўкрагига чиқиб олди-да:

— Эй, бизникилар, бу ёққа югуринглар! Ёв бу томондан жуда қисти-бастига оляпти. Манави эшикни тўсинглар! Дарвозани беркитинглар, зинапояларга ходлар ташлаб, йўлни тўсиб қўйинглар! Қатрон қайнатилаётган хумларни келтиринглар, қайнаб турган ёғларни олиб келинглр... кўчаларга баррикадалар қуринглар, минорага чиқиладиган йўлни бекитиб ташланглар! — деб қичқираверди овози борича.

Тўс-тўполонга қулоқ соларкан, бусиз ҳам ўтакаси ёрилгудек қўрқиб кетганидан чалажон бўлиб ётган Санчони тобора ваҳима босмоқда эди.

«Эй худо, қани энди ироданг билан шу оролни тезроқ ёв эгалласа-ю, мен ё тезроқ оламдан ўтсам, ё бу даҳшатли манзарадан тезроқ қутулсам!»

Ниҳоят унинг бу илтижоси, оқи-зори мустажоб бўлди чоғи. У энди тамом бўлдим деб умидини узган бир пайтда:

— Ғалаба, ғалаба қозондик, ёв чекинмоқда! Эй, губернатор жаноблари, туринг ўрнингиздан. Зафар шарбатидан тотмоқ ва сиздек соҳибқирон ҳамда энгилмас сардоримиз раҳнамолигида ёвдан олинган ўлжаларни бўлишиб олмоқ фурсати етди! — деган хайқариқлар янгради.

— Ўрнимдан турғазиб қўйинглар ахир, — деди қийналиб кетган Санчо аранг.

Уни ўрнимдан турғазиб қўйишди, қаддини ростлагач:

— Қўлга тушган ўлжаларингизнинг падарига лаънат! Билганингизни қилинглр, башарти орангизда бирор дўст одам топилгудек бўлса бир қултум вино келтиришини ўтиниб сўрайман, томоғим қақраб кетди-қу, кейин теримни артиб қўйишни илтимос қиламан, йўқса оғзи-бурним терга тўлади ҳозир, — деди.

Ҳамма ёғини артиб-суртишди, вино олиб келиб беришди, кейин қалқонларини ечиб ташлашди. Турткилаш ва тепкилашдан тинка-мадори қуриган Санчо бошдан кечирган ваҳима ҳамда қўрқув натижасида ҳушдан кетиб каравотга шилқ этиб тушди. Бу ҳангомани бошлаган масхарабозлар ҳазилимизнинг оқибати зилга айланиб кетмаса эди, деб қўрқиб кетишди, аммо уларнинг безовталаниши кўпга бормади: губернатор тезда ҳушига келиб, соат неча бўлди деб сўради; унга тонг отиб қолди деб жавоб беришди. У индамай кийина бошлади. Нима қиларкин деб, бошқалар ҳам чурқ этмай тикилиб туришарди. Санчо кийиниб бўлиб, аста-аста юриб отхона томон йўл олди, чунки роса тепки еганидан оёғини кўтариб босишга ҳам мадори етмай қолганди. Барча аёну мулозимлар унга эргашишди. Отхонага кириб, у эшаги ёнига борди-да, бўйнидан қучоқлаб меҳр билан пешонасидан ўпди, кўзларига ёш олиб:

— Оғир ва мусибатли кунларимни энгил қилган ҳамдардим, кўмакдош дўстим, кел, яна бирга бўлайлик. Бутун фикру ёдим

сен билан, сени қорнингни тўйгазиш ва абзалларингни ямаб-ясқаш билан банд бўлган дамлар, сен билан бирга ўтказган кунларим, йилларим ҳаётимдаги энг бахтиёр дамлар экан. Сендан ажралиб, шон-шавкат ва ифтихор минорасига чиқиб олганимдан буён минг бир балоларга, мушкिलоту машаққатларга гирифтор бўлдим, — деди.

Шундай дея у эшагини эгарлайверди. Ҳеч ким чурқ этмас, ҳаммалари индамай туришарди. Эшагини эгарлаб бўлгач, Санчо инқиллаб-синқиллаб унга миниб олди-да, баковул, котиб, эшик оғаси, табиб Педро Ресио ва шу ердагиларнинг ҳаммасига қараб бундай деди:

— Четроқ турунглар, муҳтарам сеньорлар. Менга халал берманглар. Энди кўзим очилди, оламдан ўтган эканман, қайтадан жон битди менга, аввалги эркин ва беташвиш ҳаётимга қайтмоқни истайман. Мен губернаторлик қилиш, орол ва шаҳарларни душмандан ҳимоя қилиш учун туғилган эмасман. Менга қонунлар чиқариш, орол ва шаҳару мамлакатларни ҳимоя қилишдан кўра ер ҳайдаб, экин экиш, ток ўтқазиб, уни парвариш қилиш кўпроқ ярашади. Эндиликда ҳар ким қўлидан келадигани билан шуғулланиши лозим эканини яхши англаб олдим. Қўлларим губернатор асосини тутгандан кўра, ўроқ тутгани маъқулроқ, бир сурбет табибнинг очдан ўлдираёзган парҳезларидан азоб чеккандан кўра, бўкиб қолгунимча тўйиб овқатланганим афзалроқ. Бу губернаторлик зиндониди голландча чойшабда чўзилиб ётишу сувсар тери пўстинларга ўралиб юришдан кўра, ёзда эман дарахти соясида қоқ ерга ағанаб ётишу қўй терисидан қилинган пўстакка ўралиб юриш минг бора афзал деб биламан. Сизларни худонинг паноҳига топширдим, муҳтарам жаноблар, сеньор герцогга, у онадан қандай туғилган бўлса, шундайлигича кетди, ҳеч нарса ютмади ҳам, ютқизмади ҳам, деб қўйинглар. Яна шуни ҳам айтиб қўяйки, одатда губернаторлар бошқачароқ иш тутишларига қарамай, мен бу ерга киссамда қора чақасиз келгандим, қора чақасиз ташлаб кетяпман оролни. Қани энди четланинглар, йўл беринглар менга. Бориб даволанай, назаримда ақалли бирорта қовурғам соғ қолмаганга ўхшайди.

— Сиз ҳеч қачон бундай қилмайсиз, сеньор губернатор! — деди Ресио. — Муҳтарам жанобларига ичган заҳотиёқ жароҳатларига малҳам бўладиган дори бераман. Уни ичишингиз биланок илгариги куч-қувватингиз қайтади, тузалиб кетасиз. Бундан ташқари, ўз хатоимни тузатаман ва кўнглингиз тусаган таомни ейишга руҳсат бераман.

— Вақт ўтди, ҳа, вақт ўтди! — деди Санчо. — Сафарни бир дақиқа кечиктиргандан кўра, чулчут бўлиб қолганим маъқул. Йўк, йўк, бунақанги майнавозлик асло такрорланмайди. Худо ҳақи қасамёд қилиб айтаманки, бу ерда губернатор бўлиб қолмайман, бошқа ернинг губернаторлигини олтин товоққа солиб тутганларида ҳам қабул қилмайман. Бу — қанотсиз кўкка парвоз этиб бўлмаганидек ҳақ гап. Мен, ахир, Пансалар авлодиданман

ку, уларнинг ҳаммаси қайсар, ўз сўзли одам бўлганлар. Зотан улардан бирортаси «тоқ» деган бўлса, бутун оламдагилар «жуфт» деб тасдиқлагани билан ўз сўзидан қайтмаган. Бахтга қарши, душманларимнинг юлқиб тепкилашлари учун мени шундай юксакларга олиб чиққан ўша чумоли қанотидек нозик қанотларим ана шу отхонада қолиб кетсин. Майли, юксакларда парвоз этмай, ерда ғимирлаб юра қолай, майли, оёқларимга антиқа хром кавуш киймай қўяқолай, пешонамга битган ўша қўполдан-қўпол чипта кавушдан қўймасин. У ҳар доим топилади. Тенг тенгги билан, тезак қопи билан дейдилар-ку, ахир! Кўр-пангга қараб оёқ узат, деган матал ҳам бор. Бас, беҳуда гап сотиш етар. Қани, йўл беринглар менга, вақт ҳам кеч бўлиб қолди!

Шунда баковул бундай деди:

— Сеньор губернатор, сизнинг оқилона иш тутишингиз ва христианларга хос феъли-атворингиз биз учун нақадар қадрли бўлмасин, сиздан ажралиш нақадар оғир бўлмасин, бажонидил рухсат беришга тайёرمىз. Бироқ ҳаммага аёнки, ҳар бир губернатор қўл остидаги вилоятни тарк этишдан аввал ҳисобот топширишга мажбур. Ҳазратим, ўн кунлик ҳукмронлигингиз ҳақида ҳисобот топширинг-у, бемалол йўлга тушаверинг.

— Ҳисобот талаб қилишга мени бу лавозимга тайинлаган герцог жанобларидан бўлак ҳеч кимнинг ҳақи йўқ,— деди Санчо.— Унинг ҳузурига бораман ва унга ҳисобот бераман. Унга бу ерга қандай қашшоқ аҳволда келган бўлсам, шундай қашшоқлигимча кетаётганимни ҳам айтаман. Бу эса, оролни фаришталардек ҳалоллик билан бошқарганимнинг энг яхши далолатидир.

— Виждонан айтганда, улуғ Санчо ҳақ!— деди табиб Ресио хитоб қилиб.— Менимча, унга жавоб беришимиз керак, зотан герцог у билан учрашишдан беҳад хурсанд бўлади.

Ҳамма унинг гапини маъқул топиб, Санчога йўлга тушишга рухсат беришди, унга фахрий соқчилар ва сафарга озиқ-овқат оливолишни таклиф этишди. Санчо, эшагимга озроқ сули, ўзимга эса битта тегарак нон билан бир бўлак пишлоқ берсанглар бас, деди, бошқа ҳеч нарсанинг ҳожати йўқлигини, чунки йўли унчалик олис эмаслигини, тезда герцог саройига етиб олажани айтди. Ҳаммалари навбатма-навбат Санчо билан, у эса уларнинг ҳар бири билан кучоқлашиб хайрлашди-да, ўзининг ўткир нутқ ҳамда қатъий ва оқилона қарори билан ҳаммани ҳайратга солиб жўнаб кетди.

## LII БОБ

### САНЧО ПАНСАНИНГ ЎЗ ХУЖАЙИНИ БИЛАН ҚАНДАЙ УЧРАШГАНИ ВА ИККОВЛАРИНИНГ ГЕРЦОГ ҚАСРИНИ ТАРК ЭТГАНЛАРИ

Хурсанд ҳамда айна вақтда сал ғамгинроқ кайфиятда бўлган Санчо ўз губернаторлигини ташлаб, хўжайининг ҳузурига

жўнади. У бутун оламдаги оролларга ҳокимлик қилишдан кўра хўжайини билан бирга бўлишни маъқул кўрарди.

Санчо ўзининг собиқ саройидан ҳали олисга кетиб улгурмасданоқ орқадан аллаким қичқириб уни чақириб қолди. Санчо ҳайрон бўлиб ўгирилиб қараганди, олисда бир йўловчининг қўлини чўзиб, уни чақираётганини кўрди. Синчиклаб қараб, яқинлашиб келаётган йўловчининг маврлар Испаниядан ҳайдаб чиқарилганига қадар<sup>92</sup> уларнинг қишлоғида дўкондорлик қилган мавр Рикотени таниди. Бу учрашувдан севиниб кетган Санчо ўша заҳотиёқ эшакдан сакраб тушди-ю, ошнасини қучоқлаб олди. Улар самимий суҳбатлаша кетдилар. Рикотеда унча-мунча егулик нарса ва вино солинган каттагина фляга бор экан. Улар йўл бўйига ўтириб олишиб, кун бўйи роса чақчақлашишди. Рикоте бошидан кечган барча мусибатларни, ўз ишларини яна йўлга қўйиб юбормоқ ниятида Испанияга яширинча қандай қайтиб келганини сўзлаб берди. Санчо ўз навбатида Рикотега Баратария оролига губернаторлик қилганида қандай оғир қунларни бошидан кечирганини сўзлаб берди. Суҳбат охирида Рикоте Санчодан ўзини маъмурларга тутиб бермаслигини илтимос қилди. Санчо уни тутиб бермасликка сўз берди.

Бу орада қуёш уфққа бош кўя бошлаган эди. Буни кўриб Санчо, аллақачон йўлга тушишим керак эди, деб шошиб қолди. У шоша-пиша Рикоте билан хайрлашиб, эшагига минди-ю, герцог қасри томон ҳайдай кетди. Барибир у қасрга кун ёруғида етиб боролмади.

Ҳаммаёқни қоп-қоронғи тун қамраб олганида ҳам Санчо ҳаммон йўлда эди. У парво қилмай борарди. Ҳозир ёз, ҳаво ҳам яхши, у очиқ ҳавода тунашга аҳд қилди. Тунни ўтказиш учун йўл четидан қулайроқ жой изларкан, бирдан кулранг дўсти билан биргалашиб қоп-қоронғи жарга тушиб кетаётгандай бўлди, юраги шувиллаб орқасига тортиб кетди. Шунда Санчо жаҳаннамга қуладим деб ўйлаб, ўзини тангрининг паноҳига бутунлай топширди. Аммо оқибат у ўйлагандан энгилроқ бўлиб чиқди: шувиллаб икки саржинча пастликка қулаб тушиб, эшаги тикка туриб қолди. Санчо эса унга миниб олганича ўтирарди. У ўзининг аъзойи баданини пайпаслаб кўриб, зиён-заҳмат етмай соғ-саломат қолганига ишонч ҳосил қилгач, худога шукроналар ўқиди. Кейин бировнинг кўмагисиз бу ердан чиқиб кета олармиканман деб ғорнинг деворларини пайпаслаб кўрди. Деворлар сип-силлиқ экан. Санчо жуда хафа бўлиб кетди, кулранг дўстининг юракни эзиб оҳиста инқиллаши айниқса кўнглини бузиб юборди. Бу қулашда Санчога зарар етмаган бўлсада, чамаси, эшак оғирроқ шикастланган эди.

— О, инсон боласи пешонасига қанчалар фалокату мусибатлар битилган-а, унинг бошига қўққисдан қандай маломат тошлари ёғилади-я!— деб фиғон чекди бечора Санчо.— Кечагина губернаторлик тахтида ўтирган одам бугун аллақандай бир ғорда тириклайин кўмилиб ўтиради деб ким айта оларди! Менга ёрдам берадиган, бу жаҳаннамдан қутқазиб оладиган бирор кимса:

на хизматкор, на муте фуқароларим бор, ҳатто бирорта тасо-  
дифий йўловчи ҳам учрамайди-я. Башарти эшагим кўрган жаро-  
ҳатларидан, мен бўлсам бошимга тушган бу мусибатдан юрагим  
ёрилиб оламдан ўтмасак, ана шу лаънати жойда очдан ўлишга  
маҳкум этилганга ўхшаймиз. Хўжайиним дон Кихот жаноблари  
ҳаммани ҳайратда қолдириб Монтесинос ғорига тушганларида  
жуда роҳат қилгандилар. Ғорда у кишига ўз уйларидагилардан  
кўра ортиқроқ иззат-икром кўрсатишган эди. У ерда жанобим  
ажойибот-ғаройиботларни кўрганлар, бу ерда эса қурбақаю илон-  
чаёнлардан бўлак нарса йўққа ўхшайди. О, қандай мусибатларга  
гирифтор бўлдим мен бахти қаро! Тентаклигим ва аҳмоқона ўй-  
ниятларим туфайли ана шунақа кунларга қолдим! Эҳтимол, бир  
кун эмас-бир кун одамлар менинг этлари кемирилган оппоқ  
суякларимни эшагимнинг суяклари билан бирга шу ердан то-  
пишар. Бу суякларни кўриб Санчо Пансанинг ўз эшагидан,  
эшакнинг эса Санчо Пансадан ажралмай, доимо бирга эканли-  
гини билган одамларнинг бари бу ерда ким ҳалок бўлганини  
фаҳмлайдилар албатта. Эҳ, шўримиз қуриди энди! Қандай даҳ-  
шатли ўлим битилган экан қисматимизга! Ўз уйимизда, яқин  
кишиларимиз олдида оёқ узатиш насиб этмаган экан бизга. Ўз  
юртимизда бўлсак, ақалли томоғимизга сув томизадиган, кў-  
зимизни бекитиб қўядиган бирор одам топилиб қоларди. Эҳ,  
дўстим, биродарим, менга қилган шунча хизматларингни яхши-  
лик билан қайтара олмадим!

Санчо Панса ана шундай фиғон чекаркан, эшаги жимгина  
қулоқ соларди, унинг ноласидан бечора жонивор ғамга ботганга  
ўхшарди. Бутун тун ана шундай нолаю фиғон билан ўтди. Ни-  
ҳоят тонг отди, кун ёришиб олам қуёш нурига ғарқ бўлгач, бу  
қудуқдан бировнинг кўмагисиз асло чиқиб кетиш мумкин эмас-  
лигига Санчонинг имони комил бўлди. Шунда у бирор кимса-  
нинг қулоғига чалиниб қолар деб янада баландроқ нола чека  
бошлади. Аммо унинг оҳ-воҳлари кимсасиз дашту биёбонда  
фарёд уришдай бир гап эди; бу жойларда унинг фиғонига қу-  
лоқ соладиган ҳеч зоғ йўқ эди. Санчо энди шубҳасиз ҳалок  
бўларканман деган қарорга келди. Кейин у оҳ-воҳ қилишни,  
ёрдамга қақиритишни йиғиштириб, эшагига қарай бошлади. Эшаги  
эса тумшугини осмонга қилганича чўзилиб ётарди. Санчо бир  
амаллаб ўрнидан туришига ёрдамлашди-да, кейин сафар тўрва-  
сидан бир бўлак нон олиб, эшагига узатди. Эшак жуда суюниб  
кетди, Санчо эса гўё у тушунадигандек:

— Нон ҳар қандай фалокату дардларнинг давоси,— деди  
насихатомуз.

Шу пайт, унинг бахтига, бу зиндон деворларидан бирига  
қуёш нури тушиб ёритди, шунда Санчо деворда аллақандай  
ковак борлигини кўриб қолди. У бу ковакка қорни билан сурғалиб  
кириб, унинг бошқа ғорга олиб ўтадиган йўлак эканига ишонч  
ҳосил қилди. Кейин орқасига қайтиб чиқиб, катта бир тошни  
олди-да, ковак оғзини тош билан уриб кенгайтира бошлади.  
Ниҳоят у ковакни эшак ўта оладиган қилиб кенгайтиришга



муяссар бўлди. Санчо эшагини етаклаб йўлакка олиб кирди-да, илгарилаб кетаверди. У ер-бу ерда тепадан тушиб турган ёруғлик горни ёритиб, зулматни қуварди-ю, бироқ бечора яроқбардорнинг даҳшат ва ғашлик билан тўлган қалбини ёритолмас, ундаги ваҳимани қуволмасди.

— Эй, қодир эгам, ўзинг мадад бергайсан!— деб такрорлади ичида.— Қани энди менинг ўрнимда хўжайиним дон Кихот жаноблари бўлиб қолса. У балки манави жаҳаннамга ўхшаган горни чамандек яшнаб турган боғлар ва подшоларнинг дашаматли қасрлари деб ҳисоблаган, бу зимистон йўлак бирорта чаманзорга олиб чиқади деб умид қилган бўларди. Мен бечора бўлсам, ўтакам ёрилиб, мана ҳозир оёғим остидан бирорта чуқур чиқиб қолади-ю, туби йўқ жаҳаннамга қулайман деб юрагимни ҳовучлаб боришдан нарига ўтолмайман.

Санчо гордан эҳтиёткорлик билан секин-секин ўтиб бораркан, мана шундай фикрлар кўнглига қутқу солар, азоб берарди.

Зимистон йўлақдан ярим милча юрилгач, ниҳоят у олд томонда хирагина ёруғлик кўрди. Бу ёруғлик Санчонинг назарида жаҳаннамга олиб борадигандек кўринган йўлакнинг ёруғ жаҳонга олиб чиқишидан нишона эди.

Санчо ана шу зимистон горда бирпас азият чека турсин, қани кўрайлик-чи, унинг хўжайини дон Кихот эрталаб нималар билан машғул бўлганикин.

Рицаримиз тонготарда уйғониб, саҳарги саррин ҳаводан тўйиб-тўйиб нафас олиш ва гўзал сенъора Дульсинея ҳақида ғамгин хаёлларга берилиш учун далага чиқиб кетди.

Дон Кихот бир оз чигилларини ёзмоқчи бўлиб Росинантни йўрттириб кетди. Йўрғалаб бораётган содиқ оти кўкқисдан аллақандай ўпирилиб тушган чуқур олдига бориб қолди. Дон Кихот бор кучи билан жиловидан тортиб қолмаганида, чуқурга қулаши турган гап эди. Аммо рицаримиз Росинантни чуқурнинг шундайгина қирғоғида тўхтатиб қолганди. У отда ўтирган жойида чуқурни кўздан кечирди: ўпирилган жой жуда чуқурга ўхшарди, туби қоп-қоронғи зимистон эди. Рицарь энди отдан тушмоқчи бўлиб турганида, ер қаъридан аллақандай қичқирган овозлар ва нола эшитилди. Бирпас диққат қилиб қулоқ солиб тургач, қуйидаги сўзларни англади:

— Эй! Эй юқоридагилар! Наҳотки тириклайин гўрга кирган бир гуноҳкор банданинг ноласини эшитиб, унга шафқат қиладиган бирор христиан ёки унга ёрдам қўлини чўзадиган бирор саховатли рицарь топилмаса!— дерди бу овоз.

Дон Кихот худди Санчо Пансанинг овозини эшитаётгандай бўлди. Ғоятда таажжубланган дон Кихот чуқурга энгашиб, овози борица:

— Эй! Пастда нола чекаётган ким? Ким ёрдамга чақиряпти?— деб кичқирди.

— Баратария оролининг губернатори, машҳур ва ботир рицарь ламаңчилик дон Кихотнинг собиқ яроқбардори, бахти

қаро Санчо Пансадан бўлак ҳеч кимса эмас,— деб жавоб қилди ер остидан эшитилган овоз.

Бу гапларни эшитиб, дон Кихотнинг капалаги учиб кетди: Санчо Панса оламдан ўтибди, бечора яроқбардоримнинг руҳи бу қоронғи лаҳадда азоб чекаётган экан, деган фикр келди унинг хаёлига. Бу мудҳиш фикрдан ларзага келиб:

— Барча азиз авлиёлар ҳақи, художўй бир христиан номидан ўтиниб сўрайманким, кимсан ўзинг? Агар сен бирор изтироб чекаётган руҳ бўлсанг, қабрда тинч ётмоғинг учун қандай ёрдам бермоғим мумкин, шуни айт менга. Гарчанд менинг бурчим бу дунёдагиларга мадад бериш, уларнинг дардига малҳам бўлиш эса-да, аммо мен у дунёда изтироб чекаётган жафокашларга ҳам ёрдам бермоқдан бениҳоят хурсанд бўлурман.

— Сўзларингиз ҳамда товушингиздан валинеъматим дон Кихот жанобларига ўхшайсиз,— деган овоз чиқди ғордан.

— Ҳа, мен дон Кихотман,— деб жавоб берди рицаримиз,— заифлар ва ожизларнинг мададкори, ҳимоясизларнинг пуштипаноҳи ўша дон Кихотман. Кимки муҳтож бўлса, у хоҳ тирик, хоҳ ўлик, бундан қатъи назар, унга кўмак бермоқ менинг бурчимдир. Кимлигингни айт, эй бечора руҳ. Агар сен ҳақиқатан ҳам менинг яроқбардорим Санчо Панса бўлсанг-у, бандаликни бажо келтириб, тангрининг марҳамати билан дўзах азобидан қутулиб, аърофатга тушиб қолган бўлсанг — қани айт-чи, нега изтироб чекапсан. Муқаддас церковимиз тортаётган азоб-уқубатларингни энгиллатишга қодир. Зотан мен ҳам унинг гуноҳингдан ўтиб, азобингни энгиллатиши учун қўлимдан келганича ёрдам беришга тайёрман. Фақат сен ўз номингни ва нимага муҳтожлигингни айтсанг бас.

— Барча инсу жинслар ва бари азиз-авлиёлар ҳақи қасамёд этаманки, мен сизнинг яроқбардорингиз Санчо Пансаман ва ҳали қазо қилганимча йўқ; губернаторликни ташлаб келишга мажбур бўлдим, холос. Нима учун бундай қилганимни эса кейин сўзлаб бераман. Шу бугун тунда сизнинг ҳузурингизга ошиқиб бораётиб, эшагим билан бирга бу ерга қулаб тушдим. У менинг ҳаққоний гапирётганимни тасдиқлашга тайёр.

Шу пайт, гўё Санчонинг гапини тушунгандек, эшак кучининг борича ҳанграб юборди, бутун ғор бўйлаб акс садо янгради.

— Ажойиб шоҳидлик бу!— деб қичқириб юборди дон Кихот.— Унинг ҳанграшини худди ўз ўғлимнинг овозидек яхши танийман, сенинг ҳам товушингни танидим, Санчо. Бир нафас сабр қил. Мен ҳозир қасрдан ёрдамга одамларни чақириб келаман, улар сени албатта ўз гуноҳинг эвазига тушуб кетганинг бу ер ости ғордан қутқариб олурлар.

— Тезроқ боринг, мухтарам жанобим,— деб жавоб қилди Санчо,— худо ҳақи, тезроқ боринг! Қўрққанимдан юрагим ёрилиб ўлай деяпман. Менга нуқул худди шу ерда куним битадигандек туюляпти.

Дон Кихот бирон дақиқа ҳам вақтни зое кетказмай, қасрга томон отини йўрттира кетди, у ерга етиб бориб, Санчо Пансанинг

бошига тушган бахтсизлик ҳақида герцог билан герцогиняга сўзлаб берди. Улар Санчонинг қадим замонларда қасрдан катта йўлга томон қазилган ер ости йўлагининг бирор ерига тушиб кетганини ўша заҳотиёқ англадилар. Қаср эгалари фақат бир нарсанигина тушуна олмасдилар: уларга хабар бермай туриб, бу Санчо губернаторликни қандай қилиб ташлаб кетдийкин: Қар ҳолда, улар ўша ондаёқ Санчони қутқазиб олиб келгани хизматкорларни жўнатдилар. Хизматкорлар арқону тизимчалар оливолишганди. Улар Санчо билан унинг эшагини бир амаллаб қоп-қоронғи зулматдан ер юзасига тортиб олишди. Бу ажиб воқеанинг шоҳиди бўлиб турган бир талаба:

— Қани энди ҳамма ярамас губернаторлар мана шу ер ости горидан тортиб олинган бечорага ўхшаб оч қолиб, ранглари мурдадек оқариб ҳамда киссаларида сариқ чақасиз ўз лавозимларини ташлаб кетсалар, жуда саз бўларди-да!— деб қўйди.

Бу гапларни эшитиб Санчо:

— Саккиз ё ўн кун муқаддам менга инъом қилинган оролни бошқаришга киришган эдим, эй масхарабоз ошнам. Уша фурсатдан буён бирор марта ҳам қорним тўйиб нон емадим: табиблар мени очдан сиришди, душманларим азоб беришди; солиқ йиққани, пора олиб бойлик орттиргани қўлим ҳам тегмади. Инсон ҳар нарсани орзу қиларкан-у, лекин тангрининг ўзи ҳар кимга билиб тақсимларкан: кимга нима лозимлиги ёлғиз унинг ўзига аён экан. Шундай бўлгач, ҳеч ким бургага аччиқ қилиб, кўрпага ўт қўймасин, ўзи сув ичадиган қудуғига тупурмасин экан; менинг аҳволимдан эгамнинг ўзи хабардор, ана шу сабабдан бир талай гапларни гапириб ташлай олсам-да, индамай қўя қолам.

— Қўй, хафа бўлма, Санчо, мабодо бирон номаъқул гап айтадиган бўлсалар жаҳлинг чиқмасин,— деди дон Кихот.— Виждонинг пок бўлса бас, қўявер, одамлар оғизларига келганини гапираверсинлар. Фисқи фасодчи одамнинг тилини боғлаб қўйиш, бепоён далага дарвоза қуриб қулфлаб қўйишдек мушкул бир нарса. Агар бирор губернатор бой-бадавлат бўлиб олгач, ўз лавозимини ташлаб кетса, уни ўғри, борди-ю, қандай қашшоқ бўлиб келган бўлса ўшандайича кетаверса, уни гўл ва аҳмоқ одам дейдилар.

— Мени ўғри эмас, аҳмоқ дейишса керак, албатта,— деди Санчо.

Шу кўйи суҳбатлашиб қасрга етиб борганларида, герцог билан герцогиня уларни ровонда кутиб туришарди. Санчо у ёққа боришдан аввал кеча тунда қаттиқ шикастланган эшагини тизукроқ ерга боғлаб қўймоқчи бўлди. У эшагини отхонага олиб кириб, ем берганидан кейингина ўз ҳукмдорлари ҳузурига борди-да, тиз чўкиб:

— Муҳтарам сеньорлар, сиздек олий ҳазратларнинг ихтиёр ва иродаларингизга биноан мен ҳеч қандай хизмат кўрсатмаганим ҳолда Баратария оролига губернатор қилиб тайинлангандим. Бу оролга ҳеч вақосиз қандайига қадам босган бўлсам, уни шундайига тарк этдим: мен бундан ҳеч нима ютганим ҳам, ҳеч

нарса ютқизганим ҳам йўқ. Оролни яхши бошқардимми ёки ёмонми, буни ишларимдан хабардор одамлар сўзлаб беришсин. Мен оғир ва мужмал ишларни ҳал қилдим ҳамда ўзига яраша ҳукм этдим. Мен токи губернаторлик қиларканман, доим оч қолдим; орол ва губернаторнинг табиби тиртеафизуралик Педро Ресионинг инон-ихтиёри шундай эди. Тунда оролимизни ёв босди. Зўр олишудан сўнг орол аҳолиси менинг мардона раҳнамолигим остидагина ўз озодликларини сақлаб қола олганларини айтишди. Илоҳо тангрим уларга, гаплари қанчалик ҳақ бўлса шунчалик сиҳат-саломатлик ато қилсин. Хуллас калом, бу вақт ичида мен губернаторликдек лавозимнинг тамомий бурч ҳамда мушкулотлари билан яқиндан танишиб, бу иш қўлимдан келмаслигини англадим. Шунинг учун ҳам губернаторлик лавозими мени тарк этмасдан туриб, илгарироқ мен уни тарк этишга аҳд қилдим. Кеча эрталаб оролни ташлаб чиқдим, у ерга кириб борганимда кўчалари, уй ва томлари қандай бўлса, шундайлигича қолди. Ҳеч кимсадан қарз олганим, ҳеч қандай фойда келтирадиган манфаатли ишларга аралашганим йўқ. Ростини айтсам, бир неча фойдали қонунлар чиқармоқчи бўлдим-у, аммо барибир амалга ошмаса керак деб ўйлаб, бундай қилмадим. Ростки амалга ошмас экан, уларни чиқарди нима-ю, чиқармади нима. Шундай қилиб, ҳеч қандай мулозимларсиз, ёлғиз ўзим оролни ташлаб чиқдим, фақат биргина эшагим ажралмас ҳамроҳим бўлди. Кела туриб ер ости ғорига тушиб кетиб, бутун тунни ўша ерда ўтказдим. Ниҳоят кун ёришгандагина аллақандай ер ости йўлаги бор эканлигини кўрдим ва зора бу қоронғи зиндондан чиқиб кетса бўладиган жой топилиб қолса деган умидда йўлакдан олға қараб юрдим. Имоним комилки, агар тангрим менга халоскоримни — хўжайиним дон Кихот жанобларини етказмаганида, ер остида умрбод қолиб кетардим. Ана шундай қилиб, жаноби герцог ва герцогиня, содиқ губернаторингиз Санчо Панса ҳузурингизда турибди. У ўзининг ўн кунлик губернаторлигидан фақат битта манфаат кўрди — бу ҳам бўлса биргина оролга эмас, ҳатто бутун дунёга ҳоким бўлиш сариқ чақага ҳам арзимаган иш эканига ишонч ҳосил қилди. Зотан бунга ишонч ҳосил қилган экан, сиз муҳтарам жанобларнинг оёгингизни ўпиб таъзим этак ва минг бора афсус билан губернаторлик лавозимини бўйнидан соқит қилажак ҳамда ўз хўжайини жаноб дон Кихот хизматига қайтажак. Унинг хизматида заҳмат чекиб, доим ваҳима ичида юрагимни ҳовучлаб юрсамда, ҳар қолда, тўйиб овқатланаман. Бу энг муҳими; нима билан тўйғазсам ҳам майли қорнимни — сабзи ейманми ёки каклик гўштимни, ишқилиб тўқ бўлсам бас.

Санчо шу билан ўз каломини тугатди. Дон Кихот бу орада содиқ яроқбардорим бемаъни гапларни валдираб юрмасин деб юрак ҳовучлаб турди. У Санчонинг одоб билан ва оқилона сўзлаётганини кўриб, қалбида тангри шарафига шукроналар ўқиди.

Герцог Санчони бағрига босиб, унинг губернаторликни бунчалик тез тарк этганига минг марта афсус-надоматлар билдирди.

Аmmo у Санчонинг ўз ҳукмронлигидан сердаромад ва айна вақтда машаққати камроқ бирор лавозимга ўтириши ҳақида ғамхўрлик қилажагини айтди. Герцогиня ҳам Санчони бағрига босиб қучоқлади ва аянчли, азият чеккан қиёфасини кўриб, уни яхшилаб зиёфат қилишларини буюрди.

Санчо бошдан кечирган изтироб ва ҳаяжонларини тезда унутиб, кўнгли таскин топди, бошлаб овқатланиб, мириқиб ухлади, герцогинянинг илтифотига сазовор бўлганидан ҳамда яна саройга келиб қолганидан беҳад мамнун эди.

Дон Кихотга келсак, бизнинг шонли рицаримиз бундай даб-дабали, бемаъни ҳаётдан зерикиб изтироб чека бошлаганди.

Герцоглар хонадонининг жаҳонгашта рицарь шарафига уюштираётган базм ва зиёфатларига қатнашиб, вақтини бекор ўтказаркан, оғир гуноҳга ботаётгандай ҳис этарди у ўзини. Бу беҳуда ўтаётган вақтим учун тангри таборак олдида қатъий ҳисоб бермасам деб чўчирди. Ана шу важдан у кунларнинг бирида мезбонлардан бу меҳмондўст қасрни тарк этишга ижозат сўради. Герцог билан герцогиня қаттиқ ранжиганларини билдирдилар, лекин рози бўлдилар. Герцогиня Санчога хотинининг мактубини тутқазди, шунда унинг ўпкаси тўлиб, кўз ёши аралаш шундай деди:

— Менинг губернаторлик мансабига минганимни эшитиб, рафиқам Тереса Пансанинг қалбида уйғонган мўътабар орзу-умидларнинг яна қайтадан хўжайиним дон Кихот жанобларининг сафарига унга йўлдош бўлиб қолишим билан чилпарчин бўлиши кимнинг хаёлига келибди дейсиз? Ҳар қалай, Тересанинг бизнинг шон-шараф ва номусимизни букмай, герцогиня хонимга чўчкаёнроқ юборганидан бағоят хурсандман. Эндиликда уни қадр билмас нонкўр дейишга ҳеч кимнинг ҳақди йўқ. Яна шунинг учун ҳам хурсандманки, бу совға-саломни пора деб бўлмайди. Совға-салом юборилган дамда мен оролда ҳукмронлик қилиб тургандим, шуниси тамоман аёнки, бировдан мурувват кўрган кимса арзимас нарса билан бўлса ҳам яхшиликка яхшилик қайтармоғи керак. Марҳаматингизга ўзга бирон нима билан ташаккур билдиролмадик: губернаторликни сариқ чақасиз қуп-қуруқ қабул қилдим ва ўз лавозимимни сариқ чақасиз қуп-қуруқ ташлаб кетдим. Шунинг учун ҳам покиза виждоним билан, бу жуда катта гап, айта оламанки: мен ҳеч нима ютмадим ҳам, ютқизмадим ҳам.— Шу хилда ўзига-ўзи таскин берди Санчо.

Ниҳоят сафарга чиқадиган кун ҳам етиб келди. Кечқуруноқ герцог ва герцогиня билан хайрлашган дон Кихот бутун қурол-яроғларини тақиб, тонг саҳарда отига миниб қаср олдидаги майдонга чиқди. Эр-хотин герцоглар бошлиқ жами сарой аҳли уни сўнгги бор кўргани қаср айвонига тўпланди. Сафар тўрваси билан чамадонини ортиб олган Санчо ўз эшагида ғоятда хурсанд бўлиб ўтирарди. Герцог баковули хайрлашув олдида дон Кихотга сездирмай икки юз олтин эскудо солинган оғир ҳамённи

қистирганди унга. Санчо хурсандлигидан оғзи қулоғига етиб, чор атрофга икки букилиб таъзим қиларди.

Дон Кихотнинг эса сабри чидамай, қасрдан тезроқ жўнаб қолгиси келарди. У эр-хотин герцогларга таъзим қилди-да, Росинантнинг бошини буриб, қаср дарвозасидан чикди. Далага чиқиши биланоқ рицаримиз ўзини кучига куч қўшилгандай бардам ва тетик сеза бошлади. У қалби қувончга тўлиб, бўлажак хавотирли саргузаштлар, рицарлик қаҳрамонликлари ҳақида ўйларкан, Санчога юзланиб, деди:

— Озодлик — тангри инсонларга ато қилган бахт-саодатларнинг энг мўътабаридир, Санчо. Ер қаърида ва денгиз тубида яшириниб ётган жамики хазинаю бойликлар унга тенг келолмайди. Озодлик йўлида, шон-шарафни ҳимоя қилгандек, жонни тикиш мумкин ва зарур. Тутқунлик эса, аксінча, инсон бошига тушадиган фалокат ва бахтсизликларнинг энг каттасидир. Герцогнинг бизни қандай дабдаба билан кутиб олганини кўрдингми, Санчо. Энди бу ёғини эшит: ана шу ҳашаматли ва тўкин-сочин, хушхўр таомлар ва ўткир, хуштаъм винолар оғирлигидан майишиб турган стол ёнида ўтирарканман, баъзан назаримда, албатта, очлик ва ташналиқдан азобланаётгандай бўлардим. Зотан мен бу лаззатли таомлар ва ширин-шарбат ичимликлардан бемалол ҳамда бамайлихотир тотинолмасдим, ҳузур қила олмасдим. Бировнинг нони бировга ботмайди, унинг хайри савоати ва марҳамати олижаноб кишиларнинг қалбига кишан уради. Пешонасига битилган бир бурда нонни миннатсиз ейдиган кимса оламда энг бахтиёр одамдир, унинг ҳеч кимдан тили қисик ери бўлмайди.

— Ҳар ҳолда, — деди Санчо, — хайрлашув олдидан менга берган икки юз эскудолик ҳамёни учун баковулдан миннатдор бўлишимиз лозим. Уни ҳар эҳтимолга қарши асраб қўяман. Бизни зиёфат қиладиган қасру саройлар ҳадеб йўлиқавермайди ахир. Муштлаб роса адабимизни берадиган меҳмонхоналарга ҳам тушиб қолармиз ҳали. — Шундай дея Санчо пул солинган ҳамённи кўксига янада маҳкамроқ босиб, эшагини қичаб ҳайдайверди.

### ЛИИ БОБ

#### ДОН КИХОТНИНГ БАРСЕЛОНА ИУЛИДА БОШДАН КЕЧИРГАН САРГУЗАШТЛАРИ

Дўстларимиз герцог қасрида узоқ вақт меҳмондорчиликда қолиб кетиб, Сарагоссадаги мусобақаларга кечикканлари сабабли тантанали байрамга тайёргарлик кўрилайётган Барселонага боришга аҳд қилдилар. Сафарнинг дастлабки кунларида ҳеч қандай ҳодиса юз бермади. Улар катта йўлдан осойишта ва хотиржамгина илгарилаб боришарди. Тушки жазирамада улар бирор сой ёки анҳор бўйидаги сершоҳ дарахт соясида салқинлаб роҳат қилиб дам олишар, кечалари эса йўл ёқасидаги меҳмонхона

ёки карвонсаройларга қўнишарди. Бунақа саёҳат айниқса Санчога жуда ёқиб тушарди. Дон Кихот ҳам ажойиб-ғаройиб ва хатарли саргузаштларни қўмсаётгандек кўринарди. Содик яроқбардори хўжайинининг бир қадар тинчиб қолганини кўриб таажжубда эди. У энди меҳмонхоналарни ҳашаматли қасрлар, қовоҳоначиларни эса донгдор рицарлар деб қарамас, ижарага турувчиларнинг жанжал ва муштлашишларига аралашмас, қаршидан келаётган йўловчиларни бепарволик билан кузатиб қоларди. Санчонинг вайсашларига эътибор ҳам бермай, ўйга толиб, ғамга ботиб олдинга тикилганича борарди у. Чамаси паҳлавонимизнинг фикри ёдини бир ўй банд этган, аллақандай бир ташвиш юрак-бағрини тирнарди. Бу қандай ўй ва қандай ташвиш эканини муҳтарам китобхон ҳозир билиб олади.

Бир куни, сафарга чиққанларининг бешинчи ё олтинчи куни улар шохлари улашиб-чирмашиб кетган дарахтлар соясида шалдираб оқаётган, суви зилолдек тип-тиник ариқ бўйида дам олгани ўтиришди. Санчо Росинант билан эшагининг эгар-жабдуқларини олиб, ўтлагани қўйиб, юборди, сўнгра у одатдаги омбори — сафар тўрваси ёнига ошиқди, тўрвадан бор-йўқ, тамаддисини чиқарди. Дон Кихот овқатга ҳадеганда қўл урмай, ғамга ботиб, индамай ўтирарди. Санчо эса одоб сақлаб овқатга биринчи бўлиб қўл уролмай, хўжайинининг бошлаб беришини кутарди. Лекин унинг хаёл дарёсига ғарқ бўлганини кўриб, Санчо одоб-қоидаларни бир чеккага йиғиштириб қўйди-да, индамай пишлоқ ва нондан олиб кавшай бошлади.

— Ол, олавер, дўстим Санчо, — деди дон Кихот, — тани соғлиққа олавер, мен эса, майли, елкамдан босаётган ғам тоши, тақдиру азалнинг оғир зарблари остида эзилиб ўлай. Мен, Санчо, ажал билан ўйнашиб яшагани, сен бўлсанг ҳаётга қўшқўллаб ёпишиб олганинча оламдан ўтгани туғилганмиз. Мабодо сўзларимнинг ҳаққонийлигига қаноат ҳосил қилмоқчи бўлсанг, мен ва менинг қаҳрамонликларим ҳақида битилган китобда қандай тасвирланганимни ўқиб кўр. Мен жангларда довурак, хушхулк, аслзодалар иззат-икромига сазовор, хонимларга манзур одамман. Хўш, ҳозир қандай аҳволдаман? Евуз жодугарларнинг сеҳрафсунлари ҳамон елкамдан босиб турибди, уларни улоқтириб ташлашдан ҳозирча ожизман. Кўзим нури, қалбим гавҳари гўзал Дульсинея ҳам сеҳрланганича хунук, бедаво, қўпол деҳқон аёл қиёфасида сирли горда азоб-уқубат чекиб ётибди ҳануз. Буни ўйлаганимда курак тишларим ўтмасланиб, жағ тишларимнинг мадори қурийди, иштаҳам ғиппа бўғилади. Энг даҳшатли ўлим топишга, очдан ўлишга қодирман.

— Мурувватли хўжам, — деди Санчо оғзи тинмай кавшаркан, — қорни тўқ осонгина жон беради деган мақолни маъзур кўрмаслигингиз яққол сезилиб турибди. Менга қолса, ўзимни очдан ўлдирмоқчи эмасман. Чармни мўлжалига етгунича тишлаб тортадиган этикдўзга ўхшашни маъқул кўраман. Пешонамга битилган умрим тугаб, насибам узилгунча овқат ейишни қўймайман. Шу нарсани билиб қўйингки, жанобимга ўхшаб

атайлаб ўзини хит қилишдан кўра аҳмоқона иш йўқ. Қулоқ солинг гапларимга: олдин тамадди қилиб кейин манави юмшоққина майса тўшакда мизғиб олсангиз анча енгил тортасиз.

— Эҳ, Санчо,— деб эътироз билдирди дон Кихот ғамгин.— Гапимнинг тагида нима гап борлигига тушунмаётганинг кўри-ниб турибди. О, менинг илтимосимни бажо келтиришга рози бўлсанг эди! Шунда ўша заҳотиёқ енгил тортардим, қалбимдаги ғам тоши кўтариларди. Сендан илтимосим шу. Маслаҳатингга кўниб, бир оз мизғиб олгунимизча, сен Росинантнинг тизгинини олиб, чеккароққа чиққин-да, уст-бошингни ечиб, Дульсинеянинг овоз бўлиши учун белгиланган уч минг қамчи ҳисобидан баданингга уч-тўрт юз қамчи ур. Ўзинг ўйлаб кўр, сенинг марҳаматинг ва ожизлигинг туфайли шўрлик сеньоранинг ёвуз сеҳр-жодулар асоратида ҳамон изтироб чекиб ётиши қандай ачинарли ҳол.

— Бу хусусда анча-мунча гапларни айтса бўлади,— жавоб берди Санчо хотиржамлик билан.— Келинг, аввал мириқиб ухлаб олайлик, у ёғи бир гап бўлар. Шуни билиб қўйингки, марҳаматли жанобим, ўзини ўзи савалаш, айниқса зарбалар семиз, микти баданга тушмай, озгин танага тегадиган бўлса, жуда мушкул иш. Келинг, сеньора Дульсинея пича сабр қила турсин. Яқин кунларда у ўзимнинг бутун аъзойи баданимни мўматалоқ қилиб ташлаганимни кўради. Ҳали-ҳозирча биров ўлгани йўқ, у ҳаёт. Бу билан демоқчиманки, ҳали мен оламдан ўтганимча йўқ, ҳаётман, менки ҳаёт эканман, берган ваъдамни бажо келтирмаман. Бунинг учун сўз бераман сизга.

Дон Кихот Санчонинг қасамини эшитаркан, кўнгли очилиб, димоғи чоғ бўлди. У пича тамадди қилди. Санчо эса қорнини обдон тўйғизиб олди. Сўнгра дўстларимиз — икки ажралмас дўст майсалар қулф уриб ётган яйловда ўтлаб юрган Росинант билан эшакни ўз ихтиёрларига қўйиб, мизғигани ётдилар.

Анчагина ухлашди, улар йўлга тушишганда кун оғиб қолганди. Қанчалик ошиқмасинлар, барибир кун ёруғида бирорта меҳмонхона ёки карвонсаройга етиб боролмадилар. Қалин бир ўрмонга етганларида қоп-қоронғи зимистон тун чўкқанди. Бу ўрмондаги дарахтлар эманлармиди ё пўкак дарахтлармиди, бу ҳақда муаллифнинг қўлида аниқ маълумот йўқ. Хўжайин ва унинг хизматқори эгардан тушиб, дарахтлар остида тунагани ётишди. Қорнини болаб тўйғазиб олган Санчо бошини қўяр-қўймас уйқу салтанатига равона бўлди. Кундузи мизғиб олган дон Кихотнинг эса ҳадеганда уйқуси келавермади. Азоб берувчи ўй-фикрлар миясида ғужғон ўйнар, безовта хаёллар эса бечора рицарни етти иқлим узра айлантириб юрарди. Гоҳ назарида яна Монтесинос ғорида юрганга ўхшайди, гоҳ кўз ўнгида Дульсинея оддий деҳқон қизига айланиб, сакраб эшакка миниб олади; қулоқлари остида Дульсинеяни ёвуз жодугарлар сеҳридан халос этишнинг бирдан-бир чорасини кўрсатган донишманд Мерлиннинг сўзлари жаранглаётгандек бўлади. У яроқбардори Санчонинг тошбағирлиги ва ношудлигини ўйлаб кетади. Дон Кихот-



нинг ҳисобича, у шу дамгача ўз баданига бор-йўғи беш қамчигина туширганди, холос.

Шу ҳақда ўйласа дон Кихотнинг юрак-бағри эзилиб кетарди. Бора-бора унинг қайғу қосаси тўлиб-тошди. Бу азобга чидашга заррача сабри қолмай, шартта ўрнидан турди-да, ўз-ўзига деди:

— Агар буюк Искандар чигал масалани «чигални ечдинг нима-ю, шартта кесиб ташладинг нима — барибир гўр» деган сўзлар билан ечган, шунга қарамай, ҳар ҳолда, бутун Осиёга ҳоким бўлган экан, унда Дульсинеянинг озод бўлиши йўлида мен ҳам албатта шундай қилишим мумкин. Буни истамаса-да, Санчони ўз қўлим билан савалайман. Зотан ҳаммаси шунга боғлиқ экан, бу уч минг қамчини ўз баданига Санчонинг ўзи туширди нима-ю, бошқа биров савалади нима, барибир эмасми?

Шундай қарорга келган дон Кихот Росинантнинг нўхтасини олиб, Санчонинг ёнига борди-да, иштонбоғини ечишга тутинди. Унинг қўли тегар-тегмас уйғониб кетган Санчо:

— Нима гап? Ким бу? — деб сўради.

— Менман, — жавоб берди дон Кихот. — Сенинг илтифотсизлигинга бархам бериб, дарди аламинни энгиллатмоқчиман. Сени саваламоқчиман, Санчо, бу билан зимманга олган вази-фангни бажаришингга кўмаклашмоқчиман. Дульсинея ҳалок бўляпти, сенинг бўлса парвойингга ҳам келмайди бу. Аммо мен унинг ишқида хазон бўляпман, инчунун уни халос этиш учун ўзимни ўтга ҳам, чўққа ҳам уришга тайёрман. Ҳаяллама, тезроқ ечин, мана шу кимсасиз ерда сенга камида икки минг қамчи туширмоқчиман.

— Эй, йўқ, — деди Санчо, — бир оз ўзингизни босиб олинг, муҳтарам жаноб, йўқса, тангри ҳақи қасам ичаманки, шовқинимиз ҳатто карлар қулоғига ҳам етажак. Ўзимни савалайман деб берган ваъдамни зўрлик билан эмас, балки ўз ихтиёрим билан бажаришим керак. Ўзимни-ўзим савашга эса ҳушим йўқ, раъйим бўлган вақтда ўзимни савалайман деб муҳтарам жанобларига берган ваъданинг ўзи ҳам катта гап.

— Сенинг ваъданга ишнолмайман, Санчо, — жавоб берди дон Кихот, — чунки юрагингга заррача шафқат йўқ, баданинг эса, гарчанд паст табақадан бўлсанг ҳам, бағоят нозик, сезгирдир.

Шундай дея у Санчонинг иштонбоғини ечаверди. Ишнинг хавотирли тус олиб бораётганини кўрган Санчо Панса ётган еридан сакраб турди-да, хўжайинига ташланди. Рицарь билан унинг яроқбардори ўртасида шафқатсиз олишув бошланди. Ниҳоят Санчо эпчиллик қилиб дон Кихотни чалиб йиқитди-да, ўнг оёғининг тиззаси билан кўкрагидан шундай босиб олдики, у на ўрнидан тура олди ва на нафас ололди.

— Бу қанақаси, хоин? Сен ўз хўжайининг ва сеньорингга қарши қўл кўтардингми? Ўз валинеъматингга тажовуз қиляпсанми ҳали? — қичқирди дон Кихот нафас ололмай бўғилиб.

— Ҳеч кимга тажовуз қилаётганим йўқ, — жавоб берди Санчо, — ўзимни қутқаряпман, холос, чунки ўзимга ўзим сеньорман ҳозир. Муҳтарам жанобим, ўзимни хотиржам тутаман ва савала-

лашни ҳозир талаб қилмайман, деб сўз берсалар, шундагина бўшатаман.

Дон Кихот Санчога сўз бериб, сенга ҳатто қўл теккизмайман, раўйингга ёққан ва истаган вақтингда саваларсан ўзингни, деди. Санчо хўжайинини бўшатди, улар яна ярашиб олишди. Аммо Санчо шу можародан сўнг дон Кихотга унчалик ишонмай қўйди, у бундай кўнгилсиз ҳодиса яна такрорланиб қолмасин деб, ўз жанобидан олисроқда тонг оттиришга аҳд қилди. Шу мақсадда у чеккароққа бориб, бир азим туп дарахт остига жойлашди. Туннинг бу ёғи осойишта ўтди. Сахар паллада уйғонишиб энгилелпи нонушта қилиб, энди йўлга тушай деб туришган пайтда қўққисдан дарахтлар ортидан аллақандай қуролланган кишилар чиқиб келишди. Дон Кихот билан Санчо ҳатто орқа-ўнгларига қараб улгурмаслариданоқ ҳаш-паш дегунча уларни қирқ чоғли қароқчи қуршаб олди: улар католончалаб сайёҳларимизга то атаман етиб келгунича қимир этмай туришни буюришди. Рицаримиз яёв ва қуролсиз эди, Росинант сал нарироқда ўтлаб юрар, найзаси эса чеккароқда дарахтга суяб қўйилганди — хулласи калом, у ўзини ҳимоя қилишдан ожиз эди шу топда. Шу сабабдан у қўл қовуштириб, бош эгишни энг оқил иш деб билди.

Қароқчилар эшакнинг абзалларини тинтиб, Санчонинг сафар тўрвасидаги ҳамма нарасни олишди: яхшиямки Санчо герцог ҳада қилган эскудолар солинган ҳамёни липпасига қистириб қўйган экан. Эҳтимол бу саховатли одамлар ўзларини ҳам бошдан-оёқ тинтиган бўлардилар, лекин шу дақиқада атаман пайдо бўлиб қолди: бу ўттиз тўрт ёшли, буғдоймағиз, забардаст, баланд бўйли, амирона чехрали бир киши эди. У бақувват отга миниб олган: эғнида пўлат совут, белида тўртта пистолет осиглик. «Қуролбардорлар»нинг — қароқчилар ўзларини шундай деб аташарди — Санчо Пансани тинтимоқчи бўлиб турганларини кўриб, бу бебошликни бас қилишни буюрди. Қароқчилар ўша заҳотиёқ буйруққа итоат қилиб, орқага чекиндилар, Санчонинг ҳамёни яна шундай омон қолди. Атаман дарахтга суяб қўйилган найзани, ерда ётган қалқон ва дон Кихотнинг ғамга толиб, қайғуга ботган қиёфасини бирма-бир назардан кечираркан, ғоят ажабланди. Атаман унинг ёнига бориб:

— Бунчалик қайғурманг, эй саховатли одам: сиз қандайдир ваҳший қароқчига эмас, балки қалби шафқатсизликдан кўра кўпроқ раҳм-шафқатга тўла Роке Гинартга<sup>93</sup> банди бўлгансиз, — деди.

— Сенинг ҳукмингга тушиб қолганимдан заррача қайғурмайман, шон-шухрати оламга машҳур, эй шавкатли Роке Гинарт, — деди дон Кихот. — Аммо бепарволигим туфайли ғафлатда сенинг сарбозларинг қўлига тушиб қолганим учун ўзимни асло афв этолмайман. Чунки мен мансуб бўлган жаҳонгашта рицарлик қонун-қоидалари доимо жанговар ҳолатда бўлишимни тақозо этади. Шу нарса сенга аён бўлсинки, эй улуг Роке, башарти манави отлиқ сарбозлар қўлимда найзам ва қалқоним борлигида

рўпара келганларида, мени енгиш осон эмасди, мен шон-шуҳрати бутун оламга ёйилган ламанчлик дон Кихот бўламан.

Шунда Роке Гинарт ким билан сўзлашаётганини фаҳмлади. У рицаримиз ҳақида илгари ҳам кўп эшитганди, лекин рицарлик қаҳрамонликлари иштиёқи одамни шундай бош-кўзини айлантириб, ақлдан оздиришгача олиб боришни тасаввур қилолмаганлиги сабабли бу гапларнинг ҳаммаси уйдирма, мишмиш гаплар деб ҳисоблаб юрарди. Шунинг учун ҳам илгарилари фақат овозасинигина эшитиб юрган одамни ўз кўзлари билан кўриш бағоят қизиқ бир ҳол эди.

— Эй, довюрак рицарь,— деди у — қўйинг, ўз парвосизлигингиз ва гафлатда қолганингиздан даргазаб бўлманг. Эҳтимол бу бахт ва фаровонликка олиб боровчи йўл — бир имтиҳондир. Тангрининг иродаси ўзига аён, на қилса — ўзи билади, у кўпинча, бахтсизларга бахт, камбағал бечораларга давлат ато қилади ва йўлдан озганларни йўлга солади.

Роке Гинарт сўзини тугатмасданок, йўлни кузатиб турган соқчи от қўйиб келиб қолди.

— Сеньор,— деди у,— Барселона йўлидан бир тўда одам келяпти.

— Нима, у одамлар бизни изловчиларданми ёки биз излайдиганларданми? — сўради Роке ундан.

— Биз излайдиганлардан,— жавоб берди соқчи.

— Ундай бўлса фурсатни бой берманглар,— деди Роке,— бориб тезда бу ёққа ҳайдаб келинглар уларни. Бирор одамни қочириб юбормасликка ҳаракат қилинглар.

Қуролбардорлар унинг амрига итоат қилиб, шошилишч йўловчилар томон жўнашди, дон Кихот, Санчо Панса ва Рокелар шу ерда қолишди. Шундан кейин Роке дон Кихотга мурожаат қилди:

— Бизнинг ҳаётимиз сеньор дон Кихотга жуда ғалати туюлаётгандир: бизнинг барча ишларимиз, саргузаштларимиз ва юриш-туришимиз ғалати ҳамда хавфли бўлиб кўринаётгандир. Виждонан айтсам, ўзим ҳам касби-коримиздан кўра хавотирлироқ ва беҳаловатроқ касб бўлмаса керак деб ўйлайман. Табиатан мен раҳмдил, ювош, беозор одамман. Аммо душманларимнинг шафқатсизларча ҳақоратлашлари қалбимда интиқом олиш иштиёқини қўзғади, оқибатда мен олижаноб хислатларимга хилоф равишда мана шу даҳшатли ҳунарни касб қилиб олдим ва гарчанд ақл-идроким бу йўлдан қайтишга даъват этса-да, шундай ҳаёт кечиришни сабот билан давом эттиряпман. Бунинг устига, бир ножўя иш иккинчисини, бир гуноҳ бошқасини судраб келади. Бора-бора ана шуларнинг ҳаммаси қалбимда мужасамланиб, ёлғиз ўзимнигина эмас, ўзгаларнинг ҳам дарди-алами учун қасос оляпман. Билъакс мен йўлдан тойиб, гуноҳлар ботқоғига ботган бўлсам ҳам, ҳар қалай, бу ботқоқдан қутулиб, нажот денгизига сузиб чиқишдан умидимни узганимча йўқ.

Дон Кихот Рокенинг бу оқилона сўзларига ҳайратланиб қулоқ соларди. Касби-кори қотиллик ва талончилик бўлган ки-

шилар орасида бундай оқилона фикр юритадиган одам топилишини у ҳеч қачон ҳаёлига ҳам келтирмаган эди.

— Сеньор Роке,— деди у,— ўз дардини тан олиш ва врач буюрган дори-дармонларни қабул этишга тайёрлик — шифо топишнинг ибтидосидир. Чунки мухтарам жаноб ўз дардларидан бохабар эканлар, само ёки шафқатли тангрим деганимиз маъқулроқ, сизни бирдан эмас, балки аста-секин бу дарддан халос этадиган дору эҳсон этажак. Оқил гуноҳкорлар бефаросат гуноҳкорларга қараганда тезроқ тузаладилар. Сиз, мухтарам жаноб, ўз нутқингизда донолигингизни намоён этган экансиз, ушбу сўзларимга қулоқ солинг: дадил туринг ва виждон азобингизнинг энгиллашишидан умид узманг. Башарти, мухтарам жаноб, нажот йўлига тезроқ юзланмоқни истасангиз, мен билан юринг. Бу сафарда бошдан кечиражак мусибату фалокатларимиз сиз учун баайни гуноҳдан форуғ бўлиш борасида қилган тавба-тазарруингиз ўрнига ўтажак ва қаршингизда жаннат дарбозасини очажак.

Бу орада ўлжа излаб кетган қароқчилар ҳам қайтиб келиб қолишди: улар икки кабальерони, икки пиёда зиёратчини, отликма яёв олти нафар хизматкор кузатиб бораётган бир неча аёл тушган каретани икки хачир ҳайдовчи аравакаши билан бирга олдиларига солиб келиб қолишди. Қуролбардорлар уларни қуршаб олишди. Мағлублар ҳам, ғолиблар ҳам Роке Гинартнинг гап бошлашини кутиб сукут сақлашарди. У отликлардан кимликларини, қаёққа кетаётганликлари ва ёнларида қанча пуллари борлигини сўради. Кабальеролардан бири жавоб берди:

— Сеньор, биз испан пиёда қўшинларининг капитанларимиз, отрядларимиз ҳозир Неаполда: Сицилияга жўнайдиган галерлар\* лангар ташлаб турган Барселонага кетяпмиз. Ёнимизда икки ёки уч юз эскудо бор. Биз учун шу ҳам кифоя, ўз тақдиримиздан нолимаймиз, зероки бечора аскарлар бундан ортигини орзу ҳам қилмайдилар.

Роке зиёратчиларга ҳам шу саволларни берди. Зиёратчилар Римга кетаётганларини, ёнларини қоқиштирганда бор-йўғи олтмиш реалча пул топилишини айтишди. Охирида Роке каретадаги аёлларнинг кимлигини ва қанча пуллари борлигини сўради.

— Бу каретада менинг бекам, Неаполь олий судьясининг рафиқаси донья Гиомар де Киньонес хоним қизчалари билан кетяптилар, ёнларида оқсочлари ва дуэньялари ҳам бор: уларни олти нафар хизматкор кузатиб боряпти, олти юз эскудо пуллари бор,— деб жавоб берди отлик хизматкорлардан бири.

— Шундай қилиб,— деди Роке Гинарт,— йўловчиларнинг ҳаммасида жами бўлиб тўққиз юз эскудо ва олтмиш реал бор экан. Менинг сарбозларим эса олтмишта. Қани, бир ҳисоблаб кўрайлик-чи, киши бошига қанчадан тегаркин: негадир унчалик яхши ҳисоблолмайман-да.

\* Кўп эшаккли кема.

Буни эшитиб, қароқчилардан бири овози борича қичқирди:  
— Унинг ўлимини тиловчи аблахларга қасдма-қасдликка Роке Гинарт омон бўлсин!

Кабальеролар хафалиklarини яширмадилар, олий судьянинг рафиқаси эса маънос бўлиб қолди, ҳатто сўнги реалларидан ажралажакларини фаҳмлаган зиёратчиларнинг ҳам башаралари буришиб кетди. Роке уларни бир нафас саросимага солиб турди-да, кейин бир қақирим наридан ҳам чеҳраларидан сезилиб турган қайғуларини тарқатиш ниятида кабальероларга қараб деди:

— Сеньор капитанлар, марҳамат қилиб, менга олтмиш эскудо қарз бера олмайсизларми? Олий судьянинг рафиқаларидан эса отрядимдагиларни хушнуд этгали саксон эскудо беришларини ўтиниб сўрадим. Сўнгра ҳаммаларингиз хотиржамгина, ҳеч қандай қаршиликсиз йўлингизни давом эттиравасизлар. Мен тинч сафарингизни давом эттиришингиз учун ҳимоя қоғози ёзиб бераман, токи йўлда учраган бирор бошқа отрядим сизларга зиён-заҳмат етказмасин. Мен ҳеч қачон сарбозларни ҳам, аёлларни ҳам, болаларни ҳам асло ранжитмайман.

Иккала капитан ҳам ўз пулларини ўзларида қолдириб, кўрсатган муруввати, сахийлиги ва тантилиги учун фасоҳат билан бирлари олиб, бирлари қўйиб Рокега миннатдорчилик билдира бошладилар. Сеньора донья Гиомар де Киньонес каретадан отилиб чиқиб, улуғ Рокенинг қўл ва оёқларини ўпмоқчи бўлди-ю, лекин у бунга йўл қўймади, балки улардан оғир касби мажбур этгани туфайли озор етказгани учун афв этишларини сўради. Олий судьянинг рафиқаси хизматкорларидан бирига саксон эскудони тезда санаб беришни буюрди, капитанлар эса олтмиш эскудони ўз қўллари билан қўшқўллаб топширдилар. Зиёратчилар ҳам бисотларидаги арзимас чақаларини топширишга тайёр эдилар-у, бироқ Роке уларнинг азият чекмасликларини айтди-да, ўз одамларига қараб:

— Ҳар қайсингиз бу пуллардан икки эскудодан оласиз, қолган йигирма эскудонинг ўнини зиёратчиларга, яна ўн эскудосини манави рицарнинг яроқбардорига берурмиз, токи у ушбу можарони яхшилик билан эслаб юрсин,— деди.

Рокега довод-қалам келтиришди, у йўловчиларга ҳимоя қоғози ёзиб берди. Бандилар билан хайр-хўшлашиб, уларни озод қилди, қароқчилар атаманининг олижаноблигига, мардлигига, келишган қиёфасига ва ширин муомаласига қойил қолиб йўлга тушишди йўловчилар.

— Атаманимизга қароқчиликдан кўра роҳиблик кўпроқ ярашади,— тўнғиллади қуролбардорлардан бири ўз ошналарига қараб.— Сахийлик қилгиси келиб қолган бўлса, ўз ҳамени ҳисобидан тантилик қилсин.

Шўрлик бу гапни анча дўриллаб айтганди, Роке эшитиб қолди. У шартта қиличини суғуриб, бу беадабнинг бошини қоқ иккига чопиб ташларкан:

— Тилини тиёлмайдиган безбетнинг жазоси шу!— деб ўшқирди.

Ҳаммалари даҳшат ичра тахтадек қотиб қолдилар. Ҳеч ким чурқ этиб оғзини очолмади: атаман уларни ана шундай жиловлаб олганди.

Роке чеккароққа ўтиб, Барселонадаги ошнасига мактуб ёзди. Мактубида у ҳамманинг оғзидан тушмай қолган жаҳонгашта рицарь, машҳур ламанчлик дон Кихот билан учрашганини хабар қилди. Роке яна, унинг ниҳоятда аломат, шу билан бир вақтда энг мулоҳазали одам эканини ёзиб, тўрт кундан сўнг, авлиё Иоанн Креститель байрами куни, уни бошдан-оёқ қуролланган ҳолда, Росинантга миндириб, ёнида яроқбардори Санчо Панса билан биргаликда Барселонадаги денгиз қирғоғига етказишни ваъда қилди.

Роке бу мактубни ўз қуролбардорларидан бирига топширди, у эса қароқчилик либосини ечиб, деҳқонча кийиниб йўлга тушди ва мактубни Барселонага, тайинланган одамга етказди.

Роке бу ишларни битказгач, дон Кихотга, энди сиз менинг меҳмонимсиз деб, орқасидан юришни илтимос қилди.

Рицаримиз атаман ҳузурида уч кун меҳмон бўлди. Дон Кихот атаман ҳузурида уч юз йил яшаганида ҳам барибир қароқчилар ҳаётидан ажабланаверган бўлурди. Бир ерда уйқудан бош кўтарсалар, бошқа бир жойда нонушта қилардилар, улар дам қочиб, дам кутардилар, кимлардан қочиб, нимани кутаётганларини ўзлари ҳам билмасдилар. Муттасил айғоқчилар юбориб турилади, атрофдан бирор хабар топиб келган соқчиларнинг ахбороти тингланади, акребузларининг пилталарини пуфлаб қолишади: акребузлари жуда оз, уларнинг кўпчилиги чақмоқ тошли пистолетлар билан қуролланган эди. Рокенинг ўзи эса тез-тез аллақаяқларга ғойиб бўлиб қоларди. У доимо ҳеч ким билмайдиган аллақандай сирли хилватгоҳ ва пана жойларда ўз қуролбардорларидан яшириниб юрарди. Барселона вице-қиронининг фармойишларида Рокенинг боши эвазига катта мукофот эълон қилинганди, шунинг учун у умрбод ҳушёр бўлиши лозим эди: атаман ўлдириб қўямасинлар ёки одил судга тутиб бермасинлар деб ўз шерикларидан қўрқарди, аслини олганда ожизлик эди бу.

Ниҳоят ташландиқ йўллар, яширин ва гадейтопмас сўқмоқлар орқали Роке дон Кихот, Санчо ва олти нафар қуролбардори билан Барселонага яшириқча этиб олди. Улар денгиз бўйига авлиё Иоанн байрами куни кечаси келишди. Шу ерда Роке дон Кихот ва Санчо (унга ваъда қилган ўн эскудони эндигина берди) билан қучоқлашиб хайрлашди, улар бир-бирларининг хизматларига доим тайёр эканликларини билдириб ажралишди.

Роке жўнаб кетди, дон Кихот эса Росинантдан тушмай, тонг ёришишини кута бошлади. Кўп ўтмай шарқ томон ёришиб тонг отди, шу ондаёқ шаҳарда сурнай ва ноғоралар, дўмбиралар янгради, мулозимлар: «Эй, четланинглар! Йўл беринглар! Йўл беринглар!» деб қичқира бошладилар. Бу орада тун чекиниб, мўъжазгина қалқондек қуёш гардиши уфқдан мўралай бошлаган эди.

Дон Кихот билан Санчо кўзи ўнгида, улар то шу кунга қадар кўрмаган денгиз намоён бўлди. Денгиз уларга жуда улкан ва бепоендек кўринди, она юртлари Ламанчдаги Руидера кўрфаз-часи бунинг олдида ҳеч гап эмасди. Соҳил яқинида галерлар саф тортиб турарди. Улардаги турли-туман белгилар ялтираб, хилма-хил байроқлари ҳилпираб денгиз сувини эркалаб елпирди; галерлардан кўкка ўрлаётган карнай, бурғи ва сурнайларнинг ёқимли ёки жангари садолари ҳавони ларзага келтирарди. Галерлар қўққисдан ҳаракатга келиб қолдилар; гўё денгиз жангини намоёниш қилаётгандек, улар гоҳ бир-бирларига яқинлашар, гоҳ узоқлашардилар, соҳилда эса тулпори отларга минган бир талай ясаниб-тусанган отлиқлар пайдо бўлиб қолишди. Галерлардаги аскарлар мушкетлардан бетиним ўқ узишар, шаҳар қалъа деворларидаги отрядлари эса уларга жавоб қайтаришарди; оғир артиллерия тўплари гумбурлаб ҳавони ларзага келтираркан, галерлардаги тўплар уларга жўр бўларди. Шўхчан денгиз, шодликларга тўлган шаҳар, аҳён-аҳёнда тўп тутуни билан қопланиб яна очилиб кетаётган мусаффо осмон одамлар қалбига қувонч бахш этарди. Санчо баҳайбат денгиз кемаларининг қандай қилиб чаққонлик билан ҳаракатланаётганига ақли етмай, оғзи очилиб анграйиб қолганди.

Шу топда ясанган бир неча ажойиб отлиқ шовқин-сурон кўтариб, қийқиришиб, дон Кихот ҳайрат ичра анграйиб турган ерга от қўйиб келаверди. Улардан бири, Рокедан мактуб олгани, дон Кихотга таъзим қилиб:

— Хуш келибсиз шаҳримизга, эй, жаҳонгашта рицарларнинг шон-шавкати, машъали ва йўлчи юлдузи! Хуш келибсиз, эй, жасур ламанчлик дон Кихот жаноблари! — деди овозини барала қўйиб.

Дон Кихот бунга жавобан оғиз ҳам очмади, отлиқлар ундан жавоб ҳам кутмадилар. Улар от қўйишиб, дон Кихот атрофида пойгада чопаётгандек чарх уриб айлана бошладилар.

— Кўряпсанми, Санчо, шон-шуҳратимиз Барселонагача етиб келибди. Бу одамлар бизни бир кўришдаёқ танишди, — деди дон Кихот Санчога.

Дон Кихотни қутлаган бояги отлиқ яна от йўрттириб унинг ёнига келди-да:

— Сеньор дон Кихот жаноблари, илтифот кўрсатиб ортимиздан юрсалар: бизлар муҳтарам жанобларининг содиқ қуллари ва Роке Гинартнинг қадрдон дўстлари бўламиз, — деди.

Дон Кихот бунга жавобан шундай деди:

— Башарти марди майдон Роке Гинарт қадрдон дўстингиз экан, сеньор кабалъеро, сизнинг эҳтиром-илтифотингиз бу олиҳиммат одам илтифотининг туққан қизи ёхуд эгачисидир. Қани, бошланг мени истаган томонингизга, чунки менинг эрк-ихтиёрим сизнинг қўлингизда, хизматингизни адо этишга бажонидил тайёрман.

Отлиқ дон Кихотнинг бу сўзларига янада назокатлироқ қилиб

жавоб берди. Унинг ҳамроҳлари рицаримизни қуршаб, карнай ва ногоралар садоси остида шаҳар томон йўл олдилар.

Дон Кихот билан Санчо бу музика садолари остида шаҳарнинг бош кўчаларидан ўтиб борарканлар, халойиқ уларни ҳайрат ичра кузатиб қолар, дайди болалар эса ҳазил-ҳузил қилиб, қий-қиришиб ортларидан югуришиб борарди. Ниҳоят улар дўстларимизни қирғоқда иззат-икром билан кутиб олган меҳмондўст кабалеронинг ҳашаматли уйига етиб келишди. Бу кабалеро жуда бадавлат ва эътиборли аслзодалардан бўлса керак; унинг исми шарифи дон Антонио Морено экан.

Дон Кихотни авраб уйига олиб келгач, дон Антонио рицарни қизиқроқ эрмак қилиш ҳақида бош қотира бошлади. Лекин у дон Кихотга бирон зиён-заҳмат етишини ёки унинг ранжиб, хафа бўлишини ҳам истамасди. У, ҳазил — ҳазилнинг кети зил, бўлишини яхши биларди. Шунинг учун ҳам у тузукроқ ўйлаб иш юритишга аҳд қилиб, ҳозирча дон Кихотга яроғ-аслаҳаларини ечишни ва йўлдан сўнг нафасини ростлаб олишини таклиф этди. Дон Кихот янги дўстларининг маслаҳатини бажо келтириб, бир оз дам оливолгач, дон Антонио уни шаҳарнинг энг катта кўчаларидан бирига қараган балконга бошлаб чиқди. Бутун халойиқ ва болалар рицарга худди маймунни томоша қилаётгандек тикилишарди. Байрамнинг фэйзига фэйз қўшиш учун эмас, балки дон Кихотнинг шарафига ўзларига оро бергандек ясанган отличлар унинг олдидан от ўйнатиб ўта бошладилар. Санчо, гўё аллақандай сеҳрли йўллар билан қайтадан герцоғ қасрига бориб қолгандай, завқ-шавқи тошиб кетганидан терисига сиймасди.

Шу куни дон Антонионикидаги зиёфатга унинг бир қанча дўстлари қатнашди, ҳаммалари дон Кихотни гоётада ҳурматлаб, унга нисбатан жаҳонгашта рицардек мулозимат қилишди: дон Кихот бундан фахрланиб, мамнунликдан ўзини унутиб, кеккайиб ўтирарди. Санчо ажойиб қизиқчиликлар қилиб, фақат хизматкорларнигина эмас, балки ҳаммани ўз оғзига қаратиб олди. Улфатлар дастурхон ёнига ўтиришгач, дон Антонио Санчога қараб:

— Эшитишимча, қадрдон Санчо, сиз мазали товуқ гўшти билан қийма дўлмани шунчалик яхши кўрармишсизки, қорнингизни бошлаб тўйғазиб олиб, қолганини кўйнингизга урармишсиз-а? — деди.

— Йўқ, сеньор, бу ёлғон, — жавоб берди Санчо, — мен жуда покиза одамман, унчалик суқ, очофат ҳам эмасман. Мана жанобим дон Кихотнинг ўзлари айтсинлар, баъзан ҳафталаб бир ҳовучгина чўчкаёнғоқ билан тирикчилик қилганмиз. Гоҳо жаҳонгашта рицарь яроқбардорининг аҳволига маймунлар йиғлайди. Шунинг учун менга сигир тегса бошвоғини ҳам оливолсам, демоқчиманки, олдимга нимани қўйсалар шуни есам, ким айбсита оларди мени. Кимки мени очофат ёки исқирт деркан, жуда янглишади, роса бошлаб сўкардим-у ҳозир ўшанақаларни, лекин бу ерда ўтирган хонимларнинг ҳурматини қиялпман-да.



— Дарҳақиқат,— деди дон Кихот,— Санчонинг дастурхон устидаги покизалиги ва ўзини тутта билиши мақтовга сазовор ҳамда унинг хотирасини келгуси авлодларимизга етказиш учун бронза тахтачаларга ўйиб ёзиб, абадийлаштиришга арзийди. Тўғри, жуда очқаб қолганда бир оз баднафсроққа ўхшаб кўринади, чунки бундай пайтларда ошиқиброқ овқатланади ва икки жағи ҳам тинмай ишлайди, аммо доимо покизалик, озодаликка риоя қилади, губернаторлик даврида у ҳатто узум ва анорни вилка билан тановул қилган.

— Ие! Санчо губернатор ҳам бўлганми?— хитоб қилди дон Антонио.

— Ҳа,— жавоб берди Санчо,— мен Баратария оролининг губернатори эдим. Оролда мириқиб роса ўн кун ҳукмронлик қилдим; бу ўн кун мобайнида оромимни йўқотиб, губернаторликдан нафратланишга ўргандим; у ердан қочдим, йўлда ер ости горига тушиб кетиб, жаҳаннамга равона бўлаёздим ва бир мўъжиза билан омон қолдим.

Дон Кихот Санчонинг губернаторлик тарихини бошдан-оёқ сўзлаб берди, суҳбатдошларини бағоят хушнуд этди.

Ўша кунни оқшомда дон Кихотга яроғ-аслаҳаларисиз, уй кийими ва сап-сариқ матодан тикилган плашда шаҳарни айланиб чиқишни таклиф этишди, бу плаш шунақанги иссиқ эдики, остида ҳатто муз ҳам эриб сув бўлиб оқарди. Хизматкорларга Санчони турли йўллар билан чалғитиб туриш, ташқарига чиқариб юбормаслик буюрилди. Дон Кихот Росинантни эмас, балки қимматбаҳо абзаллар билан безатилган баланд бир хачирни миниб олганди. Рицарнинг елкасига плаш ташлаб, орқасига катта-катта ҳарфлар билан «Ламанчлик дон Кихот» деб ёзилган қоғозни ўзига сездирмай қадаб қўйишди. Сайр қилиб юришаркан, бу ёзув ўткинчилар эътиборини жалб этар ва улар овозларини баралла қўйиб: «Ламанчлик дон Кихот» деб ўқишарди. Буни эшитган дон Кихот ҳам қувонар, ҳам шунча одам гўё уни яхши танийдигандек отини атаб чақираётганидан ажабланарди. Қаватида бораётган дон Антониога мурожаат қилиб, шундай деди у:

— Буни қаранг-а, сеньор дон Антонио, жаҳонгашта рицарларга қандай шон-шухрат йўлдош экан. Шаҳарга қадам ранжида қилишим биланоқ бутун халойиқ, ҳатто анови гўдакларгача, гарчанд улар илгари тушларида ҳам кўрмаган бўлсаларда, мени таниганига қаноат ҳосил қилдим!

— Бу айни ҳақ гап, сеньор дон Кихот,— жавоб берди дон Антонио,— ойни этак билан ёпиб бўлмаганидек, инсон жасорати ва шон-шавкатини бир жойда тутиб туриб бўлмайди; жанговар олишувларда эришилган қахрамонлик шон-шухрати бутун тўсиқларни емириб ташлаб, албатта оламга таралади.

Арзимаган бир воқеанинг бу кўнгилли сайрни барбод этишига сал қолди.

Аллақандай бир кастилиялик дон Кихотнинг орқасидаги ёзувни ўқиб:

— Оббо жин ургур, ламанчлик дон Кихот-э! Шунча таёқ

еб, ўлмай-нетмай, бу ёққа қандай етиб келдинг-а? Ахир сен тентаксан-ку! Жиннилигингни уйгинангда қилиб ўтирсанг-у, баҳарнав эди-я, лекин сен билан учрашган ва суҳбатлашганларнинг барини ақлдан оздирасан; узоққа бормай қўяқолайлик, манави сенга эргашиб юрган сеньорларнинг ўзи бунинг далили. Эй, тентак, уйингга қайт. Рўзғорингни бошқар, хотининг ва болачақангга бош-қош бўл, миянгни айнатиб, ақлдан адаштирадиган бу телбалигингни бас қил,— деб қолди қичқириб.

— Йўлингиздан қолманг, азизим,— деди унга дон Антонио,— сиздан биров маслаҳат сўрамаганидан кейин мошовага қатик бўлманг. Жаноб дон Кихотнинг ақли-ҳуши жойида, уни кузатиб бораётган бизлар ҳам тентак эмасмиз. Шон-шавкат ҳар доим қаерда бўлмасин ҳурмат-иззатга лойиқ. Қани, жаҳаннамга равона бўлгур, бир туёғингизни шиқиллатиб қолинг-чи, бундан-буён сўк ошига сурнай бўлиб юрманг!

— Турган еримда тил тортмай ўлайки, муҳтарам жаноблари ҳақ!— жавоб берди кастилиялик.— Бу паҳлавонга маслаҳат бериш ҳўкизнинг қулоғига танбур чалган билан баробар, лекин, ҳар қалай, шундай донишманд одамнинг миясига аллақандай жаҳонгашта рицарлик ҳақидаги бемаъни хаёллар уя қуриб олиб, эс-ҳушидан ажралиб валдираб юрса киши бўғилиб кетаркан. Аммо-лекин, агар минг йил умр кўрганымда ҳам, бундан-буён бирор кимсага маслаҳат бергундай бўлсам, муҳтарам жаноблари айтганларидек бутун авлод-аждодим билан жаҳаннамга равона бўлай. Ўзи сўраганида ҳам асло маслаҳат берма-я!

Насиҳатгўй шундай дея нари кетди, сайр яна давом этаверди. Бора-бора уларга эргашиб бораётган болалар ва томошатаалаб оломон жуда кўпайиб кетганидан дон Антонио дон Кихотга сездирмай орқасидаги қоғозни олиб қўйишга мажбур бўлади.

Тун кириб, ҳаммалари уйга қайтишди. Уйда уларни катта базм кутарди. Дон Антонионинг машҳур аслзодалар авлодидан бўлган қувнок, гўзал ва оқила хотини, меҳмонимни зиёфат қилиб, унинг мислсиз телбаликларини кўриб кўнгил ёзиб кетсинлар, деган мақсадда уйига бир неча дугоналарини таклиф қилган эди. Улар бу таклифни зўр қувонч билан бажонидил қабул этишди, лаззатли таомлардан сўнг, тунги соат ўнларда рақс бошланди. Хонимлар орасида қизиқ-қизиқ, беозор ҳазилларни ўйлаб топишга устаси фаранг ўйноқи ва жуда шўх икки қиз ҳам бор экан. Улар дон Кихотни ҳоли-жонига қўймай ўзлари билан рақсга тушишга тортавериш ҳолдан тойдиришди, уни жисмангина эмас, руҳан ҳам қийнаб ташлашди. Бу қоқ суяк, новча, сап-сарик кийинган одамнинг бесўнақай ҳаракатлари ажойиб манзара касб этарди. Хонимлар мулозамат қилишар, ҳадеб кўнглини овлашга тиришиб унга кўз сузишарди, дон Кихот эса хушмуомалалик билан одоб сақлаб, улардан қутулишга уринарди. Аммо хонимларнинг хиралик қилаверганларини кўриб, рицаримиз сабри тугаб, овози борича фигон чекди:

— Fugite, partes adversae!\* Тинч қўйинглар мени. Бошқа хушторлар ва муҳтарам зотларни топинглар ўзларингизга. Қалбим ҳоқони, оламда тенги йўқ малак Дульсинея Тобосская юрагимдан ўзидан бошқа кимсанинг хаёли ўрин олишига ижозат бермайди.

Шундай деркан, у сулайиб залнинг қоқ ўртасига ўтириб қолди. Дон Антонио уни кўтариб олиб бориб ўрнига ётқизишни буюрди. Санчо ўша заҳотиёқ унинг ёнига келиб, қўллари билан хўжайинини елпиб:

— Рақсга тушиб нима қилар эдингиз, сеньор хўжайин? Наҳот ҳамма паҳлавонлар рақс тушишни билишлари, барча жаҳонгашта рицарлар рақсга уста бўлишлари керак деб ўйласангиз? Агар шундай деб ўйласангиз, сизни ишонтириб айтаманки, қаттиқ янглишасиз: оламда шунақа одамлар борки, улар чиройли рақс тушишдан кўра бирон девни ўлдиришни осонроқ деб биладилар. Агар ўзимизнинг қишлоқча ўйинимиз бўлганда-ку, сизнинг ўрнингизга боплаб ўйин тушардим-а, ўзимам ўйнаганимда лочиндек парвоз қиламан-да, аммо-лекин жанобларнинг рақсига эса тирноқча ақлим етмайди,— деди.

Санчонинг бу гапларидан меҳмонлар ҳузур қилиб кулишди. У ўз хўжайинини тўшакка ётқизиб, шунча рақс тушиб терлаб кетганидан шамоллаб қолмасин деб кўрқиб, кўрпага буркаб қўйди.

#### LIV БОБ

### ДОН КИХОТНИНГ РИЦАРЬ ОҚ ОЙДИН БИЛАН УЧРАШУВИ ВА ШУНДАН КЕЙИН ЮЗ БЕРГАН ҲОДИСАЛАР

Балда бўлган ҳодисадан бир неча кун ўтгач, дон Кихот тўлиқ қуроолланган ҳолда, дарё бўйига сайрга чиқди. У: либосим — жанг анжоми, жанг майдони менинг ҳордиғим, деб такрорлашни яхши кўрарди. Рицарь соҳил бўйлаб беғубор денгиз ҳавосидан ҳузур қилиб бораркан, тўсатдан ўзи сингари бошдан-оёқ қуроолланган рицарнинг от қўйиб келаётганини кўрди. Унинг қалқонида Ой тасвири бор эди. Рицарь гап эшитиладиган масофага етиб келиб, дон Кихотга баланд овоз билан шундай деди:

— Эй шуҳратли, ҳеч ким томонидан номи тилларда дoston бўлмаган ламанчлик рицарь дон Кихот, шуни билиб қўйки, қаршингда рицарь Оқ Ойдин турибди. Умид қиламанки, менинг мислсиз қахрамонликларим ҳақидаги гапларни эшитгандирсан. Мен бу ерга сен билан жанг қилгани ҳамда менинг маъшукам, ким бўлса ҳам, сенинг ҳуснда тенгсиз Дульсинея Тобосскаяндан гўзалроқ эканлигини тан олишга мажбур қилгани келдим. Агар шу ҳақиқатни тан олсанг ўлимдан қутулиб қолсан, сени ўлдириш учун овора ҳам бўлиб юрмайман. Борди-ю,

\* Даф бўл, иблис (логичча).

мен билан жанг қилиб енгилсанг, менинг айтганимни қиласан, яъни қуролингни ташлайсан. Янги саргузаштлар изламайсан, ўз қишлоғингга қараб кетаверасан. Қишлоқда қиличга қўл урмасдан ўз рўзгоринг, жонинг фойдаси учун бир йил осойишталикда умр ўтказасан. Борди-ю, мени енгсанг, калламни узишинг мумкин, ана унда менинг отим ҳам, совутларим ҳам, қаҳрамонлигим учун орттирган шуҳратларим ҳам сенга ўтади, шонушуҳратинг янада ортади. Қандай қилсанг яхши бўлишини хўп ўйлаб ол. Мен дарҳол жавоб беришингни талаб қиламан, чунки бу ишни шу бугуноқ бир тарафли қилмоқчиман.

Дон Кихот рицарь Оқ Ойдиннинг бунчалик такаббурлигидан хайратга тушди. У мағрур, ўзига ишонган ҳолда жавоб берди:

— Эй қаҳрамонлиги менга ҳанузгача маълум бўлмаган рицарь Оқ Ойдин, онт ичиб айтаманки, сиз ҳеч қачон олий насаб Дульсинеяни кўрмагансиз, зотан мен аминманки, агар уни кўрганингизда мени жангга чақиришдан эҳтиёт бўлар эдингиз, унга бир қиё боқиш биланоқ оламда Дульсинеядан гўзалроқ малак йўқлигига ишонган бўлардингиз. Шунинг учун сизни ёлғонлаяпти деб айта олмайман, фақат хато қиляпсиз дейман, холос. Жангга чақиришингизни, барча шартларингизни қабул қиламан, фақат биттасига қўшилмайман: сизнинг шон-шуҳратингиз керак эмас менга, ўзимники ҳам етиб-ортади. Хуллас, ишни пайсалга солмайлик. Мана бу майдондан истаган ерни танлаб олинг, ҳақиқат ким томонда эканлигини худо ўзи кўрсатади.

Бу орада шу ердан ўтиб кетаётган бир неча кабальеро рицарь Оқ Ойдинни диққат билан кузатиб, дон Кихотга катта хавф таҳдид қилаётганини фаҳмлашди-да, дарҳол бу ҳақда дон Антониога хабар беришди.

Дон Антонио соҳил томон шошилди ва яккама-якка жанг бўладиган ерга дон Кихот жангга шайланиб, Росинантнинг бошини бураётган бир пайтда етиб келди. Ҳар иккала рицарнинг бир-бирига ташланишга тайёр турганини кўриб, дон Антонио орага тушди ва бундай хавфли жангни бошлашга нима сабаб бўлганини сўради. Рицарь Оқ Ойдин ўрталарида кимнинг гўзаллиги ҳақида баҳс кўрганлигини, дон Кихотнинг нималар деганини, яккама-якка жанг шартларини қисқача айтиб берди.

— Сеньор кабальеролар,— деди дон Антонио,— агар ўртадаги баҳсни бошқача йўл билан ҳал қилолмасангиз, агар сиз ҳам дон Кихот, сиз ҳам рицарь Оқ Ойдин, гапингиздан қайтмайдиган бўлсангиз, худо ёр бўлсин, жангни бошланглар.

Ана шундан кейин рицаримиз ўз тақдирини худо ва маъшуқаси Дульсинея ихтиёрига топшириб (у жангга кириш олдидан доим шундай қиларди), отини чоптириб келиш учун сал орқароққа кетди, унинг рақиби ҳам шундай қилди; ҳар иккови ҳеч қандай карнай ва бурғи овозини кутмай бараварига отларига қамчи босишди. Бироқ номаълум кишининг оти Росинантдан илдамроқ экан, рицарь Оқ Ойдин найзани ишга солмай (у эҳтимол найзани жўрттага баландга кўтаргандир), дон Кихотга шун-

дай қаттиқ ҳамла қилдики, кўз очиб юмгунча Росинантни уриб йиқитди, рицаримиз эса оти билан ерга ағанаб тушди.

Рицарь Оқ Ойдин дархол отдан сакраб тушди, дон Кихотнинг олдига чопиб келиб, найзасини унинг сипарига қадади ва хитоб қилди:

— Сиз энгилдингиз, рицарь, агар яккама-якка жангимиз шартини бажаришга кўнмасангиз шу заҳотиёқ ўласиз.

Йиқилишдан аъзойи бадани эзилган ва боши ғувиллаб кетган дон Кихот сипарини ҳам кўтармай, қабрдан чиқаётгандай ожиз, бўғиқ овоз билан жавоб қилди:

— Дульсинея Тобосская оламдаги энг гўзал аёл, мен эса жаҳондаги энг бахтсиз рицарман, маъшуқамни ҳимоя қилишга ожиз бўлсам-да, ҳақиқатдан ҳеч қачон воз кечолмайман. Ҳой рицарь, номусимдан маҳрум қилдингми, бас, суқ найзангни, ол жонимни.

— Буни ҳеч қачон қилмайман,— эътироз билдирди рицарь Оқ Ойдин.— Майли, Дульсинея Тобосскаянинг шуҳратига шуҳрат қўшилсин. Менинг талаб қиладиган нарсам битта: яккама-якка жанг олдидан шартлашганимизга кўра улуғ дон Кихот бир йилга ўз қишлоғига кетсин.

Бу гапларни дон Антонио, кабальеролар, ўша ердагиларнинг ҳаммаси эшитди; агар Дульсинеянинг шуҳратига доғ туширмайдиган бўлса, унинг ҳаммаси талабларини ҳалол ва виждонли рицарларга хос тарзда бажаришга рози эканлиги ҳақидаги дон Кихотнинг жавобини ҳам ҳамма эшитди. Ана шундай ваъдани олган рицарь Оқ Ойдин отини буриб дон Антониога, ўша ердаги кабальероларга одоб билан таъзим қилди-да, шаҳар томонга отини йўрттириб кетди.

Шу пайт жанг майдонига ҳарсиллаганича Санчо чопиб келди; у бўлиб ўтган яккама-якка жанг пайтида йўқ эди. Бу ерда Санчо иккита кабальеронинг ёрдамида дон Кихотни ердан кўтариб олди ва ўликникидай кўкариб кетган юзини очди. Росинант шундай лат еган эдики, ўрнидан силжишга ҳам мадори етмасди. Санчо шу қадар ҳаяжонга тушган эдики, нима қилишини, нима дейишини ҳам билмасди; унга бу ишлар тушда бўлаётгандай, бунга сеҳргарлик аралашгандай бўлиб туюлди. Унинг хўжайини энгилди, бир йилга қадар қўлига қурол олмасликка ваъда берди. У улуғ жасоратлар шуҳрати сўнаётганини; амалдор бўлиш, бойлик орттириш умиди ва орзуси тутун сингари тарқалиб кетаётганини кўрди.

Дон Антонио замбил келтиришга, жабрланган рицарни унга солишга ва уйига элтиб ташлашга буйруқ берди. Дон Антонионинг ўзи эса меҳмонидан шафқатсиз ўч олган рицарь Оқ Ойдиннинг кимлигини билишга қизиқиб, голибнинг орқасидан от чоптириб кетди. У рицарни меҳмонхона олдида отдан тушаётган пайтда қувиб етди. Номаълум кишининг кимлигини билиш иштиёқида унинг орқасидан меҳмонхонага кирди. Хизматкор рицарга пешвоз чиқиб кутиб олди ва уни пастки қаватнинг залига олиб кирди, дон Антонио уларнинг орқасидан изма-из кирди.

Номаълум кабальеро ўзининг орқасидан қолмаётганини кўрган рицарь Оқ Ойдин шундай деди:

— Сеньор назаримда менинг кимлигимни билмоқчисиз, кимлигимни яширишга ҳожат ҳам йўқ, хизматкор мендан совутларни ечиб олгунча ҳамма нарсани бажонидил айтиб бераман. Мен бакалавр Самсон Карраско бўламан, ламанчлик дон Кихот яшайдиган қишлоқданман, уни таниганларнинг ҳаммаси дон Кихотнинг тентаклиги, ақлсизлигидан чуқур қайғуга тушган, ҳаммадан ҳам мен кўпроқ азобланаман. Уни тентаклик касалидан халос қилишнинг бирдан-бир йўли қишлоқда тинч, осойишта ҳаёт кечириш эканлигини яхши билганим туфайли идальгони уйда ўтиришга мажбур қилиш учун айёрлик йўлига ўтдим. Бундан уч ой илгари дон Кихот билан учрашдим. Урмонлар рицари сифатида уни яккама-якка жангга чақирдим. Ғолиб нима деса, энгилган киши шунга қўниши керак эди. Олдиндан ўзимни ғолиб деб ҳисоблаб, ундан уйга қайтиш, ҳеч қаёққа чиқмаслик ҳақида ваъда олишга уриндим, шундай қилгандай унинг тентаклик касали даволанар деган умидда эдим. Лекин тақдир бошқача иш қилди: уни энга олмадим, у мени энгди, отдан улоқтириб ташлади, менинг ниятим мағлубият билан тугади. Дон Кихот тантана билан йўлида давом этди, мен эса энгилган, шарманда бўлган, йиқилишдан роса дабалам чиққан ҳолда уйга қайтиб келдим. Лекин у билан яна яккама-якка жангга куч синашиш, уни топиш ҳамда энгиш иштиёқи ҳеч сўнмади. Қишлоғимизга, Санчо Пансанинг хотини олдига герцог маҳрами хат, совға-салом билан келди, у дон Кихот билан унинг яроқбардори герцог қалъасида эканлигини батафсил ҳикоя қилиб берди, мен ўша ёққа ошиқдим, рицарнинг Барселонадаги мусобақага жўнаганини билдим, унинг орқасидан йўлга тушдим, ниҳоят сиз гувоҳ бўлган жанг юз берди. Дон Кихотнинг рицарлик қонун-қоидаларига қаттиқ амал қилишига таяниб туриб, у ўз ваъдасини бузмайди, деб ўйлайман. Бўлган гап шу, айтганларимга бошқа қўшимча қилолмайман. Лекин битта илтимос: кимлигимни дон Кихотга билдирманг, токи ақлдан озган у бечорага бир оз ақл кирсин, рицарлик алаҳсирашларидан озгина бўлса ҳам қутулсин.

— Эҳ, сеньор,— деди дон Антонио,— рицаримизга ақл кiritишга уриниб, бутун оламни унга эрмак бўлган бир тентакдан жудо қилиб орттирган гуноҳингизни худонинг ўзи кечирсин. Наҳотки дон Кихотнинг тентаклиги бахш этадиган ҳузур-ҳаловат у тузалгач келтирадиган нафдан ортиқроқ эканини тушунмасангиз? Бироқ тентакликка бунчалик берилиб кетган одамга ақл киргизишга ҳеч қандай куч таъсир этолмаслигига имоним комил, инсонийлик олдида гуноҳкор бўлиб қолишдан қўрқаман, лекин дон Кихотга ақл киришини истамайман, зероки унга ақл кирса фақат унинг энтак-тентак қилиқларидангина эмас, балки энг бадқовоқ одамни ҳам кулдириб юбора оладиган Санчо Пансанинг ҳазил-мутойибаларидан ҳам маҳрум бўламиз. Бироқ хотиржам бўлинг, мен индамайман, дон Кихотга ҳам ҳеч нарса

демайман, чунки сизнинг хатти-ҳаракатингиз ҳеч қандай натижа бермаслигини ўз кўзим билан кўрмоқчиман.

Баккалавр бошқача фикрда эканлигини, ишнинг яхши натижа билан тугашига умиди катта эканлигини айтди. Кейин у дон Антонио билан хайрлашди, совутларини эшакка юклашга амр қилди, дон Кихот билан жанг қилганда минган отига миниб уйига жўнади. Йўлда бу ҳаққоний қиссада баён этиш учун эътиборга сазовор бирорта ҳам ҳодиса юз бермади.

Дон Кихот олти кунгача кўрпада ғамгин, эзилган, қовоғи солинган, кайфияти бузилган ҳолда, ўзининг енгилишини қайта-қайта хотирлаб ётди. Санчо уни юпатган бўлиб шундай деди:

— Хўжайин, бошингизни кўтариб, хурсанд бўлиб ўтиришга интилинг. Ерга йиқилиб қовурғаларингиз синмаганига худога шукур қилинг, топмоқнинг йўқотмоғи ҳам бўлади... канорада ҳаммавақт лаҳим гўшт бўлавермайди, деган гапларни эсланг. Табибга кўрсатиб ўтирманг (чунки касалингиз бунга муҳтож эмас), номаълум юрт ва шаҳарларга саргузашт ахтариб боришдан воз кечиб, уйга қайтайлик. Бу ерда, муҳтарам жаноблари таъзирингизни едингиз, албатта. Аммо оқилона фикр юритганда мен бу ишда ҳаммадан кўра кўпроқ нарса йўқотдим. Ахир, губернатор бўлиб ҳамда оролни бошқариб кўриб, унга бўлган ҳавасим йўқолган бўлса-да, граф бўлиш умидидан воз кечганимча йўқ ҳали. Лекин, ҳайҳот, бу ҳеч қачон бўлмайди, чунки сиз муҳтарам жаноблари рицарликни ташлаганингиздан кейин қирол ҳам бўлолмайсиз. Эндиликда барча орзу-умидларим тутундай тарқалиб кетаркан-да.

— Жим, Санчо, менинг қамалиб ўтиришим фақат бир йилгагина чўзилишини биласан-ку. Шундан кейин ўзимнинг олижаноб касбимга қайтаман, ана ўшанда қиролликни эгаллайман, сенга графликни бераман.

— Илоҳо айтганингиз келсин, — деди Санчо. — Чиндан ҳам тўғри, бу машмашаларга эътибор бермаса ҳам бўлади. Гоҳ пирдан, гоҳ муриддан, бугун сизни енгашади, эртасига сиз енгасиз, бунинг учун умидсизликка тушмаслик, келгуси жасоратларга куч сақлаш зурур.

Санчо хўжайинини ана шундай юпатиб ўтирди.

Рицаримиз яккама-якка жангда орттирган жароҳатларидан халос бўлиб, аста-секин тузала бошлади. Кунлар кетидан кунлар ўтди, унинг ҳамон от минишга дармони етмасди. Кунлар унинг назарида жуда секин, зерикарли, ғамгин ўтаётгандай эди, чунки биринчи мағлубиятдан кейин одамларга кўринишдан уялар, доимо хона ичида қовоғини солиб ўтирарди. Ниҳоят у дармонга кирди, уйига қайтиш учун сафарга ярайдиган бўлиб қолди. Рицаримиз дон Антониога миннатдорчилик билдириб, Барселонани тарк этишга шошилди. Дон Кихот қурол-аслаҳасиз, йўл кийимида жўнади, совутлари эшакка юкланди, бечора Санчо эса пиёда кетишга мажбур бўлди.

ДОН КИХОТ БИЛАН САНЧО ПАНСАНИНГ ЎЗ ҚИШЛОҚЛАРИГА  
ҚАЙТАЕТГАНДА ЙЎЛДА ЮЗ БЕРГАН ҲОДИСАЛАР

Дон Кихот Барселонани тарк этаётиб ўзини отдан улоқтиришган жойни кўриб қўйиш учун орқасига ўгирилди ва хитоб қилди:

— Менинг Троям<sup>94</sup> шу ерда бўлган эди. Қўрқоқлик эмас, балки ёвуз тақдир илгари эга бўлганим шуҳратдан маҳрум қилди. Шу ерда — Фортуна — омадим ўзининг ҳамма беқарорлигини кўрсатди менга, шу ерда шуҳратим чироғи сўнди, хуллас, шу ерда ҳеч қачон қайта порламаслик учун юлдузим ҳам сўнди.

Бу гапларни эшитган Санчо шундай деди:

— Сеньор, мард киши бахтиёрликдан қанчалик хушнуд бўлса, улфатларга ҳам шунчалик сабр-қаноат билан бардош бериши лозим. Буни ўз тажрибамга қараб айтяпман: губернаторлигимда ўзимни хушчақчақ ҳис этган бўлсам, эндиликда пиёда яроқбардор бўлиб қолганимда ҳам унчалик ғам чекмаяпман. Эшитишимча, Фортуна исмли аёл мулоҳазасиз, ақли бир жойда эмас, бунинг устига кўзи кўр бир нарса, нима қилаётганини ўзи кўрмайди, кимни пастлатиб, кимнинг мартабасини улуғ қилаётганини ҳам билмайди.

— Санчо, сен улуғ файласуфсан, — деди дон Кихот, — жуда оқилона фикр юритасан. Бундай фикр юритишни қаердан ўрганганигни билмайман. Лекин оламнинг ишлари Фортуна, яъни кўр-кўрона, тасодифий омадгагина боғлиқ эмас, балки яхшилиқ ҳам, фалокат ҳам фалакнинг иродаси билан бўлади. Ҳар ким ўз бахтини ўзи яратади, деб бежиз айтилмаган. Мен ҳам ўз бахтимнинг яратгучиси эдим, бироқ зарур даражада мулоҳазалик кўрсата олмадим, ўзимга ҳаддан ташқари ишоншим кулфатга дучор қилди мени. Қирчанғи Росинантим рицарь Оқ Ойдиннинг бақувват отига бас келолмаслигини тушунишим лозим эди. Бироқ мен таваккал қилиб жанг бошладим, албатта қўлимдан келганча ҳаракат қилдим-у, барибир эгардан думалаб тушдим, гарчи ўз номусимдан айрилсам-да, берган ваъдамга нисбатан садоқатни ҳеч қачон йўқотмадим, йўқотмайман ҳам. Мен ботир, жасур жаҳонгашта рицарь эканлигимда забардаст қўлим, кўрсатган жасоратларим қилган ишларим қандайлигини рўй-рост кўрсатиб турарди, эндиликда оддий идальго бўлиб қолганимда эса, берган ваъдам қанақалигини, сўзнинг устидан чиқиш нималигини кўрсатиб қўяман. Хуллас, тезроқ юр Санчо. Уйга шошилайлик!

— Сеньор, — деди Санчо, — пиёда юрганда унча шошилиб бўлмайди. Келинг, рицарликни улоқтириб, совутларни эса бирор-та дарахтга илиб кетайлик. Оёғимни ердан узиб эшагимнинг белига эсон-омон миниб олсам, сиз буюрган ҳамда хоҳлагандай тез йўл босиб кетамиз, лекин пиёда бўлсам-у, сизга етиб юришим-



ни истасангиз, бу — мендан иложи йўқ нарсани талаб қилиш демакдир.

— Гапинг тўғри, Санчо,— деди дон Кихот,— совуту қалқонларимни ўлжа сифатида дарахтга осиб, Роланднинг совутлари остига ёзилганидай дарахт пўстлогига мана бундай деб ёзиб қўямиз:

...Роланд каби ботир, қаҳрамон,  
Бу совутни кияр бегумон.

— Олтидан ҳам қимматли сўзлар,— деди Санчо.— Агар Росинант саёҳатимиз учун зарур бўлмаганида, уни ҳам совутлар билан бирга осиб қўйишни таклиф қилардим.

— Йўқ, мен ундан ҳам, совутларимдан ҳам воз кечмоқчи эмасман! — деб хитоб қилди дон Кихот.— Ҳеч ким сидқидилдан қилинган хизмат учун мени ёмон ҳақ тўлайди деб ўйламасин.

— Ҳақ гапни айтдингиз, муҳтарам жаноблари,— деди Санчо.— Донолар эшакнинг айби учун эгарни жазоламайдилар деганлар, юз берган мусибатлар учун фақат ўзингизни айбланг, жазоланг, ўз газабингизни пачағи чиққан, қонга бўялган совутларга ҳам, бечора нимжон Росинантга ҳам, тез юришга ҳбли етмайдиган иккала оёғимга ҳам сочманг.

Ана шундай гап-сўз, суҳбатлар билан бутун кун, сўнгра яна тўрт кун ўтди. Бешинчи куни қандайдир бир қишлоқдан ўтишаётиб қўноқхона эшиги олдида каттагина оломон тўпланиб турганини кўришди. Дон Кихот уларга яқинлашганда қандайдир бир деҳқон баланд овоз билан деди:

— Ҳозиргина етиб келган манови сеньорлар бу ердагилардан ҳеч кимни билишмайди, шу сабабли баҳсимизни ҳал қилиб беришин.

— Бажонидил,— деди дон Кихот,— адолатли ҳукм чиқаришга уриниб кўраман.

— Гап бундай, муҳтарам сеньорлар,— деди деҳқон.— Қишлоғимиздаги семиз бир одам ориқ қўшнисини мусобақага чақирди. Биринчисининг оғирлиги ўн бир арроб, иккинчисиники беш арроб, холос. Шартга кўра икковлари ҳам елкаларида бир хил вазндаги юк билан роппа-роса юз қадамга чопишлари лозим. Лекин мусобақа олдидан семиз ўз рақибидан олти арроб темир орқалаб олишини талаб қилди, чунки ўзи юк кўтармаса ҳам бўлаверармиш, қорнининг оғирлиги ҳам етармиш.

— Бу бўлмағур гап,— деб гапга аралашди Санчо, дон Кихот бир нима демай туриб.— Шубҳаларингизни ҳал қилиб, ҳукм чиқариш учун менга — собиқ судья ва губернаторга рухсат бергайсизлар.

— Кези келганда гапириб қол, дўстим Санчо,— деди дон Кихот.— Ҳозир мендан ҳеч қандай гап чиқмайди, калламда ҳамма нарса аралаш-қуралаш бўлиб ётибди.

Рухсат олган Санчо атрофини ўраб, оғизларини очиб турган деҳқонларга мурожаат қилди.

— Оғайнилар! Семиз талаб қилган нарсада маъно ҳам, адолат ҳам йўқ. Қурол танлаш жангга чақирилган одам ихтиёрида бўлади: демак жангга чақирувчи ҳеч қандай шарт қўймаслиги лозим. Шу сабабли мен чиқарадиган ҳукм шундай, ориқни мусобақага чақирган семиз ўзини тозаласин, қиртишлайдими, текислайдими, ортиқча жойини кесиб ташлайдими, хуллас нима қилса ҳамки ортиқча олти арроб гўштини камайтирсин. Ана ўшанда у ўз рақиби сингари беш арроб вазнли бўлади, улар шунда бир хил шароитда югуришлари мумкин.

— Жин урсин! — деди бир деҳқон Санчонинг ҳукмини эшитиб. — Бу сеньор авлиёга ўхшаб фикр юритаркан, ишни каноник сингари ҳал қиларкан! Лекин семиз этини олти арроб у ёқда турсин, ҳатто бир унция камайтиришни ҳам хоҳламас.

— Бўлмаса югуришни мутлақо хаёлларига келтирмай қўя қолганлари маъқул, — деди бошқа бир деҳқон, — ориқ юк остида эвилишни семиз қиймаланмасликни хоҳламаса, гаровнинг ярми пулини винохўрликка сарфлайлик, майхонага бориб, манови сеньорларни ҳам таклиф қилайлик, вассалом.

— Раҳмат сизга, сеньорлар, — деди дон Кихот, — лекин мен бу ерда бирор дақиқа ҳам тўхтолмайман, аянчли вазият ҳамда қайғули фикрлар мени одобсизлик қилишга, йўлга шошилишга мажбур қилмоқда.

Шундай деди-ю, Росинантнинг биқинига ниқтаб жўнаб қолди. Деҳқонлар оғизларини очганларича унинг орқасидан қараб қолишди. Улар дон Кихотнинг ташқи қиёфасидаги ажиблик ва Санчонинг донолигидан бараварига ҳайрон қолишган эди.

Ўша кечани хўжайин билан хизматкор очиқ ҳавода ўтказишди.

Саҳар пайти яна йўлда давом этишди. Уларнинг йўли дарахтлар соясида осойишта шилдираб оқаётган анҳори бор водий орқали ўтди. Дон Кихот тўхтаб, ўйга толганча, қишлоқ табиати-нинг гаройиб манзарасига суқланиб боқди. Сўнгра хитоб қилди:

— Менга қара, Санчо. Миямга ажойиб фикр келди. Синов даврида ювош чўпонлар бўлиб, бу ерда қадимий Аркадиянинг удумларини тиклаймиз. Мен бир қанча қўй, чўпонлик ҳаётига зурур бўладиган нарсаларни сотиб оламан, ўзимни чўпон Кихотис дейман, сен чўпон Пансино бўласан; биз ашулалар айтиб, маъшуқаларимиз дардида оҳ-воҳ чекиб тоғ, ўрмон, ўтлоқларни кезиб юрамиз. Чанқоғимизни биллур булоқлар, зилол сувли ариқлар, катта дарёлар сувидан ичиб қондирамиз. Эманлар бизга ширин-шакар меваларини ҳадя қилади, мажнунтоллар бошимизга соя ташлайди, гуллар хушбўй ҳид беради, юлдузлар билан ой чарақлаб тун қалбини ёриб, йўлимизни ёритади, қўшиқлар ором бағишлаб, кўз ёшлар бизни юпатади.

— Жин урсин! — деб қичқирди Санчо. — Бунақа ҳаёт менинг дидимдаги ҳаёт. Мен аминманки, агар баккалавр Карраско ёки сартарош Николас янги ниятимиздан хабардор бўлиб қолишса, дарҳол ҳузуримизга келишиб, улар ҳам чўпон бўлиб олишади. Рухониймиз ҳам, худо кўрсатмасин, бизнинг улфатимизга ба-

жонидил қўшилади, ахир у ҳам жуда хушчақчақ одам, ҳузур қилишни яхши кўради.

— Гапинг тўғри, Санчо,— деди дон Кихот,— агар баккалавр Самсон Карраско чўпонлик унвонини оладиган бўлса, мен ишонманки, у номини Самсоново ёки Карраскон, сартарош Николас эса чўпон Николосо қилиб олади; руҳонийга ҳам бирорта ўзига ярашадиган, масалан, Куриамбро деган номни берамиз. Биз яхши кўриб қолган чўпон маъшуқаларига ном топиш дарахтдан нок узишдай осон гап. Бунинг устига маъшуқамнинг номи чўпонникига ҳам, маликаникига ҳам тўғри келаверади, яхшироқ ном излаб бош қотириб ўтирмайман. Санчо, ўзингни чўпон маъшуқанг учун истаган номни қўйишинг мумкин.

— Мен уни Тересона\* деб айтаман,— деди Санчо,— бу семизлигига ҳам мос тушади. Менимча, руҳоний чўпон маъшуқа орттирмагани маъқул, нега деганда бу унга муносиб эмас. Баккалаврга келсак, кўнглига келганича иш тутаверсин.

— Эҳ, Санчо,— хитоб қилди дон Кихот,— сен билан қойилмақом ҳаёт кечирамиз! Қанчадан-қанча сурнайлар, қўшналар, чилдирма, шиқилдоқ, бошқа музика асбоблари навосидан ҳузур қиламиз! Лекин музикадан ташқари, бўш вақтларимизни шеърхонлик билан ҳам ўтказамиз. Ўзингга маълум, қўлимдан шеър ёзиш ҳам келади, баккалавр Карраско эса ҳақиқий шоир. Руҳоний тўғрисида бир нарса деёлмайман, лекин гаров бойлашиб айтаманки, унда ҳам шеърхонликка майл кучли. Дўстимиз Николаснинг ҳам бу соҳада кўп нарсани англашига шубҳа қилмайман. Сартарошларнинг ҳаммаси ҳам гитара чалиб, ашула айтишга моҳир бўлади. Мен ҳижрон алаmidан йиғлайман, сен содиқлигингни, чўпон Карраско маъшуқасининг бепарволигини куйлайсизлар. Руҳоний Куриамбро ўзига хос мавзунни топиб олади. Хуллас, ҳамма нарса орзу қилгандан ҳам зиёда бўлади.

Бунга Санчо қуйидагича жавоб қилди:

— Сенъор, мен шу бахтли кунларга етишга олмасам керак деб кўрқаман, чунки мен толеи юришмаган бир одамман. Шундай бўла қолса қандай яхши яшар эдиг-а! Эҳ, агар чўпон бўлсам қанчадан-қанча ёғоч қошиқларни ясаб ташлардим! Бизда қанчадан-қанча чўпонлик асбоб-анжомлари бўларди-я! Ушанда ўзимни ақлли бўлмаса ҳам, эпчил бир одам сифатида машҳур қилардим. Қизим Санчика яйловга тушлик овқатлар олиб келарди.

Дон Кихот билан Санчо Панса чўпонлик ҳаёти ҳақидаги орзу ва суҳбатларга берилиб кетиб, қоронғи тушгунча йўл юришди. Шунда улар четга бурилишиб, соя-салқин бутазорга қўнишди. Кечки овқатдан сўнг дарахт тагига ётишди. Санчо соғломлиги, ҳеч қандай ғам-ташвиши йўқлиги туфайли одатдагидек дарҳол қаттиқ уйқуга кетди. Лекин дон Кихот ҳеч ухлолмади. Изтиробли фикрлар унга тинчлик бермасди. Ниҳоят унинг сабри чидамай, Санчони уйғотди.

\* Тересона (Teresona)— Тераса исмининг бўрттириб айтилгани.

— Санчо,— деди у,— сенинг беғамлигингга ҳайронман. Сен ё мрамрдан, ё қаттиқ бронзадан ясалганга ўхшайсан. Мен уйғоқман, сен бўлсанг бемалол ухляяпсан; мен йиғлаяпман, сен бўлсанг ашулалар айтяпсан, мен рўза тутиб ўзимни қийнаяпман, сен тўйиб овқат еганингдан пишиллаяпсан. Яхши хизматкор ҳеч бўлмаса одоб юзасидан хўжайинининг ғамига шерик бўлиши лозим. Манови сокин тунга, танҳоликка қара, тун билан танҳолик бизни бедорлик қилишга даъват этаётир. Тур, нарироққа бориб, Дульсинеяни озод қилиш учун ейдиган калтагинг ҳисобидан ўзингга мардларча уч ёки тўрт юз марта қамчи ур. Сендан ўтинанаман, ялинаман, зероки ўтган сафаргидек зўравонликка орқа қилиб қўлингнинг зарбидан тотиб қолмай тагин. Ўзингни савалаганингдан кейин туннинг қолган қисмини ашула айтиш билан ўтказамиз; мен маъшуқам ҳажри ҳақида, сен ўз содиқлигинг ҳақида куйлаймиз; шу билан қишлоқда ўтказадиган чўпонлик ҳаётининг бошланишига пойдевор қўямиз.

— Сеньор,— деди Санчо,— мен уйқумни бузиб, ўрнимдан туриб ўзимни савалаб азоблайдиган роҳиб эмасман, менимча, савалашдан кейин дарҳол қўшиққа ўтиш бундан ҳам қийинроқ бўлса керак. Уйқумга халақит берманг, муҳтарам жаноблари, иннай-кейин савалаш ҳақидаги бемаъни гаплар билан хархаша қилаверманг. Бўлмаса танам у ёқда турсин, кийимимдаги бирорта тукка ҳам қўл теккизмасликка қасам ичиб қўяман.

— Ҳой, тошжорак одам! Ҳой, шафқатсиз яроқбардор! Берган тузимга, кўрсатган меҳр-оқибатимга ташаққуринг шуми? Мен туфайли губернатор бўлдинг, мен туфайли графлик ёки бирор бошқа улуг мартабага кўтарилиш умидида юрибсан.

— Мен фақат бир нарсани биламан, сеньор,— деди Санчо,— ухлаётганимда қўрқинччи ҳам, умидни ҳам, меҳнатни ҳам, роҳатни ҳам билмайман, кишилар фикрини ёпувчи парда, очликни қувувчи овқат, чанқоқни босувчи сув, совуқда иситувчи олов, иссиқни бир меъёрга солиб турувчи совуқ бўлган, хуллас ҳаммани — чўпон билан қиролни, тентак билан донони тенг қилиб қўядиган уйқуни яратган одамга минг раҳмат. Лекин қаттиқ уйқунинг бир томони ёмон: айтишларича, уйқу — ўлим, уйқуга кетган билан ўликнинг ўртасида унча фарқ йўқ.

— Санчо, илгари ҳеч бунчалик сиройли гапирмаган эдинг,— деди дон Кихот.— Бу сен ҳадеб такрорлашни яхши кўрадиган туғишганинг билан эмас, туришганинг билан бўл, деган мақолни тасдиқлайди.

— Э-ҳа, сеньорим! — хитоб қилди Санчо.— Эндиликда мақолларни шодага териб ташлаётганим йўқ, балки муҳтарам жаноблари мендан кўра кўпроқ мақолларни тизиб ташлаяптилар. Тўғри, фарқи шундаки, сизнинг оғзингиздан чиққан мақоллар ўринли, мен айтганда эса, томдан тараша тушгандай бўлса-да, ҳар ҳолда барибир мақол.

Шу пайт улар водий томондан қандайдир бўғиқ, машъум овоз келаётганини эшитишди. Дон Кихот ўрnidан ирғиб туриб, қиличига қўл чўзди, Санчо эса эшакнинг тагига кириб, совут ва эгар-

жабдуқларни тўплаб орқасига яширинди, хўжайини қанчалик ҳаяжонланган бўлса, яроқбардор ҳам шунчалик кўрқиб кетган эди. Шовқин туновчиларга яқинлашиб, тобора авжига минарди. Гап шундаки, бир неча киши шу кеча олти юздан ортиқ чўққани ярмаркага ҳайдаб борарди: бу жониворлар шу қадар шовқин кўтаришдики, шовқиннинг қаёқдан келаётганлигини билмаган дон Кихот билан Санчонинг қулоқлари қоматга келди. Хур-хурлаб келаётган улкан пода ҳеч қандай юзхотир қилмай дўстларимиз устига ёпирилишди, дон Кихотни от-поги билан ағдариб юборишди. Санчони, эшакни, рицарнинг совут-қалқонларию эгар-жабдуқни топташди. Ўрнидан аранг туриб олган, ғазабланган Санчо хўжайинидан қиличини бериб туришини илтимос қилди; у ярим дюжина сеньор чўққани қилич суқиб ўлдирмоқчи бўлди, чунки у ўз оромини бузган беҳаёларнинг маҳлуқлар эканлигини билиб қолганди.

— Уларга тегма, дўстим. Уларда айб йўқ. Бу гуноҳларим эвазига юборилган шармандалик. Фалакнинг адолатли жазоси бу; енгилган жаҳонгашта рицарларга энг жирканч нарсалар ҳам ташланаверади; чиябўрилар ғажийди, арилар чақади, чўққалар топтайди.

— Жаҳонгашта рицарларнинг яроқбардорларини ҳам фалак жазоласа керак: фақат уларни пашшалар чақади, битлар этини ейди, очлик қийнайди. Бу энг катта адолатсизлик-ку. Агарда биз яроқбардорлар жаҳонгашта рицарларнинг ўғиллари ёки уларнинг яқин қариндошлари бўлганимизда, рицарлар гуноҳи учун етти пуштимизгача жазоласалар рози эдим. Лекин Панса билан дон Кихот ўртасида қандай қардошлик бор? Хўп майли, келинг, бирор жойга чўзилиб, туннинг қолганини уйқуда ўтказайлик. Худо хоҳласа, эрталаб ишларимиз юришиб кетади.

— Ухлайвер, Санчо,— деди дон Кихот,— ухлайвер, сен ухлаш учун туғилгансан. Мен эса бедор, сергак юриш учун туғилганман, орзу, қўмсовга чўмаман, маъшуқамга бағишланган шеърларда дардимни баён этаман.

— Менимча,— деди Санчо,— шеърда ифодаланган дардалам унча оғир бўлмаса керак. Муҳтарам жаноблари, сиз истаганингизча кўшиқ айтаверинг, мен кўлимдан келганича ухлайман.

У қоқ ердан ўзига яраша жойни ўлчаб олиб, кулча бўлиб ётди-да, ўша заҳоти уйқуга кетди. Чамаси Санчони бурч, кафиллик ёки бошқа ташвишлар ҳақидаги фикрлар безовта қилмаса керак. Дон Кихот эса дарахт танасига суюниб ўтирганича шеър тўқишга тушиб кетди, ҳар бир янги сатрни яқиндагина мағлубиятга учраган ва севгилисидан жудо бўлган киши сингари хўрсиниб, кўз ёшларини тўкиб айтарди.

Мана, тонг ҳам отди, қуёш нурларининг тинги Санчонинг кўзига урилди, у керишиб, ялқов аъзоларини ёзди. Чўққалар халтасини яхшигина бўшатиб кетганлигини кўриб очкўз чўққаларни, уларни ҳайдаб келувчиларни роса сўқди. Сўнгра хўжайин билан хизматкор йўлга тушишди.

Дон Кихот хафа, ғамгин борарди. Яқинда юз берган мағлубият қалбини эзарди, айниқса сеньора Дульсинеяни озод қилиш иши жуда секин бораётгани ҳақидаги фикр уни баттар қийнарди. Ниҳоят у яроқбардорига шундай сўзлар билан мурожаат қилди:

— Санчо, билишимча, Дульсинеяни озод қилиш учун ўз ихтиёрингча ўзингни саваламайсан. Бунга сени куч билан мажбур этишга эса ҳаққим йўқ. Эҳтимол, наф деган нарса сени тегишли зарбаларга бардош беришга ундар. Мен ўз-ўзингни савалашингни тақдирлашга тайёрман. Тўғри, сеҳр-жодуни олиб ташлашни пулга сотиб олишга унчалик ишонмайман. Мен дорининг даво бўлиши учун мукофот тўсқинлик қилишини истамайман. Бироқ шундай қилсак, ҳар ҳолда ҳеч нарса йўқотмаймиз. Қани, Санчо, қанча олишингни айт-у, ҳозироқ ўз-ўзингни савалайвер. Кейин ўзингга ўзинг ҳақ тўлайсан, чунки пулларимнинг ҳаммаси ўзингда.

Бу таклифни эшитган Санчо кўзларини бақрайтириб, анграйиб қулоқ солди. Дилида ўз-ўзини виждонан савалашга аҳд қилиб, дон Кихотга шундай деди:

— Майли, сеньор, шундай бўлсин, муҳтарам жанобларининг истаklarини бажо келтириб, ўз нафим учун хизмат қиламан. Хотиним, бола-чақаларимга бўлган меҳр-муҳаббатим ўз нафим учун ҳаракат қилишга мажбур қилаётир. Айтинг-чи, муҳтарам жаноблари, ўзимни савалаётганимда ҳар бир зарба учун қанчадан тўлайсиз?

— Санчо,— деди дон Кихот,— агар бу улуғ мақсад йўлида кўрсатажак жасоратинг учун сени муносиб равишда мукофотлайдиган бўлсам Венециянинг ҳамма хазиначилари ҳам етмайди. Чўнтагингда пулимдан қанча қолганини чамалаб кўр-да, ҳар бир зарбага ўзинг нарх белгилайвер.

— Жами бўлиб ўз-ўзимга уч минг уч юз мартадан ортиқроқ қамчи уришим керак, ундан бештасини уриб бўлдим. Буни ортиқчасига чиқариб юборайлик, демак уч минг уч юз қамчи қолади. Агар ҳар бир қамчини бир куартильдодан ҳисобласак (бутун жаҳон мени кўндиришга уринса ҳам бундан озига унамайман), бу уч минг уч юз куартильо бўлади; уч минг куартильо — бир минг беш юз ярим реал, яъни етти юз эллик реал демакдир, уч юз куартильоси эса юз эллик ярим реал яъни етмиш реал бўлади, жами саккиз юз йигирма беш реал бўлади. Гарчи роса калтакланган бўлсам-да, ана шу пулни муҳтарам жанобларидан олиб, уйимга бой-бадавлат, хурсанд қайтаман. Бошқа илож йўқ: тоққа чиқмасанг дўлона қайда, жондан кечмасанг жонона қайда.

— О, юмшоқкўнгил Санчо! О, суюкли Санчо! — хитоб қилди дон Кихот.— Бундан кейин мен билан Дульсинея иккимиз сенга умрбод ҳамду санолар ўқиймиз. Маъшуқам йўқолган қиёфасини топгач, биз учун роҳат-фароҳатли кунлар бошланади. Санчо, ўз-ўзингни савалашни қачон бошлашингни ҳал қил. Ишни тезлаштириш учун яна юз реал қўшаман.

— Қачон бошлайсан дейсизми? — деди Санчо. — Мана шу кечадан қолдирмайман. Муҳтарам жаноблари, сиз бугунги кечани очик ҳавода, кенг майдонда ўтказиш ғамини еяверинг; мен бўлсам ўзимни ҳеч аямайман.

Дон Кихот сабрсизлик билан кутган кеча ҳам бўлди, унга қуёш ғарб томонга одатдагига қараганда жуда секин оғаётгандай бўлиб туюлди. Ниҳоят улар йўлдан четроқдаги чиройли бутазорга боришди; у ерда Росинант ва эшакдан эгар-жабдукларни олишди, майсага чўзилишиб, Санчодаги бор нарсаларни еб тамадди қилишди. Шундан кейин Санчо Росинант ва эшакнинг нўхталаридан пишиқ қамчи ясади, хўжайиндан йигирма қадам наридаги қора қайин тагига борди. Дон Кихот унинг дадил, чаққон ҳаракат қилаётганини кўриб шундай деди:

— Менга қара, дўстим, ўзингни жудаям дабдала қилиб ташлама, ҳар қамчи урганингда озгина тўхтаб ол, ярмига бормай нафасинг бўғилиб қолмаслиги учун шошилма. Мен тегишли миқдордаги қамчиларни еб олмасдан туриб, ўлиб қолмасанг гўрга эди деб қўрқаман. Битта ортиқча ёки камроқ қамчи еб ютқазиб қўймаслигинг учун сенга яқинроқ жойда ҳар бир тушган қамчини тасбиҳ ўгириб ҳисобла тураман. Яхши ниятингга худо ёр бўлсин.

— Тўлаб турсанг бир меъёр, қанча олсанг қарз тайёр, — деди Санчо. — Мен ўзимни қаттиқ, лекин ўлмайдиган қилиб ураман: ахир, бошқа ҳеч нарсанинг ҳожати йўқ-ку.

Сўнгра у ярим белигача яланғоч бўлиб, қамчини қўлига олди-да, ўзини савалай бошлади, дон Кихот эса тушган қамчиларни санай бошлади. Санчо ўзига олти ёки етти қамчи туширгач, ҳар қамчининг баҳоси унинг назарида арзондай туюлиб кетди. Бир дақиқа тўхтаб, ҳисобдан адашганини, ҳар қамчи учун куартильодан эмас, балки ярим реалдан тўлаш лозимлигини айтди.

— Давом этавер, дўстим Санчо, тортинма, — деди дон Кихот, — сенга икки баравар ҳақ тўлайман.

— Ундай бўлса, — деди Санчо, — худо ёр бўлсин. Ҳозир устимга ёмғирдай қамчи ёғилади.

Бироқ айёр яроқбардор ўзини саваламай, дарахтларни савалай бошлади, вақти-вақти билан оҳ-воҳ чекар, ҳар оҳ чекканида танашидан жони чиқиб кетаётгандай бўларди. Санчо эҳтиётсизлик қилиб ўзини-ўзи ўлдириб, барча умидларни чиппакка чиқариб юборадими деб дон Кихот қаттиқ ташвиш торта бошлади. Бир оз сабр қилгач, алдамчига шундай деди:

— Дўстим, худо ҳақи, бу ишингни бас қил. Бу дори жуда нафқатсиз, оз-моз дам олишни талаб қилади. Янглишмасам, ҳозир ўзингга мингдан ортиқ қамчи урдинг, ҳозирча етарли: кўпол қилиб айтганда бунга эшак анча чидамли, лекин уни ҳам меъёрдан ошириб саваламаслик зарур.

— Йўқ, йўқ, сеньор, — жавоб берди Санчо, — менинг ҳақимда: «Пулни олди-ю, қўлини ювиб қўлтиққа урди», деб айтишларини хоҳламайман... Муҳтарам жаноблари, нарироқ туринг, ўзимга яна минг қамчи уришга халақит берманг. Шундай қилиб, ҳашпаш дегунча бу ишни тугаллайман.

— Сенда шундай яхши ният бўлса,— деди дон Кихот,— худо ўзи ёрлақасин. Ишингни давом эттиравер, мен чеккароққа чиқиб тураман.

— Санчо ўз машғулоти яна астойдил бошлади, ўзини шундай қаттиқ саваладики, бир неча дарахтларнинг пўстини ҳам арчиб юборди. Ниҳоят ён томонидаги дарахтга жон-жаҳди билан қамчи ургач, қичқириб юборди:

— Ҳлдим — ажалим етди!

Санчонинг аянчли қичқиригини эшитган дон Кихот унинг ёнига чошиб келди, қўлидан қамчи вазифасини ўтаётган юганни олиб, шундай деди:

— Дўстим Санчо, менинг манфаатим учун ҳаёт гулинг сўлишига худо йўл қўймайди. Ҳаётинг, хотининг, бола-чақаларинг учун зарур. Майли, Дульсинея бир оз сабр қилиб турар, мен эса бу ишнинг тезда бир ёқлик бўлишини умид қилишдан мамнунман, сен қувватга киргунча кутаман. Ҳамма иш кўнгилдагидек тамомланиши зарур.

— Модомики муҳтарам жаноблари шуни хоҳларканлар, мен розиман,— деди Санчо,— елкамга плашингизни ташлаб қўйсангиз, мен жуда тираб кетганман, ўзини биринчи марта савалаётган одамлардек шамоллаб қолишни истамайман.

Дон Кихот Санчонинг эгнига плашини ёпди, ўзи фақат камзулда қолди. Айёр хизматкор плашга яхшилаб ўраниб олди ва қуёш чиқиб уни уйғотмагунча ухлаб ётаверди. Йўловчиларимиз яна йўлга тушишди, қандайдир бир қишлоққа етгунча ҳеч қаерда тўхташмади. Улар бир қўноқхона олдида уловларидан тушишди; Санчо дон Кихотнинг бу қўноқхонани атрофида чуқур қандақлари бор, минорали, панжарали ва кўтарма кўприкли қалъага ўхшатмаганидан ҳайрон бўлди. Рицаримиз мағлубиятга учрагандан бери барча нарса ҳақида олдингидан кўра яхшироқ, ақл билан мулоҳаза юритадиган бўлиб қолди.

Улар уйқу билан овқатга тўйишгач, дон Кихот яроқбардоридан бу кеча савалашни давом эттирасанми, агар давом эттирадиган бўлсанг, шу том остидами ёки очиқ ҳаводами, деб сўради.

— Чин сўзим,— деди Санчо,— мен адо этадиган иш шундайки, уни уйдаими ёки очиқ ҳаводами — қаерда ўтказса ҳам барибир: ҳар қалай буни дарахтлар тагида бажарган маъқул; чунки дарахтлар бу ишни бажаришимда менга ўртоқ ҳамда кўмакчидир.

— Жуда соз,— деди дон Кихот.— Энди сен дамингни ол, куч тўпла, кечқурун йўлга тушамиз, бирор хилватроқ жойда қолган қамчиларни ўзингга туширасан.

Санчо рози бўлди, сўнгра бу ишни темирни қизигида ур, деганларидек тезроқ бажаришни истаганини айтди, чунки сусткашликда хавф бор, худодан тила-ю, болға уришни қўйма, икки марта «кут»дан бир марта «ол» яхши, осмондаги лочиндан қўлдаги нақд чумчуқ яхши.

— Санчо, худо ҳақи, мақолбозликни бас қил! — қичқирди дон Кихот.— Мен ўргатгандек содда, аниқ, маънили қилиб гапир,



ўшанда бир бурда нонга юз марта тўйишинг мумкинлигига иқроρ бўласан.

— Тўғриси, билолмай қолдим,— деди Санчо,— бу қандай кўргилик ўзи, мақолсиз бирорта ҳам гап айтолмайман, ҳар бир мақол назаримда ўз ўрнида айтилаётгандай. Ҳар ҳолда тузлашга ҳаракат қиламан.

Шу билан суҳбат тугади. Дон Кихот билан Санчо кеч киришини пойлаб бутун кунни қишлоқда ўтказишди. Бири кенг майдонда ўз-ўзини савалашни тугаллаш, иккинчиси ўз орзуларига етиш умидида эди. Ниҳоят кеч кирди, улар қишлоқни тарк этишди. Улар унча катта бўлмаган ўрмонзорга етишганда тун яримлаб қолганди. Шу ерда Санчо қолган қамчиларни ўзига уриши ва Дульсинеяни сеҳргар сеҳр-жодусидан озод қилиши лозим. У бу ишни тугаллади, бироқ ўз баданини савалашдан кўра қора қайинларни кўпроқ савалади албатта, чунки у гарчи елкасига пашша қўнса ҳам уни қамчи билан уриб ҳайдашни истамасди. Алданган дон Кихот Санчонинг танасига тушган қамчиларнинг бирортасини ҳам хато қилмай ҳисоблади, олдинги урганларини ҳам кўшганда жами роппа-роса уч минг уч юзтага етди. Ўзини бундай қурбон қилишни кўриш учун қуёш ўша куни одатдагидан эртaroқ чиққандай бўлди, қуёш нури таралиши биланоқ рицарь билан яроқбардор яна йўлга равона бўлишди. Ўз қишлоқларига жуда яқин қолган эди.

Дон Кихот яроқбардорининг ўз-ўзини савалиши туфайли Дульсинеяни сеҳр-жодудан озод қилганига қаттиқ ишониб, тонг ёришишини сабрсизлик билан кутди. Рицаримиз рўпарадан келаятган ҳар бир аёлга астойдил тикилиб, уларнинг ҳар бири тимсолида Дульсинеяни таниб олишга умид боғларди, чунки у Мерлиннинг ваъдасини муқаррар амалга ошади деб ҳисобларди. Ана шундай фикр ва истақлар билан ичи пишган дон Кихот Санчо билан тепаликка кўтарилди. Тепалик чўққисидан уларнинг қишлоғи кафтдагидек кўриниб турарди. Қишлоқни кўрган Санчо тиз чўкиб хитоб қилди:

— Азиз юртим, кўзингни оч, бадавлат бўлмаса-да, қамчи билан саваланиб қайтаётган ўғлинг Санчо Пансага бир назар ташла! Ана шундай ўғилларингдан бири, бошқанинг қўлида енгилган, лекин ўз-ўзини енгган, буни унинг ўз тили билан айтганда орзу қилинган ғалабаларнинг энг юқори нуқтаси деб билган Дон Кихотни ҳам қучоқ очиб кутиб ол.

— Беҳуда гапларни қўй,— деди дон Кихот,— ўзимиз орзу қилган чўпонлик ҳаётини ўтказадиган қишлоғимизга ўнг оёғинг билан қадам ташлаб кир.

Шундан кейин улар тепаликдан тушиб, ўз қишлоқлари томон йўл олишди.

ДОН КИХОТНИНГ ҮЗ ЮРТИГА ҚАЙТГАНИ, ШУНИНГДЕК, БЕТОБ  
БҮЛИШИ, ҚОЛДИРГАН ВАСИЯТИ ВА ВАФОТИ

Дон Кихот қишлоққа яқинроқ жойдаги хирмон олдида жан-жаллашаётган иккита болани кўрди. Улардан бири шеригига:

— Перикильо, беҳуда чиранма; сен уни энди умр бўйи ҳеч қачон кўролмайсан, — деб қичқирди.

Буни эшитган дон Кихот Санчога шундай деди:

— Дўстим, кўрдингми, анови бола нима деяпти: «Сен уни энди умр бўйи ҳеч қачон кўролмайсан», деди-я.

— Хўш, нима бўпти? — сўради Санчо. — Бола бақирди-қўйди-да.

— Нима бўпти дейсан-а! — деди дон Кихот. — Бу ёмон аломат эканлигини наҳотки тушунмасанг! Ахир, бу Дульсинеяни ҳеч қачон кўролмайман деган гап-да.

Санчо нимадир деб жавоб қилмоқчи бўлиб турган бир пайтда, иккита този ит қувиб келаётган қуёнга кўзи тушди, қўрқиб кетган қуён эшакнинг оёқлари орасига яширинди.

Санчо уни қўли билан ушлаб, дон Кихотга узатди, лекин у:

— Бу ёмон аломат, қуён қочяпти, тозилар уни қувишяпти: мен Дульсинеяни ҳеч қачон кўролмайман, — деди.

— Сизга ҳайронман, муҳтарам жаноблари, — деди Санчо. — Ишни чапасига айлантирамиз! Майли, манови қуён Дульсинея Тобосскага бўлсин, уни қувиб келаётган итлар Дульсинеяни деҳқон аёл қиёфасига киритиб қўйган ёвуз сеҳргарлар бўлсин. Мен уни ушлаб қўлингизга бердим, у бағрингизда турибди. Бунинг нимаси ёмон аломат бўлсин?

Шу пайт болалар қуённи кўргани келишди, Санчо уларнинг биридан нега жанжаллашганларини сўради. «Сен уни энди умр бўйи ҳеч қачон кўролмайсан» деган бола шеригидан қора чигиртка солинган қафасни тортиб олганини, уни ҳеч қачон бермаслигини айтди. Санчо ёнидан ҳамёнини чиқариб тўрт кварто олди, уни болага бериб, ўрнига қафасни олди-да, уни дон Кихотга узатиб, шундай деди:

— Мана, сенъор, менинг калтабин, аҳмоқона фикримча сизнинг ишингизга бултурги булутдай дахли бўлган барча ёмон аломатларни даф қилиб, ҳайдаб юбордим. Руҳонийимизнинг, ақлли одамлар ҳамда ҳақиқий христианлар бунақа аҳмоқона нарсаларга эътибор бермаслиги керак, дегани ёдимда. Муҳтарам жанобларининг ўзлари ҳам яқинда аломатларга ишонувчи христианлар тентаклар эканлигини айтиб, мени ишонтирган эдилар-ку. Бу ерда тўхтаб туришда ҳеч қандай маъно йўқ, қани кетдик.

Шу пайт овчилар етиб келиб, қуённи талаб қилишди, дон Кихот уни берди. Рицарь билан яроқбардор йўлида давом этишди, қишлоққа кираверишдаги майсазорда қўлларида оятлар ушлаган руҳоний ва баккалавр Карраскога дуч келишди.

Руҳоний билан баккалавр дарбадарларимизни дарҳол та-

нишди-ю, уларга томон кучоқ очиб югуришди. Дон Кихот отдан тушиб, дўстларини маҳкам кучоқлади. Дон Кихотнинг келганини эшитган қишлоқ болалари ҳам уни кўриш учун ҳар томондан чо-пиб келишди.

Шундай қилиб, рицарь билан яроқбардор болалар қуршовида, руҳоний ва баккалавр ҳамроҳлигида дон Кихотнинг уйи томон йўл олишди. Остонада аллақачон рицарнинг келганини эшитган экономка билан жияни кутиб туришарди. Бу хабар Санчо Пансанинг хотини Тереса Пансага ҳам етиб борди, у нари-бери кийинган, сочлари тўзиган ҳолда, қизи Санчикани етакла-ганича эрини кутиб олишга ошиқди. Ўз фикрича, унинг губерна-тордан кўра камбағалроқ кийинганини кўриб қичқириб юборди:

— Е раббим, нима гап ўзи, ҳой эр! Пиёда, бунинг устига оёқларингизни аранг кўтариб босаяпсиз! Негадир губернаторга ўхшамай қолибсиз.

— Жим, Тереса,— деди Санчо,— кўпинча канора бўлган би-лан лаҳм гўшт бўлавермайди. Юр уйга, сенга ғаройиб нарсаларни айтиб бераман. Энг муҳими, ҳеч кимга озор бермай, ўз ақлим би-лан тўплаган пулим бор.

— Пул бўлса чангалда шўрва, эржон,— деди Тереса,— қаер-дан олганингизнинг аҳамияти йўқ, пулни қандай қилиб топманг, бу билан ҳеч кимни ажаблантира олмайсиз.

Санчика отасини кучоқлаб, нима олиб келганини сўради, чун-ки у отасининг келишини кўзи тўрт бўлиб кутаётган эди. Хотини Санчонинг қўлидан ушлади, қизи эшакни ҳайдади, тўртовлари уйга жўнашди, дон Кихотни эса уйда экономка билан жияни, руҳоний билан баккалавр ихтиёрида қолдиришди.

Дон Кихот фурсатни бой бермай уйни ичидан бекитиб, дар-ҳол баккалавр билан руҳонийга енгилганини, зиммасига бир йилгача қишлоқдан чиқмаслик юкланганини айтиб берди. У ўзининг рицарлик ордени қонун-қоидаларига қатъий амал қи-лувчи чинакам жаҳонгашта рицарь сифатида аҳдини аниқ ба-жариш, ундан заррача орқага чекинмаслик ниятида эканини айтди. Бу йил эса у чўпонлик қилиш, далаларда танҳо кезиш, ўзининг ширин қаёлларига берилиб, чўпонларча саховатли ҳаёт кечирिशга аҳд қилганини ҳам сўзлаб берди.

— Эҳтимол,— деб қўшимча қилди у,— агар бошқа халақит берадиган муҳимроқ ташвишларинг бўлмаса, сизлар ҳам мен билан бирга бўларсизлар. Мен бир сурув қўй сотиб оламан, шундай қилганимизда чинакам чўпон бўлишимиз мумкин. Бироқ энг муҳими шуки, сизларга ажойиб ҳамда дабдабали номлар топиб қўйганман.

Руҳоний қандай номлар қўйганини сўради, у эса ўзига чўпон Кихотис, баккалаврга чўпон Карраскон, руҳонийга чўпон Ку-риамбро, Санчога эса чўпон Пансио номларини берганини айтди. Иккала дўст ҳам дон Кихотнинг янгича тентаклигидан ҳайратга тушишди. Бироқ унинг яна рицарлик саргузаштла-рини ахтариб бетишидан қўрқиб, бир йил ичида ақл кириб

қолар деган умидда бу тентагона фикрини зўр донолик ҳисоблашиб, чўпон бўлишга ваъда беришди.

— Бу таклиф менинг кўнглимдагидек бўлди,— деди баккалавр.— Менинг машҳур шоирлигим оламга маълум. Далаларда юриб, тинимсиз шеър тўқийман. Сеньорлар, энг муҳими ҳар биримиз ўзимиз ардоқлайдиган чўпон маъшуқаларимизга ҳам ном ўйлаб топишимиз керак. Мен аминманки, ошиқ чўпонларнинг қойдаси ҳамда уларнинг удумига амал қилиб, ҳар қанча мустаҳкам бўлмасин, маъшуқаларимиз номи ўйиб ёзилмаган бирорта ҳам дарахт қолмайди.

— Жуда соз!— қичқириб юборди дон Кихот.— Мен ҳаёлий чўпон қиз учун ном топиб ўтирмайман. Менинг ҳусида тенгсиз Дульсинейам бор, у мана шу соҳиллар шуҳрати, мана шу майсазорлар ҳусни, назокат чўққиси, хуллас, қанча мақтаса ҳам мақтов ожизлик қилиб қоладиган бир гўзал.

— Чин ҳақиқат,— деди руҳоний,— биз ҳам ўзимизга чўпон маъшуқалар излаймиз.

Самсон Карраско эса қўшимча қилди:

— Маъшуқаларимизни дунёдаги энг чиройли номлар билан атаймиз. Агарда маъшуқам, тўғрироғи чўпон қизимнинг исми Анна бўлса, мен уни Анарда дейман, борди-ю, оти Франциска бўлса мен уни Франсениа дейман, агар Люсия бўлса Люсинда деб атайман. Агар Санчо Панса ҳам бизга қўшиладиган бўлса, у ўзининг Тереса Пансасини Тересона деб атасин.

Бу номни эшитган дон Кихот кулиб юборди, руҳоний эса унинг ҳурматга сазовор, яхши ниятини мақтади, бўш вақтини албатта улар билан ўтказишга яна бир марта ваъда берди. Ҳар иккала дўст ҳам ўз саломатлигини сақлаши, бунинг учун нима зарур бўлса ҳаммасини қилишини ўтиниб, дон Кихот билан хайрлашди.

Бўлиб ўтган суҳбатни жияни билан экономка эшитиб туришган эди, руҳоний билан баккалавр кетиши билан улар дон Кихотнинг ҳузурига киришди. Жияни шундай гап бошлади:

— Бу қандоқ бўлди, сеньор тоғажоним? Биз бўлса сизни тинч, ҳузур-ҳаловатда яшаш учун бутунлай қайтиб келди деб ўйлабмиз. Лекин сиз бизни ташлаб, янги саргузаштлар ахтариб чўпон бўлишга, ҳамма сиз ҳақингизда:

Қайтмоқдасан қайдан эй чўпон,

Қайдин қайтиб, шашасан қаён?—

дейишлари учун бел боғлабсиз-да. Менга ишонинг, ҳуштак яшаш учун арпапоя қаттиқлик қилади.

Экономка ҳам гапга аралашди:

— Наҳотки сиз ёзнинг қоқ тушдаги жазирамаларига, туманли оқшомларга ва бўрилар улийдиган қиш кунларига бардош беролман деб ўйлайсиз? Бардош беролмайсиз. Бунга бақувват, чиниққан, шу ишда суяги қотган кишиларгина ярайди. Ёмон нарсани танлайдиган бўлсангиз чўпонликдан кўра жаҳонгашта

рицарлик минг марта аъло. Сеньор, ақлингизни йиғиб, маслаҳатимга кириш: уйда қолинг, хўжалик иши билан машғул бўлинг, тез-тез тавба-тазарру қилинг, камбағалларга хайр-садақа беринг, агар шундай қилганингиз яхши бўлмаса, майли, бошим гуноҳдан чиқмасин.

— Жим, қизларим,— деди дон Кихот,— нима қилишимни ўзим биламан. Мени ўринга ётқизинглар. Негадир мазам қочяпти. Лекин шунга ишончларинг комил бўлсинки, жаҳонгашта рицарми, чўпонми, ким бўлишимдан қатъи назар, ҳаммавақт сизларнинг эҳтиёжларинг ҳақида ғамхўрлик қиламан.

Қизлар дон Кихотнинг истагини бажо келтириб, уни ўринга ётқиздилар, овқатлантириб меҳрибонлик кўрсатдилар. Бироқ ана шундай ғамхўрликлар кўрсатилишига қарамай, рицаримизга тузалиш насиб қилмади. Бу дунёда ҳеч нарса абадий эмас, ҳамма нарсанинг, айниқса инсон умрининг ҳам ниҳояси бор: дон Кихотнинг умри эса ўз югуришини секинлата оладиган қобилиятга эга эмасди, у ҳеч кутмаган бир пайтда ўлим ташриф буюрди. Бу ҳол енгилганидан кейинги изтиробларданми ёки бошқа сабаблардан пайдо бўлдимми, ишқилиб, уни безгак тутди, олти кунгача ўрнидан қимирлаёлмади. Дўстлари — руҳоний, баккалавр ва сартарошлар унинг ҳолидан тез-тез хабар олиб туришди, саховатли яроқбардори Санчо Панса эса унинг ёнидан жилмади. Бечора идалъго Дульсинеянинг озод бўлгани ҳамда сеҳрдан қутулганини ўз кўзи билан кўриш истаги рўёбга чиқмагани туфайли ғам-ғуссага бериляпти деб ўйлашиб, уни қўлларидан келганича хурсанд қилишга уринишарди. Баккалавр уни дадил бўлиб ўрнидан туришга ва чўпонлик ҳаётини бошлашга ундарди: у, яъни Самсон Карраско бу ҳодисага бағишлаб илгари ёзилганлардан анча зўр шеър ҳам тўқиб қўйганини, бундай ташқари, у подани қўриқлайдиган иккита ажойиб ит ҳам сотиб олганини, бирининг оти Барсино, бошқасиники Бутрон эканини сўзлаб берди. Лекин буларнинг ҳеч қайсиси дон Кихот қайғусини ёза олмади.

Дўстлари табиб чақирди, у дон Кихотнинг томирини ушлаб кўриб, рицаримизга ўз руҳи борасида ўйлашини, чунки унинг танасига катта хавф таҳдид қилмоқда эканини айтди. Дон Кихот унинг гапларига хотиржам қулоқ солди. Бироқ табибнинг гапига экомомка, жияни, яроқбардори бефарқ қарамадилар, ҳаммалари дон Кихот аллақачон оламдан ўтгандай йиғи-сиғи қила бошладилар. Дон Кихот ўзини ёлғиз қолдиришларини илтимос қилди, чунки у ухлаб олмоқчи бўлди. Унинг илтимоси бажо келтирилди, у миқ этмай олти соат ухлади, у ухлаб ётганида экомомка билан жияни жони чиқиб кетмадимикан деб ташвишлана бошладилар. Лекин маълум вақт ўтгач, у уйғонди ва уйни бошига кўтариб қичқирди:

— Менга шунчалик марҳамат кўрсатган худойимга шукур. Худонинг даргоҳи шунчалик кенги, бандаларнинг гуноҳи уни ўзгартолмайди ҳам, бўшаштиролмайди ҳам.

Тоғасининг гапларига қулоқ солиб турган жиянига бу сўзлари

унинг олдинги этак-тентак гапларидан кўра бамаънироқдек туюлиб, у шундай деб сўради:

— Нималарни гапираётибсиз, сеньорим? Қанақа марҳамату бандаларнинг қанақа гуноҳи ҳақида гапираётибсиз?

— Жиян, шу пайт худойимнинг менга кўрсатган марҳамати ҳақида,— деди дон Кихот,— қилган гуноҳларим бунга ҳалақит бермади. Ҳозир ҳамма нарса ҳақида оқилона, аниқ фикр юритяпман, чунки ақлим манфур рицарь романларини ўқиш туфайли юзага келган гафлат туманидан халос бўлди. Эндиликда ўша қилмишларимнинг бемаънилигига, шайтон васвасаси эканлигига иқрорман, бироқ ақлимнинг бунчалик кечроқ кирганига афсусланаман, энди бўлса ўша китоблар етказган зиёнларни ювиш учун, ақл чироғи бўлган бошқа китобларни ўқиш учун вақт тифиз. Жиян, ўлимим яқинлигини сезиб турибман, лекин одамлар умримни ёмон, ўзимни тентак деб ҳисоблашмаса, шу аҳволда ўлиб кетмасам. Тўғри, тентаклик қилганман, бироқ тентаклигимни ўлимим ҳам тасдиқламасин. Азизим, саховатли дўстларим — руҳоний, бақкалавр Самсон Карраскони, уста Николасни чақир, чунки мен тавба қилмоқчиман, васият қолдирмоқчиман.

Лекин жиянининг уларни чақиршининг ҳожати бўлмади, чунки уларнинг ўзлари шу пайт хонага кириб келишди. Дон Кихот уларни кўрибоқ гап бошлади:

— Мени қутланг, сеньорлар: сиз қаршингизда жаҳонгашта ламанчлик дон Кихотни эмас, балки Марҳаматли деб ном чиқарган идальго Алонсо Кеханони кўриб турибсиз. Мен шу дақиқадан бошлаб Амадис Гальскийнинг ҳамда унинг ҳисобсиз авлодларининг душманман: мен жаҳонгашта рицарларнинг гуноҳга тўла тарихидан жирканаман; тентаклигимни, ўша китобларни ўқиб ўзимни ҳалокатга дучор этган хавф-хатарни англадим, энди худойим менга ақл берганда, ўз бефаросатлигимни қоралайман.

Хонада ўтирганлар бу гапларни эшитиб, янги бир тентаклик бошланмадимикин деб ўйлашди, Самсон шундай деди:

— Сеньор дон Кихот муҳтарам жаноблари, бу қандай гап? Дульсинеянинг озод бўлгани ҳақида хабар келган, ажойиб чўпонлик ҳаётини бошлаш учун ҳамма нарса муҳайё бўлган бир пайтда нималарни алжираяпсиз? Худди шундай бир пайтда ҳамма орзуларингиздан воз кечмоқчимисиз-а?

— Шу кунгача гапирганларимнинг ҳаммаси алаҳсираш эди,— деди дон Кихот,— алаҳсираш бўлганда ҳам жуда хавфли, ҳалокатлиси эди. Бироқ ўлим дақиқасида мен уни худонинг марҳамати билан ўз фойдамга ўзгартаман. Сеньорлар, ўлимим яқинлашганини ҳис этиб турибман; ҳазилни бас қилайлик. Тавба-тазарру қилишим учун мени руҳоний билан ёлғиз қолдиринглар, васият қолдиришим учун мирзани келтиринглар, чунки бундай пайтда киши ўз руҳи билан ҳазиллашиши ярамайди. Илтимос, сеньор руҳоний мени тавба қилдиргунча мирзага одам юборинглар.

Хонадагиларнинг ҳаммаси дон Кихотнинг гапига ҳайрон қо-

либ бир-бирларига қараб қўйишди, гарчи ўз шубҳаларидан воз кечиша олмаса-да, унга ишонишга майл билдиришди. Бундан ташқари у яна анча оқилона, маъноли гапларни ҳам айтдики, уйдагиларнинг шубҳалари тумандай тарқаб, рицарнинг ақли жойида эканлигига қаттиқ ишонишди. Бундай кескин ўзгариш назарларида унинг ўлим соати яқинлиги аломатидай бўлиб туюлди. Руҳоний ҳаммаларига хонадан чиқишларини буюрди, дон Кихот билан ёлғиз қолгач, тавба-тазарруни бошлади. Бақкалавр мирзаникига кетди, кўп ўтмай улар билан Санчо Панса ҳам етиб келди.

Хўжайинининг аҳволи оғирлигини бақкалаврдан эшитган Санчо аччиқ-аччиқ йиғлаётган экономка билан жиянини кўриб ўзи ҳам ёш боладай йиғлаб юборди. Кўп ўтмай тавба-тазарру тугади, руҳоний ташқарига чиқиб шундай деди:

— Алонсо Кехано муҳтарам жанобларининг чиндан ҳам қазоси етиб қолди, унинг эс-ҳуши, хотираси жойида. Унинг ҳузурига кириб, васият ёзилаётганда бирга бўлинглар.

Бу сўзлар экономка, жиян ва яроқбардор Санчо Пансанинг яна мўл-кўл кўзёш тўкиб йиғи-сиғи қилишига, чуқур оҳ-воҳ чекишига сабабчи бўлди, чунки у оддий идальго Марҳаматли Алонсо Кеханолиги пайтида ҳам, ламанчлик рицарь дон Кихот чоғида ҳам соддалиги, самимийлиги билан ажралиб турарди, дон Кихотни ана шу хислатлари учун яқинлари, уни таниганларнинг ҳаммаси ҳам чуқур ҳурмат қилишарди. Бошқалар билан бирга мирза ҳам ичкарига кирди. У васиятнинг сарлавҳасини ёзгандан кейин дон Кихот христианлик қонун-қоидаларига амал қилган ҳолда тасиятни моддама-модда изҳор қила бошлади:

— Аввало тентаклик пайтида ўзимга яроқбардорликка олган Санчо Пансанинг чўнтагидаги пуллар менга ҳалол хизмат қилгани учун унинг ўзида қолишини истайман. Бордию тентаклигимда унга битта оролни идора қилишни ҳадя қилган бўлсам, энди ҳушёрлигимда қўлимдан келса унга бутун бир қиролликни берардим, зероки унинг самимий, садоқатли қалби шундай тухфага лойиқ.

У Санчога мурожаат қилиб:

— Дўстим, мени кечир, мен туфайли сен аҳмоқ деган ном олдинг, зероки бу аҳмоқона кўчага мен сабаб бўлиб киргандинг, илгари ҳам, ҳозир ҳам жаҳонгашта рицарлар борлигига ишондинг, — деди.

— Оҳ, — деди Санчо кўзёши тўкиб, — бизни ташлаб кетманг, сеньор муҳтарам жаноблари, насиҳатимга қулоқ солинг, узок йиллар умр кўринг. Чунки киши биров унинг жонига қасд қилмай, жонидан тўйдирмай, фақат қайғу-алам чекишнинг ўзигаёқ ўлиб кетаверса, бу инсон томонидан қилинган энг катта бемаънилиқ бўлади. Илтимос қиламан, ўрнингиздан туринг, далаларни сайр қилгани борайлик, ўзимиз айтгандай чўпонча кийиниб юрайлик. Эҳтимол, бирорта чакалакзорда озод қилинган Дульсинеяни учратиб қолармиз, унда дунёда ҳеч қандай армонимиз қолмайди. Агар енгилганингиздан ҳам чекиб ўлаёт-

ган бўлсангиз, бутун айбни менга ағдариб қўя қолинг. Роси-нантнинг айилини яхши тортмаганим учун сизни эгардан йиқитиб юборишганини айтаверинг. Ўзингиз ҳам рицарлик китобларида бир рицарь иккинчисини отдан қулатгани каби ҳодисаларни кўп ўқигансиз. Бугун енгилган эртага албатта голиб чиқади.

— Албатта,— деди Самсон,— Санчо Панса бу ҳақда жуда ҳақ гапни айтди.

— Жим бўлинглар, сеньорлар,— деди дон Кихот.— Илгари тентак эдим, ҳозир ақлим жойида, илгари ламанчлик дон Кихот эдим, энди яна Марҳаматли Алонсо Кехано бўлиб қолдим. Пушаймоним ҳамда самимийлигим туфайли яна илгаригидек ҳурматларга сазовор бўлишдан умидворман. Энди эса, сеньор мирза, ёзишда давом этинг.

«Мен барча уй анжомларимни, мол-мулкимни жияним Антония Кеханога васият қилиб қолдираман, токи у мен бошқа одамларга рад қилган маблағларга эга бўлсин, шунинг билан бирга, аввало бутун умр менга хизмат қилган экономкага маош тўлашини илтимос қиламан, бунинг устига унга яна йигирма дукат пул ҳамда кийим-кечак берилсин. Сеньор руҳонийни ва сеньор баккалавр Самсон Карраскони, шу ердагиларнинг ҳаммасини васийларим этиб тайинлайман.

Бундан ташқари, борди-ю, жияним Антония Кехано эрга тегадиган бўлса, танлаган куёви рицарлик романларидан бе-хабар бўлишини аниқ билсин. Бордию ўша китобларни ўқиган, жияним эса унга эрга тегадиган бўлса, жиянимни меросдан маҳрум этаман, васийларимдан эса мол-мулкимни савобли ишларга сарф қилишларини илтимос қиламан».

Шу билан дон Кихот ўз васиятини тамомлади, ҳушидан кетиб, оёқ-қўлини узатди. Уч кунгача у ўзига келмай ҳушсиз ётди. Уй ичидагиларнинг ҳаммаси катта ташвишда қолди. Шундай бўлса-да, жиянининг томоғидан овқат ўтиб турди, экономка ҳам еб-ичишни унутмади, Санчо ҳам қорнини сийлаб турди; ўлим ҳақидаги фикр меросдан умидвор бўлиб ўтирган меросхўрлардаги табиий қайғуни ана шундай юмшатади ва сўндиради. Ниҳоят дон Кихот йиғи-сиғи қилаётган ҳамхоналари ва дўстларининг қуршовида тинчгина жон берди. Шу ерда турган мирза бирорта рицарлар романида бирорта жаҳонгашта рицарнинг дон Кихот сингари ўз тўшагида мана бундай тинчгина, христианчасига жон берганини сира учратмаганини айтди.

Санчо, жияни ва экономка кўзёшларини тасвирлаб ўтирмаймиз. Дон Кихот қабри устидаги барча расм-русумларни ҳам айтмайлик, фақат Самсон Карраско тўқиган шеърни айтиш кифоя:

Жасорати оламни тутган  
Машҳур ботир ётар бу ерда,  
Қаршисида ўлим ҳам тубан,  
Қалб оташи ёнар қабрда.



Хаёлот бўлса ҳам бир оз  
Баҳам кўрди шодлики, ғамки,  
Ўлиб кетди донишмандга хос,  
Телбасифат яшаса ҳамки.

Тарихини автор шу романда ростгўйлик билан ҳикоя қилган  
ламанчилик удабурро идальгонинг умри мана шундай тугади.

## СЕРВАНТЕС ВА УНИНГ РОМАНИ

Б. М. ЭНГЕЛЬГАРДТ

1605 йили Испанияда ҳамманинг диққатини бирданига ўзига жалб этган бир китоб босилиб чиқди. Бу ўша вақтларда бутун мамлакат берилиб ўқиётган рицарь романларига ҳажвий тарзда тақлид қилиб ёзилган ўткир ва қизиқ асар эди. Унинг муаллифи «киши онгида бемаъни рицарь тарихларига нисбатан нафрат уйғотишни» ўз олдига мақсад қилиб қўйганди. У ўз мақсадига эришди: «Дон Кихот» босилгач, рицарь романларини ўқиш бутунлай расмдан чиқиб қолди. Бироқ ғалати воқеа содир бўлди: рицарь романларининг куни битди-ю, аммо уларга тақлидан ёзилган асар яшаб қолди. Асрлар кетидан асрлар ўтаверди, лекин бу китобга қизиқиш сўнмади, балки тобора ўсди. У бутун дунёга машҳур бўлди, жуда кўп тилларга таржима қилинди; у ҳақда юзлаб китоблар ёзилди, китоб қаҳрамонларининг номлари атама бўлиб қолди, кўпгина ифодалар эса мақолга айланиб кетди.

Телба бир идальго ҳақидаги бу қиссада шундай масалалар кўтарилган, шундай ҳис-туйғулар ифодаланганки, улар одамларни ҳанузгача ҳаяжонлантириб келади. Бу китоб асар яратилган ўша даврнинг асосий белгиларини ўзига қамраб олган ва унда муаллифнинг дарабарликда кечирган серташвиш ҳаётининг бой тажрибаси ҳам ўз аксини тошган.

Мигель де Серватес Сааведра 1547 йилда Мадрид яқинидаги кичик шаҳарча Алькала де Энаресда дунёга келди. У табиблик билан шуғулланувчи, камбағаллашиб қолган дворяннинг ўғли эди. Етишмовчилик натижасида Мигель яхши билим ололмади, бироқ унда адабиёт ва театрга илк уйғонган қизиқиш мактаб машғулотларидаги камчиликларни бир қадар тўлдириб турди. У болалик чоғидаёқ шоир, драматург, ёзувчи бўлишни орзу қилар ва уни бу йўлда мадридлик ўқитувчи, гуманист Хуан Лопес де Гойос ҳар томонлама қўллаб-қўлтиқлар эди. Аммо муҳтожлик Сервантесни хизмат ҳақида ўйлашга мажбур қилади. У Испанияда ишга киролмайди. 1569 йилда у кардинал Аквавивага оддий мулозим бўлиб ишга жойлашади ва Италияга, Римга жўнаб кетади.

Кардинал ҳузуридаги бу паст хизмат уни қаноатлантиролмади. Худди шу вақтда папа, испан қироли Филипп II ва Венеция республикаси туркларга қарши уруш бошлашди. Сер-

вантес Аквавива саройини тарк этиб, ҳаракатдаги армияга кўнгилли аскар бўлиб хизматга киради. Сервантес кейинги тўрт йилни тинимсиз сафару жангларда ўтказади. Жасурлиги ва фидокорлиги туфайли у полкда катта обрў қозонади, беҳад ғайрати ва ҳамиша хушчақчақлиги туфайли эса ўртоқларига жуда ёқиб қолади. Лепанто яқинидаги денгиз жангида (1571 йил) у кўрагидан оғир яраланди ва чап қўли ишдан чиқди. Кейинчалик у «ўнг қўлимнинг шуҳрат қозониши учун шундай бўлди» деб ҳазиллашишарди.

1575 йили ҳарбий ҳаракатлар тинчиб, Сервантес ватанига қайтишга қарор қилади. У ватанига қайтаркан, бисотида майиб қўлию бош қўмондан ва Неаполь вице-қиролининг тавсия мактубидан бошқа ҳеч вақоси йўқ эди. Шундай бўлса-да, у Италияни кўради, Рим ва Неаполда узоқ яшади, италян тилини ўрганади, италиялик гуманистлар яратган нодир асарлар билан танишади. Унинг миясида талайгина адабий режалар пишиб етилади, қалби қувончи умидлар билан тўлади. У Мадридга тезроқ етиб олишни ўйлайди.

Неаполдан ватанига кетаётганида у оғир синовга дуч келади. У сузиб бораётган кемани мавританлик денгиз қароқчилари ушлаб олишади ва Жазоирга олиб кетишади. Сервантес беш йил давомида эркисизликда азоб чекади. Ҳаётини хавф остида қолдириб бир неча марта қочишга уринади, бироқ бу уринишларнинг бари муваффақиятсиз тугайди. У фақат 1580 йилдагина катта пул эвазига асирликдан қутулади ва ниҳоят Испанияга етиб келади.

Ватани уни хурсандчилик билан кутиб олмайди. Ота-онаси қашшоқликда кун кечиришарди. Маъмурлар унга бутунлай бепарволик билан қарайдилар. Жасорати ва мардлиги билан донг таратган майиб аскар кўчага қувиб чиқарилади.

Сервантес адабиётга мурожаат этади. У адабиётнинг турли соҳаларида ўз кучини синаб кўради, йилдан-йилга шафқатсиз қашшоқлик билан мардона кураш олиб боради. Бироқ ҳадеганда омади келавермайди. Сервантес ҳали ўз йўлини тополмаган, тамомила адабиёт анъаналари ҳукмида бўлиб, кўп чайналган адабий шакларда ижод қилар ва унинг ўзига хос генийлиги эркин қулоч ёяолмасди. Унинг шеърлари эътибор қозонмади, чўпонлар ҳақидаги «Галатея» романи муваффақият қозонолмади. Драмалари эса — у йигирмадан ортиқ драма ёзган — бир марта кўйилгач, сахнадан тушиб кетарди.

Сервантес қашшоқлик чоҳи ёқасига келиб қолади. 1587 йили у Мадриддан кетади. Аввал ғалла йиғувчи, кейинчалик эса Севильяда боқимандачилардан солиқ йиғувчи бўлиб ишлайди. У ўша давр Испаниянинг чекка ўлкаларидаги ҳаёт қайновига шўнғийди, деҳқонлар, бойлар ва майда дворянларнинг турмуш ҳам одатлари билан танишади. 1597 йили Сервантеснинг бошига яна фалокат тушади: у давлатнинг анчагина пулини бир банкачига ишониб топширади, банкачи эса пул билан бирга ғойиб бўлади. Сервантес турмага қамалади. Тўғри, дўстлари уни тез

кунда қутқаришади, бироқ 1598 ва 1602 йилларда у яна қамалади.

1604 йилдагина у ғазна қарзидан узилади ва маъмурлар уни ниҳоят тинч қўйишади. Шу йиллар мобайнида у тасодифий иш ҳақи ва дўстлари садақаси ҳисобига ярим оч ҳолда қашшоқликда ҳаёт кечиради.

Бироқ оғир муҳтожлик ва хўрликлар унинг иродасини бука олмайди, Сервантесга мардонавор хотиржамлик, руҳий кўтаринкилик ва хушчақчақлик ҳамиша ёр бўлади. Худди шу йиллар мобайнида у ўзининг «Дон Кихот» асари устида ўйлайди ва уни ёзади. Ҳажв тарзида тақлид қилиш усули унинг битмас-туганмас фантазияси ва беқиёс юморига кенг йўл очиб беради. Ниҳоят, унинг даҳоси бутун борлиғи билан намоён бўлишлиги учун имконият туғилади ва китоб ўз ўқувчисини топади. «Дон Кихот»нинг 1605 йилда босилиб чиққан биринчи томи алоҳида муваффақият қозонади. Аммо у ўз муаллифини моддий жиҳатдан таъминлай олмайди. Сервантес Вальядолидада аввалгидек ярим қашшоқликда ҳаёт кечиради. У ниҳоятда ҳолдан кетади, лекин бурунги ғайрат билан бор куч-қувватини адабиётга бағишлайди.

Умрининг сўнгги йилларида Сервантес «Дон Кихот»нинг иккинчи тоmidан (1615 йил) ташқари «Ибратли новеллалар» тўпламига кирган ажойиб новеллаларини, «Парнасга саёҳат» сатирик поэмасини, ўндан ортиқ комедия ва интермедияларини ёзади ва янги фантастик романини бошлаб қўяди. Бироқ ўлим эндиликда унинг ёқасига чанг сола бошлаган эди. У тугалланмаган китобига бағишлов қисмини ёзиб улгурар-улгурмас 1616 йилнинг 23 апрелида вафот этади.

Буюк ёзувчининг машаққатли ҳаёти шундай ўтади. Унинг хилма-хил таассуротлар ва кузатишларга қанчалик бой эканини кўз олдингизга келтиришингиз мумкин. У бу тажрибадан ўз романида кенг фойдаланади. Асар мазмунининг бойлиги ва бадий шаклининг ўзига хослиги билан Уйғониш даврининг энг яхши ёдгорликларидан бири ҳисобланади.

Бу Европа ҳаётида чуқур ўзгаришлар содир бўлаётган давр эди. Эскирган ва қолоқ шаклдаги хўжаликка эга бўлган феодал тузуми ўрнига капитализм вужудга келаётган бир давр эди. Савдо-сотик тобора ўсиб борарди. Америка ва Ҳиндистонга сув йўлининг очилиши билан савдо-сотик ишлари янада ривожланиб, тобора кенгая борарди. Европа моллари — газмол, мовут, чарм, темир буюмларга бўлган эҳтиёж борган сари ортарди. Мануфактуралар пайдо бўла бошлайди, биринчи йирик корхона эгалари етишиб чиқадилар.

Океан ортидаги мамлакатлар билан савдо-сотик ишлари ваҳшиёна усуллар билан олиб борилар ва бениҳоя фойда келтирарди. Олтин узоқ мустамлакалардан Европага дарё каби оқиб келар, беҳисоб бойлик тўпланарди. Шаҳарлар тез бойиб, тобора каттароқ салмоққа ва аҳамиятга эга бўла борарди. Шаҳар бойлари феодал оқсуяклари билан фақат айш-ишратда яшаш ва ҳа-

шамдорликдагина эмас, балки давлат ишларига ўз таъсирларини ўтказишда ҳам рақобат қила бошладилар.

Феодаллар ҳукмронлиги аста-секин чекланиб борарди. Мамлакат феодаллар томонидан ўзбошимчалик билан жорий қилинган ўз қонунлари, солиқлари, божларига эга бўлган феодал мулкларига бўлиниб кетган эди. Бу савдо-сотик ва саноатнинг ривожини жуда чеклаб қўярди. Янги хўжалик тартиби мустақкам марказий давлатга, бир хилдаги қонунларга, алоҳида вилоятлар ўртасидаги турли-туман тўсиқларни йўқотишга муҳтож эди. Бу даврда марказлашган миллий давлатлар ташкил топа бошлаган эди. Шу аснода капитализм ҳамма соҳаларда Европанинг хўжалик ва сиёсий ҳаётига ўз таъсирини ҳар қадамда ўтказа борарди. Албатта, эски феодализм қуллик занжирини парчалаб борар экан, у меҳнаткашларга янгилик келтирар, бу янгиликнинг машаққатлари эски жамият қийинчиликларидан кам эмасди. Капитализмнинг дастлабки капитал жамғариши деб аталган биринчи қадамииёқ океан ортидаги мулкларда яшовчи тинч аҳолини шафқатсизларча кириш ва талаш билан белгиланади. Мануфактураларда улар оғир эксплуатация қилинади, деҳқонлар тобора хонавайрон бўла боради, улар ерларидан ҳайдаб чиқарилади, бу жойларни пода ҳайдаладиган ўтлоқларга айлантирилади. Чунки жун савдоси капиталистларга катта фойда келтирарди.

Капитализм емирилаётган феодал тузуми билан олиб бораётган курашида ҳар ҳолда прогрессив тарихий куч сифатида майдонга чиқади. Бу кураш шиддатли ва шафқатсиз бўлиб, ҳамма соҳада олиб борилади. Бироқ у маънавий маданият соҳасида алоҳида кенг қулоч ёяди. Бу борада у буюк маданий ҳаракатни ҳаётга чорлайди. Энгельс буни «инсоният шунгача бошидан кечирган буюк прогрессив бурилиш» деб атаган эди.

Бу ҳаракатнинг асосини инсонни католик дини яратган ҳаёлий фантастик дунёдан ажратиб олишга ва уни моддий мавжуд дунёга яқинлаштиришга интилиш ташкил қилади. Янги маданий ҳаракат ақл-идрокнинг кўр-кўрона дин ақидаларига бўйсунитини қатъиян рад этади ва унинг табиат ҳамда инсон ҳаётини эркин равишда ўрганишга бўлган ҳуқуқини эълон қилади. У черков схоластикасининг мавҳум уйдирмаларига, фактларга асосланган фанни қарши қўяди.

Башарти ўрта аср олими табиатнинг у ёки бу ҳодисасига моғор босиб ётган илоҳий асарларнинг томларидан изоҳ қидирган бўлса, Уйғониш даври олими жонли тажрибага мурожаат қилади, назорат, тадқиқот қилади, ўлчайди ва ҳисоблайди. Коинотнинг тузилишини билишни истаганидан у сайёралар ва юлдузларнинг ҳаракатини ўрганади ва бу ҳаракатнинг қонунларини билишга интилади. У тавроту инжиллардан самовий мавжудотлар ҳақидаги турли-туман ривоятларни қидириб ўтирмайди. Уйғониш даври олими инсон танасининг тузилиши билан қизиқар экан, у одамни худо яратганлиги тўғрисидаги инжил афсоналарига мурожаат қилмайди, балки инсоннинг нафас олишини, қоннинг ҳаракатини кузатади, мурдаларнинг ичини ёради,

хилма-хил аъзоларнинг фаолиятини ўрганади. У физикавий ва химиявий тажрибалар ўтказади, илмий асбоблар ихтиро қилади, лабораториялар қуради. Шундай қилиб, аста-секин аниқ фанлар биноси қад кўтара бошлайди. Бу бино инсоннинг табиат ва ҳаётга бўлган барча қарашларини бутунлай ўзгартирибгина қолмай, балки табиатни инсонга бўйсундиришда қудратли қурол ҳам бўлади.

Аммо бу ҳам кифоя эмас. Янги маданий ҳаракат черковнинг ердаги мавжуд нарсаларнинг гуноҳкорлиги ҳақидаги зоҳидона таълимотини қаттиқ танқид қилади. У шахснинг ердаги жамики ноз-неъматларга бўлган эҳтиёжини ва истакларини қондира олиш ҳуқуқини тиклайди. Уйғониш даврининг шоирлари, рассомлари ҳамда ҳайкалтарошлари ўзларининг ажойиб шеърлари, чиройли расмларда ҳамда ҳайкалларида инсоннинг ердаги бахтини, эҳтиросининг улғуворлиги ҳамда қудратини, инсон танаси, басту келбати гўзаллигини шарафлайди.

Уйғониш черковнинг ҳақиқатни бутунлай эгаллаб олиш монополиясини барбод қилади. Черковнинг ўлик лотин тилини ягона адабий тил деб тан олиш даъвоси ҳам барҳам топади. Италия, француз, испан, инглиз тиллари каби жонли халқ тиллари янги маориф системасига тезда сингиб кетди, улар билан бирга халқ адабиёти фольклор, ривоятлар ҳам кириб келди бу соҳага. Бу буюк маданий ҳаракат ўзининг асл моҳияти жиҳатидан ҳаётий эди, чунки у илоҳий схоластиканинг тор доирадаги қуруқ сафсаталаридан қутулишга, табиат ва ҳаётни бевосита кенг кўламда ўрганишга интилади. Шу билан бир вақтда у чиндан ҳам халқчиллик хусусиятига эга эди, чунки унинг кўп томонлари кенг халқ оммасига маъқул ва манзур келарди.

Даврнинг шу иккала характерли хусусияти Сервантес асарида яққол кўзга ташланади.

Теварак атрофни ўраб олган ҳаётдан у қийналмасдан ўз романининг марказий қаҳрамонини қидириб топади. Камбағаллашиб қолган дворян, ҳозирги замонда жирканиб, ундан юз ўгирувчи ва ўтмиш тўғрисида хаёл сурувчи шахс — ўша даврдаги Испания ҳаётида типик фигура эди.

Испания XVI асрнинг ўрталарида ўз тараққиётининг алоҳида шарт-шароитига кўра чуқур иқтисодий кризисни бошидан кечирмоқда эди. Бу кризис мамлакат хўжалик ҳаётига ҳалокатли таъсир қилади. XV асрдаёқ бошланган ишлаб чиқаришнинг янгича капиталистик усулга ўтиши тўхтаб қолади. Ҳамон «Европада биринчи мамлакат» бўлиб келаётган Испания аён-ошқора инқирозга юз тута бошлайди. Дунёга ҳукмрон бўлишга интилган Филипп II нинг ҳалокатли сиёсати мамлакатнинг силласини қуритарди. Хазина бўшаб қолган, оғир солиқлар ва ноҳақ йиғимлар халққа кулфатлар келтирарди. Саноат ва ҳунармандчилик, деҳқончилик тушкунликка учраб, меҳнат қадрсизлана борарди. Аҳоли борган сари қашшоқлашарди.

Майда дворянлар — идальголар кўпчилик бошига тушган бу қисматдан қочиб қутула олмади. Майда дворянларнинг хўжа-

ликнинг янги формасига ўтишга қуввати етмасди, бунинг учун унинг маблағи етишмасди, бунинг устига бутун Испанияга ёйилган кризис унинг қашшоқлашувини ниҳоясига етказди. Кимнингки имконияти бўлса, қирол хизматига кетади, қолганлар камбағалликда яшашади, турли шубҳали ишларга киришади. Сервантеснинг ўзи ҳам қисман турли соҳаларга ўз кучини сарфлашга интилган ярим қашшоқ, майда дворянлардан эди. Лекин Сервантес буюк ижодий истеъдод эгаси бўлиб, турли-туман воқеалар ва таассуротларга бой шахсий ҳаёти уни борлиқни чуқур тушунишга ўргатади. Ўз замонасининг энг яхши интилишларини англаб етган Сервантес қашшоқ майда дворян образига ниҳоятда оригиналлик ва қуюк мазмун бағишлайди.

У телба қиёфадаги дон Кихот орқали яшашни билмайдиган, мавжуд шарт-шароитни тан олишни истамайдиган киши образини тақдим этади бизга. Бу Ғамгин Қиёфа рицарь энг эзгу ният-мақсадлар билан илҳомланган. У ҳақоратланган ва эзилганларга ҳомий бўлишни истади, дунёдаги зўравонлик ва зулмни тағ-томири билан юлиб ташлашга интилади, у жаҳонда адолат ва эркинлик ўрнатмоқни орзу қилади.

Бу буюк ниятни амалга ошириш учун олиб борилган курашда у шунчалик фидокорлик, шунчалик мардлик, шунчалик матонатлилик ва руҳан тетикликни намойиш қиладикки, натижада ўз жасоратига нисбатан чуқур ҳурмат уйғотади кишиларда. Дон Кихот ўз интилишларининг олижаноблиги, эътиқодининг самимийлиги ва қатъийлиги билан, ишига жону дилдан берилганлиги, шу йўлда ҳамиша ҳар қандай жасоратга ва хавф-хатарга тайёр туриши билан ҳақиқий қаҳрамондир. Унинг қайғули, аянчли сиймоси романдаги бошқа ҳамма персонажлардан устунроқ ажралиб туради, китобхон унинг ҳолига ачинади, ҳайрихоҳ, ҳамдарад бўлади. Ҳамма бало шундаки, дон Кихот ўзи кўзлаган юксак мақсадга эришиш учун нотўғри, фантастик йўллардан боради.

Турмушни ўзгартириш учун уни билиш, ҳаёт қонунларини бошқариб турувчи, уларни ҳаракатга келтирувчи кучларни ўрганиш лозим. Дон Кихот эса борлиқ тўғрисида тамомила ўзича фикр юритади, ҳаётда йўқ ва бўлиши ҳам мумкин бўлмаган нарсаларни тикламоқчи бўлади, унинг фикрича жаҳонгашта рицарлик дунёдаги барча ёвузлик ва дарду иллатларнинг ягона давосидир. Дон Кихот бу рицарликни рицарь романлари бўйича тасаввур қилади, бунинг тўғрилигига унда ҳеч қандай шубҳа йўқ. Китобларда яратилган қаҳрамонларга мафтун, бу асарларда тасвирланган жасоратларга маҳлиё бўлган дон Кихот аслида рицарлик қандай бўлганлигини билишни хоҳламайди, у даврларнинг қайтиб келмаслигини тан олишни истамайди. Дон Кихот ўзига хос жўшқин фантазияси яратган хаёлий дунёда яшайди. Борлиқ, рицармизни заррача қизиқтирмайди.

Мана у йўл ёқасидаги ғарибона қовокхонага яқинлашмоқда. Қаршисида камбағал оддий кишилар истиқомат қилувчи фақирона, ночор бир кулба турганини ўз кўзлари билан кўриб,

барча сезги аъзолари билан ҳис этиб, бунга ишонмоғи лозим эди. Бироқ рицарь романларида битилганидек, рицарь ўз йўлида ажойиб саройларни учратиши керак. Шунинг учун ҳам бу кўримсиз қовоқхона назарида кўз очиб юмгунча ҳашаматли саройга, унинг эгаси олижаноб сеньорга, ярим қашшоқ хизматкорлар эса гўзал хонимларга айланиб қолишади.

Дон Кихот саргузашт излаб йўлга отланар экан, юрагини банд этгучи маъшуқа танлашга қарор қилади. У қўшни қишлоқдаги ёқимтойгина деҳқон қизини танлайди. Аммо рицарлик қонунларига кўра рицарнинг маъшуқаси аслзода ва бойвучка хоним бўлиши керак. Ана шунинг учун ҳам ҳақиқат ва ақлга зид ўлароқ исми Дульсинея деб ўзгартирилган Альдонса малика бўлиб қолади. У саройда ажойиб канизу мулозимлар куршовида, ҳусну малоҳатда, билимдонликда беқиёс.

Ҳақиқатда сарой ҳам, баҳайбат полвонлар ҳам бўлмаганидек, Дульсинея ҳам аслида дунёда йўқ, фақат карвонсаройлар ва шамол тегирмонлари бор эди. Лекин бунинг аҳамияти йўқ. Дон Кихот учун хаёлида кўраётганлари турмушдаги ҳар қандай мавжуд нарсалардан ҳам ҳаётийроқдир. У атрофини ўраб олган жамики нарсаларни рицарлик донолиги асосида идрок этади ва талқин қилади. Тўғри, бунда воқелик тамомила нотўғри маъно касб этади. Аммо бу билан унинг иши нима?! Ахир, муқадас рицарь романлари қандай тақозо қилса, дунё шундай бўлиши керак-ку — демак, у шундай ҳамдир. Тўғри, гоҳо эътиқод асосида яратилган хаёлий дунё билан борлиқ ўртасидаги узилиш ниҳоятда қатъийлашади, аъзойи бадани мўматалоқ бўлган пайтларда дон Кихот пучаки хаёллардан бутунлай кўз юмиш лозимлигини сезарди-ю, барибир бу ҳол инсу жинс ва ёвуз жодугарларнинг иши деб таскин беради ўзига. Қасрларни карвонсарой, баҳайбат полвонларни шамол тегирмонларига айлантираётган ҳам ўшалар деб ўйлайди. Ҳамма нарса яна ўз изига тушади ва муқаддас рицарлик ёзувларининг обрўсига заррача путур етмай қолаверади.

«Муқаддас рицарлик ёзувлари» деб бежиз айтмадик. Дон Кихотнинг тафаккури ўрта аср ақидапарастии тафаккуридан у қадар узоқлашолмаганди. «Муқаддас ёзувлар ва ривоятлар»да каромат қилинганидек илоҳий таълим худди шундай фикр юртар, бутун борлиқни тор рамкага жойлаштиришга интиларди. Дон Кихотнинг миясига ўрнашиб қолган рицарь романларини муқаддас ёзув китобларига алмаштирсангиз, кўз олдингизда типик художўй — ақидапараст намоён бўлади. Аксинча, истаган илоҳий, «муқаддас китоблар» ўрнига рицарь романларини қўйсангиз, сиз яна дон Кихотнинг дунёқарашига эга бўласиз. Шундай қилиб, тентак бир идальгонинг ажойиб саргузаштлари тўғрисидаги аломат қисса схоластикага, борлиқни мавҳум эътиқод шарт-шароитлари асосида тузилган деб тушунтиришга ҳар қандай йўл билан зарба берувчи ўткир сатирага айланади.

Реал ҳаётдан шунчалик орқада қолиш нималарга олиб келишини Сервантес жуда қаттиқ киноя билан ёритади. Унинг



қахрамони ҳақиқат ва адолатга жону дилидан берилган олижаноб, ажойиб киши. Бироқ унинг ҳамма қахрамонликлари ўзи учун ҳам, у ёрдамга шошилган кишилар учун ҳам бир хилда кўнгилсиз тугайди. У болани ҳимоя қилади, лекин бу ҳимоя оқибатида бола ўзидан кетгунча калтакланади ва кўчага улоқтирилади, у занжирбанд маҳбусларнинг занжирларини узишга ёрдамлашади, аммо бу кишилар чор атрофга қочиб, бутун вилоятга даҳшат солишади; у гўзал Дульсинейни энг зоф муҳаббат билан севажагига ишонади, лекин бу юксак ҳис-туйғу атрофдагилар бошига бало тоши бўлиб ёғилади ва ҳақозо.

Рицарь романларидаги уйдирмаларга кўр-кўрона ишониш, мавжуд фактлар билан ҳисоблашишни қатъиян истамаслик дон Кихотда инсоний эҳтиёж ва майлга хазар, нафрат уйғотади. Унда кўз кўриб кулоқ эшитмаган кеккайиш ва такаббурлик авж олади. У эътироз билдиришларига тоқат қилолмайди. Кимки у билан келишолмаса, уни зolim деб эълон қилади ва унга ўз тигини тўғрилайди. Демак, воқеаликдан узилиб қолишлик инсоннинг энг яхши интилишларини, қалбдаги эзгу истаklarини сохталаштиради ва олиҳиммат Кехананинг хавфли мутаассибга айланиб кетишига оз қолади.

Бироқ Сервантеснинг сатираси фақатгина ўрта асрдан мерос қолган дунёга нисбатан мавҳум ва хаёлий муносабатда бўлишга қарши қаратилибгина қолмай, балки у Сервантес замонасидаги испан воқелигининг бошқа томонларини ҳам қамраб олади.

Сервантес романида телба, хаёлпараст билан бирга хушёр ва ишчан Санчо Панса ҳам ҳаракат қилади. Бу образ мукам-маллик ва мураккабликда дон Кихот образидан қолишмайди. Санчо Панса — бу дон Кихотнинг қиёфадоши, дон Кихотнинг акси, анча идрокли дон Кихотдир.

Дон Кихот рицарликка алоқадор бўлмаган ҳамма нарсалар ҳақида анчагина ақллилик ва донишмандлик кўрсатганидек, Санчо ҳам ўз тентакларча орзулари доирасидан ташқаридаги нарсаларга нисбатан хушёрлиги ва фаросатлилиги билан ажралиб туради ва кўпинча донишмандларга хос фикр юритади.

Дон Кихотнинг рицарь романларидаги хаёлий довдирашларига қарши туришга кучи етмаганидек, оққўнгил, ақлли ва камтарин, меҳнаткаш деҳқон Санчо ҳам осонгина бойлик орттириш дардига — жамиятдаги авантюризмга дучор бўлади. Бу ҳол умуман ўша давр учун характерли бўлиб, айниқса хонавайрон Испанияда кучли эди.

Ўша вақтда испан шаҳарлари омад изловчи учарлар, гард-камчи олибсотарлар ва авантюристар билан тўлиб-тошганди. Осонгина бойлик орттириш, нотўғри йўллардан бориб тез бойиб кетишда омадни синаб кўриш иштиёқи борган сари кенг қатламларни ўз ичига қамраб оларди. Бу иштиёқ оддий ҳунармандлар хонадонига ҳам, қашшоқлашиб қолган идальголар қўрасига ҳам, океан ортидаги ўлкаларда беҳисоб бойликка эга бўлишни ўйлаган қаллоблару хонавайрон бўлган қишлоқларга ҳам кириб боради.

Санчо Панса ҳам ана шу дардга мубтало бўлганди. Унинг ишчанлиги ҳам, идроклилиги ҳам дон Кихотнинг ҳотамтойлик билан берган ваъдалари олдида бардош беролмайди. Бунинг устига у муҳтарам идальгони кўздан бери ҳурмат қилишга одатланиб қолганди. Санчо Панса губернаторлик тўғрисидаги орзуларга, қандайдир оролга, бойликка ва донг таратишга қизиқиб қолиб, бир муддатда бойлик ортирувчи рицарга айланади. Олиҳиммат Кехана рицарь романларига берилиб кетиб, занглаган совуту қалқонларни тутиб саргузашт излаб йўлга тушганидек, тезда бойиб кетиш орзуси билан ҳовлиқиб қолган Санчо ҳам меҳнат билан кечадиган қишлоқ ҳаётини афсонавий яроқбардорлик касбига алмаштириб, жаҳонгашта рицарга ҳамроҳ бўлади. Агар дон Кихотнинг борлиққа нисбатан муносабати бемаъни романлардан ўқилган рицарлик қонунларига амал қилиш билан белгиланса, Санчо оламга ҳаётда тезда бойликка ботиб кетиш, оролга эга бўлиш, графлик лавозимига эришиш ва ҳоказо орзулар билан қарайди. Мана шунинг учун ҳам бу содиқ яроқбардор бир жиҳатдан ўз хўжайини сингари тентакдир.

Сервантес Санчони ўз хўжайинининг алжишларига ишонишга мажбур этади, худди шу билан у асарнинг бошқа қирраларини очган бўлиши мумкин. Зотан, ҳушёр, ақлли, шумроқ Санчо ўз хўжайинининг алжишларига, яъни жанобига маҳтал бўлиб турган императорлик тож-тахти ва бепоён қиролликлар ҳақидаги, ёвуз жодугарлар ва сеҳрланган маликалар тўғрисидаги, даҳшатли махлуқу баҳайбат паҳлавонларнинг ғарибона қовоқхоналар чордоқларида тўкилган қони ҳақидаги беъмани ҳикояларига Санчо қандай ишонсин? Бироқ, бир оз ўйлаб кўрилса, Сервантес тўғри йўл қўллаган. Ҳақиқатан ҳам, бойлик орттириш иштиёқи билан ёнган, ўз бахтини синаб кўришга ниҳоятда ошиққан Санчо дон Кихотнинг ишонтиришларига учмасдан қола олармиди?! Губернаторлик ва оролга хўжайинлик қилиш ҳисобига бойлик орттиришни кўзлаган бу соддамуғамбирнинг ўша афсонавий Эльдорадони очиш борасидаги фантастик режалардан ўша давр қаллоблари калласида ғужғон ўйнаган ашаддий чайқовчилик режаларидан нимаси кам дейсиз?!

Санчонинг ўз хўжайини фантазияси — алжирашлари тузоғига қандай илашиб қолганини кўздан кечиришдан ҳам завқлироқ ва ибратлироқ ҳеч нарса бўлмаса керак. «Ақл» унга буларнинг бари қуруқ сафсата эканини шипшитади. Аммо шу билан бир вақтда дон Кихотнинг асосли сўзлари унда рад қилиб бўлмас даражада таассурот туғдиради. У ўт билан сув орасида қолади, иккиланади, дам у ёққа, дам бу ёққа оғади. Пировардида у ҳақиқат қаердаю хаёл қаердалигини ажратолмай қолади, Санчонинг кайфиятини унинг очиқ кўнгиллилиги ва билимсизлигидан деб талқин қилиб бўлмайди. Биринчидан, у бутунлай содда эмас, иккинчидан эса, дон Кихотнинг телбалиги кўзга яққол ташланиб турар экан, Санчо унинг пучаки фантазияларини осонликча тушуниб олиши мумкин. Лекин шон-шуҳрат ва рицарлик жасоратларига иштиёқ дон Кихот

дунёқарашида қанчалик роль ўйнаса, бойлик орттириш Санчонинг дунёқарашида ҳам шунчалик роль ўйнайди. Шунинг учун ҳам дон Кихот ҳамма содир бўлаётган нарсаларни замонасини қайта тиклаш орзусига, Санчо эса губернатор бўлиш, бой, тўкин-сочин ва қувноқ турмуш ҳақидаги орзусига ёяди, таъбир қилади. Санчонинг жўн маишат борасидаги авантюраси дон Кихотнинг баландпарвоз фантазияларидан қолишмайди. Атрофдагиларда эса уларга қараб туриб қайси бири телба: жаҳонгашта рицарми ёки унинг содиқ яроқбардорими? — деган савол туғилади. Лекин пучаки эзгу, ширин хаёл йўлида жонбозликка келганда бири иккинчисидан қолишмайдиган қиёфадош шоввозлар эди.

Шундай қилиб, Сервантеснинг кинояси икки томонга қаратилган бўлиб, дон Кихот шахсида у схоластик дунёқараш устидан, Санчо Панса шахсида эса авантюризм ва манфаатпарастлик устидан кулади. Хўш, романда дон Кихот ҳаёлпарастлигига ва Санчо Пансанинг «ақли расолигига» қарши ўлароқ қандай ғоя, асос қўйилади? Карл Маркс сўзи билан айтганда, уларга Уйғониш даври гуманизмининг ажойиб вакилларида, улуғ сиймоларида бири бўлган Сервантеснинг чуқур реализми қарши қўйилади. Сервантес шу буюк реализм асосида Ғамгин Қиёфа рицарга ҳам, бойлик орттириш орзусидаги яроқбардорга ҳам баб-баравар зарба беради.

Сервантес рицарликнинг қайта тикланишини орзу қилувчи қашшоқлашиб қолган идальго билан бемаъни авантюраларга берилиб гарангсиб қолган оддий кишилар образини зўр санъаткорлик билан умумлаштиради. Сервантес бу образларда умуминсоний ҳис-туйғуларни мужассамлаштиради, уларни мавжуд ҳаётдан ажралган ҳомхаёл бандалар сифатида ва айни вақтда ақли расо қашшоқ мешчанлар қиёфасида тасвирлайди.

Сервантес ижодининг бадий фазилати, зарб қудрати унинг халқчиллигидадир. Шу халқчиллик туфайли у ўз даври, табақаси хурофотларидан юқори кўтарилди. Атроф муҳитда рўй бераётган воқеалар: эскилик қолдигими, янгилик қусурими — ҳаммаси борасида одил, аниқ фикр юритди. Сервантес ҳоким табақа йўриқларига тобе бўлмай, балки заҳматкаш испан халқининг фарзанди сифатида муайян ижод қилди.

Унинг романида XVI аср охирларидаги испан халқи ҳаёти ёрқин картиналарда атрофлича акс этдирилган. Китобда кимлар йўқ дейсиз: деҳқонлар ва ҳунармандлар, чўпон ва хачир ҳайдовчилар, руҳонийлар, қишлоқ маъмурлари, солдатлар, талабалар, майда ўғрилар ва жоҳил қароқчилар — ҳаммаси бор! Уларнинг бари ҳаётдагидек хилма-хил фонда ҳаққоний ёритилган, уларнинг ҳаммалари ўз жонли тилларида сўзлашади, бутун роман ўткир халқ мақоллари, маталлари ва қочириқлари билан тўлиб-тошган. Хушфёъл, маҳмадона Санчо Панса эса буларга нечоғлик бой.

Муаллиф оми, соддадил кишиларни, мавжуд ҳаётни самимий, хайрхоҳ, меҳр билан тасвирлайди. Асарда герцог ва гер-

цогиня қуруқ ва зерикарли тасвирланган бўлса, оддий кишилар қанчалик жонли, гўзал ва ёрқин гавдаланганига эътибор берини. Сервантес уларнинг ҳар бирининг қалб тўридан шундай бир фазилатлар топадики, китобхон унга хайрихоҳлик билан ёндошади. Масалан, хунук хизматкор аёл Мариторнес бисотида боқчақасига камбағал Санчога бир кружка вино олиб беради. Қовоқхона бекаси хачир ҳайдовчилар роса калтаклаган дон Кихотнинг яраларига самимий ҳамдардлик билан малҳам қўяди. Айёр, албатта, айёрлигича қолади, бироқ унинг тасвирида китобхонни ҳеч қандай жиркантирувчи томонлар йўқ. Сервантес ўз қахрамонларини бўрттириб тасвирлар экан, аynи вақтда уларнинг яхши томонларини бажонидил ёритади.

Бу ўринда Сервантес инсонпарварлиги тўла намоён бўлади. Унинг реализми, турмушни ақс эттиришдаги жуда катта маҳорати, инсонга нисбатан самимий ҳурмати, халқ истедодига юксак ишончи улкан, ягона қудрат кашф этади. Бу гуманизм туфайли Сервантес олижаноб ҳис-туйғуларга тўлиб тошган телба Кехана образини, содда-муғомбир, ҳиммату хизматда содиқ яроқбардор Санчо тимсолини хайрихоҳ яратади.

Санчо кечган саргардонлик, уқубат оддий испан халқиға хос турмуш уринишларининг акси деса бўлади, шунинг учун ҳам Сервантес ижодий бурчини ўз халқининг фарзанди сифатида ўринлайди. Сервантес ижодининг халқчиллик характерини кўрсатадиган ҳол шундан иборатки, у борлиққа сеҳн билан, бевосита, инсоний муносабатда бўлади. Бу эса гениал ёзувчи дунёқарашидаги одил, самимий гуманизмни, бадиий ижодидаги бой маҳоратни кўрсатади. Сервантес турмуш ва инсон устидан қанчалик аччиқ ва усталик билан кулмасин, унинг кулгисидан на умидсизлик, на руҳий тушқунлик сезилади. У инсонга ва унинг қудратига ҳаддан зиёд ишонгани учун ҳам умидсизликка тушмайди.

Романнинг мазмуни аслида ҳар қанча қайғули бўлмасин, унинг охири ҳар қанча фожиали тус олмасин, Сервантес бу борада ҳам ўз сермашаққат ҳаётидагидек мард, тетик ва бушчақчақлигича қолади. Шунинг учун китобнинг ҳеч қаерида ноумидлик, ишончсизлик сезилмайди. Аксинча, унда инсоннинг битмас-туганмас қудратига ишонч, хурофот ва ирим-сиримларга қарши, воқеликни тушунишда мешчанларча бирёқламалик, калтабинликка қарши курашдаги унинг истеъдодига, ер юзида янги, ажойиб турмуш қуришга чуқур ишонч барқ уриб туради.

## ИЗОҶЛАР

### В. М. ЭНГЕЛЬГАРДТ ТУЗГАН

<sup>1</sup> И д а л ь г о — кичик ерга эга бўлган дворян. Маврлар билан шиддатли кураш даврида (XI—XIV асрлар) Испания ҳаётида майда дворянлик муҳим роль ўйнаган эди. Испанияни чет элликлардан тозалашда озодлик қўшинлари асосан шулардан тузилган. Шунинг учун ҳам бу дворянлар курашларда қўлга киритилган ерларга пухта ўрнашиб олган эдилар. Бироқ, XV ва XVI асрларга келиб, қироллик ҳукмронлигининг кучайган даврида дворянларнинг бу гуруҳи аста-секин қирол армиясининг оддий хизматчиларига, расмий амалдор ва саройнинг майда ходимларига айланиб ўз нуфузларини йўқота бордилар. XV аср охириларида бошланган капиталистик хўжалик формасига томон бурилиш ва биринчи даражали истеъмол баҳосининг тобора ўсиб бориши майда дворянликни аста-секин тўла хонавайронликка олиб келади. Сервантес даврида сўнгги парча еридан ҳам ажралиб қашшоқлашган идальо испан ҳаётининг характерли вакилига айланиб қолган эди.

<sup>2</sup> А м а д и с Г а л ь с к и й — Испанияда айниқса XVI асрда катта муваффақият қозонган рицарлик романининг қахрамони. Бу романинг мазмуни бутунлай фантазияга асосланган. Инглиз маликаси Элизена ўғил кўради. Беникоҳ туғилган боланинг иснодига чидалмай, она уни денгизга улоқтиради. Номалум рицарь уни қутқариб, Шотландияга олиб кетади. Амадис улғайгач, қирол Лизуартининг қизи гўзалликда беқиёс Орианани севиб қолади. Амадис унинг муҳаббатини қозониш учун бутун Европани кезади, сирли, сеҳрли мамлакатларга бориб қолади, ҳайбатли паҳлавонлар, жодугарлар, сеҳргарлар билан олишади ва мингларча бошқа ажойиб жасоратлар кўрсатади. Роман Амадиснинг ғалабаси билан тугайди. Ниҳоят, у кўнглини банд этган гўзал қиз Ориананага уйланади. Романининг ҳамма қахрамонлари тўқима шахслардир. У ёки бу ҳодиса-воқеаларнинг қайси мамлакатда содир бўлаётганини англаб етиш қийин. Уларнинг ҳаракати қайси асрга мансублигини билиш ундан ҳам қийин. Роман автори воқеаларни тарихий ҳақиқатга ўхшатиб тасвирлашга интилмаган ҳам. Унинг асосий мақсади — довиорак, олижаноб, меҳрибон, шу билан бир қаторда эпчил, кучли ва саботли жангчи бўлган ҳақиқий рицарни акс эттиришдан иборат эди.

<sup>3</sup> « П а л ь м е р и н А н г л и й с к и й » р о м а н и — «Амадис Галльскийга» тақлид қилиб ёзилган китоблардан бири, Пальмерин — Англия қироли дон Дуэрте (Эдуард)нинг ўғли. У ўз укаси, сипоҳлик тимсоли Флориан билан биргаликда машуқаси йўлида ҳисобсиз қахрамонликлар кўрсатади, қудратли жодугар Делиантни енгади, сеҳрли оролга тушиб қолади ва ҳоказо. «Пальмерин Английский»нинг кўп эпизодлари инглиз хроникалари ва солномаларидан олинганлиги билан «Амадис Галльский» романидан ажралиб туради.

<sup>4</sup> С и д К а м п е а д о р («сид» — арабча «саид» сўзидан олинган: жавоб. ҳукмдор демакдир; кампеадор — испанчада қахрамон, жангчи) — Испанияда XI асрнинг иккинчи ярмида яшаган ярим афсонавий қахрамон. Унинг ҳақиқий исми Рюи Диас Бивардир. Сид ажойиб саркарда бўлган ва Костилия ҳамда Арагония қироллари қўшинларида узоқ хизмат қилган, уларнинг ўзaro ҳарбий тўқнашувларида қатнашган. Сид маврлар билан жанг қилиб, улардан Валенсияни тортиб олишда айниқса шухрат қозонган. Унинг номи билан кўн

афсоналар яратилган бўлиб, улар бизгача ҳисобсиз романслар ва поэмалар шаклида етиб келади.

<sup>5</sup> Ронселеваль дарасидаги жанг. Буюк Карл испан юришидан қайтаётганда (778 йил) қўшинининг арьергарди Ронсеваль дарасида тўсатдан душманга тўкнашиб қолиб, деярли бутунлай кириб ташланган. Бу жангда Карлнинг сафдошларидан бири — Хруадланд (Роланд) ҳалок бўлади. Бу воқеа француз эпосининг машҳур «Роланд ҳақида қўшиқ» асарида ёритилди. Бернард де Карпю — ўрта аср испан эпосининг афсонавий қаҳрамони.

<sup>6</sup> Буцефал — Македония подшоиси ва қадимги замоннинг машҳур саркардаси Буюк Искандарнинг (356—323 йиллар, эрмизгача) оти. Буцефал жанг суронидан хурқмас, нақ душман тўдасига ташланарди, у шиддати, даҳшати ва бардоши билан шуҳрат қозонган от. У қонли жанглардан бирида ҳалок бўлгунича Искандарга узоқ ва содиқ хизмат қилади. Искандар ўз отини катта мотам маросими билан дафн қилади, унинг қабри ўрнида бутун бир шаҳар барпо этади ва шаҳарни Буцефалия деб оти номига қўяди.

<sup>7</sup> Сиднинг Бабьекаси — қатор романсларда шуҳрати куйланадиган Сиднинг оти. Сиднинг оти Буцефал сингари ниҳоятда учқур, кучли ва бардошли бўлган. Маврлар билан бўлган жангларда у эгасини бир неча бор хатардан сақлаб қолган.

<sup>8</sup> Феб — қадимги юнонларда кўш ва ёруғлик худоси.

<sup>9</sup> Паладин — дастлаб Буюк Карлнинг (VIII аср охири — IX аср боши)ларида яшаб ҳукмронлик қилган) аслзода яқин кишилари паладин деб аталган, улар император билан унинг саройида бирга яшаганлар (лотинчада саройни — palatium дейилган) ва уни юришларда кузатиб борганлар. Кейинчалик ҳар қандай аслзода ва шавкатли рицарни паладин деб аташган.

<sup>10</sup> Рицарлик унвони бериш. Сервантес ҳақиқий рицарликка ўтказиш маросимини қатта мароқ билан масхара қилади. Рицарлик равнақ топган даврда (XI—XII асрлар) бу маросим айниқса тантана ва дабада билан ўтказилган. Ҳар бир рицарликка ўтувчи одам унвон олишдан олдинги тунни қурол-яроғларни қўриқлаб черковда ўтказиши лозим эди. Эрталаб ибодат вақтида бу қурол-яроғ табаррукот қилинарди. Янги рицар унинг устида рицарликнинг ҳамма қонун ва қоидаларига қатъий амал қилажағига тантанали ваъда беради. Кейин бирорта донгдор ва жанговар ишда чиниққан рицар чиқиб, қўлига қилич олар ва у билан унвон олувчининг чап елкасига уч марта уриб: «Сени рицарликка ўтказаман», дерди. Шу билан маросим ҳам тугарди. Рицарликка ўтувчининг белига қилич осишиб, олтин шпорлар тақиб қўйишарди. У ерда ҳозир бўлганларнинг ҳаммаси янги рицар шарафига уюштирилган зиёфатга йўл олишарди.

<sup>11</sup> Реал (real, le plata 68 мараведис) — тўрт қуартодан иборат, 20 тийинга яқин танга.

<sup>12</sup> Маркиз Мантуанск ва жияни рицарь Балдуин ҳақидаги қадимий романс Испанияда тилдан-тилга ўтиб юарди.

<sup>13</sup> Лиценциат — университетларда ўқитиш ҳуқуқини берувчи илмий унвон.

<sup>14</sup> Урганда — дон Кихот ёқтирган «Эспландиан» рицарлик романидаги асосий қаҳрамонлардан бири, сеҳргар аёл.

<sup>15</sup> Архиепископ Турпин — VIII аср охиридаги Реймс архиепископи. Узоқ вақт «Буюк Карлнинг ҳаёти ҳақида»ги машҳур йилнома. «Турпин йилномаси»ни тузган шахс шу киши деб келинади. Буюк Карл билан унинг Испаниядаги жияни Роланднинг қаҳрамонликлари ва саргузаштлари ҳақидаги бу йилнома тарихий ҳақиқатдан узоқ фантастик, афсонавий ҳикоялардан иборат. «Турпин йилномаси» Буюк Карл ва унинг сафдошлари ҳақидаги кўпгина рицарлик романларига асосланади.

<sup>16</sup> Ун икки пэр — Буюк Карл сафдошларидан бўлган ўн икки афсонавий рицарни шундай деб аташарди. Улар орасида энг машҳурлари: Роланд, Оливье, Рейнальд Монтальбанскийлар эди. «Турпин йилномаси»да бу рицарларнинг мутлақо ақл бовар қилмайдиган қаҳрамонликлари ва саргузаштлари тасвирланади.

<sup>17</sup>Рольдан — Роланд номининг халқ томолидан ўзгартирилган шакли.

<sup>18</sup>Яроқбардор — яроқбардорлик касби паст иш эмас эди. хизматкор бўлмай, балки рицарнинг жанговар ёрдамчисидир. Қадимий ва бадавлат дворян оилаларига мансуб бўлган ўспиринлар ўз қаҳрамонликлари билан шухрат қозонган рицарларга жон деб яроқбардор бўлганлар. Бундай машҳур рицарга яроқбардорлик қилиш яхшигина ҳарбий мактаб ҳисобланган. Бундан ташқари, рицарь ҳомийлигида саройдан эътиборли танишлар орттиришига, юқори мансабларга кўтарилишга умид қилиш мумкин эди. Лекин, энг муҳими — яроқбардор бўлиш рицарлик унвонини олишда бирдан-бир тўғри йўл эди. Яроқбардорлар маош олишмасди. Аммо одатда рицарь кўлга киритган ўз ҳарбий ўлжаларидан унга маълум улуш ажратиб ва совғалар бериб турарди. Рицарь бирор эътиборли лавозимга кўтарилар экан, ҳеч қачон ўз яроқбардорини эсдан чиқармас ва унинг мумкин қадар яхшироқ ишга жойлашиб олишига ёрдамлашарди. Чин рицарлик қоидаларига асосан оддий деҳқон аёл Альдонса Лоренсо ифбатли хоним ролига қанчалик мос келмас, Санчо ҳам яроқбардорликка худди шунчалик мос келмасди.

<sup>19</sup>Бриарей — қадимги юнонларнинг эътиқодига кўра, денгиз худоси Посейдон ва маъбуда Фетиданинг ўғли. У юз-қўлли, ўт-олов пурковчи, ҳаддан зиёд паҳлавон бўлган.

<sup>20</sup>Бенедиктчи роҳиб — VI асрда ташкил топган Бенедикт орденининг роҳиби. Орден катта бойликка эга бўлиб, таъсири ниҳоятда кучли эди.

<sup>21</sup>Бискайлик — баск.

<sup>22</sup>Санта Эрмандад (сўзма-сўзига — муқаддас биродарлик) — шаҳар ва қишлоқ аҳолисининг эркин уюшмалари дасглаб шундай деб аталган. Бу уюшмаларнинг мақсадлари ўзлари ва мол-мулкларини феодал ҳамда уларнинг шерикларининг бебошликларидан сақлаб қолишдан иборат бўлган. XIV асрда бутун Испанияни шундай уюшмалар босиб кетади; улар иттифок ташкил қилишиб, қудратли ташкилот тузишади. Феодаллар Санта Эрмандадни барбод этилишга бир неча марта уриниб кўришади, бироқ феодал зодагонларининг таъсирини чеклашга интилаётган қирол ҳокимияти биродарлики катъий қўллаб-қувватлайди. Санта Эрмандад расман тан олингач, аста-секин эркин иттифокдан маъмурий муассасага айланади. У турли-туман жинойтларга қарши курашувчи химоя корпусига айланиб қолади. Сервантес замонасида Санта Эрмандаднинг эътибори жуда паст тушиб кетади. Инквизиция\* уюшмани ўз таъсирига олиб, унинг аъзолари хизматидан ўз шахсий мақсадлари йўлида тез-тез фойдаланиб турган.

<sup>23</sup>Асумбра — икки литрдан кўпроқ бўлган суяқлик ўлчови.

<sup>24</sup>Альбрак камали — италиялик шоир Маттео Болардонинг (1434 — 1494) «Ошиқ Роланд» поэмасидан эпизод.

<sup>25</sup>Силен — қадимги юнонларнинг эътиқодига кўра май-узумчилик худоси Вакх (Дионис)нинг тарбиячиси. майхўрлик ва ишў ўйин-кулги, байрамларнинг муҳлиси бўлган. Силенин кўпинча эшакка мингазилган ва маст ҳолда тасвирлаганлар. Унинг маст сатирлар\*\* ва фавнлар\*\*\* тўдаларининг қуршовада юнон шаҳри Фивага тантанали вазиятда кириб бориши ҳақидаги ҳикоя Уйғош даврида катта шухрат қозонган эди. Дон Кихот худди шу ҳикояга ишора қилган.

<sup>26</sup>Жиневра — афсонавий инглиз қироли Артурнинг рафиқаси, ўрта асрдаги кўп афсона ва романларнинг қаҳрамони.

<sup>27</sup>Дон Кихот тилга олган қаҳрамонларнинг номлари, шунингдек, турли-туман қабила ва жойларнинг отларини у қисман рицарлик романларида, қисман ўз замонасига мансуб бўлган тарихий ва географик асарлардан олган.

<sup>28</sup>Афсонавий инглиз қироли Артурнинг сафдошларини Тегарак столрицарлари деб аташган, чунки улар қирол саройидаги зиёфат залига ўриш тилган тегарак стол атрофига йиғилишар эди. Бу рицарлар (Тристан, Ланселот ва бошқалар)нинг зўр муваффақиятлари «Артур туркуми»га кирган қатор романларда ёритилган.

\* XIII аср бошларида католик черкови томонидан тузилган ва черков душманларини бераҳи суратда таъқиб этган суд-полиция ташкилоти.

\*\* Юнон мифологиясида — май ва айи-ишрат худосининг эчки шаклида бўлган фодошабоқ ҳамроҳи.

\*\*\* Қадимги Рим мифологиясида — ўрмон илоҳи.

<sup>29</sup>Қадимги яҳудийларнинг уч афсонавий раҳнамолари — исо Навин, ҳазрати Довуд, Иуда Маккавей; қадимги маъжусийлар замонининг уч қахрамони — Искандар Румий, Гектор Троянский, римлик саркарда Юлий Цезарь; уч христиан — Англия қироли Артур, Буюк Карл ва салб юришларининг энг машҳур йўлбошчиларидан бири — Готфрид Бульонскийлар ўрта асрда Ш у х р а т л и Т ў қ қ и з Э р деб ҳисобланган.

<sup>30</sup> М а р с — қадимги римликларнинг уруш худоси.

<sup>31</sup> Е т т и о ғ а й н и — бу ерда гап етти оғайни — Катта Айиқ юлдузлари тўдаси ҳақида кетаётгир. Унинг осмонда турган ҳолатига қараб вақтни таҳминан белгиласа бўлади.

<sup>32</sup> Ю н о н л а р т ў с т ў п о л о н н и Е л е н а т у ф а й л и қ и л и ш г а н ... Қадимги юнон ривоятларига кўра, Троя подшоҳи Приамнинг ўгли Парис Спарта подшоҳи Менелайнинг хотини гўзал Еленани ўғирлаб кетади. Ҳақоратланган Менелай ёрдам сўраб ўз қавм қабилаларига мурожаат қилади. Юнонлар унга ён босишади ва Трояга юриш бошлашади. Трояни қамал қилиш бир неча йилга чўзилади ва ниҳоят шаҳар вайрон қилинади. Шу уруш тарихи «Илиада» ва «Одиссея» асарларининг мазмунини ташкил этади.

<sup>33</sup> С у э л ь д о — бир сўмга яқин бўлган танга. Эски испан қонуни оқсуякларга уларни ҳақорат қилган кишилардан беш юз суэльдогоча жарима ундириб олиш ҳуқуқини берган.

<sup>34</sup> Г а л е р л а р — Франциядагидек Испанияда ҳам каторга ишларига ҳукм қилинган айбдорлар қироллик кемаларида — галерларда эшкакчи бўлиб жазо муддатини ўтар эдилар. Галерлардаги турмуш шароити ниҳоятда оғир бўларди. Бандиликдаги асоратли иш, қатиқ тан жазоси, ёвгон овқат, биқик, ифлос хона — ҳаммаси галерларни чинакам дўзахга айлантирган эди.

<sup>35</sup> Т о р м е с л и к Л а с а р и л ь о — номаълум авторнинг 1554 йилда босилиб чиққан повести. Кичкинтой жулдирвоқи Ласарильонинг саргузаштларини соддагина ҳикоя қилиш баҳонасида китобда ўша даврдаги испан ҳаёти ўткир сатира остига олинади. Испанияда бу повесть кенг тарқалади ва «Фирибгарлик-саргузашт романи»га асос солади.

<sup>36</sup> А к а - у к а М а к к а в е й л а р — яҳудий халқининг ўз мустақиллиги учун Сурияга қарши курашган даврида таъриқ оятларида мақталган йўлбошчилари.

<sup>37</sup> К а с т о р в а П о л л у к с — Қадимги юнон эътиқоди бўйича ака-ука эгизаклар, худо Зевс ва гўзал Леданинг болалари. Қадимгилар уларни оғайини муҳаббати ва ҳарбий шон-шухратда вафодор бўлишнинг тимсоли деб ҳисоблашган.

<sup>38</sup> У л и с с — О д и с с е й — Афсонавий Итако оролининг шоҳи, Троя урушининг қатнашчиси. Гомер поэмаларида у ўзининг ақл-идроқи, зийраклиги ва бурролиги билан «уддабурро» деб ном олган.

<sup>39</sup> Э н е й — Виргилийнинг «Эней» поэмасида Эней Трояга ўт кетиб, ҳалокатга учраган пайғида ўзининг кекса отаси Анхизни қутқариб қолади. У хавфхатарни писанд қилмай, Анхизни қўлида кўтариб кема ёнига элтади. Унда тирик қолган трояликлар Троя соҳилларидан сузиб кетдилар.

<sup>40</sup> Ш и д д а т л и Р о л а н д — Уйғониш давридаги италиялик шоир Ариостонинг (1474—1533) машҳур поэмасининг қахрамони. Анжелика — Роланднинг кўнглини банд этган маъшукаси. У шу аёлни деб поэмада тасвирланган жамики саргузашт ва қахрамонликларни қилган.

<sup>41</sup> П е з о — баҳоси икки сўмлик олтин пулга яқин турган испан тангаси.

<sup>42</sup> Я л а н г о ё қ к а р м е л и т л а р — Кармелит орденининг роҳиблари. У XII асрда Фаластинда ташкил топиб, бутун Европа бўйлаб ўз мазҳабини кенг ташвиқ эта бошлаган. Камтарликда ибрат кўрсатишни истаган бу бадавлат орденининг роҳиблари одатда яланг оёқ юришган.

<sup>43</sup> А р р о б а — ўрта ҳисобда ўн икки литрга тенг бўлган суяқлик ўлчови.

<sup>44</sup> С е р в а н т е с д о н К и х о т т и л и д а н д е н г и ж а н г и н и н г даҳшатларини тасвирлар экан, Лепантодаги (1571) ўзи қатнашган машҳур жангни беихтиёр эслайди. Шу жангда Сервантес кўрсатган фидокорона мардлик ва жасорат ҳужжатлардан маълум.

<sup>45</sup> Ф е б ч о қ қ и р н и м ф а н и р а ш к к и л а р д и ... Ф е б (Аполлон) —



қадимги юнонларда ёруғлик, поэзия ва музыка худоси. Дон Кихот Аполлон ва Дафна тўғрисидаги афсонани назарда тутган. Аполлон Фессалия ноҳиссида тентираб юриб, дарёлар худоси Пеней билан Ер худосининг қизин Нимфа юнонлар мифологиясида табиатнинг турли-туман кучларини ифода этувчи иккинчи даражали худо — Дафнани севиб қолади. Бироқ Дафна ундан Лея киши исмли ўсмирни афзал кўради. Ғазаб ва рашк ўтида ёнган худо Нимфини доимо назорат-таъқиб қилади. Бир сафар Феб Дафнани қувиб ётиб олади ва қизни энди тутмоқчи бўлганида шу заҳоти Нимфанинг онаси унинг оёғи остидаги ерни ёриб юборади. Дафна ғойиб бўлади, у ердан дафна дарахтчаси ўсиб чиқади.

<sup>46</sup> Аграманте қароргоҳи. Аграманте Ариостонинг «Шиддатли Роланд» поэмасидаги қахрамонлардан бири. Аграманте Париж остонасида қароргоҳ куриб турган пайтда унинг қўшинида ўзаро қаттиқ низо ва жанжаллар чиқади. Оқибатда иш шу даражага етиб борадики, ким ким билан ва нима учун урушаётганини ҳам фарқ қилмай қолади.

<sup>47</sup> Қирол и ч а т у ф л и с и — қиролнинг уйланиши муносабати билан аҳолидан олинадиган маҳсул солиқ. Солиқнинг бундай галати ном билан айтилишига сабаб ўша пайтларда Испанияда пўкак тумшукли туфлиларни фақат турмушга чиққан хотинларгина кийишган. Халқ эса қиролчицага қимматбаҳо туфли олиб бориш вақти келипти деб гап юритган.

<sup>48</sup> С е х р г а р З о р о а с т р — қадимги форслар динининг афсонавий асосчиси. Зороастр тағлимига кўра икки худо — яхшилик (Ормузд) ва ёмонлик (Ариман) худолари дунёни қўлга киритиш учун кураш олиб борадилар. Дунё ҳаёти шу кураш асосида ташкил топган. Ўрта асрларда ва ундан кейин ҳам Зороастрни қора ва оқ сеҳр кучлари ҳамда бошқа ҳар қандай жодугарлик илму амалларининг асосчиси деб ҳисоблашган.

<sup>49</sup> С ъ е с т а — Европанинг жанубий мамлакатларида чошгоҳдан кейинги дам олиш пайти.

<sup>50</sup> Р о л а н д н и н г б у р г у с и. Буюк Карлнинг афсонавий сафдоши палатин Роланднинг сеҳрли бурғуси — «Олифант» бўлган. Бу бурғунинг товуши юз миляб масофага етиб борган. Ронсевал дарасида француз арьбергари душмандан енгилла бошлаганда, Роланддан сафдошлари ўз Олифантини чалиб, асосий куч билан қўшин олдида кетаётган Буюк Карлни ёрдамга чакиришни илтимос қилишади. Бироқ Роланд анча вақтгача бурғусини чалмайди. Нихоят унинг отрядидоғилардан деярли ҳеч ким қолмайди. Унинг ажойиб қиличи Дюрандаль ҳам синади. Ана шундагина у бурғунини чалади. Бироқ у кечиккан, фурсат ўтган эди, Роланд ўзи ҳам тенгсиз жангда ҳалок бўлади.

<sup>51</sup> П е д р о Б а р б а в а Г у т е р р е К и х а д а — булар кастиль рицарлари бўлиб, 1435 йилда ўз машуқларини шарафли мақсадида Францияга — у ердаги рицарлар билан курашиш учун йўлга чиқишган.

<sup>52</sup> Л е о н л и к р и ц а р ы С у э р о К и н њ о н с н и н г т у р н и р и 1434 йилда бўлиб ўтган. Киньонес ўзининг ўнтакча ўртоқлари билан ўттиз кун мобайнида Испания, Италия, Германия ва Франциядан келган олтмиш рицарга қарши голибона олишган.

<sup>53</sup> Н а в а р р р и ц а р и Л у и с е д е Ф а л ь с е с билан кастиль рицари Гонсало де Гусманнинг яккама-якка олишуви 1428 йилда Вальядолидада бўлиб ўтган.

<sup>54</sup> С е р в а н т е с р о м а н и н г б и р и н ч и т о м и ў т т и з и н ч и б о б д а т а с в и р л а н г а н д о н К и х о т н и н г у й г а қ а й т и ш и б и л а н т у г а й д и. Бу биринчи том 1605 йилда босилиб чиқади ва китобхонларга жуда манзур бўлади. У Испанияда бир неча марта қайта босилади ва француз ҳамда инглиз тилларида таржима қилинади. Хуллас, Ғамгин Қиёфа рицар образи бутун Европага донг таратади. Сервантес дон Кихотнинг иккинчи қисмини ёзишга киришар экан, бундан усталик билан фойдаланиш зарурлигини фикр қилди. Иккинчи томда энди ламачлик дон Кихот номаълум идальго эмас, балки ҳар бир саводхон кишига яхши таниш бўлган, бутун Испанияда донг таратган телба сифатида танилади. Бу эса Сервантесга романга бир қатор жуда қизиқ эпизодларни кириштириш имконини беради.

<sup>55</sup> Л и к у р г — қадимги Спартанинг (эрамизгача бўлган IX аср) машҳур қонушуноси. Ривоятларга қараганда мустаҳкам Спарта давлати тузумининг қарор топишига асос солган ва унинг қонуналарини яратган ҳам Ликург бўлган.

<sup>56</sup> Солон — машхур Афина файласуфи, эрамизгача бўлган VII—VI асрларнинг қонуншуноси ва шоири.

<sup>57</sup> Юпитер (Зевс) — қадимги юнон ва римликларнинг эътиқодларига кўра осмон худоси, худодлар ва одамларнинг ҳоқими. Юпитер отаси Сатурн ва укалари баҳайбат паҳлавонлар билан шиддатли жангдан сўнг осмону замин устидан ҳукмронлик қилишни қўлга олган. Улар устидан ҳукмронликни қўлга киритгач, у осмон билан ерни ўзига қолдириб денгизни Нептунга (Посейдонга), дўзахни — Плутонга берган.

<sup>58</sup> Алякальд — бир йиллик муддатга сайланган шаҳар ҳоқими ёки қишлоқ оқсоқоли; шунингдек, судьялик вазифасини ҳам бажариб келган.

<sup>59</sup> Бакалавр — университетни тамомлаганда бериладиган биринчи илмий унвон.

<sup>60</sup> Сервантес «Дон Кихот»даги автор чекинишларида китобхон билан ҳазиллашмоқчи бўлиб, ўз китобини мавр Бененчели ёзган асар дейди.

<sup>61</sup> Мафусил — тавротдаги патриарх, унинг узок яшаши мақол бўлиб қолган.

<sup>62</sup> Карраско дон Кихотга Сарагоссага турнирга боришни маслаҳат беради. XVI асрнинг охири ва XVII асрнинг бошларида, яъни Сервантес замонасида Испанияда рицарлик турнирлари ҳали ўтиб турар эди, 1599 йилда Валенсияда, 1602 йилда Торо, Самор ва Вальядолидада ажойиб турнир бўлиб ўтади.

<sup>63</sup> Горацій ўзини Тибрга ташлади. — Публий Горацій Коклес — афсонавий Рим қаҳрамони. Эрамиздан аввалги 507 йилда этрусклар Римга ҳужум қилишганда у Тибр дарёси кўпригидан душманни шаҳарга ўтазмасдан, бир ўзи узок муддат уни ҳимоя қилиб, шаҳарни сақлаб қолади. Ниҳоят, римликлар Гораційнинг орка томонидаги кўприк пештоғини бузишга муяссар бўлишади. Шундан сўнггина Горацій ўз постини қолдиришга қарор қилади, ўзини дарёга отади, душманинг дўлдек ёғилиб турган тош ва камон ўқ-найзаларидан яраланиб, аранг қирғоққача етиб олади. Гораційнинг номини шон-шухратга буркаган бу қаҳрамонлиги учун олиҳиммат римликлар тирик чоғида унга ҳайкал ўрнатишади.

<sup>64</sup> Муций ўз қўлини куйдиради — ривоятларга кўра, этрусклар қироли Порсена Римни қуршаб олганда Рим сенати Кай Муций деган жангчини қиролни ўлдириш топшириғи билан душман қароргоҳига юборади. Муций янглишиб қирол ўрнига аллақайси мирзасини ўлдириб қўяди. Уни ушлаб олиб, қирол қошига келтиришади, азоблаш ва осиб ўлдириш билан кўрқитишади. Ҳеч нарсадан кўрқмаслигини исбот қилиш учун Муций ўнг қўлини қурбонгоҳ оловига тутади ва тикка боқиб куйишини кузатади. Бу кўз кўриб қулоқ эшитмаган мардликдан ҳайратда қолган Порсена Муцийни қўйиб юборади. нинг, у юз нафар римлик йигитлар қиролни ўлдириш учун қасам ичишган, деган сўздан кўрққан Порсена Рим билан сулҳ тузиш ва қуршовни бекор қилишга зудлик билан киришади. Сенат Муцийга қатга ер майдони ҳада қилади. Шу қаҳрамонликдан кейин уни Сцевола («чапақай») деб атай бошлаганлар.

<sup>65</sup> Цезарь Рубикондан ўтди — Рубикон Италиянинг Шимолидаги Адриатик денгизга қуйиладиган кичик дарё. Қадим замонларда у Италия билан Италия Галлияси ўртасида чегара бўлиб хизмат қилган. Бирор саркарда Рим сенатининг рухсатисиз бу дарёдан кечиб ўтолмаган. Биргина Юлий Цезарь бу тўқикни бузишга журъат этган. Цезарнинг ҳаддан зиёд шухратидан ташвишланган сенат уни Галлия легионларига қўмондонлик қилишдан четлатмоқчи бўлади, шунда у кичкина бир отряд билан Италияга шошилади. Цезарь Рубиконга яқинлашгач, бир дамгина тўхтаб ўйлаб қолади. Рубикон дарёсидан ўтиш Помпей қўмондонлиги остидаги катта қўшинга таянган сенатга қарши уруш эълон қилишни биддирарди. Галлияга қайтиш эса, сенат ихтиёрига бўйсунуш деган гап эди. Цезарь тезда бир қарорга келади: у Рубикон дарёсини кечиб ўтиб, Римга томон йўл олади. Бу ақлга сиғмайдиган дадил ташаббус муваффақиятли тугайди. Барча қўшинлар унинг томонига ўтади ва у Римга тантанавор кириб боради. Италиянинг ҳоқими мутлағ бўлиб қолади.

<sup>66</sup> Геркулеснинг ўғай онаси — Геркулес — Зевс ва Алкменанинг ўғли, қадимги юнон ривоятларининг энг машхур қаҳрамонларидан бири. Геркулес жисмонан кучлилиги ва мардлиги билан ажралиб турарди. Сервантес унинг ўғай онаси ҳақида сўзлар экан, афтидан Ливия маликаси Омфалани

назарда тутади. Малика уни севиб қолган Геркулесни қатор хатарли ва уни камситадиган ишларни бажаришга мажбур қилади.

<sup>87</sup> Баҳайбат Хиральда — зафар нишонаси сифатида Севилья ибодатхонаси бош минорасига ўрнатилган катта байроқ.

<sup>68</sup> Гисандонинг тошбуқалари — Мадрид яқинидаги Гисандо қишлоғида тошдан беўхшов йўнилган бешта катта ҳайкал. Уларни ким, қачон ясагани номаълум. Сервантес замонасида бу ҳайкаллар Испаниянинг диққатга сазовор ёдгорликларидан ҳисобланарди.

<sup>69</sup> Кабра жарлиги — Кабра жарлиги Кордова яқинида бўлиб, унинг чуқурлиги юз эллик метрга яқин келади. Кабра жарлиги илгарии вақтларда теварак-атрофида яшовчи аҳолига хурофий даҳшат солган.

<sup>70</sup> Манна — кўпгина Урта-Ер денгизи дарахтлари, айниқса терак ва толларнинг пўстлоқларидан чиқадиган чучук ва ҳидли шарбат. Манна қурий бошлагач, дарахт пўстлоғида доғ ва оппоқ куйилма қолдиради.

<sup>71</sup> Монтесинос ғори — Ламанч яқинида. Сервантес ғорга кираваришни анча аниқ тасвирлаган.

<sup>72</sup> Полидор Виргилий — XV асрдаги итальян олими. Унинг «Ихтирочилар тўғрисида» номли асари ўз даврида машҳур бўлган. Сервантес Полидор китобига қўшимча китоб ёзаётган билимдон талаба шахси орқали схоластика таъбиридан ханузгача қутулмаган ўша даврда университетда ўқитиладиган фанлар устидан заҳархандалик билан кулади. Сервантес бу фанларга умрбод салбий муносабатда бўлади. У ҳеч қачон бефаҳм «бачканалар» устидан кулиш фурсатини бекор кетказмасди. Улар эса, ўз навбатида, Сервантесга ғазабдан нафратланиб жавоб қайтаришар, университет дипломига эга бўлмаган киши қандай қилиб адабиётга киришга журъат этди дейишиб, такаббурлик билан таажжубланишар эди.

<sup>73</sup> Монтесинос, Дурандарте — афсонавий испан рицарлари. Улар гўё Буюк Карлнинг Испанияга юришида қатнашганлар. Сервантес юрак кесиб олиш эпизодини қадимий романслардан олган.

<sup>74</sup> Мерлин — қадимги англиз ривоятларига кўра афсонавий қаҳрамон, қаромат қила оладиган донишманд сеҳргар. Рицарлик романларида одатда у қудратли сеҳргар сифатида қатнашади.

<sup>75</sup> Гвадиана — Юқори Гвадиана дарёси йўл-йўлакай бир неча бор ер остида йўқолиб кетади. Бу ҳол жуда кўп афсоналарни келтириб чиқарган. Сервантес дон Кихотнинг ғорга кириши тўғрисидаги ҳикояда қисман ўша афсоналардан фойдаланган.

<sup>76</sup> Герцог Альба (1508—1582) — саркарда ва испан қироли Филипп Пнинг ишончли киши. Альба Нидерландия вилоятларидаги қўзғолонларни бостиришда ва Португалияни босиб олишда ўзининг ваҳшиёна шафқатсизлиги билан донг чиқаради. Унинг номини эшитган халқ даҳшатга тушарди.

<sup>77</sup> Испаниядаги қўғирчоқ театри ханузгача равнақ топиб келмоқда. XIX асрнинг 70-йилларида ҳам Севилья, Валенсия ва бошқа шаҳарларнинг саҳналарида «Гайферос ва Мелисендранинг қизиқарли тарихи» кўрсатилар эди. Томошабинлар уни завқ билан томоша қилишарди. Бу воқеа кўп романсларда куйланган. Романсларда Гайферосни Буюк Карлнинг набираси, машҳур Роланднинг темирчиси, Мелисендрани эса, императорнинг қизи деб аташади. Унаштириб қўйилгандан кейин кўп ўтмай Мелисендрани маврлар Испанияга олиб қочишади. Гайферос бир қатор саргузаштлардан сўнггина ниҳоят уни асирликдан озод қилишга муваффақ бўлади.

<sup>78</sup> Рехидор — қишлоқ ёки шаҳар бошқармасининг аъзоси.

<sup>79</sup> Птолемей — эрамининг II асрида яшаган машҳур юнон астрономи, математиги ва географи. Тургун Ер самовий jismlar марказида жойлашган деган космогоник системаси, яъни оламнинг пайдо бўлиши ҳақидаги таълимоти Коперник ва Галилейнинг гениал ихтироларига қадар ҳаммага маъқул таълимот бўлган.

<sup>80</sup> Кава — қадимий испан афсоналаридан бирида VIII асрда Испаниянинг араблар томонидан забт этилиши тўғрисида шундай ҳикоя қилинади. Қудратли граф Юлианнынги Кава исмли гўзал қизи бўлган экан. Юлиан қизини ниҳоятда севар ва уни кўз қорачиғидек асар, эъвозлар экан. Бирок бу бахтсиз отанинги тўла ишончига кириб олган қирол Родриго гўзал Каванинги номусини бузади.

Родригодан ўч олиш учун граф Юлиан арабларни Испанияга чақиради. Родриго арабларга қарши жанг қилади, лекин бутунлай тор-мор бўлади, ўзи ҳам жангда ўлади, Юлиан кизи учун ўч олганидан хурсанд бўлиши керак эди. Аммо араблар Испанияда қолишади ва ярим оролни аста-секин бутунлай ўзларига қаратиб олишади. Шундай қилиб, дон Кихот Елена билан Кавани бир-бирига таққослар экан, у Еленани ўғирлашганда Троя хароб бўлганидек, Кавани ҳақоратлагани туфайли Испания арабларнинг босқинига учраганини айтмоқчи бўлади.

<sup>81</sup> О ш х о н а п и к а р о л а р и — феодал саройларнинг ошхоналарига суқилиб кириб олган ва мулозимлар ҳамда хизматкорлардан қолган сарқит овқатлар билан кун кечирувчи ювиндихўрлар. Пикаро сўзининг аниқ маъноси — дайди, айёр, тиланчи демакдир.

<sup>82</sup> В а м б а (672—680)— готлар сулоласидан чиққан испан қироли. Ривоятларга кўра у деҳқон табақасидан чиққан.

<sup>83</sup> Е л и с е й д а л а л а р и — қадимгиларнинг эътиқодига кўра бахтиёрлар майдони, қахрамонлар ўлгандан сўнг руҳи яшайдиган жой.

<sup>84</sup> Э с п л а н д и а н . Бу роман «Амадис Галльский» асарининг бевосита давомидир. Эспландиан — Амадис ва Ориананинг ўғли. Эспландиан рицарлик унвонини олгач, саргузашт излаб кетади. У жасоратлар кўрсатадиган асосий майдон Шарқдир. У бу ерда турклар ва сарацинлар билан курашади, якка ўзи улар устидан мислсиз ғалабалар қозонади, шаҳарларни забт этади, ёвуз жодугар ва сеҳргарларнинг хийлау найрангларини чиппакка чиқаради, ниҳоят, Истамбул императори бўлиб қолади.

<sup>85</sup> Табақаланиш, насл-насаб бидъати дворянларга бирор ҳунар билан шуғулланишни ман қиларди. Фақат қушларга қафас ва тиш тозалагич ясашигина творянинг шаънига доғ туширмайдиган машғулот саналарди.

<sup>86</sup> А л ь г в а с и л — полиция назоратчиси, жамоатчилик орасида осойишталик, тартиб ва интизомни сақловчи нозир.

<sup>87</sup> Б е л л е р о ф о н т — юнон мифологиясининг қахрамонларидан бири, Коринф қироли Главкнинг ўғли. Беллерофонт тасодифан акасини ўлдириб қўйиб, Коринфдан чиқиб кетишга мажбур бўлади. У Аргосга, подшо Претос ҳузурига жўнайди. Подшо уни жуда яхши қабул қилади, бироқ подшонинг хотини малика Стенобея Беллерофонт гўё уни йўлдан оздирмоқчи бўлганини эрига арз қилади. Шунда Претос меҳмонни ўзи жазолашни истамай, уни қариндоши подшо Иобатей ҳузурига жўнатади. Унинг қўлига Иобатейга топшириш учун мактуб беради. Сирли ҳарфлар билан ёзилган хатда Претос Беллерофонтни ўлдиришни илтимос қилади. Иобатей хатни олиб, Беллерофонтни даҳшатли маҳлуқ Химера билан олишишга буюради, у бу курашда йигит ҳалок бўлади деб ўйлаган эди. Бироқ Афина худосининг ёрдами билан, яъни Беллерофонтга тортиқ қилган сеҳрли от Пегас кўмагида баҳайбат маҳлуқни енгади. Бундан кейин ҳам у шунчалик кўп ажойиб қахрамонликлар кўрсатадики, қойил қолган Иобатей у билан ярашибгина қолмай, балки унга қизини бериб, ўзига куёв қилади.

<sup>88</sup> Қуёш худоси Гелиос қадимги юнон ривоятларига кўра ўз ўғли Фаэтоннинг илтимоси билан унга қуёш ғилдирагини айлантиришни ишониб топширади. Лекин заиф ва тажрибасиз бола йўлдан тойиб, бутун оламни ёндириб юборишига оз қолади. Дунёни сақлаб қолиш учун худолар ҳокими Зевс чақмоқ зарби билан бечора йигитчани уради, Гелиос бўлса қуёшни яна тўғри йўлга солиб юборади.

<sup>89</sup> Чўпонларнинг афсоналарида кўпинча юлдузлар осмонда фаришталар боқиб юрган эчкилар ёки қўйлар суруви қилиб ифода этиларди.

<sup>90</sup> Д а с т л а б к и т а о м — м е в а — Сервантес даврида яхши врачлар овқатланишни мевалардан бошлашни маслаҳат берганлар.

<sup>91</sup> Г и п п о к р а т (460—364, эрамизга қадар)— қадимги замоннинг буюк врач, уни «медицинанинг отаси» деб аташган. Уйғониш даврида ҳам Гиппократнинг обрўси ниҳоятда баланд бўлган ва докторлар ундан далил келтиришни яхши қўришарди. Бу ўринда доктор Санчони шунчаки аҳмоқ қилади: Гиппократ ҳеч қачон каклик ҳақида гапирмаган.

М а в р л а р н и қ у в и ш — Филипп II (1556—1598) ва унинг валиаҳди Филипп III (1598—1621) даврида маврларни Испаниядан қувиш ниҳоясига етказилган. Бу қувгин оқсуюк ҳукмронлар томонидан ҳам, инквизициячилар

томонидан ҳам қулоқ эшитмаган ёвузликлар билан амалга оширилган. Сервантес худди ўз романи «Дон Кихот»ни ёзаётган вақтда, яъни 1609 –1610 йилларда маврлар Ламанчдан зўрлаб чиқарилаётган эди. Африкага кўчиб борган маврлар бир неча майда давлатларни ташкил қилишади. Кейинчалик уларни Франция, Италия ва бошқа Европа давлатлари босиб олиб, ўзларининг мустамликаларига айлантиришади.

<sup>93</sup>Қароқчи Роке Гинарт ҳақиқатан ҳам Сервантес замонасида яшган. У ўғрилиқ ва босқинчиликда ўзининг довжораклиги, даҳшати билан бутун Испанияга доврўқ солган.

<sup>94</sup>Менинг Троям шу ерда бўлган эди — юнонлар томонидан Трояни хароб қилиш тўғрисидаги ривоятлар таъбири остида **тўқилган ҳикматли сўз** бўлиб, бу ерда мен тамомила барбод бўлдим, деган маънони билдиради.

## МУНДАРИЖА

Сервантес ва унинг «Дон Кихот» романи ҳақида. <i>Н. Боқий</i> .....	3
<i>I боб.</i> Ламанчлик дон Кихотнинг кимлиги.....	10
<i>II боб.</i> Дон Кихотнинг биринчи бор ўз мулки-давлатидан узоқлашиб сафарга чиққани.....	14
<i>III боб.</i> Дон Кихотнинг рицарликка ўтиши.....	17
<i>IV боб.</i> Рицаримизнинг меҳмонхонадан жўнаб кетгандан кейинги кечирган саргузаштлари.....	22
<i>V боб.</i> Рицаримизнинг уйга қайтиб келгани.....	26
<i>VI боб.</i> Ажойиб рицаримиз ламанчлик дон Кихотнинг иккинчи сафари...	32
<i>VII боб.</i> Шу маҳалгача кўз кўриб, қулоқ эшитмаган шамол тегирмонларига қарши даҳшатли жангда шавкатли дон Кихотнинг ғалаба қозонгани...	34
<i>VIII боб.</i> Қўрқмас бискайлик билан жасур ламанчлик ўртасидаги машҳур жанг.....	37
<i>IX боб.</i> Дон Кихот билан Санчо Панса ўртасидаги антиқа суҳбат.....	40
<i>X боб.</i> Дон Кихотнинг янгуэсслик отбоқарлар билан бўлган машъум учрашуви.....	45
<i>XI боб.</i> Рицарь қалъа деб ўйлаган карвонсаройда дон Кихот ва унинг содиқ яроқбардори бошига тушган савдолар.....	50
<i>XII боб.</i> Карвонсаройни қалъа деб билиб, ўз бошига бало орттирган ботир рицарь дон Кихот ва унинг содиқ яроқбардорининг тортган беҳисоб уқубатлари.....	54
<i>XIII боб.</i> Дон Кихотнинг қўйлар суруви билан қилган жанги.....	59
<i>XIV боб.</i> Санчо Панса билан унинг хўжайини ўртасидаги оқилона суҳбат ва ундан кейин мурда олиб кетаётганлар билан тўқнашув.....	67
<i>XV боб.</i> Ламанчлик рицарь дон Кихотнинг кўз кўриб, қулоқ эшитмаган қаҳрамонлиги.....	72
<i>XVI боб.</i> Буюк саргузашт ва Мамбриннинг бебаҳо дубулгасини қўлга киритиш ҳамда рицарь билан унинг яроқбардори ўртасидаги суҳбат.....	81
<i>XVII боб.</i> Зўрлаб олиб кетилаётган кўпгина бахтсизларга дон Кихотнинг озодлик бергани.....	89
<i>XVIII боб.</i> Хинес де Пасамонтенинг Санчо Пансанинг эшагини қандай қилиб ўғирлаб кетгани.....	96
<i>XIX боб.</i> Дон Кихотнинг Маъюс Гўзалга тақлидан тавба қилишни ўз зиммасига олгани ва Дульсинея Тобосская ҳузурига чопар юборишга аҳд қилгани.....	98
<i>XX боб.</i> Дон Кихотнинг Сиерра Моренада кўрсатган янги жасоратлари ҳамда Санчо Пансага нима бўлгани.....	109
<i>XXI боб.</i> Дон Кихотнинг ўзини ўзи мажбур этган тавба-газаррудан қандай халос бўлгани.....	115
<i>XXII боб.</i> Соҳибжамол Доротеянинг донолиги ва Санчо Пансанинг эшаги топилгани.....	124
<i>XXIII боб.</i> Рицарнинг ўз яроқбардори билан суҳбати ва Андрес исми бола билан учрашгани.....	132
<i>XXIV боб.</i> Дон Кихотнинг қизил вино мешлари билан жанг қилгани.....	137
<i>XXV боб.</i> Дон Кихотнинг ҳарбий иш ва илм-фан ҳақидаги антиқа фикрлари.....	144
<i>XXVI боб.</i> Карвонсаройда юз берган ғаройиб ҳодиса.....	151

XXVII боб. Карвонсаройда юз берган ғалати ҳодисаларнинг давоми .....	157
XXVIII боб. Ламанчлик дон Кихотнинг ғалати усул билан сеҳрлангани...	165
XXIX боб. Санчо Панса билан унинг хўжайини ўртасидаги оқиллона суҳбат, шунингдек дон Кихотнинг канолик билан гоят оқиллона баҳси .....	173
XXX боб. Чўпон билан учрашув, черков маросими билан боғлиқ бўлган саргузашт ҳамда дон Кихотнинг уйига қайтиши .....	181
XXXI боб. Дон Кихот бетоблигида руҳоний, сартарош ва унинг орасида бўлиб ўтган ҳангомалар .....	188
XXXII боб. Санчо Панса билан дон Кихотнинг жиани ва экономка ўртасидаги можаро .....	196
XXXIII боб. Дон Кихот, Санчо Панса ва баккалавр Самсон Карраско ўртасида бўлиб ўтган суҳбат .....	200
XXXIV боб. Санчо Панса ва унинг хотини Тереса Панса ўртасида бўлиб ўтган оқиллона ва ғалати суҳбатлар .....	206
XXXV боб. Дон Кихот, унинг жиани ва экономка ўртасида бўлиб ўтган воқеа, яъни бутун қиссанинг энг муҳим бобларидан бири .....	210
XXXVI боб. Дон Кихот билан унинг яроқбардори ўртасида нима ҳодиса бўлгани ва ҳайратда қолдирувчи бошқа воқеалар .....	213
XXXVII боб. Санчонинг ҳйла-найранг йўли билан сенъора Дульсинеяни аврагани .....	218
XXXVIII боб. Дон Кихотнинг жасур рицарь билан ғалати учрашуви ва икки яроқбардорнинг ширин суҳбати .....	230
XXXIX боб. Номаълум рицарь ва унинг яроқбардорининг аслида кимлар эканлиги аниқлангани .....	239
XL боб. Дон Кихотнинг шерлар билан бўлган саргузаштда кўрсатган мислсиз қаҳрамонликлари .....	248
XLI боб. Ламанч вилоятининг қоқ киндигидаги Монтеинос ғорида содир бўлган антиқа саргузаштлар .....	254
XLII боб. Икки дўстнинг йўқолган эшакни излашгани .....	265
XLIII боб. Сеҳрланган қайиқдаги ғаройиб саргузашт .....	273
XLIV боб. Дон Кихотнинг гўзал овчи аёл билан учрашгани .....	277
XLV боб. Дон Кихот ва яроқбардори герцог қасрида қандай кутиб олганлари .....	281
XLVI боб. Дульсинея Тобосскаяни сеҳрдан озод қилиш йўлининг қандай топилгани .....	299
XLVII боб. Дуэнья Долорида ёки графиня Трифальдининг ажойиб саргузаштлари, шунингдек Санчонинг ўз хотини Тереса Пансага ёзган мактуби .....	308
XLVIII боб. Дон Кихотнинг оролни бошқаришга жўнаб кетиш олдидан Санчо Пансага қилган панду насихатлари .....	327
XLIX боб. Санчонинг ўз оролига қандай етиб боргани ва уни бошқаришга киришгани .....	334
L боб. Санчо Пансанинг хотини Тереса Пансага герцогиня маҳрамининг қандай қилиб мактуб олиб бориб бергани .....	345
LI боб. Санчонинг Баратария оролидаги ҳукмронлигининг давоми ва губернаторлигининг қайғули тугаши .....	356
LII боб. Санчо Пансанинг ўз хўжайини билан қандай учрашгани ва икковларининг герцог қасрини тарк этганлари .....	366
LIII боб. Дон Кихотнинг Барселона йўлида бошдан кечирган саргузаштлари .....	374
LIV боб. Дон Кихотнинг рицарь Оқ Ойдин билан учрашуви ва шундан кейин юз берган ҳодисалар .....	387
LV боб. Дон Кихот билан Санчо Пансанинг ўз қишлоқларига қайтаётганда йўлда юз берган ҳодисалар .....	392
LVI боб. Дон Кихотнинг ўз юртига қайтгани, шунингдек, бетоб бўлиши, қолдирган васияти ва вафоти .....	402
Сервантес ва унинг романи .....	410
Изоҳлар .....	421

Литературно-художественное издание

Сервантес (Мигель де Сервантес Сааведра)

ДОН КИХОТ ЛАМАНЧСКИЙ

Р о м а н

Переиздание

Художник В. Анухтин

Перевод с издания Детгиза, Ленинград, 1962 г.

Ташкент, издательство литературы и искусства им. Гафура Гуляма

*На узбекском языке*

Адабий-бадий нашр

Сервантес (Мигель де Сервантес Сааведра)

ДОН КИХОТ САРГУЗАШТЛАРИ

Р о м а н

Қайта нашр

Редакторлар *Н. Жўраева* ва *С. Тоҳирова*

Расмлар редактори *А. Кива*

Техн. редактор *Т. Смирнова*

Корректор *Ш. Назарова*

ИБ № 4435

Босмахонага берилди 17.07.89. Босишга рухсат этилди 30.05.90. Формати 60×90<sup>1</sup>/16. Босмахона  
коғози № 2. Мактаб гарнитураси. Юқори босма. Шартли босма л. 27,0+0,37 вкл. Шартли кр.-оттис  
27,62. Нашр. л. 32,6+0,36. вкл. Тиражи 30000. Заказ № 1253. Баҳоси 3 с. Шартнома № 115—89  
Гафур Гулом номидаги Адабиёт ва санъат нашриёти. 700129. Ташкент. Навоий кўчаси, 30

Ўзбекистон ССР Матбуот Давлат комитети «Матбуот» матбаа ишлаб чиқариш бирлашмасининг Бо  
корхонаси. Ташкент —700129. Навоий кўчаси, 30.